

Li Santil hu



Bible in Q'eqchi' (GT:kek:Q'eqchi')

Li Santil hu

Bible in Q'eqchi' (GT:kek:Q'eqchi')

copyright © 2000 Wycliffe Bible Translators, Inc.

Language: Q'eqchi'

Translation by: Wycliffe Bible Translators, Inc.

Q'eqchi' [kek], Guatemala

Copyright Information

© 2000, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Q'eqchi'

© 2000, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files dated 29 Jan 2022
f1b065df-5ef5-5c8a-a273-af2b9aefff55

Contents

SAN MATEO	1
SAN MARCOS	51
SAN LUCAS	82
SAN JUAN	136
HECHOS	175
ROMANOS	224
1 CORINTIOS	247
2 CORINTIOS	270
GÁLATAS	284
EFESIOS	292
FILIPENSES	300
COLOSENSES	306
1 TESALONICENSES	312
2 TESALONICENSES	317
1 TIMOTEO	320
2 TIMOTEO	327
TITO	332
FILEMÓN	335
HEBREOS	337
SANTIAGO	354
1 PEDRO	360
2 PEDRO	367
1 JUAN	371
2 JUAN	377
3 JUAN	378
SAN JUDAS	379
APOCALIPSIS	381

Li Resil li Colba-ib li Quixtz'iba li San Mateo

Lix c'aba'eb lix xe'tonilyucua' li Jesucristo

¹ Sa' li hu a'in tz'ibanbil retalil jo' q'uialeb lix xe' xtonal li Jesucristo. Li Jesucristo ralal xc'ajol li rey David ut ralal xc'ajol ajcui' laj Abraham. ² Laj Abraham, a'an xyucua' laj Isaac. Laj Isaac, a'an xyucua' laj Jacob. Ut laj Jacob, a'an xyucua' laj Judá jo' eb ajcui' li ras ut li ritz'in. ³ Ut laj Judá ut lix Tamar, a'aneb xna' xyucua'eb laj Fares ut laj Zara. Laj Fares, a'an xyucua' laj Esrom. Ut laj Esrom, a'an xyucua' laj Aram. ⁴ Ut laj Aram, a'an xyucua' laj Aminadab. Ut laj Aminadab, a'an xyucua' laj Naasón. Ut laj Naasón, a'an xyucua' laj Salmón. ⁵ Ut laj Salmón ut lix Rahab, a'aneb xna' xyucua' laj Booz. Laj Booz ut lix Rut, a'aneb xna' xyucua' laj Obed. Ut laj Obed, a'an xyucua' laj Isai. ⁶ Ut laj Isai, a'an xyucua' li rey David. Ut li rey David, a'an lix yucua' laj Salomón riq'uin li ixk li quicuan chok' rixakil laj Uriás. ⁷ Ut laj Salomón, a'an xyucua' laj Roboam. Ut laj Roboam, a'an xyucua' laj Abías. Ut laj Abías, a'an xyucua' laj Asa. ⁸ Ut laj Asa, a'an xyucua' laj Josafat. Ut laj Josafat, a'an xyucua' laj Joram. Ut laj Joram, a'an xyucua' laj Uzías. ⁹ Ut laj Uzías, a'an xyucua' laj Jotam. Ut laj Jotam, a'an xyucua' laj Acaz. Ut laj Acaz, a'an xyucua' laj Ezequías. ¹⁰ Ut laj Ezequías, a'an xyucua' laj Manasés. Ut laj Manasés, a'an xyucua' laj Amón. Ut laj Amón, a'an xyucua' laj Josías. ¹¹ Ut laj Josías, a'an xyucua' laj Jeconías jo' eb ajcui' li ritz'in. Eb a'an que'cuan sa' eb li cutan nak eb laj Israel que'chape' ut que'c'ame' aran Babilonia. ¹² Ut nak ac chapbileb chak xbaneb laj Babilonia, laj Jeconías quicuan li ralal. Ut a'an laj Salatiel. Ut laj Salatiel, a'an xyucua' laj Zorobabel. ¹³ Ut laj Zorobabel, a'an xyucua' laj Abiud. Ut laj Abiud, a'an xyucua' laj Eliaquim. Ut laj Eliaquim, a'an xyucua' laj Azor. ¹⁴ Ut laj Azor, a'an xyucua' laj Sadoc. Ut laj Sadoc, a'an xyucua' laj Aquim. Ut laj Aquim, a'an xyucua' laj Eliud. ¹⁵ Ut laj Eliud, a'an xyucua' laj Eleazar. Ut laj Eleazar, a'an xyucua' laj Matán. Ut laj Matán, a'an xyucua' laj Jacob. ¹⁶ Ut laj Jacob, a'an xyucua' laj José, xbelom lix María. Ut lix María, a'an lix na' li Jesús. Ut li Jesús, A'an li Cristo. ¹⁷ Calaju tep li ralal xc'ajol laj Abraham quicuan toj nak quiyo'la laj David. Ac cuan calaju tep li ralal xc'ajol laj David nak que'c'ame' aran Babilonia. Ut chirix chic a'an, quicuan cui'chic calaju tep li ralal xc'ajol chalen toj nak quiyo'la li Cristo.

Li c'aru quic'ulman nak quiyo'la li Cristo

¹⁸ Ut lix yo'lajic li Jesucristo, jo'ca'in nak quicuan: Lix María lix na' li Jesús ac tz'amanbil xban laj José. Toj maji' neque'xlak'ab rib nak lix María quicana chi yaj aj ixk xban xcuanquil li Santil Musik'ej. ¹⁹ Ut xban nak tic xch'ol laj José, li ac xtz'aman re, inc'a' quiraj xc'utbal xxutan lix María. Xraj raj xcanabanquil chi mukmu. ²⁰ Ut yo' chixc'oxlanquil a'in laj José nak jun lix ángel li Kaçua' quixc'utbesi rib chiru sa' xmatc' ut quixye re: —At José, ralalat li rey David, matc'oxlac chixc'ambal lix María chok' acuixakil. A'an xcana chi yaj aj ixk xban xcuanquil li Santil Musik'ej. ²¹ Taçuank jun lix c'ula'al ch'ina telom. Ut Jesús taq'ue chok' xc'aba' xban nak a'an taçolok re lix tenamit sa' lix maqueb, chan. ²² Chixjunil a'an quic'ulman re nak tatz'aklok ru li quixye li profeta Isafas jo' nak quiyehé' re xban li Kaçua'. ²³ A'an a'in li quixye: Jun xka'al toj maji' cuanjenak riq'uin cuink taçuank lix c'ula'al ch'ina telom. Ut Emanuel taq'uehek' chok' xc'aba'. (Is. 7:14)

Chi jalbil ru Emanuel naraj naxye “Li Dios cuan kiq'uin”. ²⁴ Nak qui-aj ru laj José, quixbanu li c'a'ru quiyehe' re xban lix ángel li Kacua' sa' xmatc'. Quixc'am lix María sa' rochoch. ²⁵ Abanan inc'a' quicuan riq'uin toj quiyo'la li xben c'ula'al. Ut Jesús quixq'ue chok' xc'aba'.

2

Eb laj k'e que'cuulac chixsic'bal li Jesús

¹ Nak cuanq chok' rey laj Herodes, li Jesús quiyo'la aran Belén xcuent Judea. Cuanqueb aj k'e que'chal chak sa' releb sak'e ut que'cuulac Jerusalén.

² Que'patz'oc ut que'xye: —¿Bar cuan lix reyeb laj judío xyo'la? Xochal xban nak xkil chak toj sa' releb sak'e li chahim retalil lix yo'lajic ut xochal chixlok'oninquil, chanqueb. ³ Ut nak quirabi a'an, li rey Herodes quisach xch'ol ut qui-oc xc'a'ux jo' ajcui' chixjunileb li cuanqueb Jerusalén. ⁴ Ut laj Herodes quixch'utubeb chixjunil li xbenil aj tij jo' eb ajcui' laj tz'ib sa' li tenamit ut quixpatz' reheb bar tayo'lak li Cristo. ⁵ Ut eb a'an que'chak'oc ut que'xye re: —Aran Belén xcuent Judea xban nak jo'can tz'ibanbil chak xban li profeta. ⁶ Jo'a'in tz'ibanbil sa' li Santil Hu:

Li tenamit Belén, xch'och'eb laj Judá, moco k'axal ca'ch'in ta lix cuanquil sa' xyankeb li xnínkal ru tenamit re Judá xban nak aran taelkjun Acuabej ut a'an taberesink re lin tenamit Israel. (Mi. 5:2)

⁷ Tojo'nak laj Herodes quixbokeb laj k'e sa' mukmu ut quixpatz' reheb jok'e tz'akal quic'utun li chahim. ⁸ Ut nak quixtaklaheb Belén quixye reheb: —Ayukex aran Belén ut q'uehomak ech'ol chixsic'bal toj retal tetau li c'ula'al. Ut nak tetau chak, toleye cue re nak tñxic ajcui' lain ut toxinlok'oni chak, chan. ⁹ Ut nak que'rabi li quixye li rey, eb laj k'e que'coeb. Ut li chahim li que'ril chak sa' releb sak'e yo' chi xic c'amol be chiruheb tojo'nak quixakli sa' xben li na'ajej cuan cui' li c'ula'al. ¹⁰ Ut c'ajo' nak que'saho' sa' xch'oleb chirilbal li chahim nak quixakli sa' xben li na'ajej a'an. ¹¹ Ut nak que'oc sa' li cab, que'xtau li c'ula'al rochben lix María li na'bej. Ut que'xcuik'ib rib chiru li Jesús ut que'xlok'oni. Ut que'xte lix c'ulebaleb ut que'xq'ue lix matan. Ut li matan li que'xq'ue, a'an li oro, li incienso ut li sununquil ban mirra xc'aba'. ¹² Ut que'cutbesic chiruheb xban li Dios sa' xmatq'ueb nak inc'a' chic te'suk'ik riq'uin laj Herodes. Sa' jalan chic be que'xc'am nak que'suk'i sa' xtenamiteb.

Laj José ut lix María que'xc'am li Jesús Egipto re xcolbal chiru laj Herodes

¹³ Ut nak ac xc'oc eb laj k'e, jun x-ángel li Kacua' quixc'ut rib chiru laj José sa' xmatc' ut quixye re: —Cuaclin, c'am li c'ula'al jo' cui' lix na'. Tex-elk arin ut ayukex sa' li tenamit Egipto. Ut aran texcanak toj lain toxinyehok acue. Tex-élelik xban nak laj Herodes oc re chixsic'bal li c'ula'al re xcamsinquil.—

¹⁴ Ut laj José qui-aj ru, quicuacli ut quixc'am li c'ula'al jo' cui' lix na' ut sa' ajcui' li k'o'jyin a'an que'coeb Egipto. ¹⁵ Ut que'cuan aran Egipto toj quicam laj Herodes. A'an quic'ulman jo' quixtz'iba li profeta li quiyehe' re xban li Kacua' nak quixye: Sa' li tenamit Egipto quinbok chak li cualal, chan. (Os. 11:1) ¹⁶ A'ut laj Herodes nak quiril nak quibalak'ic xbaneb laj k'e, k'axal nak quichal xjosk'il. Ut quixtakla xcamsinquil chixjunileb li coc' telom cuanqueb Belén, jo' cui' sa' eb li na'ajej cuanqueb chixc'atk. Que'camsic chixjunileb li coc' telom li toj c'ula'aleb jun xxiq'uc aj ca'cab chihab xban nak quixbir rix c'a'ru li cutan quiyo'la cui' li c'ula'al jo' quiyehe' re xbaneb laj k'e. ¹⁷ Jo'can nak quitz'akloc ru li yebil xban li profeta Jeremías nak quixye chi jo'ca'in:

¹⁸ Qui-abjic li yabac sa' li tenamit Ramá xban li nimla rahil ch'olej, ut yot'ba ch'olej li que'xc'ul. A'an eb li ixk aj Israel nak yoqueb chi yabac chirixeb lix coc'al. Ut inc'a' chic neque raj xc'ojobanquil xch'oleb xban nak ac camenakeb chic lix coc'aleb. (Jer. 31:15)

Que'suk'i cui'chic Nazaret

¹⁹ Ut nak quicam laj Herodes, jun x-ángel li Kaçua' quixc'utbesi rib chiru laj José sa' xmatc' aran Egipto. ²⁰ Ut quixye re: —Cuaclin. C'am li c'ula'al jo' cui' li na'bej ut texxic cui'chic sa' li tenamit Israel xban nak xe'cam li que'ajoc re xcamsinuil li c'ula'al, chan. ²¹ Ut laj José quicuacli, quixc'am li c'ula'al jo' cui' lix na' ut quichal sa' li tenamit Israel. ²² Ut nak quirabi resil nak a' laj Arquelao chic li rey aran Judea rejaj laj Herodes lix yucua', laj José quixucua chi xic aran. Ut nak quic'utbesic chiru sa' xmatc', que'coeb sa' jun na'ajex xcuent Galilea. ²³ Que'chal ut que'cuan sa' jun li tenamit Nazaret xc'aba' xcuent Galilea. A'in quic'ulman jo' que'xye li profeta nak que'xye nak aj Nazaret tixc'aba'in.

3

Laj Juan laj Cubsihom Ha' quixch'olob xyalal chirix li Jesús

¹ Mokon chic quicuulac laj Juan laj Cubsihom Ha' sa' li chaki ch'och' cuan Judea. Yo chixc'olobanuil xyalal chirix lix nimajcual cuanquhal li Dios. Quixye chi jo'ca'in: ²—Chiyot'ek' ech'ol ut chejal ec'a'ux xban nak yo chak chi çhalç li taq'uehek' sa' xcuanquil xban li Dios. Ut a'an chic taçuank xcuanquil sa' xbeneb li ralal xc'ajol. ³ Li profeta Isaias quiatinac chirix laj Juan nak quixye chi jo'ca'in:

A'an tach'olobank xyalal chi cau xyab xcux sa' li chaki ch'och', ut tixye: Yibomak le yu'am ut yo'on cuankex chixc'ulbal li Kaçua' jo' nak neque'xyib li be re xc'ulbal junak li nim xcuanquil, chan. (Is. 40:3)

⁴ Li rak' narocsi laj Juan, a'an yibanbil riq'uin rix li xul camello ut lix c'amal xsa' a'an yal tz'um. Aj sac' naxtzaca riq'uin xya'al sak c'au. ⁵ Yalak bar que'chal chak li que'cuulac chirabinuil li c'a'ru yo chixyebal laj Juan. Nabal que'chal Jerusalén. Nabal que'chal chak Judea ut nabal cui'chic que'chal chak nach' riq'uin li nima' Jordán. ⁶ Que'xxoto xmaqueb ut laj Juan naxcubsihob xha' sa' li nima' Jordán. ⁷ Nak quiril nabaleb xcomoneb laj fariseo ut xcomoneb laj saduceo yoqueb chi cuulac yal re nak te'cubsik xha'eb, quixye reheb: —Laex chanchanex li ral li c'ambolay. ¿Ani xyehoc ere laex nak taruk teçol erib chiru lix josk'il li Dios li tachalk sa' eben? ⁸ Chebanuhak ban li us re nak taç'utunk nak xyot'e' ech'ol ut xejal ec'a'ux. Chanchanakex li che' çhabil li ru naxq'ue. ⁹ Meç'oxla nak inc'a' teç'ul xjosk'il li Dios yal xban nak laex ralal xc'ajol laj Abraham. Lain tixye ere nak li Dios taruk tixyo'obtesi li pec a'in chok' ralal xc'ajol laj Abraham. ¹⁰ Q'uehomak retal xban nak çhalç re li rakba atin sa' eben jo' nak ac cauresinbil li maç re xyoc'bal lix xe' li che'. Ut chixjunil li che' inc'a' çhabil li ru naxq'ue, nayoc'man ut naq'ueman sa' xam. ¹¹ Yal nak lain nincubsi eha' riq'uin ha' retalil nak xyot'e' ech'ol ut xejal ec'a'ux. Abanan çhalç re li k'axal nim xcuanquil. Xban nak k'axal nim xcuanquil chicuu lain, moco inc'ulub ta nak tincuisi lix xab. A'an tixcubsi eha' riq'uin li Santil Musik'ej ut riq'uin xam. ¹² Ac cuan chak sa' ruk' lix c'anjelebal. Ut tarapu ru chi us li riyajil li trigo ut tixch'utub lix trigo sa' lix c'ulebal ut li rix tixc'at sa' li xam li maç jaruj nachup, chan laj Juan.

Quicube xha' li Jesús xban laj Juan

¹³ Ut quicuulac xk'ehil nak li Jesús quichal chak Galilea. Quicuulac riq'uin laj Juan re nak tacubsik xha' xban sa' li nima' Jordán. ¹⁴ Abanan laj Juan inc'a' raj quiraj xcubsinquit xha' ut quixye re: —Maçua' raj lain tincubsink aha'. Laat raj ban tadcubsink inha' lain, chan. ¹⁵ Ut li Jesús quichak'oc ut quixye re: —Us takabanu anakcuan xban nak tento tauxmank chixjunil li c'a'ru naxye li Dios, chan. Tojo'nak quixc'uluban xch'ol laj Juan. ¹⁶ Ut nak ac xcubsic xha' li Jesús, qui-el chak sa' li ha'. Ut sa' junpat quiteli li choxa chiru ut quiril li Santil Musik'ej chanchan jun li paloma nak yo chak chi cubec sa' xben li Jesús. ¹⁷ Ut qui-abic xyab xcux li Dios toj sa' choxa nak quixye: —A'an a'in li cualal raro inban. Nasaho' inch'ol riq'uin, chan.

4

Li Jesús quiyale' ralenquil xban laj tza

¹ Tojo'nak li Jesús quic'ame' xban li Santil Musik'ej sa' li chaki ch'och' re tayalek' ralenquil xban laj tza. ² Nak ac xbanu x-ayun ca'c'al cutan ca'c'al k'ojoyin quitz'oca. ³ Ut laj tza quicuulac riq'uin ut quixye re: —Cui tz'akal yal nak laat rala li Dios, suk'isiheb chok' caxlan cua li pec a'in.— ⁴ Quichak'oc li Jesús ut quixye: —Inc'a' tinbanu a'an xban nak tz'ibanbil retalil sa' li Santil Hu:

Maçua' ca'aj cui' riq'uin li naxtzaca yo'yo cui' li cuink; riq'uin ban li atin li naxye li Dios. (Dt. 8:3)

⁵ Tojo'nak quic'ame' xban laj tza sa' li santil tenamit Jerusalén; ut coxak-abak toj takec' sa' xben li rochoch li Dios. ⁶ Ut laj tza quixye re: —Cui tz'akal yal nak laat rala li Dios, cut açuib tak'a. Maç'a' tac'ul xban nak jo'ca'in tz'ibanbil sa' li Santil Hu:

Tixtaklaheb lix ángel chaçuilbal ut riq'uin ruk'eb tate'xchap re nak inc'a' tatch'ol la cuok chiru pec. (Sal. 91:11-12)

⁷ Ut li Jesús quichak'oc ut quixye re: —Tz'ibanbil ajcui' sa' li Santil Hu chi jo'ca'in:

Matz'ama xmilagro li Kaçua' la Dios yal chi maç'a' rajbal. (Dt. 6:16)

⁸ Ut quic'ame' cui'chic xban laj tza sa' xben jun li tzul k'axal najt xteram. Ut laj tza quixc'ut chak chiru li Jesús chixjunil li tenamit li cuan sa' ruchich'och' jo' ajcui' lix nimal lix lok'al cuan chi sa'. ⁹ Ut quixye re li Jesús: —Chixjunil a'in tin'ue açue cui laat taçuik'ib açuib chicuu ut tin'lok'oni.— ¹⁰ Tojo'nak li Jesús quichak'oc ut quixye re: —Elen chicuu laat aj tza, xban nak jo'ca'in tz'ibanbil sa' li Santil Hu:

Li Kaçua' la Dios t'alak'oni ut ca'aj cui' chiru a'an tate'anjelak. (Dt. 6:13)

¹¹ Tojo'nak quicanabac xban laj tza ut eb li ángel que'cuulac ut que'c'anjelac chiru.

Xticlajic xc'anjel li Jesús

¹² Nak li Jesús quirabi resil nak laj Juan cuan chi prexil, ço Nazaret xcuent Galilea. ¹³ Qui-el Nazaret ut ço Capernaum. Ut aran quicana. Li tenamit a'an cuan chire li palau sa' xch'och'eb laj Zabolón ut eb aj Neftalí. ¹⁴ A'in quic'ulman jo' quixye li profeta Isaías nak quixye chi jo'ca'in:

¹⁵ Aran sa' xch'och' laj Zabolón ut sa' xch'och' laj Neftalí, li cuan chire li be li naxic sa' li palau, aran jun pac'al li nima' Jordán, sa' li na'ajej Galilea bar neque'cuan cui' li maçua'eb aj judío,

¹⁶ li tenamit chanchan li cuanqueb sa' k'ojoyin xban nak inc'a' neque'xnau lix yalal. Chanchan quicuitano' nak que'ril nak que'xtau li colba-ib.

Chanchan nak cuanqueb sa' jun na'ajej re camc xban lix maqueb nak quicuulac li cutan sa' xyankeb. (Is. 9:1-2)

¹⁷ Chalen nak quicuulac aran, li Jesús yò chixch'olobanquil li xyalal ut quixye: —Chiyot'ek' ech'ol ut jalomak ec'a'ux xban nak cuulac re xk'ehil nak tinq'uehek' sa' incuanquil xban li Dios. Ut lain chic cuank incuanquil sa' xbeñeb li cualal inc'ajol.—

Li Jesús quixbok cahib aj car re nak te'xic chirix

¹⁸ Sa' jun cutan nak coxnumek' li Jesús chire li palau cuan Galilea, quirileb cuib li cuñk ritz'ineb rib. Li jun, a'an laj Simón. Aj Pedro nayeman re. Li jun chic aj Andrés xc'aba'. Yoqueb chixq'uebal lix yoy sa' li palau xban nak a'aneb aj chapol car. ¹⁹ Li Jesús quixye reheb: —Chinetake. Macua' chic caribc tebanu. Eras eritz'in ban chic tesic' re te'pabank, chan reheb. ²⁰ Ut sa' junpat que'xcanab lix yoy ut que'xtake li Jesús. ²¹ Junpat na chic quibec li Jesús nak quixtauheb cui'chic cuibeb li cuñk ritz'ineb rib. A'aneb laj Jacobo ut laj Juan. Cuanqueb sa' lix jucub rochben laj Zebedeo lix yucua'eb. Yoqueb chixxtinguil lix yoy. Ut li Jesús quixbokeb re nak te'xic chirix. ²² Ut sa' junpat que'xcanab lix yucua'eb ut que'xcanab li jucub ut que'xtake li Jesús. ²³ Ut li Jesús quixbeni chixjunil li na'ajej Galilea. Yò chixc'utbal lix yalal sa' eb li cab li neque'xch'utub cui' ribeb laj judío. Quixch'olob xyalal li chabil esilal chirix lix cuanquilal li Dios. Ut yò chixq'uirtesinguil chixjunil li q'uila pay ru chi yajel ut li raylal. ²⁴ Quicuulac resil sa' chixjunil li na'ajej Siria li c'a'ru yò chixbanunquil li Jesús aran Galilea. Ut que'xc'am riq'uin chixjunileb li yaj. Q'uila pay ru lix yajeleb ut lix raylaleb. Cuan li toj nak'ehin xyajeleb. Ut cuan li cuanqueb maus aj musik'ej riq'uineb ut cuanqueb ajcui' li sic. Ut li Jesús naxq'uirtesiheb. ²⁵ Ut quitakec xbaneb li q'uila tenamit. Cuan li que'chal chak Galilea. Cuan li que'chal chak Decápolis. Cuan li que'chal chak Jerusalén. Cuan li que'chal chak Judea jo' ajcui' jun pac'al li nima' Jordán.

5

Li Jesús naxch'olob xyalal sa' xben li tzul

¹ Ut nak quirileb li q'uila tenamit, li Jesús quitake' sa' xben jun li tzul. Ut nak quic'ojla, eb li yoqueb chixtakenquil que'xch'utub rib riq'uin. ² Quic'oc chixch'olobanquil li xyalal chiruheb ut quixye: ³ —Us xak reheb li neque'rec'a nak cubenak xcuanguileb xban nak eb a'an cuankeb chic rubel lix nimajcual cuanquilal li Dios. ⁴ Us xak reheb li neque'yabac xban xrahileb xch'ol xban nak eb a'an taç'ojobaç xch'oleb. ⁵ Us xak reheb li tulaneb xban nak eb a'an te'echanjnk re li na'ajej li yechi'inbil reheb xban li Dios. ⁶ Us xak reheb li te'raj ru xbanunquil li tiquial. Chanchan li te'tz'ocak ut te'chakik re. Us xak reheb xban nak li Dios taatenk'ank reheb chixbanunquil li us. ⁷ Us xak reheb li neque'uxtānān u xban nak eb a'an te'uxtānāk ruheb xban li Dios. ⁸ Us xak reheb li tiq̄ueb xch'ol xban nak eb a'an te'ril ru li Dios. ⁹ Us xak reheb li neque'xtenk'a ras ritz'in chi cuanc sa' tuktuquil usilal xban nak eb a'an ralał xc'ajol li Dios te'yehek' reheb. ¹⁰ Us xak reheb li neque'rahobtesic sa' xc'aba' li tiquial, xban nak eb a'an cuankeb chic rubel lix cuanquilal li Dios. ¹¹ Us xak ere nak texhobek' ut texrahobtesik sa' inc'aba' ut tayehek' ere c'a'ak re ru chi mausilal chi yal tic'ti'. ¹² Miraho' ech'ol. Chisahok' ban ech'ol riq'uin li c'a'ru tauxk ere xban nak k'axal nim le' k'ajcamunquil taq'uehek' ere sa' choxa. Moco ca'aj cui' ta laex yoquex chi c'uluc re li raylal. Jo'can aj ban cui' que'xc'ul li profeta li que'cuan junxil.

Li ratz'amil li ruchich'och'

¹³Laex aj pabanel chanchanex li atz'am li nac'anjelac arin sa' ruchich'och'. Cui ta li atz'am taşachk xquial, çc'a' ta raj chic ru taşoc cui? Maç'a' chic taşoc cui'. Yal re tz'ekeç' aj chic ut re yek'ic.

Lix saken li ruchich'och'

¹⁴Laex aj pabanel, laex lix cutan saken li ruchich'och'. Junak tenamit cuan sa' xben junak tzul ma jaruj naru xmukbal. ¹⁵Chi moco nalochman junak candil re xq'uebal rubel junak chacach. Naq'ueman ban sa' xben xna'aj candil re nak tixcutanobresi sa' li cab li cuanqueb cui' chixjunileb. ¹⁶Jo'can ajcui' laex. Laex lix cutan saken li ruchich'och'. Chic'utunk bi' le çabalil chiruheb le ras eriz'in re nak eb a'an te xq'ue retal li us nequebanu ut te xq'ue xlok'al le Yucua' li cuan sa' choxa.

Li Jesús naxch'olob xyqalal li çhak'rab

¹⁷Meç'oxla nak xinchal chixsachbal xcuanquil li çhak'rab li quiq'uehe' re laj Moisés chi moco li ac xole'xye li profeta. Inc'a' xinchal chixsachbal xcuanquil a'an. Xinchal ban re nak tatz'aklok ru a'an. ¹⁸Relic chi yal tnye ere nak taşosok' li choxa, taşosok' li ruchich'och', ut yal ta jun xletril chi moco junak retalil li çhak'rab taşachk xcuanquil. Toj retal talaje'c'ulmank chixjunil. ¹⁹Li ani naxk'et li çhak'rab, usta nac'utun nak inc'a' nim xcuanquil chiru a'an, ut cui naxc'ut chiru li ras ritz'in xbanunquil chi jo'can, li jun a'an k'axal ca'ch'in lix lok'al taq'uehek' re sa' lix nimajcual cuanquial li Dios. Abanan li ani naxbanu chi tz'akal li naxye li çhak'rab, ut tixc'ut chiru li ras ritz'in xbanunquil chi jo'can, li jun a'an k'axal nim lix lok'al taq'uehek' re sa' lix nimajcual cuanquial li Dios. ²⁰Tnye ajcui' ere nak cui lix tiquial le ç'ol inc'a' tixk'ax ru xtiquial xç'oleb laj tz'ib ut eb laj fariseo, inc'a' tex-oc rubel lix nimajcual cuanquial li Dios.

Li Jesús naxch'olob xyqalal chirix li josk'il

²¹Erabiom resil li çhak'rab nak yebil reheb li kaxe' katon: Maçamsi açuas açuiz'in. Li ani taşamsink, toj tixtoj rix sa' rakba atin. ²²Aban lain tnye ere lix yalal a'an. Li ani taşosok'ok riq'uin li ras ritz'in tarakek' atin sa' xben. Ut li ani tixtz'ektana li ras ritz'in cuan xmaç chiru laj rakol atin. Ut li ani tixye xyaj tiox re li ras ritz'in, mare anchal taşix sa' xxamlel li xbalba. ²³Jo'can nak cui sa' xq'uebal la mayej chiru li artal tajulticok' açue nak tarec'a sa' xç'ol la çuas açuiz'in nak cuan amaç chiru, ²⁴canab aran la mayej, ut ayu, c'am çhak açuib sa' usilal riq'uin la çuas açuiz'in, tojo'nak toxak'axtesi la mayej. ²⁵Cui cuan la çh'a'ajquial riq'uin la çuas açuiz'in, yib ru chi junpat. Cui inc'a' nacac'am açuib sa' usilal chi junpat, mare anchal tatxc'am riq'uin laj rakol atin ut a'an tatxtakla sa' tz'alam. ²⁶Ut inc'a' tat-elk aran cui inc'a' taçoj chixjunil li jo' q'uial te xpatz' açue. Relic chi yal ninye açue nak tento taç'am açuib sa' usilal riq'uin la çuas açuiz'in.

Li Jesús naxch'olob xyqalal chirix li muxuc çaxar

²⁷Erabiom resil nak quiyeman najter: Matmuxuc çaxar. ²⁸Ut lain tnye ere nak yalak ani tixca'ya junak ixk re xrahinquil ru, ac xmux ru lix sumlajic xban xrahinquil ru. ²⁹Le najter na'leb tento teçanab chi junaj cua. Li c'a'ak re ru taq'uehoc ere chi maçobc, tetz'ektana. Cui li xnak' la çuu li cuan sa' anim naq'uehoc açue chi maçobc, us raj nak taçuisi ut taçz'ek. K'axal us nak taşachk li xnak' açuu chiru nak tatxix laaç sa' xbalba. ³⁰Cui la nim uk' naq'uehoc açue chi maçobc, us raj cui tayoc' ut taçz'ek. K'axal us nak taşachk la çuuk' chiru nak tatxix laaç sa' xbalba.

Li Jesús naxch'olob xyqalal chirix li jachoc ib

³¹ Ut yebil ajcui' chi jo'ca'in: Li ani tixjach rib riq'uin li rixakil, tento nak tixyib li hu re xjachbal rib ut tixq'ue re. ³² Abanan lain ninye ere li xyalal a'an. Li ani naxjach rib riq'uin li rixakil chi inc'a' xmux ru xsumlajic li ixakilbej, a' li belomej cuan xmac nak li ixk a'an tixmux ru xsumlajic. Ut li ani tac'amok re li ixk, li ac xcanabac xban xbelom, li cujnk a'an naxmux ru li sumsu.

Li Jesús naxch'olob xyalal chirix li juramento

³³ Erabiom resil nak quiyehé' reheb le xe'tonil yucua' chi jo'ca'in: Li c'a'ak re ru teyechi'i xbanunquíl riq'uin juramento, tento tebanu. ³⁴ Abanan lain tynye ere tento tebanu li c'a'ru teyechi'i ut mebanu li juramento chi mac'a' rajbal. Mepatz' xc'aba' li choxa xban nak a'an xna'aj li Dios. ³⁵ Ut mepatz' xc'aba' li ruchich'och' xban nak a'an xna'aj li rok. Ut mepatz' xc'aba' li tenamit Jerusalén xban nak a'an xtenamit li nimajcual Dios, li tz'akal Rey. ³⁶ Chi moco tebanu li juramento sa' xc'aba' le jolom xban nak laex inc'a' naru tesakobresi le rismal chi moco naru tek'ekobresi. ³⁷ Jo'ca'in ban tebanu. Cui teye nak yal, junes yal teye. Ut cui teye nak inc'a', junes inc'a' teye. Cui teq'ue xtz'akob li atin a'an, li na'leb a'an riq'uin laj tza nachal.

Li xyalal chirix xrabaleb li xic' neque'iloc ke

³⁸ Erabiom resil nak quiyehé' chi jo'ca'in najter: Cui ani tarisi xnak' acuu, taisyik ajcui' li xnak' ru a'an. Cui ani tarisi li ruch acue, taisyik ajcui' li re a'an. ³⁹ Abanan lain tynye ere: Mesume mausilal riq'uin mausilal. Cui junak tixq'ue junak ruk' sa' acuu, q'ue cui'chic chixsac' li jun pac'al. ⁴⁰ Li ani taraj tatxc'am riq'uin laj rakol atin ut taraj xmak'bal la camis, q'ue ajcui' la chaquet re. ⁴¹ Cui ani taminok acuu chixc'ambal li rik jun kilómetro, c'am cuibak kilómetro laet. ⁴² Li ani tixtz'ama c'a'ru re acue, q'ue re. Ut li ani taajok to'oninc acuiq'uin, mak'etk'eti acuib chiru. ⁴³ Erabiom resil nak tera li ani narahoc ere ut xic' teril li xic' na-iloc ere. ⁴⁴ Abanan lain tynye ere, cherahak li xic' na-iloc ere. Chetz'ama usilal sa' xbeneb li neque'hoboc ere. Chebanuhak li us reheb li xic' neque'iloc ere ut chextijok chirix li neque'banun mausilal ere ut neque'rahobtesin ere. ⁴⁵ Cui tebanu chi jo'can, laexak ralal xc'ajol le Yucua' cuan sa' choxa. A'an naq'uehoc chak li sak'e sa' xbeneb li useb xna'leb jo' ajcui' li inc'a' useb xna'leb. Ut a'an ajcui' naq'uehoc chak li hab sa' xbeneb li tiqueb xch'ol jo' ajcui' li inc'a' tiqueb xch'ol. ⁴⁶ Cui ca'aj cui' li neque'rahoc ere nequera, ¿c'a'ru le k'ajcamunquíl tec'ul? ¿Ma inc'a' ta bi' jo'can ajcui' neque'xbanu eb laj titz'ol toj, li neque'balak'in? ⁴⁷ Ut cui ca'aj cui' le rech tenamitil nequeq'ue xsahil xch'oleb, ¿c'a'ru rusil a'an? ¿Ma inc'a' ta bi' jo'can ajcui' neque'xbanu li inc'a' neque'xpab li Dios? ⁴⁸ Tıcak bi' ech'ol jo' le Yucua' li cuan sa' li choxa tic xch'ol.

6

Li xyalal chirix xbanunquíl usilal

¹ Cheq'uehak retal c'a'ru nequebanu. Cui laex tebanu li usilal yal re nak tex-ilek' jo' neque'xbanu eb laj fariseo, mac'a'ak le k'ajcamunquíl riq'uin le Yucua' cuan sa' choxa. ² Ut nak tasi li c'a'ak re ru re li ani taraj tenk'ac, mabanu jo' neque'xbanu laj ca'pac'al u. Eb a'an neque'xic sa' li cab li neque'xch'utub cui' ribeb laj judio ut sa' eb li c'ayil chixyebel resil li usilal neque'xbanu re nak te'q'uehek' xlok'al xbaneb li cujnk. Relic chi yal tynye ere nak eb a'an ac xe'xc'ul lix k'ajcamunquíl nak que'q'uehe' xlok'al xbaneb li cujnk. ³ Li c'a'ru tasi re li mac'a' cuan re, ma' ani aj e taserak'i li c'a'ru xasi, chi

moco taserak'i re li tz'akal açuamig. ⁴ Chabañu ban chi mukmu ut la yucua' li naxnau chixjunil li c'a'ak re ru nacabañu, a'an li tak'ajcamunk açue.

Li Jesús naxch'olob xyqal li tijoc

⁵ Ut nak textijok moco jo'cakex ta eb laj ca'pac'al u. Eb a'an neque'xxakab chak ribeb chi tijoc sa' eb li cab li neque'xch'utub cui' ribeb laj judio ut neque'xxakab rib chij tijoc sa' xala be yal re nak te'ilek'. Relic chi yal tinye ere nak eb a'an ac xe'xc'ul lix k'ajcamunquileb nak que'q'uehe' xlok'al xbaneb li cujnk. ⁶ Ut nak textijok laex, ocanke sa' le rochoch, tz'apomak re li cab, ut tijonkex chiru le Yucua' li inc'a' na-ilman ru. Ut le Yucua' li naril chixjunil li c'a'ru neque'banu, a'an tak'ajcamunk ere. ⁷ Ut nak textijok, meye q'uila atin chi mac'a' rajbal jo' neque'xbanu li inc'a' neque'xpab li Dios. Eb a'an neque'xc'oxla nak riq'uin li q'uila atin, te'abik xban li Dios. ⁸ Mejuntak'eta bi' erib riq'uin eb a'an xban nak le Yucua' naxnau c'a'ru nac'anjelac ere chi toj maji' nequetz'ama chiru. ⁹ Ut laex jo'ca'in nak textijok:

At Kacua', cuancat sa' li santil choxa, lok'oninbilak taxak la santil c'aba'.

¹⁰ Chichalk ta la nimajcual cuanquial. Chi-uxk ta li nacacuj, jo' sa' choxa jo' ajcui' sa' ruchich'och'.

¹¹ Chaq'ue taxak ke li kacua kuc'a chi cuulaj cuulaj.

¹² Ut chacuy chasach ta li kamac jo' nak nakacuyeb xmac li neque'macob chiku.

¹³ Ut moaq'ue taxak chi alec. Choacol ban chiru li inc'a' us. Açue li nimajcual cuanquil, li lok'onic ut li lok'al chi junelic k'e cutan. Jo'can taxak.

¹⁴ Cui nequecuy xmaqueb le ras eritz'in, tixcuy ajcui' emac laex le Yucua' cuan sa' choxa. ¹⁵ Cui inc'a' nequecuy xmaqueb le ras eritz'in, jo'can ajcui' laex inc'a' tacuyek' emac xban le Yucua' cuan sa' choxa.

Li Jesús quixch'olob xyqal li ayunic

¹⁶ Ut nak tebanu le ayun, mebanu jo' neque'xbanu laj ca'pac'al u. Eb a'an neque'xbanu rib nak raheb sa' xch'ol yal re nak tana'ek' nak yoqueb xbanunquil lix ayun. Relic chi yal tinye ere nak eb a'an ac xe'xc'ul lix k'ajcamunquil. ¹⁷ A'ut laex nak tebanu le ayun, tech'aj le ru ut teyib erib chi us, ¹⁸ re nak inc'a' tac'utunk chiruheb le ras eritz'in nak yoquex chi ayunic. Chic'utunk ban chiru le Yucua' li inc'a' na-ilman ru. Ut le Yucua' li naxnau chixjunil li neque'banu, a'an tak'ajcamunk ere.

Li kabiomal sa' choxa

¹⁹ Meq'ue ech'ol chixc'ulanquil ebimal sa' ruchich'och' bar cui' namaxen ut nak'olen ru ut bar cui' neque'oc laj elk' chi elk'ac. ²⁰ Q'uehomak ban ech'ol chirix le biomal cuan sa' choxa bar cui' inc'a' namaxen chi moco nak'olen ru ut bar cui' inc'a' taelk'ak. ²¹ Jo'can nak chenuhak nak bar cuan cui' le biomal, aran ajcui' cuank le c'a'ux. ²² Li xnak' eru chanchan jun li lampara. Xban nak na-iloc li xnak' eru, cuanquex sa' cutan. Chanchan le na'leb. Cui chabil le na'leb, cuanquex sa' cutan saken. ²³ Cui ut inc'a' saken na-iloc li xnak' eru, cuanquex sa' k'ojy'in. Ut jo'can ajcui' le na'leb. Cui inc'a' chabil le na'leb xban nak junes le biomal nequec'oxla, cuanquex sa' xk'ojy'in ru li mac. ²⁴ Ma ani naru nac'anjelac chiru cuib chi patron. Naru tixra li jun ut tixt'ektana li jun chic malaj ut xic' taril li jun ut tix-oxlok'i li jun chic. Jo'can nak maj'ok'e naru tech'oxla li Dios cui ca'aj cui' le biomal nequec'oxla.

Mexc'oxlac chirix chanru tenumsi li cutan junjunk arin sa' ruchich'och'

²⁵ Jo'can ut nak ninye ere: Mixic ech'ol chirix le cua eruc'a chi moco chirix chanru tetikib erib. ¿Ma inc'a' ta bi' k'axal lok' li kayu'am chiru li c'a'ru takatzaca? ¿Ma inc'a' ta bi' k'axal lok' li kayu'am chiru li kak'? ²⁶ Cheq'uehak

retal li xul li neque'rupupic chiru choxa. Eb a'an inc'a' neque'au, chi moco neque'k'oloc chi moco neque'xxoc xtzacaemk sa' c'ulebal. Ut le Yucua' cuan sa' choxa, a'an naq'uehoc xcuaheb. ²⁷ ¿Ma inc'a' ta bi' k'axal raroquex laex chiruheb a'an? ²⁷ ¿Ani ere laex taruk tixtik ru lix yu'am usta naxic xch'ol xc'oxlanquil? ²⁸ ¿C'a'ut nak naxic ech'ol chi c'oxlac chirix le rak'? Q'uehoma retaleb li utz'u'uj sa' pim chanru nak neque'q'ui chi inc'a' neque'c'anjelac chi moco neque'quemoc. ²⁹ A'ut lain tinya ere, usta c'ajo' xchak'al ru lix tikibanquil laj Salomón, abanan inc'a' quixtau xchak'al ru li utz'u'uj a'in. ³⁰ Laex inc'a' nequexpaban chi tz'akal. Ut cui li Dios naxq'ue lix ch'ina'usal li pim li cuan junpat ajcui' ut cuulaj q'uebilak sa' xam, ¿ma toja' ta chic laex inc'a' textikib? ³¹ Jo'can ut nak moco yokex ta chixyebal: ¿C'a'ru takatzaca anakcuan? chi moco, ¿c'a'ru takatikib cui' kib? ³² Li inc'a' neque'xpab li Dios neque'xq'ue xch'ol xc'oxlanquil a'an. Abanan le Yucua' li cuan sa' choxa naxnau li c'a'ru nequeraj ru. ³³ Li c'a'ru li tescic' xben cua, a'an lix nimajcual cuanquilal li Dios ut lix tiquilal, ut chixjunil li c'a'ak re ru a'in talajq'uehek' ere chok' xtz'akob. ³⁴ Jo'can ut nak mexc'oxlac chirix li cutan re cuulaj xban nak a'an tac'oxlamank ajcui' cuulaj. Tz'akalak riq'uin li ch'a'ajquilal li naxc'am chak li junjunk chi cutan.

7

Meq'ue ech'ol chixcuech'bal rix le ras eritz'in

¹ Ma ani tetz'il atin chirix re nak inc'a' tatz'ilek' atin cherix laex. ² Xban nak chanru nak nequextz'iloc atin, jo'can ajcui' tauxk ere laex. Ut riq'uin li bisleb li nequexbisoc cui', riq'uin ajcui' a'an texbisek' laex. ³ ¿C'a'ut nak nacaq'ue retal li c'aj che' cuan sa' xnak' ru la cuas acujtz'in ut inc'a' nacacuul li tz'amba cuan sa' xnak' acuu laqt? ⁴ ¿Chanru nak taye re la cuas acujtz'in: "Cuisihak li c'aj che' sa' xnak' acuu", ut toj cuan li tz'amba sa' xnak' acuu laqt? ⁵ At aj ca'pac'al u, xben cua isi li tz'amba cuan sa' li xnak' acuu, tojo'nak tat-ilok chi tz'akal re risinuil li c'aj che' cuan sa' xnak' ru la cuas acujtz'in. ⁶ Meq'ue reheb li tz'i' li c'a'ru k'axal lok' xban nak naru neque'chal sa' eben ut textiu. Chi moco teq'ue li pec li k'axal tertio xtz'ak chiruheb li ak re te'xyek'i.

Li Dios tixq'ue li chabil na'leb reheb li neque'xtz'ama chi anchaleb xch'ol

⁷ Nak tapaltok c'a'ru ere, chextz'amank chiru li Dios ut a'an tixq'ue ere; chesic'ak ut tetau, chebokak ut li puerta tatehek' cheru. ⁸ Chebanu a'an xban nak li ani natz'aman chiru li Dios naq'uehe' re. Li ani naxsic', naxtau. Utl ani nabokoc, li puerta natehe' chiru. ⁹ ¿Ma cuan ta bi' junak yucua'bej sa' eyank tixq'ue junak pec re li ralal nak tixpatz' xcua re? ¹⁰ Ut nak tixpatz' junak xcar re, ¿ma c'anti' ta bi' tixq'ue re? ¹¹ Cui laex li moco chabilex ta nequenau xq'uebal li c'a'ru chabil re le ralal ec'ajol, ¿ma toja' ta chic le Yucua' li cuan sa' choxa inc'a' tixq'ue li k'axal chabil re li ani tixtz'ama chiru? ¹² Jo'can nak li c'a'ru nequeraj laex nak te'xbanu raj le ras eritz'in, chebanuhak laex reheb a'an, xban nak a'an a'in xyalal li chak'rab li quiq'uehe' re laj Moisés, ut a'an ajcui' li xyalal lix yehomeb li profeta. ¹³ Chex-oc sa' li oquebal li ca'ch'in ru xban nak nim ru li oquebal ut nim ru li be li naxic sa' li tojba mac ut nabaleb li neque'xic aran. ¹⁴ Abanan li oquebal ut li be li naxic sa' li junelic yu'am, a'an ca'ch'in ru ut inc'a' q'uiheb li neque'oc aran.

Li che' nana'e'ru xban li ru naxq'ue

¹⁵ Chenauhak xcolbal erib chiruheb li profeta aj balak'. Chanchan nak chabileb jo' li carner nak neque'c'utun. Abanan moco yal ta. Chanchaneb li josk' aj xoj nak neque'chal chi balak'inc. ¹⁶ Yal riq'uin lix na'lebeb tenau

ruheb. Læex nequeq'ue retal nak li q'uix inc'a' naruçhin li uva ut li tun q'uix inc'a' naruçhin li higo. ¹⁷ Jo'can nak li çhabil che', çhabil ajcui' li ru naxq'ue. Ut li che' li inc'a' us, inc'a' ajcui' us li ru naxq'ue. ¹⁸ Li çhabil che' inc'a' naru naruçhin li inc'a' us, chi moco li che' inc'a' us naruçhin li çhabil. ¹⁹ Chixjunil li che' li inc'a' çhabil li ru naxq'ue nayoc'man ut naq'ueman sa' xam. ²⁰ Jo'can ut nak riq'uin lix na'lebeb li profeta tenau ru aniheb.

Maçua' riq'uin kayehom kabānuhom to-oc rubel xcuanquil li Dios

²¹ Moco chixjunileb ta li neque'yehoc "Kaçua', Kaçua'" cue, te'oc sa' lix nimajcual cuanquillal li Dios. Aban li neque'banun re li naraj lin Yucua' cuan sa' choxa, a'aneb li te'oc sa' lix nimajcual cuanquillal li Dios. ²² Nabaleb li te'yehoc cue sa' xk'ehil li rakba atin, "Kaçua', Kaçua', ¿ma maçua' ta bi' sa' aç'aba' coatinac jo' profeta? ¿Ma maçua' ta bi' sa' aç'aba' co-isin maus aj musik'ej? Låo nabal li milagro quilajkabanu sa' aç'aba'", cha'keb. ²³ Ut lain tinye reheb, "Læex maçua'ex cualal inc'ajol. Lain inc'a' ninnau eru. Elenkex çicuu, ex aj banuhom mausilal."

Li ani naxbanu li c'a'ru naxye li Kaçua', li jun a'an cuan xna'leb

²⁴ Jo'can nak yalak ani taabink reheb li cuatin a'in ut cui tixbanu li c'a'ru xinye, li jun a'an tinjuntak'eta riq'uin li cuink cuan xna'leb li quixyib li rochoch sa' xben pec. ²⁵ Ut quichal li hab ut quicuan li but'i ha', ut quichal li cak-sut-ik'. Coxsac' rib chiru li cab a'an, ut inc'a' quit'ane' li cab xban nak yibanbil chi us sa' xben pec. ²⁶ Ut yalak ani taabink re li cuatin ut inc'a' tixbanu li c'a'ru xinye, li jun a'an tinjuntak'eta riq'uin li cuink li maç'a' xna'leb. Inc'a' quixyib li rochoch chi çhabil. Yal sa' xben samaib quixq'ue. ²⁷ Ut quichal li hab, quicuan li but'i ha' ut quichal li cak-sut-ik'. Coxsac' rib chiru ut li cab a'an quit'ane' ut aran qui-oso'. ²⁸ Ut nak quirake' li Jesús chixyebal li atin a'in, sachsoqueb xch'ol que'cana li q'uila tenamit chirabinquil li c'a'ru yo çhixyebal. ²⁹ Que'sach xch'oleb xban nak quixc'ut chi tz'akal li xyalal chiruheb riq'uin xcuanquil ut moco jo' ta eb laj tz'ib.

8

Li Jesús quixq'uirtesi jun li saklep rix

¹ Nak quicube çhak li Jesús chiru li tzul, quitakeç xbaneb li q'uila tenamit. ² Ut quichal jun li saklep rix ut quixcuik'ib rib chiru li Jesús ut quixye re: —Kaçua', lain ninnau nak laät naru tinaq'uirtesi. Cui tabanu li usilal, chinaq'uirtesi, çhan. ³ Li Jesús quixye' li ruk', quixch'e' li cuink ut quixye re: —Nacuaj aq'uirtesinquil. Anakcuan tating'uirtesi, çhan. Ut sa' junpat quiq'uira li saklep rix. ⁴ Tojo'nak li Jesús quixye re: —Abi li tinye açue. Ma ani aj e taserak'i li xac'ul. Ayu ban ut c'ut açuib chiru laj tij. Ut taq'ue li mayej jo' naxye sa' lix çhak'rab laj Moisés re xc'utbal chiruheb nak xatq'uira.— (Lv. 13:49)

Li Jesús quixq'uirtesi lix moç jun li capitán

⁵ Ut nak quicuulac li Jesús aran Capernaum, quichal jun li capitán aj Roma riq'uin. Quixtz'ama usilal chiru ut quixye re: ⁶ —Kaçua', lin moç t'ant'o sa' cab. Sic ut k'axal ra cuan, çhan. ⁷ Li Jesús quichak'oc ut quixye re: —Tinxic lain ut toxiq'uirtesi.— ⁸ Li capitán quixye re li Jesús: —Kaçua', moco inc'ulub ta nak tatxic sa' li cuochoch. Ca'aj cui' nacuj nak taye nak taq'uirak lin moç ut ninnau nak taq'uirak. ⁹ Lain ninnau nak naru tabanu a'an xban nak lain cuan ani nataklan cue ut cuanqueb lin soldado rubel lin cuanquil. Ut ninye re li jun, "ayu" ut naxic. Ut ninye re li jun çhic, "quim", ut nachal. Ut ninye re

lin moş, “banu a'in”, ut naxbanu, chan li capitán. ¹⁰ Ut nak li Jesús quirabi li quixye, quisach xch'ol ut quixye reheb li yoqweb chi ochbeninc re: —Relic chi yal tinya ere nak ma jun intauhóm chi moco sa' xyankeb laj Israel tz'akal re ru xpabal jo' li jun a'in, usta maçua' aj judío. ¹¹ Ut lain tinya ere nak nabaleb li maçua' eb aj judío yalak bar sa' ruchich'och' te'pabank. Ut eb a'an te'eçhanink re lix nimajcual cuanquíl li Dios rochbened laj Abraham, laj Isaac, ut laj Jacob. ¹² A'ut nabaleb laj judío li te'eçhanink raj re lix nimajcual cuanquíl li Dios, eb a'an chic li te'isik ut te'q'uehek' sa' li k'o'yjin. Ut aran taçuank li yabac ut li c'uxuxinc ruch e, chan li Jesús reheb li tenamit. ¹³ Tojo'nak li Jesús quixye re li capitán: —Ayu sa' la çuochoch. Chanru nak xapab, jo'can ajcui' nak chi-uxk li c'a'ru xatz'ama, chan. Ut sa' ajcui' li honal a'an quiq'uira lix moş li capitán.

Li Jesús quixq'uirtesi xna' li rixakil laj Pedro

¹⁴ Ut quicuulac li Jesús sa' rochoch laj Pedro. Ut aran quixtau lix na' li rixakil laj Pedro yocyo sa' xch'at ut yo xtik. ¹⁵ Ut li Jesús quixchap li ruk' ut quinume' lix tik. Ut a'an quicuacli, ut quic'anjelac chiru. ¹⁶ Nak ac oc re li k'o'yjin, nabaleb li cristian que'c'ame' chak riq'uin li Jesús. Cuanqueb maş aj musik'ej riq'uineb. Ut yal riq'uin rañin, li Jesús quirisí li maş aj musik'ej riq'uineb, ut quixq'uirtesi chixjunileb li yaj. ¹⁷ A'in quic'ulman jo' quixye li profeta Isaías, nak quixye chi jo'ca'in:

A'an quic'amoc re li kayajel, ut a'an quic'uluc re li karaylal. (Is. 53:4)

¹⁸ Ut nak quiril li Jesús nak sutsu xbaneb li q'uila tenamit, quixye: —Tento toxic jun pac'al li palau, chan reheb lix tzolom. ¹⁹ Ut sa' li honal a'an quicuulac riq'uin li Jesús jun aj tz'ib ut quixye re: —At tzolonel, tincuj atakenquil yalak bar tatxíc, chan re. ²⁰ Ut li Jesús quichak'oc ut quixye re: —C'oxla chi us ma taçuy intakenquil. Li yac cuanqueb xjul sa' pec, ut li xul li neque'rupupic chiru choxa cuanqueb xsoc, abanan lain li C'ajolbej maç'a' inna'aj bar taruk tinyocob cui' cuib, chan. ²¹ Ut jun reheb lix tzolom quixye re li Jesús: —Kaçua', chinacuy. Inmukak cuan inyucua' tojo'nak tinxic çaçucix, chan. ²² Ut li Jesús quixye re: —Takehin, canabeb li toj camenakeb sa' li maç xmukakeb cuan lix camenak, chan re.

Nak quixch'anab li ik' chiru li palau

²³ Ut li Jesús qui-oc sa' li jucub rochbened lix tzolom. ²⁴ Nak ac cuanqueb chiru ha', sa' junpat quichal jun li nimla cak-sut-ik'. Ut yo chi oc lix cau ok li ha' sa' li jucub. Ut li Jesús sa xcuara. ²⁵ Eb lix tzolom que'jiloc riq'uin, que'rajsi, ut que'xye re: —Kaçua', choaçol. Osoc' ke, chanqueb re. ²⁶ Ut li Jesús quichak'oc ut quixye: —Laex inc'a' nequexpaban chi tz'akal. Jo'can nak nequexxucuaç, chan reheb. Tojo'nak quicuacli, quixk'us li ik', ut li palau, ut sa' junpat quich'ana li ik' ut quitukla ru li ha'. ²⁷ Ut c'ajo' nak que'sach xch'ol lix tzolom nak que'ril li quixbanu ut que'xye chi ribileb rib: —¿Chanru nak cuan xcuanquil li cuñk a'in nak naxk'us li ik' ut li palau ut neque'abin chiru? chanqueb.

Li cuñk li cuan maş aj musik'ej riq'uineb

²⁸ Ut nak ac xk'axon li Jesús jun pac'al li palau sa' xch'och'eb laj Gadara, cuib li cuñk que'chal chixc'ulbal. Que'chal chak sa' li na'ajeb bar neque'muke' cui' li camenak. Cuan maş aj musik'ej riq'uineb. K'alax xiu xiu rilbaleb ut ma ani naru nanume' sa' li be a'an. ²⁹ Ut eb a'an que'xjap re chixyebal: —¿C'a'ru taçuj kig'uin, at Jesús? Laat ralalat li nimajcual Dios. ¿Ma xatchal arin chikach'i'ch'i'inquil chi toj maji' xk'ehil li rakba atin?

chanqueb. ³⁰ Ut najt ca'ch'in riq'uineb cuan chak jun tub li ak, yoqueb chi ichajibc. ³¹ Ut eb li maus aj musik'ej que'xtz'ama chiru li Jesús ut que'xye re: —Cui toacuisi riq'uineb li cujnk a'in, choacanab chi oc riq'uineb li jun tub chi ak li cuanqueb aran. ³² Ut li Jesús quichak'oc ut quixye reheb: —Ayukex. Ut eb a'an que'el ut coeb riq'uineb li jun tub chi ak. Ut eb li ak que'oc chi alinac ut que'xrum chak rib sa'xben ul ut toj sa' li palau coxe'nak ut aran que'oso'. ³³ Ut eb laj ilol ak que'xucuac ut que'coeb sa' anil sa' li tenamit chixyebal resil chixjunil li c'a'ru quic'ulman. Ut que'xserak'i li c'a'ru quic'ulman riq'uineb li cujnk li cuanqueb maus aj musik'ej riq'uineb. ³⁴ Ut chixjunileb li tenamit que'el chak chixc'ulbal li Jesús. Ut nak que'ril ru, que'xtz'ama chiru nak chielk sa' lix tenamiteb.

9

Li Jesús quixq'uirtesi jun li sic aran Capernaum

¹ Ut li Jesús qui-oc cui'chic sa' jun li jucub ut quik'axon jun pac'al li palau ut quicuulac sa' lix tenamit. ² Ut aran que'xc'am riq'uin li Jesús jun li cujnk sic li rok ut sic li ruk' yocyo chiru xcuarib. Ut li Jesús quixq'ue retal nak eb li cujnk a'an neque'xpab nak naru tixq'uirtesi li yaj. Jo'can nak quixye re li yaj: —At cujnk cauhak taxak ach'ol. Ac xcuymán xsachman la mac.— ³ Ut cuanqueb junjunk sa' xyankeb laj tz'ib yoqueb chixyebal sa' xch'oleb: —Li cujnk a'in naxjuntak'eta rib riq'uin li Dios, chanqueb. ⁴ Li Jesús ac naxnau li c'a'ru yoqueb chixc'oxlanquil ut quixye reheb: —¿C'a'ut nak yoquex chixc'oxlanquil li inc'a' us? ⁵ ¿Bar cuan li us tinye re li yaj re nak tac'utunq cheru nak cuan incuanquil? ¿Ma tinye re, “Cuybil sachbil la mac” malaj ut tinye re, “Cuaclin ut ben”? ⁶ Lain tinc'ut cheru nak lain li Cristo li C'ajolbej ut cuan incuanquil sa' ruchich'och' chixcuybal xsachbal li mac, chan. Jo'can nak quixye re li yaj: —Cuaclin, c'am la ch'at ut ayu sa' la cuochoch, chan. ⁷ Tojo'nak quicuac li cujnk ut co sa' rochoch. ⁸ Nak li q'uila tenamit que'ril li quic'ulman, que'xucuac ut que'xq'ue xloch'al li Dios li quiq'uehoc chak xcuanquil li Jesús chi q'uirtesinc ut chi cuyuc mac.

Nak quiboke' laj Mateo xban li Jesús

⁹ Ut li Jesús qui-el aran Capernaum ut quinume' sa' li na'ajej bar neque'culuc cui' toj. Quiril jun li cujnk aj Mateo xc'aba'. C'ojc'o aran xban nak a'an aj titz'ol toj. Ut li Jesús quixye re: —Chinatake.— Ut laj Mateo quicuac li ut quixtake. ¹⁰ Ut chirix a'an li Jesús co sa' li rochoch laj Mateo chi cua'ac. C'ojc'o sa' mex rochbened lix tzolom nak que'cuulac nabaleb laj titz'ol toj rochbened nabaleb chic li rech aj maquil. Ut que'c'ojla sa' mex chi cua'ac rochben li Jesús. ¹¹ Ut nak que'ril a'an, eb laj fariseo que'xye reheb lix tzolom li Jesús: —¿C'a'ut nak nacua'ac laj tzolol ere rochbened laj titz'ol toj ut rochbened laj mac? chanqueb. ¹² Nak quirabi li c'a'ru quipatz'e' reheb lix tzolom, li Jesús quixye: —Li cauheb mac'a' na-oc cui' aj banonel reheb. Aban li yajeb, a'aneb li te'raj banec'. ¹³ Cheq'uehak bi' ech'ol chixtaubal ru li xyalal li atin a'in: “li k'axal lok' chicu, a'an li uxtananc u ut macua' li mayejac xul”. Lain inc'a' xinchal chixsic'bal li tiqueb xch'ol. Xinchal ban chixsic'baleb laj mac re nak te'yot'ek' xch'ol te'xjal xc'a'ux, chan li Jesús.

Li Jesús quixch'olob xyalal li ayunic

¹⁴ Ut que'cuulac lix tzolom laj Juan riq'uin li Jesús ut que'xye re: —Lao nakabanu ka-ayun rajlal ut eb laj fariseos neque'xbanu x-ayun. ¿C'a'ut nak la tzolom inc'a' neque'xbanu x-ayun? chanqueb. ¹⁵ Ut li Jesús quichak'oc

ut quixye reheb li tijleb a'in: —¿Ma naru ta bi' nak rahak sa' xch'oleb li neque'boke' riq'uin sumlac nak toj cuan li belomej sa' xyankeb? Lajin jo' jun li belomej. Taçuulak xk'eñil nak tin-isik sa' xyankeb tojo'nak te'xbanu x-ayun eb lin tzolom, chan.

Li najter na'leb inc'a' naxc'am rib riq'uin li ac' na'leb

¹⁶ Ma ani naxxiti junak k'el t'icr riq'uin ac' t'icr. Cui ut naxxiti riq'uin ac' t'icr nak tixpuch', taç'osk li ac' t'icr ut naxnimobresi xpejelal li k'el t'icr. ¹⁷ Ut ma ani naq'uehoc ac' vino sa' li k'el bols tz'um. Cui tixq'ue li ac' vino sa' li k'el bols tz'um, tapuq'uek' li k'el tz'um, tahoyek' li vino, ut taosok' ajcui' li bols tz'um. Li ac' vino sa' ac' bols tz'um naq'ueman. Chi jo'can maç'a' nasachman, chan li Jesús.

Li Jesús quixyo'obtesi cui'chic lix rabin laj Jairo

¹⁸ Nak yo chixyebal li c'a'ak re ru a'in reheb, quicuulac riq'uin jun li cujnk xcomoneb li xbenil sa' li cab li neque'xch'utub cui' ribeb laj judío. Quixcuik'ib rib chiru li Jesús ut quixye re: —Lin rabin toje' taçamk. Tatxix taxak ut taq'ue raj la cuuk' sa' xben, ut tayo'lak raj cui'chic, chan. ¹⁹ Quicuacli li Jesús ut ço chirix rochbened lix tzolom. ²⁰ Ut cuan jun li ixk cablaju chihab xticlajic xyajel. Junelic yo lix yajel li ixk a'an ut inc'a' chic natz'ap lix quiq'uel. Quijiloc chixc'atk li Jesús nak yo chi xic, ut quixch'e' li rak'. ²¹ Usta ca'aj cui' li rak' tinch'e', tinq'uirak, chan sa' xch'ol li ixk. ²² Ut li Jesús quixakli ut qui-iloc chirix. Quiril li ixk ut quixye re: —Kana', cauhak taxak a'ch'ol. Xban nak xapab nak cuan incuanquil chaq'uirtesinquil, jo'can nak xatq'uira, chan. Ut sa' ajcui' li honal a'an, li ixk quiq'uira. ²³ Chirix chic a'an li Jesús ço sa' rochoch laj Jairo. Nak quicuulac sa' li rochoch, quirileb li yoqueb chixyabasinquil li xolb ut li japoqueb re chi yabac xban xcamic li xka'al. ²⁴ Ut quixye reheb: —Elenkex arin. Li xka'al a'in yal cuar yo. Moco camenak ta, chan reheb. Ut li tenamit que'oc chixse'enquil. ²⁵ Ut nak ac xrisiheb li tenamit chirix cab, li Jesús qui-oc cuan cui' li xka'al ut quixchap chi ruk' ut li xka'al quicuacli cui'chic chi yo'yo. ²⁶ Ut li c'a'ru quixbanu li Jesús, qui-el resil sa' chixjunil li na'ajej a'an.

Li Jesús quixq'ue chi iloc li cuib chi mutz'

²⁷ Ut nak qui-el aran li Jesús, cuib li mutz' yoqueb chi takenc re ut japoqueb re chixyebal: —Chacuuxtana taxak ku, at lalal xc'ajol li rey David.— ²⁸ Nak ac x-oc li Jesús sa' li cab, que'oc ajcui' li mutz' riq'uin ut li Jesús quixye: —¿Ma nequepab nak cuan incuanquil cheq'uirtesinquil? chan reheb. Ut eb a'an que'chak'oc ut que'xye: —Nakapab, Kacua'.— ²⁹ Tojo'nak li Jesús quixch'e' li xnak' ruheb ut quixye: —Chanru nak xepab, jo'can ajcui' nak chi-uxk li c'a'ru teraj.— ³⁰ Ut que'iloc li xnak' ruheb. Ut li Jesús quixye reheb: —Cherabi chi us li c'a'ru tinye ere. Ma ani aj iq'uin teserak' i li c'a'ru xec'ul, chan reheb. ³¹ Ca'aj cui' tz'akal que'el aran nak que'oc chixserak'inquil resil sa' chixjunil li na'ajej a'an li c'a'ru quixbanu li Jesús reheb.

Li Jesús quixq'uirtesi li cujnk mem

³² Toje' ajcui' te'elk eb a'an nak quic'ame' chak riq'uin li Jesús jun li cujnk mem. Cuan maus aj musik'ej riq'uin. ³³ Li Jesús quiriri li maus aj musik'ej riq'uin ut li cujnk qui-oc chi atinac. C'ajo' nak que'sach xch'ol li tenamit ut que'xye: —Ma jun cua kilom a'in sa' li katenamit Israel.— ³⁴ Aban eb laj fariseo que'xye: —Riq'uin xcuanquil laj tza narisiheb li maus aj musik'ej li cujnk a'an, chanqueb.

Li Jesús quiril xtok'obal ruheb li tenamit

³⁵ Ut li Jesús yō xbeninquit sa' eb li tenamit junjunk ut sa' eb ajcui' li c'alebal. Quixc'ut li xyalal chiruheb sa' li cab li neque'xch'utub cui' ribeb laj judío ut quixch'olob xyalal lix nimajcual cuanquial li Dios chiruheb. Ut yō chixq'uirtesinquit chixjunil li q'uila pay chi yajel ut li raylal. ³⁶ Ut nak quirileb li q'uila tenamit, quixtok'obaheb ru xban nak tacuajenakeb ut raheb sa' xch'ol. Chanchaneb li carner li mac'a' aj ilol reheb. ³⁷ Tojo'nak quixye reheb lix tzolom, —Relic chi yal nabaleb li inc'a' neque'xnau li xyalal. Abanan moco q'uiheb ta li te'xye li xyalal reheb. Chanchaneb li ru li acujmk li mac'a' aj sic'ol re. ³⁸ Jo'can ut tinye ere nak tetz'ama chiru li Kacua' re nak a'an tixtaklaheb laj c'anjel chixch'olobanquil li xyalal chiruheb, chan li Jesús.

10

Li Jesús quixq'ueheb xc'anjel lix cablaju chi tzolom

¹ Sa' jun li cutan li Jesús quixbokeb lix tzolom cablaju riq'uin ut quixq'ueheb xcuanquil chirisinguil li maus aj musik'ej ut quixq'ueheb xcuanquil chixq'uirtesinquileb li yaj, a' yalak c'a'ru chi xyajelil ut raylal. ² A'an a'in lix c'aba'eb lix tzolom cablaju, li quixxakab chok' x-apóstol: li xben, a'an laj Simón, Pedro nayeman re; ut laj Andrés li ritz'in; laj Jacobo ut laj Juan li ritz'in. Laj Zebedeo, a'an lix yucua'eb; ³ laj Felipe ut laj Bartolomé; laj Tomás ut laj Mateo laj titz'ol toj; laj Jacobo li ralal laj Alfeo ut laj Lebeo aj Tadeo xcab xc'aba', ⁴ laj Simón aj Canaán, ut laj Judas Iscariote, a' li quik'axtesin re li Jesús sa' ruk'eb li xic' neque'iloc re. ⁵ Nak quixtaklaheb li cablaju a'in chi c'anjelac, li Jesús quixchak'rabiheb ut quixye reheb: —Mexxic sa' lix tenamiteb li macua'eb aj judío chi moco tex-oc sa' xtenamiteb aj Samaria. ⁶ Texxic ban riq'uineb laj judío. A'aneb li ralal xc'ajol laj Israel. Chanchaneb li carner li sachenakeb. ⁷ Ut nak yokex chi xic, yokex chixch'olobanquil li xyalal ut chixyebal, “cuulac re xk'ehil nak taq'uehek' sa' xcuanquil xban li Dios li taçuank xcuanquil sa' xbeneb li ralal xc'ajol,” cha'kex. ⁸ Cheq'uirtesiheb li yaj, checuaclesiheb cui'chic chi yo'yo li camenak. Cheq'uirtesiheb li saklep rix ut cherisiheb li maus aj musik'ej. Chi mañan xec'ul le cuanquil ut chi mañan ajcui' tebanu li usilal. ⁹ Mac'a' c'a'ru teç'am cherix. Inc'a' teç'am li oro chi moco li plata, chi moco li coc' tumin k'an ru. ¹⁰ Chi moco teç'am xna'aj li c'a'ak re ru taç'anjelac ere sa' be, chi moco teç'am xjalbal le rak', chi moco xjalbal exab, chi moco exuk'. Meç'am li c'a'ak re ru a'in xban nak laj c'anjel, a'an tento nak taq'uehek' re lix tzacaemk. ¹¹ Ut yalak bar tenamitil ut c'alebal toxex-ocak cui', patz'omak ani taç'uluk ere chi sa sa' xch'ol, ut aran texhilank riq'uin toja' yal jok'e texxic. ¹² Ut nak tex-oc sa' li cab, q'uehomak xsahil xch'oleb ut tetz'ama li tuktuquil usilal sa' xbeneb li cuanqeb sa' li cab. ¹³ Ut cui texc'ulek' sa' usilal, taçanak riq'uineb li tuktuquil usilal. Ut cui inc'a' texc'ulek' sa' usilal, inc'a' ajcui' taçanak riq'uineb li tuktuquil usilal. Taşuk'ik cui'chic eriq'uin. ¹⁴ Ut yalak ani inc'a' taç'uluk ere chi moco tarabi le rañin, nak tex-efk sa' li cab a'an, malaj ut sa' li tenamit, teçhik'chik'li poks cuan cherok chok' retalil nak inc'a' chic texc'oxlak chirix li na'ajej a'an. ¹⁵ Relic chi yal tinye ere nak toj cubenak ca'ch'in lix tojbal xmaqueb li tenamit Sodoma ut li tenamit Gomorra chiru lix tojbal xmaqueb li tenamit a'an sa' xk'ehil li rakba atin.

Resil li ra xic' li tachalk sa' xbeneb

¹⁶ Chenauhak nak lain tintaklank ere sa' xyankeb li xic' neque'iloc ere. Chanchanakex li carner sa' xyankeb laj xoj. Sebak ech'ol jo'cakex li c'anti'

ut tɨcək eç'ol jo'cakex li paloma. ¹⁷ Cauhak ɽe ch'ol xban nak cuanqueb li te'k'axtesink ɽe sa' ruk'eb laj rakol atin. Ut chi maç'a' ɽmaç tessaq'uek' xbaneb sa' li cab li neque'xch'utub cui' ribeb laj judío. ¹⁸ Ut texc'amek' chiruheb li acuabej ut chiruheb li rey sa' inc'aba' lain. Ut teç'h'olob li xyalal chiruheb a'an, jo' ajcui' chiruheb li maçua'eb aj judío. ¹⁹ Ut nak toxexxakabək chiruheb, mexc'oxlac chirix li c'a'ru teye, chi moco texc'oxlak chirix çanru tex-atinək xban nak sa' li honal a'an tayehek' ɽe c'a'ru teye. ²⁰ Maçua' laex li tex-atinək. A' ban li Santil Musik'ej taatinək. Yal tixto'oni lix tz'umal ɽe. ²¹ Sa' eb li cutan a'an, cuan li asbej tixk'axtesi li itz'inbej re taçamsik ut cuan li itz'inbej tixk'axtesi li asbej. Ut cuan li yucua'bej tixk'axtesi li alalbej. Ut cuan li alalbej xic' te'rileb lix na' xyucua' ut te'xq'ueheb chi çamsic. ²² Ut chixjunileb xic' te'ilok ɽe sa' inc'aba'. Abanan li ani te'cuyuk xc'ulbal li raylal toj sa' roso'jic lix yu'am, eb a'an te'colek'. ²³ Nak texrahobtesik sa' jun li tenamit, tēxxic sa' jalan çhic. Relic chi yal ninye ɽe nak toj maji' ajcui' nequeçoy xbeninquil chixjunileb li tenamit cuanqueb Israel te'x'nau nak xolinelk lain li C'ajolbej. ²⁴ Junak li yo' chi tzoloc inc'a' naru tixk'ax xcuanquil li yo' chi tzoloc re, chi moco li moç naxk'ax xcuanquil lix patrón. ²⁵ Chic'ojlak xch'ol li yo' chi tzoloc nak taçuulak jo' laj tzolol re, ut li moç jo'cak lix patrón. Cui aj tza nayehe' re laj eçal cab, çma toja' ta çhic inc'a' te'yehék' aj tza reheb li ralal xc'ajol? ²⁶ Jo'can utan mexxucuac chiruheb li xic' neque'iloc ɽe. Ma jun na'leb mukmu anakuan chi inc'a' ta taçuamank ru mokon, ut maç'a' mukmu anakuan chi inc'a' taç'utbesik. ²⁷ Li c'a'ru xexintzol cui' ejunes, a'an teye chiruheb chixjunileb, ut li c'a'ru xinye ɽe ejunes, a'an teye chi cau xyab ɽcux chiruheb chixjunileb li tenamit. ²⁸ Mexxucuac chiruheb laj çamsinel xban nak li amej inc'a' naru te'xcamsi. A' li texucua ru, a'an li Kaçua' li cuan xcuanquil chixçamsinquil li tibelej ut chixtaklanquil li amej sa' xbalba.

Li Dios na-iloc ɽe

²⁹ çMa inc'a' ta bi' nac'ayic cuib chi tzentzeyul chi jun centavo? K'axal cubenak xtz'ak, abanan ma'jun li ch'ina tzentzeyul nacam chi inc'a' ta tixnau li Dios ɽe Yucua'. ³⁰ Jo'can ajcui' li rismal ɽe jolom ajlanbileb chixjunil xban li Dios. ³¹ Jo'can nak mexxucuac chiruheb li xic' neque'iloc ɽe xban nak laex k'axal tertó ɽtz'ak chiruheb nabal chi tzentzeyul. ³² Li ani naxye chiruheb li tenamit nak niqunixpab, lain tinye chiru lin Yucua' cuan sa' çoxa nak a'an li cualal. ³³ Ut li ani tatz'ektanank cue chiruheb li tenamit, lain tintz'ektana ajcui' a'an chiru lin Yucua' cuan sa' çoxa. ³⁴ Mec'oxla nak xinçal ta chixq'uebal li tuktuquil usilal sa' ruchich'och'. Xinçal ban chixch'olobanquil li xyalal; ut xban li xyalal li nach'olobaç, nacuan li ch'a'ajquial. ³⁵ Xinçal ut chixch'olobanquil li xyalal ut li ani tapabank cue, te'xc'ul li raylal. Li alalbej taçuamank sa' ra xic' riq'uin lix yucua', ut li co'bej taçuamank sa' ra xic' riq'uin lix na', ut li alibej taçuamank sa' ra xic' riq'uin li na'bej sa' inc'aba' lain. ³⁶ Li cuanqueb sa' jun cabal, xic' te'ril rib sa' inc'aba' lain. ³⁷ Ut ani k'axal naxra xna' xyucua' çicuu lain, moco xc'ulub ta nak tinc'ul çok' cualal. Ut ani k'axal naxra li ralal xc'ajol çicuu lain, moco xc'ulub ta nak tinc'ul çok' cualal. ³⁸ Li ani tixcuy intakenquil usta tixc'ul li çamsic sa' inc'aba', li jun a'an xc'ulub nak tinc'ul çok' cualal. Abanan li ani inc'a' tixcuy intakenquil, li jun a'an moco xc'ulub ta nak tinc'ul çok' cualal. ³⁹ Li ani naxra lix yu'am arin sa' ruchich'och', a'an tixsach li junelic yu'am. Ut li ani tixsach lix yu'am arin sa' ruchich'och' sa' inc'aba' lain, a'an tareçhani li junelic yu'am.

Lix k'ajçamunquil li nac'uluc reheb lix tzolom li Jesús

⁴⁰ Li ani tac'uluk ere laex, tinixc'ul ajcui' lain. Ut li ani tac'uluk cue, tixc'ul ajcui' li xtaklan chak cue. ⁴¹ Li ani tac'uluk re junak profeta chi anchal xch'ol xban nak a'an naxye ratin li Dios, li jo' q'ualix k'ajcamunquil li tixc'ul li profeta, a'an ajcui' li tixc'ul li tac'uluk re. Ut li ani tac'uluk re li tic xch'ol xban nak a'an tic xch'ol, li jo' q'ualix k'ajcamunquil li tixc'ul li tic xch'ol, a'an ajcui' li tixc'ul li tac'uluk re. ⁴² Li ani tixq'ue jun sec'ak ruc'a junak reheb lin tzolom usta cubenak xcuanquil, cui tixq'ue li ruc'a xban nak a'an intzolom, relic chi yal ninye ere nak li jun a'an tixc'ul li x'ajcamunquil.

11

Laj Juan laj Cubsihom Ha' naxtakla xpatz'bal ani li Jesús

¹ Nak quirake' li Jesús chixtaklanquileb chi xic chi c'anjelac lix tzolom cablaju, qui-el aran ut co chixch'olobanquil li xyalal sa' eb li tenamit. ² Ac cuan chi prexil laj Juan laj Cubsihom Ha' nak quirabi resil li c'a'ru yo chixbanunquil li Cristo. Laj Juan quixtaklaheb lix tzolom chi atinac riq'uin ut chixpatz'bal re: ³ ¿Ma laet li Cristo li yechi'inbil, li yoco chiroybeninquil? ¿Malaj toj takoybeni chic junak? chanqueb. ⁴ Quichak'oc li Jesús ut quixye reheb: —Ayukex ut tesorak'i re laj Juan li c'a'ru yoquin chixbanunquil cheru ut teye re li c'a'ru yoqex chirabinquil chixcui lain. ⁵ Yehomak re nak eb li mutz' neque'iloc chic; eb li yek' rok neque'b'ec chic; eb li saklep rix xe'q'uirtesic; eb li tz'ap xic neque'abin chic; eb li camenak neque'cuaclesic cui'chic chi yo'yo; ut eb li neba' yoqeb chirabinquil resil li usilal, cha'kex re. ⁶ Us xak reheb li ani inc'a' tach'inank xch'ol inban, chan li Jesús. ⁷ Ut nak que'el eb a'an, qui-oc chi atinac li Jesús riq'uibeb li tenamit chirix laj Juan ut quixye chi jo'ca'in: —¿C'a'ru coxeril chak sa' li chaki ch'och'? ¿Ma junak cujnk nacuiban xch'ol chanchan li caxlan aj yo rec'asinquil xban ik' coxeril chak? ⁸ ¿C'a' put ru coxeril chak? ¿Ma junak cujnk chabil xtikibanquil coxeril chak? A' li chabileb rak' sa' rochocheb li rey cuanqueb. ⁹ ¿C'a'ru coxeril chak? ¿Ma junak profeta coxeril chak? Yal nak a'an jun profeta. Abanan lain tinye ere nak li jun a'in naxk'ax ru xcuanquil junak profeta. ¹⁰ Chirix laj Juan tz'ibanbil sa' li Santil Hu nak naxye chi jo'ca'in: A'ut lain tintakla lin takl aj c'amol be chacuu. A'an tach'olobank xyalal chiruheb li tenamit re nak eb a'an yo'on cuankeb chac'ulbal laet. (Mal. 3:1)

¹¹ Relic chi yal tinye ere nak ma jun reheb li neque'yo'la arin sa' ruchich'och' naxk'ax xcuanquil laj Juan laj Cubsihom Ha'. Aban li k'axal ca'ch'in sa' lix nimajcual cuanquil li Dios, k'axal us chok' re a'an chiru laj Juan (xban nak laj Juan inc'a' quiril lix nimajcual cuanquil li Dios arin sa' ruchich'och'). ¹² Chalen chak nak quixtiquib xch'olobanquil xyalal laj Juan laj Cubsihom Ha' ut toj anakcuan cuanqueb li neque'xyal xxakabanquil lix nimajcual cuanquil li Dios, yal xjuneseb, ut que'raj xbanunquil sa' junpat usta riq'uin raylal tauxmank. ¹³ Chixjunileb li profeta jo' cui' lix chak'rab laj Moisés, toj riq'uin laj Juan xolrakek' xyebal nak taxakabak lix nimajcual cuanquil li Dios. ¹⁴ Ut cui teraj xtaubal lix yalal chirix laj Juan, a'an laj Elías li tol-elk. ¹⁵ Li ani na-abin re li yoquin xyebal chixq'uehak retal chi us li cuatin xban nak cuan xyalal. ¹⁶ ¿Ani ta cui' aj iq'uin taruk tebinjuntak'eta li cuanqueb sa' ruchich'och' anakcuan? Mac'a' nacuulac chiruheb. Chanchaneb li coc'al li neque'c'ojla chi batz'unc sa' eb li c'ayil ut neque'xjap re chixyebal reheb lix comon: ¹⁷ “Xkayabasi li kaxqlb ut inc'a' xexxajoc; xobichan chi ra sa' kach'ol, ut inc'a' xyot'e' ech'ol chi moco xexyabac xban”, chanqueb. ¹⁸ Nak quic'ulun laj Juan laj Cubsihom Ha', cuan

li inc'a' quixtzaca, ut cuan li inc'a' quiruc', ut eb li tenamit inc'a' que'xc'ul ut que'xye, "Maus aj musik'ej cuan riq'uin", chanqueb. ¹⁹ Ut nak xinc'ulun lain li C'ajolbej, nincua'ac ut nin-uc'ac, ut inc'a' ajcui' quine'xc'ul sa' xyalal. Eb li tenamit neque'xye chicuix, "Li jun cuan arin, junes cua'ac ut junes uc'ac vino naxbanu. A'an ramigueb laj mac ut eb laj tij'ol toj", chanqueb. A'ut li na'leb li q'uebil xban li Dios, xakxo xcuanquil riq'uin li xbanu laj Juan ut li c'a'ru xinbanu lain.

Ra te'xc'ul li tenamit cui inc'a' te'xxoto xmac

²⁰ Tojo'nak li Jesús qui-oc chixk'usbaleb li tenamit sa' eb li na'ajeb bar quixbanu cui' nabal li milagro xban nak inc'a' que'yot'e' xch'oleb ut inc'a' que'xjal xc'a'uxeb, ut quixye reheb: ²¹ —Raylal chalel sa' eben, ex aj Corazín. Raylal chalel sa' eben ex aj Betsaida. Cui ta qui-uxman aran Tiro li milagro a'in li xinbanu cheru ut cui ta qui-uxman aran Sidón, ac najter raj que'xq'ue li cha sa' xjolomeb ut ac que'xq'ue raj li k'es ru t'icr chirixeb chok' retalil nak raheb sa' xch'ol ut que'yot'e' raj xch'oleb ut que'xjal raj xc'a'uxeb. ²² Jo'can ut nak tinye ere nak sa' xk'ehil li rakba atin, k'axal cui'chic li raylal li tec'ul laex chiru li raylal li te'xc'ul eb laj Tiro ut eb laj Sidón. ²³ Ut laex aj Capernaum, c'ajo' nak nequenimobresi erib. ¿Ma nequec'oxla nak tataksik le cuanquil toj sa' choxa? Taçubsik ban le cuanquil toj sa' xna'ajeb li camenak. Cui ta riq'uineb laj Sodoma quilaj-uxman eb li milagro li x-uxman eriq'uin laex, toj cuanqueb raj sa' li cutan anakcuan. ²⁴ Jo'can ut nak tinye ere nak sa' xk'ehil li rakba atin, k'axal cui'chic nabal lix tojbal emac li tec'ul laex chiru li te'xc'ul eb laj Sodoma.—

Chalkex cuiq'uin ut texinq'ue chi hilanc, chan li Jesús

²⁵ Sa' eb li cutan a'an, li Jesús quitijoc ut quixye: —At inYucua', laat laj echal re li choxa jo' ajcui' li ruchich'och'. Ninbantioxi chaçuu xban nak xamuk li xyalal chirix lix nimal la cuanquail chiruheb li cuanqueb xna'leb nak neque'xye rib, ut xamuk ajcui' chiruheb li tzolubileb. Ut xac'ut li xyalal chiruheb li cubenakeb xcuanquil, li chanchaneb coc'al. ²⁶ Xabanu chi jo'can xban nak jo'can xcuaul chaçuu, chan li Jesús nak quitijoc. ²⁷ Ut quixye reheb li tenamit: —Chixjunil li c'a'ak re ru xk'axtesi sa' cuuk' lin Yucua'. Ma ani nana'oc cuu lain li C'ajolbej, ca'aj cui' li Acuabej Dios. Ma ani nana'oc ru li Acuabej Dios, ca'aj cui' lain li C'ajolbej. Ut tana'ek' ajcui' ru xbaneb li ani tinc'ut cui' li xyalal, lain li C'ajolbej. ²⁸ Jo'can ut chalkex cuiq'uin chejunilex li lubluquex ut li tacuajenakex ut lain texinq'ue chi hilanc. ²⁹ C'ulumak li yugo li tinq'ue sa' eben ut tzolomak erib cuiq'uin xban nak tulanin ut k'un inch'ol ut tetau xc'ojobanquil ech'ol, ³⁰ xban nak lin yugo k'un ut seb li ik li tinq'ue sa' eben.

12

Lix tzolom li Jesús que'xch'ot ru li acujmk sa' li hilobal cutan

¹ Ut chirix chic a'an sa' jun hilobal cutan, li Jesús yo' chi bec bar cui' aubil li acujmk trigo. Ut eb lix tzolom te'tz'ocak ut que'oc chixch'otbal ru li acujmk ut yoqueb chixcua'bal. ² Ut nak que'ril eb laj fariseo, que'xye re li Jesús: —Ileb la' tzolom. Yoqueb chixsic'bal ru li acujmk. Yoqueb chixbanunquil li c'anjel moco uxc ta naraj sa' li hilobal cutan, chanqueb. ³ Li Jesús quichak'oc ut quixye reheb: —¿Ma inc'a' ta bi' xeril sa' li Santil Hu c'a'ru quixbanu laj David nak a'an ut eb li rochben te'tz'ocak? ⁴ Qui-oc sa' li cab bar neque'xlok'oni cui' li Dios ut cuan aran li mayejanbil caxlan cua. Maçua' raj re laj David xcua'bal li caxlan cua a'an, chi moco reheb li rochben. Juneseb laj tij naru neque'xcua' li mayejanbil caxlan cua. Abanan laj David quixcua'. ⁵ Ut, ¿ma inc'a' erilom

sa' lix chak'rab laj Moisés nak eb laj tij maç'a' xmaqueb nak neque'xk'et li hilobał cutan nak neque'c'anjelac sa' rochoch li Dios? ⁶ Lajin tınye ere nak cuanquin arin laın, ut k'axal nim incuanquil chiru li rochoch li Dios. ⁷ Laex inc'a' nequenau xyalał li aatin a'in li tz'ıbanbil sa' li Santil Hu: Li nacualac chicuu laın, a'an nak tex-uxtañank u ut maçua' nak texmayejak xul. (Os. 6:6)

Cui ta xetau ru li na'leb a'in, inc'a' raj xetz'ektanaheb li maç'a'eb xmaç.

⁸ Lajin li C'ajolbej. Lajin laj eçal re li hilobał cutan. Cuan incuanquil chixyebal c'a'ru tauxmañank sa' li hilobał cutan, chan li Jesús.

Li Jesús quixq'uirtesi li cuñk sic li ruk'

⁹ Ut nak qui-el chak aran, quichal sa' li cab li neque'xch'utub cui' ribeb laj judío. ¹⁰ Ut aran cuan jun li cuñk sic jun li ruk'. Ut eb laj fariseo que'xpatz' re li Jesús yal re xjıthal: —¿Ma us q'uirtesinc sa' li hilobał cutan? ¹¹ Ut li Jesús quichak'oc ut quixye reheb: —Cui junak sa' eyank cuan junak lix carner tať'ane' sa' junak jul sa' li hilobał cutan, ¿ma inc'a' raj toxchap ut toxrisi chak sa' li jul? ¹² ¿Ma inc'a' ta bi' numtajenak terto xtz'ak junak cuñk chiru junak carner? Cui us xcolbal li carner sa' li hilobał cutan, ¿ma inc'a' ta bi' k'axal cui'chic us xtenk'anquil li cuñk sa' li hilobał cutan?— ¹³ Tojo'nak quixye re li cuñk li sic li ruk': —Ye' la cuuk', chan re. Ut li cuñk quixye' li ruk' ut sa' junpať quicana chi maç'a' reç' jo' li jun chic. ¹⁴ Ut eb laj fariseo que'el aran ut que'oc chixc'ubanquil chanru nak te'xcamsi li Jesús.

Najter quiyeman resil xc'anjel li Jesucristo

¹⁵ Li Jesús quixnau nak yoqueb xc'ubanquil chanru nak te'xcamsi ut qui-el sa' li na'ajej a'an. Ut nabaleb li tenamit que'taken re ut naxq'uirtesiheb chixjunileb li yaj. ¹⁶ Ut li Jesús quixye reheb nak ma ani aj e te'xye resil nak a'an li xq'uirtesin reheb. ¹⁷ A'in quic'ulman jo' yebil chak xban li profeta Isaías nak quixye chi jo'ca'in:

¹⁸ A'an a'in laj c'anjel chicuu, li sic'bil ru inban. A'an ninra ut riq'uin a'an nasaho' lin ch'ol. Ting'ue re lin musik', ut a'an tayehok resil li rakba aatin li çalç re sa' xbeneb li tenamit.

¹⁹ Inc'a' taçuech'ink chi moco tıxjap re ut ma ani taabınk re lix yağ xcux sa' be.

²⁰ Inc'a' tıxrahobtesiheb li tacuajenakeb. Inc'a' tıxchoy xtokbal li caxlan aj li ac tokeç' re, chi moco tıxchoy xchupbal ru li xam li toj yo chi ełc xsibel toj nak tıxxakab lix cuanquil ut tarakok aatin sa' tiğualal.

²¹ Ut chixjunileb li tenamit ca'aj cui' riq'uin a'an te'yo'onınk. (Is. 42:2-4)

Maç'a' chic xcuybal xmaç li namajecuan re li Santil Musik'ej

²² Ut mokon chic quic'ame' chak riq'uin li Jesús jun li cuñk cuan maus aj musik'ej riq'uin. Mutz' ut mem li cuñk a'an. Ut li Jesús quixq'uirtesi, ut li cuñk li mutz' ut mem nak quicuan, quiatinac ut qui-iloc chic. ²³ Ut chixjunileb li tenamit que'sach xch'ol ut yoqueb chixyebal: —¿Malaj a'in ta ut ralał li rey David, li yoço chiroybeninquil? ²⁴ Ut eb laj fariseo nak que'rabi a'an, que'xye: —Li cuñk a'in na-isin maus aj musik'ej riq'uin xcuanquil laj Beelsebú, lix yucua'ıleb li maus aj musik'ej, chanqueb. ²⁵ Li Jesús quixnau li c'a'ru yoqueb chixc'oxlanquil ut quixye reheb: —Cui cuan jun tepak chi tenamit xic' te'ril rib chi ribileb rib, li jun tep chi tenamit a'an tıxsach xcuanquil xjunes rib. Ut cui cuan ta jun cabalak xic' te'ril rib chi ribileb rib, li jun cabal a'an te'xsach xcuanquil lix jun cablal. ²⁶ Jo'can ajcui' laj tza cui te'xpleti rib chi ribileb rib, a'an tıxsach xcuanquil xjunes rib. ²⁷ Cui ut sa' xc'aba' laj tza nacuisiheb li maus aj musik'ej, ¿anı sa' aj c'aba' neque'ısın maus

aj musik'ej li neque'taken ere? Jo'can nak a'aneb ajcui' te'yehok re nak inc'a' yal li yoquex chixyebal. ²⁸ Cui ut riq'uin xcuauquil li Dios nacuisiheb li maus aj musik'ej, riq'uin a'an nac'utun nak relic chi yal ac xc'ulun sa' eyank lix nimajcual cuauquilal li Dios. ²⁹ Ut chanru nak taoc junak sa' rochoch jun cujnk cau rib chixmak'bal li c'a'ru cuan re cui inc'a' ta xben cua tixbac' li cujnk cau rib, tojo'nak taoc chixc'ambal li c'a'ru cuan re. ³⁰ Li ani inc'a' na-oquen chicuix, a'an xic' niquinril. Ut ani inc'a' naxococ cuochben, a'an pajinc naxbanu. ³¹ Relic chi yal ninye ere nak tacuyman'k tasachman'k lix maqueb li cristian ut tacuyman'k ajcui' xmaqueb li neque'majecuan. Abanan li ani tamajecuan'k re li Santil Musik'ej, inc'a' tacuyek' tasachek' lix mac. ³² Li ani tahobok cue lain, li C'ajolbej, tacuyek' xmac; abanan li ani tahobok re li Santil Musik'ej inc'a' tacuyek' xmac chi moco sa' eb li cutan a'in, chi moco sa' eb li cutan chalel. Cuank ban sa' xben chi junelic lix tojbal rix li nimla mac a'an. ³³ Jo'can ajcui' cui chabil junak che', chabil ajcui' li ru. Cui inc'a' us li che', li ru inc'a' ajcui' us. Ut riq'uin li naruchin, nana'li ru li che'. ³⁴ Laex chanchanex ral li c'ambolay! ¿Chan ta cui' ru nak tex-atinak chabil atin nak moco usex ta? Jo' chanru lix ch'ol junak, jo'can ajcui' naatinac. ³⁵ Li chabil cujnk naatinac chi chabil xban nak chabil li cuan sa' xch'ol. Ut li cujnk li inc'a' us lix na'leb, yibru naatinac xban nak inc'a' us li cuan sa' xch'ol. ³⁶ Lain tinya ere nak sa' xk'ehil li rakba atin li junjunk tixk'axtesi xcuent chirix chixjunil li jo' majo'il aj atin quixye. ³⁷ Riq'uin le ratin taq'uehek' eretal. Riq'uin le ratin tac'utunk nak mac'a' le mac malaj riq'uin le ratin tatenebak li tojbal mac sa' eben.—

Eb laj fariseo que'xtz'ama li milagro

³⁸ Cuan xcomoneb laj tz'ib ut xcomoneb laj fariseo que'atinac ut que'xye: —At tzoloneb, banu junak milagro chiku. C'ut chiku nak riq'uin li Dios nachal la cuanquil, chanqueb. ³⁹ Ut li Jesús quichak'oc ut quixye reheb: —Li inc'a' useb xna'leb neque'raj nak tac'utbesik' junak milagro chiruheb, aban ma jun milagro tac'utbesik' chiruheb. Ca'aj cui' li milagro li qui-ux re laj Jonás, li quic'utbesic' chiruheb junxil, a'an li tac'utbesiman'k chiruheb. ⁴⁰ Jo' nak laj Jonás oxib cutan ut oxib k'ojyin quicuan chak sa' xsa' li nimla car, jo'can ajcui' nak lain li C'ajolbej tincuan'k oxib cutan ut oxib k'ojyin sa' li muklebal. ⁴¹ Laj Jonás quixch'olob xyalal chiruheb laj Nínive ut que'yot'e' xch'ol que'xjal xc'a'ux. Ut lain k'axal nim incuanquil chiru laj Jonás ut cuanquin arin sa' eyank, abanan laex inc'a' niquinepab. Jo'can nak eb laj Nínive te'cuaclik' chak sa' xk'ehil li rakba atin erochben ut texjiteb xban nak inc'a' nequexpaban. ⁴² Li ixk' li quicuan chok' reina sa' li tenamit li cuan sa' li sur taquaclik' chak sa' xk'ehil nak tarakek' atin sa' eben ut tixye nak cuan emac xban nak inc'a' nequexpaban. A'an quichal chak toj sa' xmaril li ruchich'och' chirabinquil lix na'leb laj Salomón. Ut lain k'axal cui'chic cuan inna'leb chiru laj Salomón ut cuanquin arin sa' eyank. Abanan inc'a' nequepab li cuatin. ⁴³ Li maus aj musik'ej nak ac x-el riq'uin junak cujnk, nalajnume' sa' li chaki na'ajej ut yo chixsic'bal bar taoc chi hilanc. Ut ma bar naxtau xna'aj. ⁴⁴ Tojo'nak naxye sa' xch'ol: —Lain tinsuk'ik' cui'chic riq'uin li cujnk bar quin-el cui' chak, chan. Ut nak nocoxtau li cujnk, chanchan jun li cab mac'a' chic cuan chi sa', mesunbil ut cauresinbil re oybeninc. ⁴⁵ Ut li maus aj musik'ej naxsic' cuukub chic chi maus aj musik'ej k'axal cui'chic numtajanek xmausilaleb chiru a'an. Neque'oc chi cuanc riq'uin li cujnk. Ut lix na'leb li cujnk a'an numtajanekak' chic xyibal ru chiru nak xcuau chak junxil. Ut jo'can ajcui' tec'ul laex li numtajanek le mausilal.

Lix na'ut eb li ritz'in li Jesús

⁴⁶ Ut toj yo ajcui' chi atinac li Jesús riq'uineb li tenamit nak quicuulac aran lix na' rochbeneb li ritz'in li Jesús. Cuanqueb chirix cab ut te'raj raj ratinanquileb. ⁴⁷ Ut jun quiyehoc chak re li Jesús: —Kacua', la na' ut eb la cujtz'in cuanqueb chirix cab. Te'raj acuatinanquile. ⁴⁸ Ut li Jesús quixye re: —¿Ani lin na' ut aniehb li cujtz'in nak nequec'oxla laex?— ⁴⁹ Ut quixye' li ruk' cuanqueb cui' lix tzolom ut quixye: —A'ineb lin na' ut a'ineb li cujtz'in. ⁵⁰ Chixjunileb li te'banunk re li naraj lin Yucua' li cuan sa' choxa, a'aneb li cujtz'in, a'aneb li cuanab ut a'aneb lin na', chan.

13

Li jaljoquil ru atin chirix laj acuinél

¹ Ut sa' li cutan a'an, li Jesús qui-el sa' li cab ut coxc'ojlak chire li palau. ² Ut que'cuulac li q'uila tenamit riq'uin chirabinquile. Xban xq'uialeb li tenamit, li Jesús qui-oc sa' jun li jucub cuan sa' li palau ut quic'ojla chi sa'. Ut chixjunileb li tenamit xakxoqueb chire li ha'. ³ Ut nabal c'a'ak re ru quixtzoleb cui' riq'uin jaljoquil ru atin, ut quixye reheb: —Abihomak li tinye ere. Jun aj acuinél co chi auc. ⁴ Ut nak yo chixhirbal li iyaj, cuan quinak chire be. Que'chal li xul li neque'xic'an ut que'xcua' li iyaj. ⁵ Ut cuan ajcui' li iyaj quinak sa' li pec ru bar mac'a' cui' mas li ch'och'. Sa' junpat quimok, abanan inc'a' quixchap xxe' xban nak jay li ch'och' sa' xben li pec. ⁶ Nak quichal li sak'e quichakic li acujmk xban nak inc'a' cham naxic lix xe'. ⁷ Ut cuan cui'chic li iyaj quinak sa' xyank li q'uix. Ut nak quichamo' li q'uix sa' xben, quixnat' li acujmk. ⁸ Ut cuan cui'chic li iyaj quinak sa' li chabil ch'och'. Quimok ut quiuichin. Cuan quixq'ue lajatk xca'c'al ru (30). Cuan quixq'ue oxtak'al ru (60), ut cuan cui'chic quixq'ue o'tak'al ru (100) li junjunk. ⁹ Tojo'nak li Jesús quixye reheb: —Li ani na-abin, chixq'uehak retal li c'a'ru tinye, chan.

Li Jesús quixye c'a'ru aj e nak cuan li jaljoquil ru atin

¹⁰ Mokon chic que'cuulac lix tzolom riq'uin li Jesús, ut que'xye re: —¿C'a'ut nak nacacuatinaheb sa' jaljoquil ru atin?— ¹¹ Li Jesús quichak'oc ut quixye reheb: —Q'uebil ere laex re nak tenau xyalal li mukmuquil na'leb chirix lix nimajcal cuanquial li Dios. Aban eb a'an inc'a' q'uebil reheb re te'xnau li na'leb a'an. ¹² A' li ani na'xtau ru li xyalal, k'axal cui'chic nabal taq'uehek' chixnau; a'ut li ani ca'ch'in ajcui' naxnau, taisik chiru li jo' q'uial naxnau. ¹³ Jo'can nak ninatinac riq'uineb sa' jaljoquil ru atin xban nak usta yoqueb chi iloc, abanan inc'a' te'xq'ue retal. Usta yoqueb chi abinc, abanan inc'a' te'xtau xyalal. ¹⁴ Chi jo'can natz'akloc ru li quiyehoc xban li profeta Isaías nak quixye chi jo'ca'in: Cuulaj cuulajeb chirabinquile ut inc'a' neque'xtau xyalal. Ut cuulaj cuulajeb chirilbal ut inc'a' neque'xq'ue retal li c'a'ru neque'ril. ¹⁵ Li tenamit a'in xe'alo' lix ch'oleb ut chanchan tz'aptz'o lix xiqueb ut chanchaneb li mutz'. Jo'can nak inc'a' neque'xnau li xyalal. Cui ta macua' jo'can, te'ilok raj ut te'xq'ue raj retal li te'ril ut te'abink raj ut te'xtau raj ru li neque'rabi ut te'yot'ek' raj xch'ol ut te'xjal raj xc'a'uxeb ut lain tebinq'uirtesi raj. (Is. 6:9-10) ¹⁶ Us xak ere laex xban nak nequex-iloc ut neque'ue retal li c'a'ru nequeril. Nequex-abin ut nequetau ru lix yalal. ¹⁷ Relic chi yal tinye ere nak nabaleb li profeta ut nabaleb li tiq'ueb xch'ol que'raj rilbal li c'a'ru yoquex chirilbal ut inc'a' que'ril. Ut que'raj rabinquile li c'a'ru yoquex chirabinquile ut inc'a' que'rabi.

Li Jesús quixch'olob xyalal chirix laj acuinél

¹⁸ Abihomak lix yalal li jaljoquil ru atin a'in chirix laj acuinel. ¹⁹ Li ani nabin re li xyalal chirix lix nimajcual cuanquilal li Dios ut inc'a' naxtau ru, a'an chanchan li iyaj li quinak chire be. Ut laj tza nachal ut naxmak' chiru li xyalal ut sa' junpat nasach sa' xch'ol. ²⁰ Ut li iyaj li quinak sa' li pec ru li inc'a' quixchap xxe', a'aneb li neque'abin re li ratin li Dios ut sa' junpat neque'xpab chi saheb sa' xch'oleb. ²¹ Abanan inc'a' nacana sa' xch'oleb. Nak nachal junak raylal, malaj ch'a'ajquilal sa' xbeneb xban lix pabaleb, inc'a' neque'xcuy xnumsinguil. Sa' junpat neque'ch'inan xch'ol. ²² Ut li iyaj li quinak sa' xyank li q'uix, a'aneb li neque'abin re li ratin li Dios. Abanan ca'aj cui' li c'a'ak re ru cuan sa' ruchich'och' neque'xc'oxla, jo' li biomal ut xrabal ru li c'a'ak chic re ru. Ut a'an li naramoc lix yalal chiruheb. Mac'a' na-oc cui' li ratin li Dios chiruheb. ²³ Ut li iyaj li quinak sa' li chabil ch'och', a'aneb li neque'rabi ut neque'xpab ut neque'xtau ru chi tz'akal li ratin li Dios. Neque'q'ui chi us sa' lix pabaleb, jo' li acujmk li naruchin lajetk xca'tak'al (30) ut li naxq'ue oxtak'al (60), ut li naxq'ue o'tak'al ru (100) li junjunk.

Li jaljoquil ru atin chirix li pim li inc'a' us

²⁴ Ut quixye jun chic li jaljoquil ru atin reheb li tenamit: Lix nimajcual cuanquilal li Dios chanchan jun li cujnk quirau li chabil riyajil li trigo sa' lix ch'och'. ²⁵ Ut nak ac xe'cuar chixjunileb, quicuulac li xic' na-iloc re laj echal re li ch'och' ut sa' xyank li trigo coxrau chak li riyajil li yibru pim chanchan ajcui' li trigo ut co. ²⁶ Ut nak quimok chak li acujmk ut quijuchin, tojo'nak quic'utun ajcui' li pim. ²⁷ Que'cuulac ut eb laj c'anjel riq'uin laj echal re li ch'och' ut que'xye: —Kacua', ¿ma macua' chabil iyaj li xacuau sa' li ch'och'? ¿Bar put xchal li pim cuan chi sa'?— ²⁸ Ut a'an quixye reheb: —Jun li cujnk xic' na-iloc cue xbanun re a'in, chan. Ut eb laj c'anjel que'xye: —¿Ma tacuaj toxic ut toxkamich'?— ²⁹ Ut laj echal re li ch'och' quixye: —Inc'a'. Mare sa' xmich'bal li pim naru temich' ajcui' li acujmk. ³⁰ Canabomak chi q'ujc chi xcabichaleb toj sa' xk'ehil xsic'bal ru li trigo. Ut sa' xk'ehil li xsic'bal, tinye reheb laj sic'ol re: —Xocomak junxil li pim ut bac'omak chi job re xc'atbal. A'ut li trigo c'ulahomak sa' li rochochil.—

Li jaljoquil ru atin chirix li mostaza

³¹ Li Jesús quixye jun chic li jaljoquil ru atin reheb: Lix nimajcual cuanquilal li Dios, a'an chanchan li riyajil li njnki mostaza, li quixc'am jun li cujnk ut quirau sa' lix ch'och'. ³² Li riyajil li mostaza coc' chiruheb chixjunil li iyaj cuan. Ut nak naq'ui, njnk chi us nacuulac. Naxk'ax xteram li acujmk. Chanchan jun ton li che' ut eb laj xic'anel xul neque'xyib lix soc sa' eb li ruk'.

Li jaljoquil ru atin chirix xch'amal xk'emal li caxlan cua

³³ Jun chic li jaljoquil ru atin quixye: Jun li ixk quixq'ue ca'ch'in lix ch'amal caxlan cua sa' xyank li oxib bisoc li c'aj ut quisipo' li k'em xban, ut nabal chic li caxlan cua qui-el. Lix nimajcual cuanquilal li Dios chanchan ajcui' a'an. Nak neque'rabi resil, nabal neque'paban re.

C'a'ru rajbal nak quiatinac sa' jaljoquil ru atin li Jesús

³⁴ Chixjunil a'in sa' jaljoquil ru atin quixye li Jesús reheb li q'uila tenamit. Ut mac'a' quixye reheb chi macua' ta sa' jaljoquil ru atin. ³⁵ Nak quixbanu chi jo'can quitz'akloc ru li quixye li profeta nak quixye chi jo'ca'in: Tinatınac riq'uibeb sa' jaljoquil ru atin. Tinch'olob xyalal li c'a'ak re ru mukmu chak chalen sa' xticlajic li ruchich'och'. (Sał. 78:2)

Li Jesús quixch'olob xyalal chirix li yibru pim

³⁶ Ut nak quixchak'rabiheb li tenamit, li Jesús qui-oc sa' cab. Ut nak que'cuulac eb lix tzolom riq'uin, que'xye re: —Kaçua', ch'olob chiku li xyalal li jaljoquil ru atin chirix li yibru pim sa' li acujmk, chanqueb. ³⁷ Quichak'oc li Jesús ut quixye reheb: —Li na-acuoc re li çhabil iyaj, a'an lain li C'ajolbej. ³⁸ Ut li ch'och', a'an li ruchich'och'. Ut li çhabil iyaj, a'aneb li cuanqueb rubel xcuanquil li nimajcual Dios. Ut li yibru pim, a'aneb li cuanqueb rubel xcuanquil laj tza. ³⁹ Ut li xic' na-iloc, a'an li qui-acuoc re li yibru pim. A'an laj tza. Ut lix k'ehil xsic'bal ru li acujmk, a'an li roso'jic li ruchich'och'. Ut eb laj sic'ol re, a'aneb lix ángel li Dios. ⁴⁰ Ut jo' ajcui' nak nach'utubac ut nac'ate' sa' xam li pim, jo'can ajcui' nak toxrakek' li ruchich'och' a'in. ⁴¹ Lain li C'ajolbej tintaklaheb chak lin ángel ut eb a'an tole'isjnk reheb chixjunileb laj maç sa' xyankeb li cuanqueb rubel xnimajcual cuanquilal li Dios. Ut te'isik ajcui' chixjunileb li neque'g'uehoc re chi maçobc li tenamit. ⁴² Ut te'q'uehek' sa' li horno li lochlo cui' li xam. Ut aran taçuank li yabac ut li c'uxuxjnc ruch e xban li raylal li te'xc'ul. ⁴³ Ut li tiqueb xch'ol te'q'uehek' xlok'al. Chanchanakeb li sak'e sa' lix nimajcual cuanquilal li Dios lix Yucua'eb. Li ani na-abin re li yoquin chixyebal chixq'uehak retal chi us li ninye.

Li jaljoquil ru atin chirix li tumin mukmu sa' ch'och'

⁴⁴ Lix nimajcual cuanquilal li choxa, a'an chanchan li tumin mukbil sa' ch'och'. Quitauman xban jun li cujnk. Ut li cujnk a'an quixmuk cui'chic xca' sut li tumin. K'axal quisaho' sa' xch'ol nak coxc'ayi chixjunil li c'a'ru cuan re ut quixlok' li ch'och' li mukmu cui' li tumin.

Li jaljoquil ru atin chirix li k'ol k'axal tertó xtz'ak

⁴⁵ Ut lix nimajcual cuanquilal li Dios, a'an chanchan ajcui' jun li cujnk aj yaconel li naxsic' li tertóquil pec perla xc'aba'. ⁴⁶ Ut nak quixtau jun li perla k'axal çhabil, quixc'ayi chixjunil li c'a'ru cuan re ut quixlok' li perla li k'axal tertó xtz'ak.

Li jaljoquil ru atin chirix li yoy re chapoc car

⁴⁷ Jo'can ajcui' lix nimajcual cuanquilal li Dios, a'an chanchan li yoy li quiq'ueman sa' li palau ut q'uila pay chi car quirisi chak. ⁴⁸ Ut nak quinujac, que'risi chire li ha' ut que'oc çhixsic'bal ru li car. Li çhabil que'xxoc ut que'xq'ue sa' li chacach ut li inc'a' us que'xtz'ek. ⁴⁹ Jo'can ajcui' tauxmank sa' roso'jic li ruchich'och'. Te'chalk eb li ángel ut a'an tole'isjnk reheb li inc'a' useb xna'leb sa' xyankeb li tiqueb xch'ol. ⁵⁰ Ut te'q'uehek' li inc'a' useb xna'leb sa' li horno li lochlo cui' li xam. Ut aran taçuank li yabac ut li c'uxuxjnc ruch e xban li raylal li te'xc'ul. ⁵¹ Li Jesús quixpatz' reheb: —¿Ma xetau xyalal chixjunil li jaljoquil ru atin a'in?— Eb a'an que'chak'oc ut que'xye re: —Kaçua', xkatau xyalal, chanqueb. ⁵² Li Jesús quixye reheb: —Jo'can nak chixjunileb li neque'xnau c'a'ru naxye sa' li chak'rab ut neque'xtzol rib cuiq'uin, eb a'an chanchaneb laj eçhal cab li narisi sa' lix c'ulebal li c'a'ru ac' jo' ajcui' li c'a'ru k'el, chan li Jesús. (Quixye chi jo'can xban nak cuan xlok'al li na'leb q'uebil najter xban li Dios ut cuan ajcui' xlok'al li ac' na'leb q'uebil xban li Jesús.)

Li Jesús quitz'ektanac xban lix tenamit aj Nazaret

⁵³ Ut nak quirake' xyebal li jaljoquil ru atin a'in, li Jesús qui-el sa' li tenamit Capernaum. ⁵⁴ Ut nak quicuulac sa' lix tenamit Nazaret, quixtzoleb sa' li cab li neque'xch'utub cui' ribeb laj judío. Ut eb a'an que'sach xch'oleb chirabinquil li quixye li Jesús, ut que'xye chi ribileb rib: —¿Bar naxtau lix na'leb li cujnk a'in? ¿Chanru nak naru xbanunquil li milagro a'in li

nalajxbanu? ⁵⁵ ¿Ma maꝥua' ta bi' a'an li lalal laj pech'? ¿Ma maꝥua' ta bi' lix María lix na'? Ut, ¿ma maꝥua' ta bi' a'an li raseb laj Jacobo ut laj José, laj Simón ut laj Judas? ⁵⁶ Ut, ¿ma maꝥua' ta bi' sa' kayanꝥ cuanqueb li ranab? ¿Bar ta cui' xtau chixjunil lix na'leb? chanqueb. ⁵⁷ Ut inc'a' que'raj rabinquil ut que'xtz'ektana. A' ut li Jesús quixye reheb: —Junak profeta q'uebil xlok'al. Abanan sa' lix tenamit ut sa' li rochoch inc'a' q'uebil xlok'al, chan. ⁵⁸ Ut inc'a' q'ui li milagros li quixbanu aran xban nak inc'a' que'raj pabanc li tenamit.

14

Lix camic laj Juan laj Cubsihom Ha'

¹ Sa' eb li cutan a'an laj Herodes li acuabej quirabi resil li c'a'ru yo chixbanunquil li Jesús. ² Ut a'an quixye reheb laj c'anjel chiru: —A'an tana laj Juan laj Cubsihom Ha'. A'an xcuacli cui'chic chi yo'yo sa' xyankeb li camenak. Jo'can nak cuan xcuunquil chixbanunquil li milagros, chan. ³ Ac junxil laj Herodes quixtakla xchapbal laj Juan. Que'xbac' rig'uin cadena ut que'xq'ue sa' tz'alam. Laj Herodes quixbanu chi jo'can yal xban nak jo'can quiraj lix Herodías. Lix Herodías a'an li rixakil laj Felipe li ritz'in laj Herodes. Ut laj Herodes quixc'am chok' rixakil. ⁴ Toj maji' naq'uehe' sa' tz'alam laj Juan laj Cubsihom Ha' nak quixye re laj Herodes chi jo'ca'in: —Nimla maꝥ xabanu nak xac'am chok' acuixakil lix Herodías, chan laj Juan re. ⁵ Jo'can nak laj Herodes quiraj raj xcamsinuil, aban quixcucac chiruheb li q'uila tenamit xban nak laj Juan profeta nak cuan chiruheb a'an. ⁶ Ut sa' xnink'einuil lix chihab laj Herodes, lix co' lix Herodías quixajoc chiruheb chixjunileb li ula'. Ut c'ajo' nak quicuulac chiru laj Herodes. ⁷ Jo'can nak laj Herodes quixyechi'i re rig'uin juramento nak tixq'ue re chixjunil li c'a'ru tixpatz'. ⁸ Ut li xka'al chi ac tacchi'inbil xban lix na', quixye re laj Herodes: —Q'ue cue arin sa' plato lix jolom laj Juan laj Cubsihom Ha', chan. ⁹ Ma ca'ch'in nak quiraho' xch'ol laj Herodes chirabinuil li quixye. Aban xban li juramento li ac quixye chiruheb li cuanqueb sa' mex rochben, quixtakla xq'uebal re li xka'al li c'a'ru quixpatz'. ¹⁰ Quixtakla xch'otbal xcux laj Juan aran sa' tz'alam. ¹¹ Ut que'xc'am chak lix jolom laj Juan sa' jun plato ut quik'axtesic re li xka'al. Ut li xka'al quixq'ue re lix na'. ¹² Nak que'rabi resil lix camic laj Juan, eb lix tzolom que'cuulac chixc'ambal li camenak ut coxe'xmuk. Ut coxe'xye chak resil re li Jesús.

Li Jesús quixq'ueheb chi cua'ac li ob mil chi cujnk

¹³ Nak quirabi resil li quic'ulman, li Jesús qui-el aran. Qui-oc sa' jun li jucub ut co sa' jun na'ajej cuan xjunes. Ut nak que'xq'ue retal li tenamit nak co, que'el chak sa' lix tenamiteb ut que'coeb chi rokeb sa' anil bar co cui' li Jesús. ¹⁴ Ut li Jesús nak qui-el sa' li jucub, quiril li q'uila tenamit li ac que'cuulac xben cua chiru a'an. Ut quixtok'oba ruheb ut quixq'uirtesiheb li yaj cuanqueb sa' xyankeb. ¹⁵ Ut nak qui-ecuu, que'cuulac lix tzolom rig'uin li Jesús ut que'xye re: —Yo chi ecuuꝥ ut maꝥ'a' cuan arin cuanco cui'. Jo'can nak tataklaheb li q'uila tenamit chixlok'bal lix cua sa' eb li coc' tenamit.— ¹⁶ Li Jesús quixye reheb: —Moco tento ta nak te'xic eb a'an. Q'uehomak xcuahab laex.— ¹⁷ Ut eb a'an que'xye: —Maꝥ'a' cuan ke laꝥ arin, ca'aj cui' ob chi caxlan cua ut cuib chi car.— ¹⁸ Li Jesús quixye reheb: —C'amomak chak cuiq'uin.— ¹⁹ Ut nak ac xtaklaheb li q'uila tenamit chi c'ojlac sa' li pach'aya', quixchap li ob chi caxlan cua ut li cuib chi car, qui-iloc takec' ut quixbantioxhi chiru li Díos. Ut quixjachi ut quixq'ue li caxlan cua reheb lix tzolom ut que'xjeq'ui reheb li q'uila tenamit. ²⁰ Ut que'cua'ac chixjunileb toj retal que'c'ojla xch'oleb. Ut

que'xxoc li jo' q'uial qui-ela'an. Cablaju chacach nujenak li rela' qui-ela'an.
²¹ Eb li que'cua'ac cuanqueb ob mil chi cujnk chi inc'a' q'uebileb sa' ajl li ixk ut eb li coc'al.

Li Jesús quibec chiru li palau

²² Tojo'nak li Jesús quixtaklaheb lix tzolom chi oc sa' li jucub re nak a'aneb xben cua te'xic jun pac'al li palau roybeninquil nak tixchak'rabiheb li q'uila tenamit. ²³ Ut nak ac xchak'rabiheb li tenamit, yo chi oc li k'ojyin nak li Jesús co chiru tzul chi tijoc. Ut aran cuan xjunes. ²⁴ Ut li jucub li yoqeb chi xic cui' lix tzolom tacuulak sa' xyi li palau, ut lix cau ok li palau cau nocoxquet rib chiru li jucub, xban nak chiru yo chak chi chalç li ik'. ²⁵ Sakeuc re nak quicuulac li Jesús bar cuanqueb cui' ut yo chi bec chiru li ha'. ²⁶ Nak que'ril lix tzolom nak cuan jun yo chi bec chiru ha', que'xucuac ut que'xjap re ut que'xye: —Anum a'an.— ²⁷ A'ut li Jesús ticto quiratinaheb ut quixye reheb: —Mexxucuac. Lain li yoqex chicuilbal. Cacuubresihomak ech'ol, chan reheb. ²⁸ Quichak'oc laj Pedro ut quixye: —Kacua', cui laät, ye nak tinxic ajcui' lain acuiq'uin chiru li ha'.— ²⁹ Li Jesús quixye re: —Quim.— Ut laj Pedro qui-el chak sa' li jucub ut qui-oc chi bec chiru li ha' re taxic riq'uin li Jesús. ³⁰ Abanan nak quixq'ue retal li cak-sut-ik', quixucuac, ut qui-oc chi subec' sa' li ha' ut quixjap re ut quixye: —iKacua', chinacolak! chan. ³¹ Ut li Jesús sa' junpat quixye' li ruk', quixchap ut quixye re: —At cujnk, inc'a' nacatpaban chi tz'akal. çC'a'ut nak xacuiba ach'ol?— ³² Ut nak que'oc sa' li jucub, quich'ana li ik'. ³³ Ut eb li cuanqueb sa' li jucub que'xcuik'ib rib chiru li Jesús ut que'xlok'oni ut que'xye re: —Relic chi yal nak laät li Lalal li Dios, chanqueb re.

Li Jesús quixq'uirtesi li yaj aran Genesaret

³⁴ Nak quicuulac li Jesús rochbened lix tzolom jun pac'al li palau, coxe'el sa' li na'ajej Genesaret. ³⁵ Eb li cujnk cuanqueb aran ticto que'xq'ue retal nak a'an li Jesús ut que'xye resil sa' chixjunil li na'ajej a'an. Ut quilaje'xc'am li yaj riq'uin re nak tixq'uirtesihheb. ³⁶ Ut que'xtz'ama chiru nak tixcanabeb li yaj chixche'bal li rak'. Ut chixjunileb li que'che'oc re li rak' quilaje'q'uira.

15

Li c'a'ru na-el chak sa' li kach'ol, a'an li nocomacob cui'

¹ Jun ch'ol eb aj tz'ib rochbened laj fariseo que'chal chak Jerusalén. Que'cuulac riq'uin li Jesús ut que'xye re: ² —çC'a'ut nak eb la tzolom neque'xk'et li chak'rab li canabanbil xbaneb li kaxe' katon? çC'a'ut nak inc'a' neque'xch'aj li ruk'eb nak neque'cua'ac jo' tz'ibanbil sa' li kachak'rab? chanqueb. ³ Li Jesús quichak'oc ut quixye reheb: —Ut laex, çC'a'ut nak nequek'et li chak'rab q'uebil ere xban li Dios riq'uin xbanunquil le najter na'leb li c'aynakex chixbanunquil? ⁴ Li Dios quixye: —Cha-oxlok'i la na' ayucua'. Ut quixye ajcui': —Ani tixhob xna' xyucua', li jun a'an camsinbil nak taosok'. (Ex. 20:12; 21:17) ⁵ A'ut laex nequeye cui cuan junak inc'a' naraj xtenk'anquil lix na' xyucua', li jun a'an tixye re lix na' xyucua', “ac mayejanbil chiru li Dios li c'a'ru raj taruk tatintenk'a cui'.” Ut inc'a' chic tento tixtenk'a lix na' xyucua', chanquex. ⁶ Jo'can nak laex nequetz'ektana xcuanquil li chak'rab q'uebil xban li Dios ut a' chic le najter na'leb nequebanu. ⁷ Laex aj ca'pac'al u. Yal ajcui' li quixye li profeta Isaías cherix laex nak quixtz'iba li c'a'ru quiyeh'e re xban li Dios nak quixye:

⁸ Li tenamit a'in niquine'xlok'oni ca'aj cui' riq'uin xtz'umal reheb. Moco neque'xbanu ta chi anchal xch'oleb.

⁹ Maç'a' rajbal nak niquine'xlok'oni xban nak li tijleb li neque'xc'ut a'an yal xchak'rabeb li cujnk. (Is. 29:13)

¹⁰ Ut li Jesús quixbokeb li tenamit riq'uin ut quixye reheb: —Abihomak chejunilex li c'a'ru tinya ut q'uehomak retal re nak tetau xyalal. ¹¹ Maçua' li c'a'ru naxtzaca li cujnk namaco' cui'; aban li c'a'ru inc'a' us naxc'oxla sa' xch'ol, a'an li namaco' cui'. —¹² Que'jiloc lix tzolom riq'uin li Jesús ut que'xye re: —¿Ma xaq'ue retal nak eb laj fariseos ra xe'rec'a nak xe'rabi li atin li xayey?— ¹³ Quichak'oc li Jesús ut quixye reheb: —Chixjunil li acujmk inc'a' aubil xban lin Yucua' cuan sa' choxa, a'an tamich'mank. ¹⁴ Canabomakeb. A'aneb mutz'eb ut neque'xberesiheb li mutz'. Ut cui li mutz' neque'xberesi li rech mutz'il, chi xcabichaleb te't'ane' sa' jul. —¹⁵ A'ut laj Pedro quichak'oc ut quixye: —Banu usilal, ch'olob chiku li xyalal li jaljoquil ru atin a'in. —¹⁶ Ut li Jesús quixye re: —¿Ma toj maç'a' ajcui' ena'leb laex? ¹⁷ ¿Ma toj maji' nequetau xyalal nak chixjunil li c'a'ru naxtzaca junak, a'an moco sa' xch'ol ta naxic? Tic sa' xsa' naxic ut chirix a'an naxtz'ek cui'chic. ¹⁸ Li inc'a' us na-el sa' xtz'umal re li junjnk, a'an sa' lix ch'ol nachal. Ut a'an a'in li namaco' cui'. ¹⁹ Sa' lix ch'ol junak nachal chak li maus aj na'leb, li camsinc ras ritz'in, li muxuc caxar, li co'betac yumbetac, li elk'ac, li k'abanc ut li majecuanc. ²⁰ Chixjunil li maus aj na'leb a'in sa' xch'ol junak nachal chak, ut a'an li namaco' cui' li junjnk. Ut li cua'ac chi inc'a' ch'ajbil li uk'ej, maçua' a'an li namaco' cui' li cujnk, chan.

Li maçua'eb aj judío naru neque'oc rubel xcuanquil li Dios

²¹ Ut qui-el aran li Jesús ut co sa' eb li na'ajej xcuent Tiro ut xcuent Sidón. ²² Ut cuan jun li ixk aj Canaán quichal sa' li na'ajej a'an. Japjo re chixyebal: —Kaçua', Ralalat laj David, chacuuxtana taxak cuu. Lin co' c'ajo' nak yo chi tacuasic xban li maus aj musik'ej, chan. ²³ A'ut li Jesús ma jun li atin quixye re. Ut eb lix tzolom que'nach'oc riq'uin li Jesús ut que'xye re: —Kaçua', banu li usilal re, re nak tixcanab xjapbal re, chanqueb. ²⁴ Li Jesús quichak'oc ut quixye: —Ma bar chic taklanbilin chak, ca'aj cui' riq'uineb laj Israel. Chanchaneb li carner sachenak, chan. ²⁵ Ut li ixk quixcuik'ib rib chiru li Jesús ut quixye cui'chic: —Kaçua', chacuuxtana taxak cuu. —²⁶ Li Jesús quichak'oc ut quixye re: —Inc'a' us xmak'bal xcuaheb li coc'al ut xq'uebal reheb li tz'i', chan li Jesús. ²⁷ Ut li ixk quichak'oc ut quixye re: —Yal li nacaye, Kaçua', abanan eb li tz'i' neque'xxoc xc'aj xcuaheb li coc'al li nat'ane' rubel li mex nak yoqueb chi cua'ac, chan. ²⁸ Ut li Jesús quixye re: —Kana', laät relic chi yal xafau ru li xyalal ut chi anchal ach'ol xatpaban. Chi-uxk li c'a'ru xatz'ama, chan. Ut sa' ajcui' li honal a'an quiq'uira lix co'.

Li maçua'eb aj judío que'q'uirtesic xban li Jesús

²⁹ Qui-el chak li Jesús aran, ut quinume' chire li palau Galilea sa' xna'ajeb li maçua'eb aj judío. Tojo'nak quitake' chiru jun li tzul ut aran quic'ojla. ³⁰ Ut que'cuulac li q'uila tenamit riq'uin. Cuanqueb nabal li yaj li que'c'ame' riq'uin. Cuanqueb li yek rok, cuanqueb li mutz', cuanqueb li mem ut li tokol ruk'eb, ut cuanqueb ajcui' nabaleb li yaj rochbened. Ut cole'q'uehek' chiru li Jesús ut a' yal c'a'ru lix yajel li junjnk, li Jesús quixq'uirtesiheb. ³¹ Jo'can nak que'sach xch'oleb li tenamit chirilbal nak li mem neque'atinac chic ut li tokoleb ruk' que'q'uira ut li yekeb rokeb neque'bec chic ut eb li mutz' ruheb neque'iloc chic. Ut que'xnima xlok'al lix Dioseb laj Israel.

Li Jesús quixq'ueheb chi cua'ac li cahib mil chi cujnk

³² Ut li Jesús quixbokeb lix tzolom riq'uin ut quixye reheb: —Neque'cuil xtok'oba' ruheb li tenamit. Ac oxib cutan xchaliqueb chicuix ut maç'a'

xcuahēb. Ut inc'a' nacuaꝝ xtaklanquileb sa' rochocheb chi inc'a' te'cua'ak. Naru neque'lub sa' be, chan. ³³ Ut eb lix tzolom que'xye re: —¿Bar takatau cua sa' li na'ajeꝝ a'in re takaꝝ'ueheb chi cua'ac li q'uilá tenamit a'in? Arin maꝝ'a' cuan, chanqueb. ³⁴ Ut li Jesús quixye reheb: —¿Jarub li caxlan cua cuan eriꝝ'uin? chan. —Cuukub ajcui' li caxlan cua ut cuib oxib li coc' car, chanqueb re. ³⁵ Ut li Jesús quixtaklaheb li tenamit chi c'oꝝlac chiru ch'och'. ³⁶ Ut quixchap li cuukub chi caxlan cua ut eb li car, quixbantioxi chiru li Dios ut quixjachi. Ut quixq'ue reheb lix tzolom re nak te'xjeꝝ'ui reheb li tenamit. ³⁷ Que'cua'ac chixjunileb toꝝ retal que'c'oꝝla xch'oleb. Ut que'xc'ula li qui-ela'an. Cuukub chacach nujenak li rela' xc'aj li caxlan cua li qui-ela'an. ³⁸ Ut eb li que'cua'ac, a'aneb caꝝhib mil chi cuꝝnk chi maꝝ'a'eb sa' ajl'ix ixk chi moco li coc'al. ³⁹ Nak ac quixchak'rabiheb li tenamit, li Jesús qui-oc cui'chic sa' li jucub ut coꝝ cui'chic jun pac'al li palau sa' li na'ajeꝝ xcuēnt Magdala.

16

Eb laꝝ fariseo jo'eb ajcui' laꝝ saduceo que'raꝝ rilbal li milagro

¹ Que'cuulac laꝝ fariseo ut eb laꝝ saduceo riꝝ'uin li Jesús. Que'raꝝ xyalbal rix ut que'oc chixtz'amanquil chiru nak tiꝝbaꝝnu junak milagro chiruheb re rilbal ma'yal nak riꝝ'uin li Dios nachal lix cuanquil. ² Ut li Jesús quichak'oc ut quixye reheb: —Nak na-ecuu nequeye “chaꝝbilak li cutan cuulaj xban nak cak ru li choxa.” ³ Ut ek'ela nequeye “hoꝝn naxq'ue hab xban nak cak ru ut k'oꝝyꝝn ru li choxa.” Laꝝ aj ca'pac'al u. Nequenau xq'uebal retal ru li choxa. Abanan, ca'aj cui' a'an nequenau rilbal. Inc'a' nequeq'ue retal c'a'ru xyalal li yoꝝ chi c'ulmaꝝnc sa' eb li cutan a'in. ⁴ Laꝝ jun tep chi tenamit inc'a' us le' na'leb. Nequetz'ektana li Dios ut neque'raꝝ nak taꝝ'utbesik cheru junak milagro. Abanan inc'a' taꝝ'utbesik cheru, ca'aj cui' li milagro li qui-ux re laꝝ Jonás, chan li Jesús. Toꝝo'nak quixcanabeb ut coꝝ. ⁵ Nak ac xe'nume' lix tzolom jun pac'al li palau, que'xq'ue retal nak inc'a' que'xc'am xtzacaemk. ⁶ Ut li Jesús quixye reheb: —Cheq'uehak retal, meꝝbon erib riꝝ'uin xch'amal xcaxlan cua eb laꝝ fariseo chi moco riꝝ'uin xch'amal xcaxlan cua eb laꝝ saduceo. ⁷ Eb lix tzolom que'oc chi aꝝtinac chi ribileb rib ut que'xye: —Xban nak inc'a' xkac'am chak li caxlan cua, jo'can nak yoꝝ chixyebal ke chi jo'can. ⁸ Li Jesús quixnau li c'a'ru yoꝝqueb chixyebal ut quixye reheb: —Laꝝ inc'a' nequexpaban chi tz'akal. ¿C'a'ut nak yoꝝquex chi c'oxlac chirix li xinye ere? ¿C'a'ut nak yoꝝquex chixyebal chiribil erib nak maꝝ'a' le' caxlan cua? ⁹ ¿Ma toꝝ maji' nequetau xyalal? ¿Ma inc'a' najultico' ere nak xinjachi li oꝝb chi caxlan cua reheb li oꝝb mil chi cuꝝnk? Ut, ¿jarub chacach li rela' quexoc? chan. ¹⁰ —Ut, ¿ma inc'a' najultico' ere nak xinjachi li cuukub chi caxlan cua reheb li caꝝhib mil chi cuꝝnk? ut, ¿jarub chacach li rela' quexoc? ¹¹ ¿C'a'ut nak inc'a' nequetau xyalal nak maꝝua' chirix li caxlan cua yoꝝquin chi aꝝtinac nak xinye ere: Meꝝbon erib riꝝ'uin li xch'amal xcaxlan cua eb laꝝ fariseo ut eb laꝝ saduceo? chan. ¹² Toꝝo'nak que'xtau ru nak maꝝua' chirix xch'amal lix caxlan cua yoꝝ chi aꝝtinac. Chirix ban lix tijlebeb laꝝ fariseo ut laꝝ saduceo yoꝝ chi aꝝtinac.

Laj Pedro quixye nak li Jesús, a'an li Cristo

¹³ Chirix chic a'an li Jesús coꝝ rochbened lix tzolom sa' li na'ajeꝝ Cesarea re Filipino. Nak yoꝝqueb chi coꝝ, quixpatz' reheb lix tzolom: —¿Anihin lain nak neque'xye li tenamit?— ¹⁴ Eb a'an que'chak'oc ut que'xye: —Cuan neque'yehoc nak laꝝat laꝝ Juan laꝝ Cubsihom Ha'. Ut cuan neque'yehoc nak laꝝat li profeta Elías, ut cuan neque'yehoc nak laꝝat li profeta Jeremías. Ut cuan

cui'chic neque'yehoc nak laät junak chic reheb li profeta. ¹⁵ Ut li Jesús quixye reheb: —Ut laex, ¿Anihin lain nak nequeye?— ¹⁶ Quichak'oc laj Simón Pedro ut quixye: —Laät li Cristo, li Ralal li yo'yoquil Dios.— ¹⁷ Tojo'nak quichak'oc li Jesús ut quixye re: —Us xak açue, at Simón, ralatat laj Jonás, xban nak moco cuïnk ta xc'utbesin çacuu li xyalal a'in. Lin Yucua' cuan sa' choxa, a'an ban li xc'utbesin çacuu. ¹⁸ Ut lain ninye açue nak laät laj Pedro. Ut sa' xben li sakonac a'in lain tincabla lin iglesia ut laj tza mac'a'ak xcuanquil sa' xben. ¹⁹ Ut lain tinq'ue açuanquil sa' xbeneb li ani te'pabank cue. Ut chixjunil li c'a'ru taç'ub ru sa' xyalal sa' ruchich'och', li Dios tixc'ub ajcui' ru sa' choxa. Li c'a'ru taye us arin sa' ruchich'och', li Dios tixye ajcui' nak us. Ut li c'a'ru taye inc'a' us, li Dios tixye ajcui' nak inc'a' us. ²⁰ Tojo'nak quixye reheb lix tzolom nak ma ani aj e te'xye nak li Jesús, a'an li Cristo, li yechi'inbil xban li Dios.

Li Jesús quixye resil lix camic

²¹ Chalen sa' li cutan a'an li Jesús quixtiquib xch'olobanquil chiruheb lix tzolom nak tento taxic Jerusalén chixc'ulbal nabal li raylal xbaneb li cuïnk li xakabanbileb chi c'anjelac sa' li templo ut xbaneb li xbenil aj tij jo' eb ajcui' laj tz'ib. Quixye reheb nak taçamsjik ut nak taçauçlik cui'chic chi yo'yo sa' rox li cutan. ²² Ut laj Pedro quirisi xjunes li Jesús ut qui-oc chixk'usbal: —Kaçua', chan re, li Dios taxak chicolok açue re nak inc'a' taç'ul chi jo'can, chan. ²³ Ut li Jesús quixsuk'isi rib chirilbal laj Pedro ut quixye re: —Elen arin sa' xnak' cuu. Laät chanchanat laj tza. Mich'inan inch'ol aban chixbanunquil li c'a'ru tento tinbanu. Laät inc'a' yoçat chixc'oxlanquil jo' naxc'oxla li Dios. Yoçat ban chixc'oxlanquil jo' naxc'oxla li cuïnk, chan. ²⁴ Ut li Jesús quixye reheb lix tzolom: —Li ani taraj inpabanquil, tento nak tixtz'ektana li c'a'ru naxrahi ru lix ch'ol. Tixcuy xnumsinquil li raylal, usta taçamsjik sa' inc'aba'. Ut chinixtakehak. ²⁵ Li ani naxra lix yu'am arin sa' ruchich'och', a'an tixsach li junelic yu'am. A'ut li ani naxsach lix yu'am arin sa' ruchich'och' sa' inc'aba', a'an tarechani li junelic yu'am. ²⁶ ¿C'a'ru tixra li cuïnk cui tarechani chixjunil xbiomal li ruchich'och' ut tixsach li junelic yu'am xban li biomal? ¿Ma cuan ta bi' c'a'ru tixtoj cui' li yu'am chi junelic? ²⁷ Lain li C'ajolbej tinchalk riq'uin xniml xlok'al lin Yucua' cuochbeneb lix ángel. Tojo'nak tinq'ue lix k'ajcamunquil chi xjunjunkaleb jo' chanru lix yehom xbanuhom. ²⁸ Relic chi yał tinye ere nak cuanqueb arin sa' eyank li inc'a' te'çamk toj tine'ril chi çalç lain li C'ajolbej riq'uin incuanquilal, chan li Jesús.

17

Qui-ile' lix lok'al li Jesús nak quijalano' li rilobal

¹ Cuakib cutan chic chirix a'an, li Jesús quixc'ameb laj Pedro, laj Jacobo ut laj Juan li ritz'in sa' xben jun li nimla tzul xjuneseb. ² Ut nak cuanqueb aran, quijalano' li rilobal li Jesús chiruheb. Ut nalemtz'un li rilobal jo' li sak'e ut li rak' saksakpotz'in quic'utun ut nalemtz'un. ³ Ut xakamileb laj Moisés ut laj Elías chiruheb nak que'ril ut yoqueb chi atinac riq'uin li Jesús. ⁴ Ut quiatinac laj Pedro ut quixye re li Jesús: —Kaçua', c'ajo' xchak'al ru nak cuanco arin. Cui taçauj, takayib oxibak muhebäl arin. Jun açue, jun re laj Moisés ut jun re laj Elías, chan. ⁵ Toj yo ajcui' chi atinac a'an nak quichal sa' xbeneb jun li chok nalemtz'un. Li Dios quiatinac çak sa' li chok, ut quixye: —A'in li cualal raro inban. Riq'uin a'an nasaho' inch'ol. Cherabihak li c'a'ru tixye.— ⁶ Nak que'rabi a'an, k'axal nak que'xucuac lix tzolom ut que'xcut rib sa' ch'och' ut huphu que'cana. ⁷ Tojo'nak li Jesús quijiloc riq'uineb ut quixt'otz't'otz'iheb

ut quixye reheb: —Cuaclinkex. Mexxucua. —⁸ Ut nak que'xtaksi li rilobaleb, mā ani chic que'ril ru, ca'aj chic li Jesús quicana xjunes. ⁹ Nak yoqueb chak chi cubec sa' li tzul, quixye li Jesús reheb: —Mā ani aj e teye li c'a'ru xeril. Toj mokon naru teye nak lain li C'ajolbej ac xincuacli cui'chic chi yo'yo sa' xyankeb li camenak. —¹⁰ Ut eb lix tzolom que'xpatz' re: —¿C'a'ut nak neque'xye laj tz'ib nak xben cua taç'ulunk laj Elías chiru laj colonel li yechi'inbil xban li Dios?—¹¹ Ut nak quichak'oc li Jesús quixye reheb: —Yal ajcui' nak laj Elías xben cua taç'alk chixc'ubanquil ru chixjunil li c'a'ak re ru. ¹² Abanan lain tynye ere nak laj Elías ac xc'ulun ut inc'a' que'xnau ru. C'ajo' li raylal xe'xbanu re ut jo'can ajcui' lain li C'ajolbej nabal li raylal tinc'ul xbaneb. —¹³ Ut eb lix tzolom que'xtau ru nak chirix laj Juan laj Cabsihom Ha' yo chi atinac li Jesús. ¹⁴ Ut que'cuulac bar xanqueb cui' nabal li tenamit. Ut jun li cujnk colxciuk'ib rib chiru li Jesús ut quixye re: ¹⁵ —Kaçua', chan, chacuuxtana taxak ru li cualal. Rajlal nac'ul xyajel, ut k'axal ra naxc'ul. Nabal sut nat'ane' sa' xam ut nabal sut nat'ane' sa' ha'. ¹⁶ Ut xinc'am riq'uin eb la tzolom re nak te'xq'uirtesi; abanan inc'a' xe'ru xq'uirtesinquit, chan. ¹⁷ Li Jesús quixye: —Ex tenamit, tic inc'a' nequexpaban ut inc'a' us le na'leb. ¿Jo' najtil chic tincuank eriq'uin re nak texpabank? ¿Jo' najtil chic texincuy nak nequec'oxla? C'am chak li al arin cuiq'uin, chan li Jesús nak quichak'oc. ¹⁸ Ut li Jesús quixch'ila li maus aj musik'ej ut qui-el riq'uin li al. Ut sa' ajcui' li honal a'an li al quiq'uira. ¹⁹ Ut que'cuulac riq'uin li Jesús lix tzolom nak cuan xjunes ut que'xpatz' re: —¿C'a'ut nak inc'a' xoru lao chirisinquil li maus aj musik'ej? chanqueb. ²⁰ Ut li Jesús quixye reheb: —Inc'a' xexru xban nak inc'a' nequexpaban chi tz'akal. Relic chi yal tynye ere nak cuan taxak ca'ch'inak le pabal chanchan xanimal ru jun ch'ina riyajil mostaza, teye raj re li tzul a'in, “Elen arin, k'axon le” ut taç'axonk raj. Ut maç'a' raj c'a'ru inc'a' taruk tēbanu. ²¹ Ca'aj cui' riq'uin ayun ut riq'uin tijoc naru risinquit li maus aj musik'ej xcomoneb a'an, chan.

Li Jesús quixye cui'chic resil lix camic

²² Ut nak cuanqueb Galilea, li Jesús quixye reheb: —Lain li C'ajolbej tink'axtesik sa' ruk'eb li cujnk li te'camsink cue. ²³ Tine'xcamsi, abanan lain tincuaclik cui'chic chi yo'yo sa' xyankeb li camenak sa' rox li cutan, chan. Ut c'ajo' nak que'raho' sa' xch'oleb lix tzolom chirabinquil li c'a'ru quixye li Jesús.

Li toj re li rochoch li Dios

²⁴ Ut nak que'cuulac Capernaum li Jesús rochbened lix tzolom, que'chal riq'uin laj Pedro li neque'titz'oc toj re li rochoch li Dios ut que'xye re: —¿Ma natojoc laj tzolol ere?—²⁵ —¿C'a' nak inc'a'? Natojoc, chan laj Pedro. Ut nak cox-ocak a'an sa' cab, li Jesús xben cua quiatinac ut quixye: —¿C'a'ru nacaye at Simón, eb li acuabej sa' ruchich'och', aniheb aj e neque'xtitz' li toj? ¿Ma reheb li ralal malaj ut reheb li jalaneb xtenamit? chan. ²⁶ Laj Pedro quixye re: —Reheb li jalaneb xtenamit.— Ut li Jesús quixye re: —Eb li ralal li acuabej inc'a' neque'tojoc chi jo'canan. ²⁷ Usta inc'a' raj tento tintoj lain, abanan re nak me'xpo' xch'oleb kaban, lain tintoj. Ayu sa' anil ut cut la chaple car sa' li palau. Ut li xben li car li taçhap chak, taçe lix tz'umal re. Aran taçtau jun li tumin. Taç'am ut riq'uin a'an taçtoj li cue ut taçtoj ajcui' la cue, chan.

1 Sa' li cutan a'an que'cuulac lix tzolom riq'uin li Jesús ut que'xye re: — ¿Ani li k'axal nim xcuauquil sa' lix nimajcual cuanquílal li Dios?— 2 Ut li Jesús quixbok jun li ch'ina al riq'uin ut quixxakab chiruheb. 3 Ut quixye reheb: —Relic chi yal tynye ere cui inc'a' tejal ena'leb ut cui inc'a' k'unak ech'ol jo' li ch'ina al a'in, inc'a' tex-oc sa' lix nimajcual cuanquílal li Dios. 4 Jo'can nak li ani narec'a nak mac'a' xcuauquil jo' li ch'ina al a'in, a'an li k'axal nim xcuauquil sa' lix nimajcual cuanquílal li Dios. 5 Ut li ani taç'uluk re junak ch'ina al jo' a'in sa' inc'aba' chanchan ajcui' nak lain xinixc'ul. 6 Ut li ani tapo'ok xch'oleb li toj k'unek xch'ol li neque'paban cue, k'axal raj us chok' re a'an nak taçutek' sa' xchamal li palau chi bac'bo junak nimla pec chixcux. 7 Tok'ob ruheb li cuanqueb sa' ruchich'och' xban nak cuan c'a' re ru napo'oc re lix ch'oleb. Ac ch'olch'o nak cuan li c'a'ru napo'oc ch'olej. Abanan raylal çalel sa' xben li ani tayo'obank re li c'a' re ru tapo'ok ch'olej.

Chetz'ektana li yibru na'leb li naq'uehoc ere chi maçobc

8 Cui la çuok malaj ut la çuuk' taq'uehoc açue chixbanunquíl li c'a'ru inc'a' us, us raj cui tayoc' ut tatz'ek. K'axal us chok' açue nak cuank la yu'am chi junelic riq'uin jun ajcui' la çuok ut la çuuk' chiru nak tatxíc chi cuib la çuok chi cuib la çuuk' sa' li xbalba bar cui' inc'a' taçupk li xam. 9 Cui li xnak' açuu taq'uehoc açue chixbanunquíl li inc'a' us, us raj cui taçuisci ut tatz'ek. K'axal us nak taçuank la yu'am chi junelic riq'uin jun ajcui' li xnak' açuu chiru nak tatxíc riq'uin cuib li xnak' açuu sa' li xam re li xbalba.

Li carner sachenak

10 Lain ninye ere cheq'uehak retal metz'ektana junak reheb li k'unek xch'ol sa' lix pabal xban nak eb a'an c'ac'alenbileb xbaneb li ángel, li cuanqueb riq'uin lin Yucua' cuan sa' choxa. 11 Lain li C'ajolbej quinc'un arin sa' ruchich'och' chixcolbaleb li sachenakeb sa' li maç. 12 ¿C'a'ru nequec'oxla laex chirix li na'leb a'in li oc cue xyebal ere? Cuan ta junak li cuink cuan o'c'alak (100) xcarner ut cui taçachk junak reheb, ¿ma inc'a' raj tixcanabeb li belelaju ro'c'al (99) chic ut taçic chiruheb li tzuyl chixsic'bal li jun li xsach? 13 Relic chi yal tynye ere nak tixtau chak li sachenak, k'axal taçahok' sa' xch'ol riq'uin li jun a'an chiruheb li belelaju ro'c'al li inc'a' que'sach. 14 Jo'can ajcui' le Yucua' cuan sa' choxa inc'a' naraj nak taçachk junak reheb li toj k'unek xch'ol sa' lix pabal.

Tento takacuy xmaçueb li kas kitz'in

15 Cui junak la çuech aj pabanelil tamaçobk çacuu, ayu riq'uin ut nak çuankeç ejunes, taç'olob chiru lix maç. Ut cui tarabi li xna'leb li taq'ue, laaç xatenk'a la çuech aj pabanelil re nak tixc'am rib sa' usilal açuiquín. 16 Cui ut inc'a' naraj nacatrabi, c'am jun malaj cuib li herman açuochben re nak riq'uin li ratin cuib oxib chi testigo, taç'olak ru chixjunil li atin. 17 Ut cui inc'a' naraj tarabiheb a'an, taye re li iglesia re nak li herman te'xch'olob xyalal chiru. Ut cui inc'a' ajcui' naraj abinc chiruheb a'an, a'an chic taçuank çeru jo' chanchan li maçua'ak aj pabanel ut chanchanak laj titz'ol toj li inc'a' us neque'xbanu. 18 Relic chi yal tynye ere nak chixjunil li c'a'ru teç'ub ru sa' xyalal sa' ruchich'och', li Dios tixc'ub ajcui' ru sa' choxa. Li c'a'ru teye us arin sa' ruchich'och', li Dios tixye ajcui' nak us. Ut li c'a'ru teye inc'a' us, li Dios tixye ajcui' nak inc'a' us. 19 Tynye ere cui cuan cuibak sa' eyank te'xc'ub ru sa' cuibal chirix c'a'ru te'tijok cui', ut te'xtz'ama chiru lin Yucua' cuan sa' choxa, li c'a'ru te'xtz'ama taq'uehek' reheb. 20 Yalak bar cuankeb cuib oxib ch'utç'ukeb sa' inc'aba', aran ajcui' cuankin lain sa' xyankeb a'an, chan li Jesús. 21 Ut laj Pedro quiatínac ut quixye re li Jesús: —Kaçua', çjarub sut taruk

tincuy xmaç li tamacobk chicuu? ¿Ma tento nak cuukub sut tincuy xmaç?—
²² Ut li Jesús quixye re: —Inc'a' ninye açue nak ca'aj cui' cuukub sut taçuy xmaç. Tinye ban açue nak taçuy xmaç cuukub sut chi lajjetk xcaç'al sut (70), chan.

Li jaljoquil ru atin chirix laj c'anjel li inc'a' quiraj xcuylal xmaç li rech aj c'anjelil

²³ Lix nimajcual cuanquilal li Dios tinjuntak'eta riq'uin jun li rey quixbir rix lix c'aseb laj c'anjel chiru. ²⁴ Nak quixtiquib xbirbal rix lix c'aseb, quic'ame' chak chiru li rey jun li cuñk lajeb mil chi tumin lix c'as. ²⁵ Ut xban nak maç'a' c'a'ru cuan re li cuñk a'an re tixtoj cui' lix c'as, jo'can nak li rey quixtakla xc'ayinguil a'an rech xxiquic li rixakil, ut li ralal xc'ajol ut chixjunil li c'a'ru cuan re, re xtojbal lix c'as. ²⁶ Ut laj c'anjel a'an quixcuik'ib rib chiru li rey ut quixpatz' xcuylal chiru ut quixye re: —Kacua', chinaçuy cuan chic ca'ch'inak, ut lain tintoj chixjunil lin c'as chaçuu.— ²⁷ Ut li rey quiril xtok'obal ru laj c'anjel chiru. Quirach'ab ut quixsach li retalil lix c'as. ²⁸ Ut nak qui-el chak laj c'anjel riq'uin li rey, quixc'ul jun li rech aj c'anjelil cuan junmay chi tumin lix c'as riq'uin li cuñk a'an. Ut laj c'anjel, li quicuye' xmaç, quixchap chi xcux li jun li cuan xc'as riq'uin ut qui-oc chixyatz'bal ut quixye re: —Toj la c'as, chan. ²⁹ Ut li rech aj c'anjelil quixcuik'ib rib chiru, quixpatz' xcuylal ut quixye re: —Chinaçuy cuan chic ca'ch'inak ut lain tintoj ajcui' chixjunil lin c'as, chan re. ³⁰ Abanan li jun inc'a' quiraj xcuylal xmaç. Co ban ut coxq'ue chak sa' tz'alam toj retal quixtoj rix lix c'as. ³¹ Nak eb li rech aj c'anjelil que'ril li c'a'ru quixbanu, c'ajo' nak que'raho' sa' xch'ol. Ut que'chal cole'xch'olob chiru li rey chixjunil li c'a'ru quic'ulman. ³² Tojo'nak quiboke' cui'chic laj c'anjel li quicuye' xmaç xban li rey. Ut li rey quixye re: —At tz'ekbetal aj c'anjel, chixjunil la c'as xinsach retalil xban nak xapatz' açuylal chicuu. ³³ ¿Ma inc'a' raj xru xatok'oba ru la cuech aj c'anjelil jo' nak xintok'oba açuu lain? chan. ³⁴ C'ajo' nak quipo' li rey ut quixk'axtesi sa' rix'eb laj ilol tz'alam toj retal quixtoj chixjunil lix c'as. ³⁵ Ut jo'ca'in ajcui' tixbanu ere laçex lin Yucua' cuan sa' choxa cui' inc'a' teçuy xmaqueb le ras eritz'in chi anchal ech'ol chejunjunkalex, chan li Jesús.

19

Li Jesús quixye nak inc'a' naru te'xjach rib li sumsuqueb

¹ Ut nak quirake' chixyebal li atin a'in, li Jesús qui-el Galilea ut co jun pac'al li nima' Jordán sa' eb li na'ajej xcuent Judea. ² Ut quitakeç xbaneb li q'uila tenamit ut nabaleb li yaj quixq'uirtesiheb aran. ³ Cuanqueb laj fariseo que'cuulac chi patz'oc riq'uin yal re xyalbal rix ut que'xye re: —¿C'a'ru nacaye laaç? ¿Ma taruk tixjach rib li cuñk riq'uin li rixakil yal riq'uin c'a'ak re ru?—
⁴ Quichak'oc li Jesús ut quixye reheb: —¿Ma inc'a' erilon li tz'ibanbil sa' li Santil Hu nak li Dios quiyobtesin chak re li cristian sa' xticlajic, cuñk ut ixk nak quixyo'obtesiheb chak? ⁵ Jo'can nak li cuñk tixcanab xna' xyucua' ut tixlak'ab rib riq'uin li rixakil. Ut chi xcabichaleb junajakeb aj chic. ⁶ Jo'can nak moco cuibakeb ta chic. Junajakeb aj ban chic. Jo'can ut nak li ani naxlak'ab li Dios, ma ani chic naru najachoc re, chan. ⁷ Ut que'xye cui'chic re li Jesús: —¿C'a'ut nak quixye laj Moisés nak taruk xyibanquil junak li hu re nak tixjach rib li cuñk riq'uin li rixakil?— ⁸ Li Jesús quichak'oc ut quixye: —Xban nak k'axal cau ech'ol, jo'can nak laj Moisés quixsume cheru nak taruk tejach erib riq'uin le rixakil. Aban moco jo'can ta chak sa' xticlajic nak li Dios quixyo'obtesiheb li cristian. ⁹ Ut lain tnye ere nak yalak ani tixcanab rixakil

chi maꝥua' xmaꝥ yumbetaꝥ, ut tixc'am jalan chic ixk, li jun a'an tixmux ru lix sumlajic. Ut li ani tixc'am chok' rixakil li ixk li canabanbil, li jun a'an tixmux ajcui' ru lix sumlajic, chan li Jesús. ¹⁰ Ut eb lix tzolom que'xye: — Cui yal nak jo'can taꝥulmank, k'axal us raj nak inc'a' tixsic' rixakil li cujnk, chanqueb. ¹¹ Ut li Jesús quixye reheb: —Moco chixjunileb ta neque'xc'ul xch'ol'li atin a'in, ca'aj cui' li ani q'uebil re xban li Dios re xtaubal ru li xyalal a'in. ¹² Cuanqueb cujnk chalen sa' xyo'lajiqueb ac reheb nak inc'a' te'cuank rixakil, ut cuanqueb yal pok'bileb xbaneb li rech cujnkilal re inc'a' te'cuank rixakileb, ut cuanqueb cui'chic yal inc'a' neque'xc'ul xch'oleb nak te'xc'am rixakil xban nak neque'xc'axtesi rib chi c'anjelac chiru li Dios. Li ani taruk tixtau ru li xyalal a'in, chixtauhak ru, chan li Jesús.

Li Jesús quirosobtesi li coc'al

¹³ Ut chirix chic a'an cuanqueb coc'al que'c'ame' chak riq'uin li Jesús re nak tixq'ue li ruk' sa' xbeneb ut tatijok. Ut eb lix tzolom que'xk'us li que'c'amoc chak reheb li coc'al. ¹⁴ Nak li Jesús quiril li yoqueb chixbanunquil, quixye reheb lix tzolom: —Canabomakeb chi chalꝥ cuiq'uin li coc'al. Meram chiruheb xban nak lix nimajcual cuanquilal li Dios, a'an reheb li k'unek xch'ol'jo' li coc'al, chan. ¹⁵ Ut li Jesús quixq'ue li ruk' sa' xbeneb ut quitijoc. Ut chirix a'an qui-el sa' li na'ajej a'an.

Jun cujnk biom quiatnac riq'uin li Jesús

¹⁶ Ut quicuulac jun li cujnk riq'uin li Jesús ut quixye re: —At chabil tzolonel, ¿C'a' raj ru us tinbanu re nak tincuechani li junelic yu'am? chan. ¹⁷ Ut li Jesús quixye re: —¿C'a'ut nak nacaye chabil cue cui inc'a' nacanau anihin? Jun ajcui' li chabil cuan ut a'an li Dios. Cui taꝥuaj nak taꝥuank la yu'am chi junelic banu li c'a'ru naxye li chak'rab.— ¹⁸ Ut li cujnk quixye: —¿C'a'ru li chak'rab li nacaye?— Ut li Jesús quixye re: —Maꝥamsi acuas acujtz'in. Matmuxac caꝥar. Mat-elk'ac. Matk'aban. ¹⁹ Cha-oxlok'i la na' ayucua' ut chara la cuas acujtz'in jo' nak nacara acuib laꝥat, chan. ²⁰ Ut li cujnk quichak'oc ut quixye: —At tzolonel, chixjunil a'in xinbanu chalen chak sa' inca'ch'inal. ¿C'a' chic ru maji' ninbanu?— ²¹ Quixye li Jesús re: —Cui taꝥuaj nak tz'akalak re ru la yu'am, ayu ut c'ayi li c'a'ru cuan acue ut si lix tz'ak li taꝥ'ul reheb li neba'. Ut taꝥuank abiomal sa' choxa. Ut nak ac xabanu a'an tatchalk ut tinatake, chan li Jesús re. ²² Ut nak quirabi a'an, li cujnk co chi ra sa' xch'ol' xban nak nabal lix biomal cuan. ²³ Tojo'nak quixye li Jesús reheb lix tzolom: —Relic chi yal tinye ere, k'axal ch'a'aj chok' re junak biom nak taoc rubel xcuanquil li Dios. ²⁴ Tinye ajcui' ere nak inc'a' raj ch'a'aj nak tanumek' junak nimla xul camello sa' ru junak cuꝥ chiru nak taoc junak biom rubel xcuanquil li Dios. ²⁵ Ut eb lix tzolom nak que'rabi a'an, c'ajo' nak que'sach xch'ol' ut que'xye: —¿Ani put taruk taꝥolek'? chanqueb. ²⁶ Ut li Jesús quixca'yaheb ut quixye reheb: —Chiru junak yal cujnk a'an mamim taruk, abanan chiru li Dios chixjunil naru xbanunquil. ²⁷ Quichak'oc laj Pedro ut quixye re: —Lao xkacanab chixjunil li c'a'ru cuan ke xban atakenquil. ¿C'a'ru taꝥuank ke?— ²⁸ Ut li Jesús quixye reheb: —Relic chi yal tinye ere nak lain li C'ajolbej tinc'ojlak sa' lin lok'laj c'ojaribal sa' li ac' ruchich'och', laꝥx li xextaken cue, textc'ojlak ajcui' sa' li cablaju chi c'ojaribal re tetrakok atin sa' xbeneb li cablaju xtepaheb laj Israel. ²⁹ Li ani naxcanab rochoch, ras ritz'in, xna' xyucua', rixakil, lalal xc'ajol, malaj xch'och' sa' inc'aba' lain, li jun a'an k'axal cui'chic nabal li tixc'ul chiru li quixcanab ut tarechani li junelic yu'am. ³⁰ Ut nabaleb li neque'xsic' xcuanquil anakcuan, mokon maꝥ'a'ak chic xcuanquileb. Ut li

ani inc'a' neque'xsic' xcuanquil anakcuan, a'aneb chic li te'cuank xcuanquil mokon, chan li Jesús.

20

Chiru li Dios juntak'et xcuanquil li junjunk

¹ Lix nimajcual cuanquilal li Dios chanchan jun li yucua'bej cuan sa' xjun cablal. Qui-el chak toj ek'ela chixsic'baleb aj c'anjel re te'c'anjelac sa' li racuimk. ² Ut que'xsume c'anjelac chiru chi jun denario li cutan xtojbaleb. Ut quixtaklaheb sa' li racuimk chi c'anjelac. ³ Ut nak qui-el cui'chic sa' beleb or, cuan cui'chic quixtauheb chak sa' c'ayil yal yoqueb chixbaybal rib. ⁴ Ut quixye reheb: —¿Ma inc'a' xeraj c'anjelac sa' li cuacuimk ut texintoj chi tz'akal? chan reheb. Ut eb a'an coeb chi c'anjelac. ⁵ Ca' sut chic co xsic'baleb xtz'akobeb lix mos. Co cua'leb ut co cui'chic sa' oxib or. ⁶ Ut nak tanach'ok ob or, co cui'chic. Ut cuan cui'chic quixtauheb yoqueb chixbaybal rib. Ut quixye reheb: —¿C'a'ut nak yoquex chixnumsinquil le cutan arin chi mac'a' le trabaj? chan reheb. ⁷ Que'chak'oc li cuink ut que'xye re: —Xban nak ma ani naq'uehoc kac'anjel.— Ut li patrón quixye reheb: —¿Ma inc'a' xeraj c'anjelac laex sa' li cuacuimk? chan reheb. ⁸ Ut nak qui-ecuu, li patrón quixye re lix mertom: —Bokeb laj c'anjel ut tatojeb. Li tatojeb xben cua, a'aneb li toje' xe'oc, ut nak ac xatrake' xtojbaleb a'an, tojo'nak tatojeb li xe'oc ek'ela.— ⁹ Ut nak que'chal, jun denario que'toje' cui' li junjunk li que'oc chi c'anjelac sa' ob or. ¹⁰ Ut que'toje' ajcui' li que'oc ek'ela. Sa' xch'oleb a'an nak tertoj raj te'xc'ul chiru li que'oc ecuu. Abanan jun denario ajcui' que'xc'ul li junjunk. ¹¹ Ut nak ac xe'xc'ul li tumin, que'oc chixcuech'bal li patrón. ¹² Ut que'xye: —Eb a'in li xe'oc mokon jun or ajcui' xe'c'anjelac. Ut juntak'et lix tojbaleb xaq'ue riq'uin li xkac'ul lao. Ut lao xoc'anjelac chiru chixjunil li cutan ut xkacu y xtikcual li sak'e ut juntak'et xoatoj riq'uibeb li jun ch'ol chic li toj xe'oc ecuu.— ¹³ Ut quichak'oc li patrón ut quixye re jun reheb li que'oc xben cua: —At cuamig, lain xatintoj chi tz'akal. ¿Ma inc'a' ta bi' xasume c'anjelac chi jun denario li cutan? ¹⁴ C'am la tojbal ut ayu. Li jo' nimal xinq'ue acue laot, a'an ajcui' ting'ue reheb li xe'oc mokon. ¹⁵ ¿Ma inc'a' ta bi' lain yal cue sa' xben li c'a'ru cue? ¿C'a'ut nak nacatcakalin? ¿Ma xban nak chabilin lain riq'uibeb? chan li patrón. ¹⁶ Jo'can nak nabaleb li cuanqueb xcuanquil anakcuan te'canak chi mac'a'ak xcuanquil mokon. Ut li mac'a'eb xcuanquileb anakcuan, te'q'uehek' xcuanquileb mokon. Nabaleb li bokbileb, abanan inc'a' q'uibeb li te'xtau ru li xyalal.

Quixye cui'chic resil lix camic li Jesús

¹⁷ Ut nak yo chi xic Jerusalén, li Jesús quirisiheb xjunes lix tzolom cablaju ut quixye reheb: ¹⁸ —Q'uehomak retal li c'a'ru tac'ulmank. Anakcuan yoco chi xic Jerusalén bar cui' tink'axtesik lain li C'ajolbej sa' ruk'eb li xbenil aj tij jo' ajcui' sa' ruk'eb laj tz'ib. Eb a'an te'xteneb camc sa' inben. ¹⁹ Ut tine'xk'axtesi sa' ruk'eb li macua'eb aj judío. Ut eb a'an tine'xhob, tine'xsac', ut tine'xcamsi chiru cruz. Abanan sa' rox li cutan tincuaclik cui'chic chi yo'yo sa' xyankeb li camenak, chan li Jesús.

Li na'bej quixtz'ama xcuanquileb lix yum chiru li Jesús

²⁰ Laj Jacobo ut laj Juan, a'aneb li ralar laj Zebedeo. Que'cuulac riq'uin li Jesús rochben lix na'eb. Ut li na'bej quixcuik'ib rib chiru li Jesús chixtz'amanquil jun usilal chiru. ²¹ Li Jesús quixye re: —¿C'a'ru tacuaj tinbanu acue?— Ut li ixk quichak'oc ut quixye re: —Ye nak eb lin yum a'in

te'c'ojlak chac'atk sa' la nimajcual cuanquial, jun sa' la nim ut jun sa' la tz'e, chan. ²² Ut li Jesús quixye re: —Inc'a' nequenau xyalal li c'a'ru yoquex chixtz'amanquil. ¿Ma tecuy xc'ulbal li raylal li oc cue chixc'ulbal lain? ¿Ma tecuy xnumsinguil li rahobtesic li tinc'ul lain?— Eb a'an que'xye: —Takacuy, chanqueb. ²³ Ut li Jesús quixye reheb: —Yal ajcui' nak laex tec'ul li raylal jo' li tinc'ul lain. Ut tecuy xnumsinguil li rahobtesic jo' li tincuy xnumsinguil lain. Abanan li na'ajej sa' lin nim ut sa' lin tz'e macua' lain ting'uehok re li na'ajej a'an xban nak ac ch'olch'o chiru lin yucua' ani aj e tixq'ue li na'ajej a'an, chan li Jesús reheb. ²⁴ Ut nak que'rabi li lajeb chic lix tzolom li Jesús li c'a'ru que'xtz'ama li ritz'ineb rib, que'po' riq'uineb. ²⁵ Ut li Jesús quixbokeb riq'uin ut quixye reheb: —Laex nequenau nak li neque'taklan sa' li ruchich'och' neque'numta sa' xbeneb li tenamit. Li ninkeb xcuanquil, a'aneb li neque'taklan. ²⁶ Abanan macua' jo'can tēbanu laex. Li ani taraj cuank xcuanquil sa' eyank, tento nak tixcubsi rib ut tac'anjelak cheru. ²⁷ Ut li ani naraj nimak xcuanquil sa' eyank, tento nak tixcubsi rib ut tac'anjelak cheru. ²⁸ Lain li C'ajolbej. Abanan inc'a' xinchal re nak te'xc'anjela cuu. Xinchal ban re tinc'anjelak chiruheb chixjunil ut re xq'uebal lin yu'am re xtojbal rix lix maqueb chixjunileb.—

Li Jesús quixq'uirtesiheb li mutz'

²⁹ Nak yoqueb chi elc Jericó, nabaleb li tenamit que'taken re li Jesús. ³⁰ Ut cuanqueb cuibeb li mutz' chunchuqueb chire li be. Nak que'rabi nak yo chi chalc li Jesús, que'xjap re chixyebal: —Kacua', Ralalat xc'ajol laj David. ¿Chacuuxtana taxak ku!— ³¹ Ut eb li tenamit que'xch'ilaheb ut que'xye reheb nak inc'a' te'chokink. A'ut eb a'an k'axal cui'chic cau que'xjap re chixyebal: —¿Kacua', ralalat xc'ajol laj David, chacuuxtana taxak ku!— ³² Quixakli li Jesús, quixbokeb ut quixye reheb: —¿C'a'ru taraj tinbanu ere? chan reheb. ³³ Ut eb li mutz' que'xye: —Kacua', takaj tailok li xnak' ku.— ³⁴ Ut li Jesús quiril xtok'obaleb ru, quixch'e' li xnak' ruheb. Ut sa' junpat que'iloc li ruheb ut que'xtake li Jesús.

21

Li Jesús que'xq'ue xcuanquil nak que'oc Jerusalén

¹ Nak ac cuulaqueb re Jerusalén, que'cuulac chire li tenamit Betfagé bar cuan cui' li tzul Olivos. Ut li Jesús quixtaklaheb cuibeb lix tzolom ut quixye reheb: ² —Ayukex sa' li ch'ina tenamit a'an. Ut nak texcuulac, tetau jun li bur bac'bo aran cuan ral. Tehit ut tec'ameb chak cue. ³ Ut cui c'a'ru tayehok' chak ere, teye re, “Li Kacua' t'ajok re li bur ut a' que ajcui' tixtakla chak hon”, cha'akex re. ⁴ Ut chixjunil a'in quic'ulman jo' quiyeh'e' xban li profeta nak quixye chi jo'ca'in:

⁵ Ye reheb li tenamit aj Sión: —Cue' chak le Rey xchal eri'q'uin. Tulan ut c'ojc'o chak chirix jun li bur. Chirix jun ch'ina ral bur xcomon li neque'ikan yo chak chi chalc.— (Zac. 9:9; Is. 62:11)

⁶ Ut coeb lix tzolom ut que'xbanu jo' que'yeh'e' reheb xban li Jesús. ⁷ Que'xc'am chak li bur rochben li ral ut que'xq'ue li rak'eb sa' xbeneb. Ut li Jesús quitake' chirix li ch'ina bur. ⁸ Ut li q'uila tenamit k'axal nabaleb. Cuan li yoqueb chixhelbal lix t'icr sa' be bar tanumek' cui' li Jesús. Ut cuan li que'xyoc' chak ruk' che' ut que'xq'ue li xak sa' be. ⁹ Nak yo chi xic li Jesús cuan yoqueb chi xic chiru ut cuan yoqueb chi xic chirix. Japjoqueb re chixyebal: —Lok'oninbil taxak laj Colol ke, li ralal xc'ajol li rey David. Osobtesinbil taxak li yo chak chi chalc sa' xc'aba' li Kacua' Dios. Aj Colol ke taxak li xchal chak

riq'uin li Dios, chanqueb. ¹⁰ Ut nak cox-ocak li Jesús sa' li tenamit Jerusalén, que'xtububi rib chixjunil ut nabaleb li tenamit yoqqueb chixyebal: —¿Ani a'in? chanqueb. ¹¹ Ut eb li tenamit li yoqqueb chi xic chirix yoqqueb chixyebal: —A'an a'in li Jesús li profeta, aj Nazaret re Galilea, chanqueb.

Li Jesús quirisiheb laj c'ay sa' rochoch li Dios

¹² Ut chirix chic a'an li Jesús qui-oc sa' li rochoch li Dios ut quixyolesiheb li yoqqueb chi c'ayinc ut li yoqqueb chi lok'oc. Quixbalk'usi lix mexeb laj jalol ru tumin ut quixbalk'usi ajcui' lix temeb li yoqqueb chi c'ayinc paloma. ¹³ Quixye reheb: —Jo'ca'in tz'ibanbil sa' li Santil Hu chirix li rochoch li Dios: Li cuochoch a'in re te'tijok cui' li tenamit nak cuan. Abanan laex xeq'ue li rochoch li Dios chok' xna'ajeb laj elk', chan li Jesús reheb. ¹⁴ Ut que'c'ame' riq'uin li Jesús sa' rochoch li Dios li mutz' ut eb li yek rok ut li Jesús quilajxq'uirtesiheb. ¹⁵ Ut eb lix benil aj tij ut eb laj tz'ib que'ril li sachba ch'olej li yo chixbanunquil. Ut que'ril nak eb li saj al japoqqueb re chixyebal sa' li rochoch li Dios: —Lok'oninbil taxak laj Colol ke, li ralal xc'ajol li rey David, chanqueb. Ut c'ajo' nak que'po' laj tij ut eb laj tz'ib. ¹⁶ Ut que'xye re li Jesús: —¿Ma yocat chirabinquil li yoqqueb chixyebal li saj al?— Ut li Jesús quixye reheb: —Yoquin chirabinquil. ¿Ma ma jun cua erilom li tz'ibanbil sa' li Santil Hu li naxye chi jo'ca'in: “Eb li coc'al ut li toj neque'tu'uc neque'xq'ue xlok'al li Dios chi tz'akal”? (Sal. 8:2)

¹⁷ Ut li Jesús quixcanabeb ut qui-el sa' li tenamit ut coj toj Betania bar quihilan cui'.

Li Jesús quixtz'ektana li jun ton chi higo mac'a' ru

¹⁸ Ut ek'ela nak yo cui'chic chi xic Jerusalén, quichal xtz'ocajic li Jesús. ¹⁹ Ut quiril jun ton li che' higo chire li be. Nak quicuulac cuan cui' li che' quiril nak mac'a' ru. Junes xak cuan. Quixye re li jun ton chi higo: —Ma jun cua chic tatuchink, chan. Ut sa' junpat quichakic li che'. ²⁰ Ut nak que'ril a'an, lix tzolom que'sach xch'ol ut que'xye: —¿Chanru nak xchakic sa' junpat lix tonal li higo? chanqueb. ²¹ Quichak'oc li Jesús ut quixye: —Relic chi yal tinye ere nak cui tepab chi tz'akal nak li Dios tixbanu, ut inc'a' taçuibanek ech'ol, taruk ajcui' tebanu jo' xinbanu lain re li che'. Ut moco ca'aj cui' ta raj a'an tebanu. Taruk ajcui' teye re li tzul a'in, “Elen ut cut açuib sa' li palau” ut tauxk ajcui' cheru. ²² Ut chixjunil li c'a'ru tetz'ama nak textijok, cui tepab nak tec'ul, taq'uehek ere.

Eb laj tz'ib que'xcuech'i rix xcuanquil li Jesús

²³ Ut qui-oc cui'chic li Jesús sa' rochoch li Dios. Ut nak yo chixch'olobanquil li xyalal chiruheb li tenamit, que'cuulac riq'uineb li xbenil aj tij ut que'cuulac ajcui' eb li xakabanbibleb chi c'anjelac sa' li rochoch li Dios. Ut que'xye re: —¿Ani xtaklan chak açue chixbanunquil li c'a'ru yocat chixbanunquil? Ut, ¿ani xq'uehoc açuanquil?— ²⁴ Quichak'oc li Jesús ut quixye reheb: —Lain tincuj ajcui' patz'oc ere. Cui tesume li c'a'ru tinpatz' ere, lain tinye ere ani xq'uehoc lin cuanquil chixbanunquil li c'a'ru ninbanu. ²⁵ ¿Ani quitaklan chak re laj Juan chi cubsinc ha'? ¿Ma li Dios malaj ut cujnk quitaklan re? chan reheb. Eb a'an que'xc'oxla ut que'xye chi ribibleb rib: —¿C'a'ru takasume cui'? Cui takaye nak a' li Dios xtaklan chak re, a'an tinye ke c'a'ut nak inc'a' xkapab li c'a'ru quixye laj Juan. ²⁶ Ut cui takaye nak cujnk xtaklan chak re, tepok' li tenamit sa' kaben ut xiu xiu chic cuanko xban nak chixjunileb neque'yehoc re nak laj Juan, a'an tz'akal profeta.— ²⁷ Ut eb a'an que'chak'oc ut que'xye re

li Jesús: —Lao inc'a' nakanau, chanqueb. Ut li Jesús quixye cui'chic reheb: —Chi moco lain tinye ere ani xq'uehoc lin cuanquil, chan reheb.

Li jaljoquil ru atin chirix li cuib chi alalbej

²⁸ Li Jesús quixye cui'chic reheb: ¿C'a'ru nequec'oxla chirix li oc cue chixyebal? Jun li cuink cuan cuib li rala. Ut quicuulac riq'uin li xben rala ut quixye: —At cualal, tatxic anakuan chi c'anjelac sa' li cuacuimk.—
²⁹ Quichak'oc li alalbej ut quixye: —Inc'a' nacuj xic, chan. Abanan mokon chic quiyot'e' xch'ol ut co. ³⁰ Ut li yucua'bej co riq'uin li rala jun chic ut quixt'ama chiru a'an nak taxic chi c'anjelac sa' li cuacuimk. Ut li rala quichak'oc ut quixye: —Cua', lain tinxic, chan. Ut inc'a' co. ³¹ ¿Ani reheb li cuib a'an xbanun re li quiraj lix yucua'? chan. Eb a'an que'chak'oc ut que'xye: —Li xben.— Ut li Jesús quixye reheb: —Relic chi yal tinye ere nak eb laj tiz'ol toj ut eb laj yumbet te'oc xben cua cheru sa' lix nimajcual cuanquil li Dios. ³² Xban nak quic'ulun eri'uin laj juan laj Cubsihom Ha'. Quixc'ut cheru c'a'ru li tiquilal ut inc'a' quepab. Ut eb laj tiz'ol toj ut eb laj yumbet que'xpab. Ut laex queril a'an ut inc'a' quiyot'e' le ch'ol chi moco quejal le c'a'ux re xpabanquil, chan.

Li jaljoquil ru atin chirix laj ilol acuimk inc'a' useb xna'leb

³³ Abihomak jun chic li jaljoquil ru atin li oc cue xyebal: Quicuan jun yucua'bej. Quirau jun sir li racuimk uvas ut quixsut sa' corral. Quixyib jun xna'aj bar te'xyatz' cui' li uvas ut quixyib ajcu' jun ch'ina cab najt xteram re li tac'ac'alenk re li acuimk. Quixsiq'ueb laj ilol re li racuimk. Ut laj echal re co chi najt sa' jalan tenamit. ³⁴ Nak quicuulac xk'ehil xsic'bal ru li acuimk, laj echal re quixtaklaheb lix mos riq'uibeb laj ilol re li acuimk chixc'ulbal li jo' q'ual ru li racuimk li tat'ak a'an. ³⁵ Eb li mos que'chape' xbaneb laj ilol re li acuimk. Quisaq'ue' li jun, li jun chic quicamsic, ut li jun chic quicutic chi pec. ³⁶ Laj echal re li acuimk quixtakla cui'chic jun ch'oleb lix mos, nabaleb chiru li quixtakla xben cua. Ut jo'can cui'chic que'xbanu reheb. ³⁷ Ut inc'a' chic quixtakla lix mos. A' chic li rala quixtakla. “Li cualal te'x-oxlok'i” chan sa' xch'ol. Jo'can nak quixtakla li rala riq'uibeb. ³⁸ Ut nak que'ril li rala, eb laj ilol re li acuimk que'xye chi ribileb rib, “A'an li rala li taechanink re li na'ajej. Kachapak ut kacamsihak, ut lao chic toechanink re.” ³⁹ Jo'can nak que'xchap. Ut que'risi sa' li na'ajej ut que'xcamsi. ⁴⁰ Ut li Jesús quixpatz' reheb li xbenil aj tij: —Nak tac'ulunk laj echal re li acuimk, ¿c'a'ru tibbanu riq'uibeb laj ilol re li racuimk nak nequeye laex?— ⁴¹ Que'xye re: —Inc'a' taril xtok'obal ruheb laj ilol re li racuimk li inc'a' useb xna'leb. Tixcamsiheb. Jalan chic tixsiq'ueb re te'lok re li racuimk. Ut eb a'an, sa' xk'ehil li sic'oc, te'xk'axesti chi tz'akal li jo' q'ual li tat'ak a'an, chanqueb. ⁴² Li Jesús quixpatz' reheb: —¿Ma inc'a' xeril sa' li Santil Hu li naxye chi jo'ca'in? Li pec li que'xtz'ektana laj cablanel, a'an li k'axal lok', li quiq'ueman chok' xxuc li cab. Li Kacua', a'an quixq'ue xlok'al li pec. Ut a'an xsachba ch'olej chok' ke lao. (Sal. 118:22-23)

⁴³ Jo'can nak ninye ere nak lix nimajcual cuanquilal li Dios tamak'ek' cheru ut taq'uehek' re jalanil tenamit ut eb a'an chic li te'pabanak ut te'cuank sa' tiquilal. ⁴⁴ Li ani tat'ane' sa' xben li pec a'in tixtoch'i rib. Ut cui ani sa' aj ben tat'ane' li pec a'in, xujinbil tacanak, chan li Jesús. ⁴⁵ Ut eb lix benil aj tij ut eb laj fariseos que'xtau ru nak chirixeb a'an yo chi atinac nak quixyehab li jaljoquil ru atin a'in. ⁴⁶ Ut que'xc'oxla raj xchapal li Jesús, abanan que'xucua' xbaneb li q'uila tenamit xban nak profeta nak cuan chiruheb.

22

Li jaljoquil ru atin chirix li nink'e caxar

¹ Li Jesús quiatinac cui'chic riq'uineb sa' jaljoquil ru atin. ² Quixye reheb: Lix nimajcual cuanquilal li Dios chanchan jun li rey li quixnink'ei lix sumlajic li rala. ³ Quixtaklaheb lix mōs chixc'ambaleb chak li ac bokbileb. A'ut eb a'an inc'a' que'raj çalç. ⁴ Quixtakla cui'chic jalaneb chix lix mōs ut quixye reheb: —Yehomak reheb li ac bokbileb, “Ac c'ubc'u li tzacaemk, ac xe'camsiman eb li cuacax ut chixjunil li xul li nink xtibeheb. Ac cauresinbil chixjunil. Çalkex sa' li sumlaç,” cha'akex reheb. ⁵ Ut eb a'an inc'a' que'raj que'rabi ut çoeb. Cuan çoeb sa' xc'alebal ut cuan çoeb sa' xc'ayibaleb. ⁶ Ut eb li jun ch'ol chic que'xchapeb lix mōs li rey, que'xrahobtesih eb ut que'xcamsih eb. ⁷ Ut li rey nak quirabi a'an, c'ajo' nak quijosk'o'. Quixtaklaheb lix soldado chixcamsinquit li que'camsin reheb lix mōs. Ut quixtakla xc'atbal lix tenamiteb. ⁸ Tojo'nak quixye reheb lix mōs: —Yal nak li sumlaç ac cauresinbil. Abanan li bokbileb maçua' ajcui' xc'ulubeb çalç sa' li sumlaç. ⁹ Anakcuan texxic sa' eb li be bar neque'nume' cui' li cristian. Ut tebokeb sa' li nink'e li ani tetauheb chak, chan. ¹⁰ Ut çoeb lix mōs sa' eb li be ut que'xc'ameb sa' li nink'e li jo' q'uial que'xtau, jun chaliqeb li çabil xna'leb jo' ajcui' li inc'a' useb xna'leb. Ut quinuajac li cab xbaneb li ula'. ¹¹ Ut qui-oc li rey chirilbaleb li rula'. Nak qui-oc, quiril aran jun li cuink moco tikto ta jo' nak tiktoqeb li cuanqeb sa' li sumlaç. ¹² Li rey quixye re: —At cuamig, çc'a'ut nak xat-oc chak arin chi inc'a' tiktocat jo' neque'xtikib rib li neque'xic sa' sumlaç? chan. Ut li cuink inc'a' quichak'oc. ¹³ Ut li rey quixye reheb lix mōs: —Bac'omak li rok ruk' ut cutumak sa' k'ojoyin chirix cab. Aran ut taçuank li yabac ut li c'uxuxinc ruch e. ¹⁴ Nabaleb li bokbileb aban inc'a' q'uiheb li te'xtau ru li xyalal. ¹⁵ Ut chirix a'an, çoeb laj fariseo ut que'xc'ub rib re rilbal chan ta na ru nak taruk nak te'xyal rix li Jesús riq'uin junak atin re te'xjit cui'. ¹⁶ Que'xtaklaheb lix tzolom rochbened li neque'oquen chirix laj Herodes re nak te'atinak riq'uin li Jesús yal re xsic'bal c'a'ru tapaltok cui' riq'uin li ratin. Ut que'xye re: —At tzolonel, nakanau nak nacara li yal. Ut sa' xyalal nacac'ut chiruheb li tenamit c'a'ru naraj li Dios ut ma' ani nacaxucua ru ut inc'a' nacasiq'ueb ru li ani nacara. ¹⁷ Ye bi' ke c'a'ru nacac'oxla chirix li na'leb a'in. ÇMa us xq'uebal li toj re laj César li Acuabej malaj inc'a'? çanqeb. ¹⁸ Ut li Jesús quixnau nak moco anchaleb ta xch'ol nak yoqeb chi patz'oc. Quixtau ru lix mausilaleb ut quixye reheb: —Ex aj ca'pac'al u, çc'a'ut nak nequeraj xyalbal cuix? ¹⁹ C'utumak chicuu li tumin li nequextojoc cui', chan reheb. Ut que'xc'ut chiru jun li tumin. ²⁰ Ut li Jesús quixpatz' reheb: —ÇAni aj e li jalam uçh cuan chiru li tumin a'in? Ut, çani aj c'aba' li tz'ibanbil chiru? chan. ²¹ Ut que'chak'oc ut que'xye re: —Re li Acuabej, çanqeb. Ut li Jesús quixye cui'chic reheb: —Tojomak bi' re li Acuabej li c'a'ru re li Acuabej, ut tojomak re li Dios li c'a'ru re li Dios, chan. ²² Ut que'sach xch'ol nak que'rabi li c'a'ru quixye ut que'xcanab li Jesús ut çoeb.

Li xyalal lix cuaclijqeb li camenak chi yo'yo

²³ Sa' li cutan a'an que'cuulac riq'uin li Jesús cuib oxib laj saduceo. Eb a'an inc'a' neque'xpab nak te'cuaclik cui'chic chi yo'yo li camenak. ²⁴ Que'xye re li Jesús: —At tzolonel, laj Moisés quixtz'iba jun li chak'rab ut quixye chi jo'ca'in: Cui junak cuink taçamk ut tixcanab li rixakil chi maç'a' ralaç xc'ajol, taç'amek' li rixakil xban li rjtz'in li camenak re nak taçuank ralaç xc'ajol sa' xc'aba' li camenak. ²⁵ Que'cuan cuukub li cuink rjtz'ineb rib sa' kayak. Li asbej quisumla ut nak quicam ma' jun li ralaç xc'ajol quicuan. Ut li rixakil

quic'ame' xban li rjtz'in li camenak re nak taçuank ralar xc'ajol sa' xc'aba' li camenak. ²⁶ Ut li cujnk a'an quicam ajcui' ut ma jun li ralar xc'ajol quicuan. Ut jo'can cui'chic quic'ulman toj retal nak que'cam chixjunileb li cuukub chi cujnk rjtz'ineb rib. ²⁷ Ut nak ac xe'cam li cuukub chi cujnk, quicam ajcui' li ixk. ²⁸ Ut sa' xcuaclijiqueb li camenak chi yo'yo, nak te'cuaclik eb a'an, ¿ani aj ixakil tačanak cui' li ixk a'an, xban nak li cuukub chi cujnk que'cuan chok' xbelom? chanqueb re li Jesús. ²⁹ Nak quichak'oc, li Jesús quixye reheb: — Læx yoquex chixbalak'inquil erib xban nak inc'a' nequetau ru li c'a'ru naxye sa' li Santil Hu chi moco nequetau ru lix cuanquil li Dios. ³⁰ Nak te'cuaclik cui'chic chi yo'yo li camenak, chanchanakeb chic li ángel sa' choxa xban nak inc'a' te'sumlak chi moco te'sumubank chic. ³¹ Ut chirix lix cuaclijiqueb li camenak chi yo'yo, ¿ma inc'a' erilom sa' li Santil Hu li quixye li Dios ere chirix lix cuaclijiqueb li camenak chi yo'yo? Quixye chi jo'ca'in: ³² Lain lix Dios laj Abraham, lix Dios aj Isaac, ut lix Dios laj Jacob. Li Dios, a'an maçua' xDioseb li camenakeb; xDioseb ban li yo'yoqueb, chan li Jesús. (Jo'can nak li Dios quixc'ut nak cuan xcuaclijiqueb chi yo'yo li camenak.) ³³ Ut li q'uila tenamit que'sach xch'oleb chirabinquil li xyalal li yo' chixch'olobanquil li Jesús chiruheb.

Li chak'rab k'axal nim xcuauquil

³⁴ Ut nak laj fariseo que'xq'ue retal nak inc'a' chic que'ru xsumenquil li Jesús laj saduceo, eb a'an chic que'xch'utub ribeb chixc'ubanquil chanru te'xbanu. ³⁵ Ut jun reheb, aj tzolol chak'rab, quipatz'oc re li Jesús yal re xyalbal rix. ³⁶ —At tzolonel, chan re li Jesús, ¿Bar cuan li chak'rab li k'axal nim xcuauquil?— ³⁷ Li Jesús quichak'oc ut quixye re: —Li chak'rab li k'axal nim xcuauquil, a'an a'in: Tara li Kaçua' la Dios chi anchal ach'ol ut chi anchal la çuam ut chi anchal la c'a'ux. ³⁸ A'an a'in li xben chak'rab, li k'axal nim xcuauquil sa' xyankeb chixjunil. ³⁹ Ut li xcab, chanchan ajcui' a'in: Tara la çuas açujtz'in jo' nak nacara açuib laa. ⁴⁰ Cui nacabanu li cuib chi chak'rab a'in ac xabanu li naxye sa' chixjunil li chak'rab jo' ajcui' li yebil xbaneb li profeta, chan li Jesús.

Li Cristo, li yechi'inbil xban li Dios, a'an ralar xc'ajol li rey David

⁴¹ Ut nak toj ch'utch'uqeb laj fariseo, li Jesús quixpatz' reheb: ⁴² —¿C'a'ru nequec'oxla chirix li Cristo, li yechi'inbil xban li Dios? ¿Ani aj alal aj c'ajol nak nequeye?— Ut que'xye re: —Ralar xc'ajol li rey David.— ⁴³ Li Jesús quixye reheb: —¿C'a'ut nak laj David quixye li c'a'ru quirec'a' sa' xch'ol xban li Santil Musik'ej nak quixye “Kaçua'” re li Cristo? Quixye chi jo'ca'in: ⁴⁴ Li Kaçua' Dios quixye re li Kaçua' laj Colol cue, c'oijan sa' lin nim uk' toj ting'ueheb li xic' neque'iloc açue rubel la cuanquil, chan. (Sal. 110:1) ⁴⁵ Li rey David quixye “Kaçua'” re, usta a'an xcomoneb li ralar xc'ajol.— ⁴⁶ Ut ma jun chic quirru chi sumenc re li Jesús. Ut chalen sa' li cutan a'an, ma ani chic quixcacuu xch'ol chi patz'oc re li Jesús.

23

Li Jesús quixk'useb laj tz'ib ut eb laj fariseo

¹ Tojo'nak li Jesús quixch'olob li xyalal chiruheb li q'uila tenamit jo'queb ajcui' lix tzolom ut quixye reheb: ² —Eb laj tz'ib ut eb laj fariseo, q'uebileb xcuauquil chixch'olobanquil xyalal li chak'rab li quic'uehe' re laj Moisés. ³ Jo'can nak chixjunil li te'xye ere, chec'ula sa' ech'ol ut chebanu. Abanan mebanu jo' neque'xbanu eb a'an xban nak yal riq'uin xtz'umal reheb

neque'xye ut inc'a' neque'xbanu li c'a'ru neque'xye. ⁴ K'axal al li ik neque'xq'ue sa' xbeneb li cristian ut k'axal ch'a'aj xc'ambal. A'ut eb a'an chi moco riq'uin ru'uj ruk'eb neque'raj xch'e'bal. ⁵ Chixjunil li c'a'ak re ru neque'xbanu, a'an yal re nak te'ilek' xbaneb li cristian. Neque'xyib chi nink ru li coc' cax filacterias xc'aba' bar nacuan cui' li chak'rab ut neque'xbac' sa' xpequemeb ut sa' xteleb. Ut nacuulac chiruheb li rak'eb chi nink lix sahob ru chire. ⁶ Ut nak neque'xic chi cua'ac sa' eb li nink'e neque'xsic' li chabil na'ajej bar te'q'uehek' xlok'al, ut neque'raj c'o'jlac sa' li na'ajej k'axal lok' nak cuanqueb sa' li cab bar neque'xch'utub cui' ribeb laj judio. ⁷ Eb a'an neque'raj nak te'oxlok'ik ut te'q'uehek' xsahil xch'oleb sa' eb li be. Ut neque'raj nak li tenamit te'xye "tzolonel" reheb. ⁸ Abanan laex merahi ru nak li tenamit te'xq'ue elok'al ut te'xye "tzolonel" ere xban nak jun ajcui' laj tzolol ere cuan. Lain li Cristo laj tzolol ere ut chejunilex laex eritz'in erib. ⁹ Ut ma' ani teg'ue chok' ekaca' sa' ruchich'och', xban nak jun ajcui' li Kacua' cuan. A'an cuan sa' choxa. ¹⁰ Chi moco chec'aba'ni aj c'amol be, xban nak jun ajcui' laj c'amol ebe. A'an lain li Cristo. ¹¹ Li ani nac'anjelac cheru, a'an li k'axal nim xcuanquil sa' eyank. ¹² Li ani naxq'ue xcuanquil xjunes rib, li jun a'an tacubsik xcuanquil. Ut li ani naxcubsi rib, li jun a'an taq'uehek' xcuanquil. ¹³ Ra chalel sa' eben, laex aj tz'ib ut laex aj fariseo, ex aj ca'pac'al u. Inc'a' nequec'ut li xyalal chiruheb li tenamit ut nequeram chiruheb lix cuanquil li Dios. Laex inc'a' nequeraj xk'axtesinquil erib rubel xcuanquil li nimajcual Dios ut inc'a' ajcui' nequecanabeb chixk'axtesinquileb rib li ani neque'raj. ¹⁴ Ra chalel sa' eben, laex aj tz'ib ut laex aj fariseo, ex aj ca'pac'al u. Nequemak' li rochoheb li xmalca'an ut nequeyal xmukbal re mausalal riq'uin nak najt rok nequextijoc. Ut xban a'an k'axal cui'chic ra li tojbal mac li tachalk sa' eben. ¹⁵ Ra chalel sa' eben laex aj tz'ib ut laex aj fariseo, ex aj ca'pac'al u. Nequesuti li ruchich'och' jo' ajcui' li palau re xsic'bal ani tapabank re le tijeb. Ut nak ac xe'xk'axtesi rib sa' eyank, k'axal cui'chic yibru xna'lebeb cheru laex ut emac laex nak te'xic sa' xbalba. ¹⁶ Ra chalel sa' eben, laex mutz' aj c'amol be. Laex nequeye: —Li ani tixbanu xjuramento sa' xc'aba' lix templo li Dios, inc'a' tento tixbanu li quixye. Abanan li ani tixbanu xjuramento sa' xc'aba' li oro li cuan sa' lix templo li Dios, li jun a'an tento nak tixbanu li c'a'ru xye sa' xjuramento, chanquex. ¹⁷ Mac'a' ena'leb ut mutz'ex xban nak inc'a' nequetau xyalal. ¿Bar cuan li k'axal nim xcuanquil? ¿Ma li oro, malaj a' lix templo li Dios li nasantobresin re li oro? ¹⁸ Ut nequeye ajcui': —Li ani naxbanu xjuramento sa' xc'aba' li artal, li jun a'an inc'a' tento tixbanu li c'a'ru quixye. Abanan li ani naxbanu xjuramento sa' xc'aba' li mayej cuan sa' xben li artal, tento nak tixbanu li c'a'ru quixye sa' lix juramento, chanquex. ¹⁹ Mac'a' ena'leb ut mutz'ex xban nak inc'a' nequetau xyalal. ¿Bar cuan li k'axal nim xcuanquil? ¿Ma li mayej malaj a' li artal li nasantobresin re li mayej? ²⁰ Jo'can nak li ani tixbanu xjuramento sa' xc'aba' li artal, naxye xjuramento sa' xc'aba' a'an ut sa' xc'aba' ajcui' chixjunil li c'a'ru cuan sa' xben. ²¹ Ut li ani naxbanu lix juramento sa' xc'aba' lix templo li Dios, naxbanu sa' xc'aba' lix templo li Dios ut sa' xc'aba' ajcui' li Dios li nacuan chi sa'. ²² Ut li ani naxbanu xjuramento sa' xc'aba' li choxa, naxbanu xjuramento sa' xc'aba' lix c'ojaribal li Dios ut sa' xc'aba' ajcui' li Dios li c'ojc'o sa' xben. ²³ Ra chalel sa' eben laex aj tz'ib ut ex aj fariseo, ex aj ca'pac'al u. Nequemayeja lix lajjetkil li isqui'ij, li eneldo li comino. Ut nequetz'ektana li k'axal cuan xcuanquil sa' li chak'rab. Inc'a' nequebanu li tiquilal. Inc'a' nequex-uxtanan u ut inc'a' nequexpaban. Us nak nequemayeja lix lajjetkil abanan inc'a' raj nequecanab xbanunquil li k'axal cuan xcuanquil. ²⁴ Ex mutz' aj c'amol be, nequeyal ek'e chixbanunquil li c'a'ak re ru li mac'a' xcuanquil, abanan li

nim xcuanquil inc'a' nequebanu. Chanchan nak nequetz'il ru le ha' re nak inc'a' tenuk' li coc' suk ut a' chic li ninki xul camello nequenuk'. ²⁵ Ra chalel sa' eben laex aj tz'ib ut aj fariseo, ex aj ca'pac'al u, xban nak a' chic li rix le sec' ut le plato nequech'aj, aban lix sa' numtajenak chi tz'aj xban le mausilal ut li elk'ac nequebanu. ²⁶ Ex mutz' aj fariseo, ch'ajomak xben cau lix sa' le sec' ut le plato re nak ch'ajbilak ajcui' li rix. ²⁷ Ra chalel sa' eben laex aj tz'ib ut laex aj fariseo, ex aj ca'pac'al u. Chanchanex li neque'muke' cui' li camenak. Bonbibleb rix ut c'ajo' xchak'al eb ru, a'ut chi sa' nujenak chi tz'aj ut chi xbakel camenak. ²⁸ Jo'can ajcui' laex. Relic chi yal nak chabil nequexc'utun chiruheb li tenamit. Abanan le ch'ol nujenak chi mausilal ut laex aj ca'pac'al u. ²⁹ Ra chalel sa' eben laex aj tz'ib ut laex aj fariseo, ex aj ca'pac'al u. Nequeyib li que'muke' cui' li profetas ut nequerutz'u'uji chak ru li que'muke' cui' li tiqueb xch'ol. ³⁰ Ut laex nequeye: —Cui ta lao ac cuanco chak sa' li cutan nak xe'cuan li kaxe' katon, inc'a' raj xkabanu jo' que'xbanu eb a'an. Inc'a' raj xkacamsiheb li profetas, chanquex. ³¹ Abanan riq'uin li mausilal li nequebanu laex, nac'utun nak juntak'etex riq'uibeb le xe'tonil yucua', li que'camsin reheb li profetas. ³² Choyomak bi' xbanunquil li inc'a' us li que'xtiquib xbanunquil le xe'tonil yucua'. ³³ Chanchanex c'anti', chanchanex ralex c'ambolay, ¿chan ta cui' ru nak texcolek' chiru lix tojba mac sa' xbalba? ³⁴ Lain tintaklaheb eriq'uin li profeta ut li cuanqueb xna'leb ut eb laj tzolonel. Abanan laex inc'a' terabi. Ut sa' xyankeb a'an, cuan tecamsiheb, cuan teq'ueheb chiru cruz, ut cuan cui'chic li terahobtesieheb sa' li cab li nequech'utub cui' erib chixtzolbal ratin li Dios. Ut cuan cui'chic tetakeheb sa' li junjunk chi tenamit re xchapbaleb. ³⁵ Xban le mausilal a'an, tat'ane' sa' eben lix camiqueb li chabileb xna'leb riq'uin xcamic laj Abel li tic xch'ol ut toj riq'uin xcamic li lalal laj Berequias laj Zacarias xc'aba' li quecamsi chiru nebal chixc'atk li rochoch li Dios ut li artal. ³⁶ Relic chi yal tnye ere nak chixjunil li camsinc que'xbanu chak junxil, jo' ajcui' li yoquex chixbanunquil anakcuan, tat'ane' ajcui' sa' eben laex li cuanquex anakcuan xban nak yoquex chixbanunquil jo' que'xbanu eb a'an.

Quiyot'e' xch'ol li Jesús chirilbaleb aj Jerusalén

³⁷ Ex aj Jerusalén, ex aj Jerusalén, neque-camsiheb li tz'akal profeta ut nequecuti chi pec eb li neque'taklac eriq'uin xban li Dios. Nabal sut raj xcua'j ecollal jo' nak naxch'utubeb li ral li caxlan rubel lix xic'. Abanan laex inc'a' xeraj. ³⁸ Ut anakcuan le tenamit jo' ajcui' li templo tacanak chi naq'uirnac aj chic ru. ³⁹ Tnye ut ere chalen anakcuan inc'a' chic teril cuu toj nak teye, "Osobtesinbilak a'an li xchal sa' xc'aba' li Kaçua'". Toj aran chic teril cuu, chan li Jesús.

24

Li Jesús quixye nak tixtau xk'ehil nak tajuq'uek' li rochoch li Dios

¹ Qui-el sa' li templo li Jesús, ut nak yo' chi xic, que'cuulac lix tzolom riq'uin ut que'xc'ut chiru li ninki cab xcuent li templo. ² Quichak'oc li Jesús ut quixye reheb: —Us ajcui' nak teril chi us chixjunil a'in xban nak tacuulak xk'ehil nak ma' jun chic reheb li pec a'an tacanak sa' xna'aj chi inc'a' ta tajuq'uek', chan. ³ Ut chirix a'an, co chiru li tzul Olivos ut nak li Jesús quic'olja aran xjunes, lix tzolom que'cuulac riq'uin ut que'xe ye: —Ye ke jok'e tac'ulman'k li yocac chixyebal. ¿C'a'ru talaj'ulman'k nak tacuulak xk'ehil la' c'ulunic? Ut ¿c'a'ru retalil li roso'jiqueb li cutan a'in?— ⁴ Quichak'oc li Jesús ut quixye reheb: —Cheq'uehak retal re nak ma' ani chibalak'ink ere. ⁵ Nabal te'ch'alk

chi balak'inc, ut te'xye nak sa' inc'aba' xe'chal, abanan moco yal ta. Tole'xye, "Lain li Cristo", cha'keb. Ut nabal te'balak'ik xbaneb. ⁶ Nak terabi nak yo li plet ut nak terabi resil nak ticlac re li plet yalak bar, mexxucac xban nak tento nak tac'ulmank chi jo'can. Abanan moco ac a'an ta roso'jiqueb li cutan a'in. ⁷ Nabal li tenamit te'pletik chi ribileb rib. Ut eb li acuabej te'xpleti ribeb. Talajcuank li cue'ej ut tacuank li yajel ut tacuank li hic sa' nabal chi na'ajej. ⁸ Abanan chixjunil a'an yal xticiajic li raylal li tachalk. ⁹ Tojo'nak texk'axtesik ut texrahobtesik ut texcamsik. Ut xic' tex-ilek' xbaneb chixjunileb li tenamit sa' inc'aba' lain. ¹⁰ Ut sa' eb li cutan a'an nabaleb te'xcanab lix pabaleb. Ut a'aneb chic li te'q'uehok reheb laj pabanel sa' raylal. Ut xic' chic te'ril ribeb. ¹¹ Ut nabaleb li profeta aj balak' te'chalk ut nabaleb te'balak'ik xbaneb. ¹² Ut xban nak tanumtak li mausilal, nabaleb te'xcanab xrabaleb li ras ritz'in. ¹³ Ut li ani tixcuy xnumsinquil li raylal a'in toj sa' roso'jic lix yu'am, a'an tacolek'. ¹⁴ Ut li resil lix nimajcual cuanquial li Dios tayemank yalak bar jun sut rubel choxa re nak chixjunileb li tenamit te'rabi resil li colba-ib. Tojo'nak tachalk li roso'jiqueb li cutan. ¹⁵ Chetzolak rix chi us li c'a'ru quixye li profeta Daniel re nak tetau ru li c'a'ru tac'ulmank. A'an quixye nak eb laj balak' te'rocsi sa' li rochoch li Dios bar macua' xc'ulub cui' cuanc li k'axal yibru ut xucuaajel riblal xban lix mausilal, ut riq'uin a'an te'xmux ru lix templo li Dios. (Dan. 9:27; 12:11) ¹⁶ Nak teril a'an, laex li cuanquex Judea, chex-elelik sa' junpat ut texxic toj sa' li tzul. ¹⁷ Li ani cuank chak sa' xben li rochoch nak tac'ulmank a'an, chi cubec chak ut tic taelelik ut inc'a' chic tac sa' rochoch chirisinquil li c'a'ru cuan re. ¹⁸ Ut li ani cuank chak sa' xc'alebal inc'a' chic chisuk'ik sa' rochoch chixxocbal li rak'. ¹⁹ Tok'obak ruheb li yaj aj ixk ut li yoqueb chi tu'resink sa' eb li cutan a'an xban nak k'axal cui'chic ch'a'aj li elelik chok' reheb. ²⁰ Chextijok ut chetz'ama chiru li Dios re nak inc'a' tac'ulmank li raylal a'in sa' habalk'e chi moco sa' li hilobal cutan. ²¹ Sa' eb li cutan a'an ma ca'ch'in li raylal tac'ulmank. Ma jun cua quic'ulman chi jo'can chalen chak sa' xticiajic li ruchich'och', chi moco tac'ulmank junak chic jo'can mokon. ²² Cui ta mac'a' sa' xch'ol li Kaqua' xrakbal ruheb li cutan a'an, ma ani raj tacanak chi yo'yo sa' ruchich'och'. Jo'can nak li Kaqua' tixseba xrakbal ruheb li cutan a'an sa' xc'aba'eb li sic'bileb ru. ²³ Jo'can nak cui ani tayehok ere, "Cue' li Cristo," malaj, "le' cuan li Cristo," mepab li c'a'ru tixye. ²⁴ Nabaleb aj balak' te'c'ulunk ut te'xye nak a'aneb li Cristo. Ut cuan te'xye nak a'aneb profeta. Nabal li c'a'ak re ru te'xc'utbesi ut sachba ch'olej telaje'xbanu re xyalbal xbalak'inquileb li tenamit, jo'queb ajcui' li sic'bileb ru xban li Dios. ²⁵ Abanan cheq'uehak retal. Ac xinye ere li c'a'ru talaje'c'ulmank. ²⁶ Cui ut neque'xye ere, "Le' sa' li chaki ch'och' cuan li Cristo," mexxic chirilbal. Cui ut neque'xye ere, "Arin cuan sa' cab," mepab li c'a'ru te'xye. ²⁷ Lain li C'ajolbej tinc'ulunk sa' junpat. Chanchan lix repom li cak na-el chak sa' releb sak'e ut naxc'ut rib toj sa' roqueb sak'e. ²⁸ Yal li neque'xye nak bar cuank junak camenak, aran te'xtub rib li so'sol.

Nak tol-ekl cui'chic li C'ajolbej Dios

²⁹ Ut sa' eb li cutan a'an nak acak xrake' li raylal a'an, tak'ojoyinok' ru li sak'e ut li po inc'a' chic tacutanok' ru. Tac'ank chak ru li choxa ut li chahim talaje't'ane'k' chak. ³⁰ Tojo'nak tac'utunk sa' choxa li cuetalil lain li C'ajolbej. Ut te'yot'ek' ut te'yabak chixjunileb li cuanqueb sa' ruchich'och'. Ut te'ril cuu lain li C'ajolbej nak yokin chak chi chalac sa' li chok riq'uin lix nimal incuanquil ut inlok'al. ³¹ Ut nak tac'ank chak chi cau li trompeta, tintaklaheb lin angel. Ut te'xch'utub li sic'bileb ru inban li cuankeb yalak

bar jun sut rubel choxa jun sut sa' ruchich'och'. ³² Cheq'uehak retal c'a'ru naxbanu li jun ton chi higo. Nak nak'unk'ut chak li xak chi elc, riq'uin a'an tenau nak yo chak chi nach'oc li sak'ehil. ³³ Jo' nak li higo naxc'utbesi retalil li sak'ehil, jo' can ajcui' chixjunil li c'a'ak re ru a'an talaje c'ulmank, naxc'utbesi retalil nak yo chi cuulac xk'ehil nak tolinelk cui'chic lain li C'ajolbej. ³⁴ Relic chi yal tinye ere nak toj talaje c'ulmank chixjunil li c'a'ak re ru a'in chi toj maji' neque'oso' li tenamit a'in. ³⁵ Li choxa ut li ruchich'och' talaje'osok'. Abanan li cuatin inc'a' tacanak yal chi jo'can chi inc'a' ta tac'ulmank chixjunil li c'a'ak re ru xinye. ³⁶ Abanan ma' ani nana'oc re jok'e lix k'ehil ut lix honal inc'ulunic. Eb li angel sa' choxa inc'a' neque'xnau chi moco lain li C'ajolbej ninna'oc re. Ca'aj cui' li Dios Acuabej nana'oc re jok'e tac'ulmank a'in. ³⁷ Jo' quic'ulman sa' xcutan laj Noé, jo'can ajcui' tac'ulmank nak tolinelk cui'chic lain li C'ajolbej. ³⁸ Sa' eb li cutan a'an nak toj maji' quicuan li but'i ha', eb li tenamit yoqueb chak chi cua'ac ut yoqueb chi uc'ac, ut yoqueb chi sumlac ut chi sumbanc toj sa' li cutan nak qui-oc laj Noé sa' li jucub cab. ³⁹ Ut inc'a' que'xtau xyalal toj quichal li but'i ha' ut quilaje c'ame' chixjunileb xban li but'. Chanchan ajcui' a'an nak tolinelk cui'chic lain li C'ajolbej. ⁴⁰ Sa' li cutan a'an cuib li cuink cuankeb sa' c'alebal, jun aj pabanel ut jun li macua' aj pabanel. Ut laj pabanel, a'an li tac'amek' xban li Dios ut li jun chic li macua' aj pabanel, a'an tacanabak. ⁴¹ Ut cuib li ixk yokeb chi que'ec sa' jun chi que'leb, jun aj pabanel ut jun li macua' aj pabanel. Ut laj pabanel, a'an li tac'amek' xban li Dios ut li jun chic li macua' aj pabanel, a'an tacanabak. ⁴² Jo'can nak yo'on cuankex xban nak inc'a' nequenau jok'e honal tolinelk lain li Kacua'. ⁴³ Chenauhak a'in: nak cui ta naxnau li yucua'bej sa' li cab jok'e honal re li k'ojoyin tol-elk laj elk', tayo'lek raj ut inc'a' raj tixcanab chi elk'ac xsa' li rochoch. ⁴⁴ Jo'can ajcui' laex yo'on cuankex chi oybeninc xban nak inc'a' nequenau jok'e honal tincuulak lain li C'ajolbej. Tincuulak chi mac'a' sa' ech'ol.

Li chabil aj c'anjel ut li inc'a' chabil aj c'anjel

⁴⁵ ¿Ani ut laj c'anjel chabil ut cuan xna'leb? A'an li quiq'uehe' xcuanguil xban lix patrón sa' xbeneb li rech mosil ut a'an taq'uehok re xtzacaeḿkeb sa' x-oril. ⁴⁶ Us xak re laj c'anjel a'an li yok chixbanunquil chi jo'can nak tol-elk lix patrón. ⁴⁷ Relic chi yal tinye ere nak lix patrón tixk'axtesi sa' ruk', chixjunil lix juncablal. ⁴⁸ Aban cui laj c'anjel a'an inc'a' us lix na'leb, tixye sa' xch'ol, "Lin patrón tabayk chak chi c'ulunc." ⁴⁹ Ut taoc chixsac'baleb li rech aj c'anjelil, ut taoc chi cua'ac ut chi uc'ac rochbeneb li calajenak. ⁵⁰ Ut mac'a'ak sa' xch'ol nak tol-elk lix patrón. ⁵¹ Ut tac'ajtesik ru ut taq'uehek' sa' xyankeb laj ca'pac'al u. Ut aran tacuank li yabac ut li c'uxuxinc' ruch e.

25

Li jaljoquil ru atin chirix li lajeb chi tuk' ix

¹ Lix nimajcual cuanquilal li Dios, a'an chanchan li quic'ulman sa' jun li sumlac. Li lajeb chi tuk' ix que'xc'am lix candil ut coeb sa' jun li sumlac chixc'ulbal li belomej. ² Ob cuanqueb xna'leb ut li ob chic mac'a' xna'lebeb. ³ Li obeb li mac'a'eb xna'leb inc'a' que'xcauresi rib chi us. Que'xc'am lix candil, abanan inc'a' que'xc'am xya'al lix candil. ⁴ Ut li cuanqueb xna'lebeb que'xcauresi rib chi us, que'xc'am lix candil ut que'xc'am ajcui' lix y'al. ⁵ Ut nak quibay chak li belomej, neque'xikan chixjunileb toj retal quicube xcuarahéb. ⁶ Ut sa' tuktu k'ojoyin, que'rabi nak yoqueb chixjapbal reheb li tenamit chixyebal: —Cue' chak li belomej. Ayukex, c'ulumak chak,

chanqueb. ⁷ Ut li lajeb chi tuk' ix que'aj ru ut que'oc xyjbanquil lix candil. ⁸ Ut li ob li mac'a'eb xna'leb que'xye reheb li ob chic li cuanqueb xna'leb: —Jec'omak bayak xya'al li kaxam xban nak chupc re li kacandil, chanqueb. ⁹ Aban li cuanqueb xna'leb que'xye: —Inc'a' naru. Inc'a' tatz'aklok li xya'al li ke cui takaq'ue ere laex. Ayukex riq'uineb laj c'ay. Lok'omak chak ere, chanqueb reheb. ¹⁰ Ut cuanqueb chak chixlok'bal lix yal'al lix candil nak col-elk li belomej. Ut li ob chic li cuanqueb xya'al lix candil que'oc rochben sa' li cab. Ut quitz'ape' li oquebal. ¹¹ Ut nak que'suk'i chak li ob chi tuk' ix chixlok'bal xya'al lix xameb, que'oc chibokoc sa' li oquebal ut que'xye: —Kacua', te li cab chiku, chanqueb. ¹² Ut li belomej quichak'oc ut quixye reheb: —Relic chi yal tinye ere inc'a' ninnau eru.— ¹³ Jo'can nak lain ninye ere: Yo'on cuanqex xban nak inc'a' nequenau li cutan chi moco li honal jok'e tolinelk lain li C'ajolbej.

Li jaljoquil ru atin chirix li tumin naxc'utbesi chanru nak toc'anjelak chiru li Dios

¹⁴ Ut lix nimajcual cuanquilal li Dios, a'an chanchan jun li cujnk li ac xic re chi najt. Quixbokeb lix mos riq'uin ut quixk'axtesi lix tumin sa' ruk'eb lix mos. ¹⁵ Quixq'ue ob mil pes re li jun, cuib mil re li jun chic ut quixq'ue jun mil re li jun chic. Quixq'ue re li junjunk a' yal chanru lix sebal xch'ol chi rilbal. Tojo'nak co chi najt. ¹⁶ Ut li mos li quic'uluc re li ob mil pes, qui-oc chi yacoc chiru ut quirechani ob mil pes chic sa' xben li quixc'ul. ¹⁷ Ut jo'can cui'chic quixbanu li quic'uluc re li cuib mil pes. Ut quirechani cuib mil pes chic sa' xben li quixc'ul. ¹⁸ A'ut li mos li quic'uluc re li jun mil pes, co ut quixbec jun li jul sa' ch'och'. Ut aran quixmuk li jun mil pes li quiq'uehe' re xban lix patrón. ¹⁹ Ut najterak chic, quic'un lix patroneb laj c'anjel a'an. Quixbokeb lix mos chixk'axtesinuil xcuenteb. ²⁰ Ut quicuulac li mos li quic'uluc re li ob mil pes. Ut quixc'am chak li ob mil li quixc'ul ut quixc'am chak ajcui' li ob mil chic li xben li quirechani, ut quixye: —Kacua', ob mil pes caq'ue cue. Cuaye' la tumin ut ob mil chic xcuexchani chak sa' xben li caq'ue cue, chan. ²¹ Ut lix patrón quixye re: —K'axal us xabanu. Laat chabilat ut tz'akalat aj c'anjel. Sa' xben li ca'ch'in xink'axtesi acue, chabilat xat-el. Anakuan tink'axtesi chic nabal acue. Chisahok' sa' la ch'ol xban nak tattz'akonk ajcui' riq'uin li sahil ch'olejil li cuan cuiq'uin lain, chan. ²² Ut li mos li quic'uluc re li cuib mil pes quicuulac ut quixye: —Kacua', caq'ue cue cuib mil pes ut cuib mil pes chic xcuexchani chak sa' xben, chan. ²³ Ut lix patrón quixye re: —Us xabanu. Chabilat aj c'anjel. Riq'uin li ca'ch'in xinq'ue acue, us xat-el. Anakuan tink'axtesi acue nabal chic. Chisahok' sa' la ch'ol xban nak tattz'akonk ajcui' riq'uin li sahil ch'olejil li cuan cuiq'uin lain, chan. ²⁴ Ut quicuulac ajcui' li jun chic li quic'uluc re li jun mil pes ut quixye re lix patrón: —Kacua', ninnau nak josk'at laat. Nacatk'oloc bar inc'a' nacat-au cui', ut nacatxococ bar cui' inc'a' nacatpajin iyaj. ²⁵ Jo'can nak quinxucuaq'ue ut cojn ut coxinmuk sa' ch'och' li caq'ue cue. Cue' li jun mil pes li caq'ue cue, chan. ²⁶ Ut li patrón quijosk'o' ut quixye re: —Inc'a' us la na'leb. Inc'a' nacacuaq'ue trabajic. Xanau nak nink'oloc bar inc'a' nin-au cui'. Ut xanau nak ninxococ bar inc'a' ninpajin cui' iyaj. ²⁷ Jo'can ut tento nak xaq'ue rajlin tumin reheb laj to' tumin. Ut sa' inc'ulunic, xinc'ul raj ral lin tumin rochben raj li xaq'ue chi to', chan. ²⁸ Ut li patrón quixye reheb lix mos li cuanqueb aran: —Mak'omak chiru li jun mil pes ut q'uehomak re li ani aj iq'uin cuan li lajeb mil pes. ²⁹ Chixjunil li ani cuan nabal reheb, mas cui'chic taq'ueman'k re ut k'axal cui'chic nabal ta'cuank re. Ut li ani ca'ch'in ajcui' cuan re, tamak'mank chiru li jo' q'ual cuan re. ³⁰ Ut laj

c'anjel a'in, maç'a' na-oc cui'. Isihomak arin ut q'uehomak sa' k'ojoyjn. Aran taçuank li yabac ut li c'uxuxinc ruch e, chan.

Li rakba atin tachalk

³¹ Nak tinchalk lain li C'ajolbej riq'uin xnimall inlok'al cuochbenakeb chak chixjunileb li ángel, tojo'nak toxinc'ojlak sa' lin c'ojaribal retalil xnimall incuanquil chi rakoc atin. ³² Ut te'ch'utubak chicuu chixjunil xtepaleb li tenamit li cuanqueb sa' ruchich'och'. Tojo'nak tinsiq'ueb ru ut tinq'ueheb sa' cuib ch'utal jo' nak li pastor narisiheb lix carner sa' xyankeb li chibat. ³³ Ut tinq'ueheb lin carner sa' lin nim uk' ut eb li chibat tinq'ue sa' intz'e. ³⁴ Ut lain li Rey tinye reheb li cuanqueb sa' lin nim: —Osobtesinbilex xban lin Yucua'. Echanihomak li nimajcual cuanquilal cauresinbil chok' ere chalen chak sa' xticlajic li ruchich'och'. ³⁵ Terehani xban nak quintz'oca chak ut quineq'ue chi cua'ac. Quichakic cue ut quineq'ue chi uc'ac. Quinsic' cuochchnal ut quinec'ul eriq'uin. ³⁶ Nak maç'a' cuak', queq'ue cuak'. Nak quinyajer, quinetenk'a. Nak quincuan sa' tz'alam, coxineril chak. ³⁷ Ut eb li tiq'ueb xch'ol te'xye cue: —Kaçua', ¿jok'e ta bi' catkil chi tattz'ocak ut jok'e ta bi' catkaq'ue chi cua'ac? ¿Jok'e ta bi' catkil chi tachakik acue ut jok'e ta bi' catkaq'ue chi uc'ac? cha'keb cue. ³⁸ ¿Jok'e ta bi' casic' acuochchnal ut catkac'ul ta kiq'uin? ¿Jok'e ta bi' catkil chi maç'a' acuak' ut quikaq'ue ta acuak'? ³⁹ ¿Jok'e ta bi' catkil chi yajat ut catkatenk'a ta? ¿Jok'e catcuan sa' tz'alam ut coxatkil ta chak? cha'keb. ⁴⁰ Ut lain tinchak'ok ut tinye reheb: —Relic chi yal tinye ere, cui quebanu a'in re junak li neque'paban cue, usta cubenak xcuanquil, cue ajcui' lain quebanu chak. ⁴¹ Tojo'nak lain li Rey tinye reheb li cuanqueb sa' lin tz'e: —Elenkex chicuu. Tz'ektananbilex sa' li xam li ma jok'e tachupk c'ubanbil chak chok' re laj tza ut reheb ajcui' lix ángel. ⁴² Xban nak lain quintz'oca chak ut inc'a' quineq'ue chi cua'ac. Quichakic chak cue ut inc'a' quineq'ue chi uc'ac. ⁴³ Quinsic' li cuochchnal ut inc'a' quinec'ul eriq'uin. Maç'a' cuak' ut inc'a' queq'ue cuak'. Quinyajer ut inc'a' quinetenk'a. Quincuan chi prexil ut inc'a' coxineril chak, cha'kin reheb. ⁴⁴ Ut te'chak'ok ut te'xye cue: —Kaçua', ¿jok'e ta bi' catkil chi tattz'ocak? ¿Jok'e ta bi' catkil chi tachakik acue? ¿Jok'e casic' acuochchnal? ¿Jok'e catkil chi maç'a' la cuak' malaj yajat, malaj cuancat sa' tz'alam ut inc'a' catkatenk'a? cha'keb. ⁴⁵ Ut lain li Rey tinchak'ok ut tinye reheb: —Relic chi yal tinye ere, xban nak inc'a' quinetenk'aheb li neque'paban cue li maç'a'eb xcuanquil, inc'a' ajcui' quinetenk'a lain, cha'kin reheb. ⁴⁶ Ut eb a'an te'xic sa' li tojba maç chi junelic. Abanan li tiq'ueb xch'ol cuankeb xyu'am chi junelic.

26

Que'xc'ub rib re nak te'xchap li Jesús

¹ Ut nak quirake' li Jesús chixyebal chixjunil li atin a'in, quixye reheb lix tzolom: ² —Laex nequenau nak cuib cutan chic ma nacuulac xk'ehil li pascua re xnink'equil chanru nak que'cole' ut que'el laj Israel sa' li tenamit Egipto. Ut lain li C'ajolbej tink'axtesik re nak tinq'uehek' chiru cruz. ³ Ut eb lix benil aj tij ut eb laj tz'ib ut eb li neque'c'amoc be sa' xyankeb laj judío que'xch'utub ribeb chiru nebal re li rochoch lix yucua'ileb laj tij, Caifás xc'aba'. ⁴ Ut que'xc'ub ribeb re nak te'xchap li Jesús ut re nak te'xyo'ob atin chirix re xcamsinquil. ⁵ Ut que'xye chiribileb rib: —Inc'a' takachap li Jesús nak yok li nink'e xban nak te'pok' li tenamit sa' kaben ut te'oc chi pletic kiq'uin, chanqueb.

Li ixk quixq'ue li sununquil ban sa' xjolom li Jesús

⁶ Li Jesús cuan aran Betania sa' rochoch laj Simón li saklep rix. ⁷ Chunchu sa' mex nak quicuulac jun li ixk. Cuan jun ch'ina met yibanbil riq'uin li tertõquil pec alabastro xc'aba'. Cuan li sununquil ban chi sa', k'axal tertõ xtz'ak. Li ixk quixq'ue li ban sa' xjolom li Jesús. ⁸ Nak que'ril a'an, eb lix tzolom que'josk'o' ut que'xye chi ribileb rib: —¿C'a'ut nak xsach li sununquil ban a'in chi mac'a' rajbal? ⁹ Xru raj xc'ayiman chi k'axal tertõ xtz'ak ut xkajeq'ui raj li tumin reheb li neba', chanqueb. ¹⁰ Li Jesús quixnau li c'a'ru yoq'ueb chixyebal ut quixye reheb: —¿C'a'ut nak yoquex chixch'i'ch'i'inquil li ixk a'in? Canabomak xcuech'inquil xban nak us li xbanu cue. ¹¹ Li neba' junelic cuankeb sa' eyank. Abanan lain moco cuankin ta chi junelic eri'uin. ¹² Li ixk a'in us li xbanu cue nak xq'ue li sununquil ban sa' inben. Maji' nincam abanan ac xinixban re lin mukbal. ¹³ Relic chi yal tinye ere yalak bar tayemank resil li colba-ib sa' chixjunil li ruchich'och', tayemank ajcui' resil li c'a'ru xbanu cue li ixk a'in re xjulticanquil a'an, chan.

Laj Judas Iscariote quixyechi'i xk'axtesinquit li Jesús sa' ruk'eb li xbenil aj tij

¹⁴ Ut laj Judas Iscariote, jun reheb li cablaju chi xtzolom li Jesús, cõ riq'uíneb lix benil aj tij. ¹⁵ Ut quixye reheb: —¿Jo' nimal teq'ue cue cui tink'axtesi li Jesús ere? chan reheb. Ut eb a'an que'xc'ub nak te'xq'ue lajeb xca'c'al chi tumin plata re. ¹⁶ Ut chalen sa' li cutan a'an, laj Judas yo chixsic'bal jok'e tixq'ue rib re nak tixk'axtesi li Jesús sa' ruk'eb.

Xticlajic chak li Lok'oninc re Xjulticanquil lix Camic li Jesucristo

¹⁷ Sa' li xben cutan re li nink'e nak neque'xcua' li caxlan cua chi mac'a' xch'amal, que'chal lix tzolom riq'uin li Jesús ut que'xye re: —¿Bar ta'cuaj takacauresi chak li na'ajeb re tatzaca cui' li mayejanbil xul? chanqueb. ¹⁸ Ut li Jesús quixye reheb: —Ayukex sa' li tenamit riq'uin li cujnk li xinye ere, ut teye re, “Chan laj tzolonel nak cuulac re xk'ehil lix camic. Taraj xnumsinquil li nink'e Pascua sa' la cuochoch rochbened lix tzolom,” cha'kex re li cujnk. ¹⁹ Ut eb lix tzolom que'xbanu jo' que'yeh'e reheb xban li Jesús ut aran que'xcauresi li nink'e. ²⁰ Ut nak qui-ecuu sa' li cutan a'an, quic'ojla li Jesús sa' mex rochbened lix cablaju chi tzolom. ²¹ Ut nak yoq'ueb chi cua'ac, li Jesús quixye reheb: —Relic chi yal tinye ere nak jun ere la'ex tak'axtesink cue sa' ruk'eb li xic' neque'iloc cue, chan. ²² Ut mac'a' jo' nak que'raho' sa' xch'õleb. Ut chi xjunjunkaleb que'xpatz' re: —¿Ma lain ta bi' tink'axtesink acue, Ka'cua'?— ²³ Quichak'oc li Jesús ut quixye reheb: —Li tak'axtesink cue, a'an li tixtz'a xcaxlan cua sa' li sec' li tixtz'a cui' li cue lain. ²⁴ Relic chi yal lain li C'ajolbej tincamsik jo' tz'ibanbil retalil chicuix sa' li Santil Hu. Abanan raylal cuan sa' xben li cujnk a'an li tak'axtesink cue. K'axal us raj chok' re li cujnk a'an nak inc'a' raj quiyo'la, chan li Jesús. ²⁵ Tojo'nak quichak'oc laj Judas li tak'axtesink re ut quixye: —¿Malaj ut lain li yocãt chinyebal, at tzolonel? Ut li Jesús quixye re: —Laat xaye acuib. ²⁶ Ut nak yoq'ueb chi cua'ac, li Jesús quixchap li caxlan cua. Quixbantioxi chiru li Dios, quixjachi, tojo'nak quixjeq'ui reheb lix tzolom. Ut quixye reheb: —C'ulumak, cua'omak. A'an a'in lin tz'ejcual.— ²⁷ Ut quixchap ajcui' li sec' re uc'ac ut quixbantioxi chiru li Dios ut quixq'ue reheb ut quixye reheb: —Uc'umak li cuan sa' li sec' a'in chejunilex, ²⁸ xban nak a'an a'in lin quiq'uel li tahoyek' re nak tacuyek' xmaqueb nabal chi tenamit. Ut a'an taxakabank xcuanquil li Ac' Contrato. ²⁹ Relic chi yal tinye ere nak chalen anakcuan inc'a' chic tincuuc' lix ya'al

ru li uva toj nak taçuulak xk'ehil nak tincuuc' cui'chic cuochbenex sa' lix nimajcual cuanquíl lin Yucua', chan li Jesús.

Li Jesús quixye nak tatz'ektanqak xban laj Pedro

³⁰ Nak ac xe'rake' xbichanquil jun li bich re xlok'oninquil li Dios, que'coeb sa' li tzuil Olivos. ³¹ Ut li Jesús quixye reheb: —Chejunilex læex tach'inak le ch'ol sa' inc'aba' lain ut tingcanab injunes chiru li k'ojyin a'in jo' tz'ibanbil retalil sa' li Santil Hu: Tincanab chi camsic laj ilol reheb li carner ut eb li carner te'xcha'cha'i ribeb. (Zac. 13:7) ³² Ut nak acak xincuacli cui'chic chi yo'yo sa' xyankeb li camenak lain xben cua tinxic chiru læex aran Galilea, chan li Jesús. ³³ Ut laj Pedro quichak'oc ut quixye: —Usta chixjunileb tate'xcanab, abanan lain inc'a' tatincanab, chan. ³⁴ Ut li Jesús quixye re: —Relic chi yal yoquin chixyebal açue nak chiru li k'ojyin a'in toj maji' nayabac laj tzo' xul nak laac ac xaye oxib sut nak inc'a' nacanau cuu.— ³⁵ Ut laj Pedro quixye cui'chic: —Ma jok'e tinye nak inc'a' ninnau açuu, usta tine'xcamsi açuochben, chan. Ut jo'can ajcui' que'xye chixjunileb lix tzolom.

Nak quitjoc chak li Jesús aran Getsemani

³⁶ Li Jesús quicuulac rochbeneb lix tzolom sa' li na'ajej Getsemani. Ut quixye reheb lix tzolom: —C'ojlankec cuan arin roybeninquil nak tinxic chi tijoc toj le', chan. ³⁷ Ut quixc'am chirix laj Pedro jo'queb ajcui' li cuib chi ralal laj Zebedeo. Ut li Jesús chi-oc chi rahoc sa' xch'ol ut c'ajo' nak tayot'ek' xch'ol. ³⁸ Ut quixye reheb: —Cuan jun raylal sa' inch'ol ut yo' chinyot'bal. Inc'a' chic nincuy nak nacuec'a. Canakex arin ut yo'lenkec cuochben, chan. ³⁹ Ut quibec chic ca'ch'in li Jesús ut quixhupub rib sa' ch'och' ut quitjoc. Ut quixye: —At inYucua', cui ta naxq'ue rib, inc'a' raj tinc'ul li raylal a'in. Abanan chixmank li c'a'ru nacacuaj laac ut macua' li nacuaj lain.— ⁴⁰ Ut nak quisuk'i riq'uineb lix tzolom, quixtauheb chi cuarc. Ut quixye re laj Pedro: —¿Ma toj yoquex chi cuarc? ¿Ma inc'a' xru xexyo'lec jun orak cuochben? ⁴¹ Chexyo'lek ut chextijoc re nak inc'a' teq'ue erib chi alec. Læex nequeraj raj xbanunquil li us, abanan ejunes inc'a' texruk, chan. ⁴² Ut li Jesús co' cui'chic xca' sut chi tijoc ut quixye: —At inYucua', cui ta naxq'ue rib nak inc'a' raj tinc'ul li raylal a'in, abanan chixmank li c'a'ru nacacuaj laac.— ⁴³ Ut nak quisuk'i cui'chic li Jesús, quixtauheb cui'chic chi cuarc lix tzolom xban nak ma' ca'ch'in lix cuaraheb. ⁴⁴ Quixcanabeb ut co' cui'chic chi tijoc rox sut ut jo'can cui'chic quixtz'ama chiru li Dios. ⁴⁵ Tojo'nak quichal cui'chic riq'uineb lix tzolom ut quixye reheb: —¿Ma toj yoquex chi cuarc? Tz'akalak li hilanc xebanu. Ac xtau xk'ehil nak lain li C'ajolbej tink'axtesik sa' ruk'eb laj mac. ⁴⁶ Cuaclinkec anacuan, yo'keb; cue' chak li tak'axtesink cue sa' ruk'eb li xic' neque'iloc cue, chan.

Nak que'xc'am chi prexil li Jesús

⁴⁷ Toj yo' ajcui' chi tinac li Jesús nak cox-elk laj Judas. A'an jun reheb li cablaju. Nabal que'chal rochben taklanbileb chak xbaneb li xbenil aj tij ut xbaneb laj c'amol be sa' xyankeb laj judío. Cuanqueb xch'ich' ut cuanqueb xche'. ⁴⁸ Li tak'axtesink re ac xc'ub chak rib riq'uineb c'a'ru li retalil li tixc'ut. Quixye reheb: —Li ani tincutz' ru, a'an li techap.— ⁴⁹ Ut laj Judas co' chi junpat riq'uin li Jesús ut quixye re: —¿Chan xacuul, at tzolonel?— ut quirutz' ru. ⁵⁰ Ut li Jesús quixye re: —Cuamig, ¿c'a'ru açuajom arin?— Tojo'nak que'nach'oc riq'uin li Jesús ut que'xchap. ⁵¹ Ut jun reheb li rochben li Jesús quirisi chak lix ch'ich' ut quixch'ot lix xic lix mos li xbenil aj tij. ⁵² Tojo'nak quiyeh'e' re xban li Jesús: —Q'ue la' ch'ich' sa' lix na'aj xban nak

chixjunileb li neque'pletic riq'uin ch'ich', riq'uin ch'ich' ajcui' te'osok'. ⁵³ ¿Ma inc'a' nacanau nak naru tintz'ama chiru lin Yucua' ut a'an tixtakla raj chak anakuan anakuan q'uila ok'ob chi ángel chincolbal? ⁵⁴ Abanan cui tixtakla raj chak eb li ángel, ¿chan raj ru nak tatz'aklok ru li tz'ibanbil sa' li Santil Hu, li naxye nak jo'ca'in tento taç'ulmank? chan li Jesús. ⁵⁵ Ut sa' li hõnal a'an li Jesús quixye reheb li q'uila tenamit, —¿Ma lain ta bi' aj elk' nak xexchal chinchapbal riq'uin che' ut riq'uin ch'ich'? Rajlal cutan ninc'ojla sa' eyank chetzolbal sa' li rochoch li Dios ut inc'a' quinechap aran. ⁵⁶ Abanan chixjunil a'in x-uxman re nak tatz'aklok ru li Santil Hu tz'ibanbil xbaneb li profeta. Tojo'nak que'elelic chixjunileb lix tzolom ut que'xcanab xjunes li Jesús.

Que'xtz'il atin chirix li Jesús nak cuan chiru lix yucua'il eb laj tij

⁵⁷ Ut li Jesús quic'ame' riq'uin laj Caifás, lix yucua'ileb laj tij. Aran ch'utch'uq'ueb laj tz'ib ut eb li neque'c'amoc be sa' xyankeb laj judío. ⁵⁸ Ut laj Pedro chi najt yo' chak chixtakenquil li Jesús ut quicuulac toj chi ru'uj nebal sa' rochoch lix yucua'ileb laj tij. Qui-oc aran ut quic'ojla sa' xyankeb laj c'ac'aleneb re nak taril c'a'ru taçanak cui'. ⁵⁹ Ut eb li xbenil aj tij ut eb li neque'c'amoc be sa' xyankeb laj judío ut chixjunileb li neque'tz'iloc atin yoq'ueb chixsic'bal chanru nak te'xyo'ob junak atin chirix li Jesús re nak taruk te'xk'axtesi chi camsjc. ⁶⁰ Abanan inc'a' que'xtau usta nabal chi testigo aj tic'ti'eb cuanqueb aran. Toj que'cuulac cui'b chic li testigo aj tic'ti'eb, tojo'nak que'xtau chanru te'xjit cui'. ⁶¹ Li cui'b a'an que'xye: —Jo'ca'in quixye li cujnk a'in, “Lain taruk tinjuc' li rochoch li Dios ut chiru oxib cutan tinyjb cui'chic”, chan. ⁶² Ut quixakli lix yucua'ileb laj tij ut quixye re li Jesús: —¿C'a'ru nacaye laät? ¿Ma maç'a' nacaye chirix li yoq'ueb chixyebal chaçuix?— ⁶³ Ut li Jesús ma jun li atin quixye. Ut li xyucua'ileb aj tij quixye cui'chic re: —Sa' xc'aba' li yo'yoq'uil Dios taye ke cui laät li Cristo, li Lalal li Dios.— ⁶⁴ Ut li Jesús quixye re: —Yal li xaye laät. Ut tinye ajcui' ere nak chalen anakuan tineril lain li C'ajolbej nak c'ojc'õkin sa' xnim uk' li nimajcual Dios ut tineril ajcui' nak yokin chak chi chaçc cui'chic sa' li chok sa' choxa, chan. ⁶⁵ Nak quirabi a'an, li xyucua'ileb laj tij quixpej li rak' xban xjosk'il ut quixye: —A'an xjuntak'eta rib riq'uin li Dios. ¿C'a' chic ru aj e nak toj te'xye ke c'a'ru lix maç? Ac xerak' nak xjuntak'eta rib riq'uin li Dios. ⁶⁶ ¿C'a'ru nequeye? ¿Ma cuan xmäc malaj inc'a'? chan. Ut que'chak'oc ut que'xye: —Cuan xmaç ut xc'ulub nak taçamsjik.— ⁶⁷ Tojo'nak cuan que'chuban re sa' ru. Ut cuan que'sac'oc re ut cuan que'pak'len re chi ruk'eb. ⁶⁸ Ut que'xye re: —At Cristo, ye ke ani xsac'oc açue, chanqueb.

Laj Pedro quixye nak inc'a' naxnau ru li Jesús

⁶⁹ Laj Pedro cuan chirix cab c'ojc'o chi ru'uj nebal. Quicuulac jun li ixk, xmos li xyucua'ileb laj tij. Quixye re laj Pedro: —Laät jun reheb li xe'ochbenin re li Jesús aj Galilea.— ⁷⁰ Laj Pedro quitic'ti'ic chiruheb chixjunileb ut quixye: —Lain inc'a' ninnau ru ani nacaye, chan. ⁷¹ Ut jun chic li ixk qui-iloc re nak yo' chi elc chire li cab. Ut quixye reheb li cuanqueb aran: —Li cujnk a'in, a'an jun qui-ochbenin re li Jesús aj Nazaret. ⁷² Ut laj Pedro quitic'ti'ic cui'chic xca' cua. Quixpatz' xc'aba' li Dios ut quixye: —Inc'a' ninnau ru li cujnk a'an, chan. ⁷³ Ut junpatak chican, li cuanqueb aran que'jiloc riq'uin laj Pedro ut que'xye re: —Relic chi yal nak laät xcomoneb xban nak la'cuatinobal nac'utuc re nak laät aj Galilea.— ⁷⁴ Ut laj Pedro qui-oc chi majecuanc ut quixye riq'uin juramento: —Inc'a' ninnau ru li cujnk a'an, chan. Ut sa' ajcui' li hõnal a'an quiyabac laj tzo' xul. ⁷⁵ Ut sa' junpat quinak sa'

xch'ol laj Pedro li atin li quiyeh'e' re xban li Jesús, "Nak toj maji' nayabac laj tzo' xul, laät ac xaye oxib sut nak inc'a' nacanau cuu." Ut laj Pedro ma' c'ajo' nak quiyot'e' xch'ol. Qui-el chirix cab ut c'ajo' nak quiyabac.

27

Li Jesús quic'ame' sa' rakleb atin chiru laj Pilato

¹ Ut nak quisakeu, que'xch'utub ribeb chixjunileb lix benil aj tij ut eb laj c'amol be sa' xyankeb laj judío. Que'xc'ub rib chanru te'xbanu re nak tacamsik li Jesús. ² Que'xc'am li Jesús chi bac'bo ut que'xk'axtesi sa' ruk' laj Pilato li acuabej.

Lix Camic laj Judas

³ Ut laj Judas li quik'axtesin re li Jesús, c'ajo' nak quiyot'e' xch'ol riq'uin li quixbanu nak quiril nak quitenebac camc sa' xben li Jesús. Quixk'ajsi li lajeb xca'c'al chi tumin plata reheb lix benil aj tij ut reheb li neque'c'amoc be sa' xyankeb laj judío. ⁴ Quixye reheb: —Xinmacob nak xink'axtesi ere li cuink a'in xban nak mac'a' xmac, chan. A'ut eb a'an que'xye re: —¿C'a' takaj re lao? Il c'a'ru tabanu.— ⁵ Ut laj Judas quixcut li tumin sa' rochoch li Dios. Ut co' ut quixyatz' rib. ⁶ Ut eb lix benil aj tij que'xxoc li tumin ut que'xye: —Inc'a' us xq'uebal li tumin a'in sa' xcaxil lix mayej li rochoch li Dios xban nak xtz'ak xyu'am li cuink.— ⁷ Ut que'xc'ub ru nak te'xlok' jun li ch'och' re te'mukek' cui' li jalaneb xtenamit. Ut chiru li tumin a'an que'xlok' li na'ajej a'an riq'uin laj pac'onel. ⁸ Jo'can nak chalen anakcuan quicana chok' xc'aba' li na'ajej a'an "Lok'bil riq'uin Quic'." ⁹ Ut riq'uin a'in quitz'akloc ru li quixye li profeta Jeremías nak quixye:

¹⁰ Ut que'xchap li lajeb xca'c'al chi tumin plata, xtz'ak li quik'axtesic. Lix tz'ak a'an li tenebanbil sa' xben xbaneb laj Israel. Ut chiru li tumin a'an que'xlok' jun li ch'och' riq'uin laj pac'onel, jo' quiyeh'e' cue xban li Kacua'. (Zac. 11:12-13)

Li Jesús quic'ame' sa' rakleb atin chiru laj Pilato

¹¹ Que'xc'am li Jesús ut que'xxakab chiru laj Pilato li acuabej. Ut laj Pilato quixpatz' re: —¿Ma laät lix Reyeb laj judío?— Li Jesús quichak'oc ut quixye re: —Yal li xaye nak lain.— ¹² Ut nak yo' xjitbal xbaneb lix benil aj tij ut eb li neque'c'amoc be chiruheb laj judío, chi tic' inc'a' quichak'oc. ¹³ Ut laj Pilato quixye re: —¿Ma inc'a' nacacuabi jo' q'uial li yo'queb chixyebal chacuix?— ¹⁴ Aban li Jesús ma' jun li atin quixye re tixcol rib ut riq'uin a'an quisach xch'ol laj Pilato.

Quitenebac li camc sa' xben li Jesús

¹⁵ Rajlal chihab sa' li nink'e' Pascua li acuabej narach'ab junak li prex a' yal ani te'raj li tenamit t'ach'abak jo' c'aynakeb xbanunquil. ¹⁶ Sa' eb li cutan a'an cuan sa' tz'alam jun li cuink na'no ru chi us, aj Barrabás xc'aba'. ¹⁷ Ut nak ch'ut'ch'uq'ueb li q'uila tenamit, laj Pilato quixpatz' reheb: —¿Ani teraj tincuach'ab? ¿Ma laj Barrabás, malaj ut li Jesús li Cristo neque'xye re? chan laj Pilato. ¹⁸ Laj Pilato naxnau nak xban xcakaleb xch'ol li xbenil aj tij nak que'xk'axtesi li Jesús sa' rakleb atin. ¹⁹ Nak laj Pilato c'ojc'o sa' lix na'aj li narakoc cui' atin, li rixakil quixtakla xyebal re: —Mac'a' tabanu re li cuink a'an xban nak mac'a' xmac. Sa' xc'aba' a'an nak k'axal ra xinmat'que chi k'ek, chan. ²⁰ Ut eb li xbenil aj tij ut eb li neque'c'amoc be sa' xyankeb laj judío que'xtacchi'i li q'uila tenamit re nak te'xye nak a' laj Barrabás li t'ach'abak, ut a' li Jesús tacamsik. ²¹ Ut li acuabej quixpatz' reheb: —¿Bar cuan reheb li

cuib a'in teraj tincuach'ab?— Ut eb a'an que'xye: —A' laj Barrabás, chanqueb.
²² Quixye laj Pilato reheb: —Ut, ¿c'a' put ru taruk tinbanu lain riq'uin li Jesús, li Cristo neque'xye re?— Ut chixjunileb que'xye: —¡Chiq'uehek' chiru cruz!—
²³ Ut li acuabej quixye reheb: —¿C'a'ut? ¿C'a'ru tz'akal xmac ere?— Ut eb a'an k'axal cau cui'chic que'xjap re chixyebal: —¡Chiq'uehek' chiru cruz!— ²⁴ Ut laj Pilato quiril nak inc'a' qui-el chi us li quiraj xbanunquíl ut quixq'ue retal nak k'axal cui'chic nak que'po' xch'ol li tenamit. Tojo'nak quixtakla xc'ambal lix ha' re xch'ajbal li ruk' chiruheb li tenamit ut quixye: —Mac'a' inmac lain riq'uin xcamic li cuĩnk a'in li mac'a' xmac. Laex chic yal ere sa' xben, chan.
²⁵ Ut chixjunileb li tenamit que'chak'oc ut que'xye: —Sa' kaben lao ut sa' xbeneb li kalal kac'ajol chicanak xtojbál rix lix camic, chanqueb. ²⁶ Tojo'nak laj Pilato quirach'ab laj Barrabás chiruheb li tenamit. Ut quixtakla xsac'bal li Jesús riq'uin tz'um ut quixk'axtesi sa' ruk'eb li soldado re nak te'xq'ue chiru cruz. ²⁷ Ut eb lix soldado li acuabej que'xc'am li Jesús sa' li popol ut que'xch'utub ribeb chixjunileb li soldado ut que'xsut li Jesús. ²⁸ Que'risi li rak' ut que'xq'ue jun caki t'icr chirix jo' neque'rocsi li rey. ²⁹ Ut que'xtz'ul jun li corona riq'uin q'uix ut que'xq'ue sa' xjolom. Ut sa' xnim uk' que'xq'ue jun li che'. Ut que'xcuik'ib ribeb chiru ut que'retz'u ut que'xye: —Sahak taxak sa' ach'ol, at xReyeb laj judío, chanqueb re. ³⁰ Quilaje'xchuba, ut que'xchap li che' ut riq'uin a'an que'xsac' sa' xjolom. ³¹ Ut nak ac xe'xtacuasi, que'risi li t'icr li cuan chirix. Ut que'xq'ue cui'chic li rak' chirix. Tojo'nak que'xc'am re nak te'xq'ue chiru cruz.

Li Jesús quiq'uehe' chiru cruz

³² Ut nak yoqueb chi xic, que'xc'ul jun li cuĩnk aj Simón xc'aba', Cirene xtenamit. Eb li soldado que'xmin ru a'an chixpakonquíl lix cruz li Jesús.
³³ Ut que'cuulac sa' li na'ajej Gólgota xc'aba'. Chi jalbil ru naraj naxye: Xna'aj Xbákel Xjolom Camenak. ³⁴ Ut que'xq'ue vino re li Jesús yubil riq'uin c'ahil ban re xcotzbal li raylal, abanan nak quixyal, inc'a' quiruc'. ³⁵ Ut mokon nak ac que'xq'ue chiru cruz, eb li soldado que'bulic chirix li rak' re rilbal ani na taechanĩnk re li rak'. Jo'ca'in quitz'akloc ru li yebil xban li profeta nak quixye: Que'xjeq'ui chi ribileb rib li cuak' ut que'bulic chirix lĩn t'icr. (Sal. 22:18) ³⁶ Que'c'ojla aran ut que'oc chixc'ac'alenuil li Jesús. ³⁷ Sa' xben li cruz que'xq'ue jun retalil c'a'ut nak que'xcamsi ut naxye:
 A'an a'in li Jesús, lix Reyeb laj judío.

³⁸ Ut cuib aj elk' que'q'uehe' chiru cruz rochben, jun sa' xnim ut jun sa' xtz'e. ³⁹ Ut eb li tenamit yoqueb chi numec' aran, que'xhob li Jesús ut neque'rec'asi xjolomeb. ⁴⁰ Ut que'xye: —¿Ma macua' ta bi' laät li cat-ajoc re xjuc'bal rochoch li Dios, ut yal chiru oxib cutan raj xayib cui'chic? Xacol raj acuib. Cui yal nak laät Ralalat li Dios, cuben chak chiru li cruz, chanqueb.
⁴¹ Jo'can ajcui' eb li xbenil aj tij yoqueb chixhobbal li Jesús rochbeneb laj tz'ib ut eb li neque'camoc be sa' xyankeb laj judío. ⁴² Ut que'xye: —Jalan chic xcoleb ut a'an inc'a' naru naxcol rib xjunes. Cui yal nak a'an xReyeb laj judío, chicubek chak chiru li cruz anakcuan ut topabank chiru. ⁴³ Cau xch'ol riq'uin li Dios. Chicolek' anakcuan cui narahe' xban li Dios xban nak naxye nak a'an Ralal li Dios, chanqueb. ⁴⁴ Ut jo'can eb ajcui' laj elk' li que'q'uehe' chiru cruz rochben, yoqueb chixhobbal. ⁴⁵ Tuktu cua'leb nak quik'ojjino' sa' chixjunil li ruchich'och' ut toj sa' oxib or re ecuu quicutano' cui'chic. ⁴⁶ Ut ca'ch'in chic ma oxib or nak quiatinac li Jesús chi cau xyab xcux ut quixye: —Elí, Elí, ¿lama sabactani?— Chi jalbil ru naraj naxye: At inDios, at inDios, ¿c'a'ut nak xinacanab injunes? ⁴⁷ Nak que'rabi li c'a'ru quixye li cuanqueb aran, cuan

li que'yehoc: —Abihomak, yo chixbokbal li profeta Elías, chanqueb. ⁴⁸ Ut jun sa' xyankeb co sa' anil ut coxtz'a chak jun li esponja sa' vinagre ut quixtaksi chi ru'uj jun li che' ut quixq'ue sa' re li Jesús re taruc'. ⁴⁹ Ut li jun ch'ol chic que'xye: —Kilak cuan ma tachalk na laj Elías chixcolbal, chanqueb. ⁵⁰ A'ut li Jesús quixjap cui'chic re chi cau ut qui-el xch'ol. ⁵¹ Ut li t'icr li cuan chok'tas sa' li Santil Na'ajej sa' li rochoch li Dios quik'iche' sa' xyl. Quiticla chak takec' ut toj tak'a coxrake' lix k'ichilal. Ca' jachal qui-el. Qui-ec'an li ch'och' ut eb li sakonac quilaje'itz'e'. ⁵² Quilaje'teli li que'muke' cui' li camenak ut nabaleb li tiqueb xch'ol que'cuacli cui'chic chi yo'yo. ⁵³ Ut mokon chic nak li Jesús ac xcuacli cui'chic chi yo'yo, que'el chak sa' lix muklebal ut que'oc sa' li santil tenamit Jerusalén ut nabal chi aj u que'xc'utbesi cui' ribeb. ⁵⁴ Ut li capitán rochbeneb li yoqueb chi c'ac'alenc re li Jesús, que'rec'a li hijc ut que'xq'ue retal li c'a'ru yo'chi c'ulmanc. Ma' c'ajo' nak que'xucac ut que'xye: —Relic chi yal nak li cujnk a'in tz'akal Ralal li Dios.— ⁵⁵ Ut cuanqueb ajcui' ixk yoqueb chak chi iloc chi najt. Eb a'an toj Galilea que'xtake chak li Jesús ut que'c'anjelac chiru. ⁵⁶ Sa' xyankeb a'an cuanqueb lix María aj Magdala, ut lix María xna'eb laj Jacobo ut laj José, ut lix na'eb li ralal laj Zebedeo.

Nak quimuke' li Jesús

⁵⁷ Ac yo' chi oc k'o'jyin nak quicuulac aran bar que'xcamsi cui' li Jesús jun li cujnk biom, aj José xc'aba'. Arimatea xtenamit. A'an xtzolom ajcui' li Jesús nak quicuan. ⁵⁸ Li cujnk a'in co' riq'u'in laj Pilato ut quixtz'ama chiru nak taq'uehek' re lix tz'ejcual li Jesús re nak tixmuk. Ut laj Pilato quixtakla xk'axtesinquil re. ⁵⁹ Ut laj José quixc'am li camenak ut quixlan sa' jun li ac' t'icr lino. ⁶⁰ Ut quixq'ue sa' jun li ac' muklebal. Re raj a'an li muklebal nak quiyibac sa' jun sakonac. Ut quixbalk'usi jun nimla pec chire li muklebal ut co'. ⁶¹ Ut cuanqueb aran lix María aj Magdala ut lix María jun chic. C'ojc'o'queb aran chi xca'yabal li muklebal.

Que'xakabac li soldado chixc'ac'alenquil li muklebal

⁶² Jo' cuulajak chic, nak ac xnume' lix cutanquil li cauresinc re li hilobal cutan, que'xch'utub ribeb li xbenil aj tij rochbeneb laj fariseo. Que'coeb riq'u'in laj Pilato. ⁶³ Ut que'xye re: —Ka'cua', xjultico' ke li atin quixye laj balak' nak toj yo'yok. Quixye nak sa' rox li cutan ta'cuaclik cui'chic chi yo'yo. ⁶⁴ Takla xq'uebal retal chi us li muklebal toj tanumek' li oxib cutan. Mare te'chalk lix tzolom chi k'ek chirelk'anquil li camenak ut te'xye reheb li tenamit, “Xcuacli cui'chic chi yo'yo sa' xyankeb li camenak.” Ut k'axal cui'chic ch'a'aj toelk lao chiru li xkac'ul xben cua. ⁶⁵ Ut laj Pilato quixye reheb: —Cue'queb jun ch'utal chi soldado. Ayukex rochbeneb ut q'uehomak retal nak te'xbanu chi us. Laex nequenau chanru tebanu, chan. ⁶⁶ Ut coeb ut que'xtz'ap chi us li muklebal ut que'xq'ue retalil li pec ut que'xcanab li soldado aran chixc'ac'alenquil li muklebal.

28

Li Jesús quicuacli cui'chic chi yo'yo sa' xyankeb li camenak

¹ Nak ac xnume' li hilobal cutan, sakeuc re li xben cutan re li xaman, quicuulac lix María aj Magdala rochben lix María jun chic chirilbal li muklebal. ² Toj maji' ajcui' neque'cuulac nak quicuan jun nimla hijc. Ut jun x-angel li Ka'cua' quicube chak sa' choxa ut quixbalk'usi li pec ut quic'o'jla sa' xben. ³ Li rilobal nalemtz'un chanchan rak' cak ut li rak' sak sak jo' li ratz'am que. ⁴ Ut eb li yoqueb chi c'ac'alenc re li muklebal neque'sicsot xban xxiuheb chirilbal

li quic'ulman. Chanchan camenak que'cana. ⁵ Ut nak que'cuulac li ixk, li ángel quixye reheb: —Mexxucuaç læex. Lajin ninnau nak yoquex chixsic'bal li Jesús li quicam chiru cruz. ⁶ Ma añi chic arin. Ac xcuacli chi yo'yo jo' quixye ere. Quimkex arin. Ilomak lix na'aj bar que'xq'ue cui' li Kaçua'. ⁷ Ayukex sa' junpat ut yehomak reheb lix tzolom nak ac xcuacli chi yo'yo sa' xyankeb li camenak. Ut anakcuan taçic Galilea ut a'an xben cua taçuulak çeru læex. Aran toxeril ru. Ca'aj cui' a'in li tinye ere, chan li ángel. ⁸ Te'xucuak li ixk nak que'el sa' li muklebal. Abanan quisaho' ajcui' sa' xch'oleb riq'uin li c'a'ru que'rabi. Ut çoeb sa' anil chixyebal resil reheb lix tzolom li Jesús. ⁹ Yoqueb chi xic nak xakamil li Jesús chiruheb ut quixq'ue xsahileb xch'ol. Ut eb li ixk que'nach'oc riq'uin ut que'xcuik'ib ribeb chiru. Que'xk'alu li rok ut que'xlok'oni. ¹⁰ Li Jesús quixye reheb: —Mexxucuaç. Ayukex ut yehomak resil reheb lin herman re nak te'xic Galilea. Ut aran te'ril cuu, chan.

Eb li xbenil aj tij que'xtumina ruheb li soldado re nak te'xye li tic'ti'

¹¹ Ut nak yoqueb chi xic li ixk, cuanqueb laj c'ac'alenel que'çoeb sa' tenamit chixyebal resil reheb lix benil aj tij chixjunil li c'a'ak re ru quic'ulman. ¹² Ut lix benil aj tij que'xch'utub ribeb roçhbeneb li neque'c'amoc be sa' xyankeb laj judío ut que'xc'ub ribeb nak te'xq'ue nabal li tumin reheb li soldado. ¹³ Ut que'xye reheb: —Jo'ca'in teye: “Eb lix tzolom que'cuulac chi k'ek ut que'relk'a li camenak nak yoco chi cuarc,” cha'kex. ¹⁴ Ut que'xye cui'chic reheb li soldado li que'c'ac'alen re li muklebal: —Cui tarabi resil a'in li acuabej, laço tooquenk çerix ut textkacal, çanqueb. ¹⁵ Ut eb li soldado que'xc'ul li tumin ut que'xbanu jo' que'yehe' reheb. Ut li resil a'in quisutun sa' xyankeb laj judío çhalen toj sa' li cutan anakcuan.

Li Jesucristo quixc'utbesi rib chiruheb lix tzolom

¹⁶ Ut lix tzolom junlaju çoeb Galilea sa' xben li tzul li que'yehe' reheb xban li Jesús. ¹⁷ Ut nak que'ril ru li Jesús, que'xlok'oni. Abanan cuanqueb sa' xyankeb lix tzolom li que'cuiban xch'ol chixpabanquil. ¹⁸ Li Jesús quinach'oc riq'uineb ut quixye reheb: —Chixjunil li cuanquil q'uebil cue xban li Dios, jo' sa' choxa jo' sa' ruchich'och'. ¹⁹ Jo'can utan teçxic sa' chixjunil li ruchich'och' ut tech'olob li xyalal chiruheb chixjunileb li tenamit re nak te'pabanç. Teçcubsiheç xha' sa' xc'aba' li Dios Acuabej, sa' xc'aba' li Dios C'ajolbej ut sa' xc'aba' li Dios Santil Musik'ej. ²⁰ Teç'ut chiruheb xpabanquil chixjunil li xinye çhak ere. Chenauhak nak lajin cuankin eriq'uin chixjunil li cutan çhalen toj sa' roso'jic li ruchich'och'. Jo'can taxak.

Li Resil li Colba-ib li Quixtz'iba li San Marcos

Laj Juan laj Cubsihom Ha' quixye resil lix c'ulunic li Jesucristo

¹ Jo'ca'in nak quiticla chak resilal li colba-ib sa' xc'aba' li Jesucristo li Ralal li Dios. ² Li profeta Isaías quixtz'iba li atin li quixye li Dios re li Ralal: Xben cua tintakla junak lin takl. A'an tayahok resil la c'ulunic re nak te'xcauresi rib li tenamit re ac'ulbal.

³ A'an tixch'olob xyalal sa' li chaki ch'och' chi cau xyab xcux. Tixye: Yibomak le yu'am ut yo'on cuankex chixc'ulbal li Kacua' jo' nak neque'xyib li be re xc'ulbal junak li nim xcuanquil. (Is. 40:3)

⁴ Jo'can nak co laj Juan laj Cubsihom Ha' sa' li chaki ch'och' ut yo chi cubsinc ha' ut yo chixch'olobanquil lix yalal chiruheb ut quixye: —Canabomak li macobc. Chi yot'ek' ech'ol ut chejal ec'a'ux ut chec'ul li cubi ha' ut li Dios tixcuy tixsach le mac, chan. ⁵ Nabaleb laj Judea ut nabaleb ajcui' laj Jerusalén que'cuulac cuan cui' laj Juan chirabinquil li c'a'ru yo chixyebal. Que'xxoto xmac chiru li Dios ut laj Juan quixcubsi xha'eb sa' li nima' Jordán. ⁶ Li rak' narocsi laj Juan, a'an yibanbil riq'uin rix li xul camello ut lix c'amal xsa', a'an tz'um. Ut aj sac' naxtzaca riq'uin xya'al sak c'au. ⁷ Naxjultica li ratin li Dios reheb li tenamit ut naxye: —Chalc re jun chic li k'axal nim xcuanquil chicuu lain. Xban nak k'axal nim xcuanquil, moco inc'ulub ta nak tinc'utzub cuib re xhitbal xc'amal lix xab. ⁸ Lain xincubsi eha' riq'uin ha'. Aban a'an tixq'ue ere li Santil Musik'ej, chan.

Nak quixc'ul li cubi ha' li Jesucristo

⁹ Sa' eb li cutan a'an li Jesús qui-el chak Nazaret xcuent Galilea. Quicuulac riq'uin laj Juan ut laj Juan quixcubsi xha' aran sa' li nima' Jordán. ¹⁰ Ut nak qui-el chak li Jesús sa' li ha', quiril nak quiteli li choxa, ut li Santil Musik'ej quicube chak sa' xben li Jesús. Chanchan jun li paloma nak yo chak chi cubec. ¹¹ Ut qui-abic xyab xcux li Dios toj sa' choxa. Quixye chi jo'ca'in: —Laat li cualal k'axal rarocat inban. Nasaho' inch'ol acuiq'uin, chan li Dios.

Nak quiyale' ralenquil li Jesús xban laj Tza

¹² Ut chirix a'in, li Jesús qui-ec'asic lix ch'ol xban li Santil Musik'ej re nak taxic sa' li chaki ch'och' bar mac'a' cui' cristian. ¹³ Ca'c'al cutan quicuan chak xjunes sa' li na'ajej a'an sa' xyankeb li josk' aj xul. Ut chiru li ca'c'al cutan a'an, li Jesús quiyale' ralenquil xban laj tza, aban inc'a' quixq'ue rib chi alec. Ut eb lix ángel li Dios que'cuulac chi c'anjelac chiru. ¹⁴ Ac cuan laj Juan laj Cubsihom Ha' sa' tz'alam nak co li Jesús Galilea ut yo chixjulticanquil resil li colba-ib li naxq'ue li Dios. ¹⁵ Li Jesús quixye: —Xcuulac xk'ehil lix nimajcual xcuanquilal li Dios. Chiyot'ek' ech'ol chejal ec'a'ux ut pabomak li Santil Evangelio, chan li Jesús.

Li Jesús quixbokeb cahib aj car re nak te'xic chirix

¹⁶ Ut nak coxnumek' li Jesús chire li palau cuan Galilea quixtau laj Simón rochben laj Andrés li ritz'in. Yoqueb chixq'uebal lix yoy sa' li palau xban nak a'neb aj chapol car. ¹⁷ Li Jesús quixye reheb, —Chinetake. Macua' chic caribec tebanu. Eras eritz'in ban chic tesic' re te'pabank, chan reheb. ¹⁸ Ut sa' junpat que'xcanab lix yoy ut que'xtake li Jesús. ¹⁹ Junpat chic quibec li Jesús nak coxtauheb li ralal laj Zebedeo. Laj Jacobo ut laj Juan xc'aba'eb. Cuanqueb sa'

lix jucub. Yoq̄ueb chixxitiñquil lix yoy. ²⁰ Li Jesús quixbokeb ut que'xcanab laj Zebedeo lix yucua'eb sa' li jucub rochbeneb lix moş. Ut que'xtake li Jesús.

Li Jesús quirisi li maş aj musik'ej

²¹ Que'cuulac sa' li tenamit Capernaum. Sa' li hilobał cutan, qui-oc li Jesús sa' li cab li neque'xch'utub cui' ribeb laj judío. Ut qui-oc chixch'olobanquil xyalal chiruheb li tenamit. ²² Neque'sach xch'oleb li tenamit chirabinquil li c'a'ru naxye li Jesús xban nak quixc'ut xyalal chiruheb chi cuan xcuanquil ut moco jo' ta que'xbanu laj tz'ib li neque'c'utuc lix chak'rab li Dios. ²³ Sa' li cab ch'utch'uq̄ueb cui' cuan jun li cuñk cuan maş aj musik'ej riq'uin. ²⁴ Li cuñk a'an quixjap re ut quixye: —¿C'a'ru taçuał kiq'uin, at Jesús aj Nazaret? ¿Ma chikasachbal xatchal? Ninnau anihat laät. Laät lix Santil Alal li Dios, chan. ²⁵ Li Jesús quixk'us li maş aj musik'ej ut quixye re: —Matchokin. Elen riq'uin li cuñk a'in, chan. ²⁶ Ut li maş aj musik'ej quixch'ikle chi cau li cuñk. Quixjap re chi cau ut qui-el riq'uin li cuñk. ²⁷ Quilaje'sach xch'ol chixjunileb li tenamit ut que'xye chiribileb rib: —¿C'a'ru xyalal a'in? ¿C'a'ru li ac' tijleb a'in? Li cuñk a'in cuan xcuanquil sa' xbeneb li maş aj musik'ej ut li c'a'ru naxye, neque'xpab.— ²⁸ Sa' junpat que'rabi resil sa' chixjunileb li tenamit xcuent Galilea c'a'ru quixbanu li Jesús.

Li Jesús quixq'uirtesi lix na' li rixakil laj Simón Pedro

²⁹ Nak que'el sa' li cab li neque'xch'utub cui' ribeb laj judío, li Jesús rochbeneb laj Jacobo ut laj Juan que'coeb sa' rochoch laj Simón ut laj Andrés. ³⁰ Nak que'cuulac, ticto que'xye re li Jesús nak nim xyajel lix na' li rixakil laj Simón. Yocyo ut yo xtik. ³¹ Tojo'nak li Jesús quijiloc riq'uin li yaj. Quixchap li ruk' ut quixcuaclesi. Sa' junpat quinume' lix tik ut qui-oc chi c'anjelac chiruheb. ³² Sa' li ecuu a'an nak ac x-oc li sak'e, que'c'ame' chak riq'uin li Jesús nabaleb li yaj. Ut que'c'ame' ajcui' chak li cuan maş aj musik'ej riq'uineb. ³³ Ut li q'uila tenamit que'chal ut que'xch'utub ribeb chire li cab cuan cui' li Jesús. ³⁴ Nabaleb li yaj que'q'uirtesic xban li Jesús. Jalan jalank xyajeleb li junjunk. Ut li Jesús quirisiheb nabal chi maş aj musik'ej riq'uineb. Li Jesús inc'a' quixcanabeb chi atinac li maş aj musik'ej xban nak eb a'an que'xnau nak a'an li Cristo.

Li Jesús quixye resil li colba-ib aran Galilea

³⁵ Cuulajak chic nak toj maji' na-iq'ue' li cutan, li Jesús quicuacli ut qui-el sa' li tenamit. Ut co xjunes chi tijoc sa' jun li na'ajej bar maç'a' cui' cristian. ³⁶ A'ut laj Simón jo'q̄ueb ajcui' li rochben que'coeb chixsic'bal li Jesús. ³⁷ Nak coxe'xtau que'xye re, —Nabal li tenamit yoq̄ueb chi sic'oc açue, chanqueb. ³⁸ Aban li Jesús quichak'oc ut quixye reheb: —Tento nak toxic sa' eb li na'ajej li cuanqueb chi nach' re nak toxinch'olob ajcui' chak resil li colba-ib reheb xban nak a'an aj e nak xinchal, chan. ³⁹ Jo'can nak li Jesús quicuulac sa' eb li na'ajej cuan xcuent Galilea. Yo chixjulticanquil li xyalal chiruheb sa' li cab li neque'xch'utub cui' ribeb laj judío, ut quirisi li maş aj musik'ej riq'uineb nabal chi cristian.

Li Jesús quixq'uirtesi jun li cuñk saklep rix

⁴⁰ Sa' jun li cutan jun li cuñk saklep rix quicuulac riq'uin li Jesús. Quixcuik'ib rib chiru ut quixtz'ama xtenk'anquil. Quixye re: —Lain ninnau nak laät naru tinaq'uirtesi, chan. ⁴¹ Li Jesús quiril xtok'obał ru li cuñk, li saklep rix. Quixye' li ruk' ut quixch'e' li cuñk. Quixye: —Nacuaj aq'uirtesinquil. Anakcuan tating'uirtesi, chan. ⁴² Ut sa' junpat qui-el li saklep chirix ut quiq'uira. Maç'a' chic xyajel quicana. ⁴³ Li Jesús quixchak'rabi chi us ut

quixye re: ⁴⁴—Abi li tinye açue. Ma ani aj e taserak'i li xac'ul. Tic tatxix riq'uin laj tij re nak a'an taril nak xatq'uira. Ut tamayeja junak li xuljo' naxye sa' lix chak'rab laj Moisés. Chabanu a'an chok' retalil chiruheb li tenamit nak xatq'uira, chan. ⁴⁵ Co li cujnk ut quilajxserak'i reheb chixjunil chanru nak quiq'uira. Riq'uin a'an inc'a' chic naxq'ue rib na-oc li Jesús sa' eb li tenamit xban nak li q'uila tenamit yoqeb chixsic'bal li Jesús. Quicana ban sa' jun li na'ajej bar maç'a' cui' nabal li cristian ut aran quilaje'cuulac riq'uin li neque'chal chak yalak bar.

2

Li Jesús quixq'uirtesi jun li cujnk yaj ut sic

¹ Nak ac xnume' cuib oxib cutan chic, li Jesús co cui'chic sa' li tenamit Capernaum. Ut que'rabi resil nak li Jesús cuan sa' li tenamit sa' jun li cab bar nahilan cui'. ² Sa' junpat que'xch'utub rib li cristian sa' li cab cuan cui' li Jesús. Ut xban xq'uial li tenamit, ma ani chic naru na-oc chire li cab xban nak maç'a' chic li na'ajej. Ut li Jesús yo chixch'olobanquil li xyalal chiruheb. ³ Nak yo chi atinac li Jesús, cahibeb li cujnk que'xc'am chak chi pakpo jun li cujnk sic. Inc'a' nabec. ⁴ Abanan xban li q'uila tenamit, inc'a' naru te'rocsi li yaj cuan cui' li Jesús. Jo'can nak que'take' sa' xben li cab ut que'xte ca'ch'in xben li cab ut aran que'xcubsi li yaj yocyo chiru lix cuaribal ut coxcanac chiru li Jesús. ⁵ Li Jesús quixq'ue retal nak eb li cujnk a'an que'xpap nak naru tixq'uirtesi li yaj. Jo'can nak quixye re li yaj: —At cujnk, cuybil sachbil chic la maç, chan. ⁶ Ut chunchuqeb ajcui' aran laj tz'ib li neque'c'utuc xchak'rab li Dios. Yoqeb chi c'oxlac. ⁷ Ut que'xye sa' xch'oleb: —¿C'a'ut nak naatinac chi jo'can li cujnk a'in? ¿Ma a'in ta bi' li Dios? Ma ani naru nacuyuc nasachoc maç. Ca'aj cui' li Dios naru nacuyuc nasachoc maç, chanqueb. ⁸ Ticto quixnau li Jesús c'a'ru yoqeb chixc'oxlanquil. Quixye reheb: —¿C'a'ut nak nequec'oxla chi jo'can? ⁹ ¿Bar cuan li us tinye re li yaj re nak taç'utunq cheru nak cuan incuanquil? ¿Ma tinye re, “Cuybil sachbil la maç”, malaj ut tinye re, “Cuaclin, ayu, ut c'am la cuaribal”? ¹⁰ Lain tinc'ut cheru nak lain li Cristo li C'ajolbej, ut cuan incuanquil sa' ruchich'och' chixcuybal xsachbal li maç, chan reheb. ¹¹ Tojo'nak li Jesús quixye re li cujnk: —At cujnk, lain tinye açue, cuaclin, c'am la cuaribal ut ayu sa' la cuochoch, chan. ¹² Ut li cujnk sic nak quicuan ac taçuaclik. Quixchap lix cuaribal ut ac taçk chiruheb chixjunil li tenamit. Ut riq'uin a'in chixjunileb que'sach xch'ol. Que'xq'ue xlok'al li Dios ut que'xye: —Ma jun cua kilom a'in, chanqueb.

Li Jesús quixbok laj Leví re nak taxic chirix

¹³ Ut nak ac xq'uirtesi li cujnk sic, li Jesús co chire li palau Galilea. Nabaleb li tenamit que'cuulac riq'uin ut li Jesús qui-oc chixtzolbaleb. ¹⁴ Nak yo chi numec' aran, li Jesús quiril laj Leví li ralar laj Alfeo. Laj Leví c'ojc'o sa' xna'aj ut yo chi titz'ol toj. Li Jesús quixye re: —Chinatake.— Tojo'nak laj Leví quicuacli ut quixtake li Jesús. ¹⁵ Ut chirix a'an li Jesús co sa' li rochoch laj Leví chi cua'ac. Nabaleb laj titz'ol toj ut nabaleb ajcui' laj maç cuanqueb sa' li mex bar cuan cui' li Jesús rochbened lix tzolom. Nabaleb xban nak nabal que'taken re li Jesús. ¹⁶ Ut eb laj tz'ib ut eb laj fariseo que'ril nak cuan li Jesús sa' mex rochbened laj titz'ol toj jo'queb ajcui' laj maç. Ut que'xye reheb lix tzolom li Jesús: —¿C'a'ut nak laj tzolol ere nacua'ac sa' xyankeb laj titz'ol toj ut sa' xyankeb laj maç? chanqueb. ¹⁷ Li Jesús quirabi li que'xpatz' ut quixye reheb: —Li cauheb maç'a' na-oc cui' aj banonel reheb. Aban li yajeb, a'aneb li

neque'raj banec'. Jo'can nak lain inc'a' xinchal chixsic'baleb li tiq̄ueb xch'ql. Xinchal ban chixsic'baleb laj maç, chan li Jesús.

Li Jesús quixch'olob xyälal li ayunic

¹⁸ Sa' eb li cutan a'an eb lix tzolom laj Juan laj Cubsihom Ha' ut eb laj fariseo neque'xbanu x-ayun. Li tenamit que'cuulac riq'uin li Jesús ut que'xye re: —Eb lix tzolom laj Juan neque'xbanu x-ayun jo'queb ajcui' laj fariseo. ¿C'a'ut nak inc'a' neque'xbanu x-ayun eb la tzolom? chanqueb re. ¹⁹ Tojo'nak quichak'oc li Jesús ut quixye reheb, —Lain jo' jun belomej nak cuanquin. ¿Ma naru te'ayunik li neque'xic riq'uin sumlaç nak cuan li belomej riq'wineb? Nak toj cuan li belomej riq'wineb, inc'a' naru neque'xbanu x-ayun. ²⁰ Ut jo'can ajcui' lin tzolom. Taçuulac xk'ehil nak tin-işik sa' xyankeb. Toj sa' li cutan a'an te'xbanu x-ayun, chan reheb.

Li jaljoquil ru atin chirix li ac'yu'am

²¹ Ma ani naxxiti junak k'el t'icr riq'uin ac' t'icr. Cui ut naxxiti riq'uin ac' t'icr, nak tixpuch' taç'osk li ac' t'icr ut tixnimobresi xpejelal li k'el t'icr. ²² Ut ma ani naq'uehoc ac' vino sa' li k'el bols tz'um. Cui tixq'ue li ac' vino sa' li k'el bols tz'um, tapuq'uek' li k'el tz'um, taḥoyek' li vino, ut taçok' ajcui' li bols tz'um. Li ac' vino sa' li ac' bols tz'um naq'ueaman, chan li Jesús.

Li Jesús quixch'olob xyälal chirix li hilobał cutan

²³ Sa' jun li hilobał cutan li Jesús rochbened lix tzolom yoqueb chi numec' bar cui' aubil li acujmk trigo xc'aba'. Eb lix tzolom que'xch'ot ru li trigo nak yoqueb chi numec' xban nak te'tz'ocak. ²⁴ Tojo'nak eb laj fariseo que'xye re li Jesús: —Il c'a'ru yoqueb la tzolom. ¿C'a'ut nak neque'xbanu li c'anjel moco uxc ta naraj sa' li hilobał cutan? chanqueb. ²⁵ Li Jesús quichak'oc ut quixye reheb: —¿Ma inc'a' ta bi' xeril sa' li Santil Hu c'a'ru quixbanu laj David nak a'an ut li rochben te'tz'ocak? ²⁶ Nak quicuan laj Abiatar chok' xyucua'ileb aj tij, laj David qui-oc sa' li rochoch li Dios. Cuan aran li mayejanbil caxlan cua. Juneseb laj tij naru neque'xcua' li caxlan cua a'an. Abanan laj David quixcua' li caxlan cua li quiq'uehe' re xban laj tij ut quixq'ue ajcui' reheb li rochben xban nak te'tz'ocak, chan. ²⁷ Ut quixye ajcui' reheb: —A' li cujnk ut li ixk a'aneb li k'axal lok' chiru li hilobał cutan. Toj maç'a' li hilobał cutan nak ac que'yo'obtesic chak ut li hilobał cutan quiq'uehe' re xtenk'anquileb li cujnk ut li ixk. ²⁸ Jo'can nak lain li C'ajolbej cuan incuanquil chixyebal c'a'ru tauxmank sa' li hilobał cutan, chan li Jesús reheb.

3

Li Jesús quixq'uirtesi li cujnk sic jun li ruk'

¹ Ut li Jesús cō cui'chic sa' li cab li neque'xch'utub cui' ribeb laj judío. Ut aran cuan jun li cujnk sic jun li ruk'. ² Eb laj fariseo yoqueb chixsic'bal chanru nak te'xjit li Jesús. Jo'can nak yoqueb chirilbal ma tixq'uirtesi tana li cujnk a'in sa' li hilobał cutan. ³ Li Jesús quixye re li cujnk li sic ruk': —Numen chak arin chi ubej, chan re. ⁴ Tojo'nak li Jesús quixpatz' reheb laj fariseo: —¿C'a'ru us xbanunquil sa' li hilobał cutan? ¿Ma naru xbanunquil li us malaj ut li inc'a' us? ¿Ma us xcolbal xyu'am junak malaj ut xsachbal? chan cui'chic reheb. Ut eb a'an mem que'cana. Inc'a' chic que'xtau c'a'ru que'xye. ⁵ Quijosk'o' li Jesús sa' xbeneb, abanan quiril cui'chic xtok'obał ruheb xban nak inc'a' que'raj xtaubal xyälal. Ut li Jesús quixye re li cujnk li sic ruk': —Ye' la cuuk', chan. Ut li cujnk quixye' li ruk' ut sa' junpat quiq'uira. ⁶ Tojo'nak eb laj fariseo

que'el riq'uin li Jesús. Que'coeb riq'uineb li neque'oquen chirix laj Herodes. Ut que'oc xc'ubanquil chanru nak te'xcamsi li Jesús.

Li q'uila tenamit que'coeb chire li palau chixsic'bal li Jesús

⁷ Ut chirix a'an li Jesús co chire li palau Galilea rochbeneb lix tzolom. Ut li q'uila tenamit que'xtake li Jesús. Que'chal chak Galilea jo' ajcui' Judea. ⁸ Nak que'rabi resil li xninkal usilal yo chixbanunquil li Jesús, quilaje'chal chirilbal. Cuan li que'chal chak Jerusalén ut Idumea. Ut cuan ajcui' que'chal chak jun pac'al li nima' Jordán. Ut que'chal ajcui' chak Tiro ut Sidón chirilbal li Jesús. ⁹ Jo'can nak li Jesús quixye reheb lix tzolom nak te'xcaresi junak li jucub. Ac cuank aran re ta'cuank chi sa' re nak inc'a' tanat'ek' xbaneb li q'uila tenamit. ¹⁰ Xban nak nabal ac xq'uirtesi, jo'can nak li q'uila tenamit yoqueb chixtiquisinguil ribeb. Te'raj te'xch'e' li Jesús re nak te'q'uirak. ¹¹ Li cuan maus aj musik'ej riq'uineb, nak que'ril li Jesús, que'xcuik'ib rib chiru ut que'xjap re chixyebal: —Laat li Ralal li Dios, chanqueb re. ¹² Ut li Jesús quixk'useb li maus aj musik'ej ut quixye reheb nak inc'a' te'xye resil nak a'an Ralal li Dios.

Li Jesús quixsiq'ueb ru lix tzolom cablaju

¹³ Tojo'nak li Jesús quitake' chiru tzul. Quixbokeb li ani quiraj ut eb a'an coeb chirix. ¹⁴ Ut li Jesús quixsiq'ueb ru li cablaju chi cuink re nak te'cuank riq'uin ut re nak tixtaklaheb chixjulticanquil li ratin li Dios. ¹⁵ Ut quixq'ueheb xcuankuil chixq'uirtesinguil li yaj ut chirisinquil li maus aj musik'ej. ¹⁶ A'aneb a'in li cablaju li quixxakabeb li Jesús: laj Simón li quixq'ue aj Pedro chok' xc'aba', ¹⁷ ut laj Jacobo ut laj Juan. Lix yucua'eb a'an, a'an laj Zebedeo. Aj Boanerges quiq'uehe' chok' xc'aba'eb xban li Jesús. Li c'aba'ej a'an naraj naxye “Ralaleb li Cak”. ¹⁸ Quixxakabeb ajcui' laj Andrés, laj Felipe, laj Bartolomé, laj Mateo, laj Tomás, laj Jacobo li ralal laj Alfeo, laj Tadeo ut laj Simón. A'an xcomoneb laj Canaán. ¹⁹ Ut quixsic' ajcui' ru laj Judas Iscariote li quik'axtesin re li Jesús sa' ruk'eb li xic' neque'iloc re.

Maç'a' chic xcuylbal xmaç li namajecuan re li Santil Musik'ej

²⁰ Ut nak ac xsiq'ueb ru lix tzolom li Jesús co sa' jun li cab rochbeneb lix tzolom. Ut que'tubla cui'chic li q'uila tenamit; riq'uin a'an moco naxq'ue ta chic rib nacua'ac li Jesús chi moco eb lix tzolom. ²¹ Ut nak que'rabi resil li c'aru yo chixbanunquil li Jesús, eb li rech'alal que'chal chixc'ambal. Que'xye nak moco tuktu ta chic xna'leb li Jesús. ²² Ut eb laj tz'ib li que'chal chak Jerusalén yoqueb chixyebal: —Laj Tza cuan riq'uin li Jesús ut sa' xc'aba' laj Tza narisiheb li maus aj musik'ej, chanqueb. ²³ Ut li Jesús quixbokeb ut quixpatz' reheb: —¿Chanru nak laj Tza tarisi li rech aj tzahil?— Ut quixye ajcui' li jaljoquil ru atin a'in: ²⁴ —Cui cuan jun tepak chi tenamit xic' te'ril rib chi ribileb rib, li jun tep chi tenamit a'an tixsach xcuankuil xjunes rib. ²⁵ Ut cui cuan ta jun cabalak xic' te'ril rib chi ribileb rib sa' rochocheb, li jun cabal a'an te'xsach xcuankuil lix jun cabal. ²⁶ Jo'can ajcui' laj Tza cui te'xpleti rib chi ribileb rib, a'an tixsach xcuankuil xjunes rib. ²⁷ Ma ani naru taoc sa' rochoch junak cuink cau rib chixmak'bal li c'aru cuan re, cui inc'a' ta xben cua tixbac' li cuink cau rib, tojo'nak taoc chixc'ambal li c'aru cuan re. ²⁸ Relic chi yal ninye ere nak taucymank tasachmank lix maqueb li cristian ut taucymank ajcui' li majecuanç neque'xbanu. ²⁹ Abanan li tamajecuanç re li Santil Musik'ej, inc'a' taucyeyek' tasachek' xmaç. Cuank ban sa' xben chi junelic lix tojbal rix li maç a'an.— ³⁰ Li Jesús quixye a'in xban nak yoqueb chixyebal nak cuan maus aj musik'ej riq'uin.

Lix na' ut eb li ritz'in li Jesús

³¹ Quicuulac aran lix na' li Jesús ut que'cuulac ajcui' li ritz'in. Que'cana chirix cab ut que'xtakla xbokbal li Jesús. ³² Ut nabaleb li tenamit c'ojc'oq'ueb chixc'atk li Jesús. Que'xye re: —Kacua', xc'ulun la na' rochbened la cuitz'in. Cuanqueb chirix cab. Yoq'ueb chasic'bal, chanqueb. ³³ Li Jesús quichak'oc ut quixye reheb: —¿Ani ta bi' lin na'? Ut, ¿ani ta bi' li cuitz'in nak nequec'oxla laex?— ³⁴ Quirileb li c'ojc'oq'ueb chixc'atk ut quixye: —A'ineb lin na' ut a'ineb li cuitz'in. ³⁵ Xban nak li ani nabanun re li naraj li Dios, a'an li cuitz'in, a'an li cuanab, ut a'an lin na', chan.

4

Li jaljoquil ru atin chirix laj acuinel

¹ Ut qui-oc cui'chic li Jesús chixtzolbaleb li tenamit chire li palau Galilea. K'axal nabal que'xch'utub rib riq'uin chirabinquil. Xban xq'uialeb li tenamit, li Jesús qui-oc sa' jun li jucub cuan sa' li palau ut quic'ojla chi sa'. Ut chixjunileb li tenamit que'cana chire li palau. ² Ut nabal c'a'ak re ru chixtzoleb cui' riq'uin jaljoquil ru atin. Nak yo chixch'olobanquil li xyalal chiruheb, quixye li serak' a'in reheb: ³ —Abihomak li tinye. Jun aj acuinel co chi auc. ⁴ Ut nak yo chixhirbal li iyaj, cuan quinak chire be. Que'chal li xul li neque'xic'an ut que'xcua' li iyaj. ⁵ Ut cuan ajcui' li iyaj quinak sa' li pec ru bar mac'a' cui' mas li ch'och'. Sa' junpat quimok, abanan inc'a' quixchap xxe' xban nak jay li ch'och' sa' xben li pec. ⁶ Nak quichal li sak'e quichakic li acuinak xban nak inc'a' cham cuan li xe'. ⁷ Ut cuan cui'chic li iyaj coxnak sa' xyank li q'uix. Ut nak quichamo' li q'uix sa' xben, quixnat' li acuinak ut inc'a' quiuchin. ⁸ Ut cuan cui'chic li iyaj coxnak sa' li chabil ch'och'. Quimok ut qui'ui ut quiuchin chi us. Cuan quixq'ue lajetk xca'c'al (30) ru. Cuan li quixq'ue oxtakc'al (60) ru ut cuan cui'chic quixq'ue o'takc'al (100) ru li junjunk. ⁹ Tojo'nak quixye li Jesús reheb: —Li ani na-abin, chixq'uehak retal li c'a'ru ninye, chan.

C'a'ut nak cuan li jaljoquil ru atin

¹⁰ Ut nak que'el lix q'ual li tenamit, li Jesús quicana rochbened lix tzolom cablaju. Eb a'an que'xpatz' re ut que'xye: —¿C'a'ru xyalal li jaljoquil ru atin a'in? chanqueb. ¹¹ Ut li Jesús quixye reheb: —Laex q'uebil ere xnaubal xyalal li mukmuquil na'leb chirix lix nimajcual xcuinquilal li Dios. A'ut li jun ch'ol chic li inc'a' neque'paban, riq'uin jaljoquil ru atin tayemank reheb. ¹² Usta yoq'ueb chi iloc, abanan inc'a' te'xq'ue retal. Usta yoq'ueb chi abinc, abanan inc'a' te'xtau xyalal. Taxmank chi jo'can re nak inc'a' te'xyot' xch'oleb ut inc'a' te'xjal xc'a'uxeb ut inc'a' tacuyek' xmaq'ueb.—

Li Jesús quixch'olob xyalal chirix laj acuinel

¹³ Tojo'nak li Jesús quixpatz' reheb: —¿Ma inc'a' nequetau ru li jaljoquil ru atin a'in? Cui inc'a' nequetau xyalal a'in, ¿chanru nak tetau xyalal chixjunil li jaljoquil ru atin chi jo'can? ¹⁴ A'an a'in lix yalal. Laj acuinel a'an jo' jun laj yehol ratin li Dios. ¹⁵ Ut li iyaj li quinak chire be, a'an chanchaneb li neque'abin re li ratin li Dios. Nak ac xe'rabi, sa' junpat nachal laj Tza chirisinuil li atin ut sa' junpat nasach sa' xch'oleb. ¹⁶ Ut li iyaj li quinak sa' li pec ru, a'an chanchaneb li neque'abin re li ratin li Dios ut sa' junpat neque'xpab chi saheb sa' xch'ol. ¹⁷ Abanan inc'a' nacana sa' xch'oleb. Nak nachal junak raylal, malaj ch'a'ajquial sa' xbaneb xbaneb lix pabal, inc'a' neque'xcuy xnumsinuil. Sa' junpat neque'ch'inan xch'ol. ¹⁸ Ut li iyaj li quinak sa' xyank li q'uix chanchaneb li neque'abin re li ratin li Dios.

¹⁹ Abanan ca'aj cui' li c'a'ak re ru cuan sa' ruchich'och' neque'xc'oxla, jo' li biomal ut xrabal ru li c'a'ak chic re ru. Ut a'an li naramoc lix yalal chiruheb. Mac'a' na-oc cui' li ratin li Dios reheb. ²⁰ Ut li iyaj li quit'ane' sa' chabil ch'och', a'an chanchaneb li neque'rabi ut neque'xpaḅ chi tz'akal li ratin li Dios. Neque'q'ui chi us sa' lix pabaleb, jo' li acuimk li naruchin lajetk xca'takc'al (30) ut li naxq'ue oxtakc'al (60) ut li naxq'ue o'takc'al (100) ru li junjũk.—

Li jaljoquil ru atin chirix li candil

²¹ Ut li Jesús quixye ajcui' reheb: —¿Ma naq'ueman ta bi' junak candil rubel junak chacach malaj ut rubel ch'at? Inc'a' naru. Takec' ban naq'ueman sa' xna'aj re nak tixcutanobresi sa' li cab. ²² Jo'an ajcui' li tijleb li ninch'olob xyalal cheru. Mac'a' taḅanak chi mukmu chi inc'a' ta taḅ'utbesik mokon. Ut li inc'a' natauman ru anakcuan, tatauḅank ru mokon. ²³ Li ani naraj rabinquil, chixq'uehak retal li ninye. ²⁴ Quixye ajcui' reheb: —Cheq'uehak retal li nequerabi ut teq'ue ech'ol chixḅanunquil li nequerabi xban nak li ani naxḅanu li c'a'ru quixtzol cuiq'uin, mas cui'chic lix na'leb taq'uehek' re xban li Dios re nak tixtau ru li cuatin. ²⁵ Li ani tixq'ue xch'ol chixtzolbal li us, k'axal cui'chic li usilal tixc'ul. Li ani inc'a' tixq'ue xch'ol chixtzolbal li us, taḅachk sa' xch'ol li jo' q'uial naxnau.

Li jaljoquil ru atin chirix li iyaj naq'ui

²⁶ Ut li Jesús quixye cui'chic reheb: —Lix nimajcual cuanquilal li Dios, chanchan junak aj acuinel. Narau li iyaj sa' ch'och'. ²⁷ Li cuĩnk nacuar, nacuacli ut eb li cutan neque'nume'. Ut li iyaj yal xjunes namok chak ut naq'ui ut li cuĩnk inc'a' naxnau chanru nak namok ut naq'ui li acuimk. ²⁸ Li ch'och' naq'uiresin re li acuimk. Naq'ui ut nanĩnkan ut chirix a'an na-oc chi atz'umac ut naxq'ue li ru. ²⁹ Ut nak nacheco' li ru nasic'man sa' junpat xban nak ac xcuulac xk'ehil xxocbal li ru.

Li jaljoquil ru atin chirix li riyajil li mostaza

³⁰ —¿C'a'ru tinjuntak'eta cui' lix nimajcual cuanquil li Dios? chan li Jesús. —Ut ¿c'a'ru chi jaljoquil ru atin tinye, re xch'olobanquil xyalal lix nimajcual cuanquilal li Dios? ³¹ Lix nimajcual cuanquilal li Dios, a'an chanchan riyajil li nĩnki mostaza. Li riyajil li mostaza coc' chiru chixjunil li iyaj cuan sa' ruchich'och'. ³² Nak ac x-auman namok ut naq'ui. Ut nĩnk chi us nacuulac lix che'el. Naxk'ax xteram chixjunil li acuimk. Neque'nĩnkan li ruk' ut eb laj xic'anel xul neque'xyib lix soc sa' eb li ruk'.— ³³ Ut li Jesús quixch'olob xyalal chiruheb li tenamit riq'uin nabal chic chi jaljoquil ru atin a' yal bar na cuan te'xtau ru. ³⁴ Ut maḅ'a' c'a'ru quixye li Jesús reheb li tenamit chi maḅua' ta sa' jaljoquil ru atin. Abanan nak ac xjuneseb chic lix tzolom, quixch'olob li xyalal chiruheb.

Li Jesús quixk'us li ik' ut li palau

³⁵ Nak qui-ecuu sa' li cutan a'an li Jesús quixye reheb lix tzolom: —K'axonko jun pac'al li palau, chan reheb. ³⁶ Ut li Jesús quixchak'rabiheb li q'uila tenamit ut quic'ame' sa' li jucub cuan cui'. Ut cuanqueb ajcui' coc' jucub que'coeb chirix. ³⁷ Ut nak ac cuanqueb sa' xyi li palau quichal jun li nimla ik'. Naxcut lix cau ok li ha' sa' li jucub ut qui-oc chi nujac li ha' chi sa' li jucub. ³⁸ Li Jesús cuan chi ixbej sa' li jucub ut yo' chi cuarc sa' xḅen jun lix soc xjolom. Eb lix tzolom que'rajsi ut que'xye re: —At tzolonel, ajsi acu. ¿Ma inc'a' nacacuil nak osoc' ke? chanqueb. ³⁹ Quicuacli li Jesús ut quixk'us li ik' ut quixye re li palau: —Matchokin. Canab ec'anc, chan. Ut sa' junpat quich'ana li ik' ut quitukla ru li ha'. ⁴⁰ Ut li Jesús quixye reheb lix tzolom: —¿C'a'ut nak c'ajo' nak nequexxucua? ¿Ma inc'a' nequepaḅ nak

li Dios tatenk'ank ere? chan. ⁴¹ Ut c'ajo' nak que'sach xch'ol lix tzolom ut que'xye chi ribbileb rib: —¿Chanru nak cuan xcuanguil li cuñk a'in nak naxk'us li ik' ut li palau, ut neque'abin chiru? chanqueb.

5

Li Jesús quirisi li maus aj musik'ej riq'uin li cuñk aj Gadara

¹ Li Jesús ut eb lix tzolom que'cuulac aran jun pac'al li palau sa' xch'och'eb laj Gadara. ² Ut nak qui-el li Jesús sa' li jucub, sa' junpat quichal jun li cuñk chi c'uluc re. Quichal chak sa' li na'ajej bar neque'muke' cui' li camenak. Li cuñk a'an cuan maus aj musik'ej riq'uin. ³ Junes sa' li na'ajej bar neque'muke' cui' li camenak nacuan. Ma' ani naru nabac'oc re chi moco riq'uin cadena naru neque'xbac'. ⁴ Nabal sut neque'xyal xbac'bal li rok ruk' riq'uin cadena. Abanan sa' junpat naxt'upi li cadena. Ut ma' ani naru natulanobresin re li cuñk a'an. ⁵ Chi k'ek chi cutan naxbeni rib sa' xbeneb li tzul ut sa' xyankeb li muklebal camenak. Junelic yo chixjapbal re ut naxyoq'ui rib riq'uin k'esnal pec. ⁶ Toj najt ajcui' cuan chak li Jesús nak quile' xban li cuñk. Li cuñk co sa' anil ut coxciuk'ib rib chiru li Jesús. ⁷ Quixjap re chixyebal: —¿C'a'ru tacuaj cuiq'uin, at Jesús? Laat Ralalat li nimajcual Dios. Sa' xc'aba' li Kacua' Dios, nintz'ama cha'cuu nak minarahobtesi, chan re. ⁸ Quixye chi jo'can xban nak ac yo li Jesús chixyebal re li maus aj musik'ej: —Elen riq'uin li cuñk a'in, at maus aj musik'ej.— ⁹ Tojo'nak li Jesús quixpatz' re: —¿Ani ac'aba'?— —Cuakib mil (6,000) inc'aba' xban nak nabalo, chan nak quichak'oc. ¹⁰ Ut nabal sut quixtz'ama chiru li Jesús nak inc'a' tarisiheb li maus aj musik'ej chi junaj cua sa' li na'ajej a'an. ¹¹ Aran cuanqueb jun tub li ak yoqueb chi ichajibc chiru li tzul. ¹² Eb li maus aj musik'ej que'xtz'ama chiru li Jesús nak tixtaklaheb riq'uineb li ak. —Choatakla riq'uineb li ak. Choacanab chi oc riq'uineb, chanqueb. ¹³ Ut li Jesús quixcanabeb chi xic. Que'el li maus aj musik'ej riq'uin li cuñk. Coxe'ocak riq'uineb li ak. Ut li ak que'oc chi alinac ut que'xrum chak rib sa' xben ul ut toj sa' li palau coxe'nak. Cuanqueb na cuib mil chi ak que'oso' sa' li palau. ¹⁴ Eb laj ilol ak que'xucuac ut que'elelic ut coxe'xye resil sa' li tenamit jo' ajcui' sa' li c'alebál. Ut nabaleb li tenamit que'coeb chirilbal li c'a'ru quic'ulman. ¹⁵ Que'cuulac cuan cui' li Jesús ut que'ril li cuñk li qui-isic nabal chi maus aj musik'ej riq'uin. C'ojc'o aran nak coxe'xtau. Tikto chic ut tuktu chic xjolom. Riq'uin rilbal a'an que'oc xxiiuheb li tenamit. ¹⁶ Ut eb li que'iloc re, que'xserak'i reheb li tenamit chanru qui-ux re li cuñk li quicuan maus aj musik'ej riq'uin, jo' ajcui' li c'a'ru que'xc'ul li ak. ¹⁷ Ut que'xtz'ama chiru li Jesús nak ta'elk sa' lix tenamiteb. ¹⁸ Ut nak qui-oc cui'chic li Jesús sa' li jucub, li cuñk li qui-isic maus aj musik'ej riq'uin quixtz'ama chiru li Jesús nak taxic chirix. ¹⁹ A'ut li Jesús inc'a' quiraj nak taxic chirix. Quixye re li cuñk: —Ayu sa' la cuochoch ut taserak'i reheb la cuech'alal li usilal xinbanu acue. Taye reheb chanru nak xcuuxtana acuu, chan re li cuñk. ²⁰ Jo'can nak co li cuñk sa' eb li tenamit xcuent Decápolis. Qui-oc chixyebal reheb chixjunil li n'inki usilal quixbanu li Jesús re. Ut chixjunileb li tenamit quilaje'sach xch'ol chirabinquil li c'a'ru quixye.

Li Jesús quixq'uirtesi lix rabin laj Jairo jo' ajcui' li ixk li quich'e'oc re li rak'

²¹ Qui-oc cui'chic li Jesús sa' li jucub ut quisuk'i cui'chic jun pac'al li palau rochbeneb lix tzolom. Ma' ca'ch'in li tenamit coxe'xch'utub rib riq'uin chire li palau. ²² Ut quichal jun li cuñk aj Jairo xc'aba'. A'an xcomoneb li neque'taklan sa' li cab li neque'xch'utub cui' ribeb laj judío. Nak quiril li

Jesús, quixcuik'ib rib chiru. ²³ Ut chi anchal xch'ol quixtz'ama chiru li Jesús ut quixye re: —At Kaçua', k'axal nim xyajel lin ch'ina rabin. Camc re. Banu usilal, tatxíc sa' cuochoch. Toxaq'ue la cuuk' sa' xben re nak taq'uirak ut inc'a' taçamk, chan re li Jesús. ²⁴ Ut li Jesús cò chirix laj Jairo ut nabaleb li tenamit que'taken re. Xban xq'uial li tenamit yoqueb chixtiqusinguil ribeb. ²⁵ Sa' xyankeb cuan jun li ixk cablaju chihab xticlajíc xyajel. Junelic yo lix yajel li ixk a'an ut inc'a' chic natz'ap lix quiq'uel. ²⁶ Quixq'ue rib chi banec' riq'uin nabaleb aj banonel ut nabal li raylal quixc'ul. Abanan ma jok'e que'xban. Ca'aj cui' quixsach chixjunil li c'a'ru cuan re, re xtojbaleb. Ut maç'a' qui-oc cui'. Nimanc ban chic naxbanu lix yajel. ²⁷ Quirabi resil nak li Jesús yo chixq'uirtesinquileb li yaj. Riq'uin a'an qui-oc chixtakenquil li Jesús rochbened li q'uila tenamit. Ut quijiloc chixc'atk re nak tixch'e' li rak'. ²⁸ —Usta ca'aj cui' li rak' tinch'e', riq'uin a'an ting'uirak, chan li ixk sa' xch'ol. ²⁹ Ut nak quixch'e' li rak' sa' junpat quiq'uira, ut quitz'ap lix quiq'uel. Ut li ixk quirec'a' nak maç'a' chic xyajel. ³⁰ Ut li Jesús quixnau nak cuan li quiq'uira xban lix cuanquil. Quixsuk'isi rib sa' xyankeb li q'uila tenamit ut quixpatz' reheb: —¿Ani xch'e'oc re li cuak'? chan reheb. ³¹ Eb lix tzolom que'chak'oc ut que'xye re: —At Kaçua', laaç nacacuil chanru nak yoqueb chixtiqusinguil ribeb li q'uila tenamit chaçcuix. ¿C'a'ut nak nacapatz' ani xch'e'oc re la cuak'? chanqueb. ³² Ut li Jesús quixsuk'isi rib chirilbal ani xch'e'oc re li rak'. ³³ Li ixk naxnau nak ax q'uira. Nasicot xban xxiu. Colxcuik'ib rib chiru li Jesús ut quixye li xyalal re. ³⁴ Li Jesús quixye re: —Kana', xban nak xapaç nak cuan incuanquil chaq'uirtesinquil, jo'can nak xatq'uira. Ayu chi sa sa' açh'ol ut chi maç'a' chic araylal, chan. ³⁵ Nak toj yo chi atinac li Jesús, que'chal lix comoneb laj Jairo sa' rochoch chixyebal re, —Xcam la rabin. ¿C'a' chic ru aj e nak tach'i ch'i'i laj tzolonel? chanqueb. ³⁶ Nak quirabi li Jesús li c'a'ru yoqueb chixyebal re laj Jairo, quixye re: —Matc'oxlac. Ca'aj cui' tapaç nak taq'uirak la rabin, chan. ³⁷ Ut inc'a' quiraj nak li tenamit te'xic chirix. Ca'aj cui' laj Pedro ut laj Jacobo ut laj Juan, li ritz'in laj Jacobo, quixc'ameb chirix. ³⁸ Nak que'cuulac sa' rochoch laj Jairo, li Jesús quiril nak yoqueb chixpokokinquil ribeb ut jappoqueb re chi yabac. ³⁹ Qui-oc sa' cab riq'uineb ut quixye reheb: —¿C'a'ut nak yoqex chixpokokinquil erib? ¿C'a'ut nak yoqex chi yabac? Li xka'al moco xcam ta. Cuarc yo, chan li Jesús reheb. ⁴⁰ Eb a'an que'oc chixse'enquil li c'a'ru quixye, ut li Jesús quirisiheb chirix cab. Ca'aj cui' lix na' ut lix yucua' ut eb li oxib chi xtzolom que'oc rochben li Jesús bar cuan cui' li camenak. ⁴¹ Quixchap chi ruk' li camenak ut quixye re sa' li ratinobał: —Talita, cumi, chan. Li atin a'an naraj naxye, “At ch'ina xka'al, lajin tanyehok açue cuaclin”. ⁴² Sa' junpat quicuacli li xka'al ut quibec. Li xka'al a'an cablaju chihab cuan re. Ut eb li cuanqueb aran quilaje'sach xch'ol chirilbal li c'a'ru quixbanu li Jesús. ⁴³ A'ut li Jesús quixchak'rabiheb chi us nak ma ani aj e te'xye li c'a'ru quic'ulman. Ut quixye reheb nak te'xq'ue chi cua'ac li xka'al.

6

Li Jesús quitz'ektanac aran Nazaret

¹ Li Jesús qui-el sa' li na'ajej a'an ut cò sa' lix tenamit rochbened lix tzolom. ² Sa' li hilobał cutan cò sa' li cab li neque'xch'utub cui' ribeb laj judío. Qui-oc chixtzolbaleb li tenamit. Nabal que'abin re ut quilaje'sach xch'ol chirabinquil ut que'xye chi ribileb rib: —¿Bar xtzol lix na'leb? ¿C'a'ru chi na'lebil li naxnau? ¿Chanru nak naxbanu li milagro? chanqueb. ³ —¿Ma maçua' ta bi' a'in laj pech'? Ut ¿maçua' ta bi' lix Maria lix na'? ¿Ma maçua' ta

bi' laj Jacobo li ritz'in ut laj José, laj Judas ut laj Simón? ¿Ma maçua' ta bi' a'in eb li ritz'in li cuanqueb sa' kayank? chanqueb. Ut que'chal xjosk'il sa' xben. ⁴ Ut li Jesús quixye: —Junak profeta naq'uehe' xlok'al yalak bar, abanan sa' lix tenamit ut sa' xyankeb li rech'alal ut sa' rochoch inc'a' naq'uehe' xlok'al.— ⁵ Ut inc'a' quiru quixbanu li milagro sa' lix tenamit xban nak inc'a' que'xpab nak cuan xcuanquil. Cui b oxib ajcui' li yaj quixq'ue li ruk' sa' xbeneb re nak te'q'uirak. ⁶ Ut li Jesús quisach xch'ol chirilbaleb nak inc'a' neque'xpab nak cuan xcuanquil. Ut nak qui-el aran, co sa' chixjunil li c'alebaj chixtzolbaleb li tenamit.

Li Jesús quixtaklaheb lix tzolom chixyebal resil li colba-ib

⁷ Tojo'nak quixbokeb lix tzolom cablaju ut quixtaklaheb chi ca'cabil ut quixq'ueheb xcuanquil chirisinguil li maus aj musik'ej. ⁸ Ut quixye reheb: —Maç'a' c'a'ru teç'am nak texxic, ca'aj cui' le xuk'. Inc'a' teç'am etzacaemk, chi moco junak bols, chi moco tumin teç'am. ⁹ Ca'aj cui' le xab cuan cherok teç'am ut ca'aj cui' le rak' cuan cherix teç'am. ¹⁰ Ut quixye ajcui' reheb: —Nak texcuulak sa' junak tenamit, sa' li cab tex-oc cui' chi hilanc, aran texcanak ut inc'a' yal yokex chixjalbal enajak. Nak ac xic ere sa' jalan chic tenamit, tojo'nak tejal le na'aj. ¹¹ Cui texcuulak sa' junak na'ajej bar cui' inc'a' texc'ulek' chi moco te'raj rabinquil le ratin, nak tex-elk riq'uineb techik' li poks cherok jo' retalil li raylal te'xc'ul. Relic chi yal ninye ere nak k'axal cui'chic li raylal te'xc'ul chiruheb laj Sodoma ut laj Gomorra sa' xk'ehil li rakba atin, chan. ¹² Jo'can nak que'coeb lix tzolom li Jesús ut que'xch'olob xyalal chiruheb li tenamit re nak te'xyot' xch'ol ut te'xjal xc'a'uxeb. ¹³ Que'risi nabal li maus aj musik'ej riq'uineb ut que'xq'ue li aceite sa' xjolomeb li yaj jo' retalil xcuanquil li Dios ut que'xq'uirtesihb.

Nak que'xcamsi laj Juan laj Cubsihom Ha'

¹⁴ Li tenamit yoqueb chixserak'inquil li milagro yo chixbanunquil li Jesús. Nak quirabi a'an, li rey Herodes quixye: —A'an laj Juan laj Cubsihom Ha'. Xcuacli cui'chic chi yo'yo sa' xyankeb li camenak. Jo'can nak cuan xcuanquil chixbanunquil li milagro, chan. ¹⁵ Ut cuan que'yehoc re nak a'an li profeta Elías. Ut cuan ajcui' que'yehoc re nak a'an jun li profeta jo' li profeta que'cuan najter. ¹⁶ Ut nak quirabi a'an, laj Herodes quixye: —A'an laj Juan li quintakla xch'otbal xcux. A'an xcuacli chi yo'yo sa' xyankeb li camenak, chan. ¹⁷ Quixye chi jo'can xban nak a'an quitaklan re xchapbal laj Juan. Que'xbac' ut que'xq'ue sa' tz'alam. Quixbanu chi jo'can xban nak jo'can quiraj lix Herodías. Lix Herodías a'an rixakil laj Felipe, ritz'in laj Herodes ut laj Herodes quixc'am chok' rixakil. ¹⁸ Nak toj maji' naq'uehe' sa' tz'alam, chaj Juan laj Cubsihom Ha' quixye re laj Herodes: —Nimla maç xabanu nak xac'uan chok' acuxikal lix Herodías xban nak ac sumsu riq'uin la cuitz'in, laj Felipe, chan re. ¹⁹ Riq'uin a'an ma ca'ch'in nak quijosk'o' lix Herodías sa' xben laj Juan ut quiraj raj xcamsinuil. Abanan inc'a' naru xban nak laj Herodes inc'a' quixcanab chixcamsinuil. ²⁰ Laj Herodes naxnau nak laj Juan tic xch'ol ut santil cuink. Jo'can nak naxucuac ut inc'a' naraj nak tacamsik. Quicuulac chiru rabinquil li quixye laj Juan usta c'ajo' nak naq'uehe' chi c'oxlak xban li atin nayehe' re. ²¹ Abanan lix Herodías quixtao chanru nak naru xcamsinuil laj Juan. Jo'ca'in quic'ulman. Nak laj Herodes quixnink'ei lix chihab, quixbokeb chi cua'ac li ninkeb xcuanquil sa' li tenamit, ut quixbokeb ajcui' li neque'taklan reheb li soldado ut jo'can ajcui' chixjunileb li xninkal ru cuink re Galilea. ²² Lix co' lix Herodías qui-oc bar yoqueb cui' chi cua'ac li ula' ut qui-oc chi xajoc chiruheb. Laj Herodes quicuulac chiru chanru naxajoc. Ut quicuulac ajcui' chiruheb li ula'. Jo'can nak laj Herodes

quixye re li xka'al: —Tatz'ama cue li c'a'ru taquaj ut lain tinq'ue acue, chan. ²³ Ut quixye ajcui' re li xka'al: —Sa' xc'aba' li Dios, tinq'ue acue li c'a'ru tapatz' cue. Usta yijach lin jun cablal tapatz' cue, tinq'ue acue, chan. ²⁴ Ut li xka'al cō chixpatz'bal re lix na': —¿C'a'ru us tintz'ama re? chan. Ut lix na' quixye re: —Tz'ama re nak tixq'ue acue lix jolom laj Juan laj Cubsihom Ha', chan. ²⁵ Sa' junpat cō li xka'al riq'uin laj Herodes ut quixye re: —Lain tincuaaj nak anakcuan ajcui' taq'ue cue sa' junak plato lix jolom laj Juan laj Cubsihom Ha', chan. ²⁶ Ut laj Herodes c'ajo' nak quiraho' sa' xch'ol. Abanan maç'a' chic quiru quixye xban nak chixjunileb li ula' que'abin re nak quixye sa' xc'aba' li Dios tixq'ue re li c'a'ru tixtz'ama. ²⁷ Laj Herodes ticto quixtakla jun li soldado chixc'ambal chak lix jolom laj Juan. Li soldado cō sa' tz'alam chixch'otbal lix cux laj Juan. ²⁸ Ut quixc'am chak lix jolom sa' jun li plato. Quixq'ue re li xka'al ut li xka'al quixk'axtesi re lix na'. ²⁹ Nak que'rabi lix tzolom laj Juan nak que'xcamsi, que'chal chixc'ambal li camenak ut coxe'xmuk.

Li Jesús quixq'ueheb chi cua'ac li ob mil chi cuïnk

³⁰ Ut nak que'suk'i chak lix tzolom li Jesús chixbanunquil li c'anjel que'taklac cui', cole'xch'utub rib riq'uin li Jesús ut que'xserak'i re c'a'ru quilaje'xbanu chak. Ut que'xye ajcui' re chanru nak que'xtzol li tenamit. ³¹ Neque'el neque'oc li q'uila tenamit riq'uin li Jesús. Jo'can ajcui' riq'uineb lix tzolom. Ut riq'uin a'an inc'a' naru neque'hilan chi moco naru te'cua'ak. Jo'can nak quixye li Jesús: —Yo'keb sa' junak na'ajej bar maç'a' cui' tenamit re nak naru tohilank ca'ch'inak kajunes, chan li Jesús. ³² Ut que'oc sa' jun li jucub ut que'coeb sa' jun na'ajej bar cui' te'hilank raj ca'ch'inak xjuneseb. ³³ Abanan nabaleb que'iloc re nak yoqueb chi xic ut que'xnu nak a'an li Jesús. Nabal quilaje'el sa' li tenamit junjünk. Que'coeb chi rokeb sa' anil ut a'aneb xben cua que'cuulac sa' li na'ajej bar yo cui' chi xic li Jesús rochbeneb lix tzolom. ³⁴ Ut nak qui-el li Jesús sa' li jucub, quirileb li q'uila tenamit. Quixtok'oba ruheb xban nak chanchaneb li carner maç'a' aj'ilol reheb. Ut nabal li c'a'ak re ru quixtzoleb cui'. ³⁵ Nak que'ril nak yo chi ecuuc, que'coeb lix tzolom riq'uin li Jesús ut que'xye re: —Yo chi ecuuc ut arin maç'a' cuan. ³⁶ Maç'a' xcuaheb. Taklaheb chixlok'baleb lix cua sa' eb li c'alebal ut sa' eb li coc' tenamit li cuanqueb chi nach', chanqueb. ³⁷ Ut nak quichak'oc li Jesús quixye reheb: —Q'uehomakeb chi cua'ac laex.— Ut eb a'an que'xye: —¿Ma toxic chixlok'bal cui'baik ciento denarios chi caxlan cua chi jo'canan re te'kaq'ue chi cua'ac? chanqueb. ³⁸ Li Jesús quixye: —¿Jarub li caxlan cua cuan eriq'uin? Ayukex, ilomak chak.— Que'coeb chi rilbal ut nak que'suk'i que'xye re: —Cuan ob li caxlan cua ut cuib li car, chanqueb. ³⁹ Li Jesús quixtaklaheb lix tzolom chixyebal reheb li tenamit nak te'c'ojlak sa' li pach'aya' chi junjünk ch'utal. ⁴⁰ Ut que'c'ojla chi junjünk ch'utal. Cuan que'c'ojla chi jun ciento sa' jünk ch'utal ut cuan cui'chic que'c'ojla chi mero ciento sa' li junjünk ch'utal. ⁴¹ Tojo'nak li Jesús quixchap li ob chi caxlan cua ut li cuib chi car ut qui-iloc sa' choxa. Quixbantioxi chiru li Dios. Ut quixjachi li caxlan cua ut quixq'ue reheb lix tzolom re nak te'xjeq'ui reheb li q'uila tenamit. Ut que'xjeq'ui ajcui' li car. ⁴² Que'cua'ac chixjunileb toj retal que'c'ojla xch'ol. ⁴³ Ut qui-ela'an li caxlan cua. Jo'can ajcui' li car. Cablaju chacach li qui-ela'an. ⁴⁴ Nabal chi tenamit que'cua'ac. Sa' xyank eb li que'cua'ac cuanqueb ob mil junes cuïnk.

Li Jesús quibec chiru li palau

⁴⁵ Ut chirix chic a'an, li Jesús quixtaklaheb lix tzolom sa' li jucub ut quixye reheb: —Xben cua texxic jun pac'al li palau sa' li tenamit Betsaida. Lain toj tincanäk chixchak'rabinquileb li tenamit, chan reheb. ⁴⁶ Ut nak ac

xchak'rabiheb li tenamit, li Jesús cō chiru tzul chi tijoc. ⁴⁷ Te'cuulak lix tzolom sa' xyi li palau nak qui-oc li k'o'jyīn, a'ut li Jesús toj cuan xjunes chire li palau. ⁴⁸ Quiril nak lix tzolom cuanqueb sa' jun ch'a'ajquilal sa' li jucub. Yoqueb chixtacuasinquil ribeb chixberesinquil li jucub xban nak sa' xbe ik' yoqueb chixc'ambal. Sakeuc re nak quicuulac li Jesús bar cuanqueb cui' ut yo chi bec chiru ha'. Quixbanu jo' li t̄j̄c̄ tanumek'. ⁴⁹ Nak que'ril lix tzolom nak cuan jun yo chi bec chiru ha', que'xucuac ut que'xjap re. Que'xc'oxla nak anum yoqueb chirilbal. ⁵⁰ Chixjunileb que'iloc re ut c'ajo' nak que'xucuac. Li Jesús ticto quiratīnaheb ut quixye reheb: —Mexxcuac. Lajin li yoquex chicuilbal. Cacubresihomak ech'ol, chan reheb. ⁵¹ Nak qui-oc sa' li jucub sa' xyankeb, ch'anamil li ik'. Inc'a' chic qui-ec'an. Ut eb lix tzolom quilaje'sach xch'ol chirilbal. ⁵² Que'sach xch'ol xban nak toj maji' neque'xtau xyalal chirix li milagro quixbanu li Jesús riq'uin li caxlan cua. K'axal cauheb xch'ol. Jo'can nak inc'a' que'xtau ru.

Li Jesús quixq'uirtesiheb li yaj aran Genesaret

⁵³ Nak que'cuulac li Jesús rochbened lix tzolom jun pac'al li palau, coxe'elk sa' li tenamit Genesaret. Que'xbac' li jucub chire li ha'. ⁵⁴ Nak yoqueb chi elc sa' li jucub, eb li cuanqueb aran ticto que'xnau nak a'an li Jesús. ⁵⁵ Jo'can nak sa' junpat que'coeb sa' chixjunil li na'ajej chixc'ambaleb chak lix yaj chiruheb lix cuarib. Nak que'xnau bar cuan li Jesús, quilaje'xc'am li yaj riq'uin. ⁵⁶ Yalak bar quinume' li Jesús quilaje'xc'am li yaj riq'uin, jo' sa' tenamit, jo' sa' c'alebāl. Que'xq'ueheb li yaj sa' li be bar cui' yo chi numec' li Jesús. Que'xtz'ama chiru: —Banu usilal, q'ue chikach'e' la cauk', chanqueb re xban nak neque'xnau nak usta ca'aj cui' re li rak' te'xch'e', te'q'uirak. Ut chixjunileb li que'ch'e'oc re li rak', que'q'uira.

7

Li c'a'ru na-el chak sa' li kach'ol, a'an li nocomacōb cui'

¹ Eb laj fariseo que'cuulac riq'uin li Jesús rochbened cuib oxib laj tz'ib li que'chal chak aran Jerusalén. ² Ut eb a'an que'xq'ue retal nak cuan lix tzolom li Jesús que'cua'ac chi inc'a' que'xch'aj li ruk'eb chi tz'akal jo' c'aynaheb chixbanunquīl laj fariseo. ³ Eb laj fariseo ut chixjunileb laj judío inc'a' neque'cua'ac cui inc'a' te'xch'aj li ruk'eb jo' naxye li chak'rab li canabanbil reheb xbaneb lix xe'tonil yucua'. ⁴ Ut nak neque'suk'i chak sa' c'ayil inc'a' neque'cua'ac cui inc'a' neque'ch'ajoc jo' naxye lix chak'rabeb. Ut cuan cui'chic nabal li na'leb li neque'xbanu jo' canabanbil reheb xbaneb li xe'tonil yucua', jo' li xch'ajbal lix sec', lix xar, li uc'al ch'ich' ut lix ch'at. ⁵ Eb laj fariseo ut eb laj tz'ib que'xpatz' re li Jesús: —¿C'a'ut nak eb la tzolom inc'a' neque'xbanu li kachak'rabinquīl canabanbil ke xbaneb li kaxe' katōn? Eb a'an neque'cua'ac chi inc'a' neque'xch'aj li ruk'eb jo' naxye li kachak'rabinquīl, chanqueb. ⁶ Nak quichak'oc li Jesús quixye reheb: —Yal ajcui' li quixye laj Isaías cherix laex aj ca'pac'al u nak quixye chi jo'ca'in: Li tenamit a'in niquine'x-oxlok'i ca'aj cui' riq'uin xtz'umaleb re. Moco neque'xbanu ta chi anchal xch'oleb.

⁷ Mac'a' aj e nak niguine'xlok'oni xban nak li tijleb li neque'xc'ut a'an yal xchak'rab eb li cuīnk. (Is. 29:13)

⁸ Laex nequetz'ektana lix chak'rab li Dios, ut a' chic le najter na'leb nequebanu, jo' riq'uin xch'ajbal li sec' ut li xar ut li c'a'ak ru chi chak'rabil reheb li cuīnk.—⁹ Li Jesús quixye ajcui' reheb: —Laex nequetz'ektana lix chak'rab li Dios re nak tebanu li najter na'leb canabanbil ere xbaneb le

xe'tonil yucua'. ¹⁰ Laj Moisés quixye, “Cha-oxlok'i lā na' lā yucua' ut ani tixhob xna' xyucua', taçamsik.” ¹¹ A'ut læx nequeye cui cuan junak li cujnk inc'a' naraj xtenk'anquil lix na' xyucua', a'an naru tixye, “Corbán”, chirix li c'a'ak re ru tixtenk'a cui' raj lix na' xyucua'. Li atin a'an naraj naxye “yechi'inbil re li Dios”. ¹² Riq'uin xbanunquil a'an li cujnk inc'a' chic naru tixtenk'a lix na' xyucua', chanquex. ¹³ Ut cuan nabal chic c'a'ak re ru chi na'lebil nalaješanu. Riq'uin xbanunquil li najter na'leb canabanbil ere, yoquex chixtz'ektanunquil lix chak'rab li Dios, chan li Jesús reheb. ¹⁴ Ut li Jesús quixbokeb li tenamit ut quixye reheb: —Abihomak chejunilex li c'a'ru tixe ut q'uehomak retal re nak tetau xyalal. ¹⁵ Maçua' li c'a'ru naxtzaca li cujnk namaço' cui'; aban li c'a'ru inc'a' us naxc'oxla, a'an namaço' cui'. ¹⁶ Li ani naraj rabinquil, chixq'uehak retal li ninye.— ¹⁷ Nak li Jesús qui-el sa' xyankeb li q'uila tenamit, qui-oc sa' cab. Ut eb lix tzolom que'xpatz' re: —¿C'a'ru xyalal li atin xaye?— ¹⁸ Ut li Jesús quixye reheb: —¿Ma inc'a' ajcui' xetau ru læx li xinye? ¿Ma inc'a' nequenau nak maçua' li c'a'ru naxtzaca junak namaço' cui'? ¹⁹ Li c'a'ru naxtzaca junak, a'an moco sa' ram ta naxic. Tic sa' xsa' naxic ut chirix a'an naxtz'ek cui'chic, chan. Jo'can nak quixye nak chixjunil li natzacaman moco maç ta xtzacanquil. ²⁰ Ut quixye ajcui' li Jesús reheb: —Li inc'a' us naxc'oxla sa' xch'ol, a'an namaçob cui'. ²¹ Sa' xc'a'ux junak nachal chak li maus aj na'leb, li muxuc caxar, li co'betac yumbetac, ut li xcamsinhal ras ritz'in. ²² Ut sa' xc'a'ux ajcui' nachal li elk'ac, lix rahinquil ru c'a'ru re ras ritz'in, li mausilal, li balak'inc, li xbanunquil li xutanalil na'leb, li cakal'inc, li majecuanc, li k'etk'etil, ut lix majelil na'leb. ²³ Chixjunil li maus aj na'leb a'in sa' xc'a'ux junak nachal chak ut a'an namaçob cui' li junjnk.—

Li ixk aj Sirofenicia quipqban

²⁴ Li Jesús ço sa' jalan na'ajej xcuent Tiro ut xcuent Sidón. Cox-oc sa' jun li cab. Inc'a' raj quiraj quinauhe' nak cuan aran. Abanan inc'a' quiru quixmuk rib. ²⁵ Sa' junpat qui-abjc resil xban jun li ixk nak cuan aran. Li ixk a'an cuan jun lix co' cuan maus aj musik'ej riq'uin. Co riq'uin li Jesús ut quixcuik'ib rib chiru. ²⁶ Li ixk a'an maçua' aj judío, a'an aj Sirofenicia. Quixtz'ama chiru li Jesús nak tarisi li maus aj musik'ej riq'uin lix co'. ²⁷ Ut li Jesús quixye re: —Cua'akeb cuan junxil li coc'al. Inc'a' us xmak'bal xcuaheb li coc'al ut xq'uebal reheb li tz'i', chan. ²⁸ Ut li ixk quichak'oc ut quixye re: —Yal li nacaye, Kaçua', abanan eb li tz'i' neque'xxoc xc'aj xcua li coc'al rubel li mex nak yoqueb chi cua'ac, chan. ²⁹ Li Jesús quixye re li ixk: —Us li xaye. Ayu sa' lā cuochoch. Ac x-el li maus aj musik'ej riq'uin lā co', chan. ³⁰ Co li ixk sa' li rochoch ut coxtau lix co' chi yocyo chiru lix ch'at. Maç'a' chic li maus aj musik'ej riq'uin.

Li Jesús quixq'uirtesi jun li cujnk tz'ap xic ut tat re

³¹ Nak qui-el li Jesús rochbened lix tzolom sa' li na'ajej xcuent Tiro, que'nume' sa' li tenamit Sidón. Ut que'nume' ajcui' sa' li na'ajej xcuent Decápolis, ut que'cuulac cuan cui' li palau Galilea. ³² Ut quic'ame' chak jun li cujnk riq'uin li Jesús tz'ap xic ut tat re. Que'xtz'ama chiru nak tixq'ue li ruk' sa' xben. ³³ Li Jesús quirisi li cujnk sa' xyankeb li tenamit ut quixc'am xjunes. Quixch'ic li ru'uj ruk' sa' xxic li cujnk. Quixt'akresi li ru'uj ruk' riq'uin li xya'al re ut quixche' li ru'uj rak' li cujnk. ³⁴ Qui-iloc sa' choxa, quixjik' xch'ol ut quixye: —Efata.— Sa' li ratinobal naraj naxye, “Chitelik lā xic ut chat-abjnk.” ³⁵ Sa' junpat quiteli lix xic ut na-abin chic ut sa chic naçatinac. ³⁶ Ut li Jesús quixye reheb li q'uila tenamit: —Ma ani aj e teserak'i li c'a'ru yoquin chixbanunquil, chan. Quixk'useb chi us. Abanan eb a'an k'axal cui'chic nak

que'oc chixserak'inquil. ³⁷ C'ajo' nak que'sach xch'oleb chirilbal ut que'xye: —Chabil chixjunil li naxbanu. Naxq'ue chi abinc li tz'ap xic ut naxq'ue chi atinac li mem, chanqueb.

8

Li Jesús quixq'ueheb chi cua'ac li cahib mil

¹ Sa' jun chic li cutan que'xch'utub rib nabal li tenamit riq'uin li Jesús. Xban nak mac'a' xcuahab quixbokeb lix tzolom ut quixye reheb: ² —Tok'obeb ru li q'uila tenamit a'in. Ac cuan oxib cutan roquiqueb arin cuiq'uin ut mac'a' chic xcuahab. ³ Cui tebintakla sa' rochocheb chi inc'a' te'cua'ak, naru neque'lub sa' be xban nak cuan najt xe'chal chak.— ⁴ Lix tzolom que'xye re: —¿Bar takataua cua sa' li na'ajej a'in re takaq'ueheb chi cua'ac? Arin mac'a' cuan, chanqueb. ⁵ Ut li Jesús quixpatz' reheb: —¿Jarub li caxlan cua cuan eriq'uin? chan. —Cuukub ajcui', chanqueb. ⁶ Tojo' nak quixye reheb li tenamit nak te'chunlak chiru ch'och'. Quixchap li cuukub chi caxlan cua. Quixbantioxi chiru li Dios ut quixjachi. Ut quixq'ue reheb lix tzolom re nak te'xjeq'ui reheb li tenamit. ⁷ Ut cuan cuib oxib li coc' car riq'uineb. Nak quirosobtesi quixye reheb nak te'xjeq'ui ajcui' reheb li tenamit. ⁸ Que'cua'ac chi us ut que'ojla xch'ol. Ut cuukub chacach chic li qui-ela'an. ⁹ Cuanqueb na cahibak mil li que'cua'ac ut nak ac xe'cua'ac, que'chak'rabic xban li Jesús. ¹⁰ Ut sa' junpat qui-oc li Jesús sa' li jucub rochbeneb lix tzolom ut que'coeb sa' li na'ajej xcuent Dalmanuta.

Eb laj fariseo que'raj rilbal li milagro

¹¹ Que'cuulac laj fariseo riq'uin li Jesús. Que'oc chixcuech'inquil yal re xyalbal. Que'xye re nak tixbanu junak milagro chiruheb re rilbal ma yal na nak riq'uin li Dios nachal lix cuanquil. ¹² Quixjik' xch'ol li Jesús xban nak quititz' xbaneb, ut quixye: —Ca'aj cui' milagro yoqueb chixpatz'bal eb li tenamit a'in. Relic chi yal tinye ere nak ma jun milagro tinbanu chiruheb.— ¹³ Qui-el riq'uineb laj fariseo. Qui-oc sa' li jucub rochbeneb lix tzolom. Yoqueb chi xic jun pac'al li palau.

Li Jesús quixjuntak'eta lix tijleb eb laj fariseo riq'uin lix ch'amal li caxlan cua

¹⁴ Ut quisach sa' xch'oleb xc'ambal xcuahab. Ac cuanqueb sa' li jucub nak que'xq'ue retal nak jun ajcui' li caxlan cua cuan riq'uineb. ¹⁵ Li Jesús quixye reheb: —Chebanu cuent. Micuan xch'amal xcaxlan cuaheb laj fariseo eriq'uin chi moco xch'amal xcaxlan cua laj Herodes.— ¹⁶ Eb lix tzolom que'oc chi atinac chi ribileb rib ut que'xye: —¿C'a'ru xyalal a'in? ¿Ma xban nak mac'a' li caxlan cua kic'uin nak xye ke chi jo'can? chanqueb. ¹⁷ Li Jesús quixnau c'a'ru yoqueb chixyebal chi ribileb rib ut quixye reheb: —¿C'a'ut nak yoquex chixyebal nak mac'a' ecua? ¿Ma inc'a' nequetau ru nak macua' chirix xch'amal li caxlan cua yoquin chi atinac? Chirix ban xtijlebeb laj fariseo yoquin chi atinac. Laex c'ajo' xcacuil ech'ol. ¹⁸ Inc'a' nequetau xyalal. Cuan xnak' eru ut inc'a' nequex-iloc. Cuan exic ut inc'a' nequex-abin. ¹⁹ ¿Ma inc'a' najultico' ere nak xinjachi li qb chi caxlan cua reheb li qb mil chi cuink? Ut ¿jarub chacach qui-ela'an? chan reheb. —Cablaju, chanqueb. ²⁰ —¿Ma inc'a' najultico' ere nak xinjachi li cuukub chi caxlan cua reheb li cahib mil. Ut jarub chacach qui-ela'an? chan reheb. —Cuukub chacach, chanqueb. ²¹ Ut li Jesús quixye reheb: —¿Ma toj maji' ajcui' nequetau xyalal chi jo'canan?—

Li Jesús quixq'uirtesi li mutz' aran Betsaida

²² Que'cuulac li Jesús rochbeneb lix tzolom aran Betsaida. Quic'ame' chak jun li cujnk riq'uin. Mutz' ru li cujnk. Que'xtz'ama chiru nak tixq'ue li ruk' sa' xben re nak tailok. ²³ Li Jesús quixchap li ruk' li mutz' ut quixc'am chire li tenamit. Ut quixchuba sa' xnak' ru li mutz'. Quixq'ue li ruk' sa' xben ut quixpatz' re: —¿Ma nacat-iloc bayak anakuan? chan re. ²⁴ Li mutz' quiloc ut quixye: —Nin-iloc ca'ch'in. Nacuileb li cujnk chanchaneb li che' nak yoqueb chi bec.— ²⁵ Tojo'nak li Jesús quixq'ue cui'chic li ruk' sa' li xnak' ru li mutz' ut quiq'uirra li ru. Nak qui-iloc li cujnk, tz'akal chic naril chixjunil. ²⁶ Li Jesús quixtakla li cujnk sa' rochoch ut quixye re: —Matxic sa' li tenamit ut ma ani aj e taye nak xating'uirtesi, chan re.

Laj Pedro quixye nak li Jesús, a'an li Cristo

²⁷ Chirix a'an co li Jesús rochbeneb lix tzolom sa' li coc' tenamit xcuent Cesarea Filipino. Nak yoqueb chi xic, quixpatz' reheb lix tzolom: —¿Anihin lain nak neque'xye li tenamit? chan. ²⁸ Que'xye re: —Cuan neque'yehoc re nak laät laj Juan laj Cubsihom Ha' xcuacli cui'chic chi yo'yo. Ut cuan neque'yehoc re nak laät li profeta Elias, li quicuan najter. Ut cuan cui'chic neque'yehoc re nak laät jun chic li profeta, chanqueb. ²⁹ —Ut laex ¿anihin lain nak nequeye? chan cui'chic reheb. Ut laj Pedro quixye: —Laat li Cristo.— ³⁰ Li Jesús quixye reheb nak ma ani aj e te'xye nak a'an li Cristo.

Li Jesús quixye resil li xamic

³¹ Li Jesús quixch'olob xyalal chiruheb nak a'an li Alalbej ut nak nabal li raylal chalç re sa' xben. Quixye reheb nak tatz'ektanak xbaneb li xakabanbaleb chi c'anjelac sa' li templo. Tatz'ektanak ajcui' xbaneb li xbenil aj tij. Jo' ajcui' xbaneb laj tz'ib ut quixye ajcui' reheb nak taçamsjik ut taçuaclik cui'chic chi yo'yo sa' rox li cutan. ³² Quixye chi tz'akal li c'a'ru tixc'ul. Nak quirabi a'an laj Pedro quirisi xjunes li Jesús ut qui-oc chixk'usbal ut quixye re: —Maye chi jo'can Kacua'.— ³³ Ut li Jesús quixsuk'isi rib. Quirileb lix tzolom ut quixk'us laj Pedro. Quixye re: —Elen arin sa' xnak' cuu. Laät chanchanat aj Tza. Laät inc'a' yocat chixc'oxlanquil jo' naxc'oxla li Dios. Laät yocat chixc'oxlanquil jo' naxc'oxla li cujnk, chan. ³⁴ Tojo'nak quixbokeb li q'uila tenamit rochbeneb lix tzolom ut quixye reheb: —Li ani taraj inpabanquil, tento nak tixtz'ektana li c'a'ru naxrahi ru lix ch'ol. Tixcuy xnumsinquil li raylal li tixc'ul usta taçamsjik sa' inc'aba'. Ut chinixtakehak. ³⁵ Li ani tatz'ektanak cue re xcolbal lix yu'am arin sa' ruchich'och', tixtz'ek li junelic yu'am. A'ut li naxsach lix yu'am sa' inc'aba' lain malaj ut sa' xc'aba' li evangelio, a'an tarechani li junelic yu'am. ³⁶ ¿C'a'ru tixra junak cujnk nak tarechani chixjunil lix biomal li ruchich'och' ut tixtz'ektana li junelic yu'am xban li biomal? ³⁷ ¿Ma cuan ta bi' li c'a'ru tixtoj cui' li yu'am chi junelic? ³⁸ Li ani taxutanak chiruheb li tenamit aj mac inban lain malaj ut xban li cuatin, lain li Alalbej tinxutanak ajcui' xbaneb nak tinchalk chak riq'uin xnimall xlok'al lin Yucua' cuochbeneb li santil ángel.—

9

¹ Ut li Jesús quixye: —Relic chi yal tinya ere nak cuanqueb nak sa' eyank li inc'a' te'camk toj te'ril lix nimajcual cuanquilal li Dios nak taçalk riq'uin lix xcuanquil.—

Qui-ile' lix lok'al li Jesús nak quijalano' li rilobal

² Cuakib cutan chic xyebal a'an xban li Jesús nak quixc'ameb laj Pedro, laj Jacobo, ut laj Juan sa' xben jun li nimla tzul. Nak cuanqueb aran xjuneseb, quijalano' li rilobal li Jesús chiruheb. ³ Ut li rak' quijalano' rilbal. Nalemtz'un

chic li rak'. Saksakpotz'in nac'utun, chanchan li ratz'am que. Ma jun aj puch'unel arin sa' ruchich'och' tixsakobresi junak t'icr jo' nak quisakobresic li rak' li Jesús. ⁴ Ac xakamil laj Elías ut laj Moisés chiruheb nak que'ril. Ut yoqueb chi atinac riq'uin li Jesús. ⁵ Laj Pedro quixye: —Kacua', c'ajo' xchak'al ru nak cuanco arin. Xkayib ta oxibak muheb'al arin. Jun açue, jun re laj Moisés, ut jun re laj Elías.— ⁶ Quixye chi jo'can xban nak inc'a' chic naxna c'a'ru tixye xban nak c'ajo' lix xiuheb. ⁷ Ut quichal jun nimla chok sa' xbeneb. Li Dios quiat'inac chak sa' li chok, ut quixye: —A'in li cualal, raro inban. Cherabi li c'a'ru tixye.— ⁸ Ut nak quiril ac ma aniheb chic laj Elías ut laj Moisés. Ca'aj chic li Jesús quicana xjunes. ⁹ Nak yoqueb chak chi cubec sa' li tzul quixye li Jesús reheb nak ma ani aj e te'xye li c'a'ru que'ril toj taquaclik cui'chic li Alalbej chi yo'yo sa' xyankeb li camenak. ¹⁰ Eb a'an ma ani aj e que'xye, ca'aj cui' chi ribileb rib que'atinac. Que'xye: —¿C'a'ru xyalal a'an nak li Jesús quixye nak taquaclik cui'chic chi yo'yo sa' xyankeb li camenak?— ¹¹ Que'xpatz' re li Jesús: —¿C'a'ut nak neque'xye laj tz'ib nak xben cua tachalk laj Elías tojo'nak tol-elk li Cristo? chanqueb. ¹² Ut nak quichak'oc li Jesús quixye reheb: —Yal ajcui' tz'ibanbil retalil nak laj Elías xben cua tachalk chixc'ubanquil chixjunil li c'a'ak re ru. Ut tz'ibanbil ajcui' sa' li Santil Hu chicuix lain li Alalbej nak nabal li raylal tinc'ul ut tine'xtz'ektana. ¹³ Abanan tnye ere nak laj Elías ac xc'ulun ut c'ajo' li raylal que'xbanu re jo' tz'ibanbil sa' li Santil Hu chanru tac'ulmank.—

Li Jesús quirisi li maus aj musik'ej riq'uin li al

¹⁴ Nak coxe'elk cuanqueb cui' li beleb chic lix tzolom li Jesús, que'ril nak cuan nabal li tenamit riq'uin. Ut eb laj tz'ib yoqueb chixc'uech'inquil lix tzolom li Jesús. ¹⁵ Ut eb li q'uila tenamit que'sach xch'ol chirilbal li Jesús, ut que'coeb sa' anil chixc'ulbal ut que'xq'ue xsahil xch'ol. ¹⁶ Li Jesús quixpatz' reheb: —¿C'a'ru nequec'uech'i cui' erib? chan. ¹⁷ Quichak'oc jun sa' xyankeb li q'uila tenamit ut quixye re: —At Kacua', xinc'am chak jun li cualal arin. Mem ut cuan maus aj musik'ej riq'uin. ¹⁸ Yalak bar nacute' sa' ch'och' xban li maus aj musik'ej. Na-el coxk sa' re ut naxc'uxuxi li ruch re ut naxchec' rib. Xintz'ama chiruheb la tzolom nak te'risi li maus aj musik'ej; abanan inc'a' xe'ru chirisinquit.— ¹⁹ Nak li Jesús quichak'oc, quixye reheb: —Tic inc'a' nequexpaban. ¿Jo' najtil chic tincuan'k eriq'uin re nak texpabank? ¿Jo' najtil chic texincuy nak nequec'oxla? C'am chak li al arin cui'uin, chan li Jesús. ²⁰ Que'xc'am li al riq'uin ut li maus aj musik'ej nak quiril li Jesús quixch'ikle li al, quixcut sa' ch'och' ut quixtolc'osi ut qui-oc chi elc coxk sa' re. ²¹ Ut li Jesús quixpatz' re lix yucua': —¿Jok'e xticia lix yajel li al a'in? chan. —Toj ca'ch'in nak quixtiquib xc'ulbal chi jo'ca'in, chan lix yucua'. ²² —Nabal sut nacute' sa' xam. Nabal sut nacute' sa' ha' xban li maus aj musik'ej re xcamsinquit. Cui cuan c'a'ru naru tabanu re, banu usilal, il xtok'oba ku ut choatenk'a, chan. ²³ Li Jesús quixye: —¿C'a'ut nak nacaye "cui naru"? ¿Ma inc'a' nacanau nak cui nacatpaban chixjunil naru xbanunquit? chan. ²⁴ Sa' junpat quiat'inac lix yucua' li al ut quixye chi cau, —Lain ninpab. Chinatenk'a re nak tinpab chi tz'akal.— ²⁵ Nak li Jesús quiril nak sa' junpat yoqueb chi ch'utlac nabal li tenamit, quixch'ila li maus aj musik'ej. Quixye re: —At maus aj musik'ej, laät nacatmemobresin. Laät nacatt'apoc xic. Lain tnye açue, elen riq'uin li al a'in ut mat-oc chic riq'uin, chan. ²⁶ Ut li maus aj musik'ej quixjap re ut quixch'ikle chi cau li al. Tojo'nak qui-el riq'uin. Ut li al chanchan camenak quicana. Nabal li tenamit que'yehoc re nak xcam. ²⁷ Ut li Jesús quixchap chi ruk' li al ut quixcuaclesi ut li al quixakli. ²⁸ Nak qui-oc li Jesús sa' cab xjunes

rochbened lix tzolom, que'xpatz' re: —¿C'a'ut nak inc'a' xoru laõ chirisinguil li maus aj musik'ej? chanqueb. ²⁹ Ut li Jesús quixye reheb: —Ca'aj cui' riq'uin ayun ut riq'uin tijoc naru risinquit li maus aj musik'ej a'in.—

Li Jesús quixye cui'chic resil lix camic

³⁰ Ut nak que'el aran, que'nume' sa' li na'ajej Galilea. Ut li Jesús inc'a' quiraj nak te'xnau nak cuan aran. ³¹ Yo chixch'olobanquit xyalal chiruheb lix tzolom. Quixye reheb: —Lain li Alalbej, tine'xk'axtesi sa' ruk'eb li cujnk li te'camsjnk cue. Ut nak ac xine'xcamsi, tincuacljnk cui'chic chi yo'yo sa' xyankeb li camenak sa' rox li cutan.— ³² Aban eb a'an inc'a' que'xtau ru li c'a'ru quixye reheb, ut que'xucuac chixpatz'bal c'a'ru xyalal li quixye.

Li nim xcuanquil, a'an li nac'anjelac chiruheb li ras rijtz'in

³³ Que'cuulac sa' li tenamit Capernaum. Nak cuanqueb sa' cab quixpatz' reheb lix tzolom: —¿C'a'ru li yoquex chixcuech'inquit rix nak yoco chi chalç? chan. ³⁴ Mem que'cana ut inc'a' chic que'chak'oc xban nak yoqueb chixcuech'inquit rix ani reheb li nim xcuanquil. ³⁵ Li Jesús quic'ojla ut quixboke li cablaju chi xtzolom riq'uin ut quixye reheb: —Li ani taraj nak taq'uehek' xcuanquil, chixcubsihak rib ut chic'anjelac chiruheb chixjunileb.— ³⁶ Quixchap chi ruk' jun li ch'ina al ut quixq'ue sa' xyiheb. Quixk'alu ut quixye reheb: ³⁷ —Li ani naxq'ue xlok'al li toj k'un xch'ol jo' li ch'ina al a'in sa' inc'aba' lain, naxq'ue ajcui' inlok'al lain. Ut macua' ca'aj cui' lain naxq'ue inlok'al. Naxq'ue aj ban cui' xlok'al li Dios li quitaklaj chak cue.—

Li ani inc'a' xic' na-iloc ke, a'an na-oquen chikix

³⁸ Laj Juan quixye re li Jesús: —At Kacua', jun cujnk xkil chak le'. Yo chi isjnc maus aj musik'ej sa' ac'aba'. Ut laõ xkaye re nak inc'a' tixbanu a'an xban nak moco kacomon ta.— ³⁹ Ut li Jesús quixye reheb: —Mek'us xban nak ma ani tabanunk junak milagro sa' inc'aba' lain ut mokon taoc ta chintz'ektanankuil. ⁴⁰ Li ani inc'a' xic' na-iloc ke, a'an na-oquen chikix. ⁴¹ Li ani taq'uehok jun sec'ak ha' ere sa' inc'aba' lain xban nak laex cualal inc'ajol, relic chi yal tnye ere nak tixc'ul lix k'ajcamunkuil.—

Xiu xiu li t'anec' sa' li mac

⁴² Li ani tapo'ok xch'oleb li toj k'uneb xch'ol, us raj xcutbal sa' li palau chi bac'bo junak nimla pec chi xcux. ⁴³ Cui la cuuk' taq'uehok acue chi macobc, us raj cui tayoc'. Mas us nak cuank la yu'am chi junelic riq'uin jun ajcui' la cuuk' chiru nak tatxix riq'uin cuib la cuuk' sa' li xbalba, bar cui' inc'a' tachupk li xam. ⁴⁴ Aran inc'a' te'camk li motzo' chi moco li xam tachupk. ⁴⁵ Cui la cuok taq'uehok acue chi macobc, us raj cui tayoc'. Mas us nak cuank la yu'am chi junelic riq'uin jun la cuok chiru nak tatxix riq'uin cuib la cuok sa' li xbalba, bar cui' inc'a' tachupk li xam. ⁴⁶ Aran inc'a' te'camk li motzo' chi moco li xam tachupk. ⁴⁷ Cui li xnak' acuu taq'uehok acue chi macobc, us raj cui tacuisi. Mas us nak tat-oc sa' xnimajcual cuanquial li Dios riq'uin jun li xnak' acuu chiru nak tatxix sa' li xbalba riq'uin cuib xnak' acuu. ⁴⁸ Aran inc'a' te'camk li motzo' chi moco li xam tachupk. ⁴⁹ Jo' nak naq'ueman li atz'am chiru li tib re nak inc'a' nachuho', jo'can ajcui' nak nayale' rix li kapaba. Chanchan riq'uin xam nayale' rix xban li raylal nakac'ul. ⁵⁰ Chabil li atz'am, abanan cui na-oso' lix qui'al mac'a' chic na-oc cui'. Jo'can ajcui' laex chi cuank eçhabilal ut cuankex sa' usilal chi ribil erib.

¹ Ut qui-el li Jesús Capernaum. Que'coeb sa' jun li na'ajej cuan xcuent Judea ut que'coeb ajcui' toj jun pac'al li nima' Jordán. ² Ut que'cuulac laj fariseo riq'uin chi patz'oc yal re xyalbal rix ut que'xye re: —¿C'a'ru nacaye laat? ¿Ma taruk tixjach rib junak cujnk riq'uin li rixakil? chanqueb re. ³ Ut nak quichak'oc li Jesús, quixye reheb: —¿C'a'ru le chak'rabinquil quixcanab ere laj Moisés?— ⁴ Eb a'an que'xye: —Laj Moisés quixye nak junak li cujnk taruk tixyib lix hu re jachoc ib ut riq'uin a'an naru tixjach rib riq'uin li rixakil.— ⁵ Li Jesús quichak'oc ut quixye: —Xban nak k'axal cau ech'ol, jo'can nak quixq'ue li chak'rab chi jo'can. ⁶ Abanan maçua' jo'can sa' xticlajic li ruchich'och'. Nak quixyib li ruchich'och' li Dios, quixyo'obtesi li cujnk ut quixyo'obtesi li ixk. ⁷ Jo'can nak li cujnk tixcanab xna' xyucua' ut tixlak'ab rib riq'uin li rixakil. ⁸ Li ani te'xlak'ab rib junajeb chic. Moco cuibeb ta chic. ⁹ Li ani naxlak'ab li Dios, ma ani chic naru najachoc re, chan li Jesús. ¹⁰ Ut nak ac cuanqueb sa' cab, lix tzolom li Jesús que'xpatz' cui'chic re chirix li na'leb a'in. ¹¹ Ut li Jesús quixye reheb: —Li ani tixjach rib riq'uin li rixakil ut tixc'am jalan chic ixk, a'an tixmux ru lix sumlajic. ¹² Ut cui junak ixk tixjach rib riq'uin lix belom, ut taç'amek' xban jalan chic cujnk, a'an tixmux ru lix sumlajic.—

Li Jesús quirosobtesiheb li coc'al

¹³ Sa' jun li cutan cuan li coc'al que'c'ame' chak riq'uin li Jesús re nak tixq'ue li ruk' sa' xbëneb ut tarosobtesiheb. Ut lix tzolom que'xk'us li que'camoc chak reheb li coc'al. ¹⁴ Nak li Jesús quixq'ue retal li yoq'ueb chixbanunquil, c'ajo' nak quipo' ut quixye reheb lix tzolom: —Canabomakeb li coc'al chi chalc cuiq'uin. Mëram chiruheb xban nak lix nimajcual cuanquial li Dios, a'an reheb li neque'paban jo' nak neque'paban li coc'al. ¹⁵ Relic chi yal tinye ere li ani inc'a' napaban jo' li coc'al, a'an inc'a' tarechani lix nimajcual cuanquial li Dios, chan. ¹⁶ Ut li Jesús quixk'aluheb li coc'al, quixq'ue li ruk' sa' xbëneb, ut quirosobtesiheb.

Jun li cujnk biom quiqtinac riq'uin li Jesús

¹⁷ Nak ac xic re li Jesús sa' jalan chic na'ajej, quichal jun li cujnk sa' anil, colxkuik'ib rib chiru ut quixye re: —At chàbil tzolonel, ¿c'a'ru taruk tinbanu re nak tincuechani li yu'am chi junelic?— ¹⁸ Li Jesús quixye: —¿C'a'ut nak nacaye chàbil cue cui inc'a' nacanau anihin lain? Jun ajcui' li chàbil ut a'an li Dios. ¹⁹ Laat nacanau c'a'ru naxye li chak'rab: Matmuxuc caxar. Maçamsi açuas açuizt'in. Mat-elk'ac. Matyo'oban atin chirix açuas açuizt'in. Matbalak'ic. Cha-oxlok'i la na' ayucua'.— ²⁰ Nak quichak'oc li cujnk quixye: —At tzolonel, chixjunil a'in ac xinbanu ajcui' chak chalen sa' inca'ch'inal.— ²¹ Li Jesús c'ajo' nak quixra li cujnk. Quixca'ya ut quixye re: —Jun chic toj maji' nacabanu. Ayu, c'ayi chixjunil li c'a'ru cuan açue ut tasi lix tz'ak reheb li neba' re nak taçuank abiomal sa' choxa. Nak ac xabanu a'an, tatchalk cuiq'uin ut tinaçake usta camc taç'ul sa' inc'aba', chan. ²² Nak quirabi a'an, li cujnk ço chi ra sa' xch'ol xban nak nabal lix biomal cuan. ²³ Li Jesús quirileb lix tzolom ut quixye reheb: —C'ajo' xch'a'ajquil chok' re junak biom rechaninquil lix nimajcual cuanquial li Dios.— ²⁴ Lix tzolom que'sach xch'oleb nak que'rabi a'an. Aban li Jesús quixye cui'chic reheb: —Ex cualal inc'ajol, c'ajo' xch'a'ajquil nak te'oc sa' xnimajcual cuanquial li Dios li neque'xic xch'ol chirix lix biomal. ²⁵ Mamin taruk tanumek' junak nimla xul camello sa' ru junak çux. Jo'can ajcui' eb li biom. Ma jok'e taruk te'oc sa' xnimajcual cuanquial li Dios cui c'aj cui' lix biomal neque'xc'oxla.— ²⁶ Eb lix tzolom c'ajo' nak que'sach xch'oleb ut que'xye: —¿Ani put taruk taçolek' chi jo'canan?— ²⁷ Li Jesús quirileb ut quixye reheb: —Li cujnk inc'a' naru

tixbanu a'an, aban li Dios mac'a' ch'a'aj chiru. A'an naru tixbanu chixjunil.—
²⁸ Laj Pedro quixye re li Jesús: —Lao xkacanab chixjunil li c'a'ru cuan ke xban atakenquil.—
²⁹ Li Jesús quixye: —Relic chi yal tinya ere, li ani naxcanab c'a'ru re sa' inc'aba' lain, tixc'ul rekaj. Li ani naxcanab xna' xyucua', li ras ut li ritz'in ut li ralar xc'ajol sa' inc'aba' lain malaj ut sa' xc'aba' li evangelio, a'an tixc'ul rekaj. Jo'can ajcui' li naxcanab xch'och' ut li rochoch sa' inc'aba' lain, tixc'ul ajcui' rekaj. ³⁰ A'an tixc'ul o'takc'al (100) chic chok' rekaj li c'a'ru re li tixcanab jo' rochoch, jo' li ras, jo' li ritz'in, jo' li ralar xc'ajol, jo' xna' xyucua' ut jo' lix ch'och'. Usta naxc'ul ra xic' arin sa' ruchich'och', abanan tarechani li junelic yu'am sa' eb li cutan chalel. ³¹ Li cuanqueb xcuauquil anakuan, mac'a'ak chic xcuauquileb mokon. Ut li mac'a'eb xcuauquil anakuan, a'aneb chic li te'cuank xcuauquil mokon,— chan li Jesús.

Li Jesús quixye cui'chic resil lix camic

³² Nak yoqueb chi xic Jerusalén c'amol be li Jesús chiruheb. Nak cuanqueb chiru be sachsoqueb xch'ol lix tzolom ut li yoqueb chi takenc reheb te'xucuae ajcui'. Tojo'nak li Jesús quixc'ameb cui'chic lix cablaju chi tzolom xjuneseb ut qui-oc chixyebal reheb li c'a'ru tixc'ul. ³³ Quixye reheb: —Q'uehohak retal. Anakuan yoco chi xic Jerusalén. Aran tink'axtesik lain li C'ajolbej sa' ruk'eb lix benil aj tij jo' ajcui' sa' ruk'eb laj tz'ib. Eb a'an te'xteneb camc sa' inben ut tine'xk'axtesi sa' ruk'eb li macua'eb aj judío. ³⁴ Ut tine'xhob, tine'xsac', tine'xchuba ut tine'xcamsi. Aban sa' rox li cutan tincuaclik cui'chic chi yo'yo sa' xyank eb li camenak.—

Laj Jacobo ut laj Juan que'xtz'ama chiru li Kacua' nak tixq'ueheb xcuauquil

³⁵ Laj Jacobo ut laj Juan, eb li ralar laj Zebedeo, que'jiloch chixc'atk li Jesús ut que'xye re: —Kacua', lao nakaj nak tibanu li usilal li takatz'ama chacuu.—
³⁶ Ut li Jesús quixye reheb: —¿C'a'ru li usilal teraj tinbanu ere? chan reheb. ³⁷ Que'xye re: —Nak ac xat-oc sa' la lok'al, nakatz'ama chacuu nak jun ke tacuank sa' la nim ut jun tacuank sa' la tz'e.— Que'xye chi jo'can xban nak te'raj oc sa' xcuauquileb. ³⁸ Ut li Jesús quixye reheb: —Laex inc'a' nequenau xyalal li yoquex chixtz'amanquil chicuu. ¿Ma tecuy xc'ulbal li raylal li oc cue chixc'ulbal lain? Ut, ¿ma tecuy xnumsinquil li raylal jo' li tinc'ul lain?— ³⁹ —¡Takacuy! chanqueb. Ut li Jesús quichak'oc ut quixye: —Yal ajcui' nak laex tec'ul li raylal jo' li tinc'ul lain. Ut tecuy xnumsinquil li raylal jo' li tincuy xnumsinquil lain. ⁴⁰ Abanan li na'ajej sa' lin nim ut sa' lin tz'e macua' lain ting'uehok re li na'ajej a'an, xban nak ac ch'olch'o chiru li Dios ani aj e li na'ajej a'an, chan li Jesús reheb. ⁴¹ Ut nak que'rabi li c'a'ru que'xpatz' laj Jacobo ut laj Juan, li lajeb chic lix tzolom que'po' riq'uineb. ⁴² Ut li Jesús quixbokeb riq'uin ut quixye reheb: —Laex nequenau nak li neque'taklan sa' ruchich'och' neque'numta sa' xben li tenamit. Li ninkeb xcuauquil, a'aneb li neque'taklan. ⁴³ Abanan macua' jo'can tibanu laex. Li ani naraj xcuauquil sa' eyank, tento nak tixcubsi rib ut tac'anjelak cheru. ⁴⁴ Li ani naraj nimak xcuauquil sa' eyank, tento tixcubsi rib ut tac'anjelak chiruheb li ras ritz'in. ⁴⁵ Lain li C'ajolbej. Abanan inc'a' xinchal re nak te'c'anjelak chicuu. Xinchal ban re nak tinc'anjelak chiruheb chixjunileb ut chixq'uebal lin yu'am re xtojbal rix lix maqueb, chan li Jesús reheb.

Li Jesús quixq'uirtesi laj Bartimeo li mutz'

⁴⁶ Que'cuulac Jerico ut nak qui-el chak li Jesús sa' li tenamit a'an rochbened lix tzolom nabal li tenamit que'taken re. Ut chunchu jun li mutz' chire be. Yo chi lemoxnac. Lix xc'aba', a'an aj Bartimeo, ralar laj Timeo. ⁴⁷ Nak

quirabi li mutz' nak yō chi chälc li Jesús aj Nazaret, quixjap re chixyebal: —¡At Jesús, ralarat xc'ajol laj David, chacuuxtana taxak cuu! chan. ⁴⁸ Ut nabaleb li tenamit que'k'usuc re ut que'xye re, —¡Matchokin! chanqueb re. Ut a'an k'axal cui'chic cau quixjap re ut quixye, —¡At ralarat xc'ajol laj David, chacuuxtana taxak cuu!— ⁴⁹ Nak quirabi a'an li Jesús quixakli ut quixtakla xbokbal li mutz'. Que'coeb chixc'ambal ut que'xye re: —Mach'ina ach'ol. Quim. Yō chäbokbal li Kacua'.— ⁵⁰ Li mutz' quirisilix t'icr lanlo cui'. Quicuacli sa' junpat ut cō riq'uin li Jesús. ⁵¹ Li Jesús quixye re: —¿C'a'ru tacuaj tinbanu acue?— Ut li mutz' quixye: —Kacua', tincuj nak tällok li xnak' cuu.— ⁵² Li Jesús quixye re: —Anakuan naru tatxic. Xatq'uira xban nak xapab nak cuan incuanquil chaq'uirtesinquit, chan re. Ut sa' junpat qui-iloc li mutz' ut cō chirixeb.

11

Li Jesús quiq'uehe' xcuanquil aran Jerusalén

¹ Que'nach'oc Jerusalén bar cuan cui' li cuib chi tenamit Betfagé ut Betania. Cuanqueb chiru li tzul Olivos nak li Jesús quiatnac riq'uin cuibeb lix tzolom. ² Quixye reheb: —Ayukex sa' li ch'ina tenamit a'an, ut nak texcuulak, tetau jun li ch'ina bur bac'bo. Li ch'ina bur a'an toj mā ani nabec chirix. Tehit chak ut tēc'am chak arin. ³ Ut cui' ani nayehoc ere, “¿C'a'ru yoquex?”, teye reheb nak li Kacua' taajok re li ch'ina bur ut a que ajcui' tixtakla chak hon, cha'kex reheb.— ⁴ Que'coeb ut que'xtau li ch'ina bur bac'bo sa' be chire puerta. Ut que-oc chixhitbal. ⁵ Eb li cuanqueb aran que'xye: —¿C'a'ru yoquex? ¿C'a'ut nak yoquex chixhitbal li ch'ina bur?— ⁶ Eb lix tzolom que'xye reheb li c'a'ru quixye li Jesús, ut eb a'an que'canabac re nak te'xc'am li ch'ina bur. ⁷ Que'xc'am riq'uin li Jesús ut que'xq'ue li rak'eb chirix li ch'ina bur ut li Jesús quitake' chirix. ⁸ Nabaleb que'xhel li rak'eb sa' be bar tanumek' cui' li Jesús. Cuan que'xyoc' chak ruk' che' ut que'xq'ue li xak sa' be. ⁹ Nak yō chi xic li Jesús cuan li yoqueb chi xic chiru ut cuan li yoqueb chi xic chirix. Japjoqueb re chixyebal: —¡Aj Colol ke taxak! ¡Osobtesinbil taxak li xchal sa' xc'aba' li Kacua' Dios! ¹⁰ Osobtesinbil taxak li tenamit tatakank cui' li xchal chok' rekaj laj David li kaxe'tonil yucua'. Aj Colol ke taxak li xchal chak riq'uin li Dios, —chanqueb. ¹¹ Nak quicuulac Jerusalén, li Jesús qui-oc sa' li rochoch li Dios. Quixsuti rilbal chixjunil li c'a'ak re ru cuan aran. Xban nak qui-ecuu cō aran Betania rochbened lix tzolom cablaju.

Li Jesús quixtz'ektana li jun ton chi higo

¹² Jo' cuulajak chic nak que'el aran Betania, quichal xtz'ocajic li Jesús. ¹³ Toj najt ajcui' cuan chak nak quiril jun ton li che' higo ut cō chirilbal ma cuan ru. Nak quicuulac cuan cui' li che' quiril nak mac'a' ru. Junes xak cuan xban nak toj maji' xk'ehil tauchink. ¹⁴ Ut li Jesús quixye re li jun ton chi higo: —Mā ani chic tatzacank re li nacacuuchin xban nak mā jun cua chic tatuchink, chan. Ut eb lix tzolom que'rabi li c'a'ru quixye.

Li Jesús quirisihel laj c'ay sa' rochoch li Dios

¹⁵ Nak que'cuulac Jerusalén, li Jesús qui-oc sa' li rochoch li Dios. Quiril nak yoqueb chi c'ayinc ut yoqueb chi lok'oc aran. Qui-oc chixyolesinquireb. Quixbalk'usi lix mexeb laj jalol tumin ut quixbalk'usi ajcui' lix temeb li yoqueb chi c'ayinc paloma. ¹⁶ Ut inc'a' chic quixcaneb li tenamit chal numec' sa' rochoch li Dios chi cuan rikeb. ¹⁷ Ut qui-oc xch'olobanquil xyalal chiruheb ut quixye: —¿Ma inc'a' ta bi' tz'ibanbil sa' li Santil Hu li c'a'ru quixye li Dios? “Li cuochoch, a'an re te'tijok cui' chixjunileb li tenamit.” Abanan

laex xeq'ue li rochoch li Dios chok' xna'ajeb laj elk', chan li Jesús. ¹⁸ Eb li xbenil aj tij ut eb laj tz'ib nak que'rabi a'an que'oc chixc'ubanquil chanru nak te'xcamsi li Jesús. C'ajo' nak que'xucuac xban nak que'ril nak sachsoqueb xch'ol li q'uila tenamit chirabinquil li tijleb li yo chixyebal li Jesús. ¹⁹ Nak qui-ecuu, qui-el li Jesús sa' li tenamit Jerusalén rochbeneb lix tzolom. ²⁰ Jo' cuulajak chic nak que'nume' cuan cui' li xtónal li higo, que'ril nak ac xchakic chi junaj cua. ²¹ Ut laj Pedro quinak sa' xch'ol nak li Jesús quixtz'ektana li che' ut quixye re: —Ka'cua', il li che' li xatz'ektana. Xchakic chi junaj cua.— ²² Ut li Jesús quixye reheb: —Chepab nak nim xcuanquil li Dios. ²³ Relic chi yal tixye ere li ani tixye re junak tzul, “Elen arin ut cut acuib sa' li palau”, ut cui inc'a' tixcuiba xch'ol, ut cui tixpab chi tz'akal nak taxk li tixye, taxmank li c'a'ru tixye. ²⁴ Jo'can nak tixye ere nak chixjunil li c'a'ru tetz'ama chiru li Dios nak yoquex chi tijoc, chepab chi tz'akal nak taq'uehek' ere ut tec'ul li c'a'ru tetz'ama. ²⁵ Nak yokex chi tijoc, checuy xmac li ani cuan xmac cheru re nak li kaYucua' li cuan sa' choxa tixcuy ajcui' emac laex. ²⁶ Ut cui inc'a' nequecuyeb xmac li cuanqueb xmac cheru, inc'a' ajcui' tixcuy emac laex li kaYucua' li cuan sa' choxa, chan li Jesús.

Eb laj tz'ib que'xcuech' rix xcuanquil li Jesús

²⁷ Que'suk'i cui'chic aran Jerusalén. Nak yo chi bec li Jesús sa' li rochoch li Dios que'cuulac li xbenileb aj tij riq'uin. Ut que'cuulac laj tz'ib ut jo'can ajcui' li xakabanbileb chi c'anjelac sa' li rochoch li Dios. ²⁸ Que'xye re li Jesús: —¿Ani xtaklan chak acue chixbanunquil li c'a'ru yocat chixbanunquil? Ut ¿ani xq'uehoc acuanquil? chanqueb. ²⁹ Li Jesús quixye: —Lain tincuj ajcui' patz'oc ere. Cui tesume li c'a'ru tinpatz' ere, lain tixye ere ani xq'uehoc incuanquil chixbanunquil li c'a'ru ninbanu. ³⁰ ¿Ani quitaklan chak re laj Juan chi cubsinc ha'? ¿Ma li Dios malaj ut cuink quitaklan chak re? Yehomak cue anakcuan, chan reheb. ³¹ Ut que'oc chixyebal chi ribileb rib: —¿C'a'ru takasume cui'? Cui takaye nak li Dios xtaklan chak re, a'an tixye ke c'a'ut nak inc'a' xkapab li c'a'ru quixye laj Juan. ³² Ut cui takaye nak cuink xtaklan chak re, te'pok' li tenamit sa' kaben, chanqueb. Eb a'an que'xxucua ru li tenamit xban nak chixjunileb neque'xnau nak laj Juan, a'an tz'akal profeta. ³³ Ut eb a'an que'chak'oc ut que'xye re li Jesús: —Lao inc'a' nakanau, chanqueb. Tojo'nak li Jesús quixye reheb: —Chi moco lain tixye ere ani quiq'uehoc incuanquil, chan reheb.

12

Li jaljoquil ru atin chirixeb laj ilol re li acujmk inc'a' useb xna'leb

¹ Li Jesús qui-oc chixyebal li jaljoquil ru atin reheb ut quixye chi jo'ca'in: Jun li cuink quirau jun sir li racujmk uvas ut quixsut sa' corral. Quixyib jun xna'aj bar te'xyatz' cui' li uvas ut quixyib ajcui' jun ch'ina cab najt xteram re li tac'ac'alenk re li acujmk. Quixsiq'ueb laj ilol re li racujmk. Ut laj echal re li acujmk co sa' jalanil tenamit. ² Nak quicuulac xk'ehil xsic'bal ru li acujmk, laj echal re quixtakla jun lix mos riq'uineb laj ilol re chixc'ulbal li ru li racujmk li jo' q'uial tatz'ak a'an. ³ A'ut eb laj ilol re li acujmk que'xchap li mos ut que'xsac'. Ut que'xtakla chi mac'a' que'xq'ue re. ⁴ Laj echal re li acujmk quixtakla jun chic lix mos riq'uineb. Ut que'xjor xjolom chi pec. K'axal ra que'xbanu re. ⁵ Ut laj echal re quixtakla cui'chic jun lix mos ut li jun a'an que'xcamsi. Ut toj nabal cui'chic lix mos quixtakla riq'uineb laj ilol re li racujmk. Cuan yal que'xsac' ut cuan que'xcamsi. ⁶ Ca'aj chic li ralal quicana, li k'axal naxra. —Li cualal te'x-oxlok'i, chan sa' xch'ol. Jo'can nak quixtakla

li lalal riq'uibeb. ⁷ Nak quicuulac li lalal, eb laj ilol re li acuimk que'xye chi ribileb rib, —A'an li lalal li tačchanink re li na'ajej. Kacamsihak, chanqueb, ut laj chic točchanink re.— ⁸ Jo'can nak que'xchap. Nak ac que'xcamsi que'xcut chak jun pac'al li ch'och'. ⁹ Ut li Jesús quixye reheb: —¿C'a'ru tixbanu laj ečhal re li acuimk nak neque'oxla laex? Tačħalk ut tixcamsihebb laj ilol re li racuimk, ut jalañ chic aj e tixq'ue li jun s̄ir chi uvas. ¹⁰ ¿Ma inc'a' xeril sa' li Santil Hu li naxye chi jo'ca'in?

Li pec li que'xtz'ektana laj cablanel, a'an li k'axal lok' li quiq'ueman chok' xxuc li cab.

¹¹ Li Kacua' a'an quixq'ue xlok'al li pec. Ut a'an xsachba ch'olej chok' ke laj.— (Sal. 118:22, 23)

¹² Eb laj tij ut eb laj tz'ib ut eb li xakabanbileb chi c'anjelac sa' rochoch li Dios que'xc'oxla raj xchapal li Jesús re te'xq'ue sa' tz'alam xban nak que'xtau ru nak chirixeb a'an yo'chi atinac nak quixye li jaljoquil ru atin a'an. Abanan que'xucuaç xbaneb li tenamit. Jo'can nak que'xcanab ut que'el sa' li na'ajej a'an.

Chikaq'uehak li katoj re li acuabej

¹³ Mokon chic que'xtakla riq'uin li Jesús cuib oxibeb laj fariseo rochbeneb cuib oxibeb li neque'oquen chirix laj Herodes re xsic'bil c'a'ru tapaltok cui' riq'uin li ratin re nak te'xchap. ¹⁴ Que'cuulac riq'uin li Jesús ut que'xye re: —At tzolonel, nakanau nak laät yal nacat-atinac ut inc'a' nacaxucua ruheb li tenamit. Yalak ani aj e nacaye lix yalal. Ut nacac'ut chiruhebb li c'a'ru naraj li Dios. Ye ke, ¿ma us xq'uebal li toj re li acuabej malaj ut inc'a'? ¿Ma takaq'ue malaj ut inc'a'? chanqueb. ¹⁵ Li Jesús naxnau nak aj ca'pac'aleb. Quixye reheb: —¿C'a'ut nak nequeraj xyalbal cuix? C'amomak chak li tumin. Cuilak, chan reheb. ¹⁶ Ut eb a'an que'xc'ut li tumin chiru. Ut li Jesús quixye reheb: —¿Ani aj e li jalam uçh li cuan chiru? Ut ¿ani aj c'aba' li tz'ibanbil chiru?— Eb a'an que'chak'oc ut que'xye: —Re li acuabej, chanqueb. ¹⁷ Ut li Jesús quixye reheb: —Tojomak re li acuabej li c'a'ru re li acuabej ut tojomak re li Dios li c'a'ru re li Dios, chan. Ut c'ajo' nak que'sach xch'oleb xban li ratin.

Li Jesús quixch'olob xyalal lix cuaclijueb li camenak chi yo'yo

¹⁸ Tojo'nak que'cuulac riq'uin li Jesús cuib oxib laj saduceo. Eb a'an inc'a' neque'xpab nak te'cuaclik cui'chic chi yo'yo li camenak. Que'xye re li Jesús: ¹⁹ —At tzolonel, laj Moisés quixtz'iba jun kachak'rabinquil ut quixye chi jo'ca'in: Cui junak cuink taçamk ut tixcanab li rixakil chi maç'a' ralal xc'ajol, tento nak taç'amek' li rixakil xban li rjtz'in li camenak re nak taçuank ralal xc'ajol sa' xc'aba' li camenak. ²⁰ Que'cuan cuukub li cuink rjtz'ineb rib. Li asbej quix'am rixakil ut quicam chi inc'a' quixcanab ralal xc'ajol. ²¹ Ut quic'ame' li ixk xban li jtz'inbej. Ut quicam ajcui' a'an chi inc'a' quixcanab ralal xc'ajol. Ut jo'can cui'chic li rox jtz'inbej. ²² Li ixk a'an quic'ame' xbaneb li cuukub. Ut ma jun reheb quixcanab ralal xc'ajol. Ut quicam ajcui' li ixk. ²³ Sa' xcuaclijueb li camenak chi yo'yo, nak te'cuaclik eb a'an, ¿ani aj ixakil taçanaç cui' li ixk a'an xban nak cuukub lix belom quicuan? chanqueb. ²⁴ Quichak'oc li Jesús ut quixye reheb: —Laex inc'a' nequetau xyalal xban nak inc'a' nequetau ru li Santil Hu chi moco lix nimal xcuauquil li Dios. ²⁵ Nak te'cuaclik chi yo'yo sa' xyañkebb li camenak, inc'a' chic te'sumlak chi moco te'sumubaç chic. Jo'keb ban chic li ángel sa' choxa. ²⁶ Ut chirix lix cuaclijueb li camenak chi yo'yo, ¿ma inc'a' erilom sa' lix hu laj Moisés li c'a'ru quiehe' re xban li Dios nak quiatinac chak sa' li q'uix li yo'chi c'ate? Quixye chi jo'ca'in, “Lain lix Dios laj Abraham, lix Dios laj Isaac ut lix Dios laj Jacob”, chan li Dios. ²⁷ A'an retalil chok' ke nak toj yo'yoqueb chiru li

Dios usta que'cam. Li Dios moco xDioseb ta li camenakeb; xDioseb ban li yo'yoqueb. Jo'can nak laex chi tic inc'a' nequetau xyalal, chan li Jesús reheb.

Li chak'rab k'axal nim xcuauquil

²⁸ Quicuulac jun reheb laj tz'ib. Ut quirabi nak yoqueb chixcuech'inquil ribeb. Quixq'ue retal nak li Jesús quixchak'beheb chi us, ut quixpatz' re li Jesús: —¿Bar cuan reheb li chak'rab li k'axal nim xcuauquil?— ²⁹ Li Jesús quichak'oc ut quixye re: —Li xben chak'rab, li k'axal nim xcuauquil, a'an a'in: Abihomak laex aj Israel, li Kaçua' li kaDios jun ajcui'. ³⁰ Tara li Kaçua' la Dios chi anchal ach'ol ut chi anchal la cuam ut chi anchal la c'a'ux ut chi anchal la metz'eu. A'an a'in li chak'rab li k'axal nim xcuauquil. ³¹ Ut li xcab chanchan ajcui' a'an: Tara la cuas acuitz'in jo' nak nacara acuib laa. Maç'a' chic junak chak'rab nim xcuauquil chiruheb li cuib a'in, chan. ³² Laj tz'ib quichak'oc ut quixye re: —Us li xaye at tzolone. Yal li xaye nak jun ajcui' li Dios cuan ut maç'a' chic junak chirix a'an. ³³ Tento nak takara li Dios chi anchal li kach'ol, chi anchal li kac'a'ux, chi anchal li kam ut chi anchal li kametz'eu. Ut takara li kas kitz'in jo' nak nakara kib lao. A'an k'axal nim xcuauquil chiruheb chixjunil li c'atbil mayej ut li mayejanbil xul, chan. ³⁴ Li Jesús quixq'ue retal nak li cuink quixnau xsumenquil ut quixye re: —Yal ca'ch'in aj chic ma nacak'axtesi acuib rubel xcuauquil li Dios, chan. Ut ma jun chic que'raj patz'oc xban nak qui-oc xc'a'uxeb.

Li Cristo xcomoneb li ralar xc'ajol laj David

³⁵ Mokon chic nak cuan sa' rochoch li Dios, li Jesús yo chixch'olobanquil li xyalal chiruheb ut quixye: —¿C'a'ut nak eb laj tz'ib neque'xye nak li Cristo, a'an xcomoneb li ralar xc'ajol laj David? ³⁶ Laj David quixye li c'a'ru quirec'a' sa' xch'ol xban li Santil Musik'ej ut quixye chi jo'ca'in:

Li Kaçua' Dios quixye re laj Colol cue, C'oılan sa' lin nim uk' toj retal tinq'ueheb li xic' neque'iloc acue rubel la cuauquil. (Sal. 110:1)

³⁷ Li rey David quixye “aj Colol cue” re li Kaçua' usta a'an xcomoneb li ralar xc'ajol, chan li Jesús. Ut li q'uila tenamit que'rabi li ratin chi sa sa' xch'oleb.

Li Jesús quixk'useb laj tz'ib

³⁸ Nak yo chixch'olobanquil li xyalal chiruheb, li Jesús quixye: —Metzol erib riq'uineb laj tz'ib li neque'raj bec chi najt rok li rak'eb re xc'utbal nak cuanqueb xcuauquil. Eb a'an neque'cuulac chiruheb nak te'q'uehek' xlok'al sa' eb li be. ³⁹ Ut nak cuanqueb sa' li cab li neque'xch'utub cui' ribeb laj judío, neque'raj c'oįlac sa' li na'ajej k'axal lok' ut neque'raj cuanc chi xjolomil li mex nak neque'xic chi cua'ac sa' junak nink'e. ⁴⁰ Neque'xmak' li c'a'ru cuan reheb li xmalca'an ut re xmukbal li mausilal neque'xbanu, najt rok neque'tjoc chiruheb li tenamit. Ut xban a'an k'axal ra cui'chic te'xtoj cui' li maç neque'xbanu.—

Lix mayej li xmalca'an neba'

⁴¹ Sa' jun cutan quicuulac li Jesús sa' rochoch li Dios. Quic'oįla chixc'atk lix çaxil li mayej. Yo chirilbal li tenamit nak yoqueb chixq'uebal li tumin sa' li çax. Nabaleb li biom nabal lix mayej yoqueb chixq'uebal. ⁴² Quichal ajcui' jun xmalca'an neba'. Ut quixq'ue cuib chi tumin jo' tana li jun centavo. ⁴³ Tojo'nak li Jesús quixbokeb lix tzolom ut quixye reheb: —Relic chi yal tinye ere nak li xmalca'an neba' nabal xq'ue chiru li mayej li xe'xq'ue chixjunileb. ⁴⁴ Chixjunileb a'an xe'xq'ue li na-ela'an chiruheb. A'ut li ixk a'in sa' neba'li xq'ue chixjunil li jo' nimal cuan re.—

13

Taçuulak xk'ehil nak tajuq'uek' li rochoch li Dios

¹ Nak qui-el chak li Jesús sa' rochoch li Dios, jun reheb lix tzolom quixye re: —At tzolonel, il, ma c'ajo' xchak'al ru li cab a'in ut ma c'ajo' xchak'al ru li pec yibanbil cui'. —² Li Jesús quichak'oc ut quixye re: —Us ajcui' nak teril chi us xban nak taçuulak xk'ehil nak ma jun chic li pec a'an taçanak sa' xna'aj chi inc'a' ta tajuq'uek', chan li Jesús.

Retalil roso'jic li ruchich'och'

³ Que'coeb sa' li tzul Olivos sa' xca'yabal li rochoch li Dios. Li Jesús quic'ojla aran ut nak cuan xjunes quipatz'e' re xbaneb laj Pedro, laj Jacobo, laj Juan ut laj Andrés. ⁴ —Ye ke jok'e taç'ulmank li yocat chixyebal chirix li rochoch li Dios ut çc'a'ru retalil taçuank nak talajc'ulmank li c'a'ak re ru a'in? —⁵ Li Jesús quichak'oc ut quixye: —Cheq'ue retal re nak ma ani tabalak'ink ere. ⁶ Nabal te'chalk chi balak'inc ut tole'x'ye, “Lain li Cristo”, cha'keb. Ut nabal te'balak'ik xbaneb. ⁷ Nak terabi nak yo li plet ut nak terabi resil nak ticlac re li plet yalak bar, mexxucuaç xban nak tento nak taç'ulmank chi jo'can. Abanan moco ac a'an ta roso'jiqueb li cutan. ⁸ Nabal li tenamit te'pletik riq'u'in jalan chic tenamit. Ut eb li acuabej te'xpleti ribeb. Talajcuank huc sa' nabal chi na'ajej ut taçuank cue'ej. Abanan a'an yal xticlajic li raylal taçchalk. ⁹ A'ut laex cheq'uehak retal li raylal taçchalk sa' eben. Texk'axtesik chiruheb laj rakol atin ut tetsaq'uek' sa' li cab li neque'xch'utub cui' ribeb laj judío. Texc'amek' chiruheb li acuabej ut chiruheb li rey sa' inc'aba' lain ut taruk tech'olob xyalal li cuatin chiruheb. ¹⁰ Tento nak xben cua taçutunk xch'olobanquil resilal li colba-ib chiruheb chixjunil li tenamit nak toj maji' na-oso' li ruchich'och'. ¹¹ Ut nak texchapek' ut texk'axtesik chiruheb li acuabej, mexc'oxlac chirix li c'a'ru teye. Li c'a'ru teye sa' li honal a'an maçua' c'oxlanbil atin li teye. Aban li tixye ere li Santil Musik'ej, a'an li teye. ¹² Eb li cujnk te'xk'axtesi chi camçic li ras ritç'in. Ut li yucua'bej tixk'axtesi li ralal. Ut li alalbej c'ajolbej te'xq'ue chi camçic li na'bej yucua'bej. ¹³ Ut xic' tex-ilek' xbaneb chixjunileb sa' inc'aba' lain. Ut li tixcuy xnumsinquil li raylal a'in toj sa' roso'jic lix yu'am, a'an taçolek' xban li Dios. ¹⁴ Chetzolak rix chi us li c'a'ru quixye li profeta Daniel re nak tetau ru li c'a'ru taç'ulmank. A'an quixye nak eb laj balak' te'chalk ut tole'xq'ue li k'axal yibru ut xucua'jel rilbal sa' li rochoch li Dios li maçua' xc'ulub cui' cuanc. Nak teril nak yoqueb chixmuxbal ru li rochoch li Dios, laex li cuanquex Judea chex-elelik sa' junpat ut texxic toj sa' li tzul. ¹⁵ Cui cuan chak junak sa' xben li rochoch nak taç'ulmank a'an, chi cubec chak ut tic taçelelik ut inc'a' chic taoc sa' rochoch chirisinquit li c'a'ru cuan re. ¹⁶ Cui ani cuan chak sa' xc'alebal inc'a' chic taçuk'ik sa' cab chixxocbal li rak'. ¹⁷ K'axal ra cui'chic li elelic chok' reheb li yaj aj ixk ut li yoqueb chi tu'resink sa' eb a cutan a'an. ¹⁸ Chextijok ut chetz'ama chiru li Dios re nak inc'a' taç'ulmank a raylal a'in sa' habalk'e. ¹⁹ Sa' eb li cutan a'an ma ca'ch'in li raylal taçuank. Ma jun cua quic'ulman chi jo'can chalen chak sa' xticlajic nak li Dios quixyib li ruchich'och', chi moco taç'ulmank chi jo'can mokon. ²⁰ Cui ta maç'a' sa' xch'ol li Kaçua' xrakbaleb li cutan a'an ma ani raj taçolek'. Abanan nim xraham li Kaçua' sa' xbaneb li sic'bileb ru xban. Jo'can nak cuan sa' xch'ol li Kaçua' xrakbal eb li cutan a'an re nak te'colek'. ²¹ Jo'can nak ani tayehok ere, “Cue' li Cristo”, malaj, “le' cuan li Cristo”, mepab li c'a'ru te'x'ye. ²² Nabaleb aj balak' te'c'ulunk ut te'x'ye nak a'aneb li Cristo. Ut cuan te'x'ye nak a'aneb li profeta. Nabal li c'a'ak re ru te'xc'utbesi ut sachba ch'olej telaje'xbanu re xbalak'inquileb li sic'bileb ru

xban li Dios. ²³ Abanan ac xinye ere li c'a'ru taç'ulmank. Jo'can nak meç'ue erib chi balak'ic.

Nak tol-elk cui'chic li C'ajolbej Dios

²⁴ Ut sa' eb li cutan a'an nak taç'ulmank li raylal, taç'ojyinjok' ru li sak'e ut li po inc'a' chic taçutanok' ru. ²⁵ Taec'ank ru li choxa ut li chahim telaje't'ane'. ²⁶ Nak acak x-ec'an ru li choxa, te'ril cuu lain li C'ajolbej nak yokin chak chi çalç sa' li chok riç'uin lix nimal incuanquil ut lin lok'al. ²⁷ Tojo'nak tintaklaheb lin ángel ut te'xch'utub li sic'bileb ru inban li cuankeb yalak bar sa' chixjunil li ruchich'och'. ²⁸ Cheç'uehak retal c'a'ru naxbanu li jun ton chi higo. Nak nak'unk'ut chak li xak chi elc, riç'uin a'an tenau nak yo chak chi nach'oc li sak'ehil. ²⁹ Jo' nak li higo naxc'utbesi retalil li sak'ehil, jo'can ajcui' nak li raylal talaje'c'ulmank tixc'utbesi retalil nak yo chi cuulac xk'ehil nak tolinek cui'chic lain li C'ajolbej. ³⁰ Relic chi yal tnye ere nak talaje'c'ulmank chixjunil li c'a'ak re ru a'in nak toj maji' neque'oso' li tenamit a'in. ³¹ Li choxa ut li ruchich'och' talaje'osok'. Abanan li c'a'ru ninye inc'a' taçanak yal chi jo'can. Talajc'ulmank ban chixjunil li c'a'ak re ru xinye. ³² Abanan ma ani nana'oc re jok'e taçuulac xk'ehil li cutan a'an chi moco li honal jok'e taç'ulmank. Eb li ángel sa' choxa inc'a' neque'xnau chi moco lain li C'ajolbej ninna'oc re. Ca'aj cui' li Dios Acuabej nana'oc re jok'e taç'ulmank a'in. ³³ Jo'can nak yo'on cuankex. Chexyo'lek ut chextijok xban nak inc'a' nequenau jok'e taçuulac xk'ehil inc'ulunic. ³⁴ Chanchan jun li cujnk najt ço sa' xviáj. Toj maji' naxic nak quixç'ueheb xcuanquileb laj c'anjel chiru. Quixcanab xc'anjel li junjunc. Ut quixye re laj ilol cab nak junelic yo'on cuank. ³⁵ Jo'can ajcui' laex. Junelic yo'on cuankex xban nak inc'a' nequenau jok'e honal tinc'ulunk. Mare tinchalk eçu, malaj tuktu k'ojyinj, malaj ut nak nayabac laj tzo' xul malaj ut ek'ela. ³⁶ Yo'on cuankex re nak inc'a' tolexintau chi cuarc xban nak inc'a' nequenau jok'e tinc'ulunk. ³⁷ Ut li c'a'ak re ru ninye ere lain, a'an ajcui' ninye reheb chixjunileb re nak yo'on cuankeb, chan li Jesús.

14

Que'raj xchapbal li Jesús

¹ Cuib cutan chic ma nacuulac xk'ehil li nink'e re xjulticanquil li reliqueb laj Israel sa' li tenamit Egipto. Pascua nayeman re li nink'e a'an. A'an ajcui' xk'ehil li nink'e nak neque'xcua' li caxlan cua chi mac'a' xch'amal. Sa' eb li cutan a'an eb lix benil aj tij ut eb laj tz'ib yoqueb chixsic'bal chanru nak te'xyo'ob atin chirix li Jesús re nak te'xç'ue chi camçic. ² Ut que'xye chi ribileb rib: —Inc'a' takachap li Jesús nak yok li nink'e xban nak te'pok' li tenamit kiç'uin ut te'oc chi pletic, chanqueb.

Nak quyule' li sununquil ban sa' xjolom li Jesús xban jun li ixk

³ Li Jesús cuan aran Betania sa' rochoch laj Simón li saklep rix. Chunchu sa' mex nak quichal jun li ixk. Cuan chak jun ch'ina botella sununquil ban riç'uin. Lix na'aj li ban a'an yibanbil riç'uin çabil pec alabastro xc'aba' ut li sununquil ban a'an nardo xc'aba' ut k'axal tertu xtz'ak. Li ixk quixtok xcux li ch'ina botella ut quixç'ue li ban sa' xjolom li Jesús. ⁴ Cuan li que'josk'o' ut que'xye chi ribileb rib: —çC'a'ut nak xsach li sununquil ban a'an chi maç'a' rajbal? ⁵ Xru raj xc'ayiman chi numenac oxib ciento denarios (Q150) ut xkajeç'ui raj reheb li neba', chanqueb. Ut que'oc chixcuech'inquil li ixk. ⁶ Ut li Jesús quixye reheb: —çC'a'ut nak yoquex chixch'i'ch'i'inquil li ixk? Canabomak xcuech'inquil xban nak us li xbanu cue. ⁷ Li neba'

junelic cuanqueb sa' eyank. Yalak jok'e naru tetenk'aheb. Abanan lain moco cuankin ta junelic eriq'uin. ⁸ Li ixk a'in xbanu li jo' q'uial xru xbanunquil. Maji' nincam abanan ac xinixban re lin mukbal. ⁹ Relic chi yal tinye ere nak tayemank resil li colba-ib yalak bar, tayemank ajcui' resil li c'a'ru xbanu li ixk a'in re xjulticanquil a'an, chan. ¹⁰ Ut laj Judas Iscariote, xcomoneb li cablaju, co riq'uineb lix benil aj tij chixyebal reheb nak tixk'axtesi li Jesús sa' ruk'eb. ¹¹ Ut eb laj tij nak que'rabi a'an c'ajo' nak que'saho' sa' xch'oleb ut que'xyechi' i xtumin. Ut laj Judas quixsic' xyalal chanru nak tixk'axtesi li Jesús sa' ruk'eb.

Xticlajic chak li Lok'oninc re Xjulticanquil lix Camic li Jesucristo

¹² Sa' li xben cutan re li nink'e nak neque'xcua' li caxlan cua chi mac'a' xch'amal, neque'xmajeja jun li carner. Li nink'e a'an re xjulticanquil li reliqueb laj Israel sa' li tenamit Egipto. Eb lix tzolom que'xye re li Jesús: —¿Bar taçuaaj takacauresi chak li na'ajej re tatzaça cui' li mayejanbil xul? chanqueb. ¹³ Li Jesús quixye reheb cuib lix tzolom: —Ayukex sa' li tenamit. Aran tec'ul jun li cujnk yo chak chixc'ambal jun cuc xha'. Tetake a'an. ¹⁴ Bar taçoa a'an aran ajcui' tex-oc laex. Ut tye re laj echal cab, “Chan laj tzolonel, ¿bar len cuan li na'ajej taçua'ak cui' rochbened lix tzolom?” cha'kex re. ¹⁵ Ut a'an tixc'ut cheru jun nimla na'ajej takec' sa' xca' tasalil li cab. Ac yjbanbil li na'ajej. Ut aran toxecauresi li nink'e chok' ke, chan li Jesús. ¹⁶ Que'coeb sa' li tenamit ut qui-uxman jo' quixye li Jesús. Ut aran que'xcauresi li nink'e. ¹⁷ Nak qui-ecuu, quicuulac li Jesús rochbened lix tzolom. ¹⁸ Nak ac yoqueb chi cua'ac sa' li mex, li Jesús quixye reheb lix tzolom, —Relic chi yal tinye ere nak jun ere laex tak'axtesjnk cue sa' ruk'eb li xic' neque'iloc cue, chan. ¹⁹ Ut eb a'an que'raho' sa' xch'oleb ut eb li junjnk que'oc chixyebal re li Jesús: —¿Ma lain ta bi' tink'axtesjnk acue, Kaçua'? chanqueb. ²⁰ Ut li Jesús quichak'oc ut quixye reheb: —Li tak'axtesjnk cue, a'an jun ere laex li yo chixtz'abal lix caxlan cua cuochben sa' li sec'. ²¹ Relic chi yal lain li C'ajolbej tinc'ul li c'a'ru tz'jbanbil chak retalil chicuix. Abanan raylal cuan sa' xben li cujnk li tak'axtesjnk cue. K'axal us raj chok' re li cujnk a'an nak inc'a' ta quiyo'la.— ²² Ut nak yoqueb chi cua'ac, li Jesús quixchap li caxlan cua. Quixbantioxi chiru li Dios, quixjachi, tojo'nak quixjeq'ui reheb lix tzolom. Ut quixye reheb: —Cua'inkex. A'an a'in intz'ejcual.— ²³ Ut quixchap ajcui' li sec' re uc'ac ut quixbantioxi chiru li Dios, tojo'nak quixq'ue reheb ut chixjunileb que'uc'ac. ²⁴ Ut li Jesús quixye reheb: —A'an a'in lin quiq'uel li tahoyek' sa' xc'aba'eb chixjunileb ut a'an taxakabank xcuanquil li Ac' Contrato. ²⁵ Relic chi yal tinye ere nak inc'a' chic tincuuc' lix ya'al ru li uva toj taçuulak xk'ehil nak tincuuc' cui'chic sa' lix nimajcual cuanquilal li Dios, chan li Jesús.

Li Jesús quixye nak tatz'ektanqak xbaneb lix tzolom

²⁶ Ut nak ac xe'rake' xbichanquil jun li bich, que'coeb sa' li tzul Olivos. ²⁷ Ut li Jesús quixye reheb: —Chejunilex laex tach'inak le ch'ol ut tinecanab injunes chiru a k'o'ojjin a'in xban nak jo'ca'in tz'jbanbil retalil xbaneb li profeta: Tincanab chi camsjc laj ibol reheb li carner ut eb li carner te'xcha'cha'i ribeb. ²⁸ Ut nak acak xincuacli cui'chic chi yo'yo sa' xyankeb li camenak, lain xben cua tinxic cheru aran Galilea.— ²⁹ Ut laj Pedro quixye re: —Usta chixjunileb tate'xcanab abanan lain inc'a' tatincanab.— ³⁰ Ut li Jesús quichak'oc ut quixye re: —Relic chi yal tinye acue nak toj maji' nayabac xca' sut li tzo' xul nak laaç ac xaye oxib sut nak inc'a' nacanau cuu.— ³¹ Ut laj Pedro quixye cui'chic chi cau: —Maj jok'e tinye nak inc'a' ninnau acuu usta tine'xcamsi açuochben, chan. Ut jo'can que'xye chixjunileb lix tzolom.

Nak quitijoc chak li Jesús aran Getsemaní

³² Li Jesús quicuulac rochbened lix tzolom sa' li na'ajej Getsemaní xc'aba'. Li Jesús quixye reheb lix tzolom: —Canakex arin. Xic cue chi tijoc lain.— ³³ Ut quixc'am oxib lix tzolom chirix. A'anéb laj Pedro, laj Jacobo ut laj Juan. Ut c'ajo' nak qui-oc chi yot'ec' xch'ol li Jesús. ³⁴ Quixye reheb lix tzolom: —Cuan jun raylal sa' inch'ol yo chinyot'bal. Lain nacuec'a nak inc'a' chic tincuy. Canakex arin ut yo'lenkex.— ³⁵ Ut li Jesús quibec chic ca'ch'in ut quixcuik'ib rib sa' ch'och' ut qui-oc chi tijoc ut quixtz'ama re li Kacua' Dios ut quixye: —Cui ta tixq'ue rib, inc'a' raj tinc'ul li raylal a'in.— ³⁶ Ut quixye ajcui': —At inYucua', lain ninnau nak chixjunil naru xbanunquil ch'acuu. Cui ta naru inc'a' raj tinc'ul li raylal a'in. Abanan chi-uxmank li c'a'ru nacacuaaj laaj ut macua' li nacuaaj lain.— ³⁷ Ut nak quisuk'i chak li Jesús, quixtauheb chi cuarc lix tzolom. Ut quixye re laj Pedro: —At Simón, ¿ma yoquex chi cuarc? ¿Ma inc'a' xru xexyo'lec jun orak cuochben? ³⁸ Chexyo'lek ut chextijok re nak inc'a' teq'ue erib chi alec. Laex nequeraj raj xbanunquil li us, abanan ejunes inc'a' texruk.— ³⁹ Ut li Jesús co cui'chic chi tijoc ut quixtz'ama cui'chic sa' lix tij nak inc'a' raj tixc'ul li raylal. ⁴⁰ Ut nak quisuk'i cui'chic li Jesús quixtauheb cui'chic chi cuarc lix tzolom xban nak ma' ca'ch'in lix cuaraheb. Ut eb a'an inc'a' chic neque'xtau c'a'ru te'xye. ⁴¹ Ut quisuk'i cui'chic sa' rox sut, coxtauheb cui'chic chi cuarc ut quixye reheb: —¿Ma toj yoquex ajcui' chi cuarc? Tz'akalak li hilanc xebanu. Ac xtau xk'ehil nak lain li C'ajolbej tink'axtesik sa' ruk'eb laj mac. ⁴² Cuaclinkex anakuan, ut yo'keb chixc'ulbal li yo' chi chalc chi k'axtesinc cue, chan.

Nak que'xc'am chi prexil li Jesús

⁴³ Toj yo ajcui' chi atinac li Jesús riq'uineb lix tzolom nak quicuulac laj Judas. A'an jun reheb li cablaju. Nabal que'chal rochben laj Judas taklanbileb chak xbaneb li xbenil aj tij ut xbaneb laj tz'ib. Taklanbileb ajcui' xbaneb laj c'amol be sa' li rochoch li Dios. Cuanqueb xch'ich' ut cuanqueb xche'. ⁴⁴ Ut laj Judas quixye reheb nak tixq'ue jun retalil chanru nak tixk'axtesi li Jesús. Ac quixye reheb: —Li ani tincuutz' ru, a'an li techap ut te'am.— ⁴⁵ Ut nak quicuulac laj Judas quijiloc chixc'atk, ut quixye: —At Kacua',— ut quirutz' ru. ⁴⁶ Ut eb a'an que'xchap li Jesús re nak te'xc'am riq'uin laj rakol atin. ⁴⁷ Ut jun reheb li rochben li Jesús quirisi chak lix ch'ich' ut quixch'ot lix xic lix mos li xyucua'ileb aj tij. ⁴⁸ Ut li Jesús quixye reheb li tenamit: —¿Ma lain ta bi' aj elk' nak xexchal chinchapbal riq'uin che' ut riq'uin ch'ich'? ⁴⁹ Rajlal cutan cuanquin sa' eyank chetzolbal sa' rochoch li Dios ut inc'a' quinechap. Abanan xc'ulman chi jo'ca'in re nak tatz'aklok ru li tz'ibanbil sa' li Santil Hu,— chan li Jesús. ⁵⁰ Ut chixjunileb lix tzolom que'elelic ut que'xcanab xjunes li Jesús sa' ruk'eb li xic' neque'iloc re. ⁵¹ Jun li al yo' chi takenc re li Jesús lanlo sa' xt'icr. A'an que'xchap raj. ⁵² Abanan a'an quielelic chiruheb. Quicana lix t'icr sa' ruk'eb ut quielelic chi t'ust'u.

Que'xtz'il atin chirix li Jesús nak cuan chiru lix yucua'ileb aj tij

⁵³ Tojo'nak que'xc'am li Jesús riq'uin lix yucua'ileb aj tij ut que'ch'utla chixjunileb lix benil aj tij. Ut que'ch'utla ajcui' eb laj c'amol be sa' rochoch li Dios ut eb laj tz'ib. ⁵⁴ Ut laj Pedro chi najt yo' chixtakenquil li Jesús ut quicuulac toj chi ru'uj nebal sa' rochoch lix yucua'ileb aj tij ut aran quic'ojla chire xam chi k'ixinc rochbened laj c'ac'alenele. ⁵⁵ Eb li xbenil aj tij ut li neque'tz'iloc atin yoqueb chixsic'bal chanru nak te'xyo'ob junak atin chirix li Jesús re nak te'xq'ue chi camsic. Abanan inc'a' que'xtau. ⁵⁶ Nabal li que'yo'oban tic'ti' chirix ut inc'a' natukla ru li ratineb xban nak jalan jalank

neque'xye li junjünk. ⁵⁷ Cuan li que'xakli chixyebal li yo'obanbil atin chirix. ⁵⁸ Ut que'xye: —Lao quikabi nak quixye, “Lain tinjuc' li rochoch li Dios li yibanbil xbaneb li cujnk, ut lain chiru oxib cutan tinyib jun chic, aban ma'ua yibanbil xbaneb li cujnk.” Jo'can quixye li cujnk a'in, chanqueb. ⁵⁹ Abanan inc'a' nach'ola ru li ratineb xban nak jalan jalank neque'xye li junjünk. ⁶⁰ Ut li xyucua'ileb aj tij quixakli sa' xyankeb ut quixye re li Jesús, —¿Ma ma'c'a' nacaye la'at chirix li yo'queb chixyebal cha'cuix?— ⁶¹ Ut li Jesús ma' jun atin quixye. Ut li xyucua'ileb aj tij quixpatz' cui'chic re li Jesús ut quixye re: —¿Ma la'at li Cristo li Ralal li nimajcual Dios? chan re. ⁶² Ut li Jesús quixye: —Lain. Ut sa' jun cutan tineril lain li C'ajolbej nak c'ojc'okin sa' xnim uk' li nimajcual Dios ut teril ajcui' nak yokin chak chi cha'c sa' li chok sa' choxa, chan. ⁶³ Nak quirabi li quixye li Jesús, li xyucua'il eb aj tij quixpej li rak' xban xjosk'il ut quixye: —¿C'a' chic ru aj e nak toj te'xye ke c'a'ru xma'c? ⁶⁴ Ac xerabi nak xjuntak'eta rib riq'uin li Dios. ¿C'a'ru nequeye? ¿Ma cuan xma'c malaj ut inc'a'? chan. Ut chixjunileb que'xye nak cuan xma'c re camsjic. ⁶⁵ Cuan li yo'queb chi chu'anc re ut cuan ajcui' que'tz'apoc re li ru li Jesús riq'uin t'icr re nak inc'a' ta'lok, ut que'xsac' ut que'xye re: —Ye ke ani xsac'oc acue, chanqueb. Tojo'nak que'xk'axtesi sa' ruk'eb laj c'ac'alenel prex ut eb a'an que'xsac' cui'chic.

Laj Pedro quixye nak inc'a' naxnau ru li Jesús

⁶⁶ Ut nak cuan laj Pedro tak'a chi ru'uj nebal, quicuulac jun li ixk, xmos li xyucua'il eb aj tij. ⁶⁷ Ut li ixk a'an quiril laj Pedro nak yo' chi k'ixinc' chire li xam. Quixca'ya ut quixye re: —La'at xat-ochbenin re li Jesús aj Nazaret, chan re laj Pedro. ⁶⁸ Ut nak quichak'oc laj Pedro, quitic'ti'ic ut quixye: —¿Ani nacaye? Lain inc'a' ninnau ru ani li nacaye. —Ut laj Pedro qui-el chire li o'quebal ut li tzo' xul quiyabac. ⁶⁹ Ut li ixk nak quiril cui'chic laj Pedro, qui-oc chixyebal reheb li cuanqueb aran: —Li cujnk a'in, a'an jun reheb lix tzolom li Jesús, chan. ⁷⁰ Ut laj Pedro quitic'ti'ic cui'chic. Ut ac jumpat na chic nak eb li cuanqueb aran que'xye cui'chic re laj Pedro: —Yal. La'at xcomoneb xban nak la' cuatinobal nac'utuc re nak la'at aj Galilea.— ⁷¹ Ut laj Pedro qui-oc chi majecuanc ut quixye: —Cutan saken chiru li Dios nak inc'a' ninnau ru li cujnk li nequeye. Cui'fic'ti' li yo'quin chixyebal, chinixtz'ektan'ak li Dios, chan. ⁷² Tojo'nak quiyabac cui'chic xca' sut li tzo' xul. Ut quinak sa' xch'ol laj Pedro li atin quiyeh' re xban li Jesús, “Nak toj maji' nayabac xca' sut li tzo' xul, la'at ac xaye oxib sut nak inc'a' nacanau cuu”. Nak quijultico' re laj Pedro li atin a'in, c'ajo' nak quiraho' sa' xch'ol ut qui-oc chi yabac.

15

Quic'ame' li Jesús sa' rakleb atin chiru laj Pilato

¹ Nak quisakeu eb lix benil aj tij que'xch'utub cui'chic rib riq'uineb laj c'amol be sa' rochoch li Dios, ut riq'uineb laj tz'ib ut riq'uin chixjunileb laj q'uehol na'leb ut que'xc'ub chanru te'xbanu. Ut que'xc'am li Jesús chi bac'bo ut que'xk'axtesi sa' ruk' laj Pilato. ² Laj Pilato quixye re li Jesús: —¿Ma la'at lix reyeb laj judio?— Li Jesús quichak'oc ut quixye re: —Yal li xaye nak lain.— ³ Ut eb lix benil aj tij nabal li c'a'ak re ru yo'queb cui' chixjitbal. ⁴ Ut laj Pilato quixpatz' cui'chic re: —¿Ma inc'a' nacatchak'oc? ¿Ma inc'a' nacacuabi li jo' q'uial yo'queb chixyebal cha'cuix? chan laj Pilato re. ⁵ Aban li Jesús ma' jun atin quixye re xcolbal rib ut riq'uin a'an quisach xch'ol laj Pilato.

Quitenebac camc sa' xben li Jesús

⁶ Rajlal chihab sa' li nink'e Pascua laj Pilato narach'ab jun li prex, a' yal bar cuan te'raj li tenamit. ⁷ Jun li cuñk aj Barrabás xc'aba' cuan sa' tz'alam rochbened lix comon xban li camšinc que'xbanu nak yoqueb chiptic chirix li acuabej. ⁸ Ut que'chal li q'uila tenamit riq'uin laj Pilato chixtz'amanquil chiru nak tarach'ab junak prex jo' c'aynak'eb xbanunquil. ⁹ Laj Pilato quichak'oc ut quixye reheb: —¿Ma teraj nak tincuach'ab lix reyebe laj judío?— ¹⁰ Laj Pilato naxnau nak xban xcakaleb xch'ol lix benil aj tij nak que'xk'axtesi li Jesús sa' rakleb atin. ¹¹ Aban eb lix benil aj tij que'xtacchi'i li q'uila tenamit re nak a' laj Barrabás li te'xtz'ama re nak taach'abak. ¹² Ut laj Pilato quixpatz' cui'chic reheb: —¿C'a'ru nequeye? ¿C'a'ru teraj tinbanu riq'uin lix reyebe laj judío?— ¹³ Ut eb li q'uila tenamit que'xjap cui'chic re chixyebal: —¡Q'ue chiru cruz! chanqueb. ¹⁴ A'ut laj Pilato quixpatz' cui'chic reheb: —¿C'a'ut? ¿C'a'ru tz'akal xmac ere? chan. Ut eb a'an k'axal cui'chic cau que'xjap re chixyebal: —¡Q'ue chiru cruz!— ¹⁵ Ut laj Pilato taraj nak sahakeb sa' xch'ol li tenamit riq'uin. Jo'can nak quirach'ab laj Barrabás chiruhebe. Tojo'nak quixtakla xsac'bal li Jesús riq'uin tz'um ut quixk'axtesi sa' ruk'eb li soldado re nak te'xq'ue chiru cruz.

Li Jesús quirahobtesic xbaneb li soldado

¹⁶ Ut eb li soldado que'xc'am li Jesús sa' li popol ut que'xch'utub ribeb chixjunileb li soldado. ¹⁷ Que'xq'ue jun caki ak' chirix li Jesús jo' neque'rocsi li rey. Ut que'xq'ue ajcui' jun tz'ulbil corona q'uix sa' xjolom. ¹⁸ Tojo'nak que'oc chixjapbal reheb chixyebal: —Sahak taxak sa' ach'ol, at xReyeb laj judío, chanqueb. ¹⁹ Ut yoqueb chixsaq'uinquil sa' xjolom riq'uin che'. Cuan que'chuban re ut cuan ajcui' que'xcuik'ib ribeb chiru re retz'unquil. ²⁰ Ut nak ac que'xtacuasi, que'risi li caki ak' chirix ut que'xq'ue cui'chic li rak' chirix. Tojo'nak que'xc'am re te'xq'ue chiru cruz.

Li Jesús quiq'uehe' chiru cruz

²¹ Jun li cuñk aj Simón xc'aba' yo chi chalç sa' c'alebaj. Cirene lix tenamit. Li cuñk a'an xyucua' laj Alejandro ut laj Rufo. Eb li soldado que'xmin ru laj Simón chixpakonquil lix cruz li Jesús. ²² Que'xc'am li Jesús sa' li na'ajej Gólgota xc'aba'. Chi jalbil ru naraj naxye: Xna'aj Xbakel Xjolom Camenak. ²³ Ut que'xq'ue vino re li Jesús yubil riq'uin c'ahil ban re xc'osbal li raylal aban li Jesús inc'a' quiruc'. ²⁴ Tojo'nak que'xq'ue chiru cruz. Ut eb li soldado que'bulic chirix li rak' re rilbal ani na taçchanjnk re li junjunk. ²⁵ Beleb or re ek'ela que'xq'ue li Jesús chiru cruz. ²⁶ Sa' xben li cruz que'xq'ue jun retalil c'a'ut nak que'xcamsi ut naxye: A'an a'in lix reyebe laj judío. ²⁷ Ut cuib laj elk' que'q'uehe' chiru cruz rochben, jun sa' xnim uk' ut jun sa' xtz'e. ²⁸ Jo'can nak quitz'akloc ru li naxye sa' li Santil Hu: A'an quiq'uehe' sa' ajl sa' xyankebe laj mac. (Is. 53:12) ²⁹ Ut eb li tenamit nak que'nume' aran que'xhob li Jesús. Que'rec'asi xjolomeb ut que'xye: —Laat pe' xatjuc'uc raj re rochoch li Dios, ut yal chiru oxib cutan raj xayib cui'chic. ³⁰ Col açuib anakcuan ut cuben chak chiru li cruz, chanqueb. ³¹ Jo'can ajcui' que'xbanu eb li xbenil aj tij. Que'xhob li Jesús nak que'xye chi ribileb rib rochbened laj tz'ib: —Jalan chic xcoleb ut a'an inc'a' naru naxcol rib xjunes. ³² Chicubek chak chiru li cruz anakcuan li Cristo lix Reyeb laj judío re nak takil ut takapab, chanqueb. Ut eb li que'q'uehe' chiru cruz rochben que'xhob ajcui' li Jesús.

Lix camic li Jesucristo

³³ Tuktu li cua'leb nak quik'ojyino' sa' chixjunil li ruchich'och' ut oxib or re ecuu quicutano' cui'chic. ³⁴ Ut sa' li or a'an li Jesús quiatinac chi cau ut quixye: —Eloi, Eloi, ¿lama sabactani?— Chi jalbil ru naraj naxye, “At inDios, at inDios, ¿c'a'ut nak xinacanab injunes?” ³⁵ Nak li cuanqueb aran que'rabi li ratin, cuan li que'xye: —Abihomak, yo chixbokbal li profeta Elías, —chanqueb. ³⁶ Ut jun sa' xyankeb coo sa' anil ut coxtz'a chak jun li esponja sa' vinagre ut quixtaksi sa' ru'uj jun che' re xq'uebal chi ruc' li Jesús ut quixye: —Kilak cuan ma tachalk na laj Elías chixcubsinquil, chan. ³⁷ A'ut li Jesús quixjap re chi cau ut qui-el xch'ol. ³⁸ Ut lix t'icrul li rochoch li Dios quik'iche', ut lix pejelal quiticla chak takec' ut toj tak'a coxrake'. Ca' jachal qui-el. ³⁹ Jun li capitán aj Roma cuan aran xakxo chiru li Jesús. Nak quiril chanru nak quicam, li capitán quixye: —Yal nak li cujnk a'in tz'akal Lalal li Dios.— ⁴⁰ Cuanqueb ajcui' ixk yoqueb chi iloc chi najt. Sa' xyankeb a'an cuan lix María aj Magdala, lix Salomé ut lix María xna'eb laj José ut laj Jacobo li itz'inbej. ⁴¹ Eb li ixk a'in, a'an li que'taken re li Jesús nak toj cuan chak Galilea ut que'c'anjelac chiru. Ut cuanqueb nabal chic li ixk cuotz que'cuulac Jerusalén rochben li Jesús.

Nak quimuke' li Jesucristo

⁴² Nak ac oc re li k'ojyin, ac nach'oc chak re li hilobal cutan. Yoqueb chix-cauresinquil ribeb re li hilobal cutan. ⁴³ Quicuan jun li cujnk aj José xc'aba' Arimatea xtenamit. A'an jun xnimal ru cujnk sa' xyankeb li neque'tz'iloc atin ut yo chixyo'oninquil lix nimal xcuanquil li Dios. Inc'a' quixucua laj José nak quicuulac chixtz'amanquil chiru laj Pilato nak a'an tamukuk re lix tz'ejcual li Jesús. ⁴⁴ Laj Pilato quisach xch'ol chirabinquil nak ac xcam li Jesús. Ut quixtakla xbokbal li capitán ut quixpatz' re: —¿Ma yal nak ac xcam li Jesús? chan re. ⁴⁵ Li capitán quixye re nak ac xcam. Tojo'nak laj Pilato quixye re laj José nak naru tixc'am. ⁴⁶ Ut laj José quixlok' jun çabil t'icr lino. Quixcubsi chak li camenak chiru li cruz ut quixlan sa' li çabil t'icr. Ut quixq'ue sa' jun muklebal yibanbil sa' jun sakonac. Ut quixbalk'usi jun nimla pec chire li muklebal. ⁴⁷ Ut lix María aj Magdala ut lix María xna' laj José que'ril bar quixmuk.

16

Li Jesús quicuacli cui'chic chi yo'yo sa' xyankeb li camenak

¹ Nak quinume' li hilobal cutan, lix María aj Magdala ut lix Salomé ut lix María xna' laj Jacobo que'xlok' li sununquil ban re te'xic chixq'uebal sa' xben li camenak. ² Toj ek'ela que'coeb sa' li xben li cutan re li xaman. Ac x-el chak li sak'e nak yoqueb chi xic sa' li muklebal. ³ Ut yoqueb chixyebal chi ribileb rib: —¿Ani tajsink re li pec li cuan chire li muklebal? chanqueb. ⁴ Ut nak que'cuulac cuan cui' li muklebal, que'ril nak ac isinbil chic li nimla pec chire li muklebal. ⁵ Ut nak que'oc sa' li muklebal que'ril jun li saj cujnk chunchu chak sa' li muklebal sa' xnim uk'eb. Li saj cujnk a'an tikto riq'uin jun saki t'icr nim xbas ut eb li ixk c'ajo' nak que'xucuaç chirilbal. ⁶ Ut li cujnk quixye reheb: —Mexxucuaç. Lain ninnau nak yoquex chixsic'bal li Jesús aj Nazaret li que'xcamsi chiru cruz. A'an ma ani chic arin. Ac xcuacli cui'chic chi yo'yo. Ilomak lix na'aj li xcuan cui' li camenak. ⁷ Ayukex, yehomak chak reheb lix tzolom, jo' ajcui' re laj Pedro, nak a'an xben cua taxic Galilea cheru laex. Aran toxeril ru jo' quixye ere, chan. ⁸ Ut eb li ixk que'el aran ut que'coeb sa' anil ut neque'sicsot xbaneb xxiu. Ut ma ani aj e que'xye xban nak te'xucuaç.

Li Jesucristo quixc'utbesi rib chiru lix María Magdala ut cuib lix tzolom

⁹ Toj ek'ela sa' li xben li cutan re li xaman quicuacli li Jesús chi yo'yo sa' ryankeb li camenak. Li xben li quixc'utbesi cui' rib li Jesús, a'an lix María aj Magdala. A'an li ixk li qui-isic li cuukub chi maus aj musik'ej riq'uin xban li Jesús. ¹⁰ Li ixk a'an co chixyebal reheb lix tzolom li Jesús. Nak quicuulac riq'uineb, coxtauheb chi yabac xban xrahil xch'oleb. ¹¹ Ut lix María quixserak'i reheb nak yo'yo li Jesús ut nak quiril ru. Abanan eb a'an inc'a' que'xpab li c'a'ru quixye. ¹² Ut chirix a'an, li Jesús quixc'utbesi cui'chic rib chiruheb cuib lix tzolom nak yoqueb chi xic sa' c'alebaj. Jalan chic rilbal nak quixc'utbesi rib chiruheb. ¹³ Eb a'an que'coeb ut coxe'xye resil reheb li jun ch'ol chic. Ut chi moco li cuib a'an que'xpab.

Li Jesucristo quixtaklaheb lix tzolom chixyebal resil li colba-ib

¹⁴ Mokon chic eb li junlaju chi xtzolom cuanqueb sa' mex nak quixc'utbesi rib li Jesús chiruheb. Ut quixk'useb xban nak inc'a' que'paban ut xban xcacuil lix ch'oleb. Inc'a' que'xpab li c'a'ru que'xye li que'iloc ru li Jesús xben cua nak ac xcuacli cui'chic chi yo'yo sa' ryankeb li camenak. ¹⁵ Ut li Jesús quixye reheb: —Texxic sa' chixjunil li ruchich'och' ut tech'olob xyalal li colba-ib chiruheb chixjunileb li tenamit jun sut rubel choxa. ¹⁶ Li ani tapabank ut tacubek xha', a'an tacolek'; a'ut li ani inc'a' tapabank, a'an taxic sa' tojba mac. ¹⁷ A'an a'in li retalil li talaje'xbanu li te'pabank. Sa' inc'aba' lain te'isink maus aj musik'ej ut te'atinak sa' jalan atinobal. ¹⁸ Cui te'xchap c'anti' chi ruk'eb, mac'a' te'xc'ul ut cui te'ruc' li c'a'ak re ru nacamsin, mac'a' te'xc'ul. Cui te'xq'ue li ruk' sa' xbeneb li yaj, te'q'uirak, chan li Jesús.

Li Jesucristo co sa' choxa

¹⁹ Nak ac xratinaheb lix tzolom li Kacua' Jesucristo, quic'ame' sa' choxa xban li Dios, ut quic'ojla sa' xnim uk' li Acuabej Dios. ²⁰ Ut eb lix tzolom que'coeb sa' chixjunil li na'ajej chixch'olobanquil xyalal li colba-ib. Ut li Kacua' yo' chi tenk'anc reheb. Ut q'uebil xcuanquil li ratineb xban li Dios riq'uin li milagro quilaje'xbanu chiruheb li tenamit. Jo'can taxak.

Li Resil li Colba-ib li Quixtz'iba li San Lucas

Xticlajic li hu li quixtz'iba laj Lucas re laj Teófilo

¹ Nabaleb li que'yaloc re xtz'ibanquil chi tz'akal re ru chanru lix na'leb li Jesucristo nak quicuan sa' kayank. ² Li que'c'utuc chak chiku, a'an eb li tz'akal que'iloc chak re riq'uin xnak'eb ru chanru quic'ulman chalen nak quixtiq'ueb chak lix c'anjel ut que'xch'olob li xyalal. ³ At Kaçua' Teófilo, laät cuan açuanquil. Nak ac xintz'ili rix chi us chixjunil li c'a'ru quic'ulman, xinc'oxla nak us tintz'ibak açuiq'uin re xyebal açue chi tz'akal re ru chanru tz'akal quic'ulman. ⁴ Yoquin chi tz'ibac açuiq'uin re nak taq'ue retal chi tz'akal li xyalal li xatzol cui' açuib.

Li ángel quixye re laj Zacarías nak taçuank jun li ralat ut aj Juan te'xq'ue chok' xc'aba'

⁵ Sa' eb li cutan nak quicuan chok' rey laj Herodes aran Judea, quicuan jun laj tij aj Zacarías xc'aba'. A'an xcomoneb li ralat xc'ajol laj Abías. Li rixakil xElisabet xc'aba'. A'an xcomoneb li ralat xc'ajol laj Aarón. ⁶ Laj Zacarías ut li rixakil, a'an tiq'ueb xch'ol chiru li Dios. Junelic neque'xq'ue xch'oleb chixbanunquil chi tz'akal lix chak'rabinquileb ut lix taklanquileb xban li Kaçua' Dios. ⁷ Abanan maç'a' xcoc'aleb xban nak lix Elisabet inc'a' naq'uiresin ut xban ajcui' nak ac cheq'ueb chic. ⁸ Sa' jun li cutan laj Zacarías yo chixbanunquil lix c'anjel chiru li Dios sa' li templo jo' c'aynakeb xbanunquil. ⁹ Quit'ane' sa' xben laj Zacarías oc sa' li Santil Na'ajej sa' li templo chixc'atbal li incienso. ¹⁰ Nak yo chi c'atc li incienso chixjunileb li tenamit ch'utch'uq'ueb chirix cab ut yoq'ueb chi tijoc. ¹¹ Sa' li honal a'an quixc'utbesi rib chiru laj Zacarías jun x-ángel li Kaçua' Dios. Xakxo sa' xnim chixc'atk li artal li nac'atman cui' li incienso. ¹² C'ajo' nak quisach xch'ol laj Zacarías nak qiriril li ángel ut quixcucac. ¹³ Ut li ángel quixye: —At Zacarías, matxucucac. Li Dios xrabi li c'a'ru xatz'ama. Lix Elisabet la cuixakil taçuank jun xc'ula'al ut Juan taq'ue chok' xc'aba'. ¹⁴ Nak tayo'lak la cualal, c'ajo' nak taçahok' sa' aç'ol laät ut nabaleb ajcui' li cristian te'sahok' sa' xch'oleb. ¹⁵ La cualal li tayo'lak taq'uehek' xcuanquil xban li Dios. A'an inc'a' tauc'ak vino chi moco li ha' li nacaltesin. Ut ac cuank chak li Santil Musik'ej riq'uin nak toj maji'ak nayo'la. ¹⁶ Ut sa' xc'aba' a'an nabaleb li ralat xc'ajol laj Israel te'xsic' cui'chic li Kaçua' Dios. ¹⁷ A'an xben cua taxic chiru li Kaçua' chixch'olobanquil li xyalal. Cuank li Santil Musik'ej riq'uin ut cuank xcuanquil jo' li cuanquilal li quiq'uehe' re laj Elias xban li Dios. Ut sa' xc'aba' a'an te'xc'am cui'chic rib sa' usilal li yucua'bej riq'ueineb li alalbej. Eb laj k'etol atin te'xjal xna'leb ut te'xtzol ribeb riq'ueineb li tiq'ueb xch'ol. Tixcauresi li tenamit chixc'ulbal li Kaçua', chan li ángel. ¹⁸ Quichak'oc laj Zacarías ut quixye: —¿Chanru nak tinnau nak yal li yoçat chixyebal cue? Lain tixin chic. Jo'can ajcui' li cuixakil, chan. ¹⁹ Ut li ángel quixye: —Lain li ángel Gabriel li ninc'anjelac chiru li Dios. Ut a'an xtaklan chak cue xyebal açue li chañil esilal a'in. ²⁰ Anakuan laät tatcanak chi mem xban nak inc'a' xapaç li c'a'ru xinye. Inc'a' tat-atinak toj taçuulak xk'ehil nak taç'ulmank chixjunil a'in, chan li ángel. ²¹ Eb li tenamit cuanqueb chirix cab. Yoq'ueb chiroybeninquil laj Zacarías. Yoq'ueb chixc'oxlanquil c'a'ru xc'ul nak xbay chak sa' li templo. ²² Ut nak qui-el chak sa' li templo mem chic laj Zacarías. Inc'a' chic naatinac. Yal ruk' aj chic

naxc'ut chiruheb li neque'atinan re. Ticto que'xtau ru nak quic'utbesic chak chiru jun li visión sa' li templo. ²³ Nak ac xrake' xbanunquíl lix c'anjel sa' li templo, laj Zacarías quisuk'i sa' rochoch. ²⁴ Ut chirix chic a'an lix Elisabet, li rixakil laj Zacarías, quicana chi yaj aj ixk. Ut chiru ob po quicana sa' li rochoch. Mā bar qui-el ut yō chixyebal sa' xch'ol: ²⁵ —Jo'ca'in nak xruxšana cuu li Kaçua'. Xrisi lin xutañ chiruheb li tenamit nak xq'ue jun lin c'ula'al, chan.

Li ángel quixye re lix María nak taçuank jun lix c'ula'al; a'an li Cristo

²⁶ Nak ac yō chic xcuak po xcanajic chi yaj aj ixk lix Elisabet, li ángel Gabriel quitaklāc xban li Dios sa' jun li tenamit Nazaret xc'aba' li cuan xcuēnt Galilea. ²⁷ Quitaklāc riq'uin jun li xka'al xMaría xc'aba' toj maji' cuanjenak riq'uin cuñk. Ac tz'amanbil xban jun li cuñk aj José xc'aba'. Li cuñk a'an xcomoneb li ralal xc'ajol li rey David. ²⁸ Li ángel quicuulac riq'uin lix María ut quixye re: —Sahak taxak sa' la ch'ol xban nak laat li sic'bil acuu. Li Kaçua' cuan acuiq'uin ut osobtesinbilat sa' xyañkeb li ixk, chan li ángel. ²⁹ Ut lix María quisach xch'ol chirabinquíl li quixye li ángel. —¿C'a'ru xyalal li atin li xye cue? chan sa' xch'ol. ³⁰ Ut li ángel quixye re: —Matxucuac, María. Li Dios xsic'oc acuu xban nak chābil ana'leb. ³¹ Anakcuan tatcanāk chi yaj aj ixk. Li Dios tixq'ue jun ac'ula'al telom ut Jesús lix c'aba' taq'ue. ³² Nimak xcuanquíl nak taçuank ut chixjunileb te'na'ok re nak a'an tz'akal Ralal li Dios. Ut li Kaçua' taq'uehok xcuanquíl chi taklānc jo' nak quicuan chi taklānc li rey David lix xe'tonil yucua'. ³³ A'anak chic li cuank xcuanquíl chi taklānc sa' xbeneb li ralal xc'ajol laj Jacob. Ut lix cuanquílal taçuank chi junelic. Inc'a' taosok, chan li ángel. ³⁴ Quichak'oc lix María ut quixye: —¿Chanru nak taçuank inc'ula'al xban nak lain moco cuanquin ta riq'uin cuñk? chan lix María. ³⁵ Li ángel quixye re: —Riq'uin xcuanquíl li Santil Musik'ej tatcanāk chi yaj aj ixk. Lix cuanquíl li nimajcual Dios taçuank acuiq'uin. Ut li c'ula'al li tayo'lak, a'an santo ut tz'akal ralal li Dios. ³⁶ Jo'can ajcui' lix Elisabet la cuae'alal yaj aj ixk anakcuan. Ac cuakib po chic xcanajic chi yaj aj ixk, usta ac tix chic ut usta chixjunileb que'xye nak a'an inc'a' taçuank xcoc'al. ³⁷ Riq'uin a'in nac'utun nak maç'a' ch'a'aj chiru li Dios, chan li ángel. ³⁸ Ut lix María quixye: —Lain aj c'anjel chiru li Kaçua' Dios. Xbanuhak cuiq'uin li c'a'ru xaye, chan. Ut chirix chic a'an, cō li ángel.

Lix María quicuulac chirula'andinquíl lix Elisabet

³⁹ Ac xnume' chic cuib oxib cutan nak lix María cō sa' junpat sa' jun li na'ajej tzul ru cuan sa' xcuēnt Judea. ⁴⁰ Quicuulac sa' rochoch laj Zacarías ut quixq'ue xsahil xch'ol lix Elisabet. ⁴¹ Nak quirabi lix sahil xch'ol lix Elisabet li quiq'uehe' xban lix María, quirec'a nak qui-ec'an chak lix c'ula'al. Ut sa' ajcui' li honal a'an lix Elisabet quinuajac chi Santil Musik'ej. ⁴² Ut lix Elisabet quixye chi cau xyāb xcux: —Osobtesinbilat sa' xyañkeb chixjunileb li ixk ut osobtesinbil ajcui' la c'ula'al li tayo'lak. ⁴³ Lain moco inc'ulub ta nak tatchalk chicuilbal xban nak laq lix na' li Kaçua', li ninlok'oni lain. ⁴⁴ Nak xcuabi lix sahil inch'ol xaq'ue, xcuec'a nak lin c'ula'al x-ec'an chak xban xsahil xch'ol. ⁴⁵ Us xak acue xban nak xapāb nak taç'ulmank li c'a'ru xye li Kaçua', chan lix Elisabet.

Lix María c'ajo' xsahil sa' xch'ol ut quixlok'oni li Kaçua'

⁴⁶ Ut lix María quixye:

—Chi anchal inch'ol ninq'ue xlok'al li Kaçua'.

⁴⁷ Nasaho' sa' inch'ol riq'uin li Dios laj Colol cue,

- 48 xban nak xruxtana cuu lain aj c'anjel chiru, usta mac'a' incuanquil. Chalen anakcuan us xak re cha'keb cue chixjunileb li tenamit.
- 49 Lok'oninbil taxak ru li Kacua' li k'axal nim xcuanquil xban nak quixc'utbesi chicuu lix nimal lix cuanquilal. A'an tz'akal santo.
- 50 Li Kacua' junelic na-uxtanan u. Naruxtana ruheb li neque'xucuan ru.
- 51 Sachba ch'olej li quixbanu riq'uin xnimal xcuanquil. Quixpo' ru li yoqueb chixc'oxlanquil xbanunquil li k'etk'eteb, li neque'rec'a sa' xch'oleb nak ninkeb xcuanquil.
- 52 Quirisi sa' xna'ajeb li cuanqueb sa' xcuanquil. Ut quixq'ueheb xlok'al li mac'a'eb xcuanquil.
- 53 Li mac'a' cuan reheb naxq'ue chi nabal c'a'ru reheb. Ut eb li biom naxtaklaheb chi mac'a' cuan reheb.
- 54 A'an junelic quixtenk'aheb laj Israel lix tenamit ut inc'a' quisach sa' xch'ol ruxtananquil ruheb,
- 55 xban nak jo'can quixyechi'i reheb li kaxe'tonil yucua'. Quixyechi'i re laj Abraham nak taruxtana ruheb li rala' xc'ajol chi junelic, chan lix Maria.
- 56 Ut lix Maria quicuan oxib po riq'uin lix Elisabet. Ut chirix a'an quisuk'i sa' rochoch.

Li xyo'lajic laj Juan laj Cubsihom Ha'

- 57 Quicuulac xk'ehil nak tayo'lak lix c'ula'al lix Elisabet ut quicuan jun lix c'ula'al ch'ina telom. 58 Nak que'rabi resil li rech cabal jo' cui' eb li rech'alal nak qui-uxtanaç ru lix Elisabet xban li Kacua', que'saho' ajcui' sa' xch'oleb a'an. 59 Ac cuan cuakxakib cutan re li c'ula'al, nak quixc'ul li circuncisión. Aj Zacarias raj que'xq'ue chok' xc'aba' chok' rekaj lix yucua'. 60 Abanan li na'bej quixye: —Inc'a'. Aj Juan takaq'ue chok' xc'aba', chan. 61 Que'chak'oc ut que'xye re: —¿C'a'ut nak taçua'j xq'uebal aj Juan chok' xc'aba'? Ma' jun sa' xyankeb la' cuech'alal cuan ta xc'aba' jo' a'an, chanqueb. 62 Que'xc'ut li ruk'eb chiru laj Zacarias re xpatz'bal re c'a'ru c'aba'ej taraj xq'uebal chok' xc'aba' li rala'. 63 Laj Zacarias quixpatz' jun xhu reheb re tixtz'iba li c'aba'ej chiru. Ut sa' li hu quixtz'iba “Juan lix c'aba' teq'ue”. Nak que'ril li hu, que'sach xch'oleb chixjunileb. 64 Ut sa' ajcui' li honal a'an laj Zacarias quiru chic chi atinac ut qui-oc chixlok'oninquil li Kacua' Dios. 65 C'ajo' nak que'oc xxiuheb chixjunileb li rech cabal ut yalak bar sa' li na'ajeb tzul ru li cuan sa' xcuent Judea qui-el resil li c'a'ru quic'ulman. 66 Ut chixjunileb li que'abin re que'xq'ue sa' xch'oleb ut que'xye: —¿C'a'ru anchal tixc'anjela li c'ula'al a'in nak tanimank? Nac'utun nak cuan xcuanquil li Dios riq'uin, chanqueb.

Li Profeta Zacarias quixye li c'a'ru quic'utbesic chiru xban li Dios

- 67 Ut laj Zacarias lix yucua' laj Juan quinuajac chi Santil Musik'ej. Qui-oc chi atinac ut quixye li c'a'ru quic'utbesic chiru xban li Dios. Ut quixye chi jo'ca'in:
- 68 —Lok'oninbil taxak li Kacua' Dios li neque'xlok'oni laj Israel xban nak xril xtok'obal ruheb lix tenamit ut xcoleb.
- 69 Xq'ue jun laj Colol ke k'axal nim xcuanquil. Quixsic' ru sa' xyankeb li rala' xc'ajol li rey David laj c'anjel chiru.
- 70 A'in quixyechi'i chak junxilaj jo' que'xye ke li santil profetas.
- 71 Quixye reheb nak toxcol chiruheb li xic' neque'iloc ke ut torisi rubeleb xcuanquil.
- 72 Quixye nak taruxtana ruheb li kaxe'tonil yucua' xban nak jultic re li quixye sa' li santil contrato.

- ⁷³ Li Kaçua' riq'uin juramento quixyechi'i a'an re laj Abraham li kaxe'tonil yucua'.
- ⁷⁴ Quixye re nak a'an taçolok ke chiruheb li xic' neque'iloc ke re nak toc'anjelak chiru a'an chi maç'a'ak kaxiu,
- ⁷⁵ ut re ajcui' nak junelic toçuank sa' santilal ut sa' tiçuilal chiru li Dios.
- ⁷⁶ At cualal, laaç xprofeta li nimajcual Dios. Laaç tatxix xben cua chiru li Kaçua' ut taç'olob li xyalal chiruheb li tenamit re nak te'xcauresi ribeb chixc'ulbal li Kaçua'.
- ⁷⁷ Taç'ut chiruheb li tenamit chanru nak te'cuyek' te'sachek' lix maqueb ut te'colek'.
- ⁷⁸ Xban nak k'axal nim ruxtañ li Kaçua' Dios, xtakla chak li Jun li taçutanobresink re li kac'a'ux.
- ⁷⁹ Ut tixcutanobresi xc'a'uxeb li cuanqueb sa' xk'ojoyinal ru li maç, li camqueb re sa' li mausilal. Ut a'an taçberesink ke sa' li tuktuçuilal, çan laj Zacarías.
- ⁸⁰ Ut li c'ula'al yo chi q'uic ut yo chi cacuuc sa' xpabal. Ut quicuan sa' li çaki ch'och' bar inc'a' q'uiheb li tenamit toj quicuulac xk'ehil nak quixtiçuib xch'olobanquil li xyalal chiruheb laj Israel.

2

Jo'ca'in nak quiyo'la li Jesús

¹ Sa' eb li cutan a'an li acuabej César Augusto quixq'ue jun li çak'rab re nak chixjunileb li tenamit te'ajlak ut te'xq'ue xc'aba'eb chi tz'ibac. ² A'in li xben sut nak que'xtz'iba xc'aba'eb li tenamit. A'an quic'ulman nak cuank laj Cirenio chi taklanc sa' li na'ajej Siria. ³ Chixjunileb que'coeb xq'uebaleb xc'aba' chi tz'ibac. Ac sa' xtenamiteb li junjank que'coeb chixtz'ibanquileb lix c'aba'. ⁴ Laj José qui-el sa' li tenamit Nazaret li cuan sa' xcuent Galilea ut ço Belén li cuan xcuent Judea. A'an xtenamit li rey David. Aran ço xban nak a'an xcomoneb li ralal xc'ajol laj David. ⁵ Aran quixq'ue xc'aba' chi tz'ibac rochben lix María li ac tz'amanbil xban. Lix María ac yaj aj ixk. ⁶ Nak ac cuanqueb aran Belén quicuulac xk'ehil nak taço'lak lix c'ula'al. ⁷ Ut quiyo'la li xben xc'ula'al, quixlan sa' t'icr ut quixyocob sa' xna'aj xcuaheb li cuacax xban nak maç'a' xna'ajeb sa' eb li ochoch.

Nak que'rabi resil li xo'la'jic li Jesús, eb laj ilol xul que'coeb chixlok'oninquit

⁸ Nach' riq'uin li tenamit Belén cuanqueb aj ilol xul yoqueb chixc'ac'alenuil lix quetomk chi k'ek. ⁹ Maç'a' sa' xch'oleb nak xakamil jun x-ángel li Kaçua' chiruheb. Ut quisakeno' chi xjun sutam li cuanqueb cui'. Ut eb laj ilol xul c'ajo' nak que'xucuac. ¹⁰ Abanan li ángel quixye reheb: —Mexxucuac xban nak lain xinchal xyebal ere jun çabil esilal. A'in jun sahil ch'olej çok' reheb chixjunileb li tenamit. ¹¹ Anakcuan xyo'la jun laj Colol ere sa' lix tenamit laj David ut a'an li Cristo li Kaçua' li yechi'inbil xban li Dios. ¹² Jo'ca'in nak tetau. Li c'ula'al lanbil sa' t'icr ut yocyo sa' xben li q'uim sa' xna'aj xcuaheb li cuacax. A'in li retalil nak a'an li tetau, çan li ángel. ¹³ Ut sa' junpaç que'chal nabaleb chic li ángel sa' choxa. Yoqueb chixlok'oninquit li Kaçua' ut yoqueb chixyebal: ¹⁴ —Chinimak taxak xlok'al li Kaçua' Dios li cuan sa' choxa ut chicuank taxak li tuktuçuilal sa' xyankeb li cristian li raroqueb xban li Dios.— ¹⁵ Nak ac xcœb li ángel sa' choxa, eb laj ilol xul que'oc chixyebal chi ribileb rib: —Yoqeb Belén ut takil çak li c'a'ru xc'ulman, li xtakla xyebal ke li Kaçua', çanqueb. ¹⁶ Coeb sa' anil ut que'xtau lix María rochben laj José ut li c'ula'al yocyo sa' xna'aj xcuaheb li xul. ¹⁷ Ut

nak ac xe'xtau, que'xserak'i reheb li c'a'ru quiyeh'e' reheb chirix li c'ula'al.
¹⁸ Ut chixjunileb li que'abin re li c'a'ru que'xye laj ilol xul, sachsoqueb xch'ol que'cana. ¹⁹ Ut lix María quixc'ula sa' xch'ol chixjunil li c'a'ru quic'ulman ut yo' chixc'oxlanquil rix. ²⁰ Ut chirix chic a'an eb laj ilol xul que'suk'i sa' lix na'ajeb. Yoqueb chixlok'oninquil ut yoqueb chixnimanquil ru li Kaçua' riq'uin li c'a'ru que'rabi ut que'ril xban nak chixjunil li que'ril, a'an jo' li quiyeh'e' reheb.

Li Jesús quik'axtesic sa' ruk' li Dios sa' li templo

²¹ Cuakxakib cutan cuan re li c'ula'al nak quixc'ul li circuncisión ut Jesús que'xq'ue chok' xc'aba', jo' quiyeh'e' re lix María xban li ángel nak toj maji' nacana chi yaj. ²² Lix María quixbānu jo' naxye sa' lix chak'rab laj Moisés. Nak ac xnume' ca'c'al cutan, lix María rochben laj José que'xc'am li c'ula'al Jerusalén ut que'xk'axtesi chiru li Kaçua'. ²³ Que'xbanu chi jo'can xban nak sa' li chak'rab li quiq'uehe' reheb xban li Kaçua' naxye nak li xben alalbej tento tak'axtesik sa' ruk' li Kaçua'. ²⁴ Ut te'xq'ue chok' xmajejeb jun sumalak li mucuy malaj ut cuibak li paloma li toj saheb, jo' naxye sa' li chak'rab.

Laj Simeón quixq'ue xlok'al li Jesús ut quixye ajcui' resil li raylal li tixc'ul

²⁵ Aran Jerusalén cuan jun li cujnk aj Simeón xc'aba'. Li cujnk a'an tix xch'ol ut naxq'ue xlok'al li Dios. Yo' chiroybeninquit nak li Dios tarisiheb sa' raylal laj Israel. Ut cuan li Santil Musik'ej riq'uin. ²⁶ Li Santil Musik'ej quixc'utbesi chiru laj Simeón nak a'an inc'a' taçamk toj taril ru li Cristo li Colonel li quixyechi'i li Kaçua' Dios. ²⁷ Li Santil Musik'ej quixc'ut chiru laj Simeón nak taxic sa' li templo xban nak sa' li honal a'an quic'ame' li Jesús sa' li templo xban laj José ut lix María re nak te'xk'axtesi sa' ruk' li Dios jo' naxye sa' li chak'rab. ²⁸ Ut laj Simeón quixk'alu li Jesús, quixq'ue xlok'al li Kaçua' ut quixye:

²⁹ —At Kaçua', anakcuan xabānu jo' xayechi'i cue. Anakcuan naru tincamk chi c'ojc'o inch'ol,

³⁰ xban nak riq'uin xnak' cuu xcuil li Colonel li yechi'inbil aban,

³¹ li xaq'ue chak re xcolbaleb chixjunileb li cuanqueb sa' ruchich'och'.

³² A'an li taçutanobresink re lix c'a'uxeb li maçua'eb aj Israel ut a'an lix lok'aleb la tenamit Israel, chan laj Simeón.

³³ Laj José ut li na'bej sachsoqueb xch'ol que'cana chirabinquit li yo' chixyebal laj Simeón chirix li Jesús. ³⁴ Ut laj Simeón quixtz'ama rusilal li Dios sa' xbeneb ut quixye re lix María li na'bej: —Chacuabi li oc cue xyebal acue. Sa' xc'aba' li c'ula'al a'in, nabaleb laj Israel te'colek' ut sa' xc'aba' ajcui' a'an nabaleb li te'sachk. Ut nabaleb li te'tz'ektanank re. ³⁵ Riq'uin li raylal te'xbanu re, taç'utunk chi tz'akal li c'a'ru cuan sa' xch'oleb li xic' neque'iloc re. Ut c'ajo' nak tarahok' ach'ol laät xban li raylal te'xbanu re. Chanchan nak te'xnumsi jun ch'ich' sa' la çuam, chan laj Simeón. ³⁶ Ut cuan ajcui' jun li xmalca'an aran profeta, xAna xc'aba'. A'an xrabin laj Fanuel xcomoneb li ralal xc'ajol laj Aser. Ac tix chic. Toj saj nak quisumla ut cuukub chihab ajcui' quicuan rochben lix belom. ³⁷ Ac cuan chic cahib ro'c'al chihab (84) xcanajic xjunes. A'an cuan junelic sa' li templo. Yo' chi c'anjelac chiru li Kaçua' chi k'ek chi cutan. Junelic yo' chi tijoc ut yo' chixbanunquit x-ayun. ³⁸ Sa' li honal a'an quicuulac cuan cui' li Jesús. Yo' chixlok'oninquit li Dios ut qui-oc chi atinac chirix li c'ula'al riq'uineb laj Jerusalén li yoqueb chiroybeninquit lix colbaleb. ³⁹ Nak ac que'xbanu chixjunil li naxye sa' li chak'rab li quixq'ue li Kaçua', laj José ut lix María que'suk'i sa' li tenamit Nazaret li cuan sa' xcuent

Galilea. ⁴⁰ Ut li c'ula'al yō chi q'ujc ut yō chi cacuuc xch'ol. Ut yō chixtaubal xna'leb. Ut li rusilal li Kaçua' cuan riq'uin.

Li Jesús quicana sa' li templo ut quiatınac riq'ıneb laj tzolol chak'rab

⁴¹ Rajlal chihab neque'xic lix na' xyucua' aran Jerusalén chixnink'equil li reliqueb Egipto. Pascua neque'xye re li nink'e a'an. ⁴² Nak ac cuan cablaju chihab re li Jesús, cōeb aran Jerusalén sa' li nink'e jo' c'aynakeb xbanunquıl. ⁴³ Ut nak ac xrake' li nink'e que'suk'i sa' lix tenamiteb. Ut li Jesús quicana Jerusalén chi inc'a' naxnau laj José chi moco li na'bej. ⁴⁴ Sa' xch'oleb a'an nak cuan sa' xyankeb li rochben. Jun cutan ac xe'bec nak que'xq'ue retal nak ma ani. Ut que'oc chixsic'bal sa' xyankeb li rech'alal ut sa' xyankeb li neque'na'oc ru. ⁴⁵ Que'ril nak inc'a' que'xtau. Que'suk'i cui'chic Jerusalén chixsic'bal. ⁴⁶ Nak ac xnume' chic oxib cutan, que'xtau aran sa' li templo. C'ojc'o sa' xyankeb li neque'xnau chi us li c'a'ru naxye sa' li chak'rab. Yō chirabinquıl li yoqueb chixyebal ut yō ajcui' chi patz'oc reheb. ⁴⁷ Ut chixjunıleb li yoqueb chi abınc re sachsoqueb xch'ol neque'cana xban nak cuan xna'leb ut naxnau xsumenquıl li c'a'ru neque'xpatz' re. ⁴⁸ Lix na' xyucua' sachsoqueb xch'ol que'cana nak que'ril nak li Jesús yō chi atınac riq'ıneb. Ut lix na' quixye re: —At inyum, ¿c'a'ut nak xabanu ke chi jo'ca'in? C'ajo' kac'a'ux chaçıix. La yucua' ut lain yōco chasic'bal, chan lix María. ⁴⁹ Quichak'oc li Jesús ut quixye re: —¿C'a'ut nak yoquex chınsic'bal? ¿Ma inc'a' ta bi' nequenau nak tento tinbanu lix c'anjel lin Yucua'? chan li Jesús. ⁵⁰ Ut eb a'an inc'a' que'xtau ru c'a'ut nak quixye reheb chi jo'can. ⁵¹ Li Jesús quisuk'i Jerusalén rochbeneb lix na' xyucua' ut na-abın chiruheb. Ut lix na' quixc'ula sa' xch'ol chixjunil li quic'ulman. ⁵² Li Jesús yō chi q'ujc ut yō ajcui' chixtaubal xna'leb. Quirahe' xban li Dios ut quirahe' ajcui' xbaneb li tenamıt.

3

Laj Juan laj Cıbsıhom Ha' quixye resıl lix c'ulunic li Jesucristo

¹ Yō o'laju chihab roquic chok' acuabej laj Tiberio César, nak cuank laj Poncio Pilato chi taklanc sa' li tenamıt Judea. Laj Herodes a'an cuank chi taklanc sa' li tenamıt Galilea. Ut laj Felipe li rıtz'in cuank chi taklanc sa' li tenamıt İtorea ut sa' li na'ajej Traconite, ut laj Lisanas cuank chi taklanc sa' li tenamıt Abılınia. ² Ut cuanqueb chok' xbenil aj tij laj Anás ut laj Caifás. Sa' eb li cutan a'an laj Juan li ralal laj Zacarías quiatınac xban li Dios nak cuan chak sa' li chaki ch'och'. ³ Laj Juan cō sa' li na'ajej cuan cui' li nima' Jordán ut qui-oc chıxch'olobanquıl li xyalal chiruheb li tenamıt li cuanqueb aran. Quixye reheb nak tento te'yot'ek' xch'ol te'xjal xc'a'ux ut te'xc'ul li cubi ha' re nak li Dios tıxcuy tıxsach lix maqueb. ⁴ Li profeta Isaiás quiatınac chirix laj Juan nak quixye chi jo'ca'in:

A'an tach'olobank xyalal chi cau xyab xcux sa' li chaki ch'och' ut tıxye:
Yıbomak le yu'am ut yo'on cuankex chıxc'ulbal li Kaçua' jo' nak neque'xyıb li be re xc'ulbal junak nim xcuanquıl.

⁵ Te't'ane'k' li tızul ut eb li coc' bol ut te'but'ek' eb li tak'a ruheb. Taçıcobresıj li be re nak tıç ru taçanaç.

⁶ Ut chıxjunıleb li cuanqueb sa' rıchıch'och' te'ril ru laj Colonel li xtakla chak li Dios. (Is. 40:3-5)

⁷ Quiril nak nabaleb li yoqueb chi cuulac yal re taçıbsıj xha'eb. Jo'can nak quixye reheb: —Laex chanchanex li ral li c'ambolay. ¿Anı xyehoc ere nak tarık teçol erıb chiru lix josc'il li Dios li taçalk sa' eben? ⁸ Chebanuhak ban li us re nak taç'utınc nak xyot'e' ech'ol ut xejal ec'a'ux. Chanchanaxek li che' çabil li ru naxq'ue. Meç'oxla nak inc'a' teç'ul xjosc'il li Dios yal xban nak

laex li ralar xc'ajol laj Abraham. Lain tinye ere nak li Dios taruk tixyo'obtesi li pec a'in chok' ralar xc'ajol laj Abraham. ⁹ Q'uehomak retal xban nak chalç re li rakba atin sa' eben jo' nak ac cauresinbil li mal re xyoc'bal lix xe' li che'. Ut chixjunil li che' inc'a' chabil li ru naxq'ue, nayoc'man ut naq'ueman sa' xam, chan laj Juan. ¹⁰ Ut eb li tenamit yoq'ueb chixpatz'bal re: —¿C'a'ru tento takabanu re nak inc'a' tarakek' atin sa' kaben? chanqueb. ¹¹ Quichak'oc laj Juan ut quixye reheb: —Li ani cuan cuibak sumal rak' chixq'uehak jun sumalak re li mac'a' re. Ut li ani cuan xtzacaemk, chixq'uehak re li mac'a' re, chan. ¹² Cuanqueb ajcui' aj titz'ol toj que'chal re te'cubsik xha' xban laj Juan ut que'xye re: —¿C'a'ru takabanu lao? chanqueb. ¹³ Ut a'an quixye reheb: —Mepatz' xben li toj li ac yebil reheb nak te'xq'ue, chan. ¹⁴ Ut cuanqueb ajcui' soldado que'patz'oc ut que'xye re: —Ut lao, ¿c'a'ru takabanu? chanqueb. Quixye reheb: —Ma ani temak' c'a'ru re ut ma ani tek'aba chi mac'a' rajbal. Chic'ojlak ban ech'ol riq'uin li jo' q'uial nequextoje' cui', chan. ¹⁵ Chixjunileb li tenamit yoq'ueb chix'oxlanquil ut que'xye sa' xch'oleb: —¿Ma macua' ta cui' a'an li Cristo, li Colonel li yoço chiroybeninquil? chanqueb. ¹⁶ Laj Juan quichak'oc ut quixye reheb chixjunileb: —Yal nak lain nincubsin ha' riq'uin ha'. Abanan chalç re li k'axal nim xcuanquil. Xban nak k'axal nim xcuanquil chicuun lain, moco inc'ulub ta nak tinhit xc'amal lix xab. A'an tixcubsi eha' riq'uin li Santil Musik'ej ut riq'uin xam. ¹⁷ A'an chanchan jun aj acuinel ac cuan chak xc'anjelebal sa' ruk'. Tarapu chi us li ru li trigo ut tixxoc lix trigo sa' lix c'ulebal ut li rix tixc'at sa' li xam. Jo'can ajcui' nak li Dios tarisiheb li inc'a' neque'paban sa' xyankeb li ralar xc'ajol ut tixtaklaheb sa' li xam li inc'a' nachup. Li ralar xc'ajol taçuank xyu'ameb chi junelic, chan laj Juan. ¹⁸ Jo'can nak yo chixch'olobanquil xna'lebeb li tenamit. Naxsic' chanru nak naxch'olob chi tz'akal li chabil esilal chiruheb. ¹⁹ Ut laj Herodes, li nataklan sa' li tenamit Galilea, quik'use' chi cau xban laj Juan xban nak quixc'am chok' rixakil lix Herodías, li rixakil laj Felipe li ritz'in. Ut quik'use' ajcui' riq'uin chixjunil li mausilal naxbanu. ²⁰ Ut k'axal cui'chic numtjenak li mausilal quixbanu nak quixq'ue sa' tz'alam laj Juan.

Quicubsic xha' li Jesús xban laj Juan laj Cubsihom Ha'

²¹ Sa' jun li cutan nak toj maji' quiq'uehe' sa' tz'alam laj Juan, yo chixcubsinquil xha'eb nabal li tenamit, ut quixcubsi ajcui' xha' li Jesús. Ut nak yo chi tijoc li Jesús, quiril nak quiteli li choxa chiru. ²² Li Santil Musik'ej chanchan jun li paloma nak yo chak chi cubec sa' xben li Jesús ut qui-abic xyab xcux li Dios toj sa' choxa nak quixye: —Laat li cualal rarocat inban. Nasaho' inch'ol acuiq'uin, chan.

A'an eb a'in lix xe'tonil yucua' li Jesús

²³ Ac cuan tana lajeb xca'c'al (30) chihab re li Jesús nak quixtiquib lix c'anjel. Chiruheb chixjunileb, li Jesús a'an ralar laj José, li ralar laj Elí. ²⁴ Ut laj Elí, a'an li ralar laj Matat. Laj Matat, a'an li ralar laj Leví. Ut laj Leví, a'an li ralar laj Melqui. Ut laj Melqui, a'an li ralar laj Jana. Ut laj Jana, a'an li ralar laj José. ²⁵ Laj José, a'an li ralar laj Matatías. Ut laj Matatías, a'an li ralar laj Amós. Ut laj Amós, a'an li ralar laj Nahum. Ut laj Nahum, a'an li ralar laj Esli. Ut laj Esli, a'an li ralar laj Nagai. ²⁶ Ut laj Nagai, a'an li ralar laj Maat. Ut laj Maat, a'an li ralar laj Matatías. Ut laj Matatías, a'an li ralar laj Semei. Ut laj Semei, a'an li ralar laj José. Ut laj José, a'an li ralar laj Judá. ²⁷ Laj Judá, a'an li ralar laj Joana. Ut laj Joana, a'an li ralar laj Resa. Ut laj Resa, a'an li ralar laj Zorobabel. Ut laj Zorobabel, a'an li ralar laj Salatiel. Ut laj Salatiel, a'an li ralar laj Neri. ²⁸ Ut laj Neri, a'an li ralar laj Melqui. Ut laj Melqui, a'an li ralar laj Adi. Ut

laj Adi, a'an li ralal laj Cosam. Ut laj Cosam, a'an li ralal laj Elmodam. Ut laj Elmodam, a'an li ralal laj Er. ²⁹ Ut laj Er, a'an li ralal laj Josué. Ut laj Josué, a'an li ralal laj Eliezer. Ut laj Eliezer, a'an li ralal laj Jorim. Ut laj Jorim, a'an li ralal laj Matat. ³⁰ Ut laj Matat, a'an li ralal laj Leví. Ut laj Leví, a'an li ralal laj Simeón. Ut laj Simeón, a'an li ralal laj Judá. Ut laj Judá, a'an li ralal laj José. Ut laj José, a'an li ralal laj Jonán. Ut laj Jonán, a'an li ralal laj Eliaquim. ³¹ Ut laj Eliaquim, a'an li ralal laj Melea. Ut laj Melea, a'an li ralal laj Mainán. Ut laj Mainán, a'an li ralal laj Matata. Ut laj Matata, a'an li ralal laj Natán. ³² Ut laj Natán, a'an li ralal laj David. Ut laj David, a'an li ralal laj Isaí. Ut laj Isaí, a'an li ralal laj Obed. Ut laj Obed, a'an li ralal laj Booz. Ut laj Booz, a'an li ralal laj Salmón. Ut laj Salmón, a'an li ralal laj Naasón. ³³ Ut laj Naasón, a'an li ralal laj Aminadab. Ut laj Aminadab, a'an li ralal laj Aram. Ut laj Aram, a'an li ralal laj Esrom. Ut laj Esrom, a'an li ralal laj Fares. Ut laj Fares, a'an li ralal laj Judá. ³⁴ Ut laj Judá, a'an li ralal laj Jacob. Ut laj Jacob, a'an li ralal laj Isaac. Ut laj Isaac, a'an li ralal laj Abraham. Ut laj Abraham, a'an li ralal laj Taré. Ut laj Taré, a'an li ralal laj Nacor. ³⁵ Ut laj Nacor, a'an li ralal laj Serug. Ut laj Serug, a'an li ralal laj Ragau. Ut laj Ragau, a'an li ralal laj Peleg. Ut laj Peleg, a'an li ralal laj Heber. Ut laj Heber, a'an li ralal laj Sala. ³⁶ Ut laj Sala, a'an li ralal laj Cainán. Ut laj Cainán, a'an li ralal laj Arfaxad. Ut laj Arfaxad, a'an li ralal laj Sem. Ut laj Sem, a'an li ralal laj Noé. Ut laj Noé, a'an li ralal laj Lamec. ³⁷ Ut laj Lamec, a'an li ralal laj Matusalén. Ut laj Matusalén, a'an li ralal laj Enoc. Ut laj Enoc, a'an li ralal laj Jared. Ut laj Jared, a'an li ralal laj Mahalaleel. Ut laj Mahalaleel, a'an li ralal laj Cainán. ³⁸ Ut laj Cainán, a'an li ralal laj Enós. Ut laj Enós, a'an li ralal laj Set. Ut laj Set, a'an li ralal laj Adán. Ut laj Adán, a'an li ralal li Dios.

4

Li Jesús quiyale' ralenquil xban laj tza

¹ Li Jesús nujenak chi Santil Musik'ej nak qui-el sa' li na'ajej cuan cui' li nima' Jordán. Li Santil Musik'ej quixc'ut chiru nak tento taxic sa' li chaki ch'och' bar maç'a' cui' cristian. ² Ut aran quicuan ca'c'al cutan. Ut laj tza quixyal ralenquil. Abanan inc'a' quixq'ue rib chi aļec. Chiruheb li cutan a'an maç'a' naxtzaca ut sa' xrakic li ca'c'al cutan quichal xtz'ocajic. ³ Laj tza quixye re: —Cui tz'akal yaļ nak ļaat Ralal li Dios, suk'isi chok' caxlan cua li pec a'in, chan. ⁴ Li Jesús quichak'oc ut quixye: —Tz'ibanbil sa' li Santil Hu chi jo'ca'in: Maçua' ca'aj cui' riq'uin li naxtzaca yo'yok cui' li cuin, chan. (Dt. 8:3a) ⁵ Tojo'nak laj tza quixc'am li Jesús sa' jun li tzul k'axal najt xteram ut sa' li honal ajcui' a'an quixc'ut chiru chixjunileb li xninkal ru tenamit li cuan sa' ruchich'och'. ⁶ Laj tza quixye re li Jesús: —Tink'axtesi sa' acuuk' li xninkal ru tenamit a'an ut lix lok'al. Eb li tenamit a'an k'axtesinbileb sa' cuuk' ļain ut naru ninq'ue re li ani tincuaļ ļain. ⁷ Chixjunil a'an tinq'ue acue cui ļaat taçuib'ib acuib' chicuu ut tinaloç'oni, chan. ⁸ Quichak'oc li Jesús ut quixye re: —Elen chicuu ļaat aj tza xban nak jo'ca'in tz'ibanbil sa' li Santil Hu: Li Kaçua' la Dios taļok'oni ut ca'aj cui' chiru a'an tatc'anjelak, chan. (Dt. 6:13) ⁹ Ut laj tza quixc'am li Jesús sa' li tenamit Jerusalaļ ut coxxakab toj takec' sa' xben li templo. Quixye re: —Cui tz'akal yaļ nak ļaat Ralal li Dios, cut acuib tak'a. ¹⁰ Maç'a' taç'ul xban nak jo'ca'in tz'ibanbil sa' li Santil Hu: Tixtaklaheb lix āngel haçauļbal. ¹¹ Ut riq'uin ruk'eb tate'xchap re nak inc'a' taçoch' la cuok chiru pec, chan. (Sal. 91:11-12) ¹² Li Jesús quichak'oc ut quixye re: —Tz'ibanbil ajcui' sa' li Santil Hu chi jo'ca'in: Mațz'ama xmilagro li Kaçua' la

Dios yal chi maç'a' rajbal. (Dt. 6:16) ¹³ Quiril laj tza nak inc'a' quiru rañenquil li Jesús, toj quixcanab cuan.

Nak quixtiquib lix c'anjel li Jesús aran Galilea

¹⁴ Ut quisuk'i li Jesús Galilea chi cuan xcuanquil li Santil Musik'ej riq'uin. Sa' chixjunil li na'ajej li cuanqueb chi xjun sutam li tenamit Galilea, que'rabi resil li Jesús. ¹⁵ Yo chixch'olobanquil li xyalal sa' eb li cab li neque'xch'utub cui' ribeb laj judío. Ut chixjunileb yoqueb chixq'uebal xlok'al.

Quit'ektanac li Jesús sa' li tenamit Nazaret li quiq'ui cui'

¹⁶ Sa' jun li cutan quicuulac li Jesús sa' li tenamit Nazaret li quiq'ui cui'. Sa' li hilobal cutan co sa' li cab li neque'xch'utub cui' ribeb laj judío jo' c'aynak xbanunquil. Ut quixakli chiruheb re taril xsa' li Santil Hu. ¹⁷ Quiq'uehe' re li hu li quixtz'iba li profeta Isaías. Nak quixte, quixtau aran li atin li naxye chi jo'ca'in:

¹⁸ Lix musik' li nimajcual Dios cuan cuiq'uin xban nak li Dios quixsic' cuu chixyebal li çabil esil reheb li cuanqueb sa' neba'il. Quinixtakla chixcolbaleb li cuanqueb sa' raylal ut chixyebal resil nak te'ach'abak li cuanqueb chi prexil ut re ajcui' nak tinq'ueheb chi iloc li mutz' ut te'cuisi ajcui' sa' raylal li rahobtesinbileb.

¹⁹ Quinixtakla xyebal resil nak ac xcuulac xk'ehil nak li Kaçua' tixcoleb lix tenamit. (Is. 61:1-2)

²⁰ Nak quixbot li hu, quixk'axtesi re li nac'anjelac sa' li cab a'an ut quic'ojla chiruheb. Ut chixjunileb li cuanqueb aran que'cana chirilbal li Jesús. ²¹ Quixye reheb: —Anakcuan xtz'akloc ru cheru li c'a'ru tz'ibanbil chak sa' li Santil Hu a'in, chan. ²² Chixjunileb li cuanqueb aran çabil yoqueb chixyebal chirix li Jesús ut sachsoqueb xch'ol chirabinquil li çabil atin li yo chixyebal. Ut que'xye: —¿Ma maçua' ta bi' a'in li lalal laj José? çhanqueb.

²³ Ut li Jesús quixye reheb: —Mare teye cue jun li atin li naxye: “At aj banonel, ban açuib ajunes. Lao xkabi resil nak nabal li c'a'ak re ru xabanu Capernaum. ¿C'a'ut nak inc'a' tabanu a'an arin sa' la tenamit?” mare cha'kex cue. ²⁴ Ut quixye ajcui' reheb: —Chi yal tinye açue ma jun profeta nac'ule' ta chi çabil sa' lix tenamit. ²⁵ Relic chi yal nak nabaleb li xmalca'an sa' li tenamit Israel nak quicuan laj Elías chok' profeta. Sa' eb li cutan a'an inc'a' quixq'ue hab chiru oxib chihab riq'uin cuakib po. Ut c'ajo' li cue'ej quicuan sa' li tenamit a'an. ²⁶ Usta ra que'xc'ul eb a'an, aban inc'a' quitaklac li profeta Elías chixtenk'anquileb li xmalca'an aj judío. Quitaklac ban chixtenk'anquil jun li xmalca'an li maçua' aj judío cuan sa' li na'ajej Sarepta li cuan nach' riq'uin li tenamit Sidón. ²⁷ Jo'can ajcui' sa' eb li cutan nak cuank chok' profeta laj Eliseo, nabaleb li saklep rixeb aran Israel. Abanan ma jun reheb laj judío quiq'uirtesic. Ca'aj cui' jun li cuñk li maçua' aj judío. Li cuñk a'an aj Naamán xc'aba'. Siria xtenamit, chan li Jesús. ²⁸ Nak que'rabi li atin a'in chixjunileb li ch'utch'uqueb aran, c'ajo' nak que'josk'o'. ²⁹ Quilaje'cuaclich chixjunileb li cuanqueb aran ut que'risi li Jesús sa' li tenamit ut que'xc'am toj sa' xben li tzul li c'ojc'o cui' lix tenamiteb re nak te'xcut chak toj tak'a. ³⁰ Abanan li Jesús quñume' sa' xyankeb ut co.

Li Jesús quixq'uirtesi jun li cuñk cuan maus aj musik'ej riq'uin

³¹ Li Jesús co sa' li tenamit Capernaum li cuan sa' xcuent Galilea. Yo chixch'olobanquil li xyalal chiruheb li tenamit sa' eb li hilobal cutan sa' li cab li neque'xch'utub cui' ribeb laj judío. ³² Naxc'ut li xyalal chiruheb chi cuan xcuanquil. Ut chixjunileb li yoqueb chi abinc re que'sach xch'ol

chirabinquil li tijleb li yo chixyebal xban nak naxc'ut li xyalal chiruheb chi cuan xcuanquil. ³³ Cuan jun li cujnk sa' xyankeb cuan maus aj musik'ej riq'uin. Qui-oc chixjapbal re chi cau ut quixye: ³⁴ —Canabo kajunes. ¿C'a'ru tacuaj kiq'uin, at Jesús aj Nazaret? ¿Ma xatchal chikasachbal? Lain ninnau nak laat lix Santil Alal li Dios, chan. ³⁵ Abanan li Jesús quixk'us li maus aj musik'ej ut quixye re: —Laat maus aj musik'ej, matchokin. Elen riq'uin li cujnk a'in, chan li Jesús. Ut li maus aj musik'ej quixt'an li cujnk chiruheb a'an, ut qui-el riq'uin ut mac'a' quixbanu re. ³⁶ Chixjunileb li que'iloc re, c'ajo' nak que'xucuac ut yoqueb chixyebal chi ribileb rib: —¿C'a'ru xyalal a'in? ¿C'a'ru li tijleb a'in? Li cujnk a'in cuan xcuanquil sa' xbeneb li maus aj musik'ej ut li c'a'ru naxye, a'an neque'xbanu, chanqueb. ³⁷ Ut que'rabi resil sa' chixjunileb li tenamit xcuent Galilea c'a'ru quixbanu li Jesús.

Li Jesús quixq'uirtesi lix na' li rixakil laj Simón Pedro

³⁸ Nak qui-el sa' li cab li neque'xch'utub cui' ribeb laj judío, li Jesús co sa' li rochoch laj Simón. Lix na' li rixakil laj Simón yocyo. Yo xtik. Que'xtz'ama chiru li Jesús nak tixq'uirtesi. ³⁹ Li Jesús quijiloc riq'uin li yaj ut quixq'uirtesi. Ut sa' ajcui' li honal a'an quicuac li ixk ut qui-oc chi c'anjelac chiruheb. ⁴⁰ Nak ac yo chi ecuuc, chixjunileb li cuanqueb xyaj, a' yal c'a'ru xyajeleb, quilaje'xc'am chak riq'uin li Jesús. Ut a'an quixq'ue li ruk' sa' xbeneb ut quixq'uirtesiheb. ⁴¹ Ut nabaleb ajcui' li quirisi maus aj musik'ej riq'uibeb. Li maus aj musik'ej nak neque'el riq'uibeb, japjoqueb re chixyebal: —Laat Ralal li Dios, chanqueb. Abanan li Jesús quixk'useb ut inc'a' quixcanabeb chi atinac xban nak eb a'an que'xnau nak a'an li Cristo, laj Colonel li yechi'inbil xban li Dios. ⁴² Cuulajak chic nak ac xsakeu, li Jesús co sa' jun na'ajej bar mac'a' cuan. Ut eb li tenamit yoqueb chixsic'bal. Que'cuulac toj bar cuan cui' a'an ut que'raj raj nak quicana riq'uibeb. Inc'a' raj que'raj nak taxic. ⁴³ Abanan li Jesús quixye reheb: —Tento nak tinxic sa' jalan tenamit chixch'olobanquil li chab'il esilal chirix lix nimajcual cuanquilal li Dios xban nak a'an aj e nak xintaklac chak arin, chan. ⁴⁴ Ut yo chixch'olobanquil lix yalal sa' eb li cab li neque'xch'utub cui' ribeb laj judío aran Galilea.

5

Numtajenak xq'uial li car que'xchap

¹ Sa' jun li cutan li Jesús cuan chire li palau Genesaret ut k'axal cui'chic nabal li tenamit que'ch'utla chirabinquil li ratin li Dios. ² Quiril cuib li jucub cuan chire li palau. Eb laj car ma' anihob chi sa'. Yoqueb chak chixch'ajbal lix yoy. ³ Qui-oc li Jesús sa' jun li jucub. Li jucub a'an re laj Simón. Li Jesús quixt'ama chiru laj Simón nak tijxil ca'ch'inak li jucub sa' li ha'. Ut quic'ojla sa' li jucub ut qui-oc chixch'olobanquil lix yalal chiruheb li tenamit li cuanqueb chire li palau. ⁴ Ut nak ac xrake' chi atinac, quixye re laj Simón: —C'am li jucub sa' xchamal li ha' ut taq'ue la yoy sa' li ha' re nak tachap la car, chan li Jesús. ⁵ Quichak'oc laj Simón ut quixye re: —At tzolonel, chixjunil li k'ojjin xkaq'ue li kayoy sa' li ha' ut ma' jun li car xkachap. Abanan xban nak laat xatyehoc cue, ting'ue cui'chic lin yoy sa' li ha', chan. ⁶ Nak que'xq'ue lix yoy sa' li ha', k'axal cui'chic nabal li car que'xchap ut yo chi pejec' lix yoyeb. ⁷ Ut que'xc'ut ruk'eb chiruheb li rochben li cuanqueb sa' li jucub jun chic re xbokbaleb re nak te'chalk chixten'anquil. Ut eb a'an que'chal ut que'xnujtesi xcabichal li jucub ut ca'ch'in chic ma' nasubun sa' li ha' xban xq'uial li car. ⁸ Nak quiril chixjunil a'in laj Simón Pedro, quixcuik'ib rib chiru li Jesús ut quixye re: —Canabin injunes, at Kacua'. Macua' inc'ulub nak

cuan⁹kat cuiq'uin xban nak lain jun cu¹⁰ink aj maç, chan. ⁹Ut quisach xch'ol laj Simón jo'queb ajcui' li cuanqueb rochben xban nak k'axal cui'chic nabal li car que'xchap. ¹⁰Ut jo'can ajcui' laj Jacobo ut laj Juan, eb li ralal laj Zebedeo. A'an eb li rochben laj Simón. Ut li Jesús quixye re laj Simón: —Matc'oxlac. Chalen anakuan maçua' chic caribe tabanu. Açuas açu¹¹itz'in ban chic tasic' re te'pabank, chan li Jesús. ¹¹Ut que'xc'am li jucub chire li palau ut aran que'xcanab chixjunil ut que'xtake li Jesús.

Li Jesús quixq'uirtesi jun cu¹²ink saklep rix

¹²Nak cuan li Jesús sa' jun li tenamit, quicuulac jun li cu¹³ink riq'uin saklep rix. Nak quiril li Jesús quixxulub rib sa' ch'och', ut quixtz'ama chiru li Jesús ut quixye re: —Kaçua', lain ninnau nak laät naru tinaq'uirtesi. Cui tabanu li usilal, chinaq'uirtesi, chan. ¹³Li Jesús quixch'e' li cu¹⁴ink riq'uin ruk' ut quixye re: —Lain tincua¹⁵j nak tatq'uirak. Anakuan tatinq'uirtesi, chan. Ut sa' ajcui' li honal a'an quiq'uira li cu¹⁶ink. ¹⁴Ut li Jesús quixye re: —Ma ani aj e taserak'i chanru nak xatq'uira. Ayu ban riq'uin laj tij re nak a'an taril nak xatq'uira. Ut taq'ue la mayej jo' naxye sa' lix chak'rab laj Moisés chok' retalil chiruheb chixjunileb nak xatq'uira, chan li Jesús. ¹⁵Abanan yalak bar yo chi abic resil chixjunil li c'a'ru yo chixbanunquil li Jesús. Nabaleb li tenamit neque'xch'utub ribeb chirabinquil li c'a'ru naxye ut re ajcui' nak te'q'uirtesik. ¹⁶Ut li Jesús rajlal naxic xjunes chi tijoc sa' eb li na'ajej bar maç'a' cuan.

Li Jesús quixq'uirtesi jun li cu¹⁷ink sic li rok ut sic li ruk'

¹⁷Sa' jun li cutan nak li Jesús yo chixch'olobanquil lix yalal chiruheb li tenamit cuanqueb cuib oxib laj fariseo sa' xyankeb. Ut cuanqueb ajcui' aj tzolol chak'rab. Que'chal chak sa' eb li na'ajej Galilea, Judea ut Jerusalén. Ut li Jesús yo chixq'uirtesinquileb li yaj riq'uin xcu¹⁸anquil li Dios. ¹⁸Sa' li honal a'an que'cuulac cuib oxib li cu¹⁹ink ut yoqueb chixc'ambal jun li cu²⁰ink sic li rok ut sic li ruk' yocyo chiru lix cuarib. Ut te'raj rocsinquil li cu²¹ink cuan cui' li Jesús. ¹⁹Abanan que'ril nak inc'a' que'ru chi oc sa' li cab xban li q'uila tenamit. Jo'can nak que'take' sa' xben li cab. Que'xte ca'ch'in li xben li cab ut aran que'xcubsi li yaj chi yocyo sa' lix cuarib. Coxexq'ue sa' xyiheb li tenamit bar cuan cui' li Jesús. ²⁰Quixq'ue retal li Jesús nak eb li cu²²ink a'an que'xpab nak naru tixq'uirtesi li yaj. Jo'can nak quixye re li yaj: —At cu²³ink, cuybil sachbil chic la maç, chan. ²¹Ut eb laj fariseo ut eb laj tzolol chak'rab que'oc chixyebal chi ribileb rib: —¿Ani li cu²⁴ink a'an nak naxjuntak'eta rib riq'uin li Dios nak naxye chi jo'can? ¿Ma a'an ta bi' li Dios? ¿Ma maçua' ta bi' ca'aj cui' li Dios naru nacuyuc maç? chanqueb. ²²Quixnau li Jesús c'a'ru yoqueb chixc'oxlanquil. Quichak'oc ut quixye reheb: —¿C'a'ut nak yoquex chixc'oxlanquil chi jo'can? ²³¿Bar cuan li us tinye re li yaj re nak taç'utun²⁴k cheru nak cuan incuanquil? ¿Ma tinye re, “cuybil sachbil la maç” malaj ut tinye re, “tating'uirtesi”? ²⁴Lain tinc'ut cheru nak lain li Cristo li C'ajolbej ut cuan incuanquil sa' ruchiç'och' chixcuybal xsachbal li maç, chan reheb. Tojo'nak li Jesús quixye re li yaj, —At cu²⁵ink, lain tinye açue, cuaclin, c'am la cuarib ut ayu sa' la cuochoch, chan. ²⁵Ut sa' ajcui' li honal a'an li cu²⁶ink li yaj nak quicuan quicuacli chiruheb chixjunileb li cuanqueb aran. Quixchap lix cuarib ut yo chixlok'oninquil li Dios nak co sa' rochoch. ²⁶Ut chixjunileb li cuanqueb aran sachsoqueb xch'ol que'cana chirilbal li quic'ulman. Que'xlok'oni li Dios ut yo xc'a'uxeb nak que'xye: —Sachba ch'olej li xkil anakuan, chanqueb.

Li Jesús quixbok chok' xtzolom laj Leví laj titz'ol toj, li nayeman ajcui' Mateo re

²⁷ Nak qui-el sa' li tenamit a'an, li Jesús quixtau jun li cujnk aj titz'ol toj aj Leví xc'aba'. Chunchu cuan cui' li mex li neque'c'uluc cui' toj. Li Jesús quixye re: —Chinatake, chan. ²⁸ Quicuacli laj Leví. Quixcanab chixjunil ut quixtake li Jesús. ²⁹ Quixbanu jun li nimla nink'e laj Leví chok' re li Jesús. Cuanqueb nabaleb xcomoneb laj titz'ol toj ut cuanqueb ajcui' nabaleb jalan chic chi cua'ac sa' li mex rochbened. ³⁰ Eb laj fariseo ut eb laj tzolol chak'rab que'oc chixcuech'inquil rixeb lix tzolom li Jesús ut que'xye reheb: —¿C'a'ut nak nequexcua'ac ut nequex-uc'ac rochbened laj titz'ol toj ut rochbened laj mac? chanqueb. ³¹ Li Jesús quixye reheb: —Li cauheb mac'a' na-oc cui' aj banonel reheb. Aban li yajeb, a'aneb li te'raj banec'. ³² Jo'can nak lain inc'a' xinchal chixsic'bal li ti'queb xch'ol. Xinchal ban chixsic'bal laj mac re nak te'yot'ek' xch'ol ut te'xjal xc'a'uxeb, chan li Jesús.

Nak que'xcuech'i rib chirix li ayun

³³ Ut que'xye cui'chic re li Jesús: —Eb lix tzolom laj Juan rajlal neque'xbanu x-ayun ut rajlal neque'tijoc. Jo'can ajcui' neque'xbanu lix tzolomeb laj fariseo. Ut eb la tzolom la'at, ¿c'a'ut nak inc'a' neque'xbanu chi jo'can? Eb a'an neque'cua'ac neque'uc'ac chi mac'a'eb xc'a'ux, chanqueb. ³⁴ Tojo'nak quichak'oc li Jesús ut quixye reheb: —Lain jo' jun belomej nak cuanquin. ¿Ma naru te'ayunik li neque'xic riq'uin sumlac nak cuan li belomej riq'uibeb? Nak toj cuan li belomej riq'uibeb inc'a' naru neque'xbanu x-ayun. ³⁵ Ut jo'can ajcui' lin tzolom. Ta'cuulak xk'ehil nak tin-isik sa' xyank'eb. Toj sa' li cutan a'an te'xbanu x-ayun, chan reheb.

Li najter na'leb inc'a' naxc'am rib riq'uin li ac' na'leb

³⁶ Ut li Jesús quixye cui'chic reheb li jaljoquil ru atin a'in: Ma ani naxxiti junak k'el t'icr riq'uin ac' t'icr. Cui ut naxxiti riq'uin ac' t'icr, naxnimobresi xpejelal li k'el t'icr. Ut inc'a' naxc'am rib li ac' t'icr riq'uin li k'el. ³⁷ Ut ma ani naq'uehoc ac' vino sa' junak k'el bols tz'um. Cui tixq'ue li ac' vino sa' junak k'el bols tz'um, tapuq'uek' li k'el tz'um ut tahoyek' li vino. Tasachk li vino ut tasachk ajcui' li bols tz'um. ³⁸ Jo'can nak li ac' vino sa' li ac' bols tz'um naq'ueman re nak mac'a' tixc'ul li vino chi moco li bols tz'um. ³⁹ Ut li ani ac' xruc' li vino re junxil inc'a' chic taraj ruc'bal li ac' vino, xban nak neque'xc'oxla nak li vino re junxil, a'an li chabil, chan li Jesús reheb.

6

Que'cuech'ic rixeb lix tzolom li Jesús nak que'xsic' ru li trigo sa' li hilobal cutan

¹ Sa' jun li hilobal cutan li Jesús yo' chi numec' sa' jun sir li acujmk trigo rochbened lix tzolom. Eb lix tzolom que'xch'ot ru li trigo nak yoq'ueb chi numec' ut que'risi li rix sa' ruk'eb ut que'xcua'. ² Cuanqueb cuib oxib eb laj fariseo que'ril nak yoq'ueb chixsic'bal ru li trigo. Que'xye reheb: —¿C'a'ut nak yoq'uech' chixsic'bal ru li trigo sa' li hilobal cutan? ¿C'a'ut nak nequebanu li c'anjel moco uxc ta naraj sa' li hilobal cutan? chanqueb. ³ Li Jesús quichak'oc ut quixye reheb: —¿Ma ma jun cua erilom sa' li Santil Hu li c'a'ru quixbanu laj David nak a'an ut eb li rochben te'tz'ocak? ⁴ Laj David qui-oc sa' li rochoch li Dios ut quixchap li caxlan cua li ac mayejanbil chiru li Dios. Juneseb raj laj tij naru te'tzacank re li caxlan cua a'an. Abanan laj David quixcua' ut quixq'ue ajcui' reheb li cuanqueb rochben xban nak te'tz'ocak. ⁵ Ut li Jesús quixye

cui'chic reheb: —Jo'can nak lain li C'ajolbej cuan incuanquil chixyebal c'a'ru tauxmank sa' li hilobal cutan, chan reheb.

Li Jesús quixq'uirtesi li cujnk sic li ruk'

⁶ Sa' jun chic li hilobal cutan qui-oc li Jesús sa' li cab li neque'xch'utub cui' ribeb laj judío ut quixch'olob lix yalal chiruheb li tenamit. Aran cuan jun li cujnk sic lix nim uk'. ⁷ Cuanqueb cuib oxib aj fariseo ut aj tzolol chak'rab aran. Yoqueb chirilbal ma tixq'uirtesi tana li ruk' li cujnk a'in sa' li hilobal cutan re nak naru te'xjit li Jesús. ⁸ Li Jesús quixnau c'a'ru yoqueb chixc'oxlanquil. Jo'can nak quixye re li cujnk li sic ruk': —Cuaclin. Xakab acuib chiruheb, chan. Ut li cujnk quicuacli ut quixakli chiruheb. ⁹ Li Jesús quixye reheb: —Cuan c'a'ru nacuaaj xpatz'bal ere. ¿C'a'ru us xbanunquil sa' li hilobal cutan? ¿Ma naru xbanunquil li us malaj li inc'a' us? ¿Ma us xcolbal xyu'am junak malaj xsachbal? chan reheb. ¹⁰ Li Jesús quicana chirilbaleb chixjunkaleb, ut quixye re li cujnk li sic ruk': —Ye' la' cuuk', chan. Ut li cujnk quixye' li ruk' ut sa' ajcui' li honal a'an quiq'uira li ruk'. ¹¹ C'ajo' nak que'josk'o' eb laj fariseo ut laj tzolol chak'rab, ut que'oc chixyebal chi ribileb rib chanru nak te'xjit li Jesús.

Li Jesús quixsic' ruheb li cablaju chi apóstol

¹² Sa' jun li cutan cō li Jesús chi tijoc sa' xben jun li tzul. Quixnumsi li k'ojyin chi tijoc chiru li Dios. ¹³ Nak ac xsakeu quixbokeb lix tzolom ut quixsic' ruheb li cablaju sa' xyankeb ut quixq'ueheb chok' apóstol. A'aneb a'in li apóstol li quixsic' ruheb: ¹⁴ laj Simón li quixq'ue ajcui' Pedro chok' xc'aba'; laj Andrés li ritz'in laj Pedro; laj Jacobo; laj Juan; laj Felipe; laj Bartolomé; ¹⁵ laj Mateo; laj Tomás; laj Jacobo li rala laj Alfeo; laj Simón li neque'xye ajcui' Zelote re; ¹⁶ laj Judas li ritz'in laj Jacobo ut laj Judas Iscariote li quik'axtesin re li Jesús mokon sa' ruk'eb li xic' neque'iloc re.

Li Jesús quixq'uirtesi nabaleb li cristian

¹⁷ Li Jesús quicube sa' li tzul rochbeneb lix tzolom ut quicana sa' jun na'ajej tak'a ru rochbeneb lix q'uaileb chic lix tzolom ut li q'uila tenamit li que'chal chak sa' eb li tenamit Judea ut Jerusalén. Ut cuan ajcui' li que'chal sa' eb li tenamit li cuanqueb chire li palau jo' Tiro ut Sidón. Quilaje'chal re nak te'rabi li c'a'ru tixye li Jesús ut re ajcui' nak li Jesús tixq'uirtesiheb li yaj. ¹⁸ Ut quixq'uirtesiheb ajcui' li cuanqueb maus aj musik'ej riq'uineb. ¹⁹ Ut li q'uila tenamit te'raj xch'e'bal li Jesús re nak te'q'uirtesik. A'an naxq'uirtesiheb riq'uin lix cuanquilal. ²⁰ Ut li Jesús quirileb lix tzolom ut qui-oc chixyebal: —Us xak ere laex li neba'ex, xban nak cuanquex chic rubel xuanquil li Dios. ²¹ Us xak ere laex li textz'ocak anakcuan xban nak ta'c'ojobak ech'ol. Us xak ere laex li yoquex chi yabac anakcuan xban xrahil ech'ol xban nak sa' jun cutan texse'ek xban xsahil ech'ol. ²² Us xak ere laex nak xic' tex'ilek' sa' inc'aba' lain li C'ajolbej. Us xak ere laex nak tex-isik sa' xyankeb ut texhobek' sa' inc'aba' lain ut tayehek' ere nak inc'a' us ena'leb. ²³ Chisahok' sa' ech'ol nak te'xbanu ere chi jo'can. Chic'ojlak ech'ol xban nak cuan jun le k'ajcamunquil riq'uin li Dios sa' choxa. Jo'can ajcui' nak que'xtz'ektana eb li profeta junxil eb lix xe'tonil xyucua'eb li tenamit a'in. ²⁴ Abanan, laex li biomex raylal çalel sa' eben xban nak ac xec'ojob ech'ol arin sa' ruchich'och'. ²⁵ Raylal çalel sa' eben laex li cuan nabal c'a'ru ere xban nak taçuulak xk'ehil nak mac'a' chic cuank ere re textzacank. Raylal çalel sa' eben laex li nequexse'ec anakcuan xban xsahil ech'ol xban nak mokon texyabak xban xrahil ech'ol. ²⁶ Raylal çalel sa' eben laex li naq'uehe' elok'al

arin sa' ruchich'och' xbaneb li tenamit. Jo'ca'in ajcui' nak que'q'uehe' xlok'al eb li profeta aj balak' xbaneb le xe'tonil yucua'.

Cherahakeb li xic' neque'iloc ere

²⁷ Ut laex li yoquex chi abinc re li yoquin chixyebal, cheq'uehak retal li tynye ere. Cherahakeb li xic' neque'iloc ere. Ut chebanuhak usilal reheb li neque'tz'ektanan ere. ²⁸ Chetz'amak rusilal li Dios sa' xbeneb li neque'mausilan ere. Ut chextijok ajcui' chirixeb li neque'hoboc ere. ²⁹ Cui ani tasac'ok xnak' acuu, q'ue li jun pac'al re, re tixsac'. Cui ani taraj xmak'bal la chaquet, q'ue ajcui' la camis re. ³⁰ Li ani tixtz'ama c'a'ru re acue, q'ue re. Ut cui ani tixmak' c'a'ru acue chacuu, mapatz' chic rekaj re. ³¹ Cui laex teraj nak chabilakeb le ras eritz'in eriq'uin, chabilakex ajcui' laex riq'ueheb a'an. ³² Cui ca'aj cui' li ani narahoc ere nequera, mac'a' xjalanil li yoquex chixbanunquil, riq'uin li neque'xbanu li maji' neque'paban xban nak ca'aj cui' li ani narahoc reheb neque'xra. ³³ Cui ca'aj cui' li neque'banun usilal ere, nequebanu usilal reheb, mac'a' xjalanil li yoquex chixbanunquil riq'uin li neque'xbanu li maji' neque'paban. Xban nak ca'aj cui' li ani nabanun usilal reheb neque'xbanu usilal re. ³⁴ Cui laex nequeto'oni tumin ca'aj cui' reheb li nequenau nak te'xq'ue rekaj, mac'a' xjalanil li yoquex chixbanunquil riq'uin li neque'xbanu li toj maji' neque'paban xban nak neque'xto'oni tumin ca'aj cui' reheb li neque'xnau nak te'xq'ue rekaj. ³⁵ Jo'can ut nak cherahakeb li ani xic' neque'iloc ere. Chebanuhak usilal reheb. Ut cheq'uehak chi to' re li c'a'ru tixpatz' ere chi inc'a' teroybeni rekaj. Cui tebanu a'an, k'axal nim le k'ajcamunquil li taq'uehek' ere ut laexak li ralal xc'ajol li nimajcual Dios. A'an k'axal nim xcuyum sa' xbeneb li inc'a' useb xna'leb li inc'a' neque'xnau bantioxinc. ³⁶ Chex-xutanank bi' u xban nak le yucua' cuan sa' choxa naxtanau u. ³⁷ Mextz'iloc atin chirixeb le ras eritz'in re nak li Dios inc'a' tatz'ilok atin cherix laex. Metz'ektana le ras eritz'in re nak li Dios inc'a' textz'ektana laex. Checuyak xmaqueb le ras eritz'in re nak li Dios tixcuy emac laex. ³⁸ Chesi c'a'ru re le ras eritz'in ut li Dios tixq'ue rekaj ere. Tixq'ue rekaj ere chi nabal chiru li xeq'ue laex. Tixq'ue chi nujenak li bisleb, chi yok chi pajec' xban nak k'axal cui'chic nabal li tixq'ue ere. Riq'uin li bisleb li texbisok cui' laex, a'an ajcui' li tabisek' cui' li taq'uehek' ere, chan. ³⁹ Li Jesus quixye li jaljoquil ru atin a'in reheb li tenamit ut quixye: —Junak mutz', ¿Ma naru ta bi' tixc'ut xbe junak chic mutz'? ¿Ma inc'a' ta bi' sa' cuibal te't'ane' sa' jul xban nak mutz'eb? ⁴⁰ Ma jun aj tzolonel naxk'ax xcuanquil laj tzolol re. Abanan nak acak xtzol rib chi tz'akal, tixtau ajcui' xcuanquil laj tzolol re. ⁴¹ ¿C'a'ut nak nacaq'ue retal li c'aj che' cuan sa' xnak' ru la cuas acuitz'in ut inc'a' nacaq'ue retal li tz'amba cuan sa' xnak' acuu laet? ⁴² ¿Chanru nak taye re la cuas acuitz'in, “Cuisihak li c'aj che' sa' xnak' acuu”, nak toj cuan li tz'amba sa' xnak' acuu laet? At aj ca'pac'al u, xben cua isi li tz'amba cuan sa' li xnak' acuu laet, re nak tat-ilok chi tz'akal re risinguil li c'aj che' cuan sa' xnak' ru la cuas acuitz'in. ⁴³ Jo'can ajcui' riq'uin li che'. Cui chabil junak che', chabil ajcui' li ru naruchin. Ut cui inc'a' us li che', li ru li naruchin inc'a' ajcui' us. Li chabil che' inc'a' naru naruchin li inc'a' us, chi moco li che' inc'a' us naru naruchin li us. ⁴⁴ Ut riq'uin li ru naruchin nanauman ru li che'. Li tun q'uix inc'a' naru naruchin li higos chi moco li q'uix naru naruchin li uvas. ⁴⁵ Jo'can ajcui' riq'uin li cristian. Li ani chabil, chabil ajcui' lix yehom xbanuhom xban nak cuan li chabil riq'uin. Ut li ani inc'a' chabil, inc'a' chabil lix yehom xbanuhom xban nak mac'a' li chabilal riq'uin. Riq'uin li ratin li junjunk nac'utun chanru li ram. ⁴⁶ ¿C'a'ut nak nequeye, “Kacua', Kacua'” cue cui inc'a' nequebanu li c'a'ru ninye? ⁴⁷ Jo'can nak li ani na-abin re li cuatin ut naxbanu

li c'a'ru ninye, li jun a'an tinjuntak'eta riq'uin jun li cujnk quixyib li rochoch. ⁴⁸ Quixbec chi cham ut quixq'ue li cimiento sa' xben li pec. Quichal li hab ut quibut'ir li nima'. Cossac' rib li ha' chiru li cab ut inc'a' quirec'asi li cab sa' xna'aj xban nak yibanbil chi us sa' xben pec. ⁴⁹ Ut li ani na-abin re li cuatin ut inc'a' naxbanu li c'a'ru ninye, li jun a'an tinjuntak'eta riq'uin li cujnk li quixyib li rochoch sa' xben ch'och' ut inc'a' quixbec xna'aj lix cimiento. Nak quibut'ir li nima', li ha' cossac' rib chiru li cab. Quit'ane' li cab ut quisach chi jun aj cua, chan li Jesús reheb.

7

Li Jesús quixq'uirtesi xmos li capitán aj Roma

¹ Nak quirake' xch'olobanquil lix yalal chiruheb li tenamit, li Jesús cō Capernaum. ² Ut aran cuan jun li capitán aj Roma cuan jun lix mōs k'axal naxra. Yaj ut camc re. ³ Li capitán quirabi resil nak cuan li Jesús aran. Quixtaklaheb cuib oxib laj judío xcomoneb li neque'c'amoc be sa' li tenamit re nak te'xtz'ama chiru li Jesús nak taxic sa' rochoch li capitán chixq'uirtesinquil lix mōs. ⁴ Que'cuulac riq'uin li Jesús ut que'xtz'ama chiru nak tixbanu li yo chixtz'amanquil li capitán. Que'xye re li Jesús: —Us cui tabanu li usilal re li capitán, ⁵ xban nak a'an nocoxra laō aj judío ut a'an quitaklan re xyibanquil li cab nakach'utub cui' kib, chanqueb re li Jesús. ⁶ Ut li Jesús cō chirixeb. Nak ac cuulaqueb re cuan cui' li rochoch, li capitán quixtaklaheb li ramig chi atinac riq'uin li Jesús ut que'xye re: —Jo'ca'in xye li capitán acue: Mach'i'ch'i'i acuib chi chalç sa' cuochoch xban nak moco inc'ulub ta nak tatchalk sa' cuochoch. ⁷ Jo'can nak inc'a' xcoin lain chi atinac acuiq'uin. Ninnau nak moco inc'ulub ta nak tincuulac acuiq'uin. Ca'aj cui' nacua'j nak taye nak taq'uirak lin mōs ut ninnau nak taq'uirak. ⁸ Lain cuan ani nataklan cue ut cuanqueb lin soldado rubel incuanquil. Nak ninye re li jun "ayu", naxic. Ut nak ninye re li jun chic "quim", nachal. Ut nak ninye re lin mōs, "banu a'in", naxbanu, chan li capitán. ⁹ Nak li Jesús quirabi a'in, quisach xch'ol ut quixye reheb li cuanqueb rochben: —Relic chi yal tinye ere nak ma' jun intauhom chi moco sa' xyankeb laj Israel cuan tz'akal xpabal jo' li jun a'in, usta ma'cua' aj judío, chan. ¹⁰ Nak que'cuulac eb li takl sa' rochoch li capitán, ac xq'uira chic lix mōs.

Li Jesús quixcualesi cui'chic chi yo'yo jun li saj al xyum jun li xmalca'an

¹¹ Chirix a'in li Jesús qui-el Capernaum ut cō sa' jun chic li tenamit Naín xc'aba' rochbened lix tzōlom. Ut cuanqueb ajcui' nabaleb li tenamit yoqueb chi xic chirix. ¹² Nak yo chi cuulac cuan cui' li oquebal re li tenamit quiril nak nabaleb li cristian yoqueb chi xic chixmukbal jun li camenak. Li camenak a'an xyum jun li xmalca'an. Jun ajcui' chiru nak quicuan. ¹³ Nak li Ka'cua' Jesús quiril li xna' li camenak, quiril xtok'obal ru ut quixye re: —Matyabac, chan. ¹⁴ Li Jesús quinach'oc riq'uineb ut quixch'e' li tusbil che' li yoqueb chixpakonquil cui' li camenak. Ut eb li yoqueb chi c'amoc re li camenak que'xakli ut li Jesús quixye re li camenak: —At saj cujnk, lain tinye acue, cuaclin, chan. ¹⁵ Ut li camenak quicuacli ut quichunla ut qui-oc chi atinac riq'uineb. Ut li Jesús quixk'axtesi re lix na'. ¹⁶ Nak que'ril li c'a'ru quic'ulman chixjunileb li cuanqueb aran, c'ajo' nak que'xucua' ut que'oc chixq'uebal xlok'al li Dios. Ut que'xye: —Jun xanimal ru profeta xc'ulun sa' kayank.— Ut que'xye ajcui': —Li Dios xchal chixtenk'anquil lix tenamit, chanqueb. ¹⁷ Ut

qui-abjc resil li c'a'ru quixbanu li Jesús sa' chixjunil li na'ajej Judea jo' ajcui' sa' eb li na'ajej li cuanqueb chi xjun sutam.

Li Jesús quixtakla xyebal re laj Juan nak li milagros li naxbanu naxc'ut nak a'an li Cristo

¹⁸ Lix tzolom laj Juan laj Cubsihom Ha' que'xserak'i re c'a'ru yo' chi c'ulmanc. Nak ac xrabi a'an, laj Juan quixtakla cuib lix tzolom riq'uin li Jesús chixpatz'bal re: ¹⁹—¿Ma laät laj Colonel li yechi'inbil li yo'co chiroybeninquil? ¿Malaj toj takoybeni junak chic?— ²⁰ Nak que'cuulac lix tzolom laj Juan riq'uin li Jesús, que'xye re: —Xoxtakla chak laj Juan laj Cubsihom Ha' acuiq'uin chixpatz'bal acue, “¿Ma laät laj Colonel li yechi'inbil li yo'co chiroybeninquil? ¿Malaj ut toj takoybeni junak chic?” chanqueb re li Jesús. ²¹ Ut sa' li honal a'an li Jesús yo' chixq'uirtesinqueleb nabaleb li cristian li cuanqueb sa' raylal. Cuanqueb li yaj quixq'uirtesinheh. Ut cuanqueb li cuan maus aj musik'ej riq'uin ut li Jesús quirisil li maus aj musik'ej riq'uineb. Ut cuanqueb nabaleb li mutz' li quixq'ueheb chi iloc. ²² Ut li Jesús quixye reheb: —Ayukex ut tesorak'i re laj Juan li c'a'ru xeril ut li c'a'ru xerabi. Yehomak re nak eb li mutz' neque'iloc chic; eb li yek rok neque'bec chic; eb li saklep rix q'uirtesinbileb chic; eb li tz'ap xic neque'abin chic; eb li camenak xe'cuaclesic cui'chic chi yo'yo ut eb li neba' yo'queb chirabinquil resil li usilal. ²³ Us xak reheb li ani inc'a' tach'inank xch'ol chinpabanquil, cha'kex re, chan li Jesús. ²⁴ Ut nak que'el lix takl laj Juan riq'uin, li Jesús qui-oc chi atinac riq'uineb li tenamit chirix laj Juan ut quixye chi jo'ca'in: —¿C'a'ru queril chak sa' li chaki ch'och' nak coex chirilbal laj Juan? ¿Ma junak cuink nacuiban xch'ol chanchan li caxlan aj yo' rec'asingul xban ik' queril chak? ²⁵ ¿C'a'ru queril chak? ¿Ma junak cuink chabil xtikibanquil queril chak? Li chabileb rak' ut li cuanqueb sa' sahil ch'olej, eb a'an sa' rochoch eb li rey cuanqueb. ²⁶ ¿C'a'ru queril chak? ¿Ma junak profeta queril chak? Yal nak a'an jun profeta. Abanan lain tnye ere nak li jun a'in naxk'ax ru xcuanquil junak profeta. ²⁷ Chirix laj Juan tz'ibanbil sa' li Santil Hu li naxye chi jo'ca'in: A'ut lain tintakla lin takl aj c'amol be chacuu. A'an tach'olobank xyalal chiruheb li tenamit re nak eb a'an yo'on cuanqueb chac'ulbal laät. (Mal. 3:1)

²⁸ Relic chi yal tnye ere nak ma jun reheb li neque'yo'la arin sa' ruchich'och' naxk'ax xcuanquil laj Juan laj Cubsihom Ha'. Aban li k'axal cubenak xcuanquil sa' lix nimajcual cuanquil li Dios, k'axal us chok' re a'an chiru laj Juan, chan li Jesús. (Quixye chi jo'can xban nak laj Juan inc'a' taril lix nimajcual cuanquial li Dios arin sa' ruchich'och'). ²⁹ Chixjunileb li tenamit ut eb laj titz'ol toj li que'abin re li c'a'ru quixye laj Juan, que'xq'ue retal nak t'ic xch'ol li Dios ut que'xc'ul li cubi ha' riq'uin laj Juan. ³⁰ Abanan eb laj fariseo ut eb laj tzolol chak'rab que'xtz'ektana li rusilal li Dios li quixc'oxla xbanunquil reheb. Ut inc'a' que'xc'ul li cubi ha' riq'uin laj Juan. ³¹ Ut quixye ajcui' li Jesús: —¿Ani aj iq'uin taruk tebinjuntak'eta li cuanqueb sa' ruchich'och' anakcuan? Mac'a' nacuulac chiruheb. ³² Chanchaneb li coc'al li neque'c'ojla chi batz'unc sa' eb li c'ayil ut neque'xjap re chixyebal reheb lix comon, “Xkayabasi li kaxolb ut inc'a' xexxajoc; xobichan chi ra sa' kach'ol ut inc'a' xexyabac xban”, chanqueb. ³³ Nak quic'ulun laj Juan laj Cubsihom ha', cuan li tzacaemk inc'a' quixtzaca ut cuan li inc'a' quiruc', ut eb li tenamit inc'a' que'xc'ul ut que'xye: “Maus aj musik'ej cuan riq'uin”, chanqueb. ³⁴ Ut nak xinc'ulun lain li C'ajolbej inc'a' ajcui' xine'xc'ul sa' xyalal usta nincua'ac ut nin-uc'ac. Que'xye ajcui' chicuix, “Li cuink a'an junes cua'ac naxbanu ut uc'ac vino. A'an ramigueb laj mac' ut eb laj titz'ol toj”, chanqueb. ³⁵ Nac'utun nak chabil

li na'leb li naxq'ue li Dios xban li ch̄abilal li neque'xbanu li ralar xc'ajol, chan li Jesús.

Quiyule' sa' sununquil ban li rok li Jesús

³⁶ Jun li cūnk aj Simón xc'aba' xcomoneb laj fariseo quixbok li Jesús chi cua'ac sa' rochoch. Ut li Jesús cō sa' rochoch li cūnk a'an ut quichunla sa' mex. ³⁷ Cuan sa' li tenamit a'an jun li ixk xcomoneb li inc'a' useb xna'leb. Quirabi resil nak li Jesús cuan chi cua'ac sa' li rochoch laj fariseo. Cō aran ut quixc'am jun ch'ina botella li sununquil ban. Li ch'ina botella yībanbil riq'uin li ch̄abil pec alabastro xc'aba'. ³⁸ Li ixk quijiloc riq'uin li Jesús. Qui-oc chi yābac sa' xben li rok ut riq'uin lix ya'al ru quixch'aj. Ut quixmes riq'uin rismal xjolom. Quirtutz' li rok ut quixyul riq'uin li sununquil ban. ³⁹ Nak quiril a'in laj fariseo li quibokoc re li Jesús chi cua'ac, quixye sa' xch'ol: Cui ta tz'akal profeta li cūnk a'in tixnau raj chanru lix yu'am li ixk a'in li yō chi ch'e'oc re li rok. Tixnau raj nak li ixk a'in inc'a' us xna'leb. ⁴⁰ Ut li Jesús quixye re laj fariseo: —At Simón, cuan c'a'ru nacuai xyebal açue, chan re. Ut laj Simón quixye re: —Us. Ye cue, at tzolonel.— ⁴¹ Ut li Jesús quixye re: —Cuan jun li cūnk quixq'ue chi to' lix tumin reheb cuib chi cūnk. Li jun o'c'al pes lix c'as ut li jun chic lajeb pes. ⁴² Ut xban nak inc'a' que'ru xq'uebal rekaj li tumin que'xto'oni, laj echal re li tumin quixcuyeb xmac xcabichaleb. Anakcuan ye cue, çani reheb a cuib a'in k'axal tarahok re laj echal re li tumin? chan li Jesús. ⁴³ Quichak'oc laj Simón ut quixye re li Jesús: —Lain ninc'oxla nak li ani nabal xc'as, a'an li k'axal tarahok re, chan. Ut li Jesús quixye cui'chic re: —Yal nak jo'can, chan. ⁴⁴ Ut li Jesús quiril li ixk ut quixye re laj Simón: —Il a ixk a'in. Nak xinc'unul sa' la cuochoch, laät inc'a' xaq'ue inha' re xch'ajbal li cuok jo' c'aynako xbanunquil. Ut li ixk a'in xch'aj li cuok riq'uin xya'al ru ut xmes riq'uin rismal xjolom. ⁴⁵ Laät inc'a' xacuutz' li cuu nak xinc'unul jo' c'aynako xbanunquil. Abanan li ixk a'in chalen xc'ulunic arin inc'a' naxcanab rutz'bal li cuok. ⁴⁶ Laät inc'a' xaq'ue li aceite sa' lin jolom jo' c'aynako xbanunquil, abanan li ixk a'in xyuli li cuok sa' sununquil ban. ⁴⁷ Jo'can nak tinye açue nak li ixk a'in k'axal nabal lix mac. Abanan cuybil sachbil chic. Jo'can nak k'axal cui'chic xinixra. Ut li ani ca'ch'in ajcui' lix mac nacuye', ca'ch'in ajcui' narahoc, chan. ⁴⁸ Ut li Jesús quixye re li ixk: —Ac cuybil sachbil chic la mac, chan. ⁴⁹ Ut eb li cuanqueb rochbened sa' li mex que'oc chixyebal: —çAni a cūnk a'in nak naxcuy naxsach li mac? chanqueb. ⁵⁰ Ut li Jesús quixye cui'chic re li ixk: —Xban nak cuan apabal, xatcole'. Jo'can nak ayu chi sa sa' ach'ol, chan re.

8

Eb li ixk li que'c'anjelac chiru li Jesús

¹ Li Jesús cō sa' eb li tenamit chixyebal resil li ch̄abil esilal. Ut quilaje'xbeni chixjunileb li tenamit ut li c'alebal rochbened lix tzolom cablaju. Yō chixch'olobanquil lix yalal chirix lix nimajcual cuanquilal li Dios. ² Cuanqueb ajcui' ixk yoqueb chi ochbeninc reheb. Eb li ixk a'in, a'an eb li que'q'uirtesic xyajeleb ut eb li que'isic maus aj musik'ej riq'uineb xban li Jesús. Sa' xyankeb a'an cuan lix María. Lix Magdalena neque'xye ajcui' re. A'an li ixk li qui-isic cuukub li maus aj musik'ej riq'uin. ³ Cuan lix Susana sa' xyankeb. Ut cuan ajcui' lix Juana li rixakil laj Chuza li quicuan chok' mertom riq'uin laj Herodes. Ut cuanqueb ajcui' nabaleb chic li ixk rochbened. A'an eb li neque'tenk'an reheb riq'uin li c'a'ruheb re.

Li jaljoquil ru atin chirix laj acuinel

⁴ Nabaleb li tenamit que'ch'utla riq'uin li Jesús. Que'chal chak sa' eb li na'ajej yalak bar. Ut li Jesús qui-oc chixyebal jun li jaljoquil ru atin reheb. Ut quixye: ⁵ —Jun aj acuinel ço chi auc. Ut nak yo chixhirbal li iyaj, cuan li quinak chire be ut quiyek'ic. Que'chal li xul li neque'xic'an ut que'xcua' li iyaj. ⁶ Ut cuan ajcui' li iyaj quinak sa' xyank li pec. Quimok, abanan sa' junpat quichakic xban nak chaki li ch'och'. ⁷ Ut cuan cui'chic li iyaj quinak sa' xyank li q'uix. Ut nak quichamo' li q'uix sa' xben, quixnat' li acujmk. ⁸ Ut cuan cui'chic li iyaj quinak sa' li chabil ch'och'. Quimok ut quiq'ui ut quiychin chi us. Quixq'ue o'takc'al (100) ru li junjunk chi rok. Ut quixye cui'chic li Jesús, —Li ani taraj rabinquil li c'a'ru yoquin chixyebal, chixq'uehak retal li yoquin chixyebal, chan. ⁹ Ut eb lix tzolom que'xpatz' re: —¿C'a'ru xyalal li jaljoquil ru atin li xaye? chanqueb. ¹⁰ Quichak'oc li Jesús ut quixye reheb: —Læx q'uebil ere xnaubal xyalal li mukmuquil na'leb chirix lix nimajcual cuanquilal li Dios. A'ut li jun ch'ol chic li inc'a' neque'paban, riq'uin jaljoquil ru atin tayemank reheb. Usta yoqueb chi iloc, abanan inc'a' te'xq'ue retal. Usta yoqueb chi abinc, abanan inc'a' te'xtau xyalal. ¹¹ A'an a'in lix yalal li jaljoquil ru atin li xinye. Li iyaj, a'an retalil li ratin li Dios. ¹² Ut li iyaj li quinak chire li be, a'an retalileb li neque'abin re li ratin li Dios. Nak ac xe'rabi li atin, laj tza inc'a' naxcanabeb re te'xtau ru li xyalal li ratin li Dios re nak inc'a' te'pabank ut te'colek'. ¹³ Ut li iyaj li quinak sa' xyank li pec, a'an retalileb li neque'abin re li ratin li Dios ut neque'xpab chi saheb sa' xch'ol. Abanan inc'a' nacana sa' xch'oleb. Nak nayale' rix lix pabaleb, inc'a' neque'xcuy xnumsinquil. Nach'inan ban xch'oleb. ¹⁴ Ut li iyaj li quinak sa' xyank li q'uix, a'an retalileb li neque'abin re li ratin li Dios. Neque'xpab, abanan inc'a' neque'q'ui sa' xpabaleb xban nak ca'aj cui' li c'a'ak re ru cuan sa' ruchich'och' neque'xc'oxla, li biomal ut xrabal ru li c'a'ak chic re ru. A'an li naramoc lix yalal chiruheb. ¹⁵ Ut li iyaj li quit'ane' sa' chabil ch'och', a'an retalileb li neque'abin re li ratin li Dios. Neque'xpab li ratin chi anchaleb xch'ol ut neque'q'ui sa' xpabaleb, chan li Jesús.

Li jaljoquil ru atin chirix li candil

¹⁶ Ut li Jesús quixye ajcui' reheb: —Ma ani tixloch junak candil ut tixq'ue ta rubel junak uc'al malaj ut tixq'ue ta rubel ch'at. Tixq'ue ban sa' junak na'ajej najt xteram re nak cuankeb sa' cutan li ani te'oc sa' li cab. ¹⁷ Jo'can ajcui' mac'a' cuan chi mukmu chi inc'a' ta tanaumank mokon. Ut li inc'a' natauman ru anakcuan, tataumank ru mokon. ¹⁸ Jo'can ut cheq'uehak retal li c'a'ru terabi xban nak li ani naxq'ue xch'ol chixtaubal ru li xyalal, taq'uehek' mas xna'leb. Abanan li inc'a' naxq'ue xch'ol chixtaubal ru, tamak'ek' chiru li naxc'oxla nak naxnau, chan.

Eb li ritz'in ut lix na' li Jesús

¹⁹ Ut eb li ritz'in li Jesús rochbened lix na' que'cuulac chi atinac riq'uin. Abanan inc'a' que'ru chi oc cuan cui' li Jesús xban nak k'axal cui'chic nabaleb li cristian. ²⁰ Ut quiyeh'e resil re li Jesús: —La na' ut eb la cuitz'in cuanqueb chirix cab ut te'raj acuatinanquil, chan. ²¹ Quichak'oc li Jesús ut quixye reheb: —Li ani neque'abin re li ratin li Dios ut neque'xbanu li c'a'ru naxye, a'aneb lin na' ut li cuitz'in, chan li Jesús reheb.

Li Jesús quixk'us li cak-sut-ik'

²² Sa' jun li cutan li Jesús quixye reheb lix tzolom: —K'axonko jun pac'al li palau, chan reheb. Ut qui-oc sa' jun li jucub rochbened lix tzolom ut coeb. ²³ Nak ac yoqueb chi xic chiru li palau, li Jesús quicuar. Sa' li honal a'an

quichal jun li cak-sut-ik' ut qui-oc chi nujac li ha' sa' li jucub ut yoq̄ueb re chi subunc sa' li palau. ²⁴ Eb lix tzolom coeb cuan cui' li Jesús ut que'rajsi. Ut que'xye re: —At tzolonel, at tzolonel, osoc' ke, chanqueb. Ut li Jesús qui-aj ru ut quixk'us li ik' ut quixk'us li palau ut ch'anamil quicana. Inc'a' chic qui-e'an. ²⁵ Ut li Jesús quixye reheb: —¿C'a'ru xec'ul? ¿Ma maç'a' chic epabal? chan. C'ajo' nak qui-oc xc'a'uxeb ut que'xsach xch'ol. Que'xye chi ribileb rib, —¿Chanru nak neque'abin li ik' ut li palau chiru li cujnk a'in? Ut, ¿chanru nak cuan xcuanquil chixk'usbaleb? chanqueb.

Li Jesús quirisi li maus aj musik'ej riq'uin jun li cujnk cuan sa' li tenamit Gadara

²⁶ Li Jesús ut eb lix tzolom que'cuulac sa' li na'ajej Gadara li cuan jun pac'al li palau Galilea. ²⁷ Toje' ajcui' te'cuulak li Jesús nak quichal jun li cujnk li cuan sa' li tenamit a'an chi c'uluc re. Li cujnk a'an ac junxil cuan maus aj musik'ej riq'uin. Inc'a' chic nacuan sa' rochoch chi moco naxq'ue chic rak'. Junes sa' li na'ajej li neque'muke' cui' li camenak nacuan. ²⁸ Nak quiril li Jesús li cujnk quixcuik'ib rib chiru. Quixjap re chixyebal: —¿C'a'ru tacuaj cuiq'uin, at Jesús? Laat li Latal li nimajcual Dios. Nintz'ama chaçuu nak minach'i'ch'i', chan re. ²⁹ Quixye chi jo'can xban nak li Jesús ac yo chixyebal re li maus aj musik'ej nak taclk riq'uin li cujnk. Nabal sut narahobtesic li cujnk xban li maus aj musik'ej. Neque'xbac' riq'uin ch'ich' ut riq'uin cadena. Abanan naxt'upi li cadena ut nac'ame' xban li maus aj musik'ej sa' eb li na'ajej bar maç'a' cuan. ³⁰ Li Jesús quixye re: —¿Ani ac'aba'? chan re. —Cuakib mil inc'aba' xban nak nabalo, chan nak quichak'oc. ³¹ Ut eb li maus aj musik'ej que'xtz'ama chiru li Jesús nak inc'a' tixtaklaheb sa' xbalba. ³² Aran cuanqueb jun tub li ak yoq̄ueb chi ichajibc chiru li tzul. Eb li maus aj musik'ej que'xtz'ama chiru li Jesús nak tixtaklaheb chi oc riq'uineb li ak. Ut li Jesús quixcanabeb chi oc riq'uineb. ³³ Que'el li maus aj musik'ej riq'uin li cujnk ut que'oc riq'uineb li ak. Eb li ak que'oc chi alinac. Sa' xben li ul que'el chak ut toj sa' li palau coxe'nak ut aran que'cam. ³⁴ Ut eb li yoq̄ueb chi iloc reheb li ak que'coeb sa' anil ut coxe'xye resil sa' li tenamit li c'a'ru quic'ulman jo' ajcui' sa' li c'alebal. ³⁵ Ut nabaleb li tenamit que'coeb chirilbal li c'a'ru quic'ulman. Que'cuulac cuan cui' li Jesús ut que'ril li cujnk li qui-isic nabal chi maus aj musik'ej riq'uin. Chunchu chiru li Jesús. Tikto chic ut tuktu chic xjolom. Riq'uin rilbal a'an que'sach xch'oleb li tenamit. ³⁶ Ut eb li que'iloc re li c'a'ru quic'ulman, que'xserak'i reheb li tenamit chanru nak quic'uira li cujnk li quicuan maus aj musik'ej riq'uin. ³⁷ C'ajo' nak que'xucuac chixjunileb li tenamit li cuanqueb sa' eb li na'ajej li cuanqueb sa' xcuent Gadara. Ut que'xtz'ama chiru li Jesús nak taclk sa' lix na'ajej. Jo'can nak li Jesús qui-oc cui'chic sa' li jucub ut qui-el sa' li na'ajej a'an. ³⁸ Ut li cujnk li qui-isic maus aj musik'ej riq'uin quixye re li Jesús: —Xicakin chaçuix, chan re. Abanan li Jesús quixye re: —Inc'a'. Canakat. ³⁹ Ayu sa' la cuochoch ut taserak'i reheb chixjunileb chanru nak li Dios xruxtana açuu, chan li Jesús. Jo'can nak co li cujnk ut quixserak'i reheb chixjunileb li cuanqueb sa' li tenamit chanru nak li Jesús quiruxtana ru.

Li Jesús quixq'uirtesi lix rabin laj Jairo jo' ajcui' li ixk li quich'e'oc re li rak'

⁴⁰ Nak li Jesús quinume' cui'chic jun pac'al li palau, li q'uila tenamit yoq̄ueb chiroybeninquil chi saheb sa' xch'ol. ⁴¹ Ut sa' li honal a'an quicuulac jun li cujnk aran aj Jairo xc'aba'. A'an li nataklan sa' li cab li neque'xch'utub cui' ribeb laj judío. Nak quiril li Jesús, quixcuik'ib rib chiru ut quixtz'ama chiru nak taxic sa' rochoch xban nak camc re lix rabin. ⁴² Jun ajcui' lix rabin chiru.

Cablaju chihab na cuan re. Ut eb li cristian yoq̄ueb chixlatz'anquil li Jesús nak yō chi xic. ⁴³ Sa' xyankeb cuan jun li ixk cablaju chihab xticlajic xyajel. Junelic yō lix yajel li ixk a'an ut inc'a' chic natz'ap lix quiq'uel. Quixq'ue rib chi banec' riq'uin nabaleb aj banonel ut nabal li tumin quixsach. Abanan mā jun quiru chi banoc re. ⁴⁴ Li ixk a'an quijiloc riq'uin li Jesús ut quixch'e' li rak'. Ut sa' ajcui' li honal a'an quiq'uira li ixk. ⁴⁵ Ut li Jesús quixye: —¿Ani xch'e'oc cue?— Ut chixjunileb que'chak'oc ut que'xye: —Lao inc'a' yoco chach'e'bal.— Tojo'nak laj Pedro jo'queb ajcui' li cuanqueb rochben que'xye re: —At tzolonel, laāt nacacuil chanru nak yoq̄ueb chalatz'anquil li tenamit. ¿C'a'ut nak nacapatz' ani xch'e'oc acue? chanqueb re. ⁴⁶ Ut li Jesús quixye cui'chic reheb: —Lain ninnau nak cuan ani xch'e'oc cue xban nak xcuec'a nak cuan ani xq'uira riq'uin incuanquil, chan. ⁴⁷ Li ixk quixq'ue retal nak li Jesús naxnau nak xch'e' li rak'. Saisicsōt xban xxiu li ixk. Sa' xch'ol a'an nak tach'ilak xban li Jesús. Quixcuik'ib rib chiru li Jesús ut quixye re chiruheb chixjunileb li cristian c'a'ut nak quixch'e' li rak'. Ut quixye ajcui' re nak sa' ajcui' li honal a'an xq'uira. ⁴⁸ Li Jesús quixye re: —Kana', xban nak xapab nak cuan incuanquil chaq'uirtesinquil, jo'can nak xatq'uira. Ayu chi sa sa' ach'ol, chan. ⁴⁹ Toj yō ajcui' chi atinac li Jesús nak quichal jun li cujnk sa' rochoch laj Jairo li nataklan sa' li cab li neque'xch'utub cui' ribeb laj judío ut quixye re laj Jairo: —Xcam lā rabin. Mach'i'ch'i'i chic laj tzolonel, chan re. ⁵⁰ Nak quirabi li Jesús li c'a'ru quixye li cujnk, quixye re laj Jairo: —Matc'oxlac. Ca'aj cui' tapab ut lā rabin tācolek', chan. ⁵¹ Nak quicuulac li Jesús, mā ani quixcanab chi oc sa' li cab. Ca'aj cui' laj Pedro, laj Jacobo ut laj Juan rochbeneb lix na' xyucua' li xka'al. ⁵² Chixjunileb li cuanqueb aran japjoqueb re chi yabac xban nak ac xcam. Ut li Jesús quixye reheb: —Mexyabac. Li xka'al a'in moco camenak ta. Cuarc yō, chan. ⁵³ Chixjunileb li cuanqueb aran que'xse'e li Jesús xban nak que'xnau nak li xka'al camenak chic. ⁵⁴ Abanan li Jesús quixch'ap chi ruk' li xka'al, ut quixye re: —At ch'ina xka'al, cuaclin, chan. ⁵⁵ Sa' li honal a'an quicuacli cui'chic chi yo'yo li xka'al. Ut li Jesús quixye reheb nak te'xq'ue chi cua'ac. ⁵⁶ Ut eb lix na' xyucua' sachsoq̄ueb xch'ol riq'uin li quic'ulman. Abanan li Jesús quixye reheb nak mā ani aj e te'xserak'i li c'a'ru quic'ulman.

9

Li Jesús quixtaklaheb lix tzolom cablaju chixch'olobanquil resil li colba-ib

¹ Li Jesús quixch'utubeb lix tzolom cablaju ut quixq'ueheb xcuanquil chirisinquileb li maus aj musik'ej ut quixq'ueheb ajcui' xcuanquil chixq'uirtesinquileb li yaj. ² Quixtaklaheb chixch'olobanquil resil lix nima-jcual cuanquilal li Dios ut chixq'uirtesinquileb li yaj. ³ Quixye reheb: —Mac'a' teç'am ere nak texxic. Inc'a' teç'am exuk', chi moco ebols, chi moco etzacaemk chi moco etumin. Ca'aj cui' le rak' li cuan cherix teç'am. ⁴ Nak textc'ulek' sa' junak cab, aran texcanak. Toj tācuulak xk'ehil nak texxic, textc'elk sa' li na'ajej a'an. ⁵ Cui textcuulak sa' junak na'ajej bar cui' inc'a' textc'ulek', textc'elk riq'uin ut techik' li poks cherok jo' retalil li raylal te'xc'ul xban nak inc'a' que'raj rabinquil li ratin li Dios, chan li Jesús. ⁶ Coeb ut lix tzolom li Jesús sa' eb li junjnk chi na'ajej ut yoq̄ueb chixch'olobanquil resil li colba-ib. Ut yoq̄ueb ajcui' chixq'uirtesinquileb li yaj.

Qui-oc xc'a'ux laj Herodes xban li Jesús

⁷ Laj Herodes li nataklan aran Galilea quirabi resil chixjunil li yo chixbanunquil li Jesús ut qui-oc xc'a'ux xban nak cuan yoq̄ueb chi yehoc re nak a'an laj Juan li xcuacli cui'chic chi yo'yo sa' xyankeb li camenak. ⁸ Ut

cuan ajcui' li yoq̄ueb chi yehoc re nak a'an li profeta Elías li xchal cui'chic. Ut cuan cui'chic li yoq̄ueb chi yehoc re nak mare a'an jun xcomoneb li profeta li que'cuan junxil li xcuacli cui'chic chi yo'yo sa' xyankeb li camenak. ⁹ Laj Herodes quixye sa' xch'ol: —A'an macua' laj Juan xban nak lain quintaklan re xch'otbal xcux. ¿Ani anchal a'an li yoquin chirabinquil resil? chan. Jo'can nak taraj rilbal ru.

Li Jesús quixq'ueheb chi cua'ac li ob mil chi cuñk

¹⁰ Nak que'suk'i chak lix tzolom chixbanunquil li c'anjel que'taklac cui', que'xserak'i re li Jesús li c'a'ru quilaje'xbanu chak. Li Jesús quixc'ameb xjuneseb sa' jun na'ajej bar mac'a' cuan, li cuan xcuent li tenamit Bet-saida. ¹¹ Abanan li q'uila tenamit que'xq'ue retal nak li Jesús yoq̄ueb chi xic sa' li na'ajej a'an, ut que'coeb chirix. Li Jesús quixc'uleb ut qui-oc chixch'olobanquil xyalal chiruheb chirix lix nimajcual cuanquial li Dios. Ut quixq'uirtesih eb ajcui' li yaj. ¹² Nak ac yo chi ecuuc, lix tzolom cablaju que'coeb bar cuan cui' li Jesús ut que'xye re: —Chak'rabiheb li tenamit re nak te'xic xsic'bal lix na'ajej bar te'hilank cui' ut te'xsic' ajcui' lix tzacaemk sa' eb li c'alebaj ut sa' eb li na'ajej li cuanqueb chi nach', chanqueb re. ¹³ Li Jesús quixye reheb: —Q'uehomak xcuah eb laex. Ut eb a'an que'xye: —Mac'a' tzacaemk kiq'uin lao. Ob ajcui' li caxlan cua ut cuib ajcui' li car cuan. ¿Malaj ut yocat chixc'oxlanquil nak lao toxic chixlok'bal xtzacaemkeb li q'uila tenamit a'in? chanqueb lix tzolom. ¹⁴ Chixjunileb li cuanqueb aran cuanqueb tana ob mil chi cuñk. Li Jesús quixye reheb lix tzolom nak te'xchunub ribeb chi ch'utal, chi lajetk roxc'al. (50) ¹⁵ Eb lix tzolom li Jesús que'xbanu jo' quiyeh'e reheb. Ut li cristian que'chunla chi ch'utal. ¹⁶ Li Jesús quixchap li ob chi caxlan cua ut li cuib chi car. Qui-iloc sa' choxa. Quixbantioxi chiru li Dios. Quixjachi ut quixq'ue reheb lix tzolom re nak te'xjeq'ui reheb li q'uila tenamit. ¹⁷ Que'cua'ac chixjunileb toj retal que'c'ojla xch'ol. Ut cablaju chacach chic li rela' quicana.

Laj Pedro quixye nak li Jesús, a'an li Cristo laj Colonel li yechi'inbil

¹⁸ Sa' jun li cutan li Jesús yo chi tijoc xjunes nak que'cuulac lix tzolom riq'uin. Li Jesús quixpatz' reheb lix tzolom ut quixye: —¿Anihin lain nak neque'xye li tenamit? chan. ¹⁹ Eb a'an que'xye re: —Cuan neque'yehoc re nak laät laj Juan laj Cubsihom Ha'. Ut cuan ajcui' neque'yehoc re nak laät li profeta Elías. Ut cuan cui'chic neque'yehoc re nak laät jun reheb li profeta li que'cuan najter li xcuacli cui'chic chi yo'yo, chanqueb. ²⁰ —Ut laex, ¿anihin lain nak neque'oxla? chan li Jesús reheb. Quichak'oc laj Pedro ut quixye re: —Laät li Cristo, laj Colonel li yechi'inbil xban li Dios, chan. ²¹ Ut li Jesús quixtz'ama chiruheb lix tzolom ut quixye reheb: —Ma' ani aj e teye nak lain li Cristo, chan reheb.

Li Jesús quixye resil li raylal li tixc'ul

²² Ut quixye ajcui' reheb: —Lain li C'ajolbej. Tento nak tinc'ul nabal li raylal. Tintz'ektanak xbaneb li xakabanbibleb chi c'anjelac sa' li templo, jo' ajcui' xbaneb li xbenil aj tij, ut xbaneb laj tiz'ib. Tincamsik, abanan tincuaclik cui'chic chi yo'yo sa' rox li cutan, chan li Jesús. ²³ Li Jesús quixye reheb chixjunileb li cuanqueb aran: —Li ani taraj inpabanquil tento nak tixtz'ektana li c'a'ru naxrahi ru lix ch'ol. Tixcuy xnumsinquil li raylal li tixc'ul, usta tacamsik sa' inc'aba'. Ut chinixtakehak. ²⁴ Li ani tatz'ektanank cue re xcolbal rix lix yu'am arin sa' ruchich'och', tixtz'ek li junelic yu'am. A'ut li ani naxsach lix yu'am arin sa' ruchich'och' sa' inc'aba' lain, a'an tarechani li junelic yu'am. ²⁵ ¿C'a'ru tixra junak li cuñk cui tarechani chixjunil xbiomal li

ruchich'och' ut tixtz'ektana li junelic yu'am? ²⁶ Li ani taxutanaq inban malaj ut xban li cuatin, lain li Alalbej tinxutanaq ajcui' xbaneb nak tinxalk chak riq'uin inlok'al ut riq'uin xlok'al lin Yucua' cuochbened li santil ángel, chan li Jesús. ²⁷ Ut quixye ajcui': —Relic chi yal tinye ere nak cuanqueb arin sa' eyank li inc'a' te'camk toj te'ril lix nimajcual cuanquial li Dios, chan li Jesús.

Laj Pedro, laj Jacobo ut laj Juan que'ril nak quijala li rilobal li Jesús

²⁸ Cuakxakib cutan na chic xyebal eb a atin a'in nak li Jesús co chi tijoc sa' xben jun li tzul rochbened laj Pedro, laj Jacobo ut laj Juan. ²⁹ Nak yo chi tijoc li Jesús, quijalano' li rilobal chiruheb. Ut li rak' sak sak ut nalemtz'un. ³⁰ Ut que'ril nak cuibeb li cujnk yoqueb chi atinac riq'uin li Jesús. A'aneb laj Moisés ut laj Elías. ³¹ Neque'lemtz'un ut c'ajo' lix lok'aleb nak yoqueb chi atinac chirix lix camic li Jesús li tenebanbil sa' xben aran Jerusalén. ³² Usta yoqueb xcuara laj Pedro ut li cuanqueb rochben, abanan inc'a' que'cuar. Yoqueb ban chirilbal lix lok'al li Jesús jo' ajcui' li cuib chi cujnk li cuanqueb rochben. ³³ Nak ac oqueb re xcanabanquil li Jesús li cuib chi cujnk, laj Pedro quixye re li Jesús: —Kacua', c'ajo' xchak'al ru nak cuanco arin. Xkayib ta oxibak muhebal arin. Jun acue, jun re laj Moisés ut jun re laj Elías, chan. Quixye chi jo'can xban nak inc'a' quixtau ru li xyalal li quiril. ³⁴ Nak toj yo chi atinac laj Pedro, quichal jun li chok sa' xbeneb. C'ajo' nak que'xucuaq nak que'mukun sa' li chok. ³⁵ Que'rabi nak li Dios quiatinac sa' li chok ut quixye: —A'in li cualal li sic'bil ru inban. Cherabi li c'a'ru tixye, chan. ³⁶ Nak quicana li atinac, xjunes chic li Jesús quicana. Ut eb a'an mac'a' chic que'xye. Ut chiruheb li cutan a'an ma' ani aj e que'xye li c'a'ru que'ril.

Li Jesús quirisi li maus aj musik'ej riq'uin jun li al

³⁷ Jo' cuulajak chic nak quicube sa' li tzul, nabaleb li q'uila tenamit que'cuulac chi c'uluc re li Jesús. ³⁸ Jun li cujnk quiatinac chak sa' xyankeb li tenamit ut quixye chi cau xyab xcux: —At tzolone', nintz'ama chacuu nak tachuil li cualal xban nak ca'aj cui' a'an chicuu. ³⁹ Cuan maus aj musik'ej riq'uin. Nak naniman xyajel najxap re ut nach'ikch'ikic chi cau xban li maus aj musik'ej ut na-el xcuokx sa' re. Ut inc'a' naraj xcanabanquil li cualal. ⁴⁰ Xintz'ama chiruheb la tzolom nak te'risi li maus aj musik'ej, abanan inc'a' xe'ru chirisinquil, chan li cujnk. ⁴¹ Quichak'oc li Jesús ut quixye reheb: —Laex tenamit li cuanquex anakcuan, chi tic inc'a' nequexpaban ut inc'a' us ena'leb. Jo' najtil chic tincuank eriq'uin re nak texpabank? Jo' najtil chic texincuy nak nequec'oxla? C'am chak li al arin cuiq'uin, chan li Jesús. ⁴² Nak yo chi xic li al riq'uin li Jesús, li maus aj musik'ej quixcut li al sa' ch'och' ut quixch'ikle chi cau. Abanan li Jesús quixk'us li maus aj musik'ej. Quixq'uirtesi li al ut quixk'axtesi re lix yucua'. ⁴³ Ut chixjunileb li cuanqueb aran sachsoqueb xch'ol chirilbal nak k'axal nim xcuanguil li Dios. Nak toj sachsoqueb xch'ol li tenamit chi c'oxlac chirix li quic'ulman, li Jesús quixye reheb lix tzolom: ⁴⁴ —Cherabihak chi us li tinye ere. Tento nak lain li C'ajolbej tink'axesik sa' ruk'eb li cujnk li xic' neque'iloc cue, chan li Jesús. ⁴⁵ Abanan eb lix tzolom inc'a' que'xtau ru li c'a'ru quixye, xban nak toj maji' nacuulac xk'ehil nak te'xtau ru. Ut que'xutanaq chixpatz'bal re c'a'ru xyalal li quixye li Jesús reheb.

Lix tzolom li Jesús que'xpatz' ani li nimak xcuanquil sa' xyankeb

⁴⁶ Eb lix tzolom li Jesús que'oc chixcuech'inquil ribeb. Ut yoqueb chixpatz'bal ani reheb li nimak xcuanquil. ⁴⁷ Nak li Jesús quixq'ue retal li c'a'ru yoqueb chixc'oxlanquil, quixc'am jun li ch'ina al ut quixxakab chiru. ⁴⁸ Ut

quixye reheb: —Li ani tac'uluk re junak ch'ina al jo' a'in sa' inc'aba' lain, tinixc'ul ajcui' lain; ut li ani tac'uluk cue lain, tixc'ul ajcui' li ani xtaklan chak cue. Jo'can nak li ani cubenak xcuanquil sa' eyank anakcuan, a' anak chic li nimak xcuanquil. ⁴⁹ Laj Juan quixye re li Jesús: —At Kaçua', xkil jun li cujnk yo chi isinc maus aj musik'ej sa' ac'aba'. Ut lao xkaye re nak inc'a' tixbanu a'an xban nak moco kacomon ta, chan. ⁵⁰ Ut li Jesús quichak'oc ut quixye re: —Mek'us li cujnk a'an xban nak li ani inc'a' xic' na-iloc ke, a'an na-oquen chikix, chan.

Li Jesús quixk'useb laj Jacobo ut laj Juan

⁵¹ Nak ac cuulac re xk'ehil nak li Jesús tac'amek' cui'chic xban li Dios sa' choxa, quixcacuubresi xch'ol chi xic Jerusalén. ⁵² Li Jesús quixtakla txakl sa' jun tenamit cuan sa' xcuent Samarita, re nak te'xcauresi xna'aj re tahilank cui'. ⁵³ Abanan li cuanqueb sa' li tenamit a'an inc'a' que'raj xc'ulbal li Jesús xban nak que'xq'ue retal nak yo chi xic Jerusalén. ⁵⁴ Nak laj Jacobo ut laj Juan que'xq'ue retal nak inc'a' quic'ule' li Jesús sa' li tenamit a'an, que'xye re: —¿Ma taçauj nak takatz'ama nak tacubek chak xam sa' choxa re nak tac'atek' li tenamit a'an jo' quixbanu laj Elías? chanqueb. ⁵⁵ Quixsuk'isi rib li Jesús ut quixk'useb. Quixye reheb: —¿C'a'ru musik'ejil cuan eriç'uin laex nak inc'a' nequetau ru? ⁵⁶ Lain li C'ajolbej inc'a' xinchal chixsachbal ruheb li cristian. Xinchal ban chixcolbaleb, chan li Jesús. Ut chirix a'an, que'coeb sa' jalan chic na'ajej.

Eb li cujnk que'xye nak te'raj xtakenquil li Jesús abanan yal xcab rix xch'ol nak que'xye

⁵⁷ Nak yoqueb chi xic li Jesús, jun li cujnk quicuulac riç'uin ut quixye re: —At tzolonel, tincuaç atakenquil yalak bar tatxic, chan re. ⁵⁸ Li Jesús quichak'oc ut quixye re: —C'oxla chi us ma taçuy intakenquil. Li yac cuanqueb xjul sa' pec, ut li xul li neque'rupupic chiru choxa cuanqueb xsoc. Abanan lain li C'ajolbej maç'a' inna'aj bar taruk tinhilank cui'. — ⁵⁹ Li Jesús quixye re jun chic: —Chinatake, chan. Quichak'oc li cujnk ut quixye: —Kaçua', chinaçuy. Inmukak cuan lin yucua' tojo'nak tinxic chaçuix, chan. ⁶⁰ Li Jesús quixye re: —Canabeb li toj camenakeb sa' li maç xmuakeb cuan lix camenak. Ut laa, ayu. Ye chak resil lix nimajcual cuanquilal li Dios, chan. ⁶¹ Ut jun chic li cujnk quixye: —At Kaçua', tatintake. Abanan inchak'rabihakeb cuan chak li cuanqueb sa' cuochoch, chan re. ⁶² Ut li Jesús quixye re: —Li ani naxtiqub c'anjelac chiru li Dios ut cui toj yo chixc'oxlanquil li c'a'ru re, li jun a'an inc'a' us chok' aj c'anjel sa' lix nimajcual cuanquilal li Dios, chan li Jesús.

10

Li Jesús quixtaklaheb li lajeb xcac'ql (70) chi cujnk chixch'olobanquil li xyalal

¹ Ut chirix chic a c'a'ak re ru a'in, li Kaçua' quixsiç'ueb ru lajeb xcac'aleb (70) chic chi cujnk ut quixtaklaheb chi ca'cabil sa' eb li junjunk chi tenamit ut sa' eb li na'ajej li bar talaje'numek' cui'. ² Ut quixye reheb, —Relic chi yal nabaleb li inc'a' neque'xnau xyalal. Abanan moco q'uiheb ta li te'xye li xyalal reheb. Chanchaneb li ru li acujmk li maç'a' aj sic'ol re. Jo'can ut tinye ere nak tetz'ama chiru li Kaçua' re nak a'an tixtaklaheb laj c'anjel chixch'olobanquil li xyalal chiruheb. ³ Ayukex bi' ut chenaahak nak lain yoçin chi taklanc ere sa' xyankeb li xic' neque'iloc ere. Chanchanakeb li coc' carner sa' xyankeb laj xoj. ⁴ Inc'a' teç'am xna'aj li c'a'ak re ru tac'anjelac ere sa' be, chi moco etumin, chi moco xjalbal exab. Ut ma ani aj iq'uin

texxaklik chi serak'ic sa' be. ⁵ Nak texcuulak sa' junak cab, teq'ue xsahileb xch'ol ut teye, "A' taxak li tuktuquil usilal chi cuank sa' li cab a'in," cha'kex. ⁶ Cui chabileb li cuanqueb sa' li cab a'an, taçuank li tuktuquil usilal riq'uineb jo' xeye laex. Cui ut inc'a' chabileb, inc'a' ajcui' taçuank li tuktuquil usilal riq'uineb. Ca'aj cui' eriq'uin ban laex tačanak. ⁷ Nak tex-oc sa' junak cab, aran texčanak. Inc'a' yokex chixbeninquil erib. Ut chetzacahak li c'a'ru taq'uehek' ere xban nak laj c'anjel tento tixc'ul lix tojbal. ⁸ Nak texc'ulek' sa' junak tenamit, chec'ulak ut chetzaca li c'a'ru taq'uehek' ere. ⁹ Teq'uirtesiheb li yaj li cuanqueb sa' li tenamit a'an ut teye ajcui' reheb nak yo chak chi nach'oc lix nimajcual cuanquial li Dios. ¹⁰ Abanan cui texcuulak sa' junak tenamit ut inc'a' texc'ulek' sa' xyalal, tex-ek' sa' be ut tex-oc xyebe, ¹¹ "Lix poksil le tenamit li xletz chi kok takachik'chik'i chok' retalil nak tachalk raylal sa' eben. Julticak ere nak lix nimajcual cuanquial li Dios xc'ulun eriq'uin, abanan inc'a' xec'ul", cha'kex reheb. ¹² Relic chi yal tinye ere nak toj cubenak ca'ch'in lix tojbal xmaqueb li tenamit Sodoma chiru lix tojbal xmaqueb li tenamit a'in xk'ehil li rakba atin.

Ra te'xc'ul li tenamit cui inc'a' te'xxoto xmaq

¹³ Raylal chalel sa' eben laex li cuanqueb sa' li tenamit Corazín. Raylal chalel sa' eben laex li cuanqueb sa' li tenamit Betsaida. Cui ta quinbanu aran Tiro li milagro a'in li xinbanu cheru ut cui ta quinbanu aran Sidón, ac najter raj que'xq'ue li k'es ru t'icr chirixeb ut que'xchunub raj rib sa' cha ut que'yot'e' raj xch'oleb ut que'xjal raj xc'a'uxeb. ¹⁴ Jo'can ut tinye ere nak sa' xk'ehil li rakba atin, k'axal cui'chic li raylal li teç'ul laex chiru li raylal li te'xc'ul eb laj Tiro ut eb laj Sidón. ¹⁵ Ut laex li cuanqueb sa' li tenamit Capernaum, c'ajo' nak nequenimobresi erib. ¿Ma nequec'oxla nak tatakjik ecuanquil toj sa' choxa? Taçubjik ban ecuanquil nak textaklak sa' xna'ajeb li camenak. ¹⁶ Li ani taabink re le ratin laex, tarabi ajcui' li cuatin lain. Ut li ani tatz'ektanank ere laex, tinixt'ektana ajcui' lain. Ut li ani natz'ektanan cue lain, naxtz'ektana ajcui' li quitaklan chak cue, chan li Jesús.

Que'suk'i chak chixyebal resil li que'taklac cui' li lajeb xcac'al (70) chi cuink

¹⁷ Que'suk'i chak li lajeb xcac'al chi cuink chi saheb sa' xch'ol ut que'xye re li Jesús: —At Kacua', sa' ac'aba' laat neque'paban chiku eb li maus aj musik'ej, chanqueb. ¹⁸ Li Jesús quixye reheb: —Lain quicuul laj tza chanchan rak' cak nak quit'ane' chak sa' choxa. ¹⁹ Lain xinq'ue ecuanquil. Usta teyek' li c'anti' ut laj xoc', mac'a' teç'ul. Xinq'ue ecuanquil sa' xben laj tza ut mac'a' taruk tixbanu ere. ²⁰ Misaho' sa' ech'ol xban nak cuan ecuanquil sa' xbeneb li maus aj musik'ej. Chisahok' ban ech'ol xban nak tz'ibanbilak le c'aba' sa' choxa, chan. ²¹ Sa' li honal a'an li Jesús quirec'a' xsahil xch'ol xban li Santil Musik'ej. Quitijoc ut quixye: —At inYucua', laaj laj echal re li choxa jo' ajcui' li ruchich'och'. Ninbantioxi chacuu xban nak xamuk li xyalal chiruheb li tzolbibleb ut li cuanqueb xna'leb. Ut xac'ut li xyalal chiruheb li cubenakeb xcuanquil. Chanchaneb coc'al. Xabanu chi jo'can xban nak jo'can xcuulac chacuu laaj, chan li Jesús nak quitijoc. ²² Ut quixye reheb li cuanqueb aran: —Chixjunil li c'a'ak re ru xk'axtesi sa' cuuk' lin Yucua'. Ma ani nana'oc cuu lain li C'ajolbej, ca'aj cui' li Acuabej Dios. Ma ani nana'oc ru li Acuabej Dios, ca'aj cui' lain li C'ajolbej. Ut tana'ek' ajcui' ru xbaneb li ani tinc'ut cui' li xyalal, chan li Jesús. ²³ Quixsuk'isi riq'rineb lix tzolom ut quixye reheb xjuneseb: —Us xak ere laex xban nak riq'uin xnak' eru yoquex chirilbal li c'a'ru yo chi c'ulmanc. ²⁴ Lain tinye ere nak nabaleb li profeta ut nabaleb li rey que'raj raj rilbal li c'a'ru yoquex chirilbal laex, abanan inc'a' que'ru rilbal. Ut que'raj raj

rabinquil li c'a'ru yoquex chirabinquil laex, abanan inc'a' que'ru rabinquil, chan li Jesús reheb.

Takara li kas kitz'in usta xic' nocoe'ril

²⁵ Jun aj tzolol chak'rab quixye re li Jesús yal re xyalbal rix: —At tzolonel: ¿C'a'ru us tinbanu re nak tincuechani li junelic yu'am? chan. ²⁶ Quichak'oc li Jesús ut quixye re: —Laat nacacuul sa' li Santil Hu. ¿C'a'ru naxye sa' li chak'rab?— ²⁷ Ut a'an quichak'oc ut quixye: —Chara li Kacua' la Dios chi anchal ach'ol, chi anchal acuam, chi anchal ametz'eu ut chi anchal ac'a'ux. Ut chara la cuas acujtz'in jo' nak nacara acuib laat, chan. ²⁸ Ut li Jesús quixye re: —Yal li xaye. Banu a'in ut tacuank ayu'am chi junelic, chan. ²⁹ A'an quiraj raj xtocabresinuil xch'ol xjunes rib. Quixye re li Jesús: —¿Ani tz'akal li cuas cujtz'in? chan. ³⁰ Li Jesús quichak'oc ut quixye re: —Cuan jun li cujnk aj judío qui-el Jerusalén ut yo chi xic Jericó. Quic'ule' xbaneb laj elk'. Que'xmak' chiru chixjunil li c'a'ru cuan re. Que'xtacuasi chi us ut coeb. Camc re li cujnk que'xcanab. ³¹ Ut sa' li be a'an quinume' jun laj tij. Quiril li cujnk t'ant'o aran, aban tjc quinume'. ³² Ut jo'can ajcui' quixbanu jun laj levita xcomoneb li neque'tenk'an reheb laj tij. Quinume' chixc'atk li cujnk li t'ant'o aran, abanan quinume' chi tjc. ³³ Ut quinume' ajcui' jun chic li cujnk sa' li be a'an, Samaria xtenamit. Eb laj Samaria xic' neque'ril rib riq'uineb laj judío. Abanan nak yo chi numec' quiril li cujnk t'ant'o aran ut quiril xtok'obal ru. ³⁴ Quicuulac riq'uin. Quixban lix yoc'olal riq'uin vino ut aceite. Quixbati ru lix toch'olal. Quixq'ue chirix lix cacuay ut quixc'am sa' jun li cab ut aran quixq'ue chi hilanc ut a'an qui-iloc re. ³⁵ Jo' cuulajak chic nak ac xic re li cujnk aj Samaria, quixq'ue cuib li tumin plata re laj echal cab ut quixye re: —Chacuul chi us li cujnk a'in. Ut chixjunil li jo' q'ual chic tasach, lain tintoj acue sa' insuk'ijic, chan. ³⁶ ¿C'a'ru nacac'oxla laat? ¿Bar cuan reheb li oxib li que'nume' li tz'akal ras ritz'in li quit'ane' sa' ruk'eb laj elk'? chan. ³⁷ Laj tzolol chak'rab quichak'oc ut quixye: —A' li qui-uxtanan ru, chan. Ut li Jesús quixye re: —Ayu ut jo'can ajcui' chabanu laat, chan.

Li Jesús quixye nak us quixbanu lix María xban nak quirabi li ratin

³⁸ Ut nak yoqueb chi xic li Jesús, que'cuulac sa' jun ch'ina tenamit. Aran quihilan li Jesús sa' rochoch jun li ixk xMarta xc'aba'. ³⁹ Lix Marta cuan jun li ritz'in xMaría xc'aba'. Lix María quixchunub rib chiru li Jesús chirabinquil li c'a'ru yo chixyebal. ⁴⁰ Abanan lix Marta ca'aj cui' lix q'uila c'anjel yo xc'a'ux chirix. Quichal riq'uin li Jesús ut quixye re: —Kacua', ¿ma inc'a' ch'a'aj nacacuec'a nak li cujtz'in niquinixcanab chi c'anjelac injunes? Ye re nak tinixtenk'a, chan. ⁴¹ Li Jesús quichak'oc ut quixye re: —Marta, laat naxic ac'a'ux chirix la q'uila c'anjel xban nak ca'aj cui' a'an nacac'oxla. ⁴² Abanan jun ajcui' li c'a'ru tento xbanunquil ut lix María xsic' ru a'an. Li k'axal us xbanunquil, a'an rabinquil li c'a'ru ninye. Ut ma ani taramok re chiru xbanunquil, chan li Jesús.

11

Li Jesús quixc'ut li tijoc chiruheb lix tzolom

¹ Sa' jun li cutan yo chi tijoc li Jesús. Ut nak quirake' chi tijoc, jun reheb lix tzolom quixye re: —Kacua', c'ut chiku li tijoc jo' nak laj Juan quixc'ut li tijoc chiruheb lix tzolom, chan. ² Ut li Kacua' quixye reheb: —Nak textijok, teye chi jo'ca'in:

Kacua', cuancat sa' li santil choxa, lok'oninbil taxak la santil c'aba'. Chichalk ta la nimajcual cuanquilal. Chi-uxk ta li nacacuj jo' sa' choxa, jo' ta ajcui' sa' ruchich'och'.

³ Chaq'ue taxak le li kacua kuc'a chi cuulaj cuulaj.

⁴ Ut chacuy chasac ta li kamac jo' nak nakacuyeb xmac li neque'macob chiku. Ut moaq'ue chi alec. Choacol ban chiru li inc'a' us.

⁵ Ut quixye ajcui' reheb li Jesús: —Kayehak nak laex cuan ta junak le ramig. Ut texxic raj riq'uin tuktu k'ojoyin ut feye raj re, “At cuamig, mare tato'oni oxibak incua. ⁶ Jun li cuamig xchal chak chi najt ut xc'ulun cuiq'uin sa' cab. Ut mac'a' cuan cue re tinq'ue re.” ⁷ Ut li jun li cuan chak sa' cab tachalk'ok chak ut tixye, “Minach'i'ch'i'i. Tz'aptz'o chic li cab. Lain ut eb lin c'ach'al yocho chi hilanc. Inc'a' naru nincuacli chixq'uebal acue li c'a'ru tacuaj.” ⁸ Moco xban ta nak ramig nak tacuaclik chixq'uebal re li c'a'ru taraj ru. Tixq'ue ban re xban nak yok chixpatz'bal ut re nak tixcanab xch'i'ch'i'inquil. ⁹ Jo'can ut nak ninye ere: —Nak tapaltok c'a'ru ere, chextz'amank chiru li Dios ut a'an tixq'ue ere. Chesic'ak ut tetau, chebokak ut li puerta tatehek' cheru. ¹⁰ Chebanu a'an xban nak li ani natz'aman chiru li Dios naq'uehe' re. Ut li ani naxsic', nextau. Ut li ani nabokoc, li puerta natehe' chiru. ¹¹ ¿Ma cuan ta bi' junak yucua'bej sa' eyank tixq'ue junak pec re li lalal nak tixpatz' xcua re? Ut nak tixpatz' junak xcar re, ¿ma c'anti' ta bi' tixq'ue re? ¹² Ut nak tixpatz' junak xmol, ¿ma aj xoc' ta bi' tixq'ue re? ¹³ Cui laex li moco chabilex ta nequenau xq'uebal li c'a'ru chabil re le lalal ec'ajol, ¿ma toja' ta chic le yucua' cuan sa' choxa inc'a' tixq'ue li Santil Musik'ej re li ani tixtz'ama chiru? chan li Jesús reheb.

K'axal nim xcuanquil li Jesús chiru xcuanquil laj tza

¹⁴ Li Jesús quirisi jun li maus aj musik'ej riq'uin jun li cujnk mem. Nak qui-el li maus aj musik'ej riq'uin, naqtinac chic li cujnk. Ut chixjunileb li cuanqueb aran que'sach xch'ol xban li c'a'ru quic'ulman. ¹⁵ Abanan cuanqueb ajcui' li que'yehoc re: —Li cujnk a'in na-isin maus aj musik'ej riq'uin xcuanquil laj Beelzebú lix yucua'ileb li maus aj musik'ej, chanqueb. ¹⁶ Ut cuanqueb ajcui' li que'xtz'ama chiru li Jesús nak tixbanu junak li milagro yal re xyalbal rix. ¹⁷ Li Jesús quixnau li c'a'ru yoq'ueb chixc'oxlanquil ut quixye reheb: —Cui cuan jun tepak chi tenamit xic' te'ril rib chi ribileb rib, li jun tep chi tenamit a'an tixsach xcuanquil xjunes rib. Ut cui cuan ta jun cabalak xic' te'ril rib chi ribileb rib, li jun cabal a'an te'xsach xcuanquil lix jun cabaleb. ¹⁸ Jo'can ajcui' laj tza. Cui xic' neque'ril rib chi ribileb rib, ¿chan ta cui' ru nak xakxok lix cuanquilal? Laex nequeye nak riq'uin xcuanquil laj tza nacuisi li maus aj musik'ej. ¹⁹ Cui lain yoquin chirisinguil maus aj musik'ej riq'uin xcuanquil laj tza, ¿ani aj cuanquil neque'isin cui' maus aj musik'ej li neque'taken ere laex? Jo'can nak a'an eb ajcui' te'yehok re nak inc'a' yal li yoquex chixyebal. ²⁰ Cui ut riq'uin xcuanquil li Dios nacuisiheb li maus aj musik'ej, riq'uin a'an nac'utun nak relic chi yal ac xc'ulun sa' eyank lix nimajcual cuanquilal li Dios. ²¹ Laj tza chanchan jun li cujnk cau rib ut cuan sa' ruk' lix ch'jch' re xcolbal rib. Yok chixc'ac'alenuil li rochoch. Mac'a' tixc'ul li c'a'ru re xban nak yok chixc'ac'alenuil. ²² Abanan cui tachalk' junak k'axal cau rib chiru a'an, a'an chic tanumtak sa' xben ut tamak'ek' chiru lix ch'jch' li cau cui' xch'ol ut tajeq'ujik li c'a'ru re. ²³ Li ani inc'a' na-oquen chicuix, a'an xic' ninril. Ut ani inc'a' natenk'an cue, narisi xcuanquil li c'a'ru ninbanu lain, chan li Jesús.

Laj tza tqasuk'ik cui'chic riq'uin li ani inc'a' tixk'axtesi rib chi tz'akal chiru li Cristo

²⁴ Nak ac x-el riq'uin junak cujnk, li maus aj musik'ej naxic sa' li na'ajej bar maç'a' cuan chixsic'bal bar taoc chi hilanc. Naril nak inc'a' naxtau xna'aj. Naxye: —Lajin tinsuk'ik cui'chic riq'uin li cujnk bar xin-el cui' chak, chan. ²⁵ Ut nak nacuulac riq'uin naxtau li cujnk chanchan jun li cab maç'a' chic cuan chi sa'. Mesunbil ut ac cauresinbil roybeninquil li ani taoc chi sa'. ²⁶ Ut li maus aj musik'ej naxsic' cuukub chic chi maus aj musik'ej k'axal cui'chic numtajanek xmausilaleb chiru a'an. Neque'oc chi cuanc riq'uin li cujnk. Ut lix na'leb li cujnk a'an numtajanek chic xyibal ru chiru nak quicuan junxil. ²⁷ Ut nak yo chixyebal eb li atin a'in li Jesús, jun li ixk quiatinac chak chi cau sa' xyankeb li q'uila tenamit, ut quixye: —Us xak re li ixk li x-alan açue ut xtu'resin açue, chan. ²⁸ Li Jesús quichak'oc ut quixye: —K'axal cui'chic us chok' reheb li neque'abin re li ratin li Dios ut neque'xbanu li c'a'ru naxye.

Li tenamit que'raj nak taç'utbesik junak milagro chiruheb

²⁹ Nak yoqueb chi ch'utlac li q'uila tenamit riq'uin, li Jesús quixye reheb: —Li cristian li cuanqueb sa' eb li cutan a'in inc'a' useb xna'leb. Te'raj taç'utbesik junak milagro chiruheb. Abanan ma jun milagro taç'utbesik chiruheb. Ca'aj cui' li milagro li qui-ux re laj Jonás, li quic'utbesic chiruheb junxil. ³⁰ Li milagro li quixc'ul laj Jonás nak quicole', a'an retalil chiruheb li tenamit Nínive nak a'an taklanbil xban li Dios. Jo'can ajcui' lajin li C'ajolbej. Li milagro li tinc'ul lajin, a'an jun retalil chiruheb li tenamit sa' eb li cutan a'in nak lajin taklanbilin xban li Dios, chan. ³¹ Li ixk li quicuan chok' reina sa' li tenamit li cuan sa' li sur, taçuaclik chak sa' xk'ehil nak tarakek' atin sa' eben ut tixye nak cuan emaç xban nak inc'a' xerabi li cuatin. A'an quichal chak toj sa' xmaril li ruchich'och' chirabinquil li c'a'ru quixye laj Salomón xban nak cuan xna'leb. Ut lajin k'axal cui'chic inna'leb chiru laj Salomón ut cuanquin arin sa' eyank. Abanan inc'a' nequepab li cuatin. ³² Ut te'cuaclik ajcui' eb li que'cuan sa' li tenamit Nínive sa' xk'ehil nak tarakek' atin sa' eben laex li cuanquex sa' eb li cutan a'in. Ut te'xye nak cuan emaç xban nak eb a'an que'yot'e' xch'ol que'xjal xc'a'ux ut que'paban nak quicuulac laj Jonás chixyebal ratin li Dios reheb. Ut lajin cuanquin arin sa' eyank ut k'axal nim incuanquil chiru xcuanquil laj Jonás ut laex inc'a' nayot'e' ech'ol inc'a' nequejal ec'a'ux, chan li Jesús.

Li Cristo a'an li kacutan saken

³³ Ma ani tixloch junak candil ut tixq'ue ta chi mukmu malaj ut tixq'ue rubel chacach. Naxq'ue ban sa' junak na'ajej najt xteram re nak cuankeb sa' cutan li ani te'oc sa' li cab. ³⁴ Li xnak' eru chanchan jun li lámpara. Xban nak na-iloc li xnak' eru cuanquex sa' cutan. Cui ta maç'a' li xnak' eru cuanquex raj sa' k'ojoyin. ³⁵ Cui inc'a' us li kana'leb, cuanco sa' k'ojoyin. Chanchano jun li mutz' li inc'a' na-iloc. Chebanu cuent re nak junelic cuankex sa' cutan saken. ³⁶ Jo'can ut cui cuanquex sa' cutan saken, moco cuanquex ta chic sa' k'ojoyin. Chabilak ban chic le na'leb. Xban nak chabil le na'leb, chanchanekex chic jun li xam li nacutanobresin, chan.

Li Jesús quixk'useb laj fariseo ut eb laj tzolol chak'rab

³⁷ Ut nak li Jesús quirake' chi atinac riq'uiheb, jun reheb laj fariseo quixbok li Jesús chi cua'ac sa' rochoch. Qui-oc li Jesús sa' rochoch laj fariseo ut quichunla chi cua'ac sa' mex. ³⁸ Laj fariseo quisach xch'ol chirilbal nak li Jesús inc'a' quich'ajoc jo' c'aynakeb xbanunquil eb laj judío. ³⁹ Li Jesús quixye re: —Laex aj fariseo nequech'aj li rix le sec' ut le plato; abanan tz'aj lix sa'. Laex chanchanex li sec' li tz'aj xsa' xban nak numtajanek le mausilal ut li elk'ac nequebanu. ⁴⁰ Laex maç'a' ena'leb. ¿Ma inc'a' nequenau nak li ani

quiyo'obtesin re li rix, a'an ajcui' li quiyo'obtesin re lix sa'? ⁴¹ Merahi ru li c'a'ru re jalan. Chesihak ban li c'a'ru cuan ere reheb li neba'. Cui tebanu chi jo'can chabilakex chic chiru li Dios, chan. ⁴² Ra chalel sa' eben laex aj fariseo. Nequemayeja li junjank sa' xlajetkil li isqui'ij, li ruda ut li c'a'ak re ru chi ichajil li nati'e'. Abanan inc'a' nequera li Dios ut inc'a' nequebanu li tiqulal. Us xq'uebal li junjank sa' xlajetkil, abanan k'axal cui'chic tento xrabal li Dios ut xbanunquil li tiqulal. ⁴³ Ra chalel sa' eben laex aj fariseo li nacuulac cheru c'ojlac sa' li na'ajej k'axal lok' nak nequexxic sa' li cab li nequech'utub cui' erib. Ut nacuulac cheru nak taq'uehek' elok'al sa' eb li be. ⁴⁴ Ra chalel sa' eben laex aj tzolol chak'rab ut laex aj fariseo xban nak inc'a' us le na'leb. Laex aj ca'pac'al u. Chanchanex li muklebaj li inc'a' nac'utun. Yalak ani nanume' sa' xben xban nak inc'a' neque'xnau c'a'ru cuan aran, chan. ⁴⁵ Quichak'oc jun reheb laj tzolol chak'rab ut quixye re li Jesus: —At tzolonel, riq'uin li c'a'ru yocat chixyebal, yocat chixc'utbal kaxutan lao.— ⁴⁶ Ut li Jesus quixye: —Ra ajcui' chalel sa' eben laex aj fariseo chak'rab. K'axal al li ik neque'ue sa' xbeneb li cristian ut k'axal ch'aj x'ambal. Laex nequeye nak tento te'xbanu chixjunil li naxye li chak'rab. Abanan chi moco laex nequexru xbanunquil. ⁴⁷ Ra chalel sa' eben laex aj tzolol chak'rab xban nak laex aj ca'pac'al u. Nequerutz'u'uji chak ru li que'muke' cui' li profetas li que'xcamsi le xe'tonil yucua'. ⁴⁸ Riq'uin li mausilal nequebanu nac'utun nak juntak'etex riq'uibeb le xe'tonil yucua'. Eb a'an que'camsin reheb li profeta ut laex nequeyib lix muklebaleb. ⁴⁹ Li Dios, a'an cuan xna'leb. Jo'can nak quixye, “Lain tintaklaheb li profeta ut eb li apóstol riq'uibeb. Sa' xyankeb a'an cuan tēcamsiheb, ut cuan ajcui' tētakeheb re xchappaleb.” ⁵⁰ Ut anakcuan laex chic textojok rix lix camiqueb chixjunileb li profeta chalen chak sa' xticlajic li ruchich'och'. ⁵¹ Yal nak laex textojok rix lix camiqueb a'an. Taticlak riq'uin lix camic laj Abel ut toj riq'uin lix camic laj Zacarias li quicamsic chiru nebal chixc'atk li templo ut li artal. ⁵² Ra chalel sa' eben laex, aj tzolol chak'rab, xban nak nequemuk li xyalal chiruheb li tenamit. Laex inc'a' nequepab li Dios, chi moco nequecanabeb chi pabanc li neque'raj raj pabanc, chan li Jesus reheb. ⁵³ Ut nak quirake' chixyebal eb li atin a'in, c'ajo' nak que'josk'o' eb laj tzolol chak'rab ut eb laj fariseo. Que'oc chixch'i'ch'i'inquil ut nabal li c'a'ak re ru yoqueb chixpatz'bal re. ⁵⁴ Yoqueb chi patz'oc re li Jesus yal re rilbal ma tixye junak atin inc'a' us re nak taruk te'xjit.

12

Mac'a' naru xbanunquil chi mukmu chi inc'a' ta tana'ek'

¹ Nak yoqueb chi ch'utlac li q'uila mil chi tenamit, yoqueb chixtiquisinuil ribeb. Li Jesus qui-oc chi atinac riq'uibeb lix tzolom xben cua ut quixye: —Mebanu jo' neque'xbanu laj fariseo. A'aneb aj ca'pac'al u. ² Mac'a' naru naxman chi mukmu chi inc'a' ta tac'utunk. Mac'a' cuan chi mukmu chi inc'a' ta tana'ek'. ³ Mac'a' naru nayeman sa' cab chi mukmu chiru k'ojyin chi inc'a' ta taek resil chi cutanquil. Ut mac'a' naru nayeman chi hasbanbil sa' cab chi inc'a' ta taabik resil yalak bar.

Ca'aj cui' li Dios tento xxucuanquil ru

⁴ Ex cuamij, lain ninye ere nak mexxucuaq chiruheb li ani te'raj camsinc ere xban nak mac'a' naru te'xbanu riq'uin le ram. ⁵ Lain tixye ere ani li tento texucua ru. Chexucuaq ru li Dios li naru tarisi xyu'am li junjank ut cuan xcuanquil chixtaklanquil li amej sa' xbalba. A'an li tento texucua ru. ⁶ Ma inc'a' ta bi' nac'ayic ob chi tzentzeyul chi cuib centavo? K'axal cubenak

xtz'ak, abanan ma jun reheb a'an nasach sa' xch'ol li Dios. ⁷ Jo'can ajcui' li rismal le jolom ajlanbileb chixjunil xban li Dios. Jo'can nak mexxucuac chiruheb li xic' neque'iloc ere xban nak laex k'axal tertó etz'ak chiruheb nabal chi tzentzeyul. ⁸ Lain tinya ere nak li ani naxye chiruheb li tenamit nak niquinixpab, lain tinya chiruheb lix ángel li Dios nak a'an cualal inc'ajol. ⁹ Ut li ani tatz'ektanank cue chiruheb li tenamit, lain tintz'ektana ajcui' a'an chiruheb lix ángel li Dios. ¹⁰ Li ani tahobok cue lain li C'ajolbej, tacuyek' xmac xban li Dios. Abanan li ani tamajecuanek re li Santil Musik'ej inc'a' tacuyek' xmac. ¹¹ Nak texc'amek' chiruheb li neque'taklan sa' li cab li neque'xch'utub cui' ribeb laj judío, malaj ut chiruheb laj rakol atin ut chiruheb li cuanqueb sa' xcuanquil, inc'a' yokex chixc'oxlanquil li c'a'ru texsumenk cui' malaj ut li c'a'ru teye, ¹² xban nak li Santil Musik'ej tixc'utbesi cheru sa' li honal a'an chanru texsumenk cui', chan li Jesús.

Inc'a'us nak junes li kabiomal takac'oxla

¹³ Jun li cujnk quiatínac chak sa' xyankeb li q'uila tenamit ut quixye re li Jesús: —At tzolonel, ye re li cuas nak xjachak li jun cablal li quicanabac chok' ke ut xq'uehak cue li jo' q'uial tintz'ak lain, chan. ¹⁴ A'ut li Jesús quixye re: —At cujnk, lain inc'a' xakabanbilin chi rakoc atin sa' eben chi moco xakabanbilin chixjachinquil le jun cablal. ¹⁵ Ut quixye ajcui' reheb chixjunileb li cuanqueb aran: —Q'uehomak retal li c'a'ru tebanu. Inc'a' yokex chixrahinquil ru li biomal, xban nak moco riq'uín ta kabiomal yo'yoco, chan. ¹⁶ Ut quixye ajcui' jun li jaljoquil ru atin reheb. Quixye: —Cuan jun li cujnk biom. Cuan jun xch'och' chabil ut nabal li acujmk na-el chi sa'. ¹⁷ Qui-oc chixc'oxlanquil ut quixye sa' xch'ol, “¿C'a'ru tinbanu? Mac'a' chic xna'aj li ru li cuacujmk”, chan. ¹⁸ Ut quixye, “Ninnau c'a'ru tinbanu. Tinpo' li rochochil li ru li cuacujmk li cuanqueb. Ut tinyib chic jalañ nink chok' rekaj. Ut chi sa' a'an tinxoc chixjunil li ru li cuacujmk jo' ajcui' chixjunil li c'a'ru cuan cue.” ¹⁹ Ut tinya: “Us xak cue. Cuan nabal c'a'ru cue xocxo inban re tinnumsi nabal chihab. Anakcuan tinhilank, tincua'ak, tin-uc'ak, ut tashok' sa' inch'ol”, chan. ²⁰ Abanan li Dios quixye re, “Abi, at jip aj cujnk. Chiru a k'ojoyin a'in tatcamk. Ut chixjunil li xocxo aban, ¿ani aj e taçanak cui'?” ²¹ Lain ninye ere: jo'ca'in naxc'ul li naxc'ula xbiomal sa' ruchich'och' ut riq'uín li Dios mac'a' xbiomal, chan li Jesús.

Mec'oxla chanru nak tenumsi li cutan junjnk

²² Ut li Jesús quixye reheb lix tzolom: —Mixic ech'ol chixc'oxlanquil chanru nak tenumsi li cutan junjnk, chi moco riq'uín li c'a'ru tetzaca chi moco riq'uín lix tikibanquil erib. ²³ Li kayu'am, a'an k'axal lok' chiru li katzacaemk. Ut li katibel, a'an k'axal lok' chiru li kak'. ²⁴ Cheg'uehak retal li xul li neque'rupupic chiru choxa. Eb a'an inc'a' neque'au, chi moco neque'k'oloc, chi moco neque'xxoc xtaheeb chi moco cuan xc'ulanquil xtzacaemkeb. Abanan li Dios naxq'ue xtzacaemkeb. ¿Ma toja' ta chic laex inc'a' tixq'ue etzacaemk? ²⁵ ¿Ani ere laex taruk tixtik ru lix yu'am usta naxtacuasi rib xc'oxlanquil? ²⁶ Cui inc'a' nequexru xbanunquil li c'a'ak re ru a'in, ¿c'a'ut nak nequetacuasi erib chixc'oxlanquil? ²⁷ Q'uehomak retal li utz'u'uj chanru nak neque'q'ui chi inc'a' neque'c'anjelac chi moco neque'quemoc. A'ut lain tinya ere, usta c'ajo' xchak'al ru lix tikibanquil laj Salomón, abanan inc'a' quixta xchak'al ru li utz'u'uj a'in. ²⁸ Ut cui li Dios naxq'ue lix ch'ina'usal li pim li cuan junpat ajcui' ut cuulaj q'uebilak sa' xam, ¿ma toja' ta chic laex inc'a' textikib? Laex inc'a' nequexpaban chi tz'akal. ²⁹ Jo'can ut nak inc'a' yok ec'a'ux chirix le cua eruc'a. ³⁰ Le yucua' li cuan sa' choxa naxnau li c'a'ru nequeraj ru. Li

inc'a' neque'xpab li Dios, ca'aj cui' lix tzacaemkeb neque'xc'oxla. ³¹ Abanan læex tesic' lix nimajcual cuanquilal li Dios ut chixjunil li c'a'ak re ru a'in talajq'uehek' ere chok' xtz'akob.

Q'uehomak ech'ol chirix li biomal cuan sa' choxa

³² Mexxucuaac ex cualal inc'ajol. Usta inc'a' q'uihex, abanan le yucua' cuan sa' choxa c'ojc'o xch'ol chixq'uebal ere lix nimajcual cuanquilal. ³³ C'ayihomak li c'a'ru cuan ere ut sihomak reheb li mac'a' cuan reheb re nak cuank ebomal sa' choxa. Aran inc'a' na-oc laj elk' chi elk'ac chi moco namaxen. Q'uehomak ech'ol chirix li biomal li inc'a' na-oso'. ³⁴ Jo'can nak chenuhak nak bar cuan cui' le biomal, aran ajcui' cuank le c'a'ux.

Yo'on cuankex chiroybeninquil lix c'ulunic li Kaçua'

³⁵ Checauresihak erib. Yokex chiroybeninquil li Kaçua'. Chanchanakes li moş li lochlo xxam ut yo' chiroybeninquil lix patrón. ³⁶ Chanchanakes li moş li yoqeb chiroybeninquil lix patroneb nak tasuk'ik chak sa' junak sumlac. Nak tixtoch' li puerta, sa' junpat te'xte chiru. ³⁷ Us xak reheb li moş li yoqeb chiroybeninquil lix patroneb. Nak taçuulak li patronej, tixtauheb chi ajoqeb ru. Relic chi yal ninye ere li patronej tixcauresi rib ut tixchunubeb lix moş sa' mex ut a'an ajcui' taq'uehok re lix tzacaemkeb. ³⁸ Us xak reheb li moş li yokeb chiroybeninquil lix patrón, usta tuktu li ojy'in malaj ut sakeuc re taçuulak. ³⁹ Cheq'uehak retal a'in: Cui ta naxnau li yucua'bej sa' li cab jok'e honal re li k'ojy'in tol-elk laj elk', tayo'lek raj ut inc'a' raj tixcanab chi elk'ac li c'a'ru cuan sa' li rochoch. ⁴⁰ Jo'can ajcui' læex yo'on cuankex chi oybeninc xban nak inc'a' nequenau jok'e honal tincuulak lain li C'ajolbej. Tincuulak chi mac'a' sa' ech'ol, chan li Jesús. ⁴¹ Laj Pedro quixye re li Jesús: —At Kaçua', çma ca'aj cui' ke lao xaye li jaljoquil ru atin a'an, malaj ut reheb ajcui' chixjunileb li tenamit?— ⁴² Ut li Kaçua' quixye re: —Li moş li cuan xna'leb ut çabil, a'an li taq'uehek' xcuanquil xban lix patrón sa' xbeneb li rech moşil. A'an chic taq'uehok re xtzacaemkeb sa' x-oril. ⁴³ Us xak re li moş li yok chixbanunquil lix c'anjel sa' xyalal nak taç'ulunk lix patrón. ⁴⁴ Relic chi yal tinye ere nak li patrón a'an, tixk'axtesi sa ruk' chixjunil lix jun cablal. ⁴⁵ Abanan cui li moş a'an inc'a' us lix na'leb, tixye sa' xch'ol, "Lin patrón tabayk chi c'ulunic". Ut taoc chixsac'baleb li rech moşil jo' cuink jo' ixk ut taoc chi cua'ac, chi uc'ac ut chi calaç. ⁴⁶ Mac'a'ak sa' xch'ol nak taç'ulunk lix patrón. Ut lix patrón tixq'ue chixtojbal rix lix mac' ut tixtakla sa' xyankeb li inc'a' useb xna'leb. ⁴⁷ Li moş li naxnau c'a'ru naraj lix patrón ut chi tic mac'a' naxbanu, li jun a'an tasaq'uek' chi cau. ⁴⁸ Abanan li moş li inc'a' naxbanu li us xban nak inc'a' naxnau c'a'ru naraj lix patrón, li jun a'an tixc'ul ajcui' xtojbal xmac. Abanan ca'ch'in ajcui' chiru li tixc'ul li naxnau li c'a'ru naraj lix patrón. Li ani naxnau xyalal, mas cui'chic nabal li ik cuan sa' xben. Ut li ani cuan xna'leb chi us, mas cui'chic li ik cuan sa' xben chiru li jun li mac'a' xna'leb, chan.

Nacuan ch'a'ajquilal nak junak naxpab li Cristo

⁴⁹ Li Jesús quixye ajcui': —Chanchan li xinq'ue xam sa' ruchich'och' nak xinchal lain xban nak sa' inc'aba' lain nabal li ch'a'ajquilal taçuank. Nacuaj ta ac xnume' li ch'a'ajquilal a'in. ⁵⁰ Abanan tento tinc'ul jun li cubi ha' xben cua. Ut li cubi ha', a'an li nimla raylal li tinc'ul. Ut yokin chiroybeninquil li honal a'an chi ra sa' inch'ol toj taçuulak xk'ehil nak taç'ulmank. ⁵¹ Mare læex nequec'oxla nak junex tuktuquil usilal xinc'am chak sa' ruchich'och'. Inc'a'. Taçuank ajcui' nabal li ch'a'ajquilal. ⁵² Chalen anakcuan inc'a' chic sa te'cuank li junk cabal sa' rochocheb xban nak cuan li te'pabank cue ut cuan

inc'a'. Mare cuan ob chi cristian sa' li jun cabal. Oxib xic' te'ril li cuib chic. Ut li cuib xic' te'ril li oxib chic. ⁵³ Li yucua'bej xic' taril li ralal, ut li alalbej xic' taril lix yucua'. Li na'bej xic' taril lix co' ut li co'bej xic' taril lix na'. Ut li na'bej xic' taril li ralib ut li alibej xic' taril lix na' lix belom. ⁵⁴ Li Jesús quixye ajcui' reheb li q'uila tenamit: —Nak nequeril nak yo' chi chalc li chok bar na-oc cui' li sak'e, nequeye, “Hon naxq'ue hab”, chanquex. Ut yal ajcui' nak naxq'ue li hab. ⁵⁵ Ut jo'can ajcui' nak nachal li ik' sa' li sur. Nequeye, “Tik ru li cutan tixq'ue anakcuan,” chanquex. Ut yal ajcui' nak naxq'ue li tik. ⁵⁶ Laex aj ca'pac'al u. Nequenau xq'uebal retal ru li choxa ut li ruchich'och'. Abanan ca'aj cui' a'an nequenau rilbal. Inc'a' nequeq'ue retal li yo' chi c'ulmanc sa' eb li cutan a'in. ⁵⁷ ¿C'a'ut nak inc'a' nequeq'ue retal c'a'ru li us tebanu? ⁵⁸ Nak yoquex chi xic' riq'uin laj rakol atin, yibomak ru le ch'a'ajquil sa' junpat riq'uin li xic' na-iloc acue nak toj maji' nequexcuulac. Cui inc'a' nacac'am acuib sa' usilal chi junpat, laj rakol atin tatxtakla sa' tz'alam. ⁵⁹ Lain ninye acue nak inc'a' tat-elik aran cui inc'a' tatorj chixjunil li jo' q'ual te'xpatz' acue, chan li Jesús.

13

Li Jesús quixk'useb li neque'xc'oxla nak nakac'ul li raylal xban nak cuan li kamac

¹ Sa' li honal a'an que'cuulac cuib oxibeb li cuink riq'uin li Jesús ut que'xe re chanru nak laj Pilato quixtakla xcamsinquileb li cuink aj Galilea nak yoqueb chi mayejac sa' li templo. ² Ut li Jesús quixye reheb: —¿Ma nequec'oxla laex nak eb li cuink a'an k'axal cui'chic aj maqueb chiruheb li rech tenamitil? ¿Ma xban a'an nak que'xc'ul a raylal a'an nak nequeye laex? chan reheb. ³ Tinye ere nak inc'a'. Cui laex inc'a' teyot' ech'ol ut tejal ec'a'ux, tex-osok' ajcui' laex chejunilex. ⁴ ¿C'a'ru nequec'oxla chirixeb li cuakxaklaju chi cuink li que'cam nak li torre li cuan Siloé quit'ane' sa' xbeneb? ¿Ma xban nak numtajenak lix maqueb a'an chiruheb chixjunileb li cuanqueb Jerusalén nak que'xc'ul chi jo'can? ⁵ Lain ninye ere nak inc'a'. Ut cui laex inc'a' teyot' ech'ol ut tejal ec'a'ux, tex-osok' ajcui' laex, chan li Jesús.

Li jun ton chi higo li inc'a' nauchin

⁶ Quixye ajcui' li jaljoquil ru atin a'in reheb: Jun li cuink cuan jun ton xhigo aubil sa' lix ch'och'. Ut quichal chixsic'bal li ru, abanan mac'a' quixtau. ⁷ Quixye re li cuink li na-iloc re li acujmk: —Oxib chihab cuoquic chiroybeninquil ma tuchink li che' a'in, ut inc'a' nauchin. Yoc' li che' a'in. ¿C'a'ru aj e nak yok chixlatz'anquil li ch'och' chi inc'a' nauchin? chan. ⁸ Ut li cuink li na-iloc re li acujmk quixye re: —Kacua', canak cuan chic jun chihabak. Ut tinbec li ch'och' sa' xton ut tinq'ue xk'emal li ch'och'. ⁹ Ut cui tuchink, us; ut cui inc'a', tayoc' mon, chan.

Quicuech'ic rix li Jesús xban nak naq'uirtesin sa' li hilobal cutan

¹⁰ Sa' jun li hilobal cutan, li Jesús yo' chixc'utbal li xyalal chiruheb sa' li cab li neque'xch'utub cui' ribeb laj judío. ¹¹ Ut aran cuan jun li ixk cuan maus aj musik'ej riq'uin. Cuakxaklaju chihab roquic lix yajel. C'utzc'u rix li ixk nak nabec ut inc'a' naru naxakli chi tic. ¹² Nak quiril li ixk li Jesús quixbok riq'uin ut quixye re: —At ixk, anakuan q'uirtesinbilat chic.— ¹³ Ut quixq'ue li ruk' sa' xben li ixk. Ut sa' ajcui' li honal a'an li ixk quixakli chi tic ut qui-oc chixlok'oninquil li Dios. ¹⁴ C'ajo' nak quijosk'o' li nataklan sa' li cab li neque'xch'utub cui' ribeb laj judío xban nak li Jesús quixq'uirtesi li ixk sa' li hilobal cutan. Ut quixye reheb li cuanqueb aran: —Cuakib cutan

cuan re nak naru texc'anjelak. Chiruheb a cutan a'an naru nequexchal chi banec' ut inc'a' texchalk chi banec' sa' li hilobal cutan, chan. ¹⁵ Ut li Kaçua' quichak'oc ut quixye re: —jEx aj ca'pac'al u! ¿Ma inc'a' ta bi' tēhit eboyx malaj ut ebur sa' li hilobal cutan re nak tec'ameb chi uc'ac? ¹⁶ Li ixk a'in, a'an xcomoneb li ralal xc'ajol laj Abraham. Ac cuan cuakxaklaju chihab roquic laj tza xch'i'ch'i'inquil. Cui laex nequehit le boyx sa' li hilobal cutan, ¿ma inc'a' ta bi' taruk tinq'urtesi li ixk a'in sa' li hilobal cutan? chan. ¹⁷ Ut riq'uin li c'a'ru quixye li Jesús, quixc'ut xxutaneb chixjunileb li yoqueb chixcuech'inquil rix. Abanan li q'uila tenamit que'saho' xch'ol xbaneb li milagro li yo chixbanunquil li Jesús.

Quijuntak'etaç lix nimajcual cuanquilal li Dios riq'uin li riyajil li mostaza

¹⁸ —¿C'a'ru taruk tinjuntak'eta cui' lix nimajcual cuanquilal li Dios? chan li Jesús. Ut, ¿c'a'ru chi jaljoquil ru atin tinye re xch'olobanquil xyalal lix nimajcual cuanquilal li Dios? ¹⁹ Lix nimajcual cuanquilal li Dios, a'an chanchan riyajil li mostaza, li quixc'am jun li cuink ut quirau sa' lix ch'och'. Ut quimok ut quiniman chi us. Nimla che' quicuulac. Ut laj xic'anel xul neque'xyib xsoqueb sa' eb li ruk'. ²⁰ Ut quixye cui'chic: ¿C'a'ru taruk tinjuntak'eta cui' lix nimajcual cuanquilal li Dios? ²¹ Lix nimajcual cuanquilal li Dios, a'an chanchan li na-oc chok' xch'amal li caxlan cua. Li ixk quixq'ue ca'ch'in sa' oxib bisoc li c'aj ut quisipo' chixjunil li k'em xban.

Moco chixjunileb ta te'oc sa' lix nimajcual cuanquilal li Dios, usta neque'xye nak aj pabaneleb

²² Li Jesús quinume' sa' eb li tenamit ut sa' eb li c'alebāl nak yo chi xic Jerusalén ut yo chixch'olobanquil li xyalal chiruheb li tenamit. ²³ Jun reheb li cuanqueb aran quixye re: —At Kaçua', ¿ma yal nak inc'a' q'uiheb li te'colek'? chan re. ²⁴ Li Jesús quichak'oc ut quixye: —Jo'can nak q'uehomak ech'ol chi oc sa' li oquebal li ca'ch'in ru. Nabaleb raj li te'raj oc, abanan inc'a' te'ruk chi oc. ²⁵ Nak acak xtz'ap li oquebal laj echal re li cab, laex texcanak chirix cab ut tetoch' raj chic li puerta ut teye, “Kaçua', Kaçua', te li puerta chiku”, cha'kex. Abanan a'an taçhak'ok ut tixye ere, “Inc'a' ninnau eru bar xexchal chak”, cha'ak. ²⁶ Ut laex teye cui'chic re, “¿C'a'ut nak inc'a' tanau ku? Lao xocua'ac xo-uc'ac kochbenat. Ut laet xatc'utuc li xyalal chiku sa' li katenamit”, cha'kex. ²⁷ Ut laj echal cab tixye cui'chic ere, “Ninye ere nak inc'a' ninnau bar xexchal chak. Elenkex chicuu, laex aj banuhom mausilal”, cha'ak. ²⁸ Nak teril laj Abraham, laj Isaac, laj Jacob ut chixjunileb li profeta cuankeb sa' lix nimajcual cuanquilal li Dios, ut laex inc'a' tex-ocsjk, toj aran texyabak ut tec'uxuxi li ruch ere xban xrahil ech'ol. ²⁹ Nabaleb li telaje'chalk chak yalak bar jun sut rubel choxa, ut te'c'ojlak chi cua'ac sa' lix nimajcual cuanquilal li Dios. ³⁰ Cuanqueb li inc'a' q'uebileb xlok'al arin sa' ruchich'och' te'q'uehek' xlok'al riq'uin li Dios. Ut cuanqueb ajcui' li q'uebileb xlok'al arin sa' ruchich'och'. Eb a'an inc'a' te'xc'ul xlok'al riq'uin li Dios, chan li Jesús.

Laj Herodes taraj xcamsinquil li Jesús

³¹ Ut sa' ajcui' li honal a'an cuanqueb aj fariseo que'cuulac riq'uin li Jesús chixyebal re: —Elen arin. Ayu xban nak laj Herodes taraj açamsinquil, chanqueb. ³² Li Jesús quixye reheb: —Ayukex ut yehomak re laj Herodes li chanchan yac nak anakuan ut cuulaj lajin yokin chi isinc maus aj musik'ej ut yokin chi q'uirtesinc. Ut sa' rox li cutan tinchoy lin c'anjel. ³³ Abanan tento nak yokin chi xic anakuan, cuulaj, ut ca'bej. Tento tincuulak Jerusalén re

nak tincamsik aran xban nak inc'a' naru tacamsik junak profeta sa' jalan na'ajej. Tento nak aran Jerusalén tincamsik, cha'kex re.

Li Jesús quiyot'e' xch'ol chirilbal li tenamit Jerusalén

³⁴ Ex aj Jerusalén, laex nequecamsiheb li profeta ut nequecuti chi pec eb li neque'taklac eriq'uin xban li Dios. Nabal sut raj xcuaj ecolbal jo' nak naxch'utubeb li ral li caxlan rubel lix xic'. Abanan laex inc'a' xeraj. ³⁵ Ut anakcuan le tenamit tacanak chi naq'uirnac aj chic ru. Tinye ut ere chalen anakcuan inc'a' chic teril cuu toj nak teye, "Osobtesinbil taxak li xchal sa' xc'aba' li Kacua'", chan li Jesús.

14

Sa' li hilobal cutan li Jesús quixq'uirtesi jun li cujnk sip lix tibel

¹ Sa' jun li hilobal cutan li Jesús co chi cua'ac sa' rochoch jun laj fariseo nim xcuanquil. Ut cuanqueb ajcui' cuib oxib laj fariseo yoqueb chixq'uebal retal li Jesús. ² Aran cuan jun li cujnk sip xakxo chiru li Jesús. ³ Ut li Jesús quixye reheb laj tzolol chak'rab ut reheb laj fariseo: —¿C'a'ru naxye sa' li chak'rab? ¿Ma us q'uirtesinc sa' li hilobal cutan? ¿Malaj ut inc'a' us? chan reheb. ⁴ Ut eb a'an tic mac'a' que'xye. Tojo'nak li Jesús quixchap li ruk' li cujnk ut quixq'uirtesi ut quixye re nak naru taxic. ⁵ Nak quixsuk'isi rib li Jesús, quixye reheb li cuanqueb aran: —¿Ani junak ere laex tat'anek' ta junak xbur malaj ut xboyx sa' xjulel ha', ma inc'a' ta bi' taxic sa' junpat chirsinqul usta hilobal cutan? chan reheb. ⁶ Ut eb a'an chi tic inc'a' que'xnau xsumenquil.

Li Jesús quixye nak inc'a' us li nimobresinc ib

⁷ Li Jesús quixq'ue retal nak li bokbileb chi cua'ac sa' li cab a'an yoqueb chixsic'bal ru li na'ajej li neque'q'uehe' cui' li cuanqueb xcuanquil. Jo'can nak quixye jun li jaljoquil ru atin reheb. Quixye: ⁸ —Nak texbokek' sa' junak sumlac, mexc'ojla sa' li na'ajej li naq'uehe' reheb li cuanqueb xcuanquil. Mare tacuulak junak chic mas nim xcuanquil cheru laex. ⁹ Ut li xbokoc ere tachalk ut tixye ere, "Q'uehomak li na'ajej a'in re li cujnk a'in", cha'ak ere. Yok chic exutan nak texxic chi c'ojlac sa' li na'ajej li neque'c'ojla cui' li mac'a'eb xcuanquil. ¹⁰ Jo'can nak ninye ere nak texbokek' sa' junak sumlac, chexc'ojlak sa' li na'ajej li neque'c'ojla cui' li mac'a'eb xcuanquil. Ut li xbokoc ere, tachalk ut tixye ere, "Quimkex, c'ojlankex arin sa' li chabil na'ajej", cha'ak ere. Chi jo'can taq'uehek' elok'al chiruheb chixjunileb li c'ojc'oqueb sa' li mex erochben. ¹¹ Jo'can nak chixjunileb li neque'xnimobresi ribeb, tacubsik xcuanquileb. Ut chixjunileb li neque'xcubsi ribeb, eb a'an te'q'uehek' xcuanquil, chan li Jesús. ¹² Ut quixye ajcui' li Jesús re laj echal cab: —Nak tatq'uehok chi tzacanc, malaj ut tabanu junak nink'e, moco ca'aj cui' ta la cuamig tabokeb, chi moco ca'aj cui' eb la cuas ut eb la cuitz'in, chi moco ca'aj cui' la cuech'alal, chi moco ca'aj cui' la cuech cabal li biomeb, xban nak eb a'an naru te'xbanu ajcui' jun nink'e ut tate'xbok ut te'xq'ue rekaj chacuu. ¹³ Nak tabanu junak li nink'e, tabok ajcui' eb li neba' ut eb li tokol rok ruk', ut eb li yek rok ut eb li mutz', ¹⁴ xban nak eb a'an inc'a' taruk te'xq'ue rekaj acue. Abanan li Dios tatosobtesi ut tixq'ue rekaj acue nak te'cuaclik cui'chic chi yo'yo li tiqueb xch'ol, chan li Jesús re.

Li Jesús quixch'olob xyalal chirixeb li neque'tz'ektanan re li rusilal li Dios

¹⁵ Jun reheb li chunchuqueb sa' li mex quirabi li c'a'ru quixye li Jesús ut quixye re: —Us xak re li ani tatz'akonk chi cua'ac sa' li nink'e sa' lix nimajcual cuanquial li Dios, chan. ¹⁶ Nak quichak'oc, li Jesús quixye jun li jaljoquil

ru atin re: Quicuan jun li cujnk quixc'ub jun nimla nink'e ut nabaleb li quixbokeb chi cua'ac. ¹⁷ Nak quicuulac xk'ehil li nink'e, quixtakla lix moş chixyebal reheb li bokbileb nak te'chalk chi cua'ac xban nak ac xyalo' li tzacaemk. ¹⁸ Abanan chixjunileb que'oc xpatz'bal xcuybaleb. Jun quiyehoc: –Xinlok' jun inch'och'. Tento nak tinxic chirilbal. Tintz'ama çacuu nak tacuy inmac xban nak inc'a' tinxic, chan. ¹⁹ Ut li jun chic quixye: –Xinlok' ob sumal inboyx. Xic cue chirilbaleb. Nintz'ama çacuu nak tacuy inmac, chan. ²⁰ Ut li jun chic quixye: –Toje' xinsumla ut inc'a' chic naru tinxic, chan. ²¹ Li moş quisuk'i riq'uin lix patrón ut quixye re li c'a'ru que'xye li bokbileb. Quichal xjosk'il li patrón ut quixye re lix moş: –Ayu sa' c'ayil ut sa' eb li be ut tabokeb li neba', eb li tokol rok ruk'eb, eb li yek rokeb ut eb li mutz' ut tac'ameb çak arin, chan. ²² Ço li moş ut quixbanu jo' quiyeh'e re. Nak quisuk'i çak quixye re lix patrón: –Kacua', xinbanu jo' xaye cue ut toj cuan nabal li na'ajej, chan. ²³ Li patrón quixye re lix moş: –Tatxic chire li tenamit ut sa' c'aleb al ut tacuelaji çak ruheb chi çalc sa' li nink'e re nak tanujak li cuochoch, chan. ²⁴ Lain ninye ere nak ma jun reheb li bokbileb xben cua te'tz'akonk riq'uin li nink'e li xinbanu, chan li patrón.

Cuan ch'a'ajquilal riq'uin xpabanquil li Cristo

²⁵ Nak yo chi xic li Jesús nabaleb li tenamit yoqeb chi takenc re. Quixsuk'isi rib li Jesús ut quixye reheb: ²⁶ –Li ani taraj takenc cue, tento nak tinixra chi tz'akal lain chiruheb lix na' xyucua', li rixakil ut eb lix coc'al, ut eb li rech'alal jo' ajcui' lix yu'am. Cui inc'a' tinixra chi tz'akal, li jun a'an moco us ta chok' intzolom. ²⁷ Li ani taraj oc chok' intzolom, tento nak tinixtake ut tixcuy xnumsinquil li raylal usta tacamsik sa' inc'aba'. ²⁸ Cui cuan junak ere naraj tixyib junak çab najt xteram, çma inc'a' ta bi' tac'ojlak xben cua chixbirbal rix ma cuan tz'akal lix tumin re tixchoy xyibanquil li cab? ²⁹ Cui tixq'ue lix cimientu li cab ut inc'a' chic taruk xchoybal, chixjunileb li te'lok re te'xtiquib xse'enquil. ³⁰ Ut te'xye, –Li cujnk a'in quixtiqub cablac ut inc'a' naru xchoybal, ça'keb. ³¹ ÇMa cuan ta bi' junak rey taxic chi pletic riq'uin junak chic rey cui inc'a' tac'ojlak xben cua chixc'oxlanquil ma tixcuy pletic rochbeneb lajebak mil chi cujnk riq'uin li rey jun chic, li yo chi çalc chi pletic rochbeneb junmay mil chi cujnk? ³² Ut cui naxc'oxla nak inc'a' taruk, tixtaklaheb lix takl nak toj cuankeb chi najt chixtz'amanquil chiru li rey jun chic re nak te'canak sa' usilal chi ribileb rib. ³³ Jo'can ajcui' laex. Tento teç'oxla chi us c'a'ru tebanu xban nak li ani inc'a' naraj xcanabanquil li c'a'ru cuan re, li jun a'an moco us ta tacoc chok' intzolom.

Li ani inc'a' chic naxcuy xpabanquil li Jesús, a'an chanchan li atz'am li inc'a' chic qui'

³⁴ Li atz'am, a'an çabil. Abanan cui inc'a' chic qui', maç'a' chic tacoc cui'. ³⁵ Inc'a' chic tausak chok' re li ch'och', chi moco chok' re li mul. Yal re tz'ekek' aj chic. Li ani taraj rabinquil li cuatin, chixq'uehak retal li yoquin chixyebal.

15

Li jaljoquil ru atin chirix li carner sachenak

¹ Nabaleb laj tiz'ol toj ut eb laj maç que'cuulac chirabinquil li c'a'ru yo chixyebal li Jesús. ² Eb laj fariseo ut eb laj tz'ib yoqeb chi cuech'inc ut yoqeb chixyebal: –Li cujnk a'in naxc'am rib sa' usilal riq'uineb laj maç ut nacua'ac rochbeneb, çanqueb. ³ Li Jesús quixye reheb li jaljoquil ru atin a'in: ⁴ ÇMa cuan junak cujnk sa' eyank cuank ta o'c'alak (100) xcarner, cui

taşachk junak sa' xyankeb a'an, ma inc'a' raj tixcanab li belelaju ro'c'al (99) sa' c'alebāl ut taḡic chixsic'bal li quisach toj retal tixtau chak? chan. ⁵ Ut nak tixtau, taşahok' sa' xch'ol ut tixq'ue sa' xben xtel, ⁶ ut taḡic sa' rochoch. Tixch'utubeb li ramig ut li rech cabal ut tixye reheb: —Chisahok' sa' kach'ol cuochbenex xban nak xintau lin carner li quisach, cha'ak reheb. ⁷ Lain tinye ere nak jo'can ajcui' sa' choxa. Taḡuan̄k nimla sahil ch'olej nak junak aj maḡ tixyot' xch'ol tixjal xc'a'ux chiruheb belelaju ro'c'al chi cristian li ac xe'paban ut tiḡueb chīc xch'oleb.

Li jaljoquil ru atin chirix li tumin sachenak

⁸ Ut quixye ajcui' reheb: Kayehak nak junak ixk cuan lajebak xtumin. Cui taşachk junak lix tumin, ḡma inc'a' raj tixloch li xam ut taoc chixmesunquil li cab ut tixsiq'ui toj retal tixtau? ⁹ Ut nak tixtau, tixch'utubeb li ramig ut eb li rech cabal ut tixye reheb: —Chisahok' sa' kach'ol cuochbenex xban nak xintau lin tumin li quisach chicuu, cha'ak. ¹⁰ Lain ninye ere nak jo'can ajcui' eb lix ángel li Dios te'sahok' sa' xch'oleb nak junak aj maḡ tayot'ek' xch'ol ut tixjal xc'a'ux.

Li jaljoquil ru atin chirix li yucua'bej li quixcuy xmaḡ li rala

¹¹ Ut quixye ajcui' reheb li jaljoquil ru atin a'in: Jun li cuḡnk quicuan cuib li rala. ¹² Li itz'inbej quixye re lix yucua': —At inyucua', q'ue cue anakuan la jun cablal li jo' q'ual li tintz'ak lain, chan. Tojo'nak li yucua'bej quixjeq'ui lix jun cablal reheb li rala cuib. ¹³ Ut maji' ajcui' najterak nak li itz'inbej quixch'utub chixjunil li c'a'ru cuan re, ut co chi najt sa' jaland tenamit. Aran quixsach li c'a'ru re nak yo' chixk'axbal li cutan chi jo' majo'. ¹⁴ Ut nak ac xsach chixjunil li c'a'ru cuan re, quicuan jun nimla cue'ej sa' li tenamit a'an. Ut li al yo' chixcuybal xtz'ocajic. ¹⁵ Jo'can nak co riq'uin jun li cuḡnk cuan sa' li tenamit a'an chixpatz'bal xtrabaj. Ut li cuḡnk a'an quixtakla sa' c'alebāl chi iloc ak. ¹⁶ Quiraj raj xcua'bal xcuaheh li ak xban nak tatz'ocak. Abanan inc'a' que'xq'ue ca'ch'inak re. ¹⁷ Quijultico' re chanru nak quicuan sa' rochoch lix yucua' ut quixye sa' xch'ol: —Nabaleb aj c'anjel cuanqueb sa' rochoch lin yucua' ut numtajanek xcuaheh. Ut lain arin osoc' cue xban tz'ocac. ¹⁸ Tinxic cui'chic sa' rochoch lin yucua' ut tinye re, “At inyucua', xinmaḡob chiru li Dios jo' ajcui' chaḡuu laa. ¹⁹ Maḡua' chic inc'ulub nak tinc'aba'in aḡualal. Chinac'ul ban jo' junak amos,” cha'akin re, chan sa' xch'ol. ²⁰ Sa' junpat quicuacli ut quisuk'i sa' rochoch lix yucua'. Toj cuan ajcui' chak chi najt nak qui-ile' xban lix yucua'. Ut li yucua'bej quiril xtok'obal ru. Co sa' aḡil chixc'ulbal li rala. Quixk'alu ut quirutz' ru. ²¹ Ut li rala quixye re: —At inyucua', xinmaḡob chiru li Dios jo' ajcui' chaḡuu laa. Maḡua' chic inc'ulub nak tinc'aba'in aḡualal, chan re lix yucua'. ²² A'ut li yucua'bej quixye reheb lix moḡ: —Sic'omak chak sa' junpat li chaḡil t'icr ut q'uehomak chirix. Q'uehomak xmatk'ab chi ru'uj ruk' ut q'uehomak xxab chi rok. ²³ Ut c'amomak chak li ch'ina cuacax, li ch'olaninbil chi us. Camsihomak ut tonink'ejk, ²⁴ xban nak li cualal a'in chanchan camenak nak xcuan chak. A'ut anakuan xsuk'i cui'chic chi yo'yo. Sachenak nak xcuan ut xtauman cui'chic, chan. Ut que'oc chi nink'ejc. ²⁵ Ut li asbej cuan chak sa' c'alebāl. Nak yo' chi cuulac sa' cab, quirabi li son ut li xajoc. ²⁶ Quixbok jun li moḡ ut quixpatz' re c'a'ru yo'queb sa' cab. ²⁷ Li moḡ quixye re: —Xsuk'i chak la cuḡtz'in ut la yucua' xtakla xcamsinquil li ral li cuacax li ch'olaninbil chi us, xban nak la cuḡtz'in xsuk'i cui'chic chi cau ut chi sa' xch'ol, chan. ²⁸ Nak li asbej quirabi li c'a'ru quixye li moḡ, quichal xjosk'il, ut inc'a' quiraj oc sa' li rochoch. Ut li yucua'bej qui-el chirix cab ut quixtz'ama chiru nak taoc.

²⁹ Li asbej quichak'oc ut quixye re lix yucua': —At inyucua', laät nacanau nak nabal chihab xinc'anjelac chaçuu ut ma jun sut xink'et la cuatin. Ut ma jun cua xaç'ue junak inch'ina chibat re nak tinnink'ejk cuochbened li cuamig. ³⁰ Abanan anakuan xc'ulun la cualal a'in li quisachoc re la jun cablal riç'uineb li ixk li neque'xc'ayi rib ut laät xatakla xcamsinquil chok' re li ch'ina cuacax li ch'olaninbil chi us, chan li asbej. ³¹ Li yucua'bej quixye re: —At cualal, laät junelic cuancat cuiç'uin ut chixjunil li c'a'ru cuan cue, a'an açue ajcui' laät. ³² Abanan tento nak tonink'ejk anakuan ut taşahok' sa' kach'ol xban nak la cuiç'in chanchan camenak nak xcuan; abanan xsuk'i cui'chic chi yo'yo. Quisach ut xtauman cui'chic, chan li yucua'bej.

16

Li mertom li inc'a' us xna'leb

¹ Li Jesús quixye reheb lix tzolom li jaljoquil ru atin a'in: Quicuan jun li cuiçk k'axal biom ut quicuan jun xmertom. Cuanqueb li que'jitoc chirix li mertom chiru li patrón ut que'xye re: —La mertom yo chixsachbal la biomal, chanqueb re. ² Jo'can nak quixbok lix mertom ut quixye re: —çC'a'ru xyalal li yoçuin chirabinquil chaçuiç? Tak'axtesi la cuent nak xatcuan chi c'anjelac xban nak inc'a' chic tatcanak chok' inmertom, chan re. ³ Ut li mertom quixye sa' xch'ol: —çC'a'ru tinbanu anakuan xban nak lin patrón tinrisi sa' lin c'anjel? Inc'a' tincuy li cacuil c'anjel ut tinxutanak chi xic chixtz'amanquil c'a'ru cue chire cablal. ⁴ Anakuan ninnau c'a'ru tinbanu re nak cuankeb li tine'xc'ul sa' rochocheb nak tin-isik chi mertomil, chan sa' xch'ol. ⁵ Quixbokeb chak chi xjunkaleb li cuanqueb xc'as riç'uin lix patrón. Ut quixye re li xben: —çJo' nimal la c'as riç'uin lin patrón? chan. ⁶ Ut li cuiçk quixye re: —O'c'al (100) barril chi aceite, chan. Ut li mertom quixye re: —Cue' li hu li tz'ibanbil cui' retalil la c'as. Chunlan ut jal sa' junpat. Lajeb roxc'al (50) aj chic tatz'iba retalil chiru li hu a'in, chan. ⁷ Ut quixye cui'chic re li jun chic: —Ut laät, çjo' nimal la c'as? chan. Ut li cuiçk quixye: —O'c'al (100) bisoc chi trigo, chan. Li mertom quixye re: —Cue' li hu li tz'ibanbil cui' retalil la c'as. Jal ut cac'al (80) bisoc aj chic tatz'iba retalil chiru li hu a'in, chan. ⁸ Ut li patrón quisach xch'ol chirilbal nak k'axal cuan xna'leb li mertom li inc'a' us xna'leb. Eb li inc'a' neque'xnau li xyalal k'axal sebeb xch'ol chixc'oxlanquil chanru tixtenk'a rib, usta inc'a' us tixbanu reheb li ras ritç'in. K'axal sebeb xch'ol chiruheb li ralal xc'ajol li Dios. ⁹ Cuan li neque'xbanu li inc'a' us riç'uin lix biomal. Abanan, lain ninye ere, chebanu usilal reheb le ras eritç'in riç'uin le biomal sa' ruchich'och'. Ut nak talajk taşosok' le biomal, texc'ulek' sa' li na'ajej li maç'a' roso'jic. ¹⁰ Li ani tic xch'ol chixbanunquil li yal ca'ch'in, ticak ajcui' xch'ol chixbanunquil li nabal. Ut li ani inc'a' tic xch'ol chixbanunquil li yal ca'ch'in, inc'a' ajcui' ticak xch'ol chixbanunquil li nabal. ¹¹ Cui laex inc'a' nequenau xrabal li biomal sa' ruchich'och', çchan ta cui' ru nak tixc'ojob xch'ol li Dios chixç'uebal ere li tz'akal biomal? ¹² Ut cui inc'a' nequenau xrabal li c'a'ru re jalan, çchan ta cui' ru nak tak'axtesik ere laex li c'a'ru tz'akal ere? ¹³ Ma ani taruk taç'anjelak chiru cuib chi patrón. Mare tixra li jun ut xic' taril li jun chic, malaj ut xic' taril li jun ut tixra li jun chic. Inc'a' naru texc'anjelak chiru li Dios cui junes le biomal nequec'oxla. ¹⁴ Nak eb laj fariseo que'rabi li quixye li Jesús, que'oc chixse'enquil xban nak neque'xra lix biomaleb. ¹⁵ Ut li Jesús quixye reheb: —Laex nequetçicobresi ech'ol ejunes chiruheb li tenamit. Abanan li Dios naxnau chanru le na'leb. Li c'a'ru k'axal lok' chiruheb li cuiçk sa' ruchich'och', a'an tz'ektanbil xban li Dios.

Li chak'rab ut lix nimajcual cuanquilal li Dios

¹⁶ Chixjunil li tijleb li que'xc'ut eb li profeta junxil, jo' ajcui' lix chak'rab laj Moisés, quirake' yyebal nak laj Juan laj Cubsihom Ha' quic'ulun chixch'olobanquil resil nak chalç re lix nimajcual cuanquilal li Dios. Ut nabale yoqweb chixyalbal xk'e chi oc rubel lix nimajcual cuanquilal li Dios. ¹⁷ Li choxa ut li ruchich'och', a'an moco ch'a'aj ta nak taşok'. Abanan ma jun li atin li tz'ibanbil sa' li chak'rab, taruk taşik xcuauquil, usta k'axal ca'ch'in. ¹⁸ Li ani tixjach rib riq'uin li rixakil ut taşumlak riq'uin jalan chic ixk, a'an tixmux ru lix sumlajic. Ut li cujnk li taşumlak riq'uin junak ixk li ac xjach rib riq'uin lix belom, tixmux ru lix sumlajic.

Li cujnk biom ut laj Lázaro

¹⁹ Quicuan jun li cujnk biom. Naxtikib rib riq'uin çabil t'icr k'axal tertoztz'ak ut rajlal cutan nanink'eic. ²⁰ Quicuan ajcui' jun li cujnk neba' aj Lázaro xc'aba'. Xox rix. Rajlal naxchunub rib chire li oqebal re li rochoch li biom. ²¹ Naxra raj ru xtzacauquil xc'aj li cua li nat'ane' sa' xben xmex li biom. Eb li tz'i' neque'chal riq'uin ut neque'xrek' ru lix xox. ²² Quicuulac xk'eheil nak quicam li neba' ut quic'ame' xbaneb li ángel toj sa' choxa bar cuan cui' laj Abraham. Ut quicam ajcui' li biom ut quimuke'. ²³ Nak ac cuan sa' xbalba, yo' chixc'ulbal li raylal aran. Qui-iloc takec' ut quiril laj Abraham ut laj Lázaro cuan chixc'atk. ²⁴ Quixjap re ut quixye: —Kaçua' Abraham, chacuil taxak xtok'obal cuu. Chatakla laj Lázaro chintenk'anquil. Chixt'akresi chak li ru'uj ruk' sa' ha' ut tolxquehobresi li ru'uj cuak' xban nak c'ajo' li raylal yoquin chixc'ulbal sa' li xam a'in, çan. ²⁵ Ut laj Abraham quixye re: —At cuas çuiz'in, julticak açue nak toj yo'yoçat sa' ruchich'och' nabal abiomal ut k'axal sa' nak xatcuau. Ut laj Lázaro c'ajo' li raylal quixc'ul. Anakunc' ojobanbil xch'ol laj Lázaro arin ut laçat k'axal ra cuançat. ²⁶ Ut cuan jun nimla çamal jul naramoç re li na'ajej cuanco cui'. Ut ma jun ke taruk taşumek' re taxic eriq'uin, chi moco laex taruk texnumek' çak arin, çan laj Abraham re li biom. ²⁷ Tojo'nak li biom quixye re: —Tintz'ama çaçuu, at Kaçua' Abraham, takla laj Lázaro sa' rochoch lin yucua'. ²⁸ Aran cuanqueb ob li çuiz'in. Chatakla xch'olobanquil xyalal chiruheb re nak eb a'an inc'a' te'çalç sa' li na'ajej a'in chi c'uluc raylal, çan. ²⁹ Laj Abraham quixye re: —Cuan riq'uineb li hu li tz'ibanbil xban laj Moisés, ut eb li profeta. Che'xq'uehak retal li c'a'ru tz'ibanbil sa' li hu a'an, çan. ³⁰ Quichak'oc li biom ut quixye: —Inc'a' tz'akal a'an, Kaçua' Abraham. Abanan cui junak çamenak taçuaclik cui'chic chi yo'yo ut taxic riq'uineb, te'yot'ek' raj xch'ol ut te'xjal raj xc'a'uxeb, çan. ³¹ A'ut laj Abraham quixye re: —Cui inc'a' neque'rabi li quixye laj Moisés ut eb li profeta, inc'a' ajcui' te'pabank usta taçuaclik cui'chic chi yo'yo junak sa' xyañkeb li çamenak, çan laj Abraham.

17

Li Jesús quixq'ue xna'lebeb lix tzolom

¹ Li Jesús quixye reheb lix tzolom: —Junelic cuan li po'oc ch'ol. Abanan raylal çalel sa' xben li ani tixpo' xch'ol li ras ritz'in. ² K'axal raj us çok' re a'an nak taçutek' sa' xçamal li palau chi bac'bo junak nimla pec chi xcux chiru nak tixpo' xch'ol junak li toj k'un xch'ol sa' lix pabal. ³ Cheq'uehak retal çanru le na'leb. Cui tamaçobk çaçuu la çuas açuiz'in, çak'usak. Ut cui tayot'ek' xch'ol ut tixjal xc'a'ux, çacuyak xmaç. ⁴ Usta tamaçobk çaçuu cuukubak sut chiru li jun cutan ut cuukub sut tixpatz' xcyubal çaçuu ut tixye nak inc'a' chic tixbanu, tento nak taçuay xmaç, çan li Jesús. ⁵ Eb li apoştol que'xye re li Kaçua': —At Kaçua', choatenk'a taxak re nak cuank

kapabal chi tz'akal, chanqueb. ⁶ Ut li Kaçua' quixye reheb: —Usta ca'ch'in ajcui' le pabal cuan jo' li riyajil li mostaza, taruk raj teye re li che' a'in, “Mich' açuib ut au açuib sa' li palau” ut li che' tixbanu raj jo' teye re, chan. ⁷ Kayehak nak junak ere cuan xmos yok chak chi c'alec malaj ut chi iloc que'omk. Nak acak xchoy lix c'anjel lix mos, tasuk'ik sa' cab. ¿Ma tayehek' ta bi' re xban lix patrón, “Ocan, c'ojlan ut cua'in”? ⁸ Inc'a'. Tayehek' ban re: “Chac'ub cuan intzacaemk ut chatc'anjelak chicuu. Nak acak xinrake' chi cua'ac, naru tatcua'ak laat.” ⁹ ¿Ma tixbantioxi re lix mos nak quixbanu li quitaklac xbanunquil? Lain ninye nak inc'a'. ¹⁰ Jo'can ajcui' laex. Nak ac xebanu li xentaklac cui', cheyehak: “Lao aj c'anjel çaçuu. Ca'aj cui' li jo' q'uial xo'atakla cui' xkabanu. Jo'can nak mabantioxi chiku”, cha'akex, chan li Jesús reheb.

Li Jesús quixq'uirtesiheb li lajeb chi cujnk saklep rix ut jun ajcui' quibantioxin chiru

¹¹ Nak yo chi xic Jerusalén, li Jesús quinume' sa' li na'ajej li neque'xc'ul cui' rib li tenamit Samaria ut Galilea. ¹² Nak yo chi cuulac sa' jun li c'alebal, que'chal chixc'ulbal lajeb li cujnk saklep rixeb. Eb a'an najt que'xakli riq'uin li Jesús. ¹³ Ut que'xjap reheb chixyebal: —At Jesús, at aj tzolone, chacuuxtana taxak ku, chanqueb. ¹⁴ Nak quirilebli Jesús quixye reheb: —Ayukex riq'uineb laj tij ut c'utumak chak erib chiruheb, chan reheb. Ut nak yoqueb chi xic, que'q'uira. ¹⁵ Jun reheb li cujnk quiril nak qui'q'uira, quisuk'i riq'uin li Jesús ut yo chixlok'oninquil li Dios chi cau xyab xcux. ¹⁶ Quixcuik'ib rib chiru li Jesús ut quixbantioxi chiru. Li cujnk a'an aj Samaria. ¹⁷ Quixye li Jesús: —¿Ma maçua' ta bi' lajeb chi cujnk li xinq'uirtesi? ¿Bar cuanqueb li beleb chic? ¹⁸ ¿Ma ca'aj cui' li jun a'in li maçua' aj judío xsuk'i chixlok'oninquil li Dios? chan. ¹⁹ Tojo'nak quixye re li cujnk: —Xaklin ut tatxic. Xatq'uira xban nak xatpaban, chan.

Li Jesús quixye nak lix nimajcual cuanquilal li Dios ac cuan riq'uineb

²⁰ Eb laj fariseo que'xpatz' re li Jesús jok'e tachalk lix nimajcual cuanquilal li Dios. Li Jesús quichak'oc ut quixye reheb: —Lix cuanquilal li Dios moco cuank ta retalil lix c'ulunic re nak tenau jok'e xk'ehil. ²¹ Chi moco te'xye, “cuan arin” chi moco te'xye, “le' cuan”, xban nak lix cuanquilal li Dios ac cuan sa' eyank laex, chan.

Li Jesús quixye chanru nak tac'ulunk cui'chic

²² Ut li Jesús quixye reheb lix tzolom: —Tacuulak xk'ehil nak laex tera ru rilbal lin c'ulunic lain li C'ajolbej, abanan inc'a' teril cuu. ²³ Ut te'xye ere, “cue' arin” malaj ut “cuan toj le”. Abanan mexxic chirilbal chi moco tetakeheb. ²⁴ Sa' xk'ehil lin c'ulunic lain li C'ajolbej chanchanakin li rak' cak nak narepoc chak ut naxcutanobresi chixjunil ru li choxa. Lain moco chi mukmu ta tinc'ulunk. ²⁵ Abanan tento nak lain li C'ajolbej tinrahobtesik ut tintz'ektanak xbaneb li cuanqueb sa' ruchich'och' sa' eb li cutan a'in. ²⁶ Jo' quic'ulman sa' eb li cutan nak toj cuank laj Noé sa' ruchich'och', jo'can ajcui' tac'ulmank nak tacuulak xk'ehil lin c'ulunic lain li C'ajolbej. ²⁷ Sa' eb li cutan a'an li tenamit yoqueb chi cua'ac ut yoqueb chi uc'ac. Yoqueb chi sumlac ut yoqueb chi sumbang toj quicuulac xk'ehil nak laj Noé qui-oc sa' li jucub cab. Nak maç'a' sa' xch'oleb quichal li but'i ha' ut quilajxsacheb chixjunileb li inc'a' que'oc sa' li jucub cab. ²⁸ Tac'ulmank jo' quic'ulman sa' eb li cutan nak laj Lot toj cuank sa' ruchich'och'. Chixjunileb yoqueb chi tzacanc ut yoqueb chi uc'ac. Yoqueb chi lok'oc ut yoqueb chi c'ayinc. Yoqueb chi açuc

ut yoq̄ueb chi cablac. ²⁹ Abanan sa' li cutan nak laj Lot qui-el sa' li tenamit Sodoma, nak maç'a' sa' xch'oleb, quichal chak sa' choxa xam ut azufre ut quilajxsacheb chixjunileb. ³⁰ Jo'can ajcui' taç'ulmank nak tinc'ulunk cui'chic lain li C'ajolbej. Maç'a'ak sa' xch'oleb li tenamit. ³¹ Sa' li cutan nak tinc'ulunk, li ani cuank chak sa' xben li rochoch ut li c'a'ru re cuank sa' li cab, micube chak chixxochal. Jo'can ajcui' li cuank chak sa' c'alebal, inc'a' taçuk'ik sa' li rochoch. ³² Chijulticok' ere li c'a'ru quixc'ul li rixakil laj Lot nak quiraj raj suk'ic. ³³ Li ani taraj xcolbal rix lix yu'am arin sa' ruchich'och', taçachk chiru. Ut li ani taçachk lix yu'am chiru, a'an taçuank xyu'am chi junelic. ³⁴ Ut tinye ajcui' ere: Sa' li honal a'an nak tinc'ulunk, cuankeb cuib yoq̄eb chi cuarc sa' jun chi cuarib. Jun aj pabanel ut jun maçua'. Laj pabanel taç'amek' xban li Dios ut li jun chic li maçua' aj pabanel, a'an taçanabaç. ³⁵ Ut cuib li ixk yoq̄eb chi que'ec sa' jun li que'leb, jun aj pabanel ut li jun chic maçua' aj pabanel. Ut laj pabanel taç'amek' xban li Dios ut li jun chic li maçua' aj pabanel, a'an taçanabaç. ³⁶ Cuankeb cuib chi cuink sa' li c'alebal, jun aj pabanel ut li jun chic maçua' aj pabanel. Laj pabanel taç'amek' xban li Dios ut li jun chic, li maçua' aj pabanel, taçanabaç, chan li Jesús. ³⁷ Eb lix tzolom que'xpatz' re: —¿Bar taç'ulmank li yoçat chixyebal? chanqueb. Ut li Jesús quixye reheb: —Laex nequenau nak bar cuan cui' junak li camenak, aran ajcui' te'ch'utlak eb li so'sol, chan.

18

Li jaljoquil ru atin chirix li xmalca'an ut laj rakol atin

¹ Li Jesús quixye li jaljoquil ru atin a'in reheb lix tzolom re xc'utbal chiruheb nak tento te'tijok junelic ut inc'a' taç'inank xch'oleb. ² Quixye reheb: Sa' jun li tenamit quicuan jun aj rakol atin inc'a' naxxucua ru li Dios, chi moco naxq'ue sa' xnak' ru li cristian. ³ Ut quicuan ajcui' sa' li tenamit a'an jun li xmalca'an cuan jun lix ch'a'ajquilal. Rajlal yo chi xic riq'uin laj rakol atin chixtz'amanquil lix tenk'anquil ut naxye re: —Banu usilal, charak atin sa' xbeneb li xic' neque'iloc cue, chan. ⁴ Ut laj rakol atin inc'a' quiraj. Abanan mokon quixye sa' xch'ol: —Lain inc'a' ninxucua ru li Dios chi moco eb li cuink ning'ueheb sa' xnak' cuu. ⁵ Abanan xban nak yoquin chi titz'c chirabinquil li ixk a'in, tinrak atin sa' xbeneb li xic' neque'iloc re. Mare yok chinch'i'ch'i'inquil junelic, chan sa' xch'ol. ⁶ Ut li Kaçua' quixye reheb: —Q'uehomak retal c'a'ru quixye laj rakol atin li inc'a' tic xch'ol. Usta inc'a' tic xch'ol, laj rakol atin quixtenk'a li xmalca'an re nak inc'a' chic taç'i'ch'i'ik xban. ⁷ ¿Ma toja ta chic li Dios inc'a' tixcoleb li sic'bileb ru xban? ¿Ma tabayk ta bi' chixsumenquil li c'a'ru te'xtz'ama li neque'yaban re lix c'aba' chi k'ek chi cutan? ⁸ Lain tinye ere nak li Dios tixcoleb chi junpat. Abanan lain ninc'oxla, çjarub ta cui' li cauhaq̄eb xch'ol sa' lix pabal? Ut, çjarubeb ta cui' li yoq̄eb chi tijoc nak tinc'ulunk cui'chic sa' ruchich'och' lain li C'ajolbej?

Laj fariseo ut laj titz'ol toj que'çq̄eb chi tijoc sa' li templo

⁹ Ut li Jesús quixye jun chic li jaljoquil ru atin reheb li neque'xc'oxla nak çabileb ut neque'xtz'ektanaheb li jun ch'ol chic. Quixye reheb: ¹⁰ Cuib li cuink çq̄eb sa' li templo chi tijoc. Li jun, a'an aj fariseo. Ut li jun chic aj titz'ol toj. ¹¹ Laj fariseo quixxakab rib ut quitijoc chi cau xyab xcux ut quixye: —At inDios, lain ninbantiox i çaçucua nak maçua'in jo'q̄eb li jun ch'ol chic. A'an eb aj elk'eb, aj banuhom maçusalal, ut aj muxuleb çaxar. Lain maçua'in jo' laj titz'ol toj a'an. ¹² Ca' sut ninbanu in-ayun chiru li jun xaman. Ut rajlal ning'ue li junjunk sa' xlaçetkil re chixjunil li jo' q'uial li ninc'ul, chan laj fariseo sa' lix

tij. ¹³ Abanan laj titz'ol toj najt quixq'ue chak rib ut quixxulub lix jolom. Yo chixtenbal li re xch'ol chi ruk' xban xrahil xch'ol ut quixye: —At inDios, lain aj mac. Chacuuxtana taxak cuu, chan. ¹⁴ Lain ninye ere nak laj titz'ol toj, a'an li quisuk'i sa' rochoch chi t'icobresinbil chic lix ch'ol. Ut laj fariseo inc'a', xban nak li ani naxnimobresi rib, a'an taqubsik xcuauquil. Ut li ani naxcubsi rib, a'an taq'uehek' xcuauquil, chan li Jesús.

Li Jesús quirosobtesih eb li coc'al

¹⁵ Sa' jun li cutan cuanqueb li que'xc'am chak lix coc'aleb riq'uin li Jesús re nak tixq'ue li ruk' sa' xbeneb ut tarosobtesih eb. Ut eb lix tzolom li Jesús que'xq'ue retal nak que'c'ame' chak li coc'al riq'uin ut que'oc chixk'usaleb lix na' xyucua'eb. ¹⁶ Ut li Jesús quixbokeb lix tzolom riq'uin ut quixye reheb: —Canabomakeb li coc'al chi chalç cuiq'uin. Meram chiruheb xban nak reheb a'an lix nimajcual cuanquilal li Dios. ¹⁷ Relic chi yal tinye ere li ani inc'a' k'un xch'ol chinpabanquil jo'queb li coc'al a'in, a'an inc'a' taoc rubel lix nimajcual cuanquilal li Dios, chan.

Jun li cujnk biom quiqtinac riq'uin li Jesús

¹⁸ Jun li cujnk nim xcuauquil sa' xyankeb laj judío quiqtinac riq'uin li Jesús ut quixye re: —At çhabil tzolonel, çc'a'ru taruk tinbanu re nak tuncueçhani li yu'am chi junelic? chan. ¹⁹ Li Jesús quixye re: —çC'a'ut nak nacaye çhabil cue cui inc'a' nacanau anihin lain? Jun ajcui' li çhabil ut a'an li Dios. ²⁰ Laat ac nacanau c'a'ru naxye sa' li çhak'rab: Matmuxuc çaxar. Maçamsi açuas açuiz'in. Mat-elk'ac. Matyo'oban tic'ti' chirix açuas açuiz'in. Çaxoxlok'i la na' ayucua', chan li Jesús re. ²¹ Li cujnk quichak'oc ut quixye: —Chixjunil a'in ac yoquin ajcui' çhak chixbanunquil çhalen sa' inca'ch'inal, chan. ²² Nak quirabi li c'a'ru quixye li cujnk, li Jesús quixye re: —Jun chic toj maji' nacabanu. C'ayi chixjunil li c'a'ru cuan açue ut tasi lix tz'ak reheb li neba' ut taçuanç abiomal sa' choxa. Nak ac xabanu a'an, tatchalk ut tinatake, chan li Jesús re. ²³ Nak quirabi li quixye li Jesús, c'ajo' nak quiraho' sa' xch'ol li cujnk xban nak nabal lix biomal cuan. ²⁴ Li Jesús quixq'ue retal nak quiraho' sa' xch'ol li cujnk ut quixye: —C'ajo' xch'a'jqwil çhok' re junak biom oc rubel lix nimajcual cuanquilal li Dios. ²⁵ Mamin taruk tanumek' junak nimla xul camello sa' ru junak çux. Jo'can ajcui' li biom. Ma jok'e taruk taoc sa' xnimajcual cuanquilal li Dios cui ca'aj cui' lix biomal naxc'oxla, chan li Jesús. ²⁶ Eb li que'abin re li quixye li Jesús, que'çhak'oc ut que'xye: —çAniheb li taruk te'colek' chi jo'canan? çhanqueb. ²⁷ Li Jesús quixye reheb: —Li c'a'ru çh'aj xbanunquil chiru li cujnk, chiru li Dios moco çh'aj ta xbanunquil, chan. ²⁸ Laj Pedro quixye re li Jesús: —Lao xkacanab chixjunil li c'a'ru ke xban atakenquil, chan. ²⁹ Li Jesús quixye: —Relic chi yal tinye ere, li ani naxcanab li c'a'ru re sa' inc'aba' lain, tixc'ul rekaç. Li ani naxcanab li rochoch, lix na' xyucua', li ras rjtz'in, li rixakil, malaj ut lix coc'al sa' xc'aba' lix nimajcual cuanquilal li Dios, a'an tixc'ul rekaç. ³⁰ K'axal nabal cui'chic li rekaç tixc'ul sa' li ruchich'och' a'in, jo' ajcui' sa' li choxa tixc'ul li junelic yu'am, chan li Jesús.

Li Jesús quixye cui'chic resil lix camic

³¹ Tojo'nak li Jesús quixc'ameb xjuneseb lix tzolom cablaju ut quixye reheb: —Anakcuan toxic Jerusalén re nak tatz'aklok ru chixjunil li tz'ibanbil xbaneb li profeta chicuix lain li C'ajolbej. ³² Tink'axtesik sa' ruk'eb li macua'eb aj judío. Tine'xhob, tine'xsac' ut tine'xçyuba. ³³ Ut nak acak xine'xsac' chi us, tine'xcamsi. Abanan sa' rox li cutan tincuaçliç cui'chic chi

yo'yo sa' xyankeb li camenak, chan li Jesús. ³⁴ Ut eb lix tzolom chi t̄ic inc'a' que'xtau ru li quixye li Jesús xban nak ch'a'aj xtaubal ru chiruheb.

Li Jesús quixq'uirtesi jun li mutz' nak yo chi cuulac Jericó

³⁵ Nak li Jesús yó chi cuulac Jericó, cuan jun li cujnk mutz' ru c'ojc'o chire li be. Yó chixtz'amanquil c'a'ru re. ³⁶ Nak quirabi li q'uila tenamit yoqueb chi numec', li mutz' quixpatz' c'a'ru yó chi c'ulmanc. ³⁷ Que'xye re nak li Jesús aj Nazaret yo chi numec'. ³⁸ Li mutz' quixjap re ut quixye: —¡At Jesús, ralalat xc'ajol laj David, laät li yóco chacuoybeninquil. Chacuuxtana taxak cuu! chan. ³⁹ Ut eb li tenamit li yoqueb chi numec' que'oc chixk'usbal ut que'xye re: —Matchokin, chanqueb re. Abanan li mutz' k'axal cui'chic cau quixjap re ut quixye: —At ralalat xc'ajol laj David, chacuuxtana cuu, chan. ⁴⁰ Nak quirabi li quixye li mutz', li Jesús quixakli ut quixtakla xc'ambal li mutz'. ⁴¹ Nak quic'ame' riq'uin, li Jesús quixye re: —¿C'a'ru taçauj tinbanu açue? chan. Ut li mutz' quixye: —Kacua', tincuj nak t̄ailokli xnak' cuu, chan. ⁴² Li Jesús quixye re: —Chi-ilok li xnak' açuu. Xatq'uira xban nak xapab nak cuan incuanquil chaq'uirtesinquil, chan. ⁴³ Ut sa' junpat qui-iloc li mutz' ut cò chirixeb. Yó chixlok'oninquil li Dios. Ut nak que'ril li c'a'ru quic'ulman, chixjunileb li tenamit que'xq'ue xlok'al li Dios.

19

Laj Zaqueo laj titz'ol toj quixpab li Jesús

¹ Nak quicuulac Jericó, li Jesús yó chi numec' sa' li tenamit. ² Aran cuan jun li cujnk biom aj Zaqueo xc'aba'. Li cujnk a'an, a'an li nataklan sa' xbeneb laj titz'ol toj. ³ Taraj xnaubal ani li Jesús. Abanan xban nak k'axal nabaleb li tenamit, inc'a' quiru rilbal xban nak ca'ch'in rok. ⁴ Jo'can nak cò sa' anil chi ubej ut quitake' sa' ru'uj jun li che' sicómoro xc'aba' re nak taruk t̄aril li Jesús xban nak aran toxnumek'. ⁵ Nak yó chi numec' aran, li Jesús qui-iloc takec'. Quiril laj Zaqueo ut quixye re: —At Zaqueo, cuben chak chi junpat xban nak tento nak tinhilank sa' la cuochoch anakcuan, chan. ⁶ Ut laj Zaqueo quicube sa' junpat ut quixc'ul li Jesús sa' rochoch chi sa sa' xch'ol. ⁷ Nak li q'uila tenamit que'ril nak li Jesús qui-oc sa' rochoch laj Zaqueo, que'po' ut que'xye: —X-oc chi hilanc sa' rochoch jun cujnk aj mac, chanqueb. ⁸ Nak yoqueb chi cua'ac, laj Zaqueo quixakli chiru li Jesús ut quixye re: —Kacua', chalen anakuan jalan chic tinbanu. Yijach lin jun cablal tinsi reheb li neba'. Ut cui cuan anihak xcuelk'a c'a'ru re, cahib cua chic xq'uial li rekaj ting'ue, chan. ⁹ Ut li Jesús quixye: —Li cujnk a'in ralat xc'ajol ajcui' laj Abraham. Anakcuan colbil chic li cujnk a'in. ¹⁰ Lain li C'ajolbej xinc'ulun chixsic'bal ut chixcolbal li sachenakeb, chan li Jesús.

Cui inc'a' nakaq'ue chi c'anjelac li kamatan li q'uebil ke xban li Dios, tamak'ek' chiku

¹¹ Ut li Jesús quixye jun chic li jaljoquil ru atin reheb li yoqueb chi abinc re, xban nak cuulaqueb re Jerusalén. Eb a'an que'xc'oxla nak li Jesús ac oc re chixxakabanquil lix nimajcual cuanquilal li Dios. ¹² Li Jesús quixye reheb: Quicuan jun xanimal ru cujnk. Li cujnk a'an quiboke' sa' jun najt̄il tenamit re nak taxakabak chok' rey ut tasuk'ik cui'chic. ¹³ Nak ac xic re li cujnk quixbokeb lajeb lix mos. Quixq'ue lajeb chi tumin re li junjunk ut quixye reheb: —Yaconkex chiru li tumin a'in toja' yal jok'e tana tinsuk'ik chak lain, chan. ¹⁴ Aban xic' na-ile' xbaneb lix tenamit ut nak ac xco li cujnk, que'xtakla xtakl riq'uin li taxakabank re chok' rey chixyebal re: —Lao inc'a' nakaj nak

taoc chok' karey li cujnk a'in, chanqueb. ¹⁵ Abanan li cujnk quixakabac chok' rey. Ut nak ac x-oc chok' rey, li cujnk a'an quisuk'i cui'chic sa' xtenamit ut quixtakla xbokbaleb lix mōs li quixq'ueheb xtumin re xnaubal li jo' nimal ac xtau li junjnk. ¹⁶ Quicuulac li xben ut quixye re: —Kaçua', lajeb chic xrala la tumin li xaç'ue cue, chan. ¹⁷ Li rey quixye re: —Laat çhabil aj c'anjel. Us xabanu. Xban nak t̃ic aç'h'ol riq'uin li ca'ch'in xinq'ue açue, jo'can nak tinq'ue açuanquil sa' xben lajeb chi tenamit, chan li rey. ¹⁸ Ut quicuulac li mōs jun chic ut quixye: —Kaçua', oç chic xrala la tumin li xaç'ue cue, chan. ¹⁹ Ut li rey quixye re: —Jo'can ajcui' laät. Çhabil xabanu. Tinq'ue açuanquil sa' xben oç chi tenamit, chan. ²⁰ Ut quicuulac ajcui' li mōs jun chic ut quixye: —Kaçua', cue' la tumin. Xinc'ula sa' jun sut. ²¹ Xinxucuaç aban xban nak ninnau nak jōsk'at. Nacac'ul li tumin li inc'a' nacac'anjela ut nacatk'oloc bar cui' inc'a' nacat-au, chan. ²² Quichak'oc li rey ut quixye: —Laat maç'a' nacat-oc cui'. Riq'uin ajcui' li c'a'ru xaye, tinrak atin sa' aben. Nacanau nak jōsk'in ut nacanau nak ninc'ul li tumin li inc'a' ninc'anjela ut nink'oloc bar cui' inc'a' nin-au. ²³ ÇC'a'ut nak inc'a' xaç'ue chi to' lin tumin? Ut lajn nak xinsuk'i, xinc'ul raj lin tumin rochben li ral, chan li rey. ²⁴ Ut li rey quixye reheb li cuanqueb aran: —Isihomak li tumin chiru ut q'uehomak re li ac cuan lajeb chi tumin riq'uin, chan. ²⁵ Eb a'an que'chak'oc ut que'xye: —At Kaçua', a'an ac cuan ajcui' lajeb chi tumin riq'uin, chanqueb. ²⁶ Li rey quixye reheb: —Lajin ninye ere nak li ani cuan nabal c'a'ru re, taq'uehek' cui'chic nabal re; ut li ani ca'ch'in ajcui' c'a'ru re, taç'ik chiru, usta ca'ch'in ajcui' li c'a'ru re. ²⁷ Ut c'amomakeb çhak li xic' neque'iloc cue li inc'a' neque'raj nak tin-oc chok' xreyeb. Ut çhicua ajcui', teçamsiheb, chan li rey.

Li Jesús quiq'uehe' xlok'al nak qui-oc Jerusalén

²⁸ Nak ac xye li jaljoquil ru atin a'in, li Jesús qui-oc cui'chic chi xic Jerusalén. ²⁹ Cuulaqueb re sa' li cuib chi tenamit Betfagé ut Betania. Nach' cuanqueb riq'uin li tzul Olivos nak li Jesús quixtaklaheb cuib lix tzolom. ³⁰ Quixye reheb: —Ayukex sa' li ç'h'ina tenamit a'an li cuan chi nach'. Ut nak texcuulak tetau jun li ç'h'ina bur bac'no. Li ç'h'ina bur a'an toj ma ani nabec çhirix. Tehit ut teç'am çhak arin. ³¹ Ut cui ani napatz'oc ere c'a'ut nak yoquex çhixhitbal, teye re nak li Kaçua' taajok ru li ç'h'ina bur, çha'akex, chan li Jesús. ³² Que'coeb lix tzolom li Jesús cuib ut que'xtau çhixjunil jo' quiyehere reheb. ³³ Nak yoqueb çhixhitbal li ç'h'ina bur, eb laj eçal re que'xpatz' reheb: —ÇC'a'ut nak yoquex çhixhitbal li kabur? çhanqueb. ³⁴ Eb lix tzolom li Jesús que'chak'oc ut que'xye: —Li Kaçua' taajok ru li bur, çhanqueb. ³⁵ Ut que'xc'am li ç'h'ina bur riq'uin li Jesús. Que'xq'ue li t'icr çhirix ut que'xten'ka li Jesús chi takeç' çhirix. ³⁶ Nak yo çhi xic li Jesús, nabaleb li cristian que'xhel lix t'icreb sa' be bar tanumek' cui' li Jesús jo' c'aynakeb xbanunquil nak nacuulac junak nim xcuanquil. ³⁷ Cuulaqueb re Jerusalén. Yoqueb çhak chi cubec sa' li tzul Olivos ut çhixjunileb li yoqueb çhixtakenquil li Jesús que'oc çhixjapbal reheb xban xsahil xç'oleb. Ut que'xlok'oni li Dios xbaneb li milagro li quilaje'ril. ³⁸ Que'xye: —Osobtesinbil taxak li rey li xçal sa' xc'aba' li Kaçua'. Ut cuank taxak li tuktuquilal sa' çhoxa. Lok'oninbil taxak li Kaçua' li cuan sa' çhoxa, çhanqueb. ³⁹ Ut cuanqueb laj fariseos sa' xyankeb li q'uila tenamit que'xye re: —At tzolonel k'useb la tzolom, ye reheb nak te'xcanab atinac.— ⁴⁰ Li Jesús quichak'oc ut quixye reheb: —Lajin ninye ere nak cui eb lin tzolom te'xcanab xq'uebal inlok'al, a' chic li pec te'xjap re çhixq'uebal inlok'al, chan li Jesús.

Li Jesús quiyot'e' xch'ol nak quiril li tenamit Jerusalén

41 Nak cuulac re Jerusalén, li Jesús quiyabac chirilbal li tenamit. 42 Ut quixye: —¡Cui ta læex aj Jerusalén nequenau xq'uebal retal ani taruk taq'uehoc tuktuquíl usilal sa' eb li cutan a'in, us raj! Aban anakcuan toj mukmu cheru. Jo'can nak inc'a' nequetau xyalal. 43 Tacuulak xk'ehil nak eb li xic' neque'iloc ere te'chalk chi pletic eriq'uin. Te'xsut rix le tenamit. Te'xq'ue ribeb chi xjun sutam le tenamit ut læex ma bar chic taruk ticol erib. 44 Te'xjuq'ui le tenamit ut te'xt'an, jo'queb ajcui' chixjunileb li cuanqueb aran. Ma jun chic li pec tacanak sa' xna'aj. Teç'ul chi jo'can xban nak læex inc'a' xeq'ue retal nak li Dios xc'ulun eriq'uin checolbal, chan li Jesús.

Li Jesús quirisiheb laj c'ay sa' li templo

45 Nak qui-oc sa' li templo, li Jesús qui-oc chixyolesinquileb chirix cab li yoqueb chi c'ayinc ut li yoqueb chi lok'oc aran. 46 Quixye reheb: —Tz'ibanbil retalil sa' li Santil Hu chi jo'ca'in: Li cuochoch a'in re te'tijok cui' li tenamit. Abanan læex xeq'ue li templo chok' xna'ajeb laj elk', chan li Jesús. 47 Ut rajlal cutan yo chixch'olobanquil xyalal sa' li templo. Eb li xbenil aj tij, ut eb laj tz'ib ut eb li neque'taklan sa' xyankeb laj judío yoqueb chixc'ubanquil chanru nak te'xcamsi. 48 Abanan inc'a' que'xtau chanru te'xbanu xban nak chixjunileb li tenamit yoqueb chixq'uebal xch'oleb chirabinquil li c'a'ru yo chixyebal li Jesús.

20

Eb laj tz'ib que'xpatz' re li Jesús ani quiq'uehoc xcuanquil

1 Sa' jun li cutan li Jesús yo chixch'olobanquil xyalal li colba-ib chiruheb li tenamit li cuanqueb sa' li templo, nak que'cuulac riq'ueineb li xbenil laj tij ut eb laj tz'ib rochbeneb li xakabanbileb chi c'anjelac sa' li templo. 2 Ut que'xye re: —¿Ani xtaklan acue chixbanunquil li c'a'ru yocac chixbanunquil? ¿Ani xq'uehoc acuanquil? chanqueb. 3 Li Jesús quixye reheb: —Lain tincuaj ajcui' patz'oc ere. Tesume li tinpatz' ere. 4 ¿Ani quitaklan chak re laj Juan chi cubsinc ha'? ¿Ma li Dios malaj ut cujnk quitaklan chak re? chan li Jesús reheb. 5 Ut que'oc chixyebal chi ribileb rib: —¿C'a'ru takasume cui'? Cui takaye nak li Dios xtaklan chak re, a'an tixye ke c'a'ut nak inc'a' xkapab li c'a'ru quixye laj Juan. 6 Ut cui takaye nak cujnk xtaklan chak re, chixjunileb li tenamit toe'xcamsi chi pec xban nak eb a'an neque'xpaab nak laj Juan, a'an tz'akal profeta, chanqueb chi ribileb rib. 7 Jo'can nak que'chak'oc ut que'xye re li Jesús: —Lao inc'a' nakanau ani xtaklan chak re, chanqueb. 8 Ut li Jesús quixye reheb: —Chi moco lain tixye ere ani xq'uehoc incuanquil chixbanunquil li c'a'ru ninbanu, chan reheb.

Li Jesús quixye reheb nak tarakek' atin sa' xbeneb li neque'tz' ektanan re

9 Ut li Jesús qui-oc chixyebal reheb li tenamit li jaljoquil ru atin a'in: Jun li cujnk quirau jun sir li racujmk uvas. Quixq'ue chi to' riq'ueineb li cujnk aj c'alom. Ut co sa' jalan tenamit ut najt quisach. 10 Nak quicuulac xk'ehil xsic'bal ru li acujmk, laj echal re quixtakla jun lix moç riq'ueineb li cujnk chixc'ulbal li jo' q'uial ru li racujmk li tatz'ak a'an. Abanan eb li cujnk que'xchap li moç ut que'xsac'. Ut quisuk'i chi mac'a' que'xq'ue re. 11 Laj echal re li acujmk quixtakla jun chic lix moç riq'ueineb. Ut jo'can ajcui' que'xbanu re a'an. Que'xhob ut que'xsac' ut quisuk'i a'an chi mac'a' que'xq'ue re. 12 Ut laj echal re li ch'och' quixtakla cui'chic jun lix moç. Ut eb li cujnk k'axal ra que'xbanu re ut que'xcut chirix li na'ajeb a'an. 13 Tojo'nak laj echal re li ch'och' quixye: —¿C'a'ru tinbanu anakcuan? Tintakla li cualal li k'axal raro inban. Nak te'ril li cualal, mare te'xc'ul sa' xyalal, chan sa' xch'ol. 14 Que'ril

nak yə chi cuulac li ralar, ut que'xye chi ribileb rib: —A'an li taəchanink re li na'ajej. Kacamsihak, chanqueb, re nak lao chic toəchanink re. ¹⁵ Que'risi sa' li na'ajej a'an ut que'xcamsi. ¿C'a'ru nequeye laex? ¿C'a'ru tixbanu laj eçal re li acujmk riq'uineb li cujnk a'in? Lain titye ere c'a'ru tixbanu. ¹⁶ Tachalk ut tixcamsiheh laj ilol re li racujmk ut jalan chic aj e tixq'ue li jun sir chi uvas, chan li Jesús. Nak que'rabi li quixye li Jesús, eb a'an que'xye: —Inc'a' taxak chic'ulmank chi jo'can, chanqueb. ¹⁷ Li Jesús quirileb ut quixye reheb: —¿C'a'ru naraj naxye a'in li tz'ibanbil sa' li Santil Hu, li que'xye li profeta chicuix?

Li pec li que'xtz'ektana laj cablanel, a'an li k'axal lok' li quiq'uehe' chok' xxuc li cab. (Sal. 118:22)

¹⁸ Li ani tat'ane' sa' xben li pec a'in, tixtoch'i rib. Coc' puc' tačanak. Ut ani sa' aj ben tat'ane' li pec a'in, xujinbil tačanak.

¹⁹ Eb laj tz'ib ut eb li xbenil aj tij que'xtau ru nak reheb a'an quixye li jaljoquil ru atin a'in ut que'raj raj xchapbal li honal a'an. Abanan inc'a' que'ru xban nak que'xucac chiruheh li tenamit.

Que'xyal rix li Jesús riq'uin xpatz'bal ma us xq'uebal li toj re laj César li acuabej

²⁰ Eb laj tz'ib ut eb li xbenil aj tij yoqueb chixq'uebal retal jok'e tz'akal taruk te'xchap li Jesús. Ut que'xtaklaheb aj q'uehol etal riq'uin. Laj q'uehol etal que'xbanu ribeb nak tiqueb xch'ol yal re rilbal cui tixye junak atin re nak taruk te'xchap ut te'xc'am riq'uin li acuabej. ²¹ Xban a'an nak que'xye re chi jo'ca'in: —At tzolonel, nakanau nak laet yal nacat-atinac ut sa' xyalal nacac'ut li xyalal chiruheh li tenamit. Inc'a' nacasic' ru ani nacara. Sa' xyalal nacac'ut chiruheh li c'a'ru naraj li Dios. ²² Ye ke c'a'ru naxye li chak'rab. ¿Ma us takaq'ue li katoj re laj César li acuabej malaj ut inc'a'? chanqueb re.

²³ Li Jesús quixnau nak aj balak'eb. Jo'can nak quixye reheb: —¿C'a'ut nak nequeraj xyalbal cuix? ²⁴ C'ut junak li tumin chicuu. ¿Ani aj e li jalam uch li cuan chiru? Ut, ¿ani aj c'aba' li tz'ibanbil chiru? chan. Eb a'an que'chak'oc ut que'xye: —Re li acuabej. ²⁵ Ut li Jesús quixye reheb: —Tojomak re li acuabej li c'a'ru re li acuabej, ut tojomak re li Dios li c'a'ru re li Dios, chan. ²⁶ Ut ma jun atin que'xtau re taruk te'xye nak cuan xmac. Ut que'sach xch'oleb xban li atin li que'sumec cui' xban li Jesús. Jo'can nak mac'a' chic que'xye.

Eb laj saduceo que'patz'oc chirix lix cuaclijiqueb li camenak chi yo'yo

²⁷ Cuanqueb cuib oxib laj saduceo que'cuulac riq'uin li Jesús. Eb a'an inc'a' neque'xpab nak te'cuaclik cui'chic chi yo'yo li camenak. Que'xye re li Jesús: ²⁸ —At tzolonel, laj Moisés quixtz'iba jun li chak'rab chok' ke. Naxye chi jo'ca'in: Cui junak cujnk tačamk ut ma jun li ralar xc'ajol tačuank, tašumlak li ritz'in li camenak riq'uin li xmalca'an re nak tačuank ralar xc'ajol sa' xc'aba' li camenak. ²⁹ Que'cuan cuukub li cujnk ritz'ineb rib. Li asbej quixc'am rixakil ut quicam chi inc'a' quicuan ralar xc'ajol. ³⁰ Ut quic'ame' li ixk xban li ritz'in li camenak ut quicam ajcui' li cujnk a'an ut chi moco a'an quicuan ralar xc'ajol riq'uin li ixk. ³¹ Ut jo'can cui'chic li rox jtz'inbej. Li ixk quicuan chok' rixakil li cuukub chi cujnk ut ma jun reheb quicuan ralar xc'ajol riq'uin li ixk a'an. ³² Ut quicam ajcui' li ixk. ³³ Sa' xcuaclijiqueb li camenak chi yo'yo, nak te'cuaclik eb a'an, ¿ani aj ixakil tačanak cui' li ixk a'an xban nak cuukub lix belom quicuan? chanqueb re li Jesús. ³⁴ Quichak'oc li Jesús ut quixye reheb: —Eb li cuanqueb sa' ruchich'och' anakuan neque'sumla ut neque'sumubač. ³⁵ Abanan sa' eb li cutan tachalk, li xc'ulubeb cuaclic cui'chic chi yo'yo sa' xyankeb li camenak, inc'a' chic te'sumlak chi moco te'sumubač. ³⁶ Jo'cakeb

ban chic li ángel sa' choxa. Inc'a' chic te'camk. Te'cuaclik cui'chic chi yo'yo sa' xyankeb li camenak, xban nak a'an eb li ralal xc'ajol li Dios. ³⁷ Laex nequeye nak inc'a' te'cuaclik cui'chic chi yo'yo li camenak. Abanan laj Moisés quixc'utbesi ajcui' chak junxil nak eb li camenak te'cuaclik cui'chic chi yo'yo. Tz'ibanbil retalil sa' li Santil Hu li quixye nak yo chi c'atc li q'uix. Quixye nak li Dios, a'an lix Dios laj Abraham, lix Dios laj Isaac, ut lix Dios laj Jacob. ³⁸ Li Dios, a'an moco xDioseb ta camenak; xDioseb ban li yo'yoqueb, xban nak toj yo'yoqueb chiru li Dios usta ac camenakeb, chan li Jesús reheb. ³⁹ Cuanqueb laj tz'ib que'chak'oc ut que'xye re: —At tzolonel, tz'akal re ru li xaye, chanqueb. ⁴⁰ Ut ma' ani chic quiraj patz'oc riq'uin li Jesús.

Li Cristo, a'an ralal xc'ajol li rey David ut a'an ajcui' laj Colol re

⁴¹ Li Jesús quixye reheb: —Neque'xye nak li Cristo laj Colonel a'an xcomoneb li ralal xc'ajol li rey David. ⁴² Tz'ibanbil retalil sa' li Santil Hu sa' li Salmos li quixye li rey David. Quixye:

Li Kaçua' Dios quixye re li Kaçua' laj Colol cue, c'o'jlan sa' li nim uk'

⁴³ toj tinq'ueheb li xic' neque'iloc acue rubel la cuanquil. (Sal. 110:1)

⁴⁴ Li rey David quixye “aj Colol cue” re li Kaçua', usta a'an xcomoneb li ralal xc'ajol, chan li Jesús.

Eb laj tz'ib aj ca'pac'al u; inc'a' useb xna'leb

⁴⁵ Chixjunileb li tenamit yoqueb chirabinquil nak li Jesús quixye reheb lix tzolom: ⁴⁶ —Metzol erib riq'uineb laj tz'ib li neque'cuulac chiruheb xq'uebal li rak'eb chirixeb chi najt rok nak neque'bec re xc'utbal nak cuanqueb xcuanquil. Eb a'an neque'cuulac chiru nak te'q'uehek' xlok'al sa' eb li be. Ut nak cuanqueb sa' li cab li neque'xch'utub cui' ribeb, neque'cuulac chiruheb c'o'jlaç toj chi ubej. Ut nak neque'boke' sa' junak nink'e, neque'cuulac chiruheb chunlaç sa' li mex li neque'chunla cui' li cuanqueb xcuanquil. ⁴⁷ Ut neque'xmak' li c'a'ru cuan reheb li xma'lc'a'an. Ut najt rok lix tijeb neque'xbanu nak neque'tijoc chiruheb li tenamit re xmukbal li ma'usilal li neque'xbanu. Eb a'an k'axal ra te'xtoj cui' li maç neque'xbanu, chan li Jesús.

21

Li xma'lc'a'an neba' nabal quixq'ue chiru li que'xq'ue li biom

¹ Sa' jun li cutan li Jesús cuan sa' li templo ut quiril nak eb li biom yoqueb chixq'uebal lix mayejeb sa' li caç. ² Ut quiril ajcui' nak jun li xma'lc'a'an neba' quixq'ue sa' li caç cuib li tumin cobre chok' xmayej. ³ Ut li Jesús quixye: —Relic chi ya' ninye ere nak li xma'lc'a'an neba' nabal xq'ue chiru li que'xq'ue li biom, ⁴ xban nak chixjunileb a'an xe'xq'ue li x-ela'an chiruheb. Abanan li ixk a'in, usta neba', xq'ue chixjunil li jo' nimal cuan re, li re raj xnumsinquil li cutan junjünk.

Taçcuulak xk'ehil nak tajuq'uik li templo

⁵ Cuanqueb li yoqueb chi atinac chirix lix ch'ina'usal li templo. Yoqueb chixyebal: —C'ajo' xchak'al ru li pec li yibanbil cui' li templo jo' ajcui' li mayej li que'xq'ue chok' xsa'hub ru, chanqueb. Ut li Jesús quixye reheb: ⁶ —Taçcuulak xk'ehil nak taçachek' ru chixjunil li yoquex chirilbal anakuan. Ma' jun reheb li pec a'an taçanajk sa' xna'aj chi inc'a' ta tajuq'uik, chan li Jesús.

Li c'a'ru talajc'ulma'nk nak ac cuulac re xk'ehil li roso'jic li ruchich'och'

⁷ Que'xpatz' re: —At tzolonel, çjok'e taç'ulma'nk li yocac chixyebal? ÇC'a'ru retalil taçuank nak talajc'ulma'nk li c'a'ak re ru a'in? chanqueb. ⁸ Li Jesús quixye reheb: —Chebanu cuent re nak inc'a' texbalak'ik xban nak nabal

te'chalk chi balak'inc ut te'xye nak sa' inc'aba' lain xe'chal. Te'xye, "Lain li Cristo li yechi'inbil xban li Dios" cha'keb. Ut te'xye, "Anakcuan xcuulac xk'ehil." cha'keb. Abanan mepab li c'a'ru te'xye eb a'an. ⁹ Nak terabi nak yo li plet ut li ch'a'ajquilal yalak bar, mexxuocac xban nak tento nak tac'ulmank chi jo'can. Abanan moco ac a'an ta ros'o'jiqueb li cutan, chan li Jesús. ¹⁰ Ut quixye ajcui': —Nabal li tenamit te'pletik riq'uin jalan chic tenamit. Ut eb li acuabeb te'xpleti ribeb. ¹¹ Talajcuank hic sa' nabal chi na'ajeb ut tacuank cue'ej ut yajel. Tacuank ninki raylal ut xucuajel rilbal li retalil li talajc'utunk sa' choxa. ¹² Abanan nak toj maji' nac'ulman chixjunil li c'a'ak re ru a'in, texchapek' ut texrahobtesik. Texc'amek' sa' li cab li neque'xch'utub cui' ribeb laj judío ut texc'amek' sa' tz'alam. Texc'amek' chiruheb li rey ut eb laj rakol atin sa' inc'aba' lain. ¹³ Ut a'an tac'anjelak ere re xch'olobanquil resil li colba-ib. ¹⁴ Q'uehomak bi' sa' ech'ol a'in, nak moco toj yokex ta chixc'oxlanquil chanru texsumenk cui' re xcolbal erib, ¹⁵ xban nak lain tinq'ue ena'leb ut tinc'ut cheru c'a'ru teye. Ut eb li xic' neque'iloc ere inc'a' te'ruk chixc'uech'bal rix li c'a'ru teye, chi moco te'xnuu xsumenquil. ¹⁶ Texk'axtesik sa' ruk'eb li xic' neque'iloc ere xbaneb le na' eyucua' ut xbaneb le ras ut le ritz'in ut eb le rech'alal jo' eb ajcui' le ramig. Ut cuan li cuanqueb sa' eyank li te'camsik. ¹⁷ Ut xic' tex'ilek' xbaneb chixjunileb li tenamit sa' inc'aba' lain. ¹⁸ Abanan mac'a' tec'ul. ¹⁹ Cui inc'a' nach'inan ech'ol sa' le pabal usta yokex chi c'uluc raylal terechani li junelic yu'am. ²⁰ Nak teril li tenamit Jerusalén sutsuk xbaneb li q'uila soldado, laex tenau nak ac xcuulac xk'ehil li ros'o'jic. ²¹ Ut eb li cuanqueb sa' li na'ajeb Judea che'elelik sa' junpat ut che'xicak sa' eb li tzul. Eb li cuanqueb sa' li tenamit Jerusalén che'elk aran ut eb li cuanqueb sa' c'alebaj inc'a' chic te'suk'ik sa' li tenamit. ²² Ut sa' eb li cutan a'an, li Dios tixq'ueheb chixtojbal rix lix maqueb li xic' neque'iloc re. Chi jo'can tatz'aklok ru chixjunil li tz'ibanbil retalil sa' li Santil Hu. ²³ K'axal ra cui'chic chok' reheb li yaj aj ixk ut li yoqueb chi tu'resink sa' eb li cutan a'an, xban nak ma'ca'ch'in li raylal te'xc'ul li tenamit a'an xban nak yok xjosk'il li Dios sa' xbaneb. ²⁴ Cuan li te'camsik riq'uin ch'ich' ut cuan li te'chapek' ut te'c'amek' chi prexil sa' eb li jalan tenamit. Ut li tenamit Jerusalén tacanək rubel xcuanquileb li macua'eb aj judío toj tacuulac xk'ehil nak li Dios tarisiheb lix cuanquileb li macua'eb aj judío, chan li Jesús. ²⁵ Ut tacuank retalil chiru li sak'e, li po ut eb li chahim. Ut eb li cuanqueb sa' ruchich'och' te'yot'ek' ut te'sach xch'oleb xban lix yab ut lix cau ok li palau. ²⁶ Te'luctak li cuink xbaneb xxiu nak yokeb chixc'oxlanquil li raylal li tachalk sa' ruchich'och'. Ut taec'ank sa' xna'aj li choxa. ²⁷ Chirix a'an teril nak lain li C'ajolbej yokin chak chi chalc sa' choxa riq'uin lix nimal incuanquial ut inlok'al. ²⁸ Nak acak xtiela xc'ulbal chixjunil li c'a'ak re ru a'in, cacuubresihomak ech'ol ut yo'on cuankex. Chisahok' sa' ech'ol xban nak cuulac re xk'ehil nak texcolek', chan li Jesús.

Li jaljoquil ru atin chirix li jun ton chi higo

²⁹ Ut quixye jun chic li jaljoquil ru atin reheb. Quixye: Cheq'uehak retal li jun ton chi higo ut chixjunileb li che'. ³⁰ Nak nak'unk'ut chak lix xak li che' chi elc, riq'uin a'an nequeq'ue retal nak yo chak chi nach'oc li sak'ehil. ³¹ Jo'can ajcui' laex nak teril nak yok chi c'ulmanc chixjunil li c'a'ak re ru a'in, a'an retalil nak yo chak chi nach'oc lix nimajcual cuanquil li Dios. ³² Relic chi yal ninye ere nak inc'a' taosok' li tenamit a'in chi toj maji'ak nac'ulman chixjunil li c'a'ak re ru a'in. ³³ Li choxa ut li ruchich'och' talaje'osok'. Abanan li cuatin inc'a' tacanək yal chi jo'can chi inc'a' ta tac'ulmank li

c'a'ru naxye. ³⁴ Chenauhak xcolbal erib. Meq'ue erib chi alec riq'uin li numcua'ac ut li calac, chi moco riq'uin xc'oxlanquil chanru tenumsi li cutan junjunk. Mare anchal tacuulak xk'ehil li cutan a'an chi mac'a' sa' ech'ol. ³⁵ Tachalk chi mac'a' sa' ech'ol jo' nak naqueman junak ra'al chi ma' ani nana'oc re. ³⁶ Jo'can ut yo'on cuankex ut junelic chextijok re nak cauhak ech'ol chixcuybal xnumsinquil li raylal li tachalk sa' eben, ut re nak taruk texcuulak cuiq'uin lain li C'ajolbej, chan li Jesús. ³⁷ Rajlal cutan li Jesús naxch'olob xyalal chiruheb sa' li templo ut nak na-ecuu, naxic sa' li tzul Olivos chixnumsinquil li k'ojyin. ³⁸ Ut chixjunileb li tenamit neque'xxic sa' li templo rajlal ek'ela chirabinquil li c'a'ru naxye li Jesús.

22

Laj Judas Iscariote quixye reheb nak tixk'axtesi li Jesús sa' ruk'eb laj judío

¹ Yo' chi cuulac xcutanquil li nink'e nak neque'xcua' li caxlan cua mac'a' xch'amal. Pascua nayeman re li nink'e a'an. ² Eb lix benil aj tij ut eb laj tz'ib yoqueb chixsic'bal chanru nak taruk te'xcamsi li Jesús. Abanan yoqueb xc'a'ux xban nak inc'a' que'raj xchik'bal xjosk'ileb li tenamit. ³ Laj Judas Iscariote jun reheb lix cablaju chi xtzolom li Jesús. A'an quix'ue rib chi alec xban laj tza. ⁴ Co riq'uineb li xbenil aj tij ut riq'uineb li neque'c'ac'alen re li templo chixyebal reheb nak tixk'axtesi li Jesús sa' ruk'eb. ⁵ Que'saho' xch'oleb chirabinquil li quixye ut que'xyechi' i xumin. ⁶ Ut quixc'ul xch'ol laj Judas li quiyeh' re. Jo'can nak qui-oc xsic'bal jok'e taruk tixk'axtesi li Jesús sa' ruk'eb chi inc'a' te'xnau li q'ulla tenamit.

Li Jesús quicua'ac rochbeneb lix tzolom re xnumsinquil li nink'e Pascua

⁷ Quicuulac xk'ehil li nink'e Pascua nak neque'xcua' li caxlan cua mac'a' xch'amal. Sa' li nink'e a'an tento nak te'xcamsi junak li carner. ⁸ Li Jesús quixye reheb laj Pedro ut laj Juan: —Ayukex ut cauresihomak chak li tzacaemk re li pascua re totzacañk, chan. ⁹ Que'xpatz' re: —¿Bar tacuaj takacauresi chak?— ¹⁰ Li Jesús quixye reheb: —Nak tex-oc sa' li tenamit, aran tetau jun li cuiñk yo' chixc'ambal jun cuc xha'. Tetake a'an toj sa' li cab bar tox-oak cui'. ¹¹ Ut tye re laj echal cab, “Chan laj tzolomel, ¿bar cuan li na'ajej li tacua'ak cui' sa' li nink'e Pascua rochbeneb lix tzolom?” cha'akex re. ¹² Ut a'an tixc'ut cheru jun nimla na'ajej takec' sa' xca' tasalil li cab. Ac yibanbil li na'ajej. Ut aran te'cauresi li nink'e chok' ke, chan li Jesús. ¹³ Que'ceeb sa' li tenamit ut qui-uxman jo' quixye li Jesús. Ut aran que'xcauresi li nink'e Pascua. ¹⁴ Nak quicuulac x-oril, li Jesús quic'ojla sa' li mex rochbeneb lix tzolom. ¹⁵ Ut quixye reheb: —C'ajo' nak yoquin chixrahinquil ru nak tocua'ak cuochbenex sa' li nink'e a'in nak toj maji' nincam. ¹⁶ Relic chi yal ninye ere nak inc'a' chic tinbanu li nink'e Pascua toj tacuulak xk'ehil nak tinbanu cui'chic sa' lix nimajcual cuanquilal li Dios, chan. ¹⁷ Ut quixchap li sec' re uc'ac. Quixbantioxi chiru li Dios ut quixye: —C'ulumak a'in ut jeq'uihomak sa' eyank li cuan chi sa', ¹⁸ xban nak lain tinye ere nak chalen anakuan inc'a' chic tincuuc' xy'al li uva toj tacuulak xk'ehil nak tincuuc' cui'chic sa' lix nimajcual cuanquilal li Dios, chan. ¹⁹ Ut quixchap li caxlan cua, quixbantioxi chiru li Dios, tojo'nak quixjachi ut quix'ue reheb lix tzolom ut quixye: —A'an a'in lin tz'ejucl, k'axtesinbil re camsic sa' ec'aba' laex. Chebanuhak re xjulticanquil lin camic, chan. ²⁰ Jo'can ajcui' quixbanu nak ac xrake' chi cua'ac. Quixchap li sec' re uc'ac ut quixye: —A'an a'in retalil li ac' contrato li taxakabak xcuanquil riq'uin lin quiq'uel li tahoyek' nak tincamsik sa' ec'aba'

laex, chan. ²¹ Ut quixye ajcui' li Jesús: —Nacuj nak tenau nak li cujnk li tak'axtesjnk cue yo chi cua'ac sa' mex cuochben. ²² Tento nak tincamsjnk lain li C'ajolbej. Abanan raylal cuan sa' xben li cujnk li tak'axtesjnk cue, chan li Jesús. ²³ Ut eb a'an que'oc chixpatz'inquil chi ribileb rib ut que'xye: —¿Ani anchal li tak'axtesjnk re? chanqueb.

Que'xcuech'i rix ani k'axal nim xcuanquil

²⁴ Eb lix tzolom li Jesús que'oc chixcuech'inquil rix chi ribileb rib ani tana sa' xyankeb nimak xcuanquil. ²⁵ Li Jesús quixye reheb: —Eb li rey li cuanqueb sa' ruchich'och' cuanqueb xcuanquil sa' xbeneb li tenamit. Eb a'an neque'raj nak chabil tayehek' chirixeb. ²⁶ Abanan laex inc'a' tebanu chi jo'can. Li ani naraj xcuanquil sa' eyank, tento nak tixcubs rib ut tac'anjelak cheru. Li ani taraj c'amoc'be sa' eyank, tento nak tixcubs rib ut tac'anjelak cheru. ²⁷ ¿Anili k'axal nim xcuanquil nak nequec'oxla laex? ¿Ma li nac'ojla sa' mex, malaj ut li nac'anjelac chiru? ¿Ma macua' ta bi' li ani nac'ojla sa' mex? Lain cuan incuanquil, aban cuanquin sa' eyank jo' jun aj c'anjel cheru. ²⁸ Laex xecuy cuochbeninquil sa' li ra xic' xinc'ul. ²⁹ Jo'can nak tin'ue ecuanquil laex jo' nak xq'ue incuanquil lain lin Yucua'. ³⁰ Laex texcua'ak ut tex-uc'ak sa' lin mex nak cuankin sa' lin cuanquil. Ut laex texc'ojlak sa' le c'ojaribal ut tetrakok atin sa' xbeneb li cablaju xtepaleb laj Israel, chan li Jesús.

Li Jesús quixye nak tatz'ektanqak xban laj Simón Pedro

³¹ Ut quixye li Kaçua': —At Simón, laj tza ac xpatz' xlesens re nak tixyal rix le pabal jo' nak nachik'e' ru li trigo re risinquil li rix. ³² Abanan lain xintijoc chaçuix re nak inc'a' tacanab la pabal. Ut nak tatsuk'ik cui'chic cuiq'uin, taq'ue xcacuillal xch'oleb la cuech aj pabanelil, chan li Jesús. ³³ Ut laj Pedro quixye re: —At Kaçua', lain cau inch'ol chatakenquil usta tine'xq'ue sa' tz'alam malaj ut tine'xcamsi acuochben, chan. ³⁴ Ut li Jesús quixye re: —At Pedro, lain ninye acue, anakuan ajcui' nak toj maji' nayabac laj tzo' xul, laac ac xaye oxib sut nak inc'a' nacanau cuu, chan. ³⁵ Ut quixye cui'chic reheb lix tzolom: —Nak quexintakla chi mac'a' ebols, chi mac'a' xna'aj etumin, chi mac'a' exab, ¿ma cuan ta bi' c'a'ru xpalto' ere? Ut eb a'an que'xye: —Mac'a' quipalto' ke. ³⁶ Quixye cui'chic li Jesús reheb: —Ut anakuan li ani cuan xbols, xc'amak chirix jo' ajcui' xna'aj lix tumin. Ut li ani mac'a' xch'ich', tixc'ayi lix chaquet ut xlok'ak xch'ich' chiru li tumin a'an. ³⁷ Relic chi yal ninye ere nak tento tatz'aklok ru li c'a'ru tz'ibanbil chicuix sa' li Santil Hu, li naxye chi jo'ca'in: Quiq'uehe' sa' ajl sa' xyankeb li inc'a' useb xna'leb. Tento nak tac'ulmank li c'a'ru tz'ibanbil retalil chicuix, chan. ³⁸ Eb a'an que'xye: —Kaçua', cuan arin cuib li ch'ich', chanqueb. Ut li Jesús quixye: —Tz'akal li xeye. Mex-atinac chic.

Nak quitijoc chak li Jesús aran Getsemani

³⁹ Li Jesús qui-el aran ut co sa' li tzul Olivos, jo' c'aynak xbanunquil. Ut eb lix tzolom que'xtake. ⁴⁰ Nak quicuulac sa' li na'ajej a'an, quixye reheb lix tzolom: —Chextijoc re nak inc'a' teq'ue erib chi alec, chan. ⁴¹ Ut li Jesús quirisi rib sa' xyankeb jo' na xnajtil nacute' cui' junak pec. Ut aran quixcuik'ib rib chi tijoc. ⁴² Quixye: —At inyucua', cui laac tacuaj, inc'a' raj tinc'ul li raylal a'in. Abanan chi-uxmank li c'a'ru nacacuj laac ut macua' li nacujaj lain, chan. ⁴³ Ut quichal jun li ángel sa' choxa ut quixq'ue xcacuillal xch'ol. ⁴⁴ Nak yo chi yot'ec' xch'ol, quitijoc cui'chic li Jesús chi k'axal anchal xch'ol ut lix tikob yo chi tz'ukuc sa' ch'och' chi ninki tz'ukul chanchan quic'. ⁴⁵ Nak quirake' chi

tijoc, quicuacli ut cō riq'ueineb lix tzolom. Quiril nak yoq̄ueb chi cuarc xban nak k'axal ra sa' xch'oleb. ⁴⁶ Ut li Jesús quixye reheb: —¿C'a'ut nak yoquex chi cuarc? Cuaclinkex ut tjonkex re nak inc'a' teq'ue erib chi aḷec, chan reheb.

Li Jesús quichape' ut quic'ame' chi prexil xbaneb laj c'amol be sa' xyankeb laj judío

⁴⁷ Toj yo ajcui' chi atinac li Jesús nak que'cuulac li q'uila tenamit. Laj Judas, a'an yo chi c'amoc be chiruheb. A'an jun reheb lix tzolom cablaju. Quijiloc chixc'atk li Jesús re nak tarutz' ru. ⁴⁸ Ut li Jesús quixye re: —At Judas, ¿ma taçauutz' cuu re ink'axtesinquil, lain li C'ajolbej? chan re. ⁴⁹ Ut li cuanqueb rochben que'ril li c'a'ru yo chixbanunquil ut que'xpatz' re: —Kaçua', ¿ma takaq'ueheb chi ch'ich'? chanqueb. ⁵⁰ Ut jun reheb quixyoc' lix xic lix moş li xyucua'il aj tij ut quirisi lix xic li cuan sa' xnim. ⁵¹ Li Jesús quixye: —Canabomak xbanunquil a'an, chan. Ut quixch'e' riq'uin ruk' lix xic li cujnk ut quixq'uirtesi. ⁵² Ut quixye reheb li xbenil aj tij, ut eb li neque'taklan sa' li templo, jo'queb ajcui' li neque'c'amoc be, li que'chal chixchapbal: —¿Ma lain ta bi' aj elk' nak xexchal chinchapbal riq'uin che' ut riq'uin ch'ich'? ⁵³ Rajlal cutan cuanquin sa' eyank chetzolbal sa' li templo ut inc'a' quinechap aran. Abanan anakuan xcuulac xk'ehil nak tepanu li c'a'ru teraj laex riq'uin xcuunquil laj tza, chan li Jesús.

Laj Pedro quixye oxib sut nak inc'a' naxnau ru li Jesús

⁵⁴ Que'xchap li Jesús ut que'xc'am sa' rochoch li xyucua'il aj tij. Ut laj Pedro yo chixtakenquil chi najt. ⁵⁵ Que'xtz'ab jun li xam chiru nebal, ut quilaje'c'ojla chire xam, ut quic'ojla ajcui' laj Pedro sa' xyankeb. ⁵⁶ Ut jun li moş ixk quiril laj Pedro c'ojc'o chire xam. Quixca'ya ut quixye: —Li cujnk a'in, a'an jun reheb li neque'ochbenin re li Jesús, chan. ⁵⁷ Abanan laj Pedro quitic'ti'ic ut quixye: —At ixk, lain inc'a' ninnau ru ani li nacaye, chan. ⁵⁸ Junpat na chic nak jun li cujnk qui-iloc re laj Pedro ut quixye: —Laat jun xcomoneb a'an, chan re. Ut laj Pedro quixye: —At cujnk, maçua' lain xcomoneb, chan. ⁵⁹ Ac xnume' na chic jun or, nak jun chic li cujnk quixye: —Relic chi yaḷ nak li cujnk a'in, a'an jun reheb li que'ochbenin re li Jesús. Li cujnk a'in aj Galilea, chan. ⁶⁰ Ut laj Pedro quixye: —At cujnk, inc'a' ninnau c'a'ru yocat chixyebal, chan. Ut toj yo ajcui' chi atinac laj Pedro nak quiyabac li tzo' xul. ⁶¹ Ut li Kaçua' quixsuk'isi rib ut quixca'ya laj Pedro. Ut quinak sa' xch'ol laj Pedro li quiyehé' re xban li Kaçua', “Toj maji' ajcui' nayabac li tzo' xul, nak laat ac xaye oxib sut nak inc'a' nacanau cuu.” ⁶² Laj Pedro qui-el chirix cab ut c'ajo' nak quiyabac xban xrahil xch'ol.

Li Jesús quihobe' ut quisaq'ue' xbaneb li soldado aj Roma

⁶³ Eb li cujnk li yoq̄ueb chi c'ac'alenc re li Jesús, que'xhob ut que'xsac'. ⁶⁴ Que'xbac' chi t'icr li xnak' ru re nak inc'a' tajlok, que'xsac' ut que'xye: —K'ehi ani xsac'oc acue, chanqueb re. ⁶⁵ Ut nabal chic c'a'ak re ru que'xye re xhobbal li Jesús.

Li Jesús quic'ame' chiruheb li neque'taklan sa' xbeneb laj judío

⁶⁶ Nak quicutano, que'xch'utub ribeb li neque'c'amoc be sa' xyankeb li tenamit ut eb li xbenil aj tij jo' eb ajcui' laj tz'ib. Ut que'xc'am li Jesús riq'ueineb li neque'taklan sa' xbeneb laj judío. Ut que'xye re: ⁶⁷ —Ye ke. ¿Ma laat li Cristo, laj Colonel li yechi'inbil xban li Dios? chanqueb. Ut li Jesús quixye reheb: —Cui tinye ere nak lain, inc'a' ajcui' raj tepab, chan. ⁶⁸ Ut cui tinpatz'ok ere, inc'a' aj raj cui' tesume li c'a'ru tinpatz', chi moco tinerach'ab. ⁶⁹ Ut chalen

anakcuan lain li C'ajolbej tinc'ojlak sa' xnim uk' li nimajcual Dios, chan. ⁷⁰ Ut chixjunileb que'xye re: —¿Ma laät li Ralal li Dios chi jo'canan? Ut li Jesús quichak'oc ut quixye: —Yal li xeye nak lain, chan. ⁷¹ Ut chixjunileb que'xye: —¿C'a' chic ru aj e nak toj te'xye ke c'a'ru xmac? Riq'uin kaxic xkabi li c'a'ru xye, chanqueb.

23

Li Jesús quic'ame' chiru laj Pilato re tixrak qtin sa' xben

¹ Ut chixjunileb li neque'taklan sa' xyankeb laj judío que'xc'am li Jesús riq'uin laj Pilato. ² Que'oc chixjitbal ut que'xye: —Xkaq'ue retal nak li cujnk a'in yo chixpo'bal xch'oleb li katenamit. Nocoxk'us riq'uin xq'uebal li katoj re li acuabej. Ut naxye nak a'an li Cristo laj Colonel li yechi'inbil xban li Dios. Naxye nak a'an rey, chanqueb. ³ Laj Pilato quixye re li Jesús: —¿Ma laät lix reyeb laj judío? Li Jesús quichak'oc ut quixye: —Yal li xaye nak lain, chan. ⁴ Ut laj Pilato quixye reheb li xbenil aj tij ut eb li q'uila tenamit: —Li cujnk a'in ma jun xmac nintau, chan. ⁵ Abanan eb a'an yalyoq'ueb xk'e chixyebal: —Naxpo' xch'oleb li katenamit. Yo chixc'utbal lix tijleb chiruheb sa' chixjunil Judea. Quixtiquib chak Galilea ut xc'ulun toj arin, chanqueb.

Li Jesús quic'ame' chiru laj Herodes re nak tixrak qtin sa' xben

⁶ Nak laj Pilato quirabi nak que'xpatz' Galilea, quixpatz' reheb: —¿Ma Galilea xtenamit li cujnk a'in? chan reheb. ⁷ —Aj Galilea, chanqueb re. Nak laj Pilato quixnau nak li Jesús quichal chak sa' li na'ajej li cuan rubel xtakl laj Herodes, quixtakla riq'uin laj Herodes xban nak sa' eb li cutan a'an laj Herodes cuan aran Jerusalén. ⁸ C'ajo' nak quisaho' xch'ol laj Herodes nak quiril ru li Jesús xban nak ac junxil quiraj raj rilbal ru. Quirabi resil li c'a'ru yo chixbanunquil li Jesús ut quiraj rilbal nak tixbanu junak milagro chiru. ⁹ Nabal li c'a'ak re ru quilajxpatz' re ut li Jesús chi tic inc'a' quichak'oc. ¹⁰ Cuanqueb aran eb li xbenil aj tij ut eb laj tz'ib. C'ajo' lix josk'ileb nak yoq'ueb chixjitbal. ¹¹ Laj Herodes ut eb li soldado que'xtz'ektana ut que'xhob. Que'retz'u ut que'xq'ue li chabil t'icr chirix jo' neque'rocsi li rey. Ut laj Herodes quixtakla cui'chic riq'uin laj Pilato. ¹² Junxil xic' que'ril ribeb laj Herodes ut laj Pilato. Abanan sa' eb li cutan a'an que'xc'am cui'chic rib sa' usilal.

Laj Pilato quixye nak mac'a' xmac li Jesús abanan quitenebq'c q'c'c sa' xben

¹³ Ut laj Pilato quixch'utubeb li xbenil laj tij, ut eb li neque'taklan sa' li tenamit jo'queb ajcui' chixjunileb li tenamit. ¹⁴ Quixye reheb: —Laex xec'am chak li cujnk a'in cuiq'uin ut xeye nak naxpo' xch'oleb li tenamit. Lain xinpatz'i re cheru ut inc'a' xintau junak xmac jo' yoq'ueb chixyebal laex. ¹⁵ Chi moco laj Herodes xtau junak xmac. Jo'can nak xtakla cui'chic chak arin cuiq'uin. Anakcuan lain ninnau nak ma jun mac xbanu xc'ulub cui' camc. ¹⁶ Tintakla xq'uebal xlob, tojo'nak tinc'uch'ab, chan laj Pilato. ¹⁷ Sa' li nink'e a'an c'aynakeb nak na-ach'abac junak li prex. ¹⁸ Ut chixjunileb li tenamit que'xye chi junajeb xyab xcuxeb: —¡Camsi a'an, ut ach'ab laj Barrabás! chanqueb. ¹⁹ Laj Barrabás cuan sa' tz'alam xban li camsinc quixbanu nak yoq'ueb chi pletic li tenamit chirix li acuabej. ²⁰ Laj Pilato quiraj raj rach'abanquil li Jesús ut quixpatz' cui'chic reheb ma taruj tarach'ab li Jesús. ²¹ Abanan eb li tenamit que'xjap reheb chixyebal: —¡Q'ue chiru cruz! ¡Q'ue chiru cruz! chanqueb. ²² Ut laj Pilato quiatinac cui'chic rox sut riq'uineb ut quixye: —¿C'a'ru tz'alak xmac ere? Ma jun xmac nintau lain re nak tintakla

chi camsic. Lain tintakla xsac'bal ut tincuach'ab, chan reheb. ²³ Abanan eb a'an k'axal cau cui'chic que'xjap re chixyebal: —¡Q'ue chiru cruz!— Japjoqueb re li tenamit jo' eb ajcui' laj tij toj retal quixbanu laj Pilato li c'a'ru que'raj. ²⁴ Ut laj Pilato quixteneb camc sa' xben li Jesús jo' que'raj li tenamit. ²⁵ Ut quirach'ab laj Barrabás li quiq'uehe' sa' tz'alam xban li pletic ut camsinc quixbanu chirix jun li acuabej. Ut quixk'axtesi li Jesús sa' ruk'eb re te'xbanu li c'a'ru te'raj riq'uin.

Li Jesús quiq'uehe' chiru cruz

²⁶ Eb li tenamit que'xc'am li Jesús ut nak yoqueb chi xic que'xc'ul jun li cujnk aj Simón xc'aba' yo chi chalc sa' c'alebál. Cirene lix tenamit. Ut que'xmin ru chixpakonquil li cruz re xtenk'anquil li Jesús. ²⁷ Nabaleb li tenamit yoqueb chi takenc re. Ut cuanqueb ajcui' ixk k'axal ra sa' xch'oleb. Yoqueb chi yabac xban li c'a'ru yo chixc'ulbal li Jesús. ²⁸ Ut li Jesús quixsuk'isi rib ut quirileb li ixk. Quixye reheb: —Ex ixk aj Jerusalén, mexyabac chicuix lain. Chexyabak ban cherix laex ut chirixeb ajcui' le ralar ec'ajol. ²⁹ Tacuulak xk'ehil nak eb li tenamit a'in te'xye, “Us xak reheb li ixk li inc'a' neque'q'uiresin ut li inc'a' neque'tu'resin.” ³⁰ Ut te'xye ajcui' reheb li tzul, “T'anekek chak sa' kaben ut choemuk taxak”, cha'keb. ³¹ Cui jo'ca'in te'xbanu cuiq'uin lain li chanchanin jun ton chi che' rax rax ru, ¿c'a'ru inc'a' te'xbanu ere laex li chanchanex chaki che'? chan li Jesús. ³² Que'xc'am ajcui' rochben li Jesús cuibeb li cujnk li cuanqueb xmac re te'camsik rochben li Jesús. ³³ Ut que'cuulac sa' li na'ajej Gólgota xc'aba'. Chi jalbil ru naraj naxye: Xna'aj Xbakel Xjolom Camenak. Ut aran que'xq'ue chiru cruz li Jesús. Ut que'xq'ue ajcui' chiru cruz li cuib chi cujnk li cuanqueb xmac. Jun li cruz que'xq'ue sa' xnim uk' li Jesús ut li jun chic que'xq'ue sa' tzt'e. ³⁴ Ut li Jesús quitjoc ut quixye: —At in Yucua', cuy taxak xmaqueb li tenamit a'in xban nak inc'a' neque'xnau c'a'ru yoqueb chixbanunquil, chan. Ut eb li soldado que'bolic chirix li rak' re rilbal ani na tachechanink re. ³⁵ Eb li tenamit xakxoqueb aran chi iloc. Ut eb li neque'taklan sa' xbeneb li tenamit yoqueb chixhobbal li Jesús ut que'xye: —Jalan chic quixcoleb. Cui yal nak a'an li Cristo, li sic'bil ru xban li Dios, chicolak rib xjunes, chanqueb. ³⁶ Ut eb li soldado yoqueb ajcui' chixhobbal. Que'jiloc chixc'atk ut que'xyechi'i vinagre re. ³⁷ Ut que'xye re: —Cui yal nak laet lix reyeb laj judío, col acuib ajunes, chanqueb. ³⁸ Chiru li cruz que'xq'ue jun retalil tz'ibanbil sa' eb li atinobal griego, hebreo, ut latin, li naxye chi jo'ca'in:

A'an a'in lix reyeb laj judío.

³⁹ Jun reheb laj mac li que'q'uehe' chiru cruz rochben, quixhob ajcui' li Jesús ut quixye: —Cui laet li Cristo, col acuib laet, ut choacol ajcui' lao, chan re.

⁴⁰ Abanan li jun chic quichak'oc ut quixk'us ut quixye re: —Chi moco laet nacaxucua ru li Dios, usfa juntak'et li raylal li yoco chixc'ulbal kochben a'an. ⁴¹ Relic chi yal nak lao kac'ulub xc'ulbal li raylal a'in xban nak lao can kamac. Abanan li cujnk a'in mac'a' junak mac xbanu, chan re. ⁴² Ut li cujnk a'an quixye ajcui' re li Jesús: —At Kacua', chinjulticok' taxak acue nak tat-oc sa' la nimajcual cuanquilal, chan. ⁴³ Ut li Jesús quixye re: —Relic chi yal tinye acue nak hon ajcui' cuankat cuiq'uin sa' li paraiso, chan re.

Lix camic li Jesús

⁴⁴ Tuktu cua'leb quik'ojyino' sa' chixjunil li ruchich'och' ut toj sa' oxib or re ecuu quicutano' cui'chic. ⁴⁵ Nak quik'ojyino' ru li sak'e, lix t'icrul li templo

quik'iche' sa' xyi. ⁴⁶ Quiatinac li Jesús chi cau xyab xcux ut quixye: —At inYucua', sa' acuuk' tink'axtesi lin musik', chan. Nak quixye a'an, qui-el xch'ol. ⁴⁷ Li capitán aj Roma quixq'ue retal li quic'ulman. Quixlok'oni li Dios ut quixye: —Relic chi yal nak li cujnk a'in tjc xch'ol, chan. ⁴⁸ Chixjunileb li q'uila tenamit li cuanqueb aran chi iloc, que'xq'ue retal li c'a'ru quic'ulman. Que'suk'i sa' rochocheb ut yoqueb chixtenbal li re xch'ol chi ruk'eb nak yoqueb chi xic xban xrahil xch'oleb. ⁴⁹ Ut chixjunileb li neque'na'oc ru li Jesús, jo' eb ajcui' li ixk li que'taken chak re toj Galilea xakxoqueb chak chi najt ut yoqueb chirilbal chixjunil li c'a'ak re ru a'in.

Quimuke' li Jesús xban laj José aj Arimatea

⁵⁰ Quicuan jun li cujnk aj José xc'aba'. Arimatea xtenamit li cuan sa' xcuent Judea. Laj José, a'an jun xcomoneb li neque'taklan sa' xbeneb laj judío. Tjc xch'ol ut chabil. ⁵¹ Inc'a' quixc'ul xch'ol li c'a'ru que'xc'ub ru xbanunquil re li Jesús, chi moco quixc'ul xch'ol nak que'xcamsi xban nak a'an yo chixyo'oninguil lix nimajcual cuanquial li Dios. ⁵² Co riq'uin laj Pilato ut quixtz'ama chiru nak tixq'ue re lix tz'ejcual li Jesús re tixmuk. ⁵³ Jo'can nak quixcubsi chak li camenak chiru cruz, quixlan sa' li chabil t'icr lino ut quixq'ue sa' jun muklebal yibanbil sa' jun sakonac. Toj ma jun mukbil aran. ⁵⁴ Chixjunil a'in quic'ulman sa' li cutan nak neque'xcauresi li c'a'ru reheb re li hilobal cutan xban nak ac cuulac re xcutanquil. ⁵⁵ Eb li ixk, li que'taken chak re li Jesús toj Galilea, que'xtake laj José ut que'ril li muklebal li quimuke' cui' li camenak ut que'ril ajcui' chanru nak quiq'uehe' sa' li jul. ⁵⁶ Que'suk'i sa' rochocheb ut que'xcauresi li sununquil ban re xbanbal li camenak, ut que'hilan sa' li hilobal cutan jo' naxye sa' lix chak'rabeb.

24

Li Jesús quicuacli cui'chic chi yo'yo sa' xyankeb li camenak

¹ Sa' li xben li cutan re li xaman, toj ek'ela chi us, coeb li ixk cuan cui' li muklebal. Que'xc'am li sununquil ban li que'xyjb. Ut cuanqueb jalaneb chic ixk rochbened. ² Nak que'cuulac, que'ril nak ac isinbil chic li nimla pec li natz'apoc re li muklebal. ³ Ut nak que'oc chi sa' li muklebal, inc'a' que'xtau li camenak. ⁴ Que'sach xch'oleb ut inc'a' que'xnau c'a'ru te'xbanu. Ut xakamil chiruheb cuib li cujnk. Nalemzt'un li rak'eb. ⁵ C'ajo' nak que'xucuacl li ixk. Que'xxulub li rilobal. Ut eb li cujnk que'xye reheb: —¿C'a'ut nak nequesic' li yo'yo sa' xyankeb li camenak? ⁶ A'an ma ani chic arin. Ac xcuaclicui'chic chi yo'yo. Chijulticok' ere li c'a'ru quixye chak nak toj cujnk chak Galilea. ⁷ Quixye nak tento tak'axtesik li C'ajolbej sa' ruk'eb li cujnk aj mac. Taq'uehek' chiru cruz ut tacamsik. Ut quixye ajcui' nak tacuaclik cui'chic chi yo'yo sa' xyankeb li camenak sa' rox li cutan, chanqueb. ⁸ Riq'uin a'an quinak sa' xch'oleb li ixk li c'a'ru quixye li Jesús. ⁹ Que'el sa' li muklebal ut coeb. Cole'xye resil chixjunil li c'a'ak re ru a'in reheb li junlaju ut reheb ajcui' li jun ch'ol chic. ¹⁰ Eb li ixk li que'yehoc re li esilal a'in reheb li apóstol, a'an eb lix María Magdala xtenamit, lix Juana ut lix María lix na' laj Jacobo rochbened li jun ch'ol chic li ixk. ¹¹ Abanan eb li junlaju chi apóstol inc'a' que'xpab li c'a'ru que'xye li ixk. Sa' xch'oleb a'an nak moco yal ta li yoqueb chixyebal. ¹² Abanan laj Pedro co sa' anil sa' li muklebal. Qui-iloc chi sa' ut quiril nak ca'aj chic li t'icr lino cuan aran. Jo'can nak sachso xch'ol chi c'oxlac nak quisuk'i sa' rochoch.

Li Jesús quixc'utbesi rib chiruheb li cujnk nak yoqueb chi xic Emaús

¹³ Sa' ajcui' li cutan a'an, cuibeb lix tzolom li Jesús yoqqueb chi xic sa' li ch'ina tenamit Emaús. Li tenamit a'an junlaju kilómetro na xnajtil riq'uin Jerusalén. ¹⁴ Yoqqueb chi atinac chi ribileb rib chirix chixjunil li c'a'ak re ru quic'ulman sa' eb li cutan a'an. ¹⁵ Nak yoqqueb chi atinac ut chixtz'ilbal rix chi ribileb rib li c'a'ru quic'ulman, li Jesús quijiloc riq'uineb ut qui-oc chi bec rochbened. ¹⁶ Usta que'ril ru, abanan inc'a' que'xnau nak a'an li Jesús xban nak cuan c'a'ru quiramoc re chiruheb. ¹⁷ Ut li Jesús quixye reheb: —¿C'a'ru chi aj ix yoquex chi serak'ic chi ribil erib nak yoquex chi bec? ¿C'a'ut nak ra sa' ech'ol? chan reheb. ¹⁸ Jun reheb a'an, aj Cleofas xc'aba', quichak'oc ut quixye: —Jo' li ca'aj cui' laa't li yocat chi numec' sa' li tenamit Jerusalén li inc'a' nacatna'oc re li c'a'ru xc'ulman sa' eb li cutan a'in, chan. ¹⁹ Ut li Jesús quixye reheb: —¿C'a'ru anchal a'an? chan. Eb a'an que'xye re: —Chirix li Jesús aj Nazaret. A'an profeta nak quicuan. Nim xcuanquil. Chabil quixbanu ut chabil quixye chiru li Dios ut chiruheb li tenamit. ²⁰ Eb li xbenil aj tij ut eb li neque'taklan sa' kaben que'xk'axtesi chi camsic ut que'xq'ue chiru cruz. ²¹ A'an raj li taçolok re li katenamit Israel sa' kach'ol. Abanan anakuan ac oxib cutan xc'ulbal a'an. ²² Xsach kach'ol chirabinquil li c'a'ru xe'x'ye ke li ixk li xe'cuulac sa' li muklebäl toj ek'ela. ²³ Xban nak inc'a' xe'xtau li camenak, xe'suk'i sa' cab ut xe'x'ye ke nak cuib li ángel xe'xc'utbesi rib chiruheb ut xe'x'ye reheb nak yo'yo li Jesús. ²⁴ Ut cuanqueb ajcui' kacomon xe'cuulac chak sa' li muklebäl ut xe'ril nak yäl li xe'x'ye li ixk. Abanan inc'a' xe'ril ru li Jesús, chan laj Cleofas. ²⁵ Ut li Jesús quixye reheb: —¡Laex mac'a' ena'leb ut al le ch'ol chixpabanquil chixjunil li c'a'ru que'x'ye chak li profeta! ²⁶ ¿Ma inc'a' ta bi' tento nak tixc'ul chixjunil li raylal a'in li Cristo laj Colonel li yechi'inbil xban li Dios re nak taq'uehek' xlok'al? chan reheb. ²⁷ Ut quixch'olob xyälal chiruheb chirix li c'a'ru quixtz'iba laj Moisés. Quixch'olob ajcui' li xyälal li que'xtz'iba chak li profeta chirix li Cristo li yechi'inbil xban li Dios jo' tz'ibanbil sa' li Santil Hu. ²⁸ Que'cuulac sa' li ch'ina tenamit li yoqqueb cui' chi xic. Ut li Jesús quixbanu rib nak tjc taxic. ²⁹ Abanan eb a'an que'relaji ru re taçanak riq'uineb. Que'x'ye re: —Canakat kiq'uin xban nak yo' chi ecuç. Oc re li k'o'jyïn, chanqueb re. Ut li Jesús qui-oc sa' cab ut quicana riq'uineb. ³⁰ Nak c'o'jc'o sa' mex rochbened, quixchap li caxlan cua, quixbantioxi chiru li Dios, quixjachi ut quixq'ue reheb. ³¹ Sa' li honal a'an que'xq'ue retal nak a'an li Jesús. Ut nak ac xe'xnau nak a'an, nak que'ril ac ma ani chic sa' xyankeb. ³² Ut eb a'an que'x'ye chi ribileb re: —Jo'can pe' nak yoco chak rec'anquil jun sahil ch'olej sa' kam nak yo' chak chikatanquil sa' be ut nak yo' chixch'olobanquil chiku li naxye sa' li Santil Hu, chanqueb. ³³ Sa' ajcui' li honal a'an que'suk'i Jerusalén. Aran que'xtau li junlaju chi apóstol ch'utch'uqqueb rochbened lix comon. ³⁴ Yoqqueb chixyebal: —Relic chi yäl nak xcuacü cui'chic chi yo'yo li Kaçua' xban nak xc'utbesi rib chiru laj Simón, chanqueb. ³⁵ Tojo'nak li cuib chi cujnk que'xserak'i reheb li c'a'ru quic'ulman sa' be nak yoqqueb chi xic Emaús. Que'x'ye reheb chanru nak que'xnau ru li Jesús nak quixjachi li caxlan cua.

Li Jesús quixc'utbesi rib chiruheb lix tzolom

³⁶ Toj yoqqueb ajcui' xserak'inquil li c'a'ru que'xc'ul nak ac xakamil li Jesús sa' xyankeb ut quixye reheb: —¡Chicuank taxak li tuktuquil usilal eriq'uin! chan reheb. ³⁷ Ut eb a'an sachsoqqueb xch'ol que'cana ut te'xucuak. Sa' xch'oleb a'an nak mare junak musik'ej yoqqueb chirilbal. ³⁸ Ut li Jesús quixye reheb: —¿C'a'ut nak nequexxucuac? Ut, ¿c'a'ut nak na-oc ec'a'ux? ³⁹ Lajin li

Jesús. Ilomak li cuok ut li cuuk'. Ch'e'omakin re nak teq'ue retal nak lain tz'akal. Junak musik'ej, a'an maç'a' xbakel, chi moco cuan xtibel. Ilomak. Lain cuan inbakel ut cuan intibel, chan reheb. ⁴⁰ Ut nak yo chixyebal a'in, quixc'ut li rok ut li ruk' chiruheb. ⁴¹ C'ajo' nak quisaho' sa' xch'oleb. Abanan toj sachsoqheb xch'ol. Inc'a' que'xnau ma yal li yoqheb chirilbal malaj ut inc'a'. Ut li Jesús quixye reheb: —¿Ma cuan ca'ch'inak tzacaemk eriq'uin? chan reheb. ⁴² Ut que'xq'ue re jun jachal li pombil car ut ca'ch'in li xya'al cab. ⁴³ Li Jesús quixc'ul ut quixtzaca. ⁴⁴ Ut quixye reheb: —Li c'a'ru xinc'ul, a'an ajcui' li quinserak'i chak ere nak toj cuanquin chak sa' eyank. Tento nak taz'aklok ru chixjunil li tz'ibanbil chak retalil chicuix sa' lix chak'rab laj Moisés, jo' ajcui' sa' lix hu eb li profeta ut sa' ajcui' li Salmos, chan reheb. ⁴⁵ Ut quixq'ueheb xna'leb re nak te'xtau ru li tz'ibanbil sa' li Santil Hu. ⁴⁶ Quixye reheb: —Jo'ca'in tz'ibanbil chak retalil sa' li Santil Hu chicuix lain: tento nak li Cristo tixc'ul li raylal ut sa' rox li cutan taçuaclik cui'chic chi yo'yo sa' xyankeb li camenak. ⁴⁷ Tz'ibanbil ajcui' retalil nak tajulticamank chiruheb chixjunileb li tenamit nak tento te'xyot' xch'oleb ut te'xjal xc'a'uxeb re taçuymank taşachmank lix maqheb sa' xc'aba' a'an. Taticlak xch'olobanquil arin Jerusalén. ⁴⁸ Laex texyehok resil xban nak laex xex-abin re ut laex xex-iloc re chixjunil li c'a'ak re ru a'in. ⁴⁹ Ut lain tintakla chak ere le mañan li quixyechi'i lin Yucua'. Abanan canakex arin sa' li tenamit Jerusalén toj teç'ul le cuanquil li taçhalk sa' choxa, chan li Jesús reheb.

Li Jesucristo quic'ame' cui'chic sa' choxa xban li Dios

⁵⁰ Ut li Jesús quixc'ameb toj sa' li tenamit Betania. Quixtaksi li ruk' ut quirosobtesihieb. ⁵¹ Nak yo chirosobtesinquileb, quirisi rib sa' xyankeb ut quic'ame' takec' sa' choxa. ⁵² Nak ac xe'xlok'oni li Kaçua', eb a'an que'suk'i cui'chic Jerusalén chi c'ajo' xsahil sa' xch'oleb. ⁵³ Ut junelic cuanqueb sa' li templo. Yoqheb chi bantioxinc ut yoqheb chixlok'oninquil li Dios. Jo'can taxak.

Li Resil li Colba-ib li Quixtz'iba li San Juan

Li Jesucristo quitz'ejcualo' ut quic'ulun sa' ruchich'och'

¹ Chalen chak sa' xticlajic li ruchich'och' ac cuan chak li Atin. Li Atin cuan chak riq'uin li Dios ut a'an tz'akal Dios. Li Atin, a'an li Cristo. ² Li Cristo ac cuan chak sa' xticlajic riq'uin li Dios. ³ Chixjunil li c'a'ru cuan, li Dios quixyib sa' xc'aba' li Cristo. Ut mac'a' c'a'ak re ru cuan chi macua' a'an ta li quiyiban re. ⁴ Li Cristo, a'an li naq'uehoc junelic yu'am. Ut li yu'am li naxq'ue naxcutanobresi lix c'a'uxeb li cristian. ⁵ Li Cristo naxcutanobresi lix c'a'uxeb li toj cuanqueb sa' xk'o'jyinal ru li mac. Li mac inc'a' quinumta sa' xben li Cristo. ⁶ Quicuan jun li cujnk aj Juan xc'aba' taklanbil chak xban li Dios. ⁷ Quitaklac chak chixch'olobanquil xyalal nak li Jesús, a'an li cutan saken re nak chixjunileb li ani te'abink re, te'pabank. ⁸ Li Cristo, a'an li tz'akal cutan saken. Macua' laj Juan. Laj Juan quic'ulun chixch'olobanquil xyalal ani li tz'akal cutan saken. ⁹ A'an li tz'akal cutan saken li quic'ulun sa' ruchich'och' chixcutanobresinuil xc'a'uxeb chixjunileb li cristian. ¹⁰ Li Cristo quicuan sa' ruchich'och'. Abanan li cuanqueb sa' ruchich'och' inc'a' que'xq'ue retal chi tz'akal nak a'an li Cristo usta sa' xc'aba' a'an quiyibac li ruchich'och'. ¹¹ Quic'ulun sa' lix tenamit. Abanan inc'a' quic'ule' sa' xyalal xbaneb. ¹² Abanan chixjunileb li que'c'uluc re ut que'paban re nak a'an taklanbil chak xban li Dios, a'aneb li quixc'uleb chok' ralal xc'ajol li Dios. ¹³ Que'oc chok' ralal xc'ajol li Dios xban nak jo'can quiraj li Dios. Moco yal xc'a'ux cujnk ta. Moco jo' ta nak nayo'la junak cristian arin sa' ruchich'och'. Yo'lajenakeb ban chic sa' musik'ej ut ralal xc'ajoleb chic li Dios. ¹⁴ Li Jesucristo quitz'ejcualo' ut tz'akal cujnk nak quicuan arin sa' kayank. C'ajo' li rusilal ut a'an naxc'ut li xyalal. A'an li Ralal li Dios li junaj chi ribil ut lao xkil lix lok'al. ¹⁵ Laj Juan laj Cubsihom Ha' quixch'olob xyalal chi cau xyab xcux ut quixye: —A'an a'in li quinch'olob chak xyalal cheru nak quinye ere: Mokon tachalk jun k'axal nim xcuanchil chicuu lain xban nak a'an ac cuan ajcui' chak junxil chicuu lain, chan. ¹⁶ Xban xnimal rusilal, k'axal numtajanek li kosobtesinuil naxq'ue. ¹⁷ Li Dios quixq'ue li chak'rab re laj Moisés re nak tixc'ut chiku. Aban li xyalal chirix li Dios ut li rusilal quixc'utbesi chiku li Jesucristo. ¹⁸ Ma ani qui-iloc ru li Dios. Ca'aj cui' li Dios C'ajolbej, a'an tz'akal li cuan chi sum atin riq'uin li Dios Acuabej. Ut a'an li quic'utbesin chiku chanru li Dios.

Laj Juan laj Cubsihom Ha' quixye nak a'an macua' li Cristo li yechi'inbil xban li Dios

¹⁹ Eb laj judío li cuanqueb Jerusalén que'xtaklaheb laj tij ut eb laj levita chixpatz'bal re laj Juan, ut que'xye re: —¿Anihat laät? ¿Ma laät li Cristo li taklanbil chak xban li Dios? chanqueb re. ²⁰ Quichak'oc laj Juan ut quixye reheb: —Lain macua'in li Cristo, chan. ²¹ Ut que'xye cui'chic re: —Ye ke anihat laät. ¿Ma laät laj Elías?— Quichak'oc laj Juan ut quixye: —Moco lain ta, chan. —¿Ma laät li profeta li tachalk? chanqueb cui'chic re. —Inc'a', chan laj Juan. ²² —Ye ke chi tz'akal anihat re nak taruk takaye reheb li xe'taklan chak ke. Tento nak taye ke anihat, chanqueb. ²³ Quixye laj Juan: —Lain li yoquin chixch'olobanquil li xyalal chiruheb li cristian chi cau xyab incux sa' li chaki ch'och' ut ninye resil li quixye li profeta Isaías:

Yibomak le yu'am ut yo'on cuan̄kex chixc'ulbal li Ka'cua' jo' nak neque'xyjib li be re xc'ulbal junak li nim xcuanguil. (Is. 40:3)

²⁴ Li que'taklac chi atinac riq'uin laj Juan, a'an xcomoneb laj fariseo.

²⁵ Que'xye cui'chic re laj Juan: —¿C'a'ut nak nacatcubsin ha' cui ma'cua' la'at li Cristo, chi moco la'at laj Elías, chi moco la'at li profeta? chanqueb re laj Juan.

²⁶ Quichak'oc cui'chic laj Juan ut quixye: —Lain nincubsin ha' riq'uin ha'. Abanan cuan jun sa' eyank laex inc'a' nequenau chi tz'akal ani a'an. ²⁷ A'an li taoc chi c'anjelac mokon. K'axal nim xcuanguil a'an chicuu lain. Moco inc'ulub ta xbanunquil lix c'anjel a'an xban nak cubenak incuanquil. Jo'can nak moco inc'ulub ta xhitbal xc'amal lix xab, chan. ²⁸ Chixjunil a c'a'ak re ru a'in quic'ulman sa' li na'ajej Betania li cuan jun pac'al li nima' Jordán, li yo cui' chi cubsinc ha' laj Juan.

Laj Juan quixjuntak'eta li Jesús riq'uin jun li carner

²⁹ Jo' cuulajak chic laj Juan quiril li Jesús yo chak chi chalc riq'uin ut quixye: —Ilomak. Cue' chak li Cristo, li taklanbil chak xban li Dios. Chanchan jun li carner. Taçamsik re xtojbal rix lix ma'queb li cuanqueb sa' ruchich'och'.

³⁰ A'an a'in li quingatinac chak chirix nak quinye ere nak taçalk jun cujnk k'axal nim xcuanguil chicuu lain xban nak a'an ac cuan ajcui' chak junxil chicuu lain. ³¹ Lain inc'a' ninnau nak a'an li Cristo. Abanan yoqin chi cubsinc ha' re nak li Dios tixc'utbesi chiku lao aj Israel ani tz'akal li Cristo, chan. ³² Laj Juan quixch'olob xyalal li c'a'ru quiril. Quixye: —Quicuul nak li Santil Musik'ej quicube chak sa' choxa. Chanchan jun li paloma nak quicube ut quihilan sa' xben li Jesús. ³³ Inc'a' raj xinnau nak a'an li Cristo cui ta inc'a' quicuul li quic'ulman. Xinnau nak a'an li Cristo xban nak li Dios li quitaklan chak cue chi cubsinc ha' quixye cue, “Nak taçuil li Santil Musik'ej chanchan jun li paloma yok chi cubec ut tahilank sa' xben jun li cujnk, a'an retail nak a'an li taç'uehok ere li Santil Musik'ej”, chan li Dios. ³⁴ Ut lain quicuul nak quicube chak li Santil Musik'ej sa' xben li Jesús. Jo'can nak ninnau chi tz'akal nak a'an tz'akal Lalal li Dios, chan laj Juan.

Laj Andrés ut laj Simón, a'aneb li xben li quixsiq'ueb ru chok' xtzolom li Jesucristo

³⁵ Jo' cuulajak chic laj Juan cuan cui'chic chire li nima' Jordán rochben cuibeb lix tzolom. ³⁶ Nak quiril li Jesús yo chi numec' nach' cuanqueb cui', laj Juan quixye: —Cue' chak li Cristo, li chanchan Carner q'uebil chak xban li Dios, chan. ³⁷ Ut eb lix tzolom cuib, nak que'rabi li quixye laj Juan, que'xtake li Jesús. ³⁸ Li Jesús quixakli ut quixsuk'isi rib. Quiril nak yo'queb chi xic chirix. Quixye reheb: —¿C'a'ut nak yo'queb chintakenquil? ¿C'a'ru teraj? chan reheb. Que'chak'oc eb a'an ut que'xye: —At tzolonel çbar nacathilan? chanqueb re. ³⁹ Quichak'oc li Jesús ut quixye reheb: —Yo'keb chicuix re nak tenau bar ninhilan, chan li Jesús reheb. Jo'can nak que'coeb chirix ut que'ril bar nahilan. Ut que'cana riq'uin xban nak ac cahib or chic re ecuu. ⁴⁰ Laj Andrés li ritz'in laj Simón Pedro, a'an jun reheb li cuib li que'abin re li c'a'ru quixye laj Juan ut que'xtake li Jesús. ⁴¹ Nak ac x-atinac riq'uin li Jesús, ticto co laj Andrés riq'uin laj Simón ut quixye re: —Anakuan xkatau li Mesías, chan. (Chi jalbil ru naraj naxye “li Cristo li taklanbil chak xban li Dios”). ⁴² Ut quixc'am laj Simón riq'uin li Jesús. Li Jesús quiril a'an ut quixye re: —La'at laj Simón li ralal laj Jonás. Anakuan Pedro chic aç'aba'.— (Chi jalbil ru naraj naxye “Pec”).

Laj Felipe ut laj Natanael que'siq'ue' ru xban li Jesucristo

⁴³ Jo' cuulajak chic li Jesús quiraj xic sa li na'ajej Galilea. Quixtau laj Felipe ut quixye re: —Chinatake, chan. ⁴⁴ Laj Felipe, a'an Betsaida xtenamit. A'an ajcui' xtenamiteb laj Andrés ut laj Pedro. ⁴⁵ Laj Felipe ticto cō chixsic'bal laj Natanael ut quixye re: —Xkatau li Mesías li tz'jbanbil chak retalil sa' li chak'rab xban laj Moisés ut xbaneb li profeta. A'an li Jesús ratalaj laj José. Nazaret xtenamit, chan laj Felipe. ⁴⁶ Laj Natanael quixye re: —¿Ma cuan ta bi' junak chābil tachaik chak Nazaret? chan. Ut laj Felipe quixye re: —Yo'o rilbal re nak tapab, chan. ⁴⁷ Li Jesús quiril nak laj Natanael yo chak chi chalc riq'uin ut quixye: —Cue' chak jun cuink tz'akal aj Israel. Chābil xna'leb. A'an inc'a' nabalak'ic, chan li Jesús. ⁴⁸ Laj Natanael quixye re li Jesús: —¿Chanru nacanau nak chābil inna'leb? chan. Li Jesús quichak'oc ut quixye re: —Xinnau chanru ana'leb nak cuancat rubel li jun ton chi higo nak toj maji' nacatxbok laj Felipe, chan. ⁴⁹ Quichak'oc laj Natanael ut quixye re: —At tzolonel, laāt li Ralal li Dios. Laāt lix Reyeb laj Israel, chan re li Jesús. ⁵⁰ Li Jesús quixye re: —Xapab nak lain li Cristo xban nak xinye acue nak xinnau chanru la na'leb nak cuancat rubel li jun ton chi higo. Abanan toj cuan cui'chic xninkal ru na'leb talajacuil chiru a'in, chan li Jesús. ⁵¹ Ut quixye ajcui' reheb: —Relic chi yal tinye ere nak teril li choxa chi teto. Ut eb lix ángel li Dios yokeb chi takec' ut yokeb chi cubec cuanquin cui' lain li C'ajolbej, chan li Jesús reheb.

2

Li Jesús quixc'utbesi lix cuanquil nak quixsuk'isi li ha' chok' vino sa' jun li sumlac

¹ Yo chic rox cutan xc'ulbal a c'a'ak re ru a'in nak quicuan jun li sumlac sa' li tenamit Caná re Galilea. Cuan lix na' li Jesús aran. ² Ut quiboke' sa' li sumlac li Jesús rochbeneb lix tzolom. ³ Nak ac yo li nink'e, qui-oso' li vino. Ut lix na' li Jesús quixye re: —Mac'a' chic li vino, chan re. ⁴ Ut li Jesús quixye re: —¿C'a'ut nak nacatchal xyebal cue a'an? Toj maji' xk'ehil nak tinc'utbesi lin cuanquil, chan re lix na'. ⁵ Lix na' li Jesús quixye reheb li yoqueb chi c'anjelac: —Chebanuhak li c'a'ru tixye ere, chan. ⁶ Ut aran cuanqueb cuakib li ninki cuc yibanbil riq'uin pec. A'an nac'anjelac chok' xna'aj xha'eb laj judío re xch'ajobresinquil ribeb jo' naxye sa' lix chak'rabeb. Li junjunk chi cuc a'an naxc'am oxib ninki cuc chi ha'. ⁷ Li Jesús quixye reheb li yoqueb chi c'anjelac aran nak te'xnujtesi li ninki cuc riq'uin ha'. Ut eb a'an que'xq'ue li ha' sa' li cuc toj retal que'nujac. ⁸ Quixye cui'chic li Jesús reheb: —Lecomak ca'ch'inak ut tec'am riq'uin li najolomin re li nink'e, chan. Ut eb a'an que'xbanu jo' quiyehé' reheb xban li Jesús. ⁹ Li ha' ac suk'isinbil chok' vino xban li Jesús nak que'xc'am riq'uin li najolomin re li nink'e. A'an inc'a' quixnau bar ta xchal li vino. Ca'aj cui' eb laj c'anjel li que'lecoc chak re que'xnau. Li najolomin re li nink'e quixyal li vino. Tojo'nak quixbok li belomej ut quixye re: ¹⁰ —Chixjunileb li neque'nink'e'ic xben cua neque'xjec' li chābil vino. Ut nak ac xe'uc'ac chi nabal li ula', neque'xjec' li inc'a' mas chābil. Abanan laāt xac'ula li chābil vino ut toj anakuan xacuisi chak, chan re. ¹¹ A'an a'in li xben milagro li quixbanu li Jesús nak quixsuk'isi li ha' chok' vino aran Caná re Galilea. Riq'uin li milagro a'in quixc'utbesi nak cuan xcuancan ut eb lix tzolom que'xpab nak li Jesús a'an li Ralal li Dios. ¹² Chirix chic a'an cō Capernaum li Jesús rochben lix na' ut eb li ritz'in. Que'coeb ajcui' lix tzolom ut que'cana aran cuib oxib cutan.

Li Jesús quirisiheb laj c'ay sa' li templo

¹³ Nak ac yō chi cuulac xk'ehil li Pascua, lix nink'e eb laj judío, li Jesús quicuulac Jerusalén. ¹⁴ Quicuulac sa' li templo ut aran quixtauheb li yoqeb chi c'ayinc boyx, carner ut paloma. Chunchuqeb ajcui' aran laj jalol ru tumin. ¹⁵ Li Jesús quixyib jun lix tz'um riq'uin c'am ut quixyolesiheb. Quirisiheb chixjunileb chirix cab rochbened lix xul. Quixpaji lix tumin eb laj jalol ru tumin ut quixbalk'usi lix mexeb. ¹⁶ Quixye reheb li yoqeb chi c'ayinc paloma: —Isihomak chixjunil a'in sa' li templo. Mesuk'isi chök' c'ayil li rochoch lin Yucua', chan li Jesús reheb. ¹⁷ Tojo'nak quinak sa' xch'oleb lix tzolom nak tz'ibanbil retalil sa' li Santil Hu li naxye chi jo'ca'in: Lain ninra la cuochoch ut naraho' sa' inch'ol nak neque'xbanu li inc'a' us sa' la cuochoch. (Sal. 69:9) ¹⁸ Ut eb laj judío que'xye re li Jesús: —¿C'a'ru retalil taç'ut chiku re nak takanau nak cuan acuanquil chirisinguileb sa' li templo? chanqeb re. ¹⁹ Quichak'oc li Jesús ut quixye reheb: —Juc'umak li templo a'in ut chiru oxib cutan tincuaclesi cui'chic chi ac', chan reheb. ²⁰ Eb laj judío que'chak'oc ut que'xye re li Jesús: —Chiru cuakib roxc'al (46) chihab que'cablac re xyibanquil li templo a'in. ¿Ma nacac'oxla laät nak yal chiru oxib cutan taçuaclesi cui'chic? chanqeb. ²¹ Abanan li Jesús inc'a' yō chi atinac chirix li templo. Yō ban chi atinac chirix lix camic ut lix cuaclijic cui'chic chi yo'yo. ²² Jo'can nak ac xcuacli cui'chic chi yo'yo sa' xyankeb li camenak, que'nak sa' xch'oleb lix tzolom li c'a'ru quixye li Jesús nak toj maji' nacam. Ut que'xpab li c'a'ru tz'ibanbil chak najter sa' li Santil Hu ut que'xpab ajcui' li c'a'ru quiyeh'e' reheb xban li Jesús.

Li Jesús naxnau chanru xna'leb li junjunk

²³ Nak li Jesús cuan aran Jerusalén chixnumsinquil li nink'e Pascua, nabaleb que'paban re xban nak que'ril li milagro li quilajxbanu. ²⁴ Abanan li Jesús inc'a' quixc'ojob xch'ol riq'uineb xban nak naxnau chanru lix c'a'uxeb. ²⁵ Inc'a' tento nak taç'h'olobak chiru chanru lix c'a'uxeb xban nak ac naxnau chanru lix na'leb li junjunk.

3

Laj Nicodemo quicuulac chi atinac riq'uin li Jesús

¹ Quicuan jun li cuink aj fariseo aj Nicodemo xc'aba'. A'an xcomoneb li neque'taklan sa' xyankeb laj judío. ² Sa' jun li k'oyjin laj Nicodemo quicuulac chi atinac riq'uin li Jesús ut quixye re: —At tzolonel, lao nakanau nak riq'uin li Dios chalenakat chak chok' aj tzolol ke xban nak ma ani taruk tixbanu li milagros li nacabanu laät cui ta macua' riq'uin xcuanquil li Dios, chan. ³ Quichak'oc li Jesús ut quixye re: —Relic chi yal ninye açue, ma ani naru taoc rubel xnimajcual cuanquilal li Dios cui inc'a' tayo'lak cui'chic xca' sut, chan li Jesús. ⁴ Laj Nicodemo quixye re: —¿Chan ta cui' ru nak tayo'lak cui'chic xca' sut junak cuink? ¿Ma taruk ta bi' taoc cui'chic riq'uin lix na' ut tayo'lak cui'chic xca' sut? chan. ⁵ Quichak'oc li Jesús ut quixye re: —Relic chi yal ninye açue nak ani inc'a' tayo'lak riq'uin ha' ut riq'uin li Santil Musik'ej moco taruk ta taoc rubel lix nimajcual cuanquilal li Dios. ⁶ Li ani yo'lajenak riq'uin lix na' xyucua' cuan xyu'am sa' ruchich'och'. Abanan li ani yo'lajenak riq'uin li Santil Musik'ej cuan xyu'am chi junelic. ⁷ Misach aç'h'ol xban nak xinye açue nak tento tayo'lak cui'chic xca' sut. ⁸ Li ik' nanume' bar naraj chi inc'a' nacanau bar nachal chak chi moco nacanau bar yo chi xic. Inc'a' nacacuil ru. Ca'aj cui' lix yab nacacuabi nak nanume'. Jo'can ajcui' lix yu'ameb li yo'lajenakeb riq'uin li Santil Musik'ej. Cuan xyu'ameb chi junelic chi inc'a' nacanau chi tz'akal chanru, chan li Jesús. ⁹ Quichak'oc

laj Nicodemo ut quixye re: —¿Chanru nak nac'ulman a'in? Inc'a' nintau ru, chan. ¹⁰ Li Jesús quixye re: —Laat aj tzolol reheb laj Israel ut inc'a' nacatau ru li yoquin chixyebal. ¹¹ Relic chi yal ninye ere: Lao nocoatinac chirix li nakanau. Ut nakach'olob resil li c'a'ru nakil. Abanan laex inc'a' nequec'uluban li c'a'ru nakach'olob xyalal cheru. ¹² Laat inc'a' nacapab li c'a'ru ninye acue chirix li c'a'ru nac'ulman sa' ruchich'och'. ¿Ma toja' ta chic tapab nak tinye acue li choxahil na'leb? ¹³ Ma ani quicuulac sa' choxa. Ca'aj cui' lain li C'ajolbej. Lain xinchal chak sa' choxa. ¹⁴ Nak toj cuanqueb laj judío sa' li chaki ch'och', laj Moisés quixtaksi chiru jun che' jun li c'anti' yibanbil riq'uin li ch'ich' bronce. Jo'can ajcui' lain li C'ajolbej. Tento nak tintaksik chiru jun li che', ¹⁵ re nak chixjunileb li te'pabank cue lain inc'a' te'sachk. Te'cuank ban xyu'am chi junelic. ¹⁶ Li Dios c'ajo' nak quixraheb li cuanqueb sa' ruchich'och' nak quixq'ue li Ralal junaj chi ribil re nak chixjunileb li ani te'pabank re inc'a' te'sachk. Taçuank ban xyu'ameb chi junelic. ¹⁷ Li Dios inc'a' quixtakla chak li Ralal sa' ruchich'och' chixtenebanquil li tojba mac sa' xbeneb li cuanqueb sa' ruchich'och'. Quixtakla ban chak re nak sa' xc'aba' a'an te'colek'. ¹⁸ Li ani napaban re, mac'a' li tojba mac sa' xben. Abanan li ani inc'a' napaban re, ac cuan li tojba mac sa' xben xban nak inc'a' xpab li Ralal li Dios, li junaj chi ribil. ¹⁹ Xban nak inc'a' neque'paban, cuan li tojba mac sa' xbeneb. Li C'ajolbej quic'ulun sa' ruchich'och' chixc'utbal li xyalal chiruheb li cuanqueb sa' ruchich'och'. A'an chanchan li cutan. Abanan eb li cuanqueb sa' ruchich'och' k'axal que'raj cuanc sa' xk'o'jyinal ru li mac ut inc'a' que'raj cuanc sa' li cutan xban nak inc'a' us lix na'lebeb. ²⁰ Li ani neque'xbanu li mausilal, xic' neque'ril li xyalal. Inc'a' nacuulac chiruheb cuanc sa' xyalal xban nak inc'a' neque'raj tac'utunk li mausilal neque'xbanu. ²¹ Abanan li ani cuanqueb sa' tiq'uilal, neque'cuulac chiru cuanc sa' xyalal re nak tac'utunk nak neque'xbanu li c'a'ru naraj li Dios, chan li Jesús.

Laj Juan naxch'olob cui'chic xyalal nak li Jesús a'an li Mesías

²² Chirix chic a'in, li Jesús cō sa' li na'ajej Judea rochbeneb lix tzolom. Aran que'cana cuib oxib cutan ut yō chi cubsinc ha'. ²³ Laj Juan laj Cubsihom Ha' yō ajcui' chi cubsinc ha' sa' li na'ajej Enón li cuan nach' riq'uin li na'ajej Salim xban nak aran cuan nabal li ha'. Ut neque'cuulac li cristian riq'uin ut naxcubsi xha'eb. ²⁴ A'in quic'ulman nak toj maji' quiq'uehe' sa' tz'alam laj Juan. ²⁵ Que'oc chixcuech'inquil ribeb lix tzolom laj Juan riq'uinib laj judío. Que'xcuech'i ribeb chirix li cubi ha' li yoqueb chixbanunquil. ²⁶ Que'cuulac lix tzolom laj Juan riq'uin ut que'xye re: —At tzolonel, li cuink li quicuulac acuiq'uin aran jun pac'al li nima' Jordán, li cach'olob chak resil chiku, a'an yō chi cubsinc ha'. Ut chixjunileb li cristian yoqueb chi cuulac riq'uin, chanqueb. ²⁷ Quichak'oc laj Juan ut quixye: —Junak cuink mac'a' c'a'ru tixbanu chi inc'a' ta q'uebil re xban li Dios. ²⁸ Laex querabi ajcui' chak nak quinye nak moco lain ta li Cristo. Yal taklanbilin ban chak xben cua chiru a'an chixch'olobanquil li resilal. ²⁹ Junak cuink xic re chi sumlac cuan li ixakilbej riq'uin. Uf li ramig cuan aran ut nasaho' sa' xch'ol chirabinquil li naxye li belomej. Li Cristo, a'an jo' jun li belomej ut lain yal jo' jun li ramig. Lain nasaho' sa' inch'ol nak yoqueb chi xic li cristian riq'uin xban nak a'an li tz'akal aj Colonel. ³⁰ Tento nak a'an tanimank xcuanquil ut lain tacubek incuanquil, chan laj Juan.

Li xchal chak sa' choxa, a'an li k'axal nim xcuanquil

³¹ Ut quixye ajcui' laj Juan: —A'an xchal chak sa' choxa ut k'axal nim xcuanquil sa' xben chixjunil. Lain quinyo'la sa' ruchich'och' ut rehin ajcui'

li ruchich'och'. Ut ningatinac chirix li c'a'ru nac'ulman sa' ruchich'och'. Li jun li xchal chak sa' choxa, a'an li k'axal nim xcuanquil sa' xben chixjunil. ³² Ut li c'a'ru quiril ut quirabi, a'an li naxch'olob xyalal. Abanan moco q'uiheb ta li neque'paban re li c'a'ru naxye. ³³ Abanan li ani naxpab li c'a'ru naxye, riq'uin a'an naxc'ut nak naxpab nak tz'akal yal li c'a'ru yebil xban li Dios. ³⁴ Li Jesucristo, a'an taklanbil chak xban li Dios ut naxye li c'a'ru nayehe' re xban li Dios xban nak li Santil Musik'ej cuan riq'uin chi tz'akal. ³⁵ Li Acuabej Dios naxra li Lalal ut quixk'axtesi chixjunil sa' ruk' a'an, ut a'an chic yal re sa' xben. ³⁶ Li ani napaban re li C'ajolbej cuan xyu'am chi junelic. Ut li ani inc'a' napaban re li C'ajolbej inc'a' tacuanq xyu'am chi junelic. Cuan ban li tojba mac sa' xben, chan laj Juan.

4

Li Jesús quiqtinac riq'uin jun li ixk aj Samaria

¹ Quicuulac resil riq'ueib laj fariseo nak k'axal nabaleb li yoqueb chi takenc re li Jesús chiruheb li yoqueb chi takenc re laj Juan ut yoqueb chi cubsic xha'eb. ² Abanan macua' li Jesús li yo chi cubsinc ha'. A'aneb ban lix tzolom li yoqueb chi cubsinc ha'. ³ Nak quixnau li c'a'ru yoqueb chixyebal laj fariseo, li Jesús qui-el Judea ut co cui'chic Galilea. ⁴ Nak yo chi xic Galilea, tento nak tanumek' aran Samaria. ⁵ Nak yo chi numec' Samaria, quicuulac sa' li tenamit Sicar. Li tenamit a'an nach' cuan riq'uin li na'ajej li quixq'ue laj Jacob re laj José li lalal. ⁶ Ut aran cuan jun li becbil ha' li quixtakla xbecbal laj Jacob najter. Cua'leb na chic quicuulac aran li Jesús. Quic'ojla chire li becbil ha' chi hilanc xban nak quilub chi bec. ⁷ Quicuulac jun li ixk aj Samaria chirisinguil xha'. Ut li Jesús quixye re: —Si bayak cuuc'a, chan. ⁸ Ut eb lix tzolom li Jesús ac xcqeb sa' tenamit chixlok'bal lix tzacaemkeb. ⁹ Quichak'oc li ixk ut quixye re: —Lain aj Samaria ut laät, laät aj judío. ¿C'a'ut nak nacapatz' acuuc'a cue? chan. Quixye re chi jo'can xban nak eb laj judío inc'a' neque'xc'am rib sa' usilal riq'ueib laj Samaria. ¹⁰ Li Jesús quixye re: —Cui ta nacanau c'a'ru li mañan li naxq'ue li Dios, ut cui ta nacanau anihin lain li yoquin chixtz'amanquil cuuc'a acue, laät tatz'ama raj acuuc'a cuiq'uin ut ting'ue raj acue li ha' li naq'uehoc junelic yu'am, chan li Jesús. ¹¹ Quichak'oc li ixk ut quixye re: —Kacua', ¿C'a' ta cui' ru tacuisi cui' li ha'? Cham chan chak. Ut, ¿chan ta cui' ru nak taq'ue li ha' li naq'uehoc yu'am? ¹² Laj Jacob li kaxe'tonil yucua' quixcanab chok' ke li becbil ha' a'in. Arin qui-uc'ac a'an ut arin ajcui' que'uc'ac li lalal xan'ajol ut lix quetomk. ¿Ma laät ta bi' k'axal nim xcuanquil chiru a'an? chan li ixk. ¹³ Quichak'oc li Jesús ut quixye re: —Chixjunileb li te'uc'ak re li ha' a'in, tachakik cui'chic reheb. ¹⁴ A'ut li te'uc'ak re li ha' ting'ue lain, ma jok'e chic tachakik reheb. Li ha' li ting'ue lain jalan cui'. A'an li junelic yu'am. Chanchan jun li yu'am ha' li cuan chi junelic. Mac'a' roso'jic, chan li Jesús. ¹⁵ Li ixk quixye re: —Kacua', q'ue cue li ha' a'an re nak inc'a' chic tachakik cue, chi moco tinchalk chic toj arin chirisinguil inha', chan. ¹⁶ Li Jesús quixye re: —Ayu. Bok chak la belom ut tatchalk cui'chic arin acuochben, chan. ¹⁷ —Mac'a' inbelom, chan li ixk. Li Jesús quixye re: —Yal li xaye nak mac'a' abelom, ¹⁸ xban nak ob li cuñk cuanjenak acuiq'uin. Ut li jun li cuan acuiq'uin anakuan macua' ajcui' abelom. Yal li xaye nak mac'a' abelom, chan li Jesús. ¹⁹ Quixye li ixk re: —Kacua', jo' li laät anchal profeta. ²⁰ Eb li kaxe'tonil yucua' lao aj Samaria que'tijoc chiru li Dios sa' li tzul li cuan arin. Abanan laex aj judío nequeye nak toj aran Jerusalén cuan li tz'akal na'ajej re lok'oninc. Ye cue

bar cuan li tz'akal xyalal, chan li ixk. ²¹ Quixye li Jesús re: —At ixk, pab li c'a'ru tinye acue. Taçuulak xk'ehil nak moco tento ta chic texxic sa' li tzuł li cuan arin, chi moco Jerusalén re textijoni chiru li Dios Acuabej. ²² Laex aj Samaria inc'a' nequenau chi tz'akal ani nequeq'ue xlok'al. Lao aj judío nakanau chi tz'akal ani nakaq'ue xlok'al xban nak li colba-ib riq'uineb laj judío xchal chak. ²³ Taçuulak xk'ehil, ut anakcuan ajcui', nak eb li te'xlok'oni li Acuabej Dios chi tz'akal, te'xbanu chi anchal xch'oleb ut chi yal xban nak li Acuabej Dios naraj nak te'xlok'oni chi tz'akal re ru. ²⁴ Li Dios, a'an musik'ej ut li ani talok'onink re, tento nak tixbanu chi anchal xch'ol ut chi tz'akal re ru, chan li Jesús. ²⁵ Quichak'oc li ixk ut quixye re: —Lain ninnau nak taçhalk li Mesías li taçolok ke. Li Cristo neque'xye re. Nak tol-elk a'an, tixch'olob chiku chixjunil li c'a'ak re ru a'in, chan li ixk. ²⁶ Quixye li Jesús re: —Lain li Cristo li yoquin chi atinac acuiq'uin, chan. ²⁷ Sa' ajcui' li honal a'an, que'cuulac eb lix tzolom li Jesús. Ut que'sach xch'oleb chirilbal nak yo chi atinac riq'uin li ixk aj Samaria. Abanan ma jun quiyehoc re: —¿C'a'ut nak yocat chi atinac riq'uin li ixk a'an?— Chi moco que'xye: —¿C'a'ru yocat chixyebal re?— ²⁸ Li ixk quixcanab lix cuc aran ut co sa' li tenamit ut quixye reheb li cuanqueb aran: ²⁹ —Yo'keb chicuix chirilbal jun li cuink quixye cue chixjunil lin yehom inbanuhom. Mare a'an li Cristo li yoco chiroybeninquil, chan. ³⁰ Jo'can nak li cuanqueb sa' li tenamit a'an coeb riq'uin li Jesús. ³¹ Nak toj maji' neque'cuulac, eb lix tzolom li Jesús yoqueb chixtz'amanquil chiru nak taçua'ak. Que'xye re: —At tzolonel, cua'in, chanqueb re. ³² Li Jesús quixye reheb: —Maçua' tzacaemk nasaho' cui' inch'ol. Lain cuan jun xsahil inch'ol ut laex inc'a' nequenau c'a'ut, chan. ³³ Ut eb lix tzolom que'xye chi ribileb rib: —Mare ani xc'amoc chak xcua, chanqueb. ³⁴ Li Jesús quixye reheb: —Lain nasaho' inch'ol nak ninbanu li c'a'ru naraj li quitaklan chak cue ut tinchoy xbanunquil lix c'anjel. A'an ruchil li cua chok' cue lain, chan. ³⁵ Laex nequeye, “Toj tanumek' cahib po chic tojo'nak to-oc chi k'oloc”, chanquex. Abanan lain ninye ere us xtiqubanquil anakcuan. Ilomak li q'uila tenamit. Chanchaneb li acujmk li ac xk'ano'. Tento nak taçh'olobak li xyalal chiruheb. ³⁶ Laj k'olonel naxe'ul xtojbai ut nasaho' sa' xch'ol rochben laj acuinel. Jo'can ajcui' li ani naxch'olob xyalal re nak te'pabank li cristian. Li jun a'an taçuank lix k'ajcamunquil xban nak cuanqueb li te'rechani li junelic yu'am sa' xc'aba' a'an. ³⁷ Riq'uin a'in na-el chi yal li neque'xye: Jun li na-acuoc re ut jun chic li nak'oloc re. ³⁸ Lain xexintakla chixk'olbal li moco laex ta xexc'anjelan re. Jalaneb xe'c'anjelan re ut laex chic xexyaloc xsahil lix c'anjeleb, chan li Jesús reheb. ³⁹ Nabaleb laj Samaria li cuanqueb sa' li tenamit a'an que'xpab nak li Jesús a'an li Cristo, xban nak li ixk quixye reheb: —Li cuink a'an xye cue chixjunil li c'a'ru quilajinbanu.— ⁴⁰ Nak que'cuulac eb laj Samaria riq'uin li Jesús, que'relaji ru chi canac riq'uineb. Ut a'an quicana cuib cutan riq'uineb. ⁴¹ Ut k'axal cui' chic nabaleb li que'paban re li Jesús xban nak que'rabi li c'a'ru quixye. ⁴² Ut que'xye re li ixk: —Anakcuan nakapab, moco xban ta li c'a'ru xayke ke. Lao xkabi chi tz'akal li c'a'ru xye ut nakanau nak a'an tz'akal li Cristo laj Colol re li cuanqueb sa' ruchich'och', chanqueb.

Li Jesús quixq'uirtesi li ralał jun li cuink aj c'anjel chiru li rey

⁴³ Nak ac xnume' li cuib cutan, li Jesús qui-el aran ut co Galilea. ⁴⁴ Ut li Jesús quixch'olob xyalal ut quixye nak junak profeta inc'a' naq'uehe' xlok'al sa' lix tenamit. ⁴⁵ Nak quicuulac li Jesús sa' li tenamit Galilea, quic'ule' sa' xyalal xbaneb li que'cuulac aran Jerusalén chixnumsinquil li nink'e Pascua xban nak que'ril chixjunil li quilajxbanu li Jesús. ⁴⁶ Li Jesús co cui' chic sa' li tenamit

Caná re Galilea li quixsuk'isi cui' li ha' chok' vino. Ut aran Capernaum cuan jun li cuṁnk aj c'anjel chiru li rey. Yaj li rala. ⁴⁷ Li cuṁnk a'an quirabi resil nak li Jesús ac xsuk'i chak Judea ut cuan aran Galilea. Co riq'uin li Jesús ut quirelaji ru chi xic Capernaum re tixq'uirtesi li rala. Camc re xban nak nim xyajel. ⁴⁸ Li Jesús quixye re li cuṁnk: —Laex inc'a' nequepab nak li Dios quitaklan chak cue cui inc'a' tinc'ut junak milagro cheru retalil nak cuan incuanquil, chan. ⁴⁹ Ut li cuṁnk quixye cui'chic re li Jesús: —Kacua', banu usilal cue. Yo'o chi junpat xban nak k'axal nim xyajel li cualal. Camc re, chan li cuṁnk. ⁵⁰ Li Jesús quixye re li cuṁnk: —Ayu sa' la cuochoch. La cualal inc'a' tacamk. Taq'uirak ban, chan. Ut li cuṁnk quixpab li quiyeh'e' re xban li Jesús ut co. ⁵¹ Nak ac cuulac re sa' li rochoch, eb lix moş que'coeb chixc'ulbal ut que'xye re: —Yo'yo la cualal. Yo chi usac, chanqueb re. ⁵² Ut li cuṁnk quixpatz' reheb jok'e honal quixtiquib usac. Ut que'xye re: —Ecuer sa' jun or re li ecuu quinume' lix tik, chanqueb re. ⁵³ Ut quinak sa' xch'ol li yucua'bej nak sa' ajcui' li honal a'an quiyeh'e' re xban li Jesús nak taq'uirak li rala. Ut li cuṁnk a'an quixpab li Jesús jo'queb ajcui' chixjunileb li cuanqueb sa' li rochoch. ⁵⁴ A'an a'in li xcab milagro li quixbanu li Jesús nak qui-el Judea ut co cui'chic Galilea.

5

Li Jesús quixq'uirtesi jun li cuṁnk inc'a' nabec, li cuan chire li ha' Betesda xc'aba'

¹ Chirix chic a'in, li Jesús co Jerusalén sa' li nink'e li neque'xbanu eb laj judío. ² Sa' li tenamit Jerusalén bar cuan cui' li oquebal li neque'rocsi cui' li carner, cuan jun li ha' Betesda xc'aba' sa' ratinobaleb laj hebreo. Aran cuan ob li muhebal. ³ Sa' eb li muhebal a'an cuanqueb nabaleb li yaj. Cuanqueb mutz', cuanqueb yek rokeb, ut cuanqueb li sic rokeb ut sic ruk'eb. Yoqueb chiroybenuquil nak taec'ank li ha'. ⁴ Jun x-angel li Kacua' nacube chak sa' choxa yalak jok'e ut narec'asi li ha'. Li ani xben cua na-oc chi sa' nak ac x-ec'asic li ha', li jun a'an naq'uira a' yal c'a'ru xyajel. ⁵ Cuan jun li cuṁnk aran cuakxaklaju xca'c'al (38) chihab roquic lix yajel. ⁶ Nak li Jesús quiril li cuṁnk jiljo aran chire li ha' quixnau nak ac najter roquic lix yajel. Quixye re: —¿Ma tacuaj q'uirac? chan re. ⁷ Quixye li cuṁnk: —Kacua', nacua' raj abanan ma ani na-ocsin cue sa' li ha' nak na-ec'asic. Nak yoquin chixyalbal oc, jalañ chic na-oc xben cua chicuu, chan. ⁸ Quixye li Jesús re: —Cuaclin, xoc la cuarib ut ben, chan re. ⁹ Sa' ajcui' li honal a'an li cuṁnk quiq'uira. Quixakli, quixxoc lix cuarib ut quibec. A'in quic'ulman sa' li hilobal cutan. ¹⁰ Que'oc chi cuech'inc li neque'taklan sa' xyankeb laj judío. Que'xye re li cuṁnk li quiq'uira: —Hilobal cutan anakuan. Yocat chixk'etbal li kachak'rab xban nak yocat chixc'ambal la cuarib chiru li hilobal cutan, chanqueb. ¹¹ Quichak'oc li cuṁnk ut quixye reheb: —Li cuṁnk li xq'uirtesin cue, xye cue, “c'am la cuarib ut ben”, chan. ¹² Que'xpatz' re: —¿Ani li cuṁnk li xyehoc acue nak taxoc la cuarib ut tatbek? chanqueb. ¹³ Li cuṁnk li quiq'uirtesic inc'a' naxnau ani ta a'an, xban nak k'axal nabaleb li cuanqueb aran ut li Jesús ac x-el sa' xyankeb. ¹⁴ Mokon chic li Jesús quixtau cui'chic li cuṁnk sa' li templo ut quixye re: —Chaq'uehak retal nak xatq'uira. Canab xbanunquil li inc'a' us mare anchal tachalk junak chic nimla raylal sa' aben, chan li Jesús re. ¹⁵ Qui-el li cuṁnk riq'uin li Jesús ut quixye resil reheb li neque'taklan sa' xyankeb laj judío nak li Jesús, a'an li quiq'uirtesin re.

Lix cuanquil li C'ajolbej q'uebil re xban li Yucua'bej

16 Eb li neque'taklan sa' xyānkeb laj judío xic' que'ril li Jesús xban nak naq'uirtesin sa' li hilobal cutan. Ut que'raj xcamsinquit. 17 Li Jesús quixye reheb: —Lin Yucua' toj yo chixtenk'anquileb li cristian ut tento ajcui' nak tintenk'aheb lain, chan. 18 K'axal cui'chic que'josk'o' laj judío riq'u'in a'in. Jo'can nak que'raj xcamsinquit xban nak moco ca'aj ta cui' naxk'et lix chak'rabeb nak naq'uirtesin chiru li hilobal cutan; riq'u'in aj ban cui' nak naxjuntak'eta rib riq'u'in li Dios nak naxye nak li Dios, a'an lix Yucua'. 19 Jo'can nak li Jesús quixye reheb: —Relic chi yal tinye ere, Lain li C'ajolbej. Mac'a' naru tinbanu injunes. Li c'a'ru naxc'ut chicuu lin Yucua', a'an li ninbanu. Chixjunil li naxbanu lin Yucua', a'an li ninbanu lain. 20 Lain li C'ajolbej. Raroquin xban lin Yucua'. A'an naxc'ut chicuu chixjunil li c'a'ak re ru naxbanu. Ut toj cuan cui'chic c'a'ak re ru xnjnk'al ru na'leb chiru a'in tixc'ut chicuu xbanunquit. Ut laex tasachk ech'ol chirilbal. 21 Li Yucua'bej naxcuaclesihieb cui'chic chi yo'yo li camenak. Ut jo'can ajcui' lain li C'ajolbej. Lain ninq'ue li junelic yu'am reheb li ani nacuaij. 22 Li Yucua'bej ma ani naxrak atin sa' xben. Quixk'axtesihieb ban sa' cuuk' re nak lain chic tinrakok atin sa' xben. 23 Quixbanu chi jo'can re nak chixjunileb te'xq'ue inlok'al jo' nak neque'xq'ue xlok'al li Yucua'bej. Li ani inc'a' naxq'ue inlok'al lain li C'ajolbej, inc'a' ajcui' naxq'ue xlok'al li Yucua'bej li quitaklan chak cue. 24 Relic chi yal ninye ere nak li ani na-abin re li c'a'ru ninye ut naxpab li Dios li quitaklan chak cue, li jun a'an cuan xyu'am chi junelic. Inc'a' taxic sa' tojba mac xban nak inc'a' chic tenebanbil li camc sa' xben. Cuank ban chic xyu'am chi junelic. 25 Chi yal ninye ere tacuulac xk'ehil ut anakuan ajcui' xcuulac xcutanquit, nak eb li chanchan camenakeb xban li mac te'rabi li cuatin lain li C'ajolbej. Ut li te'abjnk cue te'cuank xyu'am chi junelic. 26 Li Yucua'bej cuan xcuankuil chi q'uehoc junelic yu'am ut a'an ajcui' quiq'uehoc cue lain li C'ajolbej lin cuankuil chi q'uehoc junelic yu'am. 27 Ut quixq'ue ajcui' incuanquit chi rakoc atin xban nak lain li C'ajolbej. Taklanbilin chak xban li Dios. 28 Misach ech'ol chirabinquit li yoquin chixyebal. Tacuulac xk'ehil nak chixjunileb li camenak te'rabi li c'a'ru tinye. 29 Li que'xbanu li us te'cuaclik cui'chic ut te'cuank xyu'am chi junelic. Ut eb li que'xbanu li inc'a' us te'cuaclik ajcui' re te'taklak sa' li tojba mac. 30 Lain mac'a' naru ninbanu injunes. Lain ninrakoc atin jo' naxye cue li Yucua'bej. Jo'can nak ninrakoc atin sa' tiq'uial. Inc'a' ninbanu li c'a'ru nacuaij lain. Ninbanu ban li c'a'ru naraj li Yucua'bej li quitaklan chak cue. 31 Cui' lain tinch'olob xyalal cheru anihin tz'akal lain, laex teye nak inc'a' yal li yoquin chixyebal. 32 Abanan cuan jun chic li naxch'olob xyalal cheru anihin tz'akal lain ut lain ninnau nak yal li yo chixyebal chicuix. 33 Laex xetakla xpatz'bal re laj Juan laj Cubsihom Ha' ut a'an quixch'olob li xyalal cheru ut yal li quixye chicuix. 34 Abanan inc'a' tento nak junak cujnk tixch'olob xyalal anihin. Ninye ban ere anihin re nak texcolek'. 35 Laj Juan chanchan jun li xam quixcutanobresi ebe nak quixch'olob li xyalal cheru. Ut quisaho' jun c'amoc sa' ech'ol chirabinquit li quixye. 36 Li c'a'ru quixch'olob laj Juan chicuix, a'an yal. Abanan riq'u'in li c'a'ru ninbanu, k'axal cui'chic naxc'ut chi tz'akal anihin lain. Lain ninbanu li c'a'ru quixye cue li Yucua'bej. Li c'a'ru ninbanu lain, a'an naxc'ut nak taklanbilin xban li Yucua'bej. 37 Ut li Yucua'bej li quitaklan chak cue, a'an quixch'olob ajcui' li xyalal chicuix usta ma jun sut xerabi chi atinac chi moco queril chanru na-iloc. 38 Laex inc'a' nequeraj xc'ulbal li ratin xban nak inc'a' niquinepab lain, li taklanbilin chak xban a'an. 39 Laex nequeq'ue ech'ol chixtzolbal xsa' li Santil Hu. Laex nequec'oxla nak aran tetau chanru tacuank le yu'am chi junelic. Abanan inc'a' nequeq'ue retal nak li Santil

Hu a'an naxch'olob ajcui' li xyalal chicuix lain. ⁴⁰ Laex inc'a' nequera j xpabanquil nak lain ning'uehoc ere le yu'am chi junelic. ⁴¹ Lain inc'a' nacuj nak teq'ue inlok'al laex, ⁴² xban nak ninnau chanru le na'leb. Ninnau nak inc'a' nequera li Dios chi anchal ech'ol. ⁴³ Lain xinchal sa' xc'aba' lin Yucua'. Abanan inc'a' xeraj inc'ulbal. Cui ut ani ta chic junak tachalk yal naxtakla chak rib xjunes, laex teç'ul raj a'an. ⁴⁴ Nak nequeq'ue elok'al chi ribil erib, c'ajo' nak nacuulac cheru. Abanan inc'a' nequesic' li lok'al li naxq'ue li jun chi Dios. ¿Chan ta cui' ru nak tinepab lain chi jo'canan? ⁴⁵ Meç'oxla nak lain tinjitok ere chiru lin Yucua'. Cuan jun li tajitok ere. A'an li chak'rab li quix'uehe' re laj Moisés li c'ojc'o cui' ech'ol. ⁴⁶ Cui ta nequepab li c'a'ru quixye laj Moisés, tinepab aj raj cui' lain xban nak laj Moisés quixch'olob ajcui' chak xyalal chicuix lain. ⁴⁷ Cui inc'a' nequepab li c'a'ru quixtz'iba laj Moisés chicuix, ¿chan ta cui' ru nak tepab li c'a'ru ninye lain?

6

Li Jesús quixq'ueheb chi cua'ac li ob mil chi cuink

¹ Mokon chic li Jesús cō cui'chic jun pac'al li palau Galilea. Neque'xye ajcui' Tiberias re li palau a'an. ² Nabaleb yoq'ueb chi takenc re xban nak que'rileb li milagro li yo chixbanunquil nak naxq'uirtesiheb li yaj. ³ Ut quitace' li Jesús chiru jun li tzul ut aran quic'ojla rochbeneb lix tzolom. ⁴ Ac cuulac re xk'ehil li nink'e Pascua, li neque'xbanu eb laj judío. ⁵ Li Jesús quiril nak nabaleb li yoq'ueb chi cuulac riq'uin. Quixye re laj Felipe: —¿Bar taruk takalok' xcuahab chixjunileb li tenamit a'in? chan. ⁶ Quixye chi jo'can yal re rilbal c'a' na ru tixye laj Felipe xban nak ac cuan sa' xch'ol li Jesús nak tixq'ue xcuahab. ⁷ Quixye laj Felipe: —Kaçua', cuib ciento denario chi caxlan cua inc'a' tatz'aklok re te'tz'ak ca'ch'inak chi xjunkaleb, chan. ⁸ Jun chic reheb lix tzolom aj Andrés xc'aba' ras laj Simón Pedro. Quixye: ⁹ —Cuan jun li al arin cuan cuib li car riq'uin ut ob li caxlan cua yibanbil riq'uin cebada. Abanan a'in ma jok'e tatz'aklok reheb li q'uila tenamit, chan. ¹⁰ Ut quixye li Jesús reheb: —Q'uehomakeb chi c'ojlac li tenamit.— Nabal li pach'aya' cuan aran. Chixjunileb que'c'ojla sa' li pach'aya'. Ob mil na chi cuink li cuanqueb aran. ¹¹ Tojo'nak li Jesús quixchap li caxlan cua. Quixbantioxi chiru li Dios. Quixjachi li caxlan cua ut quixq'ue reheb lix tzolom re nak te'xjeq'ui reheb li q'uila tenamit li c'ojc'oq'ueb aran. Jo'can ajcui' quixbanu riq'uin li car. Ut que'cua'ac chixjunileb toj retal que'c'ojla xch'oleb. ¹² Nak ac xe'rake' chi cua'ac, li Jesús quixye reheb lix tzolom: —Xocmak li jo' q'uial x-ela'an re nak mac'a' tatz'ekman, chan. ¹³ Que'xxoc cablaju chachac rela' li caxlan cua yibanbil riq'uin cebada. A'an li qui-ela'an nak que'rake' chi cua'ac chixjunileb li cuanqueb aran. ¹⁴ Nak que'ril li milagro li quixbanu li Jesús, eb li cuanqueb aran que'xye: —Relic chi yal li cuink a'in, a'an li profeta li quiyehé' chak resil junxil nak tachalk sa' ruchich'och', chanqueb. ¹⁵ Li Jesús quixnau nak te'raj xpuersinquil ru re nak taoc chok' rey. Jo'can nak qui-el sa' xyankeb ut cō xjunes sa' li tzul.

Li Jesús quibec chiru li palau

¹⁶ Oc re k'ojyin nak coeb lix tzolom li Jesús chire li palau. ¹⁷ Li Jesús maji' nacuulac riq'ueheb. Que'oc sa' jun li jucub ut yoq'ueb chi xic sa' li tenamit Capernaum li cuan jun pac'al li palau. ¹⁸ Ac x-oc li k'ojyin nak quichal jun cacuil ik' ut qui-oc chi ec'anc ru li palau chi cau. ¹⁹ Cuan na xcab legua ac xe'bec chiru li ha' sa' li jucub nak que'ril nak yo chak chi çalc li Jesús. Yo chi

beç chiru li ha'. Yo çhak chi nach'oc chixc'atk li jucub. C'ajo' nak que'xucuaç xban nak inc'a' que'xnau ru. ²⁰ Ut li Jesús quixye reheb: —Lain. Mexxucuaç, çhan. ²¹ Ut c'ajo' xsahil xch'oleb nak que'roçsi sa' li jucub. Ut sa' ajcui' li hõnal a'an que'cuulac sa' li na'ajej li yoqueb cui' chi xic. ²² Cuulajak chic li q'uila tenamit li cuanqueb chire li palau li que'el cui', que'xq'ue retal nak jun ajcui' li jucub qui-el aran. Ut que'xnau nak li Jesús inc'a' qui-oc chi sa' li jucub a'an roçbened lix tzolom. Xjunedeb ban coeb. ²³ Ut cuanqueb cui'chic jucub que'el çhak Tiberias que'cuulac chixc'atk li na'ajej li que'cua'ac cui' nak ac xbantioxi li Jesús chiru li Dios. ²⁴ Li q'uila tenamit que'xq'ue retal nak ma ani chic li Jesús sa' li na'ajej a'an, chi moco cuanqueb lix tzolom. Que'oc sa' eb li jucub li que'çal Tiberias ut coeb Capernaum chixsic'bal. ²⁵ Nak que'xtau li Jesús jun pac'al li palau, que'xye re: —At tzolonel, çJok'e xatchal arin?— ²⁶ Quichak'oc li Jesús ut quixye reheb: —Relic chi yał ninye ere nak laex yoquex çhintakenquil xban nak xexinq'ue chi cua'ac toj retal xexnujac. Inc'a' yoquex çhintakenquil xban nak xeril li milagro li xinbanu. ²⁷ Mixic ech'ol ca'aj cui' riq'uin xsic'bal li tzacaemk li na-oso'. Cheq'uehak ban ech'ol chixsic'bal li tzacaemk li inc'a' nalaj na-oso'. A'an li junelic yu'am li ninq'ue lain li C'ajolbej. A'an aj e nak quixq'ue incuanquil ut quinixtakla çhak li Yucua'bej, çhan li Jesús. ²⁸ Ut que'xye re li Jesús: —çC'a' raj ru takabanu laõ re nak taçahok' xch'ol li Dios kiq'uin? çhanqueb. ²⁹ Li Jesús quixye reheb: —Li c'a'ru naraj li Dios nak tebanu, a'an a'in: nak tinepab lain xban nak taklanbilin çhak xban, çhan. ³⁰ Ut que'xye cui'chic re: —Tento taç'ut çhiku junak li milagro re nak takapab nak taklanbilat xban li Dios. çC'a'ru li retalil taç'ut çhiku? ³¹ Eb li kaxe'tonil yucua' que'q'uehe' çhak li maná chixcua'eb nak yoqueb çhak chi numec' sa' li çhaki çh'och' jo' tz'ibanbil retalil sa' li Santil Hu: Choxahil cua quiq'uehe' chixcua'eb. ³² Ut li Jesús quixye reheb: —Relic chi yał ninye ere, moco a' ta laj Moisés quiq'uehoc reheb li choxahil cua. A' ban lin Yucua', a'an li quiq'uehoc reheb. Ut a'an naq'uehoc li tz'akal choxahil cua. ³³ Li tz'akal choxahil cua li naxq'ue li Dios, a'an li jun li quichal çhak sa' choxa ut naxq'ue li junelic yu'am reheb li cuanqueb sa' ruchich'och', çhan. ³⁴ Eb a'an que'xye re: —At Kaçua', taq'ue ta ke rajlal li cua a'an.— ³⁵ Li Jesús quixye reheb: —Lain li cua a'an. Lain ninq'uehoc junelic yu'am. Li ani napaban cue taç'ojobak xch'ol. Inc'a' chic taç'ocak ut inc'a' chic taçhakik re. Chanchan nak ac xrake' chi tzacañc. ³⁶ Aban ac xinye ere nak usta ac xeril cuu, toj inc'a' ajcui' niquinepab. ³⁷ Chixjunileb li tixk'axtesi cue li Yucua'bej, tine'xpab. Ut li ani napaban cue, lain inc'a' tintz'ektana. ³⁸ Lain xinçal çhak sa' choxa re tinbanu li c'a'ru naraj li Dios li quitaklan çhak cue. Moco xinçal ta chixbanunquil li c'a'ru nacuaç lain. ³⁹ Li c'a'ru naraj lin Yucua' li quitaklan çhak cue, a'an nak ma jun reheb li cualal inc'ajol li xk'axtesi cue taçahk chicuu. Tincuaclesiheb ban chi cuankeb xyu'am sa' roso'jiqueb li cutan. ⁴⁰ Li Yucua'bej li quitaklan çhak cue, a'an naraj nak chixjunileb li te'xq'ue retal nak lain li C'ajolbej ut tine'xpab taçuank xyu'ameb chi junelic. Ut lain tincuaclesiheb ut tinq'ue xyu'ameb sa' roso'jiqueb li cutan, çhan li Jesús. ⁴¹ Ut eb laj juđio que'oc chixcuech'inquil rix li quixye li Jesús xban nak quixye, “Lain li cua. Lain xinçal çhak sa' choxa.” ⁴² Que'xye chi ribileb rib: —çMa maçua' ta bi' a'in li Jesús li ralal laj José? Laõ nakanau ruheb lix na' xyucua'. çC'a'ut nak naxye nak sa' choxa xçal çhak? çhanqueb. ⁴³ Quixye li Jesús reheb: —Canabomak xcuech'inquil erib, çhan. ⁴⁴ Ma ani naru tapabank cue cui inc'a' ta k'axtesinbil cue xban li Yucua'bej li quitaklan çhak cue. Li neque'paban cue, lain tincuaclesiheb cui'chic chi yo'yo sa' roso'jiqueb li

cutan. ⁴⁵ Tz'ibanbil retalil chi jo'ca'in sa' li Santil Hu xbaneb li profeta: Li Dios tixc'ut li xyalal chiruheb chixjunileb. Jo'can nak chixjunileb li neque'abin re ut neque'xtau ru li c'a'ru naxye li Dios, eb a'an tine'xpab ajcui' lain. ⁴⁶ A'in moco naraj ta naxye nak cuan li que'iloc chak ru li Acuabej Dios. Ca'aj cui' lain ninna'oc ru xban nak riq'uin quinchal chak. ⁴⁷ Relic chi yal tinye ere nak li ani napaban cue, li jun a'an cuan xyu'am chi junelic. ⁴⁸ Lain li cua li naq'uehoc yu'am chi junelic. ⁴⁹ Le xe'tonil yucua' que'xcua' chak li cua li quichal chak sa' choxa junxil nak yoqueb chi numec' sa' li chaki ch'och'. Usta que'xcua' li cua li quichal sa' choxa, abanan moco cuanqueb ta xyu'am chi junelic. ⁵⁰ Abanan, lain li xinchal chak sa' choxa, lain li tz'akal choxahil cua xban nak ninq'uehoc yu'am chi junelic. Li ani napaban cue, a'an inc'a' tacamk. Cuanq ban xyu'am chi junelic. ⁵¹ Lain li yo'yoquil cua. Quinchal chak sa' choxa. Li ani napaban cue lain inc'a' tasachk. Cuanq ban xyu'am chi junelic. Li cua li ting'ue lain, a'an lin tibel nak tink'axtesi cuib chi camc re nak taruk te'cuank xyu'ameb chi junelic li cuanqueb sa' ruchich'och', chan li Jesús. ⁵² Nak que'rabi li c'a'ru quixye, eb laj judío que'oc chixcuech'inquil rix li quixye ut que'xye: —¿Chanru nak tixq'ue lix tibel re takatzaca? chanqueb. ⁵³ Quixye li Jesús reheb: —Relic chi yal ninye ere: Cui inc'a' tetzaca lin tibel lain li C'ajolbej ut cui inc'a' teruc' lin quiq'uel, inc'a' tacuanq le yu'am chi junelic. ⁵⁴ Chixjunileb li neque'xtzaca lin tibel ut neque'ruc' lin quiq'uel, cuank xyu'ameb chi junelic, ut lain tincuaclesih eb cui'chic chi yo'yo sa' roso'jiqueb li cutan. ⁵⁵ Lin tibel, a'an li tzacaemk li naq'uehoc junelic yu'am. Ut lin quiq'uel, a'an li uc'a li naq'uehoc junelic yu'am. ⁵⁶ Li ani naxtzaca lin tibel ut naruc' lin quiq'uel, li jun a'an cuan chi sum atin cuiq'uin ut lain cuanquin chi sum atin riq'uin a'an. ⁵⁷ Li yo'yoquil Dios, a'an li quitaklan chak cue. Jo' nak yo'yo chi junelic a'an, jo'can nak yo'yoquin ajcui' lain chi junelic. Jo'can ajcui' li ani naxtzaca lin tibel, li jun a'an tacuanq xyu'am chi junelic sa' inc'aba' lain. ⁵⁸ Jo'can nak lain li cua li quinchal chak sa' choxa. Moco jo' ta li cua li que'xcua' le xe'tonil yucua'. A'an inc'a' quixq'ue xyu'ameb chi junelic. Abanan chixjunileb li te'cua'ok re li cua a'in, eb a'an te'cuank xyu'ameb chi junelic, chan li Jesús. ⁵⁹ Chixjunil li c'a'ak re ru a'in li Jesús quixye reheb nak yo' chixc'utbal li xyalal chiruheb aran Capernaum sa' li cab li neque'xch'utub cui' ribeb laj judío.

Nabaleb que'xcanab xtakenquil li Jesús

⁶⁰ Nak que'rabi li c'a'ru quixye, nabaleb lix tzolom que'oc chi atinac chi ribileb rib, ut que'xye: —C'ajo' xch'a'ajquil xtaubal ru li xye. ¿Ani ta cui' tata'ok ru? chanqueb. ⁶¹ Li Jesús quixnau nak yoqueb chixcuech'inquil rix li c'a'ru quixye usta ma ani quiyehoc re. Jo'can nak quixye reheb: —¿Ma inc'a' xcuulac cheru li c'a'ru xinye ere? ¿Ma tecanab intakenquil xban? ⁶² ¿Ma ra xerec'a nak xinye ere chi jo'can? ¿C'a' raj ru tepanu nak teril nak lain li C'ajolbej yokin cui'chic chi xic sa' choxa li xincuan cui' chak junxil? ⁶³ Li naq'uehoc junelic yu'am, a'an li Santil Musik'ej. A'an macua' re li tibeje. Lain xinch'olob xyalal cheru. Li xinye ere yebil cue xban li Santil Musik'ej. Cui tepab li c'a'ru xinye, li Santil Musik'ej tixq'ue ere li junelic yu'am. ⁶⁴ Abanan toj cuanqueb ajcui' sa' eyank li inc'a' neque'paban, chan li Jesús. Chalen sa' xticlajic li Jesús quixnau aniheb li inc'a' te'pabank re. Ut quixnau ajcui' ani li tak'axtesink re sa' ruk'eb li xic' que'iloc re. ⁶⁵ Ut quixye ajcui' li Jesús reheb: —Jo'can nak xinye ere nak ma ani taruk tepabank cue cui' inc'a' ta k'axtesinbil cue xban li Yucua'bej, chan. ⁶⁶ Chalen sa' li cutan a'an nabaleb lix tzolom que'ch'inan xch'oleb ut inc'a' chic que'xtake li Jesús. ⁶⁷ Ut li Jesús quixye reheb lix tzolom cablaju: —¿Ma teraj ajcui' xic laxex? ¿Ma

tingecanab ajcui' læex? chan reheb. ⁶⁸ Quichak'oc laj Simón Pedro ut quixye re: —At Kācua', ¿ani aj iq'uin toxic? Laat nacaye ke chanru taçuank kayu'am chi junelic. ⁶⁹ Lao nakapab li c'a'ru nacaye ut nakananu nak laat li Cristo, li Lalal li yo'yoquil Dios, chan. ⁷⁰ Quixye li Jesús: —¿Ma maꝓua' ta bi' lain xinsic'oc eru læex li cablaju? Lain xinsic'oc eru ut jun sa' eyank xk'axtesi rib re laj tza, chan. ⁷¹ Yo chi atinac chirix laj Judas Iscariote, li lalal laj Simón. Usta a'an jun reheb li cablaju, mokon laj Judas Iscariote quixk'axtesi li Jesús sa' ruk'eb li xic' neque'illoc re.

7

Li Jesús quihobe' xbaneb li ritz'in

¹ Chirix chic a'an, li Jesús yo' chixbeninquileb li na'ajej li cuanqueb Galilea. Inc'a' quiraj xic Judea xban nak eb li neque'taklan sa' xyankeb laj judío te'raj xcamsinquit. ² Yo' chi cuulac xk'ehil li nink'e nak eb laj judío neque'xyib lix coc' muhebal. ³ Eb li ritz'in li Jesús que'xye re: —Elen sa' li na'ajej a'in. Ayu Judea re nak eb li neque'taken açue te'rileb li milagro li nacabanu. ⁴ Ma' ani junak tixbanu lix c'anjel chi mukmu cui naraj nak tana'lik ru. Cui tabanu li milagro a'in, c'utbesi la c'anjel chiruheb chixjunileb, chanqueb. ⁵ Yal ta eb li ritz'in neque'paban re nak a'an taklanbil chak xban li Dios. ⁶ Quixye li Jesús reheb: —Toj maji' nacuulac xk'ehil nak tinxic. Læex naru texxic yalac jok'e. ⁷ Eb li cuanqueb sa' ruchich'och' xic' niquine'ril xban nak lain ninye reheb nak inc'a' us li yo'queb chixbanunquit. Abanan læex inc'a' xic' nequexile' xbaneb. ⁸ Ayukex læex sa' li nink'e. Lain inc'a' tinxic xban nak toj maji' nacuulac xk'ehil nak tinxic, chan li Jesús. ⁹ Nak quixye reheb a'in, li Jesús toj quicana aran Galilea.

Li Jesús cõ Jerusalén chixnumsinquit li nink'e

¹⁰ Nak ac xcõeb li ritz'in sa' li nink'e aran Jerusalén, li Jesús cõ ajcui'. Abanan moco quixye ta rib. Chanchan sa' mukmu cõ. ¹¹ Eb li neque'taklan sa' xyankeb laj judío yo'queb chixsic'bal li Jesús sa' li nink'e. —¿Bar anchal cuan li cujnk a'an? chanqueb. ¹² Nabaleb li cuanqueb aran yo'queb chixcuech'inquit rib chirix li Jesús. Cuan yo'queb chi yehoc re: —Çabil cujnk a'an, chanqueb. Ut cuan cui'chic yo'queb chi yehoc: —Inc'a'. Li cujnk a'an naxbalak'iheb li tenamit, chanqueb. ¹³ Abanan ma' ani quiatínac chi cau xban nak que'xucuac chiruheb li neque'taklan sa' xyankeb laj judío. ¹⁴ Nak ac yo' li nink'e li Jesús cõ sa' li templo ut qui-oc chixch'olobanquit li xyalal chiruheb li cuanqueb aran. ¹⁵ Que'sach xch'õleb li neque'taklan sa' xyankeb laj judío chirabinquit li c'a'ru quixye li Jesús. Que'xye: —¿Chanru nak naxnau li cujnk a'in chixjunil li c'a'ak re ru a'in? A'an moco tzolbil ta, chanqueb. ¹⁶ Quixye li Jesús reheb: —Li tijleb li yo'quin chixc'utbal maꝓua' cue. A' li Dios li quitaklan chak cue, a'an li quic'utuc chicuu li yo'quin chixyebal, chan. ¹⁷ Li ani taajok xbanunquit li c'a'ru naraj li Dios, a'an tixnau ma re li Dios li tijleb li yo'quin chixc'utbal malaj ut yal inc'a'ux injunes. ¹⁸ Cui junak naxch'olob xyalal li naxc'oxla xjunes, li jun a'an naraj nak taq'uehek' xlok'al xbaneb li neque'abin re. Abanan li ani naraj nak taq'uehek' xlok'al li quitaklan chak re, li jun a'an tic xch'õl ut maꝓa' balak'ic riq'uin. ¹⁹ ¿Ma inc'a' ta bi' quixq'ue ere li chak'rab laj Moisés? Ç'a'ut nak ma jun sa' eyank naxbanu chi tz'akal li c'a'ru naxye li chak'rab? Ut, ¿c'a'ut nak teraj incamsinquit? chan li Jesús. ²⁰ Eb a'an que'chak'oc ut que'xye re: —Cuan na li maus aj musik'ej açuiq'uin. ¿Ani taajok açamsinquit? chanqueb

re. ²¹ Quixye li Jesús reheb: —Lain xinbanu jun li milagro sa' li hilobal cutan ut sachso ech'ol xexcana xban. ²² Laj Moisés quixye ere nak tento tēbanu li circuncisión reheb le ralar. (Maçua' laj Moisés li quitiquiban re. A' le xe'tonil yucua', a'aneb li que'tiquiban re xbanunquil li circuncisión.) Usta hilobal cutan, laex nequebanu li circuncisión. ²³ Cui laex nequebanu li circuncisión usta hilobal cutan re nak inc'a' tek'et li chak'rab li quiq'uehe' re laj Moisés, ¿c'a'ut nak xexjosk'o' cuiq'uin nak xinq'uirtes jun li cujnk sa' li hilobal cutan? ²⁴ Mexrakoc atin jo' nequeraj laex yal ejunes. Chexrakoc ban atin sa' xyalal, chan li Jesús. ²⁵ Cuanqueb aj Jerusalén que'xye: —¿Ma maçua' ta bi' a'in li cujnk li te'raj xcamsinquil eb li neque'taklan sa' kayank lao aj judío? ²⁶ Q'uehomak retal. Cuan arin ut yo' chi atinac chiruheb chixjunileb li tenamit ut maç'a' neque'xye re. Mare xe'xnau nak a'an li Cristo. ²⁷ ¿Chanru nak a'anak li Cristo? ¿Ma inc'a' ta bi' nakanau bar xtenamit li cujnk a'in? Nak tachalk li Cristo, ma' ani tana'ok re chi tz'akal bar tachalk chak, chanqueb. ²⁸ Nak li Jesús yo' chixch'olobanquil li xyalal sa' li templo, quixye chi cau xyab xcux: —Yal nak nequenau cuu. Ut nequenau bar intenamit. Abanan inc'a' nequenau chi tz'akal bar xinchal chak. Lain inc'a' xintakla chak cuib yal injunes. Li Dios, li tic xch'ol, a'an li xtaklan chak cue. Laex inc'a' nequenau ru a'an. ²⁹ Ca'aj cui' lain ninna'oc ru xban nak riq'uin a'an xinchal chak. Li Dios, a'an li quitaklan chak cue, chan li Jesús. ³⁰ Ut que'raj raj xchappal re nak te'xq'ue sa' tz'alam. Abanan inc'a' ajcui' que'xchap xban nak toj maji' nacuulac xk'ehil nak tachapek'. ³¹ Nabaleb li tenamit que'xpab li Cristo ut que'xye: —Lao nakanau nak tac'ulunk li Cristo, nabaleb li milagro tixbanu. Li cujnk a'in nabal li milagro yo' chixbanunquil. Cui ta maçua' li Cristo, ¿chan ta cui' ru nak tixbanu li milagro li yo' chixbanunquil?

Eb li neque'c'ac'alen sa' li templo que'taklac chixchappal li Jesús

³² Eb laj fariseo que'rabi li yo'queb chixyebal chirix li Jesús. Jo'can nak eb a'an, rochbened li xbenil aj tij, que'xtakla li neque'c'ac'alen sa' li templo chixchappal li Jesús re te'xq'ue sa' tz'alam. ³³ Li Jesús quixye reheb: —Toj maji' tinechap. Toj tincuan'k chic ca'ch'inak sa' eyank, tojo'nak tinsuk'ik cui'chic riq'uin li quitaklan chak cue. ³⁴ Tinesic' ut inc'a' tine'tau xban nak bar cuankin lain, laex inc'a' texruk chi xic, chan. ³⁵ Ut eb laj judío que'oc chi atinac chi ribileb rib ut que'xye: —¿Bar anchal taxic li cujnk a'in nak inc'a' taruk takatau? Mare taxic riq'uineb laj judío li cuanqueb sa' xtenamiteb laj griego. Malaj taoc chixtzolbaleb laj griego. ³⁶ A'an xye, “Tinesic' ut inc'a' tine'tau. Inc'a' naru texxic bar cuankin cui',” chan. ¿C'a'ru xyalal a'an? chanqueb.

Li Jesús quixye nak li ani tachakik re tixq'ue ruc'a

³⁷ Li roso'jic li nink'e, a'an li cutan li k'axal lok' chiruheb. Sa' li honal a'an, li Jesús quixakli chiruheb ut quixye chi cau xyab xcux: —Li ani tachakik re, chalk cuiq'uin. Lain tinq'ue ruc'a. ³⁸ Xban nak jo'ca'in tz'ibanbil retalil sa' li Santil Hu: Chixjunileb li ani te'pabank cue lain, li Santil Musik'ej li naq'uehoc junelic yu'am tacuan'k riq'uineb. Chanchan jun li yu'am ha' li inc'a' n-oso'.— ³⁹ Nak quixye a'in, li Jesús yo' chi atinac chirix li Santil Musik'ej li tacuan'k riq'uineb li te'pabank re. Sa' li cutan a'an, li Santil Musik'ej toj maji' nac'ulun xban nak li Jesús toj maji' naxic sa' choxa chixc'ulbal lix lok'al. ⁴⁰ Nak que'rabi li c'a'ru quixye li Jesús, cuan que'yehoc: —Relic chi yal li cujnk a'in profeta.— ⁴¹ Ut cuanqueb ajcui' que'xye: —Li cujnk a'in, a'an li Cristo.— Abanan cuanqueb cui'chic li que'chak'oc ut que'xye: —¿Ma Galilea ta bi' tachalk li Cristo li yechi'inbil ke? ⁴² Tz'ibanbil retalil sa' li Santil Hu nak

li Cristo li Mesías taçhalk sa' xyankeb li ralex xc'ajol li rey David. Taçhalk aran Belén li quicuan cui' li rey David najter, chanqueb. ⁴³ Jo'can nak li tenamit que'xjachi ribeb xban nak jalan jalank yoqueb chixc'oxlanquil chirix li Jesús. ⁴⁴ Cuanqueb li que'ajoc xchapbal li Jesús abanan inc'a' ajcui' que'xbanu.

Li cuanqueb xcuanquil inc'a' que'xpab li Jesús

⁴⁵ Nak que'suk'i li que'taklac chixchapbal li Jesús, eb laj fariseo ut eb li xbenil aj tij que'xpatz' reheb: —¿C'a'ut nak inc'a' xec'am chak li cuink a'an? chanqueb. ⁴⁶ Eb li neque'c'ac'alén sa' li templo que'chak'oc ut que'xye: —¿Ma jun cua kabiom junak cuink chi atinac jo' naatinac li cuink a'an! Ch'ina'us li c'a'ru naxye, chanqueb. ⁴⁷ Ut eb laj fariseo que'xye reheb: —¿Ma xeq'ue ajcui' erib laex chixbalak'i li cuink a'an? ⁴⁸ ¿Ma cuan ta bi' junak xcomoneb li neque'taklan sa' kayank li xpab li c'a'ru naxye a'an? Ut, ¿ma cuan ta bi' junak kacomon lao aj fariseo xpaban re? ⁴⁹ Eb li q'uila tenamit a'in inc'a' neque'xnau c'a'ru naxye sa' li chak'rab li quiq'uehe' re laj Moisés. ¿C'a'ru te'oc cui' eb a'an? chanqueb laj fariseo. ⁵⁰ Cuan aran laj Nicodemo li quicuulac riq'uin li Jesús chi k'ek. A'an jun reheb laj fariseo. Quixye reheb: ⁵¹ —Naxye sa' li kachak'rab nak inc'a' naru rakoc atin sa' xben junak cuink chi toj maji' naxye ma cuan xmaq malaj ut inc'a'. Tento takanau chi tz'akal c'a'ru lix mac, chan laj Nicodemo. ⁵² Que'chak'oc ut que'xye re: —¿Ma laät ajcui' aj Galilea laät? Tzol acuib chi us sa' li Santil Hu re taq'ue retal nak ma jun profeta chalenak chak Galilea, chanqueb. ⁵³ Ut chirix chic a'an, chixjunileb que'coeb sa' rochocheb.

8

Quic'ame' riq'uin li Jesús jun li ixk li quixmux ru xsumlajic

¹ Li Jesús cõ sa' li tzul Olivos. ² Cuulajak chic nak toj ek'ela cõ cui'chic sa' li templo. Li q'uila tenamit que'cuulac riq'uin. Ut nak quic'ojla, qui-oc cui'chic chixch'olobanquil li xyälal chiruheb. ³ Eb laj fariseo ut eb laj tzolol chak'rab que'xc'am riq'uin li Jesús jun li ixk yo chixmuxbal ru xsumlajic nak que'xtau ut coxxe'xxakab chiruheb chixjunileb. ⁴ Que'xye: —At tzolonel, li ixk a'in yo chixmuxbal ru xsumlajic nak xkatau. ⁵ Sa' li chak'rab li quixq'ue ke laj Moisés naxye nak cutbileb chi pec nak te'camsik eb li ixk li neque'xmux ru lix sumlajic jo' xbanu li ixk a'in. Ut laät, ¿c'a'ru nacaye? chanqueb. ⁶ Que'xye re li Jesús chi jo'can yal re rilbal c'a' na ru tixye xban nak yoqueb chixsic'bal c'a'ru te'xjit cui'. Aban li Jesús quixxulub rib ut qui-oc chi tz'ibac chiru ch'och' riq'uin ru'uj ruk'. ⁷ Ut xban nak yoqueb chixpatz'bal, li Jesús quixakli cui'chic ut quixye reheb: —Li ani mac'a' xmaq sa' eyank, a'an li xben li tixcut li pec, chan. ⁸ Ut quixxulub rib ut qui-oc cui'chic chi tz'ibac chiru ch'och'. ⁹ Nak que'rabi li c'a'ru quixye, que'rec'a rib xban nak cuanqueb xmaq ut que'oc chi elc chi xjunkaleb. Xben cua que'el li chequel cuink ut chirixeb a'an que'el li toj saheb. Quicana xjunes li Jesús ut li ixk xakxo chiru. ¹⁰ Li Jesús quixakli cui'chic ut quixye re li ixk: —¿Bar cuanqueb li yoqueb chi jitoc acue? ¿Ma ma ani xq'uehoc acue chixtojbal amac? chan. ¹¹ Ut li ixk quixye re: —Ma jun, Kacua'. — Ut li Jesús quixye re: —Chi moco lain tating'ue chixtojbal amac. Ayu ut matmacob chic, chan.

Li Jesús quixch'olob xyälal chiruheb nak a'an li Cristo

¹² Li Jesús quiatinac cui'chic riq'uineb li tenamit ut quixye reheb: —Lain lix cutan saken li ruchich'och'. Li ani tapabank cue lain, inc'a' chic taçuank sa' xk'ojjinal ru li mac. Taçuank ban sa' cutan saken ut taçuank xyu'am

chi junelic, chan. ¹³ Ut eb laj fariseo que'xye re: —Maç'a' na-oc cui' li c'a'ru yocat chixyebal xban nak chaçcuij ajcui' laät yocat chi atinac, chanqueb. ¹⁴ Li Jesús quixye reheb: —Cuan xcuanquil li ninye usta yoquin chi atinac chicuix lain xban nak tz'akal yal li ninye. Laex inc'a' nequenau bar xinchal chak, chi moco nequenau bar tinxic. Ca'aj cui' lain ninna'oc re bar xinchal chak ut bar tinxic. ¹⁵ Laex nequexrakoc atin jo' nequeraj laex ejunes. Lain ma ani sa' aj ben yoquin chi rakoc atin. ¹⁶ Abanan cui tinrakoc atin, tinbanu sa' tiqUILal xban nak inc'a' ninrakoc atin injunes. Ninbanu ban jo' naraj lin Yucua' li quitaklan chak cue. ¹⁷ Sa' le chak'rab tz'ibanbil retalil cui cuan cuibeb li quitak junaj lix c'a'uxeb riq'uin li c'a'ru te'xye, tento xpabanquil li ratineb. ¹⁸ Lain ninye li yal chicuix ajcui' lain. Ut lin Yucua' li quitaklan chak cue, a'an naxch'olob ajcui' li yal chicuix, chan li Jesús. ¹⁹ Eb laj fariseo que'chak'oc ut que'xye re: —¿Ani la yucua'? chanqueb re. Li Jesús quixye reheb: —Laex inc'a' nequenau ani lin Yucua' xban nak inc'a' nequenau cuu lain. Cui ta nequenau cuu lain, nequenau aj raj cui' ru lin Yucua', chan reheb. ²⁰ Chixjunil a'in quixye li Jesús reheb nak yo chixch'olobanquil li xyalal chiruheb li cuanqueb sa' li templo sa' li na'ajej bar neque'xq'ue cui' lix mayejeb. Ut ma ani quichapoc re xban nak toj maji' nacuulac xk'ehil. ²¹ Ut li Jesús quixye cui'chic reheb: —Lain tinxic. Tinesic' raj chic abanan inc'a' tine'tau xban nak inc'a' taruk texxic bar tinxic cui' lain. Texcamk ban sa' le maç, chan. ²² Ut eb laj judío que'xye: —A'an xye nak inc'a' naru toxic bar taxic cui' a'an. ¿C'a'ut nak xye ke chi jo'can? ¿Ma yo chixc'oxlanquil xcamsinuil rib? chanqueb. ²³ Li Jesús quixye reheb: —Laex aj ruchich'och'. Abanan lain maçua'in aj ruchich'och'. Lain sa' choxa xinchal chak. ²⁴ Jo'can nak ninye ere nak texcamk sa' le maç. Laex texcamk sa' le maç cui' inc'a' nequepab nak lain ac cuanquin ajcui' chak sa' xticlajic jo' xinye ere, chan li Jesús. ²⁵ Ut eb a'an que'xye re: —Ye ke. ¿Anihat tz'akal laät? chanqueb. Li Jesús quixye reheb: —Chalen sa' xticlajic quinye chak ere anihin lain. ²⁶ Nabal li c'a'ak re ru naru tinye raj ere re xrakbal atin sa' eben. Li ani quitaklan chak cue, a'an tic xch'ol ut naxye li yal. Li c'a'ru xc'ut chicu li quitaklan chak cue, a'an li ninye ere laex li cuanqueb sa' ruchich'och', chan. ²⁷ Abanan eb a'an inc'a' que'xtau ru nak li Jesús yo chi atinac chirix li Acuabej Dios. ²⁸ Ut quixye ajcui' li Jesús reheb: —Nak acak xinetaksi chiru li cruz re incamsinuil toj aran teg'ue retal nak lain li taklanbilin chak xban li Dios. Ut tenau nak maç'a' ninbanu injunes. Li c'a'ru ninye lain, a'an li quixc'utbesi chicu lin Yucua'. ²⁹ Li ani quitaklan chak cue, a'an cuan cuiq'uin. A'an inc'a' quinxicanab injunes xban nak lain junelic ninbanu li c'a'ru naraj a'an, chan li Jesús. ³⁰ Nabaleb que'paban re li Jesús nak que'rabi li c'a'ru quixye.

Li Jesús quixye anihéb li rälal xc'ajol laj Abraham ut anihéb li rälal xc'ajol laj tza

³¹ Li Jesús quiätinac riq'uibeb laj judío li que'paban re. Quixye reheb: —Cui laex tebanu li c'a'ru ninye ere, laexak tz'akal intzolom. ³² Tenau chic li xyalal. Ut nak acak xenau chic li xyalal, libre chic cuankex, chan. ³³ Eb a'an que'chak'oc ut que'xye: —Lao rälal xc'ajol laj Abraham. Ma jun cua c'ayinbilo chi c'anjelac chiru anihak. ¿C'a'ut nak nacaye nak libre chic cuanko? ³⁴ Li Jesús quixye reheb: —Relic chi yal ninye ere nak chixjunibeb li neque'xbanu li mausilal cuanqueb rubel xcuanquil li maç. Chanchan nak c'ayinbibleb chi c'anjelac chiru. ³⁵ Junak c'ayinbil chi c'anjelac moco taçanaç ta chi junaj cua sa' rochoch lix patrón. A'ut li alalbej, a'an tento nak taçanaç sa' rochoch chi junaj cua. ³⁶ Jo'can nak cui lain li C'ajolbej tincolok ere chiru li maç, relic

chi yal libre chic cuankek. ³⁷ Lain ninnau nak laex xcomonex li ralal xc'ajol laj Abraham. Abanan cuan sa' eyank li te'raj incamsinquil xban nak inc'a' nacuulac chiruheb li c'a'ru yoquin chixyebal. ³⁸ Lain ninye li c'a'ru quixc'ut chicuu lin Yucua'. Ut eb a'an neque'xbanu li c'a'ru quixye reheb lix yucua'eb a'an, chan. ³⁹ Eb a'an que'xye re: —Laj Abraham, a'an li kaxe'tonil yucua', chanqueb. Li Jesús quixye reheb: —Cui ta laex ralal xc'ajol laj Abraham, tebanu raj jo' quixbanu laj Abraham. Chabil raj le na'leb jo' xna'leb a'an nak quicuan. ⁴⁰ Abanan laex teraj incamsinquil xban nak lain xinye ere li xyalal jo' quic'utbesic chicuu xban li Dios Acuabej. Laj Abraham inc'a' quixbanu jo' yoquex laex. ⁴¹ Inc'a' yoquex chixbanunquil li quixye laj Abraham. Yoquex ban chixbanunquil li naxye le yucua', chan li Jesús. Eb a'an que'chak'oc ut que'xye re: —Moco lao ta ralal xc'ajol laj co'bet. Jun ajcui' li kayucua' cuan. A'an li Dios, chanqueb. ⁴² Li Jesús quixye reheb: —Cui ta yal nak li Dios eyucua', niquinera raj lain xban nak riq'uin li Dios quinchal chak. Cuanquin arin sa' eyank. Inc'a' quintakla chak cuib injunes. A' li Dios, a'an li quitaklan chak cue. ⁴³ ¿C'a'ut nak inc'a' nequetau ru li c'a'ru ninye? Inc'a' neque'ul li cuatin xban nak inc'a' nequeraj rabinquil li c'a'ru yoquin chixyebal. ⁴⁴ Laex ralal xc'ajol laj tza. A'an li nataklan sa' eben. Laex nequebanu li c'a'ru naraj a'an xban nak cuanquex rubel xcuanquil. A'an aj camsinel chalen sa' xticlajic. Inc'a' nacuulac chiru li yal xban nak a' aj tic'ti'. Ac re nak natic'ti'ic. A'an li xyucua'il li tic'ti'. ⁴⁵ Lain ninye ere li xyalal. Jo'can nak inc'a' niquinepab. ⁴⁶ ¿Ma cuan junak sa' eyank taruk tixye nak cuan inmac lain? Cui ninye li yal, ¿c'a'ut nak inc'a' niquinepab? ⁴⁷ Cui ta laex ralal xc'ajol li Dios, nequepab raj li c'a'ru naxye. Abanan laex macua'ex ralal xc'ajol li Dios. Jo'can nak inc'a' nequeraj rabinquil li c'a'ru naxye, chan li Jesús. ⁴⁸ Que'chak'oc eb laj judío ut que'xye re: —Yal ajcui' nacaye. Samaria la tenamit ut cuan maus aj musik'ej acuiq'uin, chanqueb. ⁴⁹ Li Jesús quixye reheb: —Mac'a' maus aj musik'ej cuiq'uin. Li c'a'ru yoquin chixbanunquil lain, a'an xq'uebal xlok'al lin Yucua'. Abanan laex niquinez'ektana. ⁵⁰ Lain inc'a' ninsic' inlok'al. Abanan cuan jun naraj nak taq'uehek' inlok'al. Ut a'an li tarakok atin sa' eben xban nak yoquex chintz'ektananquil. ⁵¹ Relic chi yal ninye ere nak li ani tixbanu li c'a'ru ninye, li jun a'an inc'a' tacamk, chan. ⁵² Eb laj judío que'chak'oc ut que'xye: —Anakcuan nakanau chi tz'akal nak cuan maus aj musik'ej acuiq'uin. Laj Abraham quicam ut que'cam ajcui' eb li profeta. Abanan laet nacaye nak li ani tabanunk re li c'a'ru nacaye inc'a' tacamk. ⁵³ ¿Ma k'axal nim ta bi' acuanquil laet chiru laj Abraham li kaxe'tonil yucua'? A'an quicam ut que'cam ajcui' li profeta. ¿Anihat laet nak nacaye chi jo'can? chanqueb re. ⁵⁴ Li Jesús quixye reheb: —Cui lain ting'ue inlok'al injunes, mac'a' na-oc cui' lin lok'al. Li naq'uehoc lin lok'al, a'an lin Yucua' li nequeye laex nak a'an le Dios. ⁵⁵ Laex inc'a' nequenau ru a'an. Abanan lain ninnau ru. Cui ut tinye ta nak inc'a' ninnau ru, lainak raj aj tic'ti' jo' laex. Aban lain ninnau ru ut ninbanu li c'a'ru naxye a'an. ⁵⁶ Laj Abraham le xe'tonil yucua' quisaho' sa' xch'ol nak tinchalk sa' ruchich'och'. Quiril nak quinc'ulun ut quisaho' sa' xch'ol xban, chan li Jesús reheb. ⁵⁷ Eb a'an que'xye re: —¿Chanru nak xacuil ru laj Abraham? Laet toj maji' nacabanu lajeb roxc'al (50) chihab, chanqueb. ⁵⁸ Li Jesús quichak'oc ut quixye reheb: —Relic chi yal tinye ere nak chafen chak sa' xticlajic nak toj maji' nayo' laj Abraham, ac cuanquin ajcui' chak lain, chan li Jesús. ⁵⁹ C'ajo' nak que'josk'o' ut que'oc raj chixcutinquil chi pec. Abanan li Jesús quixmuk rib chiruheb. Qui-el sa' li templo ut co.

9

Li Jesús quixq'uirtesi jun li cujnk mutz' ru chalen sa' xyo'lajic

1 Nak yo chi xic li Jesús, quiril jun li cujnk mutz' ru chalen sa' xyo'lajic.
 2 Eb lix tzolom li Jesús que'xpatz' re: —At tzolonel, ¿c'a'ut nak mutz' ru li cujnk a'in? ¿Ani cuan xmac? ¿Ma li cujnk a'in malaj ut lix na' xyucua? chanqueb. 3 Li Jesús quixye: —Ma ani cuan xmac. Chi moco a'an, chi moco lix na' xyucua'. A'an xc'ul chi jo'can yal re nak tac'utbesik lix cuanquilal li Dios, chan. 4 Tenta nak tineseba cuib chixbanunquil li c'a'ru naraj li Dios li xtaklan chak cue. Anakcuan xcutanquil xbanunquil xban nak tacuulak xk'ehil nak ma' ani chic taruk tac'anjelak. 5 Nak toj cuan'kin sa' ruchich'och', lain tincutanobresi lix c'a'uxeb li cuanqueb sa' ruchich'och', chan. 6 Nak ac xye a'in, li Jesús quichubac sa' ch'och'. Riq'uin lix chub quixyib li sulul. Ut quixyul sa' rix ru li mutz'. 7 Ut quixye re: —Ayu. Ch'aj chak la' cuu sa' li ha' Siloé, chan. Siloé naraj naxye “taklanbil chak”. Li mutz' co ut quixch'aj chak li ru ut na-iloc chic nak quisuk'i chak. 8 Ut eb li rech cabal ut chixjunib li neque'na'oc nak mutz' ru, que'xye: —¿Ma macua' ta bi' a'an li nac'ojla chire be chixtz'amanquil c'a'ru re? chanqueb. 9 Ut cuan li que'yehoc: —Yal. A'an li cujnk, chanqueb. Cuan cui'chic li que'xye: —Chan'chan a'an, aban macua', chanqueb. Ut li cujnk quixye: —Lain li cujnk a'an, chan. 10 Ut que'xye re: —Cui la'at li cujnk a'an, ¿chanru nak xtehon li xnak' acuu? chanqueb. 11 Quichak'oc li cujnk ut quixye reheb: —Li cujnk Jesús xc'aba', quixyib li sulul. Quixyul sa' rix cuu ut quixye cue nak tinxic chi ch'ajoc sa' li ha' Siloé. Jo'can nak co'in ut quinch'aj li cuu ut anakcuan nin-iloc chic, chan li cujnk. 12 Ut que'xye re: —¿Bar cuan li cujnk a'an? chanqueb. Ut li cujnk quixye reheb: —Inc'a' ninnau bar cuan, chan. 13 Ut que'xc'am riq'uibneb laj fariseo li cujnk li mutz' nak quicuan, 14 xban nak li Jesús quixyib li sulul sa' li hilobal cutan ut quixq'ue chi iloc li mutz'. 15 Ut eb laj fariseo que'xpatz' cui'chic re li cujnk chanru nak quiteli li xnak' ru. Li cujnk quixye reheb: —Li Jesús quixq'ue li sulul sa' rix cuu, ut quinch'aj li cuu ut anakcuan nin-iloc chic, chan. 16 Cuanqueb laj fariseo que'xye: —Li cujnk a'an, li Jesús xc'aba', moco taklanbil ta chak xban li Dios xban nak inc'a' naxq'ue xlok'al li hilobal cutan, chanqueb. Ut cuanqueb cui'chic que'yehoc re: —¿Chanru nak tixbanu li milagro junak cujnk aj mac? chanqueb. Xban nak jalan jalank neque'xc'oxla chirix li Jesús, inc'a' chic junajeb xch'oleb. 17 Jo'can nak eb laj fariseo que'xpatz' cui'chic re li cujnk, li mutz' nak quicuan. Que'xye re: —Ut la'at, ¿c'a'ru nacaye chirix li cujnk a'in li xq'uehoc acue chi iloc? chanqueb re. Ut li cujnk quixye reheb: —Lain ninye nak a'an profeta, chan. 18 Ut eb laj judío li neque'taklan inc'a' que'raj xpabanquil nak li cujnk mutz' junxil ut na-iloc chic. Jo'can nak que'xtakla xbokbal lix na' xyucua'. 19 Ut que'xpatz' reheb: —¿Ma a'in le ralar? ¿Ma yal nak mutz' li ru chalen sa' xyo'lajic? ¿Chanru nak na-iloc chic anakcuan? chanqueb. 20 Que'chak'oc lix na' xyucua' ut que'xye: —Lao nakanau nak a'an li kalal. Ut nakanau nak a'an mutz' chalen sa' xyo'lajic. 21 Abanan inc'a' nakanau ani xtehoc li ru chi moco nakanau chanru nak na-iloc chic. Patz'omak re a'an. Ac cuan xchihab. Tixnau chic xsumenquil a'an, chanqueb. 22 Que'xye chi jo'can lix na' xyucua' xban nak que'xucua'c xbaneb li neque'taklan sa' xyankeb laj judío xban nak ac c'ubanbil ru xbaneb cui ani tixye nak li Jesús, a'an li Cristo, li jun a'an inc'a' chic tac'ulek' sa' li cab li neque'xch'utub cui' ribeb laj judío. 23 Jo'can nak lix na' xyucua' que'xye: —A'an ac cuan xchihab. Patz'omak re a'an.— 24 Eb laj fariseo que'xbok cui'chic xca' sut li cujnk, li mutz' nak quicuan, ut que'xye

re: —Sa' xc'aba' li Dios taye ke li xyalal. Lao nakanau nak li cujnk a'an aj mac, chanqueb re. ²⁵ Li cujnk, li mutz' nak quicuan, quixye reheb: —Lain inc'a' ninnau ma aj mac malaj ut inc'a'. Ca'aj cui' li ninnau lain nak mutz'in nak xincuan ut anakcuan nin-iloc chic, chan. ²⁶ Ut que'xye cui'chic re: —¿C'a'ru xbanu acue? ¿Chanru nak xatxq'ue chi iloc? chanqueb. ²⁷ Li cujnk quixye reheb: —Ac xinye ere chanru xbanu nak xinixq'ue chi iloc ut inc'a' xeraj xpabanquil. ¿C'a'ut nak teraj terabi cui'chic? ¿Ma teraj ajcui' oc chok' xtzolom laex? chan reheb. ²⁸ Ut que'xhob li cujnk ut que'xye re: —Laat xtzolom li cujnk a'an. Lao inc'a'. Lao xtzolom laj Moisés, chanqueb re. ²⁹ —Lao nakanau nak li Dios quiatinac riq'uin laj Moisés; abanan li cujnk a'an inc'a' nakanau bar xchal chak, chanqueb. ³⁰ Li cujnk quixye reheb: —Laex nequeye nak inc'a' nequenau bar xchal chak li cujnk a'an. Nasach inch'ol eban xban nak li cujnk a'an xq'uehoc cue chi iloc lain. ³¹ Lao nakanau nak li Dios inc'a' narabi nak neque'tijoc laj mac. Narabi ban lix tijeb li neque'xxucua ru ut neque'xbanu li c'a'ru naraj. ³² Chalen chak sa' xticlajic li ruchich'och', ma jun sut qui-abiman nak cuan ta junak cujnk tixte ta xnak' ru junak mutz' chalen sa' xyo'lajic. ³³ Cui ta inc'a' taklanbil chak xban li Dios li cujnk a'in, mac'a' raj naru naxbanu, chan li cujnk reheb. ³⁴ Eb a'an que'chak'oc ut que'xye re: —Laat aj mac chalen chak sa' ayo'lajic. ¿Ma nacac'oxla nak naru taq'ue kana'leb lao? chanqueb. Ut que'risi li cujnk sa' xyankeb ut inc'a' chic que'xc'ul. ³⁵ Li Jesús quirabi resil li c'a'ru que'xbanu. Nak quixtau li cujnk li quixq'uirtesi, quixye re: —¿Ma nacapab li Ralal li Dios? chan re. ³⁶ Li cujnk quixye re: —Ye cue ani a'an, Kacua', re nak taruk tinpab lain, chan. ³⁷ Li Jesús quixye re: —A'an li yocat chirilbal ru anakcuan. Li Ralal li Dios, a'an lain li yoquin chi atinac acuiq'uin, chan. ³⁸ Li cujnk quixye: —At Kacua', lain nacatinpab, chan ut quixcuik'ib rib chiru ut quixlok'oni. ³⁹ Li Jesús quixye re: —Lain xinchal sa' ruchich'och' chi rakoc atin. Lain tincutanobresi xna'lebeb li inc'a' neque'xtau xyalal. Ut tinmuk li xyalal chiruheb li neque'xc'oxla nak cuanqueb xna'leb. Chanchan nak tinq'ueheb chi iloc li inc'a' neque'iloc. Ut tinq'ueheb chi mutz'oc' li neque'iloc, chan li Jesús. ⁴⁰ Cuanqueb laj fariseo aran ut yoqueb chirabinquil li quixye li Jesús. Eb a'an que'xye re li Jesús: —¿Ma mutz'o' ta bi' lao nak nacac'oxla laat? chanqueb. ⁴¹ Li Jesús quixye reheb: —Chanchanex mutz'. Cui ta laex inc'a' nequenau xyalal, mac'a' raj emac. Abanan cuan emac xban nak nequeye nak nequenau xyalal, chan li Jesús.

10

Li Jesús quixye nak a'an li chabil pastor

¹ Relic chi yal tnye ere, li ani na-oc sa' xcorraleb li carner chi inc'a' nac-oc sa' li tz'akal oquebal re li corral, li jun a'an aj elk'. ² Abanan li ani nac-oc sa' li tz'akal oquebal re li corral, li jun a'an aj ilol reheb li carner. ³ Li nac'ac'alen re li oquebal naxnau ru a'an ut naxte li oquebal chiru. Ut eb li carner neque'xnau ru li xyab xcux nak naxbokeb chi xjunkaleb riq'uin lix c'aba'eb ut narisiheb sa' li corral. ⁴ Nak ac xrisiheb, naxberesiheb ut eb li carner neque'xtake xban nak neque'xnau ru xyab lix cux. ⁵ Abanan junak li inc'a' neque'xnau ru, ma jok'e te'xtake. Elelic ban chic te'xbanu chiru xban nak inc'a' neque'xnau ru xyab lix cux, chan li Jesús. ⁶ A'an a'in li jaljoquil ru atin li quixye li Jesús reheb. Abanan inc'a' que'xtau ru lix yalal. ⁷ Jo'can nak li Jesús quixye cui'chic reheb: —Relic chi yal ninye ere, Lain li oquebal reheb li te'pabank cue. ⁸ Chixjunileb li que'c'ulun xben cua chicuu lain,

a'aneb aj elk'eb ut aj balak'eb. Ut eb li neque'paban cue, inc'a' neque'xpab li c'a'ru neque'xye. ⁹ Lain li oquebal. Chixjunileb li neque'paban cue lain, te'colek' ut lain tin-ilok reheb. Chanchaneb li carner li neque'oc ut neque'el ut neque'xtau lix cuaheb. ¹⁰ Laj elk' nachal chi elk'ac ut chi camsinc ut chi sachoc. Lain xinhal re nak taçuanç eyu'am chi tz'akal. Taçuanç eyu'am chi junelic. ¹¹ Lain chanchanin jun li çhabil pastor. Junak çhabil pastor naxk'axtesi lix yu'am sa' xc'aba'eb lix carner. ¹² Junak tojbil moç maçua' tz'akal pastor xban nak maçua' a'an laj eçal re li carner. Naril nak yo chi ççalç laj xoj, naxcanabeb li carner ut naeletic. Ut laj xoj naxçapeb li carner ut naxça'cha'i ruheb. ¹³ Li tojbil moç naeletic xban nak yal moç. A'an inc'a' naxq'ue xch'ol chixcolbaleb li carner. ¹⁴ Lain chanchanin jun çhabil pastor. Lain ninnau ruheb li cualal inc'ajol. Ut eb a'an neque'xnau cuu lain. ¹⁵ Jo' nak lin yucua' naxnau cuu lain, jo'can ajcui' nak ninnau ru lin yucua' ut tink'axtesi cuib chi camsic re xcolbaleb li cualal inc'ajol. ¹⁶ Cuanqueb ajcui' cualal inc'ajol jalaneb xtenamiteb. Tento nak lain tinc'ameb çhak. Eb a'an te'rabi ajcui' xyab lin cux. Ut junajakeb chic ru nak te'cuank ut junak ajcui' laj ilol reheb. ¹⁷ Ninxra li Yucua'bej xban nak lain tink'axtesi cuib chi camsic ut tinc'ul cui'chic lin yu'am. ¹⁸ Ma ani taq'uehok cue chi camsic cui inc'a' nacuaç lain. Xban nak lain nacuaç, tink'axtesi cuib chi camsic. Cuan incuanquil chixk'axtesinquit lin yu'am. Ut cuan ajcui' incuanquil chixc'ulbal cui'chic lin yu'am. A'an a'in li quixye cue lin Yucua' nak tento tinbanu, çhan li Jesús. ¹⁹ Ut xban nak jalan jalank yoqueb chixc'oxlanquil chirix li quixye li Jesús, quicuan cui'chic jachoc ib sa' xyankeb. ²⁰ Nabaleb que'yehoc re: —Cuan maus aj musik'ej riq'uin. Inc'a' tuktu xjolom. Ç'a'ut nak nequerabi li c'a'ru naxye a'an? çanqueb. ²¹ Ut cuanqueb cui'chic yoqueb xyebal: —Inc'a' naru taatinak chi jo'can cui cuan maus aj musik'ej riq'uin. ÇMa taruk ta bi' tixq'ue chi iloc junak mutz' cui cuan maus aj musik'ej riq'uin? çanqueb.

Li Jesús quitz'ektanç xbaneb laj judío

²² Yo li habalk'e aran Jerusalén nak quicuulac xk'ehil li nink'e re xjulticanquil nak que'xk'axtesi li templo sa' ruk' li Kaçua' Dios. ²³ Ut li Jesús yo chi beç sa' li templo bar cuan cui' li oquebal Salomón xc'aba'. ²⁴ Quisute' xbaneb laj judío ut que'xye re: —ÇJok'e taye ke chi tz'akal anihat? ÇMa yal yokat chixq'uebal kac'a'ux? ÇMa laät li Mesías, li yechi'inbil xban li Dios? Cui laät li Cristo, ye ke chi tz'akal anakcuan, çanqueb. ²⁵ Li Jesús quixye reheb: —Ac xinye ere anihin ut inc'a' niquinepab. Li milagros li yoquin chixbanunquil sa' xc'aba' lin Yucua', a'an naxc'ut chi tz'akal anihin. ²⁶ Laex inc'a' niquinepab xban nak laex maçua'ex cualal inc'ajol. ²⁷ Eb li cualal inc'ajol neque'rabi li c'a'ru ninye. Lain ninnauheb ru ut eb a'an neque'xbanu li c'a'ru ninye. ²⁸ Lain ting'ueheb xyu'am chi junelic. Inc'a' te'osok' ut ma ani taruk tamak'ok reheb chicuu. ²⁹ Lin Yucua' li k'axal nim xcuanquil chiruheb chixjunil, a'an li quik'axtesin reheb sa' cuuk'. Ma ani naru tamak'ok reheb chiru a'an. ³⁰ Lain ut li Yucua'bej junajo chi kibil kib, çhan li Jesús. ³¹ Ut eb laj judío que'xchap xpequeb ut que'raj cui'chic xcutbal chi pec. ³² Li Jesús quixye reheb: —Nabal li çhabilal xinbanu çheru jo' quic'utbeçic chicuu xban lin Yucua'. ÇBar cuan reheb li çhabil c'anjel a'in li xinbanu tineçuti cui' chi pec? çhan. ³³ Eb a'an que'çhak'oc ut que'xye: —Inc'a' tatkatut chi pec xban li çhabilal xabanu. Tatkatut chi pec xban nak nacajuntak'eta açulib riq'uin li Dios. Laät yal cuinkat. Moco Diosat ta jo' yocat chixyebal, çanqueb re li Jesús. ³⁴ Li Jesús quixye reheb: —ÇMa inc'a' ta bi' tz'ibanbil retalil sa' le çhak'rab nak li Dios quixye reheb li que'culuc re li raçin “diosex laex”? (Sal.

82:6)³⁵ Nakanau nak inc'a' naru takaye nak inc'a' yal li tz'ibanbil sa' li Santil Hu. Li Dios quixye “dios” reheb li quixxakab. ³⁶ Li Acuabej Dios xsic'oc cuu ut xinixtakla chak sa' ruchich'och'. ¿C'a'ut nak nequeye laex nak yoquin chixmajecuanquil li Dios riq'uin nak ninye nak lain li Ralal? ³⁷ Cui lain inc'a' yoquin chixbanunquil li c'a'ru naraj lin Yucua', mepab nak lain li Ralal li Dios. ³⁸ Abanan cui yoquin chixbanunquil li c'a'ru naraj li Dios, usta inc'a' niquinepab lain, cheq'ue retal li milagro li yoquin chixbanunquil re nak tenau chi tz'akal nak li Dios cuan cuiq'uin ut lain cuanquin riq'uin a'an, chan li Jesús. ³⁹ Ut que'xyal cui'chic xchapbal, abanan li Jesús qui-el chiruheb. ⁴⁰ Ut co jun pac'al li nima' Jordán sa' li na'ajej li quicubsin cui' ha' laj Juan junxil. Ut aran quicana. ⁴¹ Nabaleb li tenamit que'cuulac riq'uin. Yoqueb chixyebal chi ribileb rib: —Laj Juan ma jun milagro quixbanu. Abanan yal chixjunil li quixye chirix li cujnk a'in, chanqueb. ⁴² Ut nabaleb li cuanqueb aran que'xpab li Jesús.

11

Laj Lázaro quicam, abanan li Jesús quixcuaclesi cui'chic chi yo'yo

¹ Jun li cujnk aj Lázaro xc'aba' quiyajer. Betania xtenamit. Ut aran ajcui' cuanqueb li ranab cuib, lix Marta ut lix María. ² (Lix María, a'an li quiq'uehoc re li sununquil ban chiru rok li Jesús ut quixmes riq'uin rismal xjolom.) ³ Eb li ranab que'xtakla xyebal re li Jesús: —Kacua', laj Lázaro li nacara yaj. ⁴ Li Jesús quirabi nak yaj laj Lázaro, ut quixye: —Laj Lázaro inc'a' taçamk chi junaj cua xban li yajel a'an. Li yajel a'an yal re nak taq'uehek' xlok'al li Dios ut taq'uehek' ajcui' inlok'al lain li Ralal li Dios, chan. ⁵ Li Jesús naxraheb lix María ut lix Marta jo' ajcui' laj Lázaro. ⁶ Abanan inc'a' co chirilbal chi junpat, usta quirabi nak nim xyajel laj Lázaro. Toj quicana ban cuib cutan chic sa' li na'ajej li cuan cui'. ⁷ Nak ac xnume' li cuib cutan, li Jesús quixye reheb lix tzolom: —Yo'keb cui'chic Judea, chan. ⁸ Lix tzolom que'chak'oc ut que'xye: —At tzolonel, nak cuanco aran, eb laj judío li cuanqueb aran que'raj raj açamsinquit chi pec. ¿Ma toxic cui'chic aran? chanqueb. ⁹ Li Jesús quixye reheb: —¿Ma inc'a' ta bi' cablaju or ru li jun cutan? Li ani nabec chi cutan inc'a' naxtich rib xban nak cutan. ¹⁰ Abanan li ani nabec chiru k'ojyjn, naxtich rib xban nak mac'a' li cutan saken riq'uin. Li ani naxbanu jo' naraj li Dios inc'a' te'xcamsi chi toj maji' nacuulac xk'ehil. ¹¹ Nak ac xye a'in, li Jesús quixye reheb lix tzolom: —Laj Lázaro li nakara, yo chi cuarc. Abanan lain xic cue chirajsinquit, chan. ¹² Eb lix tzolom que'xye: —Kacua', cui yo chi cuarc, a'an retalil nak taq'uirak, chanqueb. ¹³ Eb a'an inc'a' que'xtau ru nak li Jesús quixye nak camenak chic laj Lázaro. Sa' xch'oleb a'an nak yal nak yal cuarc yo. ¹⁴ Tojo'nak li Jesús quixye chi tz'akal reheb: —Laj Lázaro camenak chic. ¹⁵ Abanan nasaho' sa' inch'ol nak ma anihin chak aran nak xcam re nak laex tepab nak cuan incuanquil. Yokeb riq'uin, chan li Jesús. ¹⁶ Laj Tomás, li neque'xye lut re, quixye reheb li rech aj tzolonelil: —Yo'keb ajcui' lao usta tocamsik kochben laj tzolonel, chan. ¹⁷ Nak quicuulac li Jesús aran Betania, ac cuan chic चाहिब cutan xmukbal laj Lázaro. ¹⁸ Li tenamit Betania nach' cuan riq'uin Jerusalén, mero legua tana xnajtil. ¹⁹ Nabaleb laj judío que'chal chixc'ojbanquil xch'oleb lix María ut lix Marta xban nak ac xcam li raseb. ²⁰ Que'rabi nak yo chi chalç li Jesús, ut lix Marta co chixc'ulbal. Abanan lix María quicana sa' cab. ²¹ Lix Marta quixye re li Jesús: —Kacua', cui ta cuancat arin, inc'a' raj xcam li cuas. ²² Abanan lain ninnau nak chixjunil

li c'a'ru tatz'ama chiru li Dios, a'an tixq'ue açue, chan lix Marta. ²³ Li Jesús quixye re: —La cuas taçuaclik cui'chic chi yo'yo, chan. ²⁴ Ut lix Marta quixye: —Lain ninnau nak taçuaclik cui'chic chi yo'yo nak te'cuaclik li camenak sa' roso'jiqueb li cutan, chan. ²⁵ Ut li Jesús quixye re: —Lain li nincuacliesin reheb li camenak chi yo'yo. Lain li ninq'uehoc junelic yu'am. Li ani napaban cue lain taçuank xyu'am chi junelic usta nacam. ²⁶ Ut li ani cuan xyu'am ut niquinixpab, inc'a' taçamk chi junaj cua. Cuank ban xyu'am chi junelic. ¿Ma nacapab a'in? chan li Jesús. ²⁷ Quichak'oc lix Marta ut quixye: —Ninpab, Kaçua'. Lain ninnau nak laät li Cristo li Ralal li Dios li yoco chiroybeninquil, chan lix Marta. ²⁸ Nak ac xye a'in, lix Marta ço sa' rochoch chixbokbal lix María li rjtz'in. Ut quixye re chi timil re nak inc'a' te'rabi chixjunileb: —Xc'ulun laj tzolonel ut taraj atinac açuiq'uin, chan re. ²⁹ Nak lix María quirabi nak ac xc'ulun li Jesús, ço sa' junpat chixc'ulbal. ³⁰ Li Jesús toj maji' na-oc sa' li tenamit. Toj cuan chak sa' li na'ajej bar quic'ule' cui' xban lix Marta. ³¹ Nabaleb laj judío li cuanqueb sa' li rochoch yoqueb chixc'ojobanquil xch'ol lix María. Que'ril nak ço sa' junpat. Que'xtake xban nak eb a'an que'xc'oxla nak lix María ço chi yabac sa' li muklebal. ³² Lix María quicuulac cuan cui' li Jesús. Nak quiril ru, quixcuik'ib rib chiru ut quixye re: —Kaçua', cui ta cuancat arin, inc'a' raj xcam li cuas, chan re. ³³ Li Jesús quiril nak yo chi yabac ut yoqueb açui' chi yabac li cuanqueb rochben. C'ajo' nak quiyot'e' xch'ol chi rilbal. ³⁴ Ut quixye reheb: —¿Bar xemuk?— Que'xye re: —Yo'o re taçuil bar xkamuk, chanqueb. ³⁵ Ut li Jesús quiyabac xban xrahil xch'ol. ³⁶ Cuanqueb aran que'xye: —Ilomak c'ajo' nak quixra li camenak, chanqueb. ³⁷ Ut cuanqueb cui'chic li que'xye: —A'an quixq'ue chi iloc li mutz'. ¿Ma inc'a' raj xru quixcol laj Lázaro chiru li çamc? chanqueb. ³⁸ Ut quiyot'e' cui'chic xch'ol li Jesús. Ço aran cuan cui' li muklebal yibanbil sa' jun ochoch pec. Li muklebal tz'aptz'o riq'uin jun nimla pec. ³⁹ Quixye li Jesús: —Isihomak li pec.— Lix Marta, li ranab li camenak quixye re: —Kaçua', ac xchuho'. Cuan chic çahib cutan xmukbal, chan. ⁴⁰ Quixye li Jesús re: —¿Ma inc'a' xinye açue nak cui tapab, taçuil xcuanquihal li Dios? chan. ⁴¹ Ut que'risi li pec chire li muklebal li que'xq'ue cui' li camenak. Li Jesús qui-iloc takec' ut quitijoc. Quixye: —At inYucua', ninbantioxi çaçuu nak nacacuabi li c'a'ru nintz'ama çaçuu. ⁴² Lain ninnau nak junelic niquinacuabi. Abanan ninye açue a'in re nak eb li cuanqueb arin te'ril li c'a'ru tinbanu ut te'xpab nak laät xattaklan chak cue, chan li Jesús nak quitijoc. ⁴³ Nak quirake' chi tijoc, li Jesús quixye chi cau xyab xcux: —At Lázaro, cuacilin chak ut quim arin, chan. ⁴⁴ Ut laj Lázaro li quicam qui-el chak. Lanlo sa' jun t'icr jo' c'aynakeb chixbanunquil reheb li camenak. Li ru lanlo açui' sa' t'icr ut bac'bo li rok ut bac'bo li ruk'. Li Jesús quixye reheb: —Hitomak ut canabomak chi bec, chan.

Eb laj judío que'xc'ub ru chanru nak te'xcamsi li Jesús

⁴⁵ Ut nabaleb laj judío li cuanqueb rochben lix María que'xpab li Jesús nak que'ril li milagro li quixbanu. ⁴⁶ Abanan cuanqueb açui' li que'çoeb riq'uineb laj fariseo ut que'xye reheb chixjunil li quixbanu li Jesús. ⁴⁷ Ut eb laj fariseo rochbeneb li xbenil aj tij que'xch'utub ribeb riq'uineb li neque'taklan sa' xyankeb laj judío ut que'xye reheb: —¿C'a'ru takabanu? Li cuink a'in nabal li milagro yo chixbanunquil. ⁴⁸ Cui takacanab chi jo'can, chixjunileb li tenamit te'pabank re. Ut te'josk'ok kiq'uin eb laj Roma li neque'taklan sa' kaben. Te'xjuc' li katemplo ut te'xsach li katenamit, chanqueb. ⁴⁹ Jun li cuink

aj Caifás xc'aba', a'an li xyucua'il aj tij sa' li chihab a'an. Quixye reheb: — *Laex maç'a' ena'leb.* ⁵⁰ *¿Ma inc'a' nequec'oxla nak k'axal us raj nak taçamk jun chi cuñk sa' xc'aba'eb li tenamit chiru nak taçachek' ku chikajunilo lao aj judío xbaneb laj Roma? chan.* ⁵¹ *Laj Caifás, a'an li xyucua'il aj tij sa' li chihab a'an. Ut li c'a'ru quixye inc'a' quixye yal xjunes. Quixye ban xban nak li Dios quic'utuc chiru li c'a'ru tixye. Jo'can nak quixye nak li Jesús taçamk sa' xc'aba'eb laj judío.* ⁵² *Ut maçua' ca'aj cui' sa' xc'aba'eb a'an nak taçamk li Jesús. Re aj ban cui' nak junajakeb chic ru chixjunileb li lalal xc'ajol li cuanqueb sa' chixjunil li ruchich'och'.* ⁵³ *Ut chalen sa' li cutan a'an, eb li neque'taklan sa' xyankeb laj judío que'oc xc'ubanquil ru sa' comonil chanru nak te'xcamsi li Jesús.* ⁵⁴ *Xban nak que'raj xcamsinuil li Jesús, inc'a' chic quiraj xc'utbal rib chiruheb laj judío. Qui-el aran ut co sa' li tenamit Efraín li cuan nach' riq'uin li chaki ch'och'.* *Ut aran quicana rochbened lix tzolom.* ⁵⁵ *Nak yo chi cuulac xk'ehil li nink'e Pascua, nabaleb li cristian coeb Jerusalén chixch'ajobresinuil ribeb jo' c'aynakeb chixbanunquil re xtz'amanuil xcuylal xmaqueb chiru li Dios. Tento te'xbanu a'an re nak taruk te'oquenk sa' li nink'e.* ⁵⁶ *Yoqueb chixsic'bal li Jesús nak que'xch'utub ribeb sa' li templo. Que'xye chi ribileb rib: —¿C'a'ru nequec'oxla laex? ¿Ma taçalk ta cui' sa' li nink'e li cuñk a'an?—* ⁵⁷ *Eb li xbenil aj tij ut eb laj fariseo que'xye reheb li tenamit nak cui ani taabink resil bar cuan li Jesús, tento te'xye resil, re nak taruk te'xtakla xchapbal.*

12

Lix María quixq'ue li sununquil ban chiru rok li Jesús

¹ Cuakib cutan chic ma nacuulac xk'ehil li nink'e Pascua nak quicuulac li Jesús Betania. A'an xtenamit laj Lázaro, li quicam ut quicuaclesic cui'chic chi yo'yo xban li Jesús. ² Que'xcauresi xtzacaemk li Jesús. Laj Lázaro cuan sa' xyankeb li c'ojc'oqueb sa' mex rochben li Jesús. Ut lix Marta yo chixq'uebal li tzacaemk sa' li mex. ³ Lix María quixc'am chak mero botella li sununquil ban terto xtz'ak yibanbil riq'uin nardo. Quixq'ue chiru rok li Jesús ut quixmes riq'uin li rismal xjolom. Ut c'ajo' xsununquil sa' li cab quicana xban xboc li sununquil ban. ⁴ Laj Judas Iscariote li lalal laj Simón, a'an jun reheb lix tzolom. A'an li tak'axtesink re li Jesús sa' ruk'eb li xic' neque'iloc re. ⁵ Quixye: —¿C'a'ut nak inc'a' xc'ayiman li sununquil ban a'in chi oxib ciento denarios ut xq'ueman raj li tumin a'an reheb li neba'? chan. ⁶ Maçua' xban nak naxraheb li neba' nak quixye a'an. Quixye chi jo'can xban nak aj elk'. Riq'uin a'an cuan lix boñsil li tumin ut cuan nak naxchap chok' re a'an li tumin cuan chi sa'. ⁷ Li Jesús quixye re: —Mecuech' rix li c'a'ru xbanu li ixk a'in, xban nak re inmukbal nak xq'ue li ban a'in chiru li cuok. ⁸ Li neba' junelic cuankeb sa' eyank. Yalak jok'e naru tetenk'aheb. Abanan lajn moco cuan kin ta chi junelic eriq'uin, chan li Jesús. ⁹ Nabaleb laj judío que'rabi resil nak li Jesús cuan aran Betania ut que'cuulac aran. Maçua' ca'aj cui' li Jesús que'cuulac chirilbal. Que'cuulac aj ban cui' chirilbal laj Lázaro li quicuaclesic cui'chic chi yo'yo xban li Jesús. ¹⁰ Ut eb li xbenil aj tij que'xc'ub ru nak te'xcamsi ajcui' laj Lázaro, ¹¹ xban nak nabaleb laj judío yoqueb chi elc sa' xyankeb ut yoqueb chixpabanquil li Jesús xban nak quixcuaclesi cui'chic chi yo'yo laj Lázaro.

Li Jesús quiq'uehe' xlok'al ut quixakabac raj chok' rey nak qui-oc Jerusalén

¹² Jo' cuulajak chic li q'uila tenamit que'cuulac sa' li nink'e. Que'rabi resil nak li Jesús cuulac re Jerusalén. ¹³ Quilaje'xc'am chak xxak li mocoçh ut

que'chal chixc'ulbal li Jesús. Japjoqueb re chixyebal: —Lok'oninbil taxak li Kaçua'. Osobtesinbil taxak li xchal sa' xc'aba' li Kaçua' Dios. Osobtesinbil taxak li karey, laõ aj Israel, chanqueb. ¹⁴ Li Jesús quixto'oni jun li ch'ina bur, quitake' chirix ut yo' chi xic Jerusalén jo' tz'ibanbil retalil sa' li Santil Hu:

¹⁵ Mexxucuaç laex li cuanqueb Sión xban nak yo' chak chi çalç le rey. Chirix jun ral bur yo' chak chi çalç. (Zac. 9:9)

¹⁶ Sa' li honal a'an nak yo' chi c'ulmanc li c'a'ak re ru a'in, eb lix tzolom inc'a' que'xtau ru li xyalal. Abanan mokon nak ac quicuacleşic cui'chic chi yo'yo sa' xyankeb li camenak ut quiq'uehe' xlok'al, tojo'nak que'xq'ue retal nak quixc'ul jo' tz'ibanbil chak retalil sa' li Santil Hu chirix. ¹⁷ Eb li tenamit li cuanqueb rochben li Jesús nak quixcuaclesi cui'chic chi yo'yo laj Lázarõ yoqueb chixyebal resilal yalak bar. ¹⁸ Li q'uila tenamit que'cuulac chixc'ulbal li Jesús xban nak que'rabi resil li milagro li quixbanu. ¹⁹ Eb laj fariseo que'xye chi ribileb rib: —¿Ma xeq'ue retal nak maç'a' aj e li yoçõ chixbanunquil? Q'uehomak retal. Anakcuan chixjunileb li tenamit yoqueb chi takenc re li cuñk a'an, chanqueb.

Li Jesús quixye resil nak taçamsjik

²⁰ Cuanqueb li maçua'eb aj judío que'cuulac Jerusalén chi lok'oninc nak yo' li nink'e. ²¹ Que'cuulac riq'uin laj Felipe Betsaida xtenamit xcuent Galilea ut que'xye re: —Kaçua', takaj xnaubal ru li Jesús, chanqueb. ²² Laj Felipe co ut quixye resil re laj Andrés ut coeb xcabichaleb chixyebal re li Jesús. ²³ Li Jesús quixye reheb: —Xcuulac x-oril nak taq'uehek' inlok'al lain li C'ajolbej. ²⁴ Relic chi yal ninye ere nak cui li jun t'orol chi riyajil trigo inc'a' na-auman, jun t'orolak ajcui'. Ut cui na-auman, na-oso' sa' li ch'och'. Jun ajcui' ru li na-oso', abanan nabal li ru naxq'ue nak nauchin. ²⁵ Li ani k'axal naxra lix yu'am sa' li ruchich'och' a'in, a'an tixsach li junelic yu'am. A'ut li ani inc'a' naxra lix yu'am sa' ruchich'och', a'an taçuank xyu'am chi junelic. ²⁶ Li ani taraj c'anjelac chicuu, tento tinixtake ut tixbanu li c'a'ru ninye. Bar cuanquin lain, aran ajcui' taçuank a'an. Ut lin Yucua' taq'uehok xlok'al li ani taç'anjelak chicuu, chan li Jesús reheb. ²⁷ Li Jesús quixye ajcui': —Anakcuan k'axal ra sa' inch'ol. ¿Ma taruk ta bi' tinye re li Dios, “At inYucua', chinacol chiru li raylal a'in”? Lain inc'a' tinye chi jo'can xban nak a'an aj e nak xinçal sa' ruchich'och'. ²⁸ At inYucua', chinimak taxak la lok'al, chan. Ut li Dios quiatinac chak sa' choxa ut quixye: —Ac xnimaç inlok'al, ut tanimak cui'chic, chan li Dios. ²⁹ Ut li que'abin re nak quiatinac li Dios inc'a' que'xnau nak a'an li Dios. Cuan que'xye: —Çak x-ec'an, chanqueb. Ut cuan cui'chic que'yehoc re: —Jun angel x-atinac riq'uin, chanqueb. ³⁰ Ut li Jesús quixye reheb: —Moco re ta inten'anquil lain nak x-atinac li Dios. Re ban eten'anquil laex. ³¹ Anakcuan xcuulac xk'ehil nak li Dios tarakok atin sa' xbeneb li cuanqueb sa' ruchich'och'. Anakcuan taçachek' xcuanguil laj tza li nataklan sa' ruchich'och'. ³² Ut nak tinq'uehek' lain chiru cruz, nabaleb te'pabank cue, chan. ³³ Nak quixye chi jo'can, li Jesús yo' chixyebal reheb chanru nak taçamsjik. ³⁴ Eb li q'uila tenamit que'xye re: —Sa' li kachak'rab laõ aj judío tz'ibanbil retalil nak li Cristo li Mesías taçuank xyu'am chi junelic. ¿Ç'a'ut nak nacaye laät nak li C'ajolbej taq'uehek' chiru cruz? ¿Ani li C'ajolbej li yoçat chixyebal? chanqueb. ³⁵ Quichak'oc li Jesús ut quixye reheb: —Lain li cutan saken. Xinçal chixch'olobanquil li xyalal cheru. Toj tincuanq chic ca'ch'inak sa' eyank. Jo'can nak q'uehomak ech'ol chinpabanquil nak toj cuanquin sa' eyank re nak inc'a' texcuank sa' xk'ojyinal ru li maç. Li ani nacuan sa' xk'ojyinal ru li maç inc'a' naxnau bar yo' chi xic. ³⁶ Chinepab lain

nak toj cuanquin eriç'uin re nak læexak chic li cualal inc'ajol ut cuankek sa' cutan, chan li Jesús. Nak ac xye li atin a'in, li Jesús qui-el sa' xyankeb ut ço sa' jun na'ajej bar inc'a' te'xtau.

Eb laj judío inc'a' que'xpab li Jesús

³⁷ Usta nabal li milagro quixbanu li Jesús chiruheb, abanan inc'a' ajcui' que'paban. ³⁸ A'in quic'ulman re nak tatz'aklok ru li quixye li profeta Isaías nak quixye:

Kacua', çani ta bi' taç'uehok xcuanquil li c'a'ru xkaye? Ut, çani ta bi' taç'uehok xcuanquil li milagro li yocat chixc'utbesinquil chiruheb? (Is. 53:1)

³⁹ Inc'a' quiru que'paban xban nak ac tz'ibanbil chak retalil xban laj Isaías nak jo'can te'xc'ul.

⁴⁰ Chanchaneb li mutz' xban nak que'iloc ut inc'a' que'xtau xyalal. Que'cacuubresic lix ch'oleb xban li Dios re nak inc'a' te'xtau xyalal chi moco te'suk'jik riç'uin re nak tixq'uirtesiheb. (Is. 6:10)

⁴¹ Quixye a'in laj Isaías nak quic'utbesic chiru lix lok'al li Jesús. Jo'can nak quixch'olob li xyalal. ⁴² Cuanqueb nabaleb laj judío que'xpab nak li Jesús, a'an li Mesías. Sa' xyankeb a'an cuanqueb junjunçk li neque'taklan. Abanan inc'a' que'xye resil nak que'paban xban nak que'xucuaç xbaneb laj fariseo. Inc'a' que'raj nak te'isik sa' li cab li neque'xch'utub cui' ribeb laj judío. ⁴³ A' chic li lok'al li neque'xq'ue li tenamit que'xq'ue xcuanquil. Ut inc'a' que'xq'ue xcuanquil li lok'al li naxq'ue li Dios. ⁴⁴ Quixye li Jesús chi cau xyab xcux: —Li ani napaban cue lain, moco ca'aj cui' ta lain niçuinixpab. Naxpab aj ban cui' li quitaklan chak cue. ⁴⁵ Li ani nana'oc cuu lain, naxnau ajcui' ru li quitaklan chak cue. ⁴⁶ Lain xinchal chixq'uebal li cutan saken sa' ruchich'och'. Li ani tapabank cue lain, a'an inc'a' chic taçuanç sa' xk'ojyinal ru li maç. ⁴⁷ Lain inc'a' xinchal sa' ruchich'och' chixq'uebaleb chixtojbäl rix lix maqueb li ani neque'abin re li c'a'ru ninye ut inc'a' neque'xbanu. Maçua' re xq'uebaleb chixtojbäl lix maqueb nak xinchal. Xinchal ban chixcolbaleb. ⁴⁸ Tento nak tarakek' atin sa' xbeneb li neque'tz'ektanan cue, li inc'a' neque'paban re li c'a'ru ninye. Li atin li xinye, a'an ajcui' li taç'uehok reheb chixtojbäl rix lix maqueb sa' roso'jiqueb li cutan. ⁴⁹ Li c'a'ru yoçuin chixyebal, a'an tz'akal yal xban nak moco injunes ta yoçuin chi atinac. Li Yucua'bej li quitaklan chak cue, a'an li nayehoc cue c'a'ru tinye. ⁵⁰ Lain ninnau nak li c'a'ru naxye cue li Yucua'bej, a'an li naq'uehoc yu'am chi junelic. Ut li c'a'ru ninye lain, a'an li naxc'utbesi chicuu li Yucua'bej.

13

Li Jesús quixch'aj li rokeb lix tzolom re xc'utbal chiruheb nak tento te'xcubsi rib

¹ Ac cuulajak naticla li nink'e Pascua. Li Jesús ac naxnau nak cuulac re xk'ehil lix camic re nak taxic cui'chic riç'uin lix Yucua' sa' choxa. Junelic naxraheb li ralal xc'ajol li te'canak sa' ruchich'och' ut nak ac çamc re quixc'utbesi chi tz'akal lix rahom chiruheb. ² Li Jesús yo çhi cua'ac rochbeneb lix tzolom. Laj tza ac xq'ue sa' xch'ol laj Judas li ralal laj Simón Iscariote nak tixk'axtesi li Jesús sa' ruk'eb li xic' neque'iloc re. ³ Li Jesús naxnau nak q'uebil re lix cuanquil xban li Dios ut a'an yal re sa' xben chixjunil. Naxnau nak riç'uin li Dios quichal chak ut riç'uin ajcui' li Dios taxic. ⁴ Nak yoqueb chi cua'ac, li Jesús quicuacu. Quirisi lix t'icr li cuan sa' xben li rak'. Quixchap jun chic li t'icr ut quixbac' chi xsa'. ⁵ Quixq'ue li ha' sa' jun li emel ut qui-oc chixch'ajbal li rokeb lix tzolom. Ut quixmes li

rokeb riq'uin li t'icr bac'bo chi xsa'. ⁶ Nak qui-oc raj chixch'ajbal li rok laj Simón Pedro, a'an quixye re: —Kacua', ¿ma laät tatch'ajok re li cuok lain? chan. ⁷ Li Jesús quixye re: —Anakcuan inc'a' nacatau ru li c'a'ru yoquin chixbanunquil. Abanan mokon tatau ru li xyalal, chan li Jesús. ⁸ Laj Pedro quixye re: —Kacua', ma jok'e ting'ue li cuok re tach'aj, chan. Li Jesús quixye re: —Cui laät inc'a' taq'ue la cuok re tinch'aj, laät macua'at intzolom, chan. ⁹ Laj Simón Pedro quixye: —Kacua', macua' ca'aj cui' li cuok tach'aj. Tach'aj aj ban cui' li cuuk' ut lin jolom, chan. ¹⁰ Li Jesús quixye reheb: —Li ani ac x-atin, ca'aj chic xch'ajbal li rok taraj, xban nak ac ch'ajbil. Ac sak chic ru. Jo'can ajcui' laex. Laex ac tic ech'ol xban nak ac xinepab. Abanan moco chejunilex ta tic ech'ol. Cuan jun sa' eyank inc'a' tic xch'ol, chan. ¹¹ Li Jesús ac naxnau ani li tak'axtesink re sa' ruk'eb li xic' neque'iloc re. Jo'can nak quixye nak cuan jun sa' xyankeb inc'a' tic xch'ol. ¹² Nak ac xrake' xch'ajbal li rokeb, quixq'ue cui'chic li rak' chirix. Quic'ojla cui'chic sa' li mex. Ut quixye reheb lix tzolom: —¿Ma nequenau c'a'ru xyalal nak xinch'aj le rok? chan reheb. ¹³ —Laex nequeye aj tzolonel cue ut nequeye ajcui' Kacua' cue. Us nak nequeye chi jo'can xban nak yal ajcui' nak lain li Kacua' ut lain aj tzolol ere. ¹⁴ Lain li Kacua' ut lain laj tzolol ere. Abanan xinch'aj le rok. Jo'can ajcui' tebanu laex. Tech'aj le rok cheribil erib. ¹⁵ Lain xinc'ut cheru chanru tebanu. Jo'can nak chebanu jo' xinbanu lain. ¹⁶ Relic chi yal ninye ere nak ma jun mos tixk'ax ta ru xcuunquil lix patrón ut li ani nataklaç inc'a' naxk'ax ru lix cuanquil li quitaklan chak re. ¹⁷ Ac nequenau chic xyalal. Us xak ere cui laex tebanu li c'a'ru xetzol cuiq'uin. ¹⁸ Inc'a' yoquin chi atinac cherix chejunilex. Lain ninnau chanru le na'leb xban nak lain xinsic'oc eru. Abanan tento nak tatz'aklok ru li tz'ibanbil sa' li Santil Hu li naxyce chi jo'ca'in: Li jun li nacua'ac cuochben, a'an li tatz'ektanank cue. ¹⁹ Lain ninye ere a'in anakcuan nak toj maji' nac'ulman. Ut nak tac'ulmank, laex tenau nak yal li xinye nak lain li Cristo li taklanbil chak xban li Dios. ²⁰ Relic chi yal tynye ere nak ani tac'uluk re li ani tintakla, tinixc'ul ajcui' lain. Ut li ani tac'uluk cue lain, tixc'ul ajcui' li quitaklan chak cue, chan li Jesús reheb.

Li Jesús quixye nak tak'axtesik sa' ruk'eb li xic' neque'iloc re xban laj Judas Iscariote

²¹ Nak ac xye chixjunil li c'a'ak re ru a'in, li Jesús quiyot'e' xch'ol. Ut quixye chi tz'akal reheb: —Relic chi yal ninye ere nak jun sa' eyank laex tak'axtesink cue sa' ruk'eb li xic' neque'iloc cue, chan. ²² Ut eb lix tzolom que'oc xc'a'uxeb. Que'xca'ya ribeb chi ribileb rib ut que'xye: —¿Ani anchal naxyehan? chanqueb. ²³ Jun reheb lix tzolom, li raro xban, c'ojc'o chixc'atk. ²⁴ Laj Simón Pedro quixc'ut li ruk' chiru ut quixye re nak tixpatz' re li Jesús ani li yo chixyebal. ²⁵ Ut li jun, li c'ojc'o chixc'atk li Jesús, quijiloc riq'uin ut quixpatz' re: —Kacua', ¿ani li yocat chixyebal? chan. ²⁶ Li Jesús quixye re: —Li ani ting'ue cui' li caxlan cua a'in nak acak xintz'a sa' li sec', a'an li cuijnk li tak'axtesink cue sa' ruk'eb li xic' neque'iloc cue, chan. Ut li Jesús quixtz'a li caxlan cua sa' li sec' ut quixq'ue re laj Judas li lalal laj Simón Iscariote. ²⁷ Ut laj Judas quixc'ul li caxlan cua ut sa' ajcui' li honal a'an quixk'axtesi rib chixbanunquil li c'a'ru naraj laj tza. Ut li Jesús quixye re: —Li c'a'ru yocat chixc'oxlanquil xbanunquil, banu chi junpat, chan. ²⁸ Ma jun reheb li cuanqueb sa' li mex que'xtau ru li quixye li Jesús. ²⁹ Cuan li que'xc'oxla nak li Jesús taraj nak laj Judas taxic chixlok'bal li c'a'ak re ru re li nink'e. Ut cuan ajcui' li que'xc'oxla nak taraj nak laj Judas tixq'ue ca'ch'inak li tumin

reheb li neba' xban nak riq'uin laj Judas cuan lix bolsil lix tumineb. ³⁰ Nak ac xc'ul li caxlan cua laj Judas, qui-el sa' junpat chirix cab. Ac k'ojoyin chic.

Li Jesús quixq'ue jun li ac' chak'rab

³¹ Nak laj Judas ac x-el sa' xyankeb, li Jesús quixye: —Anakcuan xcuulac xk'ehil nak tac'utbesik lin lok'al lain li C'ajolbej ut tac'utunk ajcui' lix lok'al li Dios riq'uin li c'a'ru tinc'ul lain. ³² Cui lain tinc'utbesi lix lok'al li Dios, a'an chi seb ajcui' tixc'utbesi lin lok'al lain li C'ajolbej. ³³ Ex cualal inc'ajol, inc'a' chic najt tincuank eri'q'uin. Laex tinesic' raj chic. Abanan lain ma anihakin chic. Ninye ere jo' quinye reheb laj judío li neque'taklan sa' eyank. Bar tinxic lain, laex inc'a' texruk chi xic. ³⁴ Jun li ac' chak'rab tinq'ue ere anakcuan nak cherañak erib cheribil erib. Jo' nak nequexinra lain, jo'can ajcui' nak tera erib laex cheribil erib. ³⁵ Cui tera erib cheribil erib, chixjunileb te'xnau nak laex intzolom, chan li Jesús.

Li Jesús quixye nak laj Pedro tixye nak inc'a' naxnau ru li Jesús

³⁶ Laj Simón Pedro quixpatz' re: —At tzolonel, ¿bar xic acue?— Li Jesús quixye re: —Anakcuan inc'a' naru texxic chicuix bar tinxic cui' lain. Abanan mokon naru texxic li bar xic cui' cue, chan. ³⁷ Laj Pedro quixye cui'chic re: —Kacua', ¿c'a'ut nak inc'a' taruk tinxic chacuix anakcuan? Lain tatintake usta tincamsik xban atakenquil, chan. ³⁸ Li Jesús quixye re: —¿Ma yal nak tinatake usta tatcamsik sa' inc'aba'? Relic chi yal ninye acue nak toj maji' ajcui' nayabac laj tzo' xul nak laet ac xaye oxib sut nak inc'a' nacanau cuu, chan li Jesús.

14

Li ani napaban re li Jesús naxpab ajcui' li Dios Acuabej

¹ Misach ech'ol chi c'oxlac. Chepab li Dios ut chinepab ajcui' lain. ² Sa' rochoch lin Yucua' nabal li na'ajej cuan. Cui ta maç'a' li na'ajej, ac xinye raj ere. Lain xic cue chixcauresinquil ena'aj. ³ Nak ac xyalo' le na'aj, tinchalk cui'chic ut texinc'am cuiq'uin re nak bar cuankin lain, aran ajcui' cuankex laex. ⁴ Laex nequenau lix behil li na'ajej li xic cui' cue, chan li Jesús. ⁵ Laj Tomás quixye re: —At Kacua', inc'a' nakanau bar xic acue. ¿Chan ta cui' ru nak takanau li be? chan. ⁶ Li Jesús quixye re: —Lain aj c'amol be cheru. Lain ninch'olob li xyalal li Dios ut lain ninq'uehoh junelic yu'am. Ma ani taruk taoc riq'uin lin Yucua' cui inc'a' tinixpab lain. ⁷ Li ani naxnau cuu lain naxnau ajcui' ru lin Yucua'. Chalen anakcuan nequenau chic ru lin Yucua' ut xeril ru, chan li Jesús. ⁸ Laj Felipe quixye re: —Kacua', c'utbesi chiku li Yucua'bej ut tac'ojlak kach'ol, chan. ⁹ Li Jesús quixye re: —At Felipe, ac junxil nin-oc sa' eyank. ¿Ma toj maji' nequenau cuu? Li ani nana'oc cuu lain, a'an naxnau ajcui' ru li Yucua'bej. ¿C'a'ut nak nacaye cue, “C'ut chiku li Yucua'bej?” ¹⁰ Felipe, ¿ma inc'a' nacapab nak lain ut li Yucua'bej junaj ku chi kibil kib? Li c'a'ru xinye ere moco yal injunes ta xinye. Li Yucua'bej cuan cuiq'uin, ut a'an nac'utuc chicuu li c'a'ru ninbanu. ¹¹ Chepab nak lain cuanquin riq'uin li Yucua'bej ut a'an cuan cuiq'uin. Junaj ku chi kibil kib. Cui inc'a' niquinepab xban li c'a'ru ninye, chinepabak xbaneb li milagro li yoquin chixbanunquil. ¹² Relic chi yal ninye ere, li ani napaban cue lain, a'an tixbanu li c'anjel ninbanu lain. Ut k'axal cui'chic nabal li tixbanu chiru li xinbanu lain xban nak lain xic cue riq'uin li Yucua'bej. ¹³ Chixjunil li tetz'ama sa' inc'aba', lain tinq'ue ere re nak tanimaç xlok'al li Yucua'bej sa' inc'aba' lain. ¹⁴ Jo'can ut nak yalak c'a'ru tetz'ama sa' inc'aba', lain tinq'ue ere.

Li Jesús quixye nak tixtakla li Santil Musik'ej re taçuank riq'uineb li lalal xc'ajol

¹⁵ Cui niquinera, chebanuhak jo' xexinchak'rabi cui'. ¹⁶ Lain tintz'ama chiru lin Yucua' nak tixq'ue ere li Santil Musik'ej. A'an tac'ojobank ech'ol ut a'an tatenk'ank ere. A'an taçuank eriq'uin chi junelic. ¹⁷ Ut a'an ajcui' li Santil Musik'ej li tac'utuk re li xyalal cheru chirix li Dios. Li inc'a' niquine'xpab inc'a' naru nacuan li Santil Musik'ej riq'uineb xban nak inc'a' neque'xnau ani a'an, chi moco neque'xq'ue retal li c'a'ru naxbanu li Santil Musik'ej. Abanan læx nequenau ani a'an xban nak a'an cuan sa' eyank anakuan ut taçuank eriq'uin chi junelic. ¹⁸ Nak tinxic inc'a' texincanab ejunes. Tinchalk cui'chic eriq'uin. ¹⁹ Cuulac re xk'ehil nak inc'a' chic te'ril cuu li inc'a' neque'paban cue. Abanan læx teril cuu. Ut xban nak yo'yokin lain, yo'yokex ajcui' læx. ²⁰ Toj sa' li cutan a'an læx teq'ue retal nak li Yucua'bej cuan cuiq'uin ut lain cuanquin riq'uin a'an. Junaj ku chi kibil kib. Ut læx cuankex cuiq'uin ut lain cuankin eriq'uin. ²¹ Li ani naxc'ul lin chak'rab ut naxbanu li naxye, a'an li narahoc cue. Li ani narahoc cue narahe' ajcui' xban lin Yucua'. Ut lain tinra ajcui' a'an ut tinc'utbesi cuib chiru, chan li Jesús reheb lix tzolom. ²² Laj Judas jun chic, li maçua' laj Judas Iscariote, quixye re: —Kaçua', çchanru nak tac'utbesi açuib chiku lao, ut inc'a' tac'utbesi açuib chiruheb li inc'a' neque'paban açue? chan. ²³ Quichak'oc li Jesús ut quixye re: —Lain tinc'utbesi cuib chiruheb li neque'rahoc cue ut neque'xbanu li c'a'ru ninye. Eb a'an te'rahek' xban lin Yucua'. Lain ut lin Yucua' toxic riq'uineb ut toçuank riq'uineb. ²⁴ Li ani inc'a' narahoc cue inc'a' naxbanu li c'a'ru ninye. Li c'a'ru xinye ere, inc'a' xinye yal injunes. Lin Yucua' li quitaklan chak cue, a'an li nac'utuc chicuu c'a'ru tinye. ²⁵ Yoquin chixyebal ere a'in nak toj cuanquin sa' eyank. ²⁶ Li Santil Musik'ej li tixtakla chak li Yucua'bej chok' cuuchil, a'an tatenk'ank ere ut a'an tac'utuk cheru chixjunil li c'a'ak re ru li inc'a' nequetau ru. Ut a'an tixjultica ere chixjunil li c'a'ru xinye ere. ²⁷ Lain tincanab li tuktuquil usilal eriq'uin nak tinxic. Li tuktuquil usilal li ting'ue ere moco jo' ta li neque'xq'ue li cuanqueb sa' ruchich'och'. Lain ting'ue xtuktuquilal le ch'ol. Mexc'oxlac chi moco texxucuak. ²⁸ Ac xinye ere nak tinxic, ut tinchalk cui'chic. Cui yal nak niquinera, tasahok' raj sa' ech'ol nak tinxic riq'uin lin Yucua', xban nak a'an k'axal nim xcuanquil chicuu lain. ²⁹ Lain yoquin chixyebal ere a'in nak toj maji' nac'ulman. Nak tac'ulmank li c'a'ru xinye, læx tepab nak yal li c'a'ru xinye ere. ³⁰ Inc'a' chic taruk tinatinak chi nabal eriq'uin xban nak yo chi çalç li nataklan sa' li ruchich'och', usta a'an maç'a' xcuanquil sa' inben lain. ³¹ Lain yoquin chixbanunquil chixjunil li quixye cue lin Yucua' re nak chixjunileb li cuanqueb sa' ruchich'och' te'xq'ue retal nak lain ninra li Yucua'bej. Anakuan yoqeb. Elko sa' li na'ajej a'in, chan li Jesús.

15

Li Jesús quixjuntak'eta rib riq'uin li xtõnal li uvas

¹ Li Jesús quixye ajcui' reheb: —Lain chanchan li xtõnal li uvas. Ut lin Yucua' jo' jun li nasabesin re. ² Li ani inc'a' naxbanu li c'a'ru naraj lin Yucua', a'an chanchan li ruk' li che' li na-isic xban nak inc'a' nauchin. Abanan li ani naxbanu li c'a'ru naraj lin Yucua', a'an chanchan li ruk' li che' li nauchin. Ut li na-iloc re naxsabesi re nak tixq'ue nabal li ru. ³ Laex chanchanex li çhabil ruk' li che' li nauchin chi nabal xban nak sabesinbil chic ru. Laex ac tic chic le yu'am xban li xyalal xinch'olob cheru. ⁴ Cuankeb cuiq'uin ut lain cuankin eriq'uin. Jo' li ruk' li che', cui inc'a' letzlo riq'uin lix tõnal, inc'a' naru nauchin.

Jo'can ajcui' læex. Cui inc'a' cuankex cuiq'uin, inc'a' taruk texq'uik sa' le pabal. ⁵ Lain jo' li xtonal li uvax ut læex jo' li ruk'. Cui cuankex cuiq'uin ut lain cuankin eriq'uin, læex texcuank sa' tiq'uilal ut texq'uik sa' le pabal. Yal ejunes maç'a' naru tebanu. ⁶ Li ani inc'a' taçuank cuiq'uin tajsik jo' nak nayoq'ue' li ruk' li che' li inc'a' us. Nak nachakic nacute' sa' xam ut nac'a'. ⁷ Cui læex cuankex cuiq'uin ut tebanu li c'a'ru xinye ere, taq'uehek' ere chixjunil li c'a'ru tetz'ama. ⁸ Nequeq'ue xlok'al lin Yucua' riq'uin li çabilal nequebanu. Cui yokex chixbanunquil li c'a'ru naraj li Dios, læexak tz'akal intzolom. ⁹ Lain nequexinra læex jo' nak ninxra lin Yucua' lain. Chexcuank cuiq'uin re nak texinra chi junelic. ¹⁰ Cui tebanu li c'a'ru ninye ere, lain texinra junelic. Lain xinbanu li c'a'ru xye cue lin Yucua' ut a'an junelic niquinixra lain. ¹¹ Lain ninye ere a'in re nak textz'akonk riq'uin lix sahil inch'ol lain. Cui tebanu li c'a'ru ninye ere, numtajanakak xsahil ech'ol læex. ¹² A'an a'in li çak'rab li nin'ue ere nak cherahak erib çeribil erib jo' nak nequexinra lain. ¹³ Li rahoc chi tz'akal a'an nak junak tixk'axtesi lix yu'am sa' xc'aba' li ras ritz'in. ¹⁴ Cui tebanu li c'a'ru ninye ere, læexak li raroxex inban. ¹⁵ Læex maçua'akex chic yal aj c'anjel xban nak junak laj c'anjel inc'a' naxnau c'a'ru yo lix patrón. Abanan lain xinye ere chixjunil li naxye cue lin Yucua'. A'an naxc'ut nak raroquex inban. ¹⁶ Maçua' læex xexsic'oc cuu lain. Lain ban xinsic'oc eru læex ut xexinxakab chixbanunquil li tiq'uilal. Le tiq'uilal inc'a' taosok'. Taçuank ban chi junelic. Ut lin Yucua' tixq'ue ere chixjunil li tetz'ama sa' inc'aba' lain. ¹⁷ A'an a'in li yoquin chixyebal ere nak cherahak erib çeribil erib.

Xic' qui-ile' li Jesús ut xic' ajcui' te'ilek' li ratal xc'ajol

¹⁸ Cui læex xic' nequex-ile' xbaneb li inc'a' neque'paban, çenauhak nak xben cua lain xic' xine'ril cheru læex. ¹⁹ Cui ta læex inc'a' xinepab lain, raroxex raj xbaneb li inc'a' neque'paban. Abanan læex maçua'ex chic jun sa' xyankeb xban nak lain xinsic'oc eru. Jo'can nak xic' nequex-ile' xbaneb. ²⁰ Chijulticok' ere nak xinye ere nak ma jun aj c'anjel naxk'ax ru xcuanquil lix patrón. Cui xine'xrahobtesi lain, texrahobtesik ajcui' læex. Cui ta xe'xbanu li c'a'ru xinye lain, te'xbanu aj raj cui' li c'a'ru teye læex. ²¹ Texrahobtesik xban nak læex cualal inc'ajol. Te'xbanu chi jo'can xban nak inc'a' neque'xnau ru li ani quitaklan çak cue. ²² Maç'a'eb raj xmaç cui ta lain inc'a' xinc'ulun ut cui ta inc'a' xinye reheb li xyalal. Abanan maç'a' c'a'ru te'xcol cui' ribeb xban nak cuanqueb xmaç. ²³ Li ani xic' na-iloc cue lain, xic' ajcui' naril lin Yucua'. ²⁴ Maç'a'eb raj xmaç cui ta inc'a' xe'ril li milagros li xinbanu çiruheb, li milagros li ma ani chic naru xbanunquil. Abanan eb a'an que'ril li xinbanu. Jo'can nak xic' niquine'ril lain ut xic' ajcui' neque'ril lin Yucua'. ²⁵ Jo'ca'in xc'ulman xban nak tz'ibanbil çak retalil sa' li çak'rab li quiq'uehe' reheb: Maç'a' raj inmaç, abanan xic' quine'ril. ²⁶ Nak tachalk li Santil Musik'ej, laj C'ojobanel Çh'ol, eriq'uin a'an tixc'ut chi tz'akal li xyalal cheru chicuix lain. Lain tintakla çak eriq'uin li Santil Musik'ej li nachal riq'uin lin Yucua'. ²⁷ Ut læex teç'h'olob ajcui' li xyalal chicuix xban nak læex cuanquex cuiq'uin çhalen nak xintiquib lin c'anjel arin sa' ruchich'och'.

16

¹ Yoquin chixyebal ere chixjunil li c'a'ak re ru a'in re nak inc'a' tach'inank ech'ol sa' le pabal nak tachalk li rayla sa' eben. ² Tex-isik sa' li cab li neque'xch'utub cui' ribeb laj judio. Taçuulak xk'ehil nak eb li te'camsink ere te'xc'oxla nak yoqueb chi c'anjelac çiru li Dios nak te'xbanu chi jo'can. ³ Te'xbanu li rayla a'in ere xban nak inc'a' neque'xnau ru lin Yucua' chi

moco neque'xnau cuu lain. ⁴ Ac xinye ere chixjunil li c'a'ak re ru a'in re nak tajulticok' ere li c'a'ru xinye ere nak yokex chixc'ulbal li raylal. Lain inc'a' quinye chak ere junxil nak quintiquib chak lin c'anjel xban nak cuanquin eriq'uin.

Li Jesús quixye c'a'ru li c'anjel li tixbanu li Santil Musik'ej nak tachalk

⁵ Anakcuan xic cui'chic cue riq'uin li quitaklan chak cue. Ut ma jun ere napatz'oc cue bar xic cue. ⁶ Xraho' sa' ech'ol xban li c'a'ru xinye ere. ⁷ Abanan lain xinye li xyalal ere. K'axal us chok' ere nak tinxic xban nak cui inc'a' nixic, inc'a' tachalk li Santil Musik'ej eriq'uin. A'an li tatenk'ank ere ut a'an li tac'ojobank re le ch'ol. Nak tinxic, lain tintakla chak li Santil Musik'ej eriq'uin. ⁸ Nak tachalk li Santil Musik'ej, a'an tixc'utbesi chiruheb li cuanqueb sa' ruchich'och' nak inc'a' neque'xtau ru c'a'ru li mac ut c'a'ru li tiquilal chi moco neque'xtau ru li rakba atin li tixbanu li Dios. ⁹ Inc'a' neque'xtau ru c'a'ru li mac xban nak inc'a' niquine'xpab. ¹⁰ Inc'a' neque'xtau ru c'a'ru li tiquilal. Cui ta que'xtau ru te'xnau raj nak lain tic inch'ol. Xban nak tic inch'ol, tinxic riq'uin li Dios ut inc'a' chic teril cuu. ¹¹ Inc'a' neque'xtau ru c'a'ru li rakba atin. Cui ta que'xtau ru, te'xnau raj nak ac tenebanbil li rakba atin sa' xben laj tza li nataklan sa' ruchich'och'. ¹² Toj cuan raj nabal chic li tinye ere, abanan inc'a' tecuy rabinquil anakuan. ¹³ Abanan nak tachalk li Santil Musik'ej, a'an tixc'ut cheru chixjunil li xyalal. Inc'a' taatinak yal xjunes. Tixye ban ere chixjunil li c'a'ru tarabi riq'uin li Dios ut tixch'olob cheru li c'a'ru tachalk mokon. ¹⁴ Li Santil Musik'ej tixq'ue inlok'al xban nak li c'a'ru tinye re, a'an ajcui' li tixch'olob xyalal cheru. ¹⁵ Chixjunil li c'a'ru cuan re lin Yucua', cue ajcui' lain. Jo'can nak xinye ere nak li c'a'ru tinye ere, a'an ajcui' li tixc'utbesi cheru li Santil Musik'ej. ¹⁶ —Chi seb inc'a' chic teril cuu. Abanan mokon chic teril cui'chic cuu, chan li Jesús. ¹⁷ Cuanqueb lix tzolom yoqueb chixyebal chi ribileb rib: —¿C'a'ru xyalal nak xye ke nak taxic riq'uin lix yucua'? ¿C'a'ut nak xye ke nak chi seb inc'a' chic takil ru ut mokon chic takil cui'chic ru? ¹⁸ ¿C'a'ut nak xye chi jo'can? Inc'a' nakatau ru c'a'ut nak quixye nak chi seb inc'a' chic takil ru, chanqueb. ¹⁹ Li Jesús quixnau nak que'raj xpatz'bal re c'a'ru xyalal li yo chixyebal. Jo'can nak quixye reheb: —¿Ma yoquex chixpatz'bal cheribil erib c'a'ru xyalal li xinye? ¿Ma inc'a' xetau ru nak xinye ere nak chi seb inc'a' chic teril cuu ut mokon chic teril cui'chic cuu? ¿Ma a'an li teraj xnaubal? ²⁰ Relic chi yal ninye ere nak eb li inc'a' neque'paban cue tasahok' sa' xch'oleb nak tinc'ul li raylal. Laex tayot'ek' ech'ol ut texyabak nak tinc'ul chi jo'can. Tarahok' sa' ech'ol, abanan mokon tasahok' cui'chic sa' ech'ol nak teril cui'chic cuu. ²¹ Junak ixk yo'lac re lix c'ula'al narec'a xrahil lix raylal. Abanan nak ac xyo'la lix c'ula'al, nasach sa' xch'ol li raylal li quixc'ul ut nasaho' sa' xch'ol xban nak ac xyo'la lix c'ula'al. ²² Jo'can ajcui' laex. Anakcuan ra sa' ech'ol. Abanan nak teril cui'chic cuu, tasahok' sa' ech'ol. Ut ma ani taisink cheru lix sahil ech'ol. ²³ Tacuulak xk'ehil nak mac'a' chic tetz'ama cue lain. Chiru ban chic lin Yucua' textz'amank. Relic chi yal tinye ere nak chixjunil li tetz'ama chiru lin Yucua' sa' inc'aba' lain, a'an tixq'ue ere. ²⁴ Chalen anakcuan toj mac'a' nequetz'ama sa' inc'aba'. Chextz'amank ut taq'uehek' ere re nak k'axal cui'chic tasahok' sa' ech'ol, chan li Jesús. ²⁵ Chixjunil li c'a'ak re ru a'in xinye ere sa' jaljoquil ru atin. Abanan tacuulak xk'ehil nak inc'a' chic tinye ere chi jaljo ru. Tinye ban ere chi tz'akal riq'uin atin inc'a' ch'a'aj xtaubal ru ut tinch'olob cheru li xyalal chirix lin Yucua'. ²⁶ Nak tacuulak xk'ehil laex chic textz'amank chiru li Yucua'bej sa' inc'aba' lain. Inc'a' chic tento nak lain tintz'amank chiru li Yucua'bej cherix laex. ²⁷ Lin Yucua' nequexra

laex xban nak laex niqunera lain ut xban nak xepab nak riq'uin li Dios xinchal chak. ²⁸ Lain riq'uin lin Yucua' xinchal chak. Ut anakcuan tincanab li ruchich'och' ut tinxic cui'chic riq'uin lin Yucua', chan li Jesús. ²⁹ Ut eb lix tzolom que'xye re: —Anakuan yocacat chi atinac riq'uin atin inc'a' ch'a'aj xtaubal ru. Inc'a' chic xaye ke riq'uin jaljoquil ru atin. ³⁰ Anakuan nakaq'ue retal nak laac nacanau chixjunil li c'a'ak re ru. Moco toj ta tayehek' acue. Jo'can nak nakapab nak laac riq'uin li Dios xatchal chak, chanqueb. ³¹ Li Jesús quixye reheb: —¿Ma yal nak niquinepab anakcuan? ³² Xcuulac xk'ehil, ut anakcuan ajcui', nak tacha'cha'ik eru chejunilex. Ac xbe xbe li junjunk tixchap ut tincanab injunes. Abanan moco injunes ta xban nak lin Yucua' cuank cuiq'uin. ³³ Xinye ere li c'a'ak re ru a'in re nak texcuank cuiq'uin ut tacuank eriq'uin li tuktuquilal. Sa' li ruchich'och' tec'ul li raylal. Abanan cacuubresihomak le ch'ol xban nak lain ac xinumta sa' xben li nataklan sa' ruchich'och', chan li Jesús reheb lix tzolom.

17

Li Jesús quitjoc chirixeb lix tzolom

¹ Nak quirake' xyebal li atin a'in, li Jesús quixtaksi li rilobal ut qui-oc chi tijoc. Quixye: —At inYucua', xcuulac xk'ehil nak tincamsik. Taq'ue taxak inlok'al lain li C'ajolbej re nak lain tinq'ue ajcui' alok'al laac. ² Laac xatq'uehoc incuanquil sa' xben chixjunil re nak tinq'ue li junelic yu'am reheb li xak'axtesiheb cue. ³ Li junelic yu'am, a'an nak te'xnau acuu laac li junajacat chi tz'akal Dios ut te'xnau ajcui' cuu lain li Jesucristo li quinaatakla chak. ⁴ Lain xinq'ue alok'al arin sa' ruchich'och' xban nak xinchoy xbanunquil li c'anjel li xaq'ue cue re tinbanu. ⁵ At inYucua', chaq'ue ta cui'chic lin lok'al li quicuan nak toj cuanquin chak acuiq'uin nak toj maji' naticla chak li ruchich'och'. ⁶ Eb li xasiq'ueb ru sa' ruchich'och' xak'axtesiheb cue. Lain xinc'ut chiruheb chi tz'akal anihat laac ut xinch'olob li xyalal chiruheb. Ut eb a'an xe'xbanu li c'a'ru xaye reheb. ⁷ Anakuan neque'xnau nak chixjunil li c'a'ru xinbanu, laac xatq'uehoc cue chixbanunquil. ⁸ Lain xinye reheb li c'a'ru xaye cue ut xe'xc'ul li cuatin. Xe'xq'ue retal nak relic chi yal acuiq'uin xinchal chak ut xe'xpab nak laac xattaklan chak cue. ⁹ Lain inc'a' yoquin chixtz'amanquil acue nak tatenk'aheb li inc'a' xine'xpab. Yoquin ban chixtz'amanquil chacuu nak tatenk'aheb lin tzolom li xak'axtesiheb cue xban nak a'aneb la cualal ac'ajol. ¹⁰ Chixjunileb li cualal inc'ajol, acualal ac'ajol ajcui' laac. Ut chixjunileb la cualal ac'ajol, cualal inc'ajol ajcui' lain. Ut eb a'an neque'xnima inlok'al. ¹¹ Anakcuan lain tinxic acuiq'uin. Inc'a' chic tincuank sa' ruchich'och'. Abanan eb a'an toj te'cuank sa' ruchich'och'. At inYucua', laac Santo. Chacuileb taxak riq'uin lix nimal la cuanquil li xak'axtesiheb cue re nak junajak ruheb jo' laac ut lain junaj ku. ¹² Nak cuanquin sa' xyankeb, riq'uin xanimal la cuanquil xincuileb lin tzolom li xak'axtesiheb cue ut ma jun xsach chicuu. Ca'aj cui' li jun xsach li ac q'uebil chak re sachc. A'in xc'ulman re nak tatz'aklok ru li tz'ibanbil sa' li Santil Hu. ¹³ Anakcuan xic cue acuiq'uin. Abanan yoquin chixyebal li c'a'ak re ru a'in nak toj cuanquin sa' ruchich'och' re nak tacuank xsahil xch'oleb a'an jo' li xsahil inch'ol lain. ¹⁴ Lain xinch'olob xyalal la cuatin chiruheb. Jo'can nak xic' neque'ile' xbaneb li inc'a' neque'paban. Xic' neque'ile' xban nak moco xcomoneb ta chic ut moco juntak'et ta chic lix na'lebeb. Jo'can ajcui' lain. Moco lain ta xcomoneb li cuanqueb sa' ruchich'och'. ¹⁵ Inc'a' yoquin chixtz'amanquil chacuu nak tacuisiheb lin tzolom sa' ruchich'och'. Ca'aj cui' yoquin chixtz'amanquil chacuu nak tacleb chiru laj tza. ¹⁶ Lain macua'in

xcomoneb li cuanqueb sa' ruchich'och'. Jo'can ajcui' eb a'an. Macua'eb chic xcomoneb li inc'a' neque'paban. ¹⁷ Chasantobresiheb taxak riq'uin la cuatin, xban nak a'an li tz'akal yal. ¹⁸ Jo' nak xinatakla chak lain sa' ruchich'och' chixch'olobanquil li xyalal, jo'can ajcui' nak tintaklaheb chixch'olobanquil li xyalal chiruheb li inc'a' neque'paban. ¹⁹ Sa' xc'aba' eb a'an xink'axtesi cuib lain chixbanunquil li c'a'ru xaye cue. Ut sa' xc'aba' li yal li xinye eb a'an te'xk'axtesi ajcui' ribeb chixbanunquil li c'a'ru nacacuj. ²⁰ Macua' ca'aj cui' chirixeb lin tzolom yoquin chi tz'amanc chacuu. Yoquin aj ban cui' chi tz'amanc chacuu chirixeb li te'pabank mokon nak te'xch'olob li xyalal chiruheb. ²¹ At inYucua', li c'a'ru nintz'ama chacuu, a'an nak junajak taxak ruheb. Che'cuank kiq'uin jo' nak cuanquin lain acuiq'uin ut laat cuancak cuiq'uin. Junajak taxak ruheb re nak li cuanqueb sa' ruchich'och' te'xpaab nak laat xattaklan chak cue. ²² Lain xinq'ueheb lix lok'al jo' nak xaq'ue inlok'al lain re nak junajak ruheb jo' nak junaj ku lao. ²³ Lain cuankin riq'uibeb ut laat cuankak cuiq'uin re nak junajak chic ruheb chi tz'akal kiq'uin. Ut xban nak junajak chic ruheb kiq'uin, eb li inc'a' neque'paban te'xq'ue retal nak laat xattaklan chak cue ut te'xq'ue ajcui' retal nak laat nacaraheb jo' nak niquinara lain. ²⁴ At inYucua', nintz'ama chacuu nak chixjunileb li xak'axtesiheb cue te'cuank cuiq'uin sa' li na'ajeb li tincuanck cui' lain. Nacuj nak te'ril lin lok'al li caq'ue chak cue nak toj maji' quiyibac li ruchich'och' xban nak niquinara. ²⁵ At inYucua', laat tic ach'ol. Eb li inc'a' neque'paban inc'a' neque'xnau acu. Abanan lain ninnau acu ut eb lin tzolom neque'xnau chic nak laat xattaklan chak cue. ²⁶ Lain xinc'ut chiruheb anihat laat ut toj tinch'olob cui'chic chiruheb re nak te'rahok jo' nak niquinara laat, ut lain tincuanck riq'uibeb, chan li Jesús nak quitijoc.

18

Li Jesús quik'axtesic sa' ruk'eb li xic' neque'iloc re

¹ Nak quirake' chi tijoc li Jesús, qui-el sa' li na'ajeb a'an rochbened lix tzolom. Coeb jun pac'al li ha' Cedron xc'aba' bar cuan cui' jun sir li acujmk. ² Laj Judas Iscariote, li tak'axtesink re li Jesús, naxnau li na'ajeb a'an xban nak nabal sut quicuulac li Jesús aran rochbened lix tzolom. ³ Jo'can nak laj Judas co sa' li na'ajeb a'an ut quixc'am chirix jun ch'utal li soldado aj Roma. Ut coeb ajcui' chirixeb li neque'c'ac'alén sa' li templo. Taklanbileb xbaneb laj fariseo ut li xbenil aj tij. Cuan cuanqueb xxameb sa' ruk' ut cuan cuanqueb xxameb sa' ru'uj che' ut cuanqueb ajcui' xch'ich'eb. ⁴ Li Jesús ac naxnau chixjunil li c'a'ru tixc'ul. Jo'can nak quichal ut quixakli chiruheb ut quixye: —¿Ani nequesic'? chan reheb. ⁵ Eb a'an que'xye: —Yoco chixsic'bal li Jesús laj Nazaret.— Li Jesús quixye: —Lain li yoquex chinsic'bal, chan. Cuan ajcui' sa' xyankeb laj Judas li tak'axtesink re. ⁶ Nak li Jesús quixye reheb, “Lain li yoquex chinsic'bal”, k'ajel ix nak que'coeb ut jun t'aniqueb nak que'tane' chi ch'och'. ⁷ Ut li Jesús quixye cui'chic reheb: —¿Ani nequesic'? Que'chak'oc ut que'xye re: —Li Jesús laj Nazaret, a'an li yoco chixsic'bal.— ⁸ Li Jesús quixye reheb: —Ac xinye ere nak lain. Cui yoquex chinsic'bal lain, canabomakeb chi xic li neque'taken cue, chan. ⁹ Quixye chi jo'can re nak tatz'aklok ru li quixye nak quitijoc: At inYucua', ma jun reheb li cak'axtesiheb cue xsach chicuu. ¹⁰ Laj Simón Pedro cuan xch'ich'. Quirisi chak lix ch'ich' sa' xna'aj. Ut riq'uin lix ch'ich' quirisi lix xic laj Malco lix mos li xyucua'il aj tij. Li xic li quixyoc, a'an li cuan sa' xnim. ¹¹ Li Jesús quixye re laj Pedro: —Xoc la ch'ich' sa' xna'aj. ¿Ma inc'a' ta bi' tento nak tunc'ul li raylal a'in? ¿Ma inc'a' ta bi' a'an aj e nak xinixtakla chak lin Yucua'? chan. ¹² Ut eb li soldado aj Roma rochben li

nataklan sa' xbeneb ut eb laj judío li neque'c'ac'alen sa' li templo, que'xchap li Jesús ut que'xbac'. ¹³ Que'xc'am riq'uin laj Anás lix yucua' li rixakil laj Caifás. Laj Caifás, a'an li xbenil aj tij sa' li chihab a'an. ¹⁴ Laj Caifás a'an li quiyehoc reheb li neque'taklan sa' xbeneb laj judío nak us raj nak taçamk jun chi cuñk sa' xc'aba'eb chixjunileb.

Laj Pedro quixye nak inc'a' naxnau ru li Jesús

¹⁵ Nak yoqueb chixc'ambal li Jesús, laj Simón Pedro rochben jun chic lix tzolom li Jesús yoqueb chixtakenquil. Li tzolom a'an nana'e' ru xban li xyucua'il aj tij. Jo'can nak qui-oc rochben li Jesús sa' li nebal li cuan chiru li rochoch li xyucua'il aj tij. ¹⁶ Abanan laj Pedro quicana sa' be chire li oquebal. Ut lix tzolom jun chic qui-el sa' li nebal li cuan chiru li cab ut quiatnac riq'uin li ixk li nac'ac'alen re li oquebal. Ut quirocsi laj Pedro chi sa'. ¹⁷ Ut li ixk, li nac'ac'alen re li oquebal quixye re laj Pedro, —¿Ma maçua' ta bi' laät jun reheb lix tzolom li cuñk a'an? chan re. Laj Pedro quichak'oc ut quixye: —Inc'a'. Maçua'in.— ¹⁸ Eb laj c'anjel ut eb li neque'c'ac'alen sa' li templo que'xtz'ab xxameb xban nak que te' rec'a. Xakxoqueb chi k'ixinc chire xam. Laj Pedro yo ajcui' chi k'ixinc sa' xyankeb. ¹⁹ Li xyucua'il aj tij qui-oc chixpatz'bal re li Jesús chirixeb lix tzolom ut chirix ajcui' li tijleb li naxc'ut. ²⁰ Li Jesús quixye re: —Junelic xinch'olob li xyalal chiruheb li tenamit sa' eb li cab li neque'xch'utub cui' ribeb laj judío ut sa' li templo. Maç'a' xinye reheb chi mukmu. ²¹ ¿C'a'ut nak nacapatz' cue lain? Patz' reheb li neque'abin cue. Eb a'an naru neque'xye ere c'a'ru xinye, chan li Jesús. ²² Nak quixye a'an, jun reheb li neque'c'ac'alen sa' li templo quixsac' sa' xnak' ru li Jesús ut quixye re: —¿C'a'ut nak nacasume li xyucua'il aj tij chi jo'can? chan re. ²³ Li Jesús quixye re: —Cui inc'a' us li xinye, ye reheb li cuanqueb arin c'a'ru inc'a' us xinye. Cui ut us li xinye, ¿c'a'ut nak niquinaçac'? chan re. ²⁴ Ut laj Anás quixtakla li Jesús chi bac'bo riq'uin laj Caifás li xyucua'il aj tij. ²⁵ Laj Pedro toj xakxo chi k'ixinc chire xam. Ut que'xye cui'chic re: —¿Ma maçua' ta bi' laät xcomoneb lix tzolom li cuñk a'an? Ut laj Pedro quitic'ti'ic ut quixye: —Inc'a'. Maçua'in.— ²⁶ Jun lix moç li xyucua'il aj tij rech'alal li cuñk li quiyoq'ue' xxic xban laj Pedro, quixye re: —Laät xcomoneb. ¿Ma inc'a' ta bi' xcuil nak açuochben aran sa' li xna'aj li açujmk? chan. ²⁷ Ut laj Pedro quixye cui'chic re: —Inc'a'. Maçua'in, chan. Toje' ajcui' tarakek' xyebal a'an nak quiyabac laj tzo' xul.

Quic'ame' li Jesús riq'uin laj Pilato

²⁸ Toj ek'ela chi us que'risi li Jesús riq'uin laj Caifás ut que'xc'am sa' li na'ajej li narakoc cui' atin laj Pilato li acuabej aj Roma. Eb li neque'taklan sa' xbeneb laj judío inc'a' que'oc sa' li rochoch laj Pilato xban nak a'an maçua' aj judío. Cui ta que'oc sa' rochoch junak maçua' aj judío, que'xmux raj rib sa' lix pabaleb. Xban nak que'raj cua'ac re li nink'e' Pascua, inc'a' que'ru chi oc sa' li cab a'an. ²⁹ Xban nak inc'a' que'oc sa' li cab, laj Pilato qui-el chirix cab ut quixye reheb: —¿C'a'ru xmaç li cuñk a'in nak xexchal chixjítbal? chan reheb. ³⁰ Que'chak'oc ut que'xye re: —Cui ta maç'a' xmaç, inc'a' raj xkac'am chak açuiq'uin re nak tatrakok atin sa' xben, chanqueb. ³¹ Laj Pilato quixye reheb: —C'amomak laex ut rakomak atin sa' xben jo' naxye sa' le chak'rab laex, chan. Eb laj judío que'xye re: —Moco q'uebil ta kalesens laç aj judío nak takacamsi junak cristian, chanqueb. ³² Riç'uin a'in quitz'akloc ru li quixye li Jesús chanru nak taçamsik. ³³ Laj Pilato qui-oc cui'chic sa' li na'ajej li narakoc cui' atin. Quixbok li Jesús riq'uin ut quixye re: —¿Ma laät

lix reyeb laj judío? chan re. ³⁴ Li Jesús quixye re: —¿Ma sa' ach'ol x-ala li xaye, malaj jalan xyehoc acue li xaye? chan. ³⁵ Laj Pilato quixye re: —¿Ma lain ta bi' aj judío? Eb la cuech tenamitil rochbened li xbenil aj tij, a'aneb li xe'k'axtesin acue sa' cuuk'. Ye cue c'a'ru amac, chan. ³⁶ Li Jesús quixye re: —Lin cuanquil lain macua' re sa' ruchich'och'. Cui ta lain tintaklank arin sa' ruchich'och', eb li neque'taken cue te'pletik raj re incolbal chiruheb li neque'c'amoc be chiruheb laj judío. Abanan lin cuanquil lain macua' re sa' ruchich'och', chan. ³⁷ Laj Pilato quixye re: —Laat rey chi jo'canan.— Li Jesús quixye re: —Yal li xaye nak lain rey. A'an aj e nak quinchal chi yo'lac arin sa' ruchich'och' re xch'olobanquil li xyalal. Ut chixjunileb li neque'raj xnaubal li xyalal, neque'rabi li c'a'ru ninye, chan. ³⁸ Laj Pilato quixye: —Ut, ¿c'a'ru li xyalal?— Ut cō cui'chic riq'uineb laj judío ut quixye reheb: —Ma jun xmac li cujnk a'in nintau. ³⁹ Laex c'aynakex nak na-ach'abac junak li prex sa' li nink'e Pascua. ¿Ma teraj nak tincuach'ab cheru le rey laex aj judío? chan laj Pilato. ⁴⁰ Eb a'an que'xjap re ut que'xye: —Inc'a'. Macuach'ab li cujnk a'an. Ach'ab laj Barrabás, chanqueb. Laj Barrabás, a'an jun aj elk'.

19

Quitenebac camc sa' xben li Jesús

¹ Laj Pilato quixtakla li Jesús chi saq'uec' riq'uin tz'um. ² Eb li soldado que'xyib jun li corona riq'uin q'uix ut que'xq'ue sa' xjolom li Jesús. Ut que'xq'ue jun li caki t'icr chirix xcomon li neque'rocsi li rey. ³ Ut que'xye re: —¡Sahak taxak sa' ach'ol, at xreyeb laj judío! chanqueb re. Ut que'xsac' riq'uin ruk'eb. ⁴ Laj Pilato cō cui'chic riq'uineb laj judío ut quixye reheb: —Xinc'am chak arin chirix cab re nak tenau nak ma jun xmac xintau, chan. ⁵ Ut li Jesús qui-el chirix cab. Cuan sa' xjolom li corona li yibanbil riq'uin q'uix ut cuan li caki t'icr chirix. Laj Pilato quixye reheb: —Cue' li cujnk. Ilomak, chan. ⁶ Eb li neque'c'ac'alén sa' li templo ut eb li xbenil aj tij que'ril li Jesús ut que'xjap reheb ut que'xye: —¡Q'ue chiru cruz! ¡Q'ue chiru cruz! chanqueb. Ut laj Pilato quixye reheb: —C'amomak laex ut q'uehomak chiru cruz cui teraj. Lain ma jun lix mac xintau, chan. ⁷ Abanan eb laj judío que'xye: —Lao cuan kachak'rab ut li kachak'rab naxye nak tacamsik xban nak a'an quixq'ue rib chok' Ralal li Dios.— ⁸ Nak quirabi li que'xye, k'axal cui'chic quixucuac laj Pilato. ⁹ Qui-oc cui'chic sa' cab rochben li Jesús ut quixye re: —Ye cue bar xatchal chak.— Abanan li Jesús ma jun li atin quixye. ¹⁰ Laj Pilato quixye re: —¿C'a'ut nak inc'a' nacatchak'oc? ¿Ma inc'a' nacanau nak cuan incuanquil chaq'uebal chiru cruz ut cuan incuanquil chaquach'abanquil? chan re li Jesús. ¹¹ Li Jesús quixye re: —Mac'a' raj acuanquil sa' inben cui ta inc'a' q'uebil acue xban li Dios. Ut li jun li xk'axtesin cue sa' acuuk' re nak tatrakok atin sa' inben, a'an k'axal cui'chic nim xmac chaquu laat, chan. ¹² Ut chalen a'an laj Pilato yo chixsic'bal chanru nak tarach'ab li Jesús. Abanan eb laj judío que'xjap reheb ut que'xye: —Cui nacacuach'ab li cujnk a'an, laat macua'akat chic ramig li Acuabey César. Li ani naraj xq'uebal rib chok' rey, li jun a'an xic' chic naril li Acuabey, chanqueb. ¹³ Nak laj Pilato quirabi li que'xye, quixc'am li Jesús chirix cab. Quic'ojla sa' li na'ajej li narakoc cui' atin. Li c'ojlebal a'an cuan sa' xben li tusbil pec. C'ajo' xch'ina'usal. Gabata xc'aba' li na'ajej a'an sa' li atinobal hebreo. ¹⁴ Cua'leb na re cutan nak quic'ulman a'in. Li tenamit yoqueb chixcauresinquil li nink'e Pascua, li taticlak sa' li cutan jun chic. Laj Pilato quixye reheb: —Cue'le rey, chan. ¹⁵ Que'xjap cui'chic reheb chixyebal:

—jQ'ueomak chiru cruz! jQ'uehomak chiru cruz! Ut laj Pilato quixye reheb: —¿Ma teraj nak ting'ue chiru cruz le rey? chan. Eb li xbenil aj tij que'xye: —Jun ajcui' li karey cuan. A'an li Acuabej César, chanqueb. ¹⁶Laj Pilato quixk'axtesi li Jesús sa' ruk'eb li soldado re nak taq'uehek' chiru cruz. Ut que'xc'am li Jesús.

Jo'ca'in nak quiq'uehe' li Jesús chiru cruz

¹⁷ Li Jesús yō chixpakonquil lix cruz nak cō sa' li na'ajej Xbakel Xjolom Camenak xc'aba'. Sa' li atinobal hebreo Gólgota xc'aba'. ¹⁸ Ut aran que'xq'ue chiru cruz. Ut que'xq'ue cuib chic li cujnk chiru cruz rochben. Jun que'xq'ue sa' xnim uk' ut li jun chic que'xq'ue sa' xtz'e. Li cruz li que'xq'ue cui' li Jesús quicana sa' xyi. ¹⁹ Laj Pilato quixtz'iba jun li retalil ut que'xq'ue sa' xjolom li cruz li quiq'uehe' cui' li Jesús. Li retalil a'an quixye: Li Jesús aj Nazaret, a'an lix reyeb laj judío. ²⁰ Nabaleb laj judío que'ril li retalil li quitz'ibac, xban nak li na'ajej li quiq'uehe' cui' chiru cruz li Jesús nach' cuan riq'uin li tenamit. Li retalil tz'ibanbil sa' eb li atinobal hebreo, griego ut latín. ²¹ Inc'a' quicuulac chiruheb lix xbenil aj tij li quixtz'iba. Que'xye re laj Pilato: —Matz'iba nak a'an xreyeb laj judío. Tz'iba ban nak a'an xyehoc re, “Lain xreyeb laj judío”, chanqueb. ²² Ut laj Pilato quixye reheb: —Li c'a'ru xintz'iba, xintz'iba. Inc'a' chic tajalmank, chan. ²³ Nak ac xe'xq'ue chiru cruz li Jesús, eb li soldado que'xc'am li rak' chok' reheb. Cahib echal que'risi, jun re li junjnk chi soldado. Ut que'xc'am ajcui' li rak' li mac'a' xbojbal. Junaj ru lix quemal. ²⁴ Que'xye chi ribileb rib: —Inc'a' takapeji. Us takabuli rix re rilbal ani taçchanink re, chanqueb. Jo'can que'xbanu re nak tatz'aklok ru li tz'ibanbil sa' li Santil Hu li naxye chi jo'ca'in: Que'xjeq'ui chirixeb lin t'icr ut que'xbuli rix li cuak'. (Sal. 22:18) ²⁵ Nach' riq'uin li cruz xakxo li xna' li Jesús rochben lix María li ras. A'an li rixakil laj Cleofas. Ut cuan ajcui' aran lix María, Magdala xtenamit. ²⁶ Li Jesús quiril lix na' ut quiril ajcui' lix tzolom li raro xban. Li Jesús quixye re lix na': —At inna', li cujnk a'in, a'an chic la yum.— ²⁷ Ut quixye re lix tzolom: —Li ixk a'in, a'an chic la na'.— Ut chalen a'an lix tzolom quixc'ul lix na' li Jesús riq'uin sa' li rochoch.

Jo'ca'in nak quicam li Jesús

²⁸ Chirix chic a'an quixnau li Jesús nak ac xtz'akloc ru chixjunil. Re nak tatz'aklok ru li tz'ibanbil sa' li Santil Hu, li Jesús quixye: —Tachakik cue, chan. ²⁹ Cuan aran jun sec' nujenak chi vinagre. Que'xtz'a sa' li vinagre jun li esponja ut que'xtaksi sa' ru'uj jun li ruk' che' hisopo xc'aba' ut que'xq'ue sa' re. ³⁰ Li Jesús quiruc' li vinagre ut quixye: —Anakuan xtz'akloc ru chixjunil.— Quixxulub lix jolom ut quicam. ³¹ Eb li neque'taklan sa' xyankeb laj judío que'xtz'ama chiru laj Pilato re nak tixtakla xtokbal xbakel li ra'eb li que'q'uehe' chiru cruz re nak te'camk chi junpat. Que'raj nak te'isik chiru cruz xban nak cuulac re li hilobal cutan. Yoqeb chixcauresinquil ribeb re li nink'e Pascua xban nak a'an li k'axal lok' chiruheb. ³² Que'chal eb li soldado ut que'xtok xbakel li ra'eb li cuib chi cujnk li que'q'uehe' chiru cruz rochben li Jesús. ³³ Abanan nak que'cuulac cuan cui' li Jesús, que'ril nak ac xcam ut inc'a' que'xtok xbakel li ra'. ³⁴ Jun li soldado quixhop xc'atk xsa' riq'uin lix ch'ich' ut sa' junpat qui-el li quic' ut qui-el ajcui' li ha'. ³⁵ Lain quin-iloc re chi tz'akal li c'a'ru quic'ulman ut li c'a'ru yoqquin xyebal ere tz'akal yal. Yoqquin chixyebal ere a'in re nak tepab nak tz'akal yal nak quic'ulman chi jo'can. ³⁶ Quic'ulman chi jo'can re nak tatz'aklok ru li tz'ibanbil sa' li Santil Hu: Ma

jun lix bakel taʔtokmaṅk. (Ex. 12:46)³⁷ Ut tz'ibanbil ajcui' sa' li Santil Hu: Eb a'an te'ril li ani quihope' chi ch'ich'. (Zac. 12:10)

Jo'ca'in nak quimuke' li Jesús

³⁸ Jun li cuṅk aj José xc'aba' Arimatea xtenamit quicuulac riq'uin laj Pilato chixtz'amanquil chiru nak tixq'ue lix tz'ejcual li Jesús re, re tixmuk. Laj José, a'an jun reheb li neque'paban re li Jesús. Abanan inc'a' quixye xban nak quixucuac xbaneb li neque'taklan sa' xbeneb laj judío. Laj Pilato quixye re nak taruk tixmuk, ut laj José cō chixc'ambal li camenak. ³⁹ Laj Nicodemo li quicuulac riq'uin li Jesús chi k'ek, cō rochben laj José. Quixc'am na o'c'alak (100) libra li sununquil ban y'ibanbil riq'uin mirra ut áloes. ⁴⁰ Li cuib chi cuṅk que'xc'am lix tz'ejcual li Jesús ut que'xlan riq'uin li chaḅil t'icr lino ut que'xq'ue li sununquil ban jo' c'aynakeb chi mukuc eb laj judío. ⁴¹ Sa' li na'ajej li quiq'uehe' cui' li Jesús chiru cruz cuan jun sir li acuṅmk. Aran cuan jun li muklebaḷ toj ac'. Toj ma' ani mukbil aran. ⁴² Aran que'xmuk li Jesús xban nak nach' cuan li na'ajej a'an ut que'raj ru xmukbaḷ chi junpaḷ xban nak cuulac re li hilobaḷ cutan.

20

Li Jesús quicuacli cui'chic chi yo'yo sa' xyañkeb li camenak

¹ Sa' li xben li cutan re li xaman nak toj maji' nasakeu cō lix María Magdala xtenamit sa' li muklebaḷ. Nak quicuulac cuan cui' li muklebaḷ, quixq'ue retal nak ac isinbil chic li nimla pec li que'xq'ue chire li muklebaḷ. ² Cō sa' anil riq'uin laj Simón Pedro ut riq'uin li jun chic xtzolom li Jesús li raro xban, ut quixye reheb: —Xe'risi li Kaḅua' sa' li muklebaḷ ut inc'a' nakanau bar ta xe'xq'ue, chan. ³ Coeb sa' li muklebaḷ laj Pedro rochben li jun chic xtzolom li Jesús. ⁴ Coeb sa' anil xcabichaleb. Ut lix tzolom jun chic k'axal cau quialinac chiru laj Pedro ut a'an xben cua quicuulac sa' li muklebaḷ. ⁵ Quixc'utzub rib chi iloc chi sa'. Quiril li t'icr li que'xlan cui' li Jesús. Abanan inc'a' qui-oc toj chi sa'. ⁶ Quicuulac laj Pedro toj chi ixbej. Ticto qui-oc chi sa' li muklebaḷ ut quiril li t'icr sok'so aran. ⁷ Cuan ajcui' aran li t'icr li que'xbac' cui' lix jolom li Jesús. Moco cuan ta sa' xyañk li t'icr. Jalan basbo cui' xjunes. ⁸ Ut qui-oc ajcui' chi sa' li muklebaḷ li tzolom li quicuulac xben cua. Quiril li t'icr aran ut quixpab nak ac xcuacli cui'chic chi yo'yo li Jesús. ⁹ Toj maji' que'xtau ru chi tz'akal li tz'ibanbil sa' li Santil Hu li naxye nak tento taḅuacliḅ cui'chic chi yo'yo sa' xyañkeb li camenak. ¹⁰ Ut eb lix tzolom que'suk'i cui'chic sa' li cab li cuanqueb cui'.

Li Jesús quixc'utbesi rib chiru lix María, Magdala xtenamit

¹¹ Lix María cuan chire li muklebaḷ. Yo chi yabac. Quixc'utzub rib chi iloc chi sa' li muklebaḷ. ¹² Quiril cuib li ángel sak li rak'eb. C'ojc'oq'ueb aran bar quicuan cui' li Jesús. Jun cuan sa' xjolom ut jun cuan chi rok. ¹³ Que'xye re: —At ixk, ꞑc'a'ut nak yocac'hi yabac?— Lix María quixye reheb: —Yoḅuin chi yabac xban nak xe'risi li Kaḅua' arin ut inc'a' ninnau bar xe'xq'ue.— ¹⁴ Sa' li honal a'an, lix María qui-iloc chirix ut quiril li Jesús xakxo aran, abanan inc'a' quixnau nak a'an ta li Jesús. ¹⁵ Li Jesús quixye re: —At ixk, ꞑc'a'ut nak yocac'hi yabac? ꞑAni nacasic'? chan. Sa' xch'ol lix María nak a'an aj ilol acuṅmk ut quixye re: —Kaḅua', cui laaḷ xatc'amoc re, baṅu usilal, ye cue bar xaḅ'ue re nak tinc'am, chan. ¹⁶ Li Jesús quixye re: —¡María!— Quixsuk'isi rib lix María ut quixye sa' raṅinobaḷ aj hebreo: —Raboni.— (Chi jalbil ru naraj naxye aj tzolonel). ¹⁷ Li Jesús quixye re: —Minabay. Canabin chi xic. Tento nak tinxic

riq'uin lin Yucua'. Ayu ut ye reheb lin herman nak xic cue riq'uin lin Yucua'. A'an ajcui' le yucua' laex. A'an lin Dios ut a'an ajcui' le Dios laex, chan li Jesús. ¹⁸ Co lix Maria ut quixye reheb lix tzolom li Jesús nak quiril ru li Kaçua' Jesús ut quixye ajcui' reheb chixjunil li quiyehé' re xban.

Li Jesús quixc'utbesi rib chiruheb lix tzolom

¹⁹ Sa' li xben cutan re li xaman, nak ac oc re li k'ojyjn, que'xch'utub ribeb lix tzolom li Jesús. Tz'aptz'o chi us lix puertil li cab li ch'utch'uqueb cui' xban nak que'xucuac xbaneb li neque'taklan sa' xbeneb laj judío. Xakamil li Jesús chiruheb ut quixye reheb: —Chicuank taxak li tuktuqukil usilal eriq'uin, chan reheb. ²⁰ Ut quixc'ut chiruheb li ruk' ut lix c'atk xsa' li quihope'. C'ajo' nak que'sahó' sa' xch'oleb lix tzolom nak que'ríl cui'chic ru li Kaçua'. ²¹ Li Jesús quixye cui'chic reheb: —Chicuank taxak li tuktuqukil usilal eriq'uin. Jo' nak xinixtakla chak lin Yucua' lain, jo'can ajcui' nak texintakla laex, chan. ²² Ut nak quixye a'an, quirapuheb ut quixye reheb: —C'ulumak li Santil Musik'ej. ²³ Li ani tēcuy xmac laex, təcuyek' ajcui' xmac xban li Dios. Ut li ani inc'a' tēcuy xmac laex, inc'a' ajcui' təcuyek' xmac xban li Dios, chan li Jesús.

Nak quiril li retalil li claux sa' ruk' li Jesús, laj Tomás quixpab nak yo'yo chic

²⁴ Laj Tomás, a'an jun reheb lix tzolom cablaju, li neque'xye ajcui' lut re. A'an ma ani sa' xyankeb nak quixc'utbesi rib li Jesús chiruheb. ²⁵ Li rech aj tzolonelil que'xye re: —Xkil ru li Kaçua', chanqueb re. Abanan laj Tomás quixye reheb: —Cui inc'a' tincuil li retalil li claux sa' ruk' ut cui inc'a' tinq'ue li ru'uj cuuk' sa' xna'aj li claux ut cui inc'a' tinch'ic li cuuk' sa' xc'atk xsa', lain inc'a' tinpab nak xcuacli cui'chic chi yo'yo, chan laj Tomás. ²⁶ Ac xnume' chic cuukub cutan nak que'xch'utub cui'chic ribeb lix tzolom li Jesús. Laj Tomás cuan sa' xyankeb. Tz'aptz'o'queb lix puertil li cab chi us. Nak que'ríl ac xakamil li Jesús chiruheb ut quixye reheb: —Chicuank taxak li tuktuqukil usilal eriq'uin, chan. ²⁷ Tojo'nak quixye re laj Tomás: —Il chi us li cuuk'. Ch'ic li ru'uj la cuuk' arin sa' xna'aj li claux. Ut ch'ic la cuuk' sa' xc'atk lin sa'. Chatpabank. ¿C'a'ut nak inc'a' xapab nak xincuacli cui'chic chi yo'yo?— ²⁸ Ut laj Tomás quixye re: —¡At Kaçua', at inDios!— ²⁹ Li Jesús quixye re: —Laat toj xacuil cuu, tojo'nak xinapab. Abanan lain ninye acue, us xak reheb li neque'paban cue chi inc'a' xe'ríl cuu, chan li Jesús re.

Li hu a'in tz'ibanbil re nak tenau nak li Jesús, a'an li Cristo li Ralal li Dios

³⁰ Nabal chic li milagro quixbanu li Jesús chiruheb lix tzolom li inc'a' tz'ibanbil retalil sa' li hu a'in. ³¹ Abanan li jo' q'ual tz'ibanbil retalil sa' li hu a'in, quitz'ibac re nak tepab nak li Jesús, a'an li Cristo. A'an li Ralal li Dios. Quitz'ibac re nak riq'uin xpabanquil təcuan eyu'am chi junelic sa' xc'aba' a'an.

21

Li Jesús quixc'utbesi rib chiruheb cuukub lix tzolom

¹ Mokon chic quixc'utbesi cui'chic rib li Jesús chiruheb lix tzolom chire li palau Tiberias. Jo'ca'in nak quixc'ut rib chiruheb: ² Ch'utch'uqueb laj Simón Pedro ut laj Tomás li nayehe' lut re, ut laj Natanael, Caná xtenamit li cuan sa' xcuent Galilea. Cuanqueb ajcui' aran li ralal laj Zebedo ut cuibeb chic lix tzolom li Jesús. ³ Laj Simón Pedro quixye reheb: —Lain xic cue chi caribc, chan. —Toxic ajcui' lao chaçuix, chanqueb re. Ut que'oc sa' jun li jucub ut que'xnumsi li k'ojyjn chi caribc. Abanan ma jun li car que'xchap. ⁴ Nak ac yo chic chi sakeuc, li Jesús quixc'utbesi cui'chic rib chiruheb chire li palau.

Abanan eb lix tzolom inc'a' que'xnau nak a'an li Jesús. ⁵ Quixye li Jesús reheb: —Ex cualal inc'ajol, ¿ma xechap li car? chan. Eb a'an que'chak'oc ut que'xye: —Ma jun xkachap.— ⁶ Li Jesús quixye reheb: —Cutumak le yoy chixc'atk li jucub, sa' le nim re nak tēchap li car, chan. Ut que'xcut lix yoy sa' li ha' ut inc'a' ch'ic que'xcuy risinquil xban xq'uial li car li que'xchap. ⁷ Ut lix tzolom li Jesús, li raro xban, quixye re laj Pedro: —¡A'an li Kācua'!— Ut laj Pedro, nak quirabi nak a'an li Kācua', quixq'ue cui'chic li rak' chirix xban nak quirisi nak qui-oc chi caribc, ut quixcut rib sa' li ha' re taxic riq'uin li Jesús. ⁸ Ut eb lix comon que'chal sa' li jucub. Yoqweb chixquelonquil lix yoy nujenak chi car. Moco najt ta cuanqueb chire li palau, yal oc'al metro tana. ⁹ Nak que'el sa' li jucub que'ril nak cuan jun li xam c'ubc'u. Li Jesús yō chixpombal jun li car sa' xben li ru xam ut cuan ajcui' caxlan cua riq'uin. ¹⁰ Li Jesús quixye reheb: —C'amomak chak cuib oxibak li car li xechap.— ¹¹ Laj Simón Pedro qui-oc sa' li jucub ut quixquelo li yoy chi ch'och'el nujenak chi ninki car. Jun ciento riq'uin oxlaju roxc'al (153) li car cuan sa' li yoy. Usta k'axal nabaleb li car cuan chi sa', abanan inc'a' quipeje' li yoy. ¹² Li Jesús quixye reheb: —Quimkex ut cua'inkex.— Ut ma jun reheb lix tzolom quiraj xpatz'bal re ma a'an li Kācua' xban nak ac neque'xnau nak a'an li Kācua'. ¹³ Ut li Jesús quixchap li caxlan cua ut quixq'ue reheb. Ut quixq'ue ajcui' li car. ¹⁴ A'in li rox sut nak quixc'utbesi cui'chic rib li Jesús chiruheb lix tzolom nak ac xcuacli cui'chic chi yo'yo sa' xyankeb li camenak.

Li Jesús quixye re laj Pedro nak tarileb lix carner

¹⁵ Nak ac xe'cua'ac, li Jesús quixye re laj Simón Pedro: —At Simón, ralalat laj Jonás, ¿ma k'axal niqunāra chiruheb a'in?— Laj Pedro quixye re: —Kācua', laāt nacanau nak nacatinra, chan. Ut li Jesús quixye re: —Chacuilakeb li cualal inc'ajol li toj k'unek xch'ol sa' lix pabaleb jo' jun li pastor narileb lix coc' carner.— ¹⁶ Ut li Jesús quixye cui'chic re: —At Simón, ralalat laj Jonás, ¿ma niqunāra?— Laj Pedro quixye: —Kācua', laāt nacanau nak nacatinra.— Ut li Jesús quixye re: —Chacuilakeb li cualal inc'ajol jo' jun li pastor narileb lix carner, chan. ¹⁷ Ut li Jesús quixpatz' cui'chic re rox sut: —At Simón, ralalat laj Jonás, ¿ma niqunāra?— Ut quiraho' sa' xch'ol laj Pedro xban nak li Jesús quixpatz' re rox sut “¿ma niqunāra?”. Jo'can nak quixye re li Jesús: —Kācua', laāt nacanau chixjunil li c'a'ak re ru. ¡Laāt nacanau nak nacatinra!— Ut li Jesús quixye cui'chic re: —Chacuilakeb li cualal inc'ajol jo' jun li pastor narileb lix carner. ¹⁸ Relic chi yal ninye acue nak toj sajat, nacabac' asa' ajunes ut nacatxic yalak bar nacacua'j xic. Abanan nak ac tixakat chic, taye' la cuuk' ut jalan tabac'ok re ut tatxc'am bar inc'a' nacacua'j xic, chan. ¹⁹ Riq'uin li atin a'in li quixye li Jesús, yō chixyebal chanru nak tačamsik laj Pedro. Ut riq'uin xcamic tixq'ue xlok'al li Dios. Nak ac xye a'in, li Jesús quixye re laj Pedro: —Chinātaqe, chan re.

Laj Pedro quixpatz' c'a'ru tixc'ul li tzolom li raro xban li Jesús

²⁰ Laj Pedro quixsuk'isi rib ut quiril lix tzolom li Jesús, li raro xban, yō chi xic chirixeb. A'an lix tzolom li quipatz'oc re li Jesús nak yoqweb chi cua'ac, “¿Ani tak'axtesink acue, at Kācua'?” ²¹ Nak laj Pedro quiril a'an, quixpatz' re li Jesús: —Ut li cuñk a'an, Kācua', ¿ma tixc'ul jo' tinc'ul lain? chan. ²² Li Jesús quixye re: —Cui lain tincua'j nak yo'yok a'an toj tinc'ulunk cui'chic, ¿c'a'ru tačua'j re laāt? Laāt q'ue ach'ol chintakenquil, chan li Jesús re laj Pedro. ²³ Jo'can nak qui-el resil sa' xyankeb laj pabanel nak li jun a'an inc'a' tačamk. Abanan mačua' jo'can quixye li Jesús. Inc'a' quixye nak inc'a' tačamk. Ca'aj

cui' quixye, "Cui lain tincuaaj nak yo'yok toj tinc'ulunk, ¿c'a'ru tacuaaj re laať?"
²⁴ Ut li tzolom a'an, a'an lain laj Juan. Lain quin-iloc re li c'a'ru quic'ulman ut xinch'olob xyalal sa' li hu a'in. Ut lao nakanau nak tz'akal yaľ li c'a'ru xintz'iba sa' li hu a'in. ²⁵ Toj cuan chic nabal li c'a'ak re ru quilajxbanu li Jesús. Cui ta tz'ibanbil retalil chi xjunjunkal, lain ninye nak ma jok'e raj tatz'aklok li ruchich'och' chok' xna'aj li hu li tatz'ibamank cui' retalil. Jo'can taxak.

Lix Yehom Xbanuhomēb li Apóstol

Li Dios quixyechi'i li Santil Musik'ej reheb li ralal xc'ajol

¹ Sa' li xben hu quintz'jba acuiq'uin, at Teófilo, quintz'jba retalil chixjunil li jo' q'uial quixc'ut ut quixbanu li Kacua' Jesús chalen nak quixtiquib lix c'anjel sa' ruchich'och' ² toj sa' li cutan nak quic'ame' sa' choxa. Nak toj maji' naxic sa' choxa, riq'uin xcuanquil li Santil Musik'ej, quixye reheb c'a'ru tento te'xbanu lix apóstol li quixsiq'ueb ru. ³ Nak ac xrahobtesic ut ac xcamsic, quicuacli cui'chic chi yo'yo ut quixc'utbesi cui'chic rib chiruheb. Ca'c'al cutan quicuan sa' ruchich'och' ut nabal sut quixc'utbesi rib chiruheb re nak te'xnau chi tz'akal nak quicuacli cui'chic chi yo'yo. Quixch'olob xyalal chiruheb chanru nak taçuank xnimal xcuanquilal li Dios sa' xbenēb li tenamit. ⁴ Nak toj cuan sa' xyankeb li Jesús quixye reheb chi jo'ca'in: — Inc'a' texxic sa' jalan na'ajej. Texcanak ban Jerusalén roybeninquil li Santil Musik'ej li yechi'inbil ere xban li Dios Acuabej, li ac xinye ere lain. ⁵ Yal nak laj Juan quicubsin ha' riq'uin ha'. Abanan anakuan a' chic lix cuanquilal li Santil Musik'ej teç'ul chi seb ut a'an chic taçuank eriq'uin, chan.

Li Jesús quic'ame' sa' choxa xban li Dios

⁶ Eb li apóstol li ch'utch'uqueb aran que'xpatz' re li Jesús: —At Kacua', ¿ma anakuan taq'ueheb cui'chic xcuanquileb laj Israel re te'xtakla cui'chic rib xjuneseb? chanqueb. ⁷ Quichak'oc li Jesús ut quixye reheb: —Macua' ere laex xnaubal li c'a'ak re ru a'in. Ca'aj cui' li Dios Acuabej nana'oc re jok'e tixbanu xban nak ca'aj cui' a'an yal re sa' xben chixjunil. ⁸ Laex teç'ul le cuanquil nak tachalk li Santil Musik'ej eriq'uin. Laex chic texch'olobank resilal chicuix lain arin Jerusalén, aran Judea ut Samaria. Jo' ajcui' yalak bar jun sut sa' ruchich'och' tech'olob li xyalal, chan. ⁹ Nak quirake' xyebal chixjunil a'in quic'ame' sa' choxa li Jesús xban li Dios. Yoqueb chirilbal nak quichal jun li chok ut quimukun sa' li chok. Ut inc'a' chic que'ril ru. ¹⁰ Toj yoqeb ajcui' chirilbal nak yo chi xic li Jesús sa' choxa nak xakamileb cuibeb li cujnk chiruheb. Sakeb li rak'. ¹¹ Ut que'xye reheb: —Ex cujnk aj Galilea, ¿C'a'ut nak yoqex chi iloc sa' choxa? Li Jesús li xcuan sa' eyank ut xc'ame' sa' choxa, a'an tachalk cui'chic. Chanru nak xeril chi xic sa' choxa, jo'can cui'chic nak teril nak yok chi çalç, chanqueb reheb.

Quixakabac laj Matías chok' apóstol chok' rekaç laj Judas

¹² Chirix a'an eb li apóstol que'cube chak sa' li tzul Olivos ut que'coeb cui'chic Jerusalén. Li tzul a'an nach' cuan riq'uin li tenamit Jerusalén, jun kilómetro tana xnajtil, jo' xnajtil li naru neque'xbeni sa' li hilobal cutan. ¹³ Nak que'cuulac Jerusalén que'take' sa' xca' tasal li cab li neque'hilan cui' nak cuanqueb Jerusalén. A'aneb laj Pedro, laj Juan, laj Jacobo, laj Andrés, laj Felipe, laj Tomás, laj Bartolomé, laj Mateo, laj Jacobo li ralal laj Alfeo, laj Simón li na-oquen sa' xyankeb li jun ch'utal Celote neque'xye reheb, ut laj Judas li ralal laj Jacobo. ¹⁴ Chixjunileb a'an yoqueb chi tijoc chi junajeb xch'ol rochbenēb li ritz'in li Jesús ut lix María lix na'. Ut cuanqueb ajcui' ixk yoqeb chi tijoc rochbenēb. ¹⁵ Sa' eb li cutan a'an jun ciento riq'uin junmay chixjunileb laj pabanel li ch'utch'uqueb aran. Laj Pedro quixakli sa' xyankeb ut qui-oc chixyebal reheb: ¹⁶ —Ex inherman, tento nak tauxmank li tz'ibanbil sa' li Santil Hu li quic'ute' chiru li rey David xban li Santil Musik'ej chirix laj

Judas li quik'axtesin re li Jesús reheb li que'chapoc re. ¹⁷ Laj Judas, a'an raj jun sa' kayank sa' li c'anjel a'in. ¹⁸ Riq'uin lix tojbal li quiq'uehe' re xban nak quixbanu li mausilal, quilok'e' jun li ch'och'. Quixyatz' rib ut nak quit'ane' chi xulxu, quichire' ut qui-el chak chixjunil sa' lix sa'. ¹⁹ Qui-el ut resil a'an sa' xyankeb chixjunileb li cuanqueb Jerusalén. Jo'can nak Acédama neque'xye re li na'ajej a'an sa' li ratinobaleb. A'an naraj naxye "Lok'bil riq'uin quic'." ²⁰ Quic'ulman chi jo'can xban nak sa' li hu Salmos tz'ibanbil retalil li naxye chi jo'ca'in:

Chicanak ta lix na'aj chi mac'a' chic cuan chiru. Ut ma'ani ta chic chi cuank sa' lix muhebal. (Sal. 69:5)

Ut naxye ajcui':

Jalan ta chic chiq'uehek' chok' rekaj sa' lix c'anjel. (Sal. 109:8)

²¹ Jo'can nak tento takaxakab junak chok' rekaj laj Judas. Cuanqueb cuink sa' kayank que'ochbenin chak ke nak toj cuan li Jesús sa' kayank, ²² chalen nak quicubsjc chak xha' li Jesús xban laj Juan ut toj chalen nak quic'ame' sa' choxa' chiku. Jun reheb li cuink a'an naru takaxakab chok' rekaj laj Judas re nak tixch'olob ajcui' xyalal nak quicuacli cui'chic chi yo'yo li Jesús sa' xyankeb li camenak, chan laj Pedro. ²³ Que'xxakab laj José li neque'xye Barsabás re. Aj Justo lix c'aba' jun chic neque'xq'ue. Ut que'xxakab ajcui' laj Matías. ²⁴ Ut que'oc chi tijoc ut que'xye: —At Ka'ua', laa'at nacana'au chanru li ram li junjank. Jo'can nak nakatz'ama chacuu nak ta'c'utbesi chiku ani reheb li cuib a'in tasic' ru re ta'cana'k chi c'anjelac chok' rekaj laj Judas. ²⁵ A'an tixc'ul xcuanquil chi c'anjelac chok' apóstol. Tixbanu li c'anjel li quixtz'ektana laj Judas xban li inc'a' us quixbanu. Laj Judas co sa' li na'ajej chixtojbal xmac bar xc'ulub cui' xic, chanqueb. ²⁶ Jo'can nak que'xbuli rix li ani ta'cana'k chi c'anjelac. Ut nak ac xe'bulic, li c'anjel a'an quicana sa' xben laj Matías. Ut sa' ajcui' li honal a'an laj Matías qui-oc chok' apóstol sa' xyankeb li junlaju chic.

2

Que'xc'ul li xcuanquilal li Santil Musik'ej eb laj pabanel sa' xk'ehil li nink'e Pentecostés

¹ Sa' xk'ehil li nink'e re li Pentecostés ch'utch'uqueb chixjunileb laj pabanel sa' jun chi na'ajej ut junajeb xch'ol. ² Que'rabi jun chokinc chanchan xyab cacuil ik' yo' chi chal'c sa' choxa. Chixjunileb li cuanqueb sa' li cab que'rabi. ³ Que'ril li chanchan rak' xam. Li rak' xam que'xjeq'ui rib ut que'hilan sa' xbeneb chi xjunjankaleb. ⁴ Que'xc'ul li xcuanquilal li Santil Musik'ej, ut que'oc chi atinac sa' jalan atinobal' a'yal chanru quic'ute' chiruheb xban li Santil Musik'ej. ⁵ Cuanqueb aj judío aran Jerusalén cauheb xch'ol sa' xpabaleb. Que'chal chak sa' chixjunil li tenamit jun sut rubel choxa. ⁶ Nak que'rabi li c'aru yoqueb chixc'ulbal eb a'an, que'xch'utub ribeb li q'uila tenamit. Sachsoqueb xch'ol xban nak que'rabi nak yoqueb chi atinac sa' li ratinobaleb li junjank chi tenamit. ⁷ C'ajo' nak que'xcuac ut sachsoqueb xch'ol que'cana ut que'xye chi ribileb rib: —¿Ma macua'eb ta bi' aj Galilea chixjunileb a'in li yoqueb chi atinac sa' jalanil atinobal? ⁸ ¿C'a'ut nak yoco chirabinquileb chi atinac sa' li ka'inobal' chikajunkal? ⁹ Anakcuan eb a'an yoqueb chi atinac sa' ratinobaleb laj Partos, laj Medo, laj elamitas ut chikajunilo laj li cuanco Mesopotamia, ut Judea, Capadocia, Ponto ut Asia, ¹⁰ jo'queb ajcui' laj Frigia ut laj Panfilia, laj Egipto ut eb li cuanqueb sa' eb li na'ajej xcuent Libia li cuanqueb nach' riq'uin Cirene, jo'queb ajcui' laj Roma. ¹¹ Cuanqueb aj judío sa' xyo'lajiqueb ut cuanqueb

ajcui' li que'xjal xpabal ut que'oc sa' xyankeb laj judío. Cuanqueb ajcui' li que'chal Creta ut Arabia. Nakabi nak yoqqueb chixyebal sa' kañinobal li c'a'ru yo chixbanunquil li Kaçua' Dios riq'uin xnimal xcuanguilal, chanqueb. ¹² Ut chixjunileb sachsoqqueb xch'ol ut inc'a' que'xtau ru. Que'xye chiribileb rib: —¿C'a'ru xyalal a'in li yoco chixc'ulbal? chanqueb. ¹³ Cuanqueb ajcui' yoqqueb chi hoboc ut yoqqueb chixyebal: —Maçe te'calak, chanqueb.

Laj Pedro naxch'olob xyqalal chiruheb li q'uila tenamit

¹⁴ Tojo'nak quixakli laj Pedro rochbened li junlaju chic chi apóstol ut qui-oc chi atinac chi cau xyab xcux. Quixye reheb li q'uila tenamit: —Ex cuech tenamitil aj judío ut chejunilex laex li cuanquex Jerusalén, lain tynye ere c'a'ru xyalal a'in. Q'uehomak retal chi us li oc cue xyebal ere. ¹⁵ Li jo' q'uaiebal li cuanqueb arin moco te'calak ta jo' yoquex chixc'oxlanquil laex. Anakcuan toje' beleb or re li cutan cuanco. ¹⁶ Yoco ban chixc'ulbal li quixye chak resil li profeta Joel nak quixye chi jo'ca'in:

¹⁷ Sa' eb li cutan li telaje'chalk, chan li Dios, lain tinq'ue lin musik' chi cuanc riq'uineb chixjunileb li tenamit. Eb le ralał ec'ajol te'yehok ratin profeta. Ut tinc'ut li xyalal chiruheb li tixil cuñk sa' xmatq'ueb ut tinc'uteb li visiön chiruheb li saj cuñk.

¹⁸ Ut tinq'ue ajcui' lin musik' chi cuanc riq'uineb lin moş cuñk ut lin moş ixk, ut talaje'xye resil li c'a'ru taç'ulmank mokon.

¹⁹ Ut sachba ch'olej tinc'utbesi cheru chiru choxa jo' ajcui' sa' ruchich'och' ut teril li quic', li xam ut li sib chanchan li chok.

²⁰ Tak'ojyinok' ru li sak'e ut li po taçakok' ru chanchan li quic' toj taçuulak xk'ehil li cutan a'an, li k'axal xiu xiu, nak lain tinrakok atin, chan li Dios.

²¹ Abanan chixjunileb li neque'yaban re lix c'aba' li Kaçua', te'colek'. (Joel 2:28-32)

²² Ex aj Israel, abihomak li tynye ere. Laex ac nequenau nak li Jesús aj Nazaret, a'an q'uebil xcuanquil xban li Dios sa' eyank laex riq'uin li sachba ch'olej ut li milagro quilajxbanu. Laex ac nequenau nak riq'uin xcuanquil li Dios quixbanu li sachba ch'olej. ²³ Li Jesús quik'axtesic sa' eruk' laex xban nak ac jo'can chak sa' xch'ol li Dios nak jo'can tixc'ul. Ut laex quechap ut quek'axtesi sa' ruk'eb li cuñk li inc'a' useb xna'leb. Ut eb a'an que'xcamsi chiru cruz. ²⁴ Abanan li Dios quicuaclesin cui'chic re chi yo'yo sa' xyankeb li camenak. Li Dios quirisi xcuanquil li camc sa' xben xban nak li camc inc'a' naru nanumta sa' xben. ²⁵ Jo'ca'in quixye li rey David chirix li Jesús: Lain junelic ninc'oxla li Dios. A'an cuan cuiq'uin. Maç'a' c'a'ru taşşink cue riq'uin li Dios.

²⁶ Numtaje nak li saylal cuan sa' li cuam xban nak c'ojc'o inch'ol riq'uin li Kaçua'.

²⁷ Lain ninnau nak tinacuaclesi cui'chic chi yo'yo sa' xyankeb li camenak. Ut ninnau ajcui' nak inc'a' taçanab chi k'aç lix tibel la Santil Alal.

²⁸ Lain ninnau nak laät nacatc'utuc chicuu chanru nak tintaui li junelic yu'am. Xban nak laät cuancat cuiq'uin, junelic sa sa' inch'ol. Ut ca'aj cui' acuiq'uin cuan li sahil ch'olejil. (Sal. 16:8-11)

²⁹ Ex kech tenamitil, lain ninye ere chi anchal inch'ol nak tz'akal yał nak laj David li kaxe'tonil yucua' quicam ut quimuke'. Lao nakanau nak li muklebal li cuan cui' toj cuan ajcui' chalen anakcuan. ³⁰ Laj David a'an jun profeta. A'an quixnau nak li Dios quixye riq'uin juramento nak sa' xyankeb li ralał xc'ajol tayo'lał li Cristo, ut a'an chic taxakabak chok' rey. ³¹ Ut laj David quixnau li c'a'ru taç'ulmank mokon. Jo'can nak quixch'olob xyalal nak li

Cristo taçuaclik cui'chic chi yo'yo sa' xyañkeb li camenak. Quixnau nak a'an inc'a' taçanaç sa' xna'ajeb li camenak chi moco lix tibel tak'ak. ³² A'an a'in li Jesús li quicuaclesic cui'chic chi yo'yo xban li Dios. Laç xkil tz'akal riq'uin xnak' ku. Jo'can nak nakanau nak yaç. ³³ Quic'ame' xban li Dios re nak taç'ojlak sa' lix nim uk' ut quiq'uehe' xcuauquil. Ut quiq'uehe' li Santil Musik'ej re xban li Dios. Ut quixq'ue ajcui' ke laç li Santil Musik'ej jo' quiyechi'ç ke. A'an a'in li yoquex çhirilbal ut chirabinquil anakcuan. ³⁴ Li rey David inc'a' quic'ame' sa' choxa jo' nak quic'ame' li Cristo sa' choxa. Abanan quixye chi jo'ca'in:

Li Dios quixye re li Kaçua': C'ojlan sa' lin nim uk',

³⁵ toj tinq'ueheb li xic' neque'iloc açue rubel laç cuauquil. (Sal. 110:1)

³⁶ Chenauhak chejunilex laex aj Israel nak li Jesús li queq'ue laex chiru cruz, a'an li quiq'uehe' chok' Kaçua' ut chok' Cristo xban li Dios, çan laj Pedro. ³⁷ Nak que'rabi a'an li ch'utch'uqqueb aran, que'yot'e' xch'oleb ut que'xye re laj Pedro jo' ajcui' reheb li apóstol li jun ch'ol chic: —Ex kas kitz'in, çc'a'ru takabañu? çanqueb. ³⁸ Laj Pedro quichak'oc ut quixye reheb: —Chiyot'ek' ech'ol ut jalomak ec'a'ux ut taçubsik' eha' çhi juñjunkalex sa' xc'aba' li Jesucristo re nak tixcuy emaç li Dios ut tixq'ue ere li Santil Musik'ej. ³⁹ Yechi'inbil ere laex li maçan a'in, ut yechi'inbil ajcui' reheb le ralaç ec'ajol ut reheb ajcui' li maçua'eb aj judío. Yechi'inbil reheb chixjunileb li jo' q'uaieleb te'bokek' xban li Kaçua' li kaDios, çan. ⁴⁰ Maçua' ca'aj cui' a'an li quixye laj Pedro reheb. Quixch'olob ban ajcui' xyalal chiruheb riq'uin nabal çhi a'in ut quixq'ue xna'lebeb. Quixye reheb: —Chenauhak xcolbal erib chiru li tojba maç li taçhalk sa' xbeneb li inc'a' useb xna'leb, çan. ⁴¹ Ut chixjunileb li que'paban re li raçin que'cubsic xha'. Oxib mil tana li que'paban sa' li cutan a'an ut que'oc chok' xcomoneb.

Chanru nak que'cuan çhi junaj xch'oleb li xben aj pabanel

⁴² Cauheb xch'ol chixpabanquil li tijleb li quich'olobaç chiruheb xbaneb li apóstol. Junaj xch'oleb nak cuanqueb ut sa' comonil que'tijoc ut que'cua'ac re xjulticanquil lix çamic li Jesucristo. ⁴³ Chixjunileb sachsoqueb xch'ol xban li milagro ut li sachba ch'olej li yoqueb chixbanunquil li apóstol. ⁴⁴ Ut eb li que'paban junaj xch'oleb ut chixjunil li c'a'ru cuan reheb, reheb sa' comonil. ⁴⁵ Que'xc'ayi lix ch'och'eb ut chixjunil li c'a'ru cuan reheb ut que'xjeq'ui lix tz'ak reheb chixjunileb a'yal çanru taç'anjelak chiruheb li junjunk. ⁴⁶ Rajlal cutan que'xch'utub ribeb sa' li templo çhi lok'onjnc. Ut sa' eb li rochoch que'cua'ac sa' comonil çhi sa' sa' xch'oleb ut çhi junaj xch'oleb. ⁴⁷ Que'xlok'oni li Kaçua' Dios ut que'q'uehe' xcuauquil xbaneb chixjunileb li tenamit. Ut rajlal cutan li Dios quixtenk'aheb çhi q'uaianç laj pabanel.

3

Laj Pedro quixq'uirtesi jun li cujnk inc'a' nabec

¹ Sa' jun li cutan que'çoeb sa' li templo laj Pedro roçben laj Juan oxib or re ecu sa' x-oril li tijoc. ² Rajlal cutan nac'ame' jun li cujnk inc'a' nabec çhalen sa' xyo'lajic ut naq'uehe' çhire li oquebaç re li templo. Lix c'aba' li oquebaç a'an "Ch'ina'us". Naq'uehe' li yaj aran re tixtz'ama c'a'ru re riq'uiheb li neque'oc sa' li templo. ³ Li cujnk a'in çiril nak yoqueb çhi oc sa' li templo laj Pedro ut laj Juan. Qui-oc çixtz'amanquil c'a'ru re reheb. ⁴ Laj Pedro ut laj Juan que'cana çhirilbal li yaj ut laj Pedro quixye re: —Ilon çhak kiq'uin.— ⁵ Nak çuirabi li cujnk li c'a'ru quixye, qui-oc çhirobybeninquil c'a'ru te'xq'ue re. ⁶ Laj Pedro quixye re: —Maç'a' intumin laj re tinq'ue

acue. Abanan li c'a'ru cuan cuiq'uin ting'ue acue. Sa' xc'aba' li Kacua' Jesucristo laj Nazaret, ninye acue cuaclin ut ben, chan re. ⁷ Ut nak quixye a'in, quixchap ut quixcuaclesi riq'uin lix nim uk'. Sa' junpat quicacuu li xben rak ut li rok li cuink. ⁸ Sa' junpat quixakli ut quibec. Ut qui-oc sa' li templo rochbened. Yo chi pisc'oc xban xsahil xch'ol ut yo chixlok'oninquil li Dios. ⁹ Chixjunileb li tenamit que'iloc re chi bec ut chixlok'oninquil li Dios. ¹⁰ C'ajo' nak que'xucucac ut sachsoqueb xch'ol chirilbal li cuink a'an, xban nak que'xnau ru nak a'an li nac'ojla chixtz'amanquil c'a'ru re chire li oquebal "Ch'ina'us" xc'aba'.

Laj Pedro quixye reheb laj judío nak li Jesús a'an laj Colonel li yechi'inbil xban li Dios

¹¹ Ut li cuink li cuiq'uirtesic inc'a' quiraj xcanabanquil rib riq'uibeb laj Pedro ut laj Juan. Yo chi bec rochbened. Ut chixjunileb sachsoqueb xch'ol chirilbal li quic'ulman. Que'coeb sa' anil sa' li templo ut que'xch'utub ribeb sa' li oquebal Salomón xc'aba', cuanqueb cui' laj Pedro ut laj Juan. ¹² Nak laj Pedro quirileb, quixye reheb: —Laex aj Israel, ¿c'a'ut nak sachso ech'ol nequexcana xban li c'a'ru xc'ulman? ¿C'a'ut nak yoquex chikilbal? ¿Ma nequex'oxla laex nak lao xkaq'uirtesi li cuink a'in kajunes? ¿Ma xban ta bi' kacuanquil ut li kachabilal nak xkaq'ue chi bec li cuink a'in? ¹³ Li Dios li que'xlok'oni chak laj Abraham, laj Isaac ut laj Jacob jo'queb ajcui' li kaxe'tonil yucua', a'an quiq'uehoc xcuauquil li Jesucristo laj c'anjel chiru. Ut laex quek'axtesi a'an re laj Pilato. Ut nak laj Pilato quiraj raj rach'abanquil, laex inc'a' queraj. ¹⁴ Laex inc'a' queraj xcolbal rix li santil cuink a'in, li tic xch'ol. A' chic laj camsinel queq'ue chi ach'abac. ¹⁵ Laex queq'ue chi camsic a'an, ut a'an li naq'uehoc yu'am. Abanan quicucaclesic cui'chic chi yo'yo xban li Dios sa' xyankeb li camenak. Ut a'an li nakach'olob xyalal lao xban nak lao xkil chi tz'akal nak quicuacli. ¹⁶ Li cuink a'in xq'uira sa' xc'aba' li Jesús. Riq'uin xpabanquil li Jesús xq'uira chi junaj cua li cuink a'in li nequenau ru ut yoquex chirilbal. ¹⁷ Jo'can ut ex cuas cuitz'in, lain ninnau nak queq'ue chi camsic li Jesús xban nak inc'a' nequenau xyalal jo'queb ajcui' li neque'taklan sa' eben. ¹⁸ Riq'uin a'in quitz'akloc ru li que'xye chak li profeta najter nak que'xye nak tento tixc'ul li rahobtesic li Cristo li Mesías, xban nak jo'can quixye li Dios. ¹⁹ Jo'can ut nak yot'omak ech'ol ut jalomak ec'a'ux ut sic'omak li Kacua' re nak a'an tixcuy tixsach le mac. Ut li Kacua' tixq'ue xcacuual ut xsaylal ech'ol. ²⁰ Li Dios tixtakla cui'chic chak li Jesucristo sa' ruchich'och' xban nak a'an li Mesías li ac xakabanbil chak najter re xcolbaleb chiru li raylal li cuanqueb sa' ruchich'och'. ²¹ Abanan tento nak cuank chak aran sa' choxa toj tacuulak xk'ehil nak tatz'aklok ru chixjunil jo' que'xch'olob xyalal li santil profeta junxilaj jo' quiyehere reheb xban li Dios. ²² Laj Moisés quixye reheb li kaxe'tonil yucua', "Li Kacua' le Dios tixq'ue junak profeta sa' eyank sic'bil ru xban jo' lain. Ecoman ajcui' laex. Chebanu chixjunil li c'a'ru tixye ere. ²³ Ut li ani inc'a' tixpab li c'a'ru tixye li profeta a'an, taisik sa' xyankeb lix tenamit li Dios ut tasachek' ru." (Dt. 18:18-19) ²⁴ Chalen nak quicuan li profeta Samuel chixjunileb li profeta que'xye ajcui' resil li c'a'ru tac'ulman sa' eb li cutan a'in. ²⁵ Laex ralar xc'ajol eb li profeta ut laex text'uluk re li quiyechi'ic reheb le xe'tonil yucua'. Nak li Dios quixbanu li contrato riq'uin laj Abraham, quixye re, "Chixjunileb li cuanqueb sa' ruchich'och' te'osobtesik sa' xc'aba'eb la cualal ac'ajol." ²⁶ Nak li Dios quixtakla chak li ralar, quixtakla xben cua eriq'uin laex aj judío re

erosobtesinquit re nak chejunjunkalex teyot' ech'ol ut tejal ec'a'ux ut tēcanab xbanunquit li maṣilal.

4

Laj Pedro yo chixch'olobanquit li xyalal chiruheb li neque'taklan sa' xbeneb laj judío

¹ Toj yoqueb ajcui' chi atinac laj Pedro ut laj Juan nak que'cuulac laj tij riq'uineb. Rochbeneb laj tij cuan li nataklan sa' xbeneb li soldado li neque'c'ac'alēn re li templo ut rochbeneb ajcui' laj saduceo. ² Yoqueb xjosk'il xban nak laj Pedro ut laj Juan yoqueb chixc'utbal li xyalal chiruheb li tenamit ut yoqueb chixch'olobanquit xyalal chiruheb chirix lix cuaclijiqueb li camēnak chi yo'yo sa' xc'aba' li Jesús. ³ Xbaneb xjosk'il que'xchap laj Pedro ut laj Juan ut que'xq'ue sa' tz'alam toj sa' li cutan jun chic xban nak ac x-ecuu. ⁴ Abanan nabaleb li que'paban re li atin li yoqueb chixyēbal laj Pedro ut laj Juan. Cuanqueb na obak mil li cuṅk li que'paban. ⁵ Sa' li cutan jun chic que'ch'utla Jerusalēn eb li xbenil aj tij, ut eb li neque'taklan sa' xbeneb laj judío, jo'queb ajcui' laj tz'ib. ⁶ Cuanqueb ajcui' aran laj Anás li xyucua'il laj tij, ut laj Caifás, ut laj Juan, ut laj Alejandro jo'queb ajcui' li jun ch'ol chic lix comoneb li xyucua'il aj tij. ⁷ Que'xtakla xc'ambal laj Pedro ut laj Juan. Que'xakabac chiruheb ut que'xye reheb: —¿Ani xq'uehoc ecuanquit? Ut, ¿ani sa' aj c'aba' yoquex chixxbanunquit li milagro a'in? chanqueb. ⁸ Ut laj Pedro qui-oc chi atinac riq'uin xcuanquit li Santil Musik'ej ut quixye reheb: —Læx li nequextaklan sa' xbeneb laj judío ut læx li nequexc'amoc be chiruheb, abihomak li oc cue xyēbal, ⁹ xban nak yoquex chixtz'ilbal atin sa' kabēn riq'uin li usilal li xc'ul li cuṅk a'in. Yoquex chixpatz'bal ke chanru nak quiq'uirtēsic li cuṅk a'in. ¹⁰ Takaye li xyalal ere re nak tenau nak li cuṅk a'in xq'uira sa' xc'aba' li Jesucristo laj Nazaret li queq'ue læx chi camšic chiru cruz. Ut a'an li quicuaclesic cui'chic chi yo'yo xban li Dios sa' xyānkeb li camēnak. Sa' xc'aba' a'an xq'uira li cuṅk a'in li yoquex chirilbal arin anakcuan. ¹¹ Li Jesús a'an chanchan li chābil pec tz'ektānān bil xbaneb laj cablanel. Læx xetz'ektāna li Jesús. Chanchanex laj cablanel li que'tz'ektānan re li chābil pec li quiq'uehe' chok' xxuc li cab mōkon. ¹² Ut mā ani chic aj iq'uin taruk takatau kacolbal, xban nak mač'a' chic junak c'aba'ej sa' chixjunil li ruchich'och' q'uebil ta ke re taruk tocolek' cui', chan laj Pedro. ¹³ Que'ril nak cauheb xch'ol laj Pedro ut laj Juan chi atinac. Que'xq'ue retal nak moco tzolbileb ta ut mač'a'eb xcuanquit. Ut que'xsach xch'oleb chirabinquit li c'a'ru que'xye. Ut que'xq'ue retal nak eb li cuṅk a'in que'bec chak rochben li Jesús. ¹⁴ Ut mač'a' chic naru neque'xye xban nak yoqueb chirilbal li cuṅk li quiq'uirtēsic xakxo chixc'atkeb laj Pedro ut laj Juan. ¹⁵ Jo'can nak que'xtakla risinquit chirix cab laj Pedro ut laj Juan. Ut que'oc chixc'ubanquit chi ribileb rib c'a'ru te'xbanu riq'uineb. ¹⁶ Ut que'xye: —¿C'a'ru takabanu riq'uineb li cuṅk a'in? Chixjunileb li tenamit arin Jerusalēn neque'xnu nak tz'akal milagro que'xbanu re li cuṅk. Lāo inc'a' naru takaye nak inc'a' yal a'an. ¹⁷ Takase'besiheb re nak inc'a' chic te'xye resil li na'leb a'in sa' eb li tenamit. Takaye reheb nak chalen anakcuan inc'a' chic te'atinak sa' xc'aba' li Jesús, chanqueb. ¹⁸ Ut nak que'boke' cui'chic laj Pedro ut laj Juan, que'xye reheb nak inc'a' chic taruk te'atinak chi moco taruk chic te'xtzoleb li tenamit sa' xc'aba' li Jesús. ¹⁹ Ut que'chak'oc laj Pedro ut laj Juan ut que'xye reheb: —C'oxlahomak chi us bar cuan li us chiru li Dios. ¿Ma us nak texkapab læx malaj ut us nak takapab li Dios? ²⁰ Lāo inc'a' naru takacanab xyēbal

resil li c'a'ru xkil ut xkabi, chanqueb. ²¹ Nak ac xe'xse'besiheb riq'uin cacuil atin, que'rach'abeb. Maç'a' que'ru xbanunquíl reheb xban nak chixjunileb li tenamit yoqueb chixlok'oninquíl li Dios riq'uin li c'a'ru quic'ulman. ²² Ac numenak ca'c'al chihab cuan re li cuĩnk li quiq'uirtesic riq'uin milagro.

Eb laj pabanel que'xtz'ama xtenk'anquíl re nak cauhaveb xch'ol chixyebal resil li Jesús

²³ Ut nak ac xe'ach'abac laj Pedro ut laj Juan, que'coeb riq'uineb li rech aj pabanelil. Que'xserak'i reheb chixjunil li que'xye eb li xbenil aj tij ut eb li neque'taklan. ²⁴ Nak que'rabi a'an, chixjunileb laj pabanel que'tijoc chiru li Dios sa' comonil ut que'xye: —At Kacua' at nimajcual Dios, laät catyiban re li choxa, li ruchich'och', ut li palau. Laät catyiban re chixjunil li c'a'ru cuan. ²⁵ Riq'uin li Santil Musik'ej caye re li rey David laj c'anjel chaçuu nak tixye chi jo'ca'in:

¿C'a'ut nak yoqueb xjosk'il li tenamit li inc'a' neque'xpab li Dios? Ut, ¿c'a'ut nak yoqueb xc'ubanquíl ribeb chixbanunquíl li yal maç'a' na-oc cui'?

²⁶ Eb li rey que'josk'o' riq'uin li c'a'ru quixbanu li Kaçua'. Ut que'xch'utub rib chixc'ubanquíl chanru nak te'risi sa' xcuanquíl li Mesías li xakabanbil chak xban li Dios. (Sal. 2:1-2)

²⁷ At Kaçua', yal ajcui' nak que'xch'utub ribeb sa' li tenamit a'in laj Herodes ut laj Poncio Pilato rochbeneb li tenamit aj Israel jo'queb ajcui' li maçua'eb aj Israel ut que'xc'ub ru chanru nak te'xbanu raylal re li Jesús la Santil Alal li sic'bil ru aban xban nak xic' que'ril. ²⁸ Jo'ca'in que'xbanu xban nak ac jo'can chak sa' ach'ol laät. Ut ac yebil chak aban nak jo'can taç'ulmank.

²⁹ Ut anakcuan, at Kaçua', chaç'ue taxak retal li kase'besinquíl yoqueb, ut choatenk'a laç aj c'anjel chaçuu re nak takaye la cuesilal chi cau kach'ol.

³⁰ Ut riq'uin taxak xniml la çuanquíl, taç'uirtesiheb li yaj ut chabanu li sachba ch'olej ut milagro sa' xc'aba' li Jesús la Santil Alal, chanqueb sa' lix tijeb. ³¹ Nak ac xe'rake' chi tijoc, qui-ec'asic li na'ajej li ch'ut'ch'ueb cui'. Ut chixjunileb li cuanqueb aran que'nujac riq'uin li Santil Musik'ej. Ut cauheb xch'ol chixyebal li rañin li Dios.

Chixjunil li c'a'ru cuan reheb laj pabanel, a'an reheb sa' comonil

³² Ut chixjunileb li que'paban junajeb chic xch'oleb ut junajeb chic xc'a'uxeb. Ut ma' ani quixye nak junes re a'an li c'a'ru cuan re. Reheb ban sa' comonil chixjunil li c'a'ru cuan reheb. ³³ Eb li apóstol cauheb xch'ol chixch'olobanquíl xyalal lix cuaclijic cui'chic chi yo'yo li Jesucristo sa' xyankeb li camenak. Ut li Dios quirosobtesiheb chixjunileb chi nabal.

³⁴ Ma' jun sa' xyankeb maç'a' ta cuan re xban nak chixjunileb li cuanqueb xch'och' ut li cuanqueb rochocheb que'xc'ayi ut que'xk'axtesi reheb li apóstol lix tz'ak li que'xc'ayi. ³⁵ Coxé'xq'ue li tumin reheb re te'xjeq'ui a' yal jo' q'ual taç'anjelak chiru li junjunk. ³⁶ Quicuan jun li cuĩnk aj José xc'aba'. Eb li apóstol que'xq'ue Bernabé chok' xcab xc'aba'. Chi jalbil ru naraj naxye “Aj C'ojobanel Ch'olej”. A'an xcomoneb li neque'tenk'an reheb laj tij. Chipre xtenamit. ³⁷ Cuan jun xch'och' quixc'ayi. Quixc'am lix tz'ak ut quixq'ue reheb li apóstol.

5

Li c'a'ru que'xc'ul laj Ananías ut lix Safira xban li maç que'xbanu

¹ Quicuan jun li cuĩnk aj Ananías xc'aba'. Quixc'ayi jun lix ch'och' rochben lix Safira li rixakil. ² Ut que'xc'ub ru chi ribileb rib nak yijach lix tz'ak li ch'och' taçanaç chok' reheb. Ut li yijach chic quixc'am laj Ananías riq'uineb li

apóstol ut quixye reheb: —A'an a'in chixjunil lix tz'ak li kach'och' li xkac'ayi, chan. ³ Laj Pedro quixye re: —At Ananías, ¿c'a'ut nak xaq'ue acuib chirale laj tza? ¿c'a'ut nak yocat chixbalak'inquil li Santil Musik'ej riq'uin nak yocat chixcanabanquil yijach lix tz'ak li ch'och' chok' acue? ⁴ ¿c'a'ut nak tat-oc xmkbal xtz'ak la ch'och'? ¿Ma maçua' ta bi' acue? Cui xaç'ayi la ch'och', ¿ma inc'a' ta bi' raj xru xcana chok' acue lix tz'ak? Maçua' chiku lao yocat chi tic'ti'ic. Chiru ban li Dios, chan. ⁵ Nak quirabi li atin li quixye laj Pedro, quit'ane' laj Ananías ut camenak quicana. Ut c'ajo' nak qui-oc xxiuheb chixjunileb li que'iloc re jo'queb ajcui' li que'abin resil. ⁶ Ut eb li cujnk li toj sajeb li cuanqueb aran que'xlan li camenak, que'xpako ut que'xc'am re te'xmuk. ⁷ Ac xnume' na chic oxib or nak quicuulac lix Safira li rixakil. Inc'a' naxnau c'a'ru ac xc'ulman. ⁸ Laj Pedro quixye re: —Ye cue. ¿Majo' a'in xec'ayi cui' le ch'och'?— Ut lix Safira quixye: —Yal, jo'can xkac'ayi cui', chan. ⁹ Ut laj Pedro quixye cui'chic re: —¿c'a'ut nak xec'ub cheribil erib xyalbal rix li Santil Musik'ej? Cue'queb chak li xe'muk chak re la belom ut tate'xc'am ajcui' laa, chan. ¹⁰ Ut sa' ajcui' li honal a'an lix Safira quit'ane' chi rok laj Pedro ut camenak quicana. Eb li cujnk que'oc sa' cab ut que'ril nak camenak chic. Que'risi ut coxe'xmuk chak chixc'atk lix belom. ¹¹ C'ajo' nak qui-oc xxiuheb chixjunileb laj pabanel jo'queb ajcui' chixjunileb li que'abin re li resil a'in.

Nabal li milagro ut li sachba ch'olej que'xbanu li apóstol

¹² Rajlal neque'xch'utub ribeb sa' xmu li templo chixjunileb laj pabanel cuan cui' li oquebal Salomón xc'aba'. Nabal li milagro que'xbanu eb li apóstol ut nabal li sachba ch'olej. ¹³ Usta eb li tenamit neque'xq'ue xlok'aleb laj pabanel, abanan neque'xucuaç chi xic sa' xyankeb. ¹⁴ C'ajo' nak yo'queb chi tamc li yo'queb chi pabanc re li Kacua', jo' cujnk jo' ixk. ¹⁵ Ut nabaleb li que'xc'am chak lix yajeb ut que'xyocob sa' lix cuarib malaj chiru lix pop chire be. Que'raj nak laj Pedro tix'q'uirtesiheb. Eb a'an que'xc'oxla nak usta yal tanumek' chiruheb, te'q'uirak. ¹⁶ Nabaleb li que'chal chak sa' eb li tenamit li cuanqueb chi nach' riq'uin Jerusalén. Que'xc'am chak li yaj ut eb li cuan maus aj Musik'ej riq'uineb. Ut chixjunileb quilaje'q'uirtesic.

Eb li apóstol que'c'ame' cui'chic chiruheb li neque'taklan sa'xbeneb laj judío

¹⁷ Ut li xyucua'il aj tij ut eb laj saduceo li cuanqueb rochben, c'ajo' nak que'oc xcakalinquileb li apóstol. ¹⁸ Jo'can nak que'xtakla xchappaleb ut que'xq'ueheb sa' li tz'alam li neque'q'uehe' cui' yalak ani. ¹⁹ Abanan chiru li k'o'jyin a'an jun lix ángel li Kacua' quixte lix puertil li tz'alam ut quirisiheb sa' tz'alam ut quixye reheb: ²⁰ —Ayukex sa' li templo ut tech'olob xyalal chiruheb li tenamit chirix li ac' yu'am, chan reheb. ²¹ Cuulajak chic nak toj ek'ela que'coeb sa' li templo eb li apóstol ut que'oc chixch'olobanquil li xyalal chiruheb li tenamit jo' quiyeh' reheb xban li ángel. Sa' ajcui' li ek'ela a'an que'cuulac li xbenil aj tij rochbeneb chixjunileb li neque'tenk'an re, ut que'xbokeb li jun ch'ol chic li neque'c'amoc be chiruheb laj judío jo'queb ajcui' li neque'taklan sa' xbeneb. Ut que'xtakla xyebal re laj ilol tz'alam nak te'c'amek' li apóstol riq'uineb. ²² Que'cuulac li takl sa' li tz'alam ut inc'a' chic que'ta'e' li apóstol aran. Jo'can nak que'suk'i chixyebal resil ut que'xye: ²³ —Relic chi yal li tz'alam tz'aptz'o chi us nak xkatau. Ut eb laj c'ac'alenel cuanqueb chire li oquebal. Nak xkate li tz'alam, inc'a' chic xkatauheb li cujnk chi sa', chanqueb li takl. ²⁴ Nak que'rabi a'an, eb li xbenil aj tij ut eb li neque'taklan sa' xbeneb li soldado li neque'c'ac'alen sa' li templo, que'sach xch'oleb ut que'oc chixc'oxlanquil c'a'ru taçanaç cui' li yo' chi c'ulmanç.

²⁵ Quichal jun ut quixye reheb: —Eb li cujnk li que'q'uehe' sa' tz'alam ecuer cuanqueb sa' li templo ut yoqueb chixch'olobanquil li xyalal chiruheb li tenamit, chan. ²⁶ Co ut li jun li nataklan sa' xbeneb li soldado rochbened lix takl. Ut que'xc'ameb chak li apóstol sa' usilal xban nak que'xucuac. Que'xc'oxla nak mare te'cutek' chi pec xbaneb li tenamit. ²⁷ Que'c'ame' laj Pedro ut laj Juan ut que'xakabac chiru li xyucua'il aj tij ut chiruheb li cuanqueb rochben. Ut li xyucua'il aj tij qui'atinac riq'üneb ut quixye reheb: ²⁸ —¿Ma inc'a' ta bi' xkaye ere nak inc'a' chic tetzoleb li tenamit sa' xc'aba' li cujnk a'an? Laex yoquex chixc'utbal li tijleb a'an sa' chixjunil Jerusalén ut teraj xq'uebal sa' kaben lix camic li cujnk a'an, chanqueb. ²⁹ Laj Pedro, jo'queb ajcui' li rech apostolil, que'chak'oc ut que'xye: —¿Ma takak'et li c'a'ru naxye li Dios ut takapab li c'a'ru neque'xye li cujnk? Inc'a'. Tento takapab li c'a'ru naxye li Dios. ³⁰ Li Dios li que'xlok'oni chak li kaxe'tonil yucua', a'an li quicuaclesin cui'chic re li Jesús chi yo'yo sa' xyankeb li camenak, li queq'ue chi camsic chiru cruz laex. ³¹ Li Jesús, a'an li quiq'uehe' xlok'al xban li Dios ut quiq'uehe' chi c'ojlac sa' xnim uk' ut quiq'uehe' xcuauquil chi taklanc ut chi coloc, re nak laj Israel naru te'yot'ek' xch'oleb te'xjal xc'a'ux ut te'cuyek' xmaqueb. ³² Lao xkil a'an riq'uin ku. Jo'can nak nakach'olob xyalal a'in ut li Santil Musik'ej li naxq'ue li Dios reheb li neque'paban, a'an ajcui' nac'utuc re li xyalal a'in, chanqueb. ³³ Li xyucua'il aj tij ut li cuanqueb rochben, c'ajo' nak que'jok'o' nak que'rabi li quixye laj Pedro ut que'raj raj xcamsinqueb li apóstol. ³⁴ Abanan sa' xyankeb a'an cuan jun aj fariseo aj Gamaliel xc'aba'. Li cujnk a'an aj tzolol chak'rab ut naq'uehe' xcuauquil xbaneb li tenamit. Quixakli chiruheb ut quixtakla risinqueb li apóstol junpat chirix cab. ³⁵ Ut quixye reheb: —Ex cujnk aj Israel, c'oxlahomak chi us c'a'ru tebanu riq'üneb li cujnk a'in. ³⁶ Q'uehomak retal li c'a'ru quixc'ul laj Teudas. A'an quixye nak k'axal nim xcuauquil. Cuan na cahibak ciento chi cujnk li neque'taken re. Aban li jun a'an quicamsic ut chixjunileb li que'taken re quilaje'xcha'cha'i ribeb ut que'oso' yal chi jo'can. ³⁷ Ut jo'can ajcui' quixc'ul laj Judas, Galilea xtenamit, nak quic'ulun sa' xk'ehil chixtz'ibanquil xc'aba'eb li tenamit. Quixbalak'ihéb nabaleb li tenamit. Quicam ajcui' a'an ut chixjunileb li que'taken re que'cha'cha'jc. ³⁸ Anakcuan lain tinye ere: Canabomakeb li cujnk a'in. Mech'i'ch'i'ihéb chic xban nak cui li c'anjel a'in yal xc'a'ux cujnk, taosok'. ³⁹ Abanan cui ut re li Dios, inc'a' texpruk chixpo'bal ru. Q'uehomak retal chi us mare anchal yoquex chi pletic riq'uin li Dios, chan laj Gamaliel. ⁴⁰ Ut que'xc'ul xch'ol li quixye. Que'xbobe li apóstol ut que'xq'ueheb chi saq'uec' ut que'xye reheb nak inc'a' chic te'atinak sa' xc'aba' li Jesús. Ut chirix a'an, que'ach'abac. ⁴¹ Ut eb li apóstol que'el chiruheb chi k'axal sa sa' xch'oleb xban nak chiruheb a'an lok' xc'ulbal li raylal sa' xc'aba' li Jesús. ⁴² Ut inc'a' que'xcanab xch'olobanquil xyalal chiruheb li tenamit sa' li templo ut sa' eb li rochoch ut que'xye resil nak li Jesucristo, a'an laj Colonel li yechi'inbil xban li Dios.

6

Cuukub chi cujnk que'xakabac chi c'anjelac

¹ Sa' eb li cutan a'an c'ajo' nak yoqueb chi q'uianc eb laj pabanel. Ut eb laj judío li neque'atinac sa' griego que'oc chixcuech'inquileb laj judío li neque'atinac sa' hebreo. Que'xye nak inc'a' tz'akal li c'a'ru naq'uehe' rajlal cutan reheb lix malca'an li cuanqueb sa' xyankeb a'an. ² Jo'can nak li cablaju chi apóstol que'xch'utub chixjunileb laj pabanel ut que'xye reheb: —Inc'a' naru takacanab xch'olobanquil ratin li Dios yal re nak tojec'ok tzaacemk

lao. ³ Ex herman, sic'omak sa' eyank cuukubak chi cujnk chabilakeb xna'leb ut nujenakeb chi Santil Musik'ej riq'uineb. Chabilak xyehom xbanuhomob. A'aneb li te'q'uehek' sa' li c'anjel a'in. ⁴ Ut lao takayal kak'e chi tijoc ut chixjulticanquil li ratin li Dios, chanqueb. ⁵ Ut que'xc'ul xch'oleb chixjunil li cuanqueb aran. Que'xsic' ru laj Esteban li napaban chi tz'akal ut nujenak chi Santil Musik'ej. Ut que'xsic' ajcui' ruheb laj Felipe, laj Prócoro, laj Nicanor, laj Timón, laj Parmenas, ut laj Nicolás aj Antioquía li qui-oc sa' xyankeb laj judío. ⁶ A'aneb a'in li que'xakabac chi c'anjelac. Ut eb li apóstol que'xq'ue li ruk' sa' xbeneb ut que'tijoc. ⁷ Jo'can nak yo chi abic li ratin li Kacua' yalak bar. Ut yoqueb chi tamc laj pabanel aran Jerusalén. Ut nabaleb laj tij que'paban.

Nak que'xchap laj Esteban

⁸ Laj Esteban a'an jun cujnk osobtesinbil xban li Dios ut q'uebil xcuanquil chixbanunquil li milagro ut sachba ch'olej sa' xyankeb li tenamit. ⁹ Cuanqueb xcomoneb li neque'tzoloc sa' li cab li neque'xch'utub cui' ribeb laj judío. Aj libertos neque'xye reheb. Sa' xyankeb a'an cuanqueb li neque'chal chak sa' eb li tenamit Cirene, Alejandría, Cilicia ut Asia. Eb a'an yoqueb chixcuech'inquil laj Esteban. ¹⁰ Abanan nak quiatínac laj Esteban, eb a'an inc'a' chic que'ru xsumenquil xban nak a'an q'uebil xna'leb xban li Santil Musik'ej. ¹¹ Aban cuanqueb li que'tuminac ru re te'xye tic'ti' chirix laj Esteban. Ut que'xye: —Lao xkabi nak yo chixmajecuanquil li Dios ut laj Moisés, chanqueb. ¹² Ut que'xtacchi'i ajcui' li tenamit, jo'queb ajcui' laj c'amol be ut eb laj tz'ib. Que'xchap laj Esteban ut que'xc'am chiruheb li neque'taklan sa' xbeneb laj judío. ¹³ Ut que'xsic' ani tatic'ti'ik chirix ut que'xk'aba a'an ut que'xye: —Li cujnk a'in junelic yo chixsachbal xcuanquil li santil na'ajej a'in ut naxtz'ektana li chak'rab li quiq'uehe' re laj Moisés. ¹⁴ Lao quikabi nak yo chixyebal nak li Jesús laj Nazaret tixjuc' li na'ajej a'in, ut tixjal ru li chak'rab li coxtzol cui' laj Moisés, chanqueb. ¹⁵ Ut chixjunileb li neque'taklan sa' xbeneb laj judío li c'ojc'oqueb aran que'ríl laj Esteban ut que'xq'ue retal nak nalemtz'un li rilobał. Chanchan na-iloc jun li ángel.

7

Laj Esteban quixch'olob xyalal chiruheb li neque'taklan sa' xbeneb laj judío

¹ Ut li xyucua'il eb laj tij quixpatz' re laj Esteban ma yal li yoqueb chixyebal. ² Quichak'oc laj Esteban ut quixye: —Ex cuas cujtz'in ut laex li nequexc'amoc be, abihomak li oc cue chixyebal. Li Dios li k'axal lok' quixc'utbesi rib chiru laj Abraham li kaxe'tonil yucua' nak cuan aran Mesopotamia nak toj maji' naxic chi cuanc sa' li na'ajej Harán. ³ Quixye re: —Tat-elk sa' li na'ajej a'in. Tacanabeb la cuech'alal ut tatic' sa' jun li na'ajej li tinc' ut chacuo lain, chan. ⁴ Qui-el ut laj Abraham sa' li na'ajej Caldeo ut co chi cuanc sa' li na'ajej Harán. Nak ac cuan sa' li na'ajej a'an quicam lix yucua'. Ut chirix a'an li Dios quixtakla chi cuanc sa' li na'ajej li cuanquex cui' laex anakuan. ⁵ Abanan li Dios inc'a' quixq'ue xch'och' laj Abraham aran. Chi tic mac'a' quixq'ue re. Abanan quixye re nak tixq'ue chok' reheb li ralal xc'ajol li te'cuank mokon usta toj ma jun lix coc'al cuan. ⁶ A'an a'in li quixye li Dios re laj Abraham: —Eb la cualal ac'ajol te'cuank sa' jalan tenamit macua' xtenamiteb. Ut sa' li tenamit a'an te'cuank chok' rahobtesinbil mos ut xic' te'ilek' chiru cahib ciento chihab. ⁷ Ut lain tinrakot atin sa' xben li tenamit a'an li te'rahobtesink reheb la cualal ac'ajol. Ut nak te'elk sa' li tenamit a'an te'c'anjelak chicuu sa' li na'ajej a'in, chan li Dios. ⁸ Nak li Dios quixbanu li contrato riq'uin laj Abraham quixye re nak tento te'xbanu li circuncisión. Jo'can nak laj

Abraham quixbanu li circuncisión riq'uin laj Isaac li ralal nak ac cuan cuakxakib cutan re. Ut laj Isaac quixbanu riq'uin laj Jacob li ralal ut jo'can ajcui' quixbanu laj Jacob riq'uineb li ralal cablaju. ⁹ Eb li ralal laj Jacob c'ajo' nak que'xcakali laj José li ritz'ineb. Jo'can nak que'xc'ayi laj José ut quic'ame' aran Egipto. Abanan nak ac cuan aran Egipto, li Dios yo'chi tenk'anc re. ¹⁰ Ut a'an quitenk'an re chixcuybal li raylal li quixc'ul. Quirosobtesi ut quixq'ue xna'leb. Ut laj Faraón li acuabej aran Egipto quixq'ue retal nak laj José cuan xna'leb ut quixxakab chi taklanc sa' xben li tenamit ut sa' xbeneb ajcui' li cuanqueb sa' li rochoch. ¹¹ Ut quicuan jun nimla cue'ej ut jun nimla raylal sa' eb li tenamit Egipto ut Canaán. Ut eb li kaxe'tonil yucua' inc'a' chic que'xtau xtzacaemkeb. ¹² Nak quirabi laj Jacob nak aran Egipto cuan nabal li trigo, quixtaklaheb li ralal aran chixc'ambaleb xtrigo. ¹³ Nak que'coeb cui'chic xca' sut li ralal aran Egipto, laj José quixye reheb nak a'an laj José li ritz'ineb. Ut sa' ajcui' li cutan a'an laj Faraón quixnau nak laj José, a'an xcomoneb li ralal xc'ajoleb laj judío. ¹⁴ Ut chirix a'an laj José quixtakla xc'ambal lix yucua' jo'queb ajcui' li rech'alal. Chixjunieb li rech'alal cuanqueb o'laju xcac'al (75). ¹⁵ Jo'ca'in nak coeb aran Egipto laj Jacob li kaxe'tonil yucua' ut aran quicam jo'queb ajcui' li ralal. ¹⁶ Lix bakeleb que'c'ame' Siquem ut que'muke' sa' li na'ajej li quixlok' laj Abraham riq'uineb li ralal xc'ajol laj Hamor. ¹⁷ C'ajo' nak yo'queb chi q'uianc li ralal xc'ajol laj Israel aran Egipto nak ac yo'chi cuulac xk'ehil nak te'isik sa' li tenamit a'an jo' quiyechi'ic re laj Abraham xban li Dios. ¹⁸ Ut qui-oc jalan chic acuabej ut a'an inc'a' quixnau ru laj José chi moco quixnau chanru lix na'leb nak quicuan. ¹⁹ Li acuabej a'an quixsic' xyalal chanru nak tixbanu raylal reheb li kaxe'tonil yucua'. Quixrahobtesiheb nak quixtakla xcamsinquileb li coc' telom li te'yo'lak re nak inc'a' chic te'tamk li ralal xc'ajoleb. ²⁰ Sa' eb li cutan a'an quiyo'la laj Moisés. Li c'ula'al a'an raro xban li Kaçua'. Ut oxib po quiq'uiresic xbaneb lix na' xyucua'. ²¹ Abanan quicuulac xk'ehil nak quicanabac chak sa' li nima' ut lix rabin laj Faraón quixococ re, re taruk taçolek'. Quixc'am chok' re ut quixq'uiresi jo' tz'akal re. ²² Laj Moisés quixtzol rib jo' neque'xtzol ribeb laj Egipto. Ut cuan xna'leb chi atinac ut chixbanunquil li chabil na'leb. ²³ Nak ac xbanu li ca'c'al chihab (40), qui-ala sa' xch'ol xic chirilbaleb laj Israel li rech tenamitil. ²⁴ Nak quiril jun reheb yo'chi saq'uec' xban jun aj Egipto, quixcol sa' ruk'. Quixchap laj Egipto ut quixcamsi. Chi jo'ca'in quixq'ue rekaj li quixbanu re li rech tenamitil. ²⁵ Laj Moisés quixc'oxla nak eb li rech tenamitil te'xq'ue retal nak a'an li taç'anjelak chiru li Dios re xcolbaleb. Abanan eb a'an inc'a' que'xq'ue retal. ²⁶ Cuulajak chic laj Moisés quixtau cuib laj Israel yo'queb chi pletic. Quixk'useb re te'xcanab xch'e'bal rib. Quixye reheb: —Laex ecomon erib. ¿C'a'ut nak yoq'uech xhipletinquil erib? chan reheb. ²⁷ Ut li jun li yo'chi sac'oc re li jun chic quixtiquisi laj Moisés ut quixye re: —¿Ani xq'uehoc acue chi taklanc ut chi rakoc atin sa' kaben? ²⁸ ¿Ma taçua'j tinçamsi lain jo' nak xacamsi laj Egipto eçuer? chan re laj Moisés. ²⁹ Nak quirabi li c'a'ru quixye, laj Moisés quixcucua' ut quielelic. Co'chi cuanc sa' li na'ajej Madian li moco tz'akal xtenamit ta. Nak cuan aran, que'yo'la cuib li ralal. ³⁰ Ac xnume' chic ca'c'al chihab roquic sa' li chaki ch'och' a'an, nak quiril jun ton li q'uix yo' xxamlel nach' riq'uin li tzul Sinai. Ut sa' li xam a'an quixc'utbesi rib jun li ángel chiru. ³¹ Ut laj Moisés c'ajo' nak quisach xch'ol chirilbal ut quinach'oc riq'uin re taril chi us. Quirabi xyab xcux li Kaçua' nak quixye: ³² —Lain li Kaçua' Dios li que'xlok'oni chak la' x'e'tonil yucua'. Lain li Dios li que'xlok'oni chak laj Abraham, laj Isaac, ut laj Jacob,

chan. Ut laj Moisés nasicsot xban xxiu ut inc'a' chic quixcuy rilbal. ³³ Ut quixye li Kaçua' re: —Isi la xab çaçucok xban nak li na'ajej cuancat cui', a'an santil na'ajej. ³⁴ Relic chi yal lain yoquin chirilbal li raylal li yoqueb chixc'ulbal lin tenamit li cuanqueb Egipto. Ut yoquin ajcui' chirabinquil nak yoqueb xk'okonquil ribeb xban li raylal. Jo'can nak xinçal chixcolbaleb sa' ruk'eb laj Egipto. Abi li tinya açue. Tatintakla Egipto, chan li Kaçua' re laj Moisés. ³⁵ Laj Moisés, a'an li que'xtz'ektana laj Israel nak que'xye: —¿Ani xq'uehoc açue chi taklanc ut chi rakoc atin? çanqueb. A'an li quitaklaç chixtenk'anquileb laj Israel ut chixcolbaleb. Quitaklaç xban li Kaçua' nak li ángel quixc'utbesi rib chiru sa' li jun ton chi q'uix yo xxamlel. ³⁶ Laj Moisés, a'an li qui-isin reheb Egipto. Nabal li milagro ut li sachba ch'olej quixbanu aran Egipto ut sa' li Caki Palau. Chiru ca'c'al chihab quic'amoc be chiruheb sa' li chaki ch'och'. ³⁷ A'an laj Moisés li quiyehoc çak re a'in reheb laj Israel: —Li Kaçua' le Dios tixq'ue junak profeta sa' eyank sic'bil ru xban jo' lain. Ecomon ajcui' laex. Çebanu chixjunil li c'a'ru tixye ere, çan. ³⁸ A'an li quicuan rochbened laj Israel nak que'xch'utub ribeb sa' li chaki ch'och'. Quicuan rochbened li kaxe'tonil yucua' ut rochben ajcui' li ángel li quiatınac riq'uin sa' li tzul Sinai nak quixye re li ratin li Dios li naq'uehoc yu'am re nak a'an chic tayehok ke lao. ³⁹ Abanan eb li kaxe'tonil yucua' inc'a' que'raj xpabanquil li c'a'ru quixye. Que'xtz'ektana ban ut que'raj raj suk'ic cui'chic Egipto. ⁴⁰ Que'xye re laj Aarón: —Yib kadios re te'c'amok be chiku. Inc'a' nakanau c'a'ru xc'ul çak laj Moisés li qui-isin çak ke Egipto. ¿C'a'ru aj e nak yoko chiroybeninquil? çanqueb li kaxe'tonil yucua'. ⁴¹ Jo'can nak que'xyib riq'uin oro xjalım uç jun li cuacax ut que'mayejac chiru. C'ajo' nak que'saho' sa' xch'oleb chirilbal lix dioseb li que'xyib riq'uin ruk'eb. Ut que'xbanu jun li nink'e re xlok'oninquil. ⁴² Jo'can nak li Kaçua' Dios quixcanabeb xjuneseb. Quixcanabeb chixlok'oninquil li çahim li cuan chiru choxa. Ut quitz'akloc ru li tz'ibanbil çak najter xbaneb li profeta nak que'xye:

Laex aj Israel, ¿ma quexmayejac ta bi' çak chicuı lain nak yoquex çak chi numec' sa' li chaki ch'och' chiru ca'c'al chihab?

⁴³ ¿Ma maçua' ta bi' le yibanbil dios Moloc ut Renfan quelok'oni? Laex queyib li jalam uç a'in re telok'oni. Jo'can nak texincanab re nak jalan tenamit tanumtak sa' eben ut text'amek' chi najt sa' jun li na'ajej li cuan jun pac'al li tenamit Babilonia, çan li Kaçua'. (Am. 5:25-27)

⁴⁴ Eb li kaxe'tonil yucua' que'xyib ajcui' çak li tabernaculo nak yoqueb çak chi numec' sa' li chaki ch'och' ut aran xocxo li çak'rab. Que'xyib jo' li retalil li quic'ute' chiru laj Moisés xban li Dios. ⁴⁵ Eb li kaxe'tonil yucua' que'xc'ul li muhebal a'in. Ut nak laj Josué quic'amoc be chiruheb chi pletic, que'xc'am li muhebal chirixeb. Ut que'reçhani lix ch'och'eb li maçua'eb aj judío nak li Dios quirisi chiruheb li kaxe'tonil yucua' li xic' que'iloc reheb. Li muhebal a'an quic'anjelac sa' eb li cutan a'an toj çalın nak quicuan laj David çok' rey. ⁴⁶ Laj David quixbanu li c'a'ru quiraj li Dios, ut li Dios quisaho' xch'ol riq'uin. Quixtz'ama chiru li Dios nak tixyib li templo bar te'xlok'oni cui' li Dios li quixlok'oni laj Jacob. ⁴⁷ Abanan maçua' laj David quiyiban re li templo. Laj Salomón, a'an li quiyiban re. ⁴⁸ Quixyib li templo usta li nimajcual Dios inc'a' nacuan sa' junak cab yibanbil xban cuink' jo' quixye çak li profeta Isaías nak quixye chi jo'ca'in:

⁴⁹ Li choxa, a'an li na'ajej li ninc'ojla cui' ut li ruchich'och', a'an xna'aj li cuok. ¿C'a'ru chi ochochil taruk teyib çok' cue? Ut, ¿bar cuan lin na'aj li tinhılank cui'?

⁵⁰ ¿Ma maꝥua' ta bi' lain xinyjban re chixjunil li c'a'ru cuan? chan li Kaꝥua'. (Is. 66:1-2)

⁵¹ Laex inc'a' nequetau xyalal. K'axal cau eꝥh'ol. Chanchanex li inc'a' neque'paban re li Dios. Junelic neque'etk'eti erib chiru li Santil Musik'ej jo' que'xbanu le xe'tonil yucua'. ⁵² ¿Ma cuan ta bi' junak profeta inc'a' quirahobtesic xbaneb le xe'tonil yucua'? ¿Ma inc'a' ta bi' que'xcamsiheb li que'ch'oloban chak resil lix c'ulunic li jun li Tjꝥ Xch'ol, li quek'axtesi laex chi camsic? ⁵³ Laex quec'ul li chak'rab li quixq'ue ere li ángel, abanan inc'a' nequebanu li c'a'ru naxye, chan laj Esteban.

Nak que'xcamsi laj Esteban

⁵⁴ Nak que'rabi li c'a'ru yo chixyebal laj Esteban, c'ajo' nak que'josk'o'. Que'xc'uxuxi li ruch re xbaneb xjosk'il. ⁵⁵ Ut laj Esteban nujenak chi Santil Musik'ej. Qui-iloc sa' choxa ut quiril lix nimajcual lok'al li Dios ut quiril li Jesús sa' xnim uk' li Dios. ⁵⁶ Quixye: —Ilomak. Teto li choxa nak nacuil ut li C'ajolbej cuan chi xnim uk' li Dios, chan. ⁵⁷ Ut eb li tenamit xic' que'rabi li quixye ut que'txz'ap lix xiqueb ut que'xjap reheb chi cau xban xjosk'ileb ut jun xiquiqueb sa' xben nak que'xchap. ⁵⁸ Que'risi laj Esteban sa' li tenamit. Ut eb li oqeb re chi cutuc re chi pec, que'xcanab li rak'eb chi rok jun li saj cujnk aj Saulo xc'aba'. ⁵⁹ Nak yoꝥueb chixcutbal chi pec, laj Esteban yo chi tijoc ut quixye: —At Kaꝥua' Jesús, c'ul lin musik'.— ⁶⁰ Quixcuik'ib rib, quixjap re chi cau ut quixye: —At Kaꝥua', maq'ue li maꝥ a'in sa' xbeneb.— Ut nak quixye a'an, quicam.

8

Laj Saulo xic' narileb laj pabanel

¹ Laj Saulo quixc'ul xch'ol nak que'xcamsi laj Esteban. Chalen sa' li cutan a'an que'oc xrahobtesinquileb chixjunileb laj pabanel aran Jerusalén ut c'ajo' li raylal que'xc'ul. Ut chixjunileb quilaje'xjeq'ui rib sa' eb li na'ajej Judea ut Samaria. Ca'aj chic eb li apóstol que'cana Jerusalén. ² Cuib oxib laj pabanel que'muk re laj Esteban ut c'ajo' nak que'raho' xch'oleb xban lix camic. ³ Aban laj Saulo yalyo xk'e chixrahobtesinquileb laj pabanel. Na-oc sa' eb li cab ut narisiheb sa' rochoheb ut naxc'ameb sa' tz'alam, jo' cujnk jo' ixk. ⁴ Ut chixjunileb li que'xjeq'ui ribeb sa' jalan na'ajej yoꝥueb chixyebal resil li evangelio yalak bar.

Laj Felipe yo chixyebal resil aran Samaria nak li Jesús, a'an li Cristo

⁵ Laj Felipe co sa' li tenamit Samaria ut qui-oc chixch'olobanquil resil chiruheb li tenamit nak li Cristo, a'an laj Colonel li yechi'inbil xban li Dios. ⁶ Ut chixjunileb que'xq'ue xch'ol chirabinquil li atin li quixye laj Felipe xbaneb li milagro quilajxbanu. ⁷ Nabaleb li cuan maus aj musik'ej riq'uineb que'q'uirtesic. Japjoꝥueb re li maus aj musik'ej nak neque'el riq'uineb. Ut nabaleb li yek rokeb ut li sic rok ruk'eb quilaje'q'uirtesic. ⁸ Ut c'ajo' nak que'saho' sa' xch'oleb sa' li tenamit a'an.

Laj Simón laj k'e quiraj xlok'bal xcuanquil li Dios

⁹ Quicuan jun li cujnk aj Simón xc'aba'. A'an aj k'e. Ac najter na-oc chixbalak'inquileb li cuanqueb sa' li tenamit Samaria. A'an naxye nak nim xcuanquil. ¹⁰ Ut chixjunileb li tenamit, jo' li cuanqueb xcuanquil jo' ajcui' li maꝥ'a'eb xcuanquil, que'rabi li c'a'ru yo chixyebal laj Simón ut que'xye: —Li cujnk a'in, cuan xcuanquil li Dios riq'uin, chanqueb. ¹¹ Ut que'xq'ue xch'ol chixbanunquil li c'a'ru naxye xban nak ac junxil na-oc chixbalak'inquileb.

12 A'ut laj Felipe yō chixjulticanquil resil xnimal xcuanquilal li Dios ut li Jesucristo. Ut nabaleb que'pāban ut que'cubsic xha', jo' cuṅk jo' ixk. 13 Ut quipaban ajcui' laj Simón ut quicubsic xha'. Ut yō chi xic chirix laj Felipe yalak bar. Quisach xch'ol chirilbaleb li milagro ut li sachba ch'olej li yō chixbanunquil laj Felipe. 14 Eb li apóstol li toj cuanqueb Jerusalén que'rabi resil nak eb laj Samaria yoqueb chixpabanquil li Dios. Jo'can nak que'xtakla laj Pedro ut laj Juan aran. 15 Nak que'cuulac Samaria, que'tijoc sa' xbeneb laj pabanel re nak te'xc'ul li Santil Musik'ej xban nak toj maji' que'xc'ul. 16 Ca'aj cui' que'cubsic xha' sa' xc'aba' li Jesucristo. 17 Laj Pedro ut laj Juan que'xq'ue li ruk'eb sa' xbeneb ut que'xc'ul li Santil Musik'ej. 18 Ut quiril laj Simón nak riq'uin xq'uebal li ruk'eb li apóstol sa' xbeneb, neque'xc'ul li Santil Musik'ej. Ut quixyechi' tumin reheb laj Pedro ut laj Juan ut quixye reheb: 19 —Q'ue cue li cuanquil a'an re nak li ani tinq'ue li cuuk' sa' xben tixc'ul li Santil Musik'ej, chan. 20 Laj Pedro quixye re: —Chisachk la tumin acuochben xban nak xac'oxla nak taruk talok' riq'uin tumin li naxq'ue chi maṭan li Kaçua' Dios, chan. 21 Laat inc'a' taruk taç'ul li maṭan a'in xban nak moco tic ta la ch'ol chiru li Dios. 22 Cui tayot' ach'ol tajal ac'a'ux ut taçanab xbanunquil li maṣilal a'in ut cui taç'ama acuybal chiru li Dios, maṣe chan nak tixcuy amaç riq'uin li xac'oxla. 23 Laat c'ajo' nak nacatcakalin ut junes maṣilal nacac'oxla, chan laj Pedro. 24 Quichak'oc laj Simón ut quixye: —Chextijok chicuix chiru li Kaçua' re nak inc'a' tinc'ul jo' xaye laat, chan. 25 Nak ac xe'xch'olob xyälal li raṭin li Dios ut que'xye resil li Jesucristo, laj Pedro ut laj Juan que'suk'i cui'chic Jerusalén. Ut que'xch'olob xyälal sa' nabal chi tenamit cuanqueb sa' xcuent Samaria.

Laj Felipe quixch'olob xyälal chiru li cuṅk Etiopía xtenamit

26 Ut jun lix ängel li Kaçua' quiätinac riq'uin laj Felipe ut quixye re: —Tatxic sa' li be li cuan sa' li sur. Li be a'an li nanume' sa' li chaki ch'och' naxic Jerusalén toj Gaza.— 27 Laj Felipe çō. Nak yō chi xic quiril jun li cuṅk aj Etiopía. A'an jun eunuco q'uebil xcuanquil chi c'anjelac chiru lix Candace li reina li cuan Etiopía. Sa' ruk' li cuṅk a'an k'axtesinbil chixjunil lix biomal li reina. Li cuṅk a'an çō Jerusalén chixlok'oninquil li Dios. 28 Yō chi suk'ic sa' rochoch. Ç'ojc'o sa' lix carruaje ut yō chirilbal xsa' li hu li quixtz'iba li profeta Isaías. 29 Li Santil Musik'ej quixye re laj Felipe: —Ayu, jilon chixc'atk li carruaje a'an, chan. 30 Quijiloc laj Felipe ut quirabi nak li cuṅk yō chirilbal xsa' li hu li quixtz'iba li profeta Isaías. Laj Felipe quixpatz' re: —¿Ma nacatau ru li yocat chirilbal? chan re. 31 Ut li cuṅk quixye: —¿Chanru nak tintau ru cui ma' ani junak taç'utuk lix yälal chicuu? — Ut quixtz'ama chiru laj Felipe nak taçakek' sa' li carruaje ut taç'ojlak chixc'atk. 32 Ut li hu li yō chirilbal xsa', a'an li quixtz'iba li profeta Isaías. Naxye chi jo'ca'in: Nak yō xrahobtesinquil, quixcubsi rib ut ma' jun ätin quixye jo' jun carner nak quic'ame' chi çamsic. Chanchan nak naxcanab rib li carner chi besec' li rix chiruheb li neque'besoc re, jo'can quixbanu a'an. Ut ma' jun ätin quixye.

33 Usta maç'a' xmaç, quichape' ut quiq'uehe' chi çamsic. Ut ma' ani qui-oquen chirix re xcolbal. Quicamsic ban. ¿Ani taruk taçehok li resil lix yibal ru xna'lebeb li rech tenamitil? (Is. 53:7-8)

34 Li cuṅk quixye re laj Felipe: —Ye cue, ¿ani chi aj ix naxye a'in li profeta? ¿Ma chirix a'an, malaj ut chirix jalan chic? chan. 35 Laj Felipe qui-oc chixch'olobanquil lix yälal chiru. Quixtiquib riq'uin li quixtz'iba li profeta Isaías ut toj quixch'olob xyälal chirix li Jesucristo. 36 Nak yoqueb chi xic,

que'cuulac cuan cui' jun li ha'. Ut li cujnk quixye: —Arin cuan ha'. ¿Ma inc'a' taruk tacubek inha' lain? chan. ³⁷ Ut laj Felipe quixye re: —Cui nacapab chi anchal ach'ol li Jesucristo, taruk tacubek aha', chan. Li cujnk quichak'oc ut quixye: —Ninpab nak li Jesucristo, a'an Ralal li Dios, chan. ³⁸ Ut quixxakab li carruaje. Tojo'nak laj Felipe ut li cujnk coeb sa' li ha' ut laj Felipe quixcubsi xha'. ³⁹ Nak que'el chak sa' li ha', li Santil Musik'ej quixc'am laj Felipe ut li cujnk inc'a' chic quiril ru. Co xjunes chi sa sa' xch'ol. ⁴⁰ Ut laj Felipe quic'ame' Azoto ut coxnumek' sa' chixjunileb li tenamit. Yo chixch'olobanquil xyalal li evangelio chalen nak quicuulac sa' li tenamit Cesarea.

9

Laj Saulo quipaban

¹ Nak yo chi c'ulmanc a'in, laj Saulo toj yo chixrahobtesinquileb li neque'paban re li Kacua' ut yo chixyebal nak toj tixcamsiheb. Jo'can nak co riq'uin li xyucua'il aj tij. ² Ut quixtz'ama lix hu chiru re tixk'axtesi sa' eb li cab li neque'xch'utub cui' ribeb laj judío aran Damasco re taruk tixchapeb laj pabanel li tixtau aran, jo' cujnk jo' ixk. Tixchapeb ut tixc'ameb chi prexil Jerusalén. ³ Yo chi xic ut nak ac cuulac re sa' li tenamit Damasco, sa' jumpat quisute' xban jun chanchan xam quichal sa' choxa. ⁴ Quit'ane' sa' ch'och' laj Saulo ut quirabi jun xyab cux yo chixyebal re: —At Saulo, at Saulo, ¿C'a'ut nak yocat chixbanunquil raylal cue?— ⁵ Laj Saulo quixye: —¿Anihat laät, at Kacua'?— Ut li yo chi atinac quixye: —Lain li Jesús li xic' yocat chirilbal. Yocat chixtacuasinquil acuib nak xic' yocat chicuibal, chan. ⁶ Nasicsot xban xxiiu laj Saulo nak quixye: —Kacua', ¿c'a'ru tacuaj tinbanu? chan. Ut li Kacua' quixye: —Cuaclin ut ayu sa' li tenamit, ut aran tayehek' acue c'a'ru us tabanu, chan. ⁷ Ut eb li cujnk li yoqueb chi xic rochben sachsoqueb xch'ol que'cana. Yoqueb chirabinquil li yo chi atinac, abanan inc'a' que'ril ru li ani yo chi atinac. ⁸ Quicuacli laj Saulo ut nak quixte li xnak' ru, inc'a' chic qui-iloc. Ch'ilonbil chi ruk' nak quic'ame' sa' li tenamit Damasco. ⁹ Aran quicuan chiru oxib cutan. Inc'a' na-iloc ut inc'a' quicua'ac chi moco qui-uc'ac. ¹⁰ Aran Damasco cuan jun laj pabanel aj Ananías xc'aba'. Li Kacua' quiatinac riq'uin sa' visión ut quixye re: —At Ananías.— Quichak'oc ut quixye re: —Cue'quin, Kacua'.— ¹¹ Ut li Kacua' quixye re: —Lain tinye acue, ayu sa' rochoch laj Judas li cuan sa' li nim be li Tic neque'xye re. Aran tasic' jun li cujnk li xchal chak Tarso. Aj Saulo xc'aba'. A'an yo chi tijoc aran. ¹² Laj Saulo xril jun li visión. Xat-oc riq'uin nak xril ut xaq'ue la cuuk' sa' xben re nak t'ilok cui'chic, chan li Kacua'. ¹³ Laj Ananías quichak'oc ut quixye: —At Kacua', nabal que'yehoc resil cue nak xic' narileb laj pabanel li cujnk a'an. C'ajo' li raylal nalajxbanu reheb la cualal ac'ajol li cuanqueb aran Jerusalén. ¹⁴ Ut jo'can ajcui' arin xq'uehe' xcuanquil xbaneb li xbenil aj tij chixq'uebaleb sa' tz'alam chixjunileb li neque'paban acue, chan laj Ananías. ¹⁵ Ut li Kacua' quixye re: —Ayu xban nak li cujnk a'an sic'bil ru inban re xyebal resil li colba-ib sa' inc'aba' lain reheb li cuanqueb sa' xcuanquil ut reheb ajcui' li macua'eb aj judío jo'queb ajcui' li ralal xc'ajol laj Israel. ¹⁶ Lain tinc'ut chiru jo' q'ual li raylal tento tixc'ul sa' inc'aba' lain, chan li Kacua'. ¹⁷ Co ut laj Ananías ut qui-oc sa' li cab jo' quiyeh'e' re. Quixq'ue li ruk' sa' xben laj Saulo ut quixye re: —Hermano Saulo, li Kacua' Jesús, li quixc'utbesi rib chacuu sa' li be nak yocat chi chalc arin, a'an xtaklan chak cue arin re nak taruk tat-iloc cui'chic ut tac'ul li Santil Musik'ej, chan laj Ananías re. ¹⁸ Ut sa' jumpat quit'ane' chanchan xpat li ru ut qui-iloc cui'chic. Quixakli ut quicubsi xha'.

¹⁹ Ut nak ac xcua'ac, quicacuu cui'chic. Laj Saulo quicana cuib oxib cutan sa' xyankeb laj pabanel li cuanqueb Damasco.

Laj Saulo quixye resil li colba-ib aran Damasco

²⁰ Laj Saulo ticto qui-oc chixch'olobanquil li xyalal chirix li Jesús, chiruheb li tenamit sa' eb li cab li neque'xch'utub cui' ribeb laj judío ut quixye reheb: —Li Jesús, a'an li Cristo li Lalal li Dios, chan. ²¹ Ut chixjunileb li yoqueb chi abjnc re que'sach xch'oleb chirabinquil ut que'xye: —¿Ma maçua' ta bi' a'an li yo chi rahobtesjnc reheb laj pabanel aran Jerusalén? ¿Ma maçua' ta bi' re xchapbaleb laj pabanel nak xchal arin re nak tixc'ameb riq'uineb li xbenil aj tij? chanqueb. ²² Ut laj Saulo k'axal cui'chic quixq'ue xch'ol chixch'olobanquil xyalal ut que'sach xch'oleb laj judío li cuanqueb Damasco xban nak yo chixc'utbal chi tz'akal chiruheb nak li Jesús a'an li Cristo laj Colonel li yechi'inbil xban li Dios. ²³ Ac cuan cutan xc'ulbal a'an nak que'xc'ub ru chi ribibleb rib laj judío chanru nak te'xcamsi laj Saulo. ²⁴ Abanan laj Saulo quirabi resil nak te'raj xcamsinquil. Eb a'an chi k'ek chi cutan yoqueb chixc'ac'alenukil li oquebal re li tenamit re te'xcamsi. ²⁵ Ut eb laj pabanel que'xq'ue sa' jun nimla chacach ut chiru k'o'jyjn que'xcubsi chirix li tz'ac. Jo'can nak quicole' laj Saulo chiruheb li que'ajoc re xcamsinquil.

Quicuulac laj Saulo Jerusalén

²⁶ Nak quicuulac Jerusalén, laj Saulo quiraj oc sa' xyankeb laj pabanel. Abanan eb a'an que'xucua. Inc'a' que'xpab nak a'an aj pabanel chic. ²⁷ Ut laj Bernabé quixc'am laj Saulo riq'uineb li apóstol ut quixserak'i reheb chanru nak quiril ru li Kaçua' sa' li be ut quixye ajcui' reheb chanru nak quixch'olob xyalal li Jesucristo chi cau xch'ol aran Damasco. ²⁸ Ut laj Saulo quicana riq'uineb laj pabanel aran Jerusalén ut co yalak bar chixyebal resil li Jesucristo chi cau xch'ol. ²⁹ Ut quixch'olob li xyalal chiruheb laj judío li neque'atinac sa' griego. Eb a'an inc'a' que'raj rabinquil. Que'raj ban xcamsinquil. ³⁰ Nak eb laj pabanel que'rabi resil nak te'raj xcamsinquil, que'xc'am laj Saulo aran Cesarea ut aran chic que'xtakla Tarso. ³¹ Ut inc'a' chic que'rahobtesjnc laj pabanel li cuanqueb Judea, Galilea, ut Samaria. Yoqueb chi q'uic sa' xpabaleb. Neque'xxucua ru li Kaçua'. Ut li Santil Musik'ej yo chixq'uebal xcacuual xch'oleb. C'ajo' nak yoqueb chi tamc.

Nak quiquirtesic laj Eneas

³² Ut laj Pedro, nak yo chirula'aninguleb chixjunileb laj pabanel yalak bar, quicuulac ajcui' riq'uineb laj pabanel li cuanqueb Lida. ³³ Aran quixtau jun li cujnk aj Eneas xc'aba'. Cuakxakib chihab roquic lix yajel ut inc'a' chic nacuacli. Sic li rok ruk'. ³⁴ Ut laj Pedro quixye re: —At Eneas, li Kaçua' Jesucristo tatxq'uirtesi anakcuan. Xaklin ut xoc la cuarib, chan. Ut sa' junpat quixakli li cujnk. ³⁵ Ut chixjunileb li cuanqueb Lida ut Sarón que'ril nak quiq'uira li cujnk ut que'xpab li Kaçua'.

Lix Dorcas quicuaclic cui'chic chi yo'yo xban laj Pedro

³⁶ Ut quicuan aran Jope jun li ixk aj pabanel xTabita xc'aba'. Chi jalbil ru naraj naxye Dorcas. Junelic yo chixbanunquil usilal reheb li ras rjtz'in ut naxtenk'aheb li neba'. ³⁷ Sa' eb li cutan a'an quiyajer ut quicam. Que'ratesi ut que'xjilib sa' jun li na'ajej li cuan sa xca' tasal li cab. ³⁸ Li tenamit Jope nach' cuan riq'uin li tenamit Lida bar cuan cui' laj Pedro. Eb laj pabanel que'rabi nak cuan aran. Que'xtakla cuib li cujnk chixbokbal. —Chalkat chi junpat kiq'uin, chanqueb re laj Pedro. ³⁹ Laj Pedro co rochbened. Nak quicuulac, que'xc'am sa' li na'ajej li cuan cui' li camenak. Aran quisute'

xbaneb li xmalca'an. Yoq̄ueb chi yābac ut que'xc'ut chiru li t'icr li quixyib lix Dorcas nak toj cuan sa' xyankeb. ⁴⁰ Laj Pedro quirisiheb chirix cab. Quixcuik'ib rib ut qui-oc chi tijoc. Ut quiril li camenak ut quixye re: —Tabita, cuaclin, chan. Ut li'ixk quixte li xnak'ru, ut nak quiril ru laj Pedro, quic'ojla. ⁴¹ Laj Pedro quixchap chi ruk' ut quixcuaclesi. Quixbokeb li xmalca'an jo' ajcui' chixjunileb laj pābanel ut quixxakab chiruheb chi yo'yo chic. ⁴² Qui-el resil sa' chixjunil li tenamit Jope li c'a'ru quic'ulman. Xban a'an nabaleb que'pāban re li Kaçua'. ⁴³ Laj Pedro najt quicuan aran Jope. Quihilan sa' rochoch jun li cuṅk aj yibom tz'um, aj Simón xc'aba'.

10

Laj Pedro ut laj Cornelio

¹ Quicuan jun li cuṅk aran Cesarea aj Cornelio xc'aba'. A'an li natakan sa' xbeneb jun ch'utal chi soldado aj Italia neque'xye re. ² Li cuṅk a'an quixxucua ru li Dios jo'queb ajcui' chixjunileb li cuanqueb sa' li rochoch. Çābil xna'leb ut junelic natijoc chiru li Dios ut junelic naxtenk'aheb li neba'. ³ Sa' jun li cutan sa' oxib or tana re ecua laj Cornelio quiril sa' visión nak qui-oc jun li ángel riq'uin ut quixye re: —At Cornelio, chan. ⁴ Laj Cornelio taxucua nak quiril li ángel ut quixye: —C'a'ru taçuaç tinbanu, Kaçua'.— Li ángel quixye: —Li Dios xrabi la tij. Nacuulac chiru li c'a'ru nacabanu re xtenk'anquileb li neba'. ⁵ Anakuan tinye açue takla cuib oxibakeb li cuṅk aran Jope chixc'ambal chak li cuṅk aj Simón xc'aba'. Aj Pedro nayeman ajcui' re. ⁶ A'an tayehok açue c'a'ru us tabanu. A'an yo chi hilanc sa' rochoch laj Simón laj yibom tz'um. Li rochoch cuan chire li palau, chan li ángel. ⁷ Nak ac x-el li ángel riq'uin, laj Cornelio quixbok cuib lix moç cuṅk ut quixbok ajcui' jun reheb lix soldado li naxxucua ru li Dios. ⁸ Quixserak'i reheb chixjunileb li quiyehē' re xban li ángel ut quixtaklaheb Jope re nak te'xc'am chak laj Pedro. ⁹ Cuulajak chic ac cuulaqueb na re sa' li tenamit Jope nak laj Pedro quitake' sa' xca' tasal li cab chi tijoc. Ca'ch'in na chic ma' cua'leb. ¹⁰ Quichal tz'ocajic ut quiraj raj ru cua'ac. Abanan toj yoq̄ueb chixyibanquil lix tzacaemk. Nak toj yo chiroybeninquil lix tzacaemk, quiril jun li visión. ¹¹ Quiril nak teto li choxa ut chanchan jun nimla saki t'icr yo chak chi cubec. Pixbil sa' xca' pac'alil lix xuc li t'icr ut yo chak chi cubec sa' ruchich'och'. ¹² Chi sa' li t'icr a'an cuanqueb chak nabal pay ru li xul xcomoneb li neque'cuan sa' ruchich'och'. Cuanqueb cuan cuib rokeb ut cuib ruk', cuanqueb xcomoneb li c'anti' ut cuanqueb xcomoneb li xul li neque'rupupic chiru choxa. ¹³ Ut quirabi jun xyāb cux quixye re: —At Pedro, chap açue li xul a'in. Taçamsi ut tatiu, chan. ¹⁴ Laj Pedro quixye: —Inc'a', Kaçua'. Ma' jun sut xintzaca c'a'ak re ru li naxye sa' li chak'rab nak inc'a' us xtzacanquil, chan. ¹⁵ Ut quixye cui'chic li yo chi atinac: —Laat inc'a' naru nacac'oxla nak inc'a' us tatzaca li c'a'ru xye li Dios nak us tatzaca, chan. ¹⁶ Oxib sut quiyehē' re chi jo'can ut chirix a'an quixoque li nimla t'icr a'an ut quic'ame' cui'chic sa' choxa. ¹⁷ Laj Pedro toj yo ajcui' chixc'oxlanquil c'a'ru xyalal li quic'utbesic chiru nak que'cuulac li cuṅk li que'taklaç xban laj Cornelio. Cuanqueb chire li cab ut yoq̄ueb chixpatz'bal bar cuan li rochoch laj Simón. ¹⁸ Que'xpatz' ma' aran cuan chi hilanc laj Simón li neque'xye aj Pedro re. ¹⁹ Laj Pedro toj yo ajcui' chixc'oxlanquil c'a'ru xyalal li visión li quiril nak li Santil Musik'ej quixye re: —Oxib li cuṅk xe'chal çhasic'bal. ²⁰ Ayu, cuben ut atinaheb chak. Matc'oxlac chi xic chirixeb xban nak lajin xintaklan chak reheb, chan. ²¹ Jo'can nak laj Pedro quicube ut quixye reheb li cuṅk: —Cue'quin. Lajin laj Simón Pedro li

niquinesic'. ¿C'a'ru xc'amoc chak ere toj arin ut c'a'ru teraj cuiq'uin? chan. ²² Eb a'an que'xye: —Laj Cornelio li capitán xtaklan chak ke. A'an jun cujnk t̄ic xch'ol ut naxxucua ru li Dios. Chixjunileb laj judío neque'xq'ue sa' xnak' ruheb. Jun x-ángel li Dios quixc'utbesi rib chiru ut quixye re nak tatzbok sa' rochoch re nak taruk tarabi li c'a'ru taye re, chanqueb re. ²³ Laj Pedro quirocsiheb ut que'xnumsi li k'o'jyin sa' li cab a'an. Sa' li cutan jun chic laj Pedro co chirixeb. Ut cuib oxib laj pabanel re Jope que'cgeb chirix. ²⁴ Jo' cuulajak chic que'cuulac Cesarea ut laj Cornelio yo chiroybeninquileb rochbened li rech'alal ut eb li tz'akal ramig li quixbok riq'uin. ²⁵ Nak laj Pedro quicuulac sa' li rochoch, laj Cornelio qui-el chixc'ulbal. Quixcui'ib rib chiru re xlok'oninquil. ²⁶ Abanan laj Pedro quixye re: —Cuaclin. Minalok'oni lain xban nak lain yal cujnkun jo' laat, chan. ²⁷ Yo chi atinac riq'uin laj Cornelio nak yoqueb chi oc sa' li cab. Nak que'oc, que'xtau nabaleb ac ch'utch'ubeb sa' li cab. ²⁸ Laj Pedro quixye reheb: —Laex nequenau nak lix chak'rabeb laj judío naxye nak inc'a' naru takajunaji kib riq'uibeb li macua'eb aj judío chi moco taruk to-oc sa' rochocheb. Abanan xc'ut chicuu li Kaçua' Dios nak ma jun li cristian tintz'ektana chi moco tине nak inc'a' us atinac riq'uibeb. ²⁹ Jo'can nak inc'a' xink'etk'eti cuib chi chalc nak xine'xbok chak. Ye cue c'a'ut nak xatakla inbokbal, chan. ³⁰ Quichak'oc laj Cornelio ut quixye: —Çahib cutan anakcuan jo'ca'in ajcui' honal nak yoquin chi ayunic ut chi tijoc sa' li cuochoch. Oxib or re ecuu quixc'utbesi rib chicuu jun li cujnk nalemtz'un li rak'. ³¹ Quixye cue, “At Cornelio, li Dios quirabi la' tij. Nacuulac chiru li c'a'ru nacabanu re xtenk'anquileb li neba'. ³² Takla xc'ambal laj Simón Pedro li cuan aran Jope. Yo chi hilanc sa' li rochoch laj Simón laj yibom tz'um. Li rochoch a'an cuan chire li palau. Nak tac'ulunk laj Pedro, tixch'olob çacuu li xyalal,” chan cue li ángel. ³³ Jo'can nak xintakla aç'ambal sa' junpat. Ut laat xabanu usilal ke. Xatc'ulun. Anakcuan ut chikajunilo cuanco arin chiru li Dios chirabinquil chixjunil li c'a'ru taye ke li xye chak açue li Dios, chan laj Cornelio re laj Pedro.

Laj Pedro quixye re laj Cornelio nak li Dios inc'a' naxsic' ru li ani naxra

³⁴ Quixtiquib atinac laj Pedro ut quixye: —Anakcuan xinq'ue retal chi tz'akal nak li Dios inc'a' naxsic' ru li ani naxra. ³⁵ Li ani naxxucua ru li Dios ut naxbanu li t̄iquilal a' yal bar xtenamit, li jun a'an narahe' xban li Dios. ³⁶ Laex nequenau nak li Dios quixtakla resil li colba-ib reheb laj Israel. Li colba-ib, a'an li naq'uehoc tuktuquil usilal sa' xc'aba' li Jesucristo. Ut li Jesucristo, a'an li Kaçua', ut nim xcuanguil sa' xben chixjunil. ³⁷ Laex nequenau c'a'ru quixc'ulman sa' chixjunil li tenamit Judea. Quiticla aran Galilea nak ac xch'olobac resil li cubi ha' xban laj Juan. ³⁸ Ac erabiom resil li Jesucristo aj Nazaret. Li Dios quixq'ue li Santil Musik'ej re, ut quixq'ue xcuanguil. A'an quibec yalak bar chixbanunquil li usilal ut chixq'uirtesinquileb li tacuasinbileb xban laj tza xban nak li Dios cuan riq'uin. ³⁹ Lao quikil riq'uin ku chixjunil li c'a'ru quixbanu li Jesús aran Judea ut Jerusalén. Abanan eb a'an que'xcamsi chiru cruz. ⁴⁰ Ut li Dios quixcuaclesi cui'chic chi yo'yo sa' xyankeb li camenak sa' rox li cutan. Ut mokon li Jesús quixc'utbesi rib chiku. ⁴¹ Inc'a' quixc'utbesi rib chiruheb chixjunileb. Ca'aj cui' chiruheb li quisiq'ue' ruheb junxil xban li Dios. Lao cocua'ac ut co-uc'ac riq'uin nak ac xcuacli cui'chic chi yo'yo sa' xyankeb li camenak. ⁴² Ut coxtakla chixch'olobanquil xyalal ut chixjulticanquil chiruheb li tenamit nak a'an q'uebil xban li Dios chi rakoc atun sa' xbeneb chixjunileb, li yo'yoqueb jo' ajcui' li camenakeb. ⁴³ A'an a'in li Jesús li que'xye chak resil chixjunileb li

profeta junxil. Que'xye nak sa' xc'aba' a'an taꝥuyek' xmaꝥueb chixjunileb li neque'paꝥan re.

Li Santil Musik'ej quiq'uehe' reheb li maꝥua'eb aj judío

⁴⁴Toj yo ajcui' chi atinac laj Pedro nak que'xc'ul li Santil Musik'ej chixjunileb li yoꝥueb chi abinc re li ratin li Dios li yo chixyebal. ⁴⁵Eb laj paꝥanel aj judío, li que'chal chirix laj Pedro, que'sach xch'ol chirilbal nak li Dios quixq'ue li Santil Musik'ej reheb li maꝥua'eb aj judío. Gentiles nayeman ajcui' reheb. ⁴⁶Que'rabi nak yoꝥueb chi atinac sa' jalan atinobaꝥ ut yoꝥueb chixnimanquil ru li Dios. ⁴⁷Ut laj Pedro quixye: —¿Ma cuan ta bi' junak inc'a' taajok nak te'cubek' xha'eb a'in li xe'c'uluc re li Santil Musik'ej, jo' nak xkac'ul lao? chan. ⁴⁸Ut quixtakla xcubsinquil xha'eb sa' xc'aba' li Kaꝥua' Jesucristo. Ut eb a'an que'xtz'ama chiru laj Pedro nak taꝥanaꝥ cuib oxibak cutan chic riq'uineb.

11

Laj Pedro quixye reheb li cuanqueb Jerusalén nak naru ajcui' te'colek' li maꝥua'eb aj judío.

¹Ut que'rabi resil eb li apóstol ut eb laj paꝥanel li cuanqueb Judea nak eb li maꝥua'eb aj judío yoꝥueb ajcui' chixpaꝥanquil li ratin li Dios. ²Nak co Jerusalén laj Pedro, quicuech'ic xbaneb laj paꝥanel aj judío li neque'banun re li circuncisión. ³Que'xye re: —¿C'a'ut nak xacuula'aniheb li maꝥua'eb aj judío? Ut, ¿c'a'ut nak xatcu'a'ac rochbeneb? chanqueb. ⁴Tojo'nak laj Pedro qui-oc chixyebal reheb chixjunil li c'a'ru quic'ulman ut quixye reheb: ⁵—Yoquin chi tjoj aran Jope nak quicuil jun li visión. Sa' li visión quicuil nak yoꝥ chak chi cubec jun nimla t'icr sa' choxa. Pixbil sa' xca pac'alil lix xuc li t'icr. Quichal bar cuanquin cui'. ⁶Quicuil chi sa' li t'icr ut aran cuanqueb nabal pay ru li xul xcomoneb li neque'cuan sa' ruchich'och'. Cuanqueb li josk' aj xul, cuanqueb xcomoneb li c'anti' ut cuanqueb xcomoneb li xul li neque'rupupic chiru choxa. ⁷Ut quicuabi jun xyab cux quixye cue, “At Pedro, chap acue li xul a'in. Taꝥamsi ut taꝥtiu,” chan. ⁸Ut lain quinye re, “Inc'a' Kaꝥua'. Ma jun sut xintzaca c'a'ak re ru li naxye sa' li chak'rab nak inc'a' us tintzaca,” chanquin. ⁹Ut quixye cui'chic cue li yoꝥ chak chi atinac sa' choxa, “Laat inc'a' naru nacac'oxla nak inc'a' us taꝥzaca li c'a'ru xye li Dios nak us taꝥzaca,” chan. ¹⁰Oxib sut quiyeh'e' cue chi jo'can ut chirix a'an quic'ame' cui'chic sa' choxa li nimla t'icr a'an. ¹¹Ut sa' ajcui' li honal a'an que'cuulac sa' li cab cuanquin cui' oxib li cujnk que'chal chak toj Cesarea chinsic'bal. ¹²Ut li Santil Musik'ej quixye cue nak tinxic chirixeb chi maꝥ'a' inc'a'ux. Ut que'coeb ajcui' chicuix cuakib li herman. Ut co-oc sa' rochoch jun li cujnk. ¹³Li cujnk a'an quixserak'i ke chanru nak quixc'utbesi rib jun li ángel chiru sa' li rochoch. Li ángel quixye re, “Takla xbokbal aran Jope laj Simón li nayehe' ajcui' aj Pedro re. ¹⁴A'an tayehok acue chanru taruꝥ tatcolek' jo'queb ajcui' li cuanqueb sa' laꝥ cuochoch, chan cue li ángel,” chan li cujnk. ¹⁵Ut nak quin-oc chi atinac riq'uineb, li Santil Musik'ej quichal sa' xbeneb jo' nak quichal sa' kaben lao junxil. ¹⁶Ut quinak sa' inch'ol li c'a'ru quixye li Kaꝥua', “Laj Juan relic chi yal quicubsin ha' riq'uin ha', abanan laꝥ tec'ul li Santil Musik'ej.” ¹⁷Jo'can ut nak cui li Dios quixq'ue li Santil Musik'ej reheb a'an jo' nak quixq'ue ke lao li xopaꝥan re li Jesucristo, ¿anihin ta bi' lain nak tinram chiru li Dios li c'a'ru taraj xbanunquil? chan laj Pedro. ¹⁸Nak que'rabi li c'a'ru quixye laj Pedro, eb laj c'amol be sa' xyankeb laj paꝥanel

aj judío, que'xcanab cuech'inc. Que'xlok'oni li Dios ut que'xye: —Li Kaçua' xq'ue ajcui' li junelic yu'am reheb li maçua'eb aj judío xban nak xe'xyot' xch'ol ut xe'xjal xc'a'ux, chanqueb.

Eb laj pañanel li cuanqueb Antioquia que'xtiquib xch'utubanquil ribeb chi lok'oninc

¹⁹ Chirix lix camic laj Esteban, que'xjeq'ui ribeb laj pañanel xban li raylal li yoqueb chixc'ulbal. Que'cuulac toj Fenicia, Chipre ut Antioquia. Aran que'xch'olob resil li evangelio chiruheb laj judío. Inc'a' que'xye reheb li maçua'eb aj judío. ²⁰ Abanan cuanqueb aj pañanel aj Chipre ut aj Cirene que'cuulac Antioquia. Eb a'an que'xch'olob xyalal chiruheb li neque'atinac sa' griego ut que'xye resil li colba-ib sa' xc'aba' li Jesucristo. ²¹ Li Kaçua' Jesús quixtenk'aheb riq'uin xnimal xcuauquil ut nabaleb que'xpab li Kaçua' Jesús. ²² Nak que'rabi resil eb laj pañanel li cuanqueb Jerusalén, que'xtakla laj Bernabé aran Antioquia. ²³ Nak quicuulac laj Bernabé quixq'ue retal nak li Dios yo chirosobtesinquileb laj pañanel li cuanqueb aran. Quixq'ue xcacuual xch'oleb ut quixye ajcui' reheb nak che'xq'uehak xch'oleb chixpañanquil li Kaçua'. ²⁴ Laj Bernabé, a'an jun cuink çabil ut cuan xpabal. Nujenak chi Santil Musik'ej. Ut chiru a'an nabaleb que'xpab li Kaçua'. ²⁵ Chirix chic a'an laj Bernabé ço Tarso chixsic'bal laj Saulo. Nak quixtau quixc'am Antioquia. ²⁶ Ut que'cuan aran jun chihab tz'akal riq'uineb ut que'xc'ut li xyalal chiruheb nabal. Ut aran Antioquia que'xtiquib xyebal “cristiano” reheb laj pañanel. ²⁷ Sa' eb li cutan a'an cuanqueb profeta que'el Jerusalén ut que'çoeb Antioquia. ²⁸ Cuan jun sa' xyankeb a'an aj Agabo xc'aba'. Quixye nak taçuanç jun nimla cue'ej sa' chixjunil li ruchich'och' xban nak jo'can quic'ute' chiru xban li Santil Musik'ej. Ut li cue'ej a'in quic'ulman sa' eb li cutan nak cuank laj Claudio chok' acuabej. ²⁹ Ut eb laj pañanel li cuanqueb Antioquia que'xc'ub ru nak te'xtenk'aheb laj pañanel li cuanqueb Judea. Que'xtenk'a a' yal çanru quixq'ue rib chiru li junjunk. ³⁰ Ut jo'can que'xbanu. Que'xtakla lix tenk'al çhirixeb laj Bernabé ut laj Saulo re nak te'xk'axtesi sa' ruk'eb li neque'c'amoc be sa' xyankeb laj pañanel li cuanqueb Judea.

12

Quicamsic laj Jacobo ut quiq'uehe' sa' tz'alam laj Pedro

¹ Sa' eb li cutan a'an laj Herodes quixtiquib xrahobtesinquileb laj pañanel. ² Quixtakla xcamsinquin riq'uin ch'ich' laj Jacobo li ras laj Juan. ³ Laj Herodes quixq'ue retal nak eb laj judío que'saho' xch'ol riq'uin li c'aru quixbanu. Jo'can nak quixtakla ajcui' xchapbal laj Pedro. Quixbanu a'in sa' li nink'e nak neque'xcua' li caçlan cua maç'a' xch'amal. ⁴ Nak ac xchape' laj Pedro, li rey Herodes quixtakla sa' tz'alam ut quixk'axtesi sa' ruk'eb çahib ch'utal chi soldado re te'xc'ac'ale. Çahib chi soldado cuan sa' li junjunk ch'utal. Laj Herodes cuan sa' xch'ol nak tixc'am chiruheb li tenamit nak ac xrake' li nink'e re te'xrak atin sa' xben. ⁵ Jo'can nak laj Pedro ilbil chi us xbaneb li soldado re nak inc'a' taçelelik. Abanan eb laj pañanel cau yoqueb chi tijoc chirix.

Nak qui-isic laj Pedro sa' tz'alam xban li Dios

⁶ Ac cuulac re xk'ehil nak taç'amek' laj Pedro xban laj Herodes chiruheb li tenamit. Sa' li k'ojyin a'an laj Pedro yo chi cuarc sa' xyiheb li cuib chi soldado bac'bo riq'uin cadena. Ut cuanqueb ajcui' laj c'ac'alanel çire li oquebal re li tz'alam. ⁷ Ut xakamil jun x-ángel li Dios bar cuan cui' laj Pedro

ut quixcutanobresi sa' li tz'alam. Li ángel quixt'otz'otz'i laj Pedro ut quirajsi. Quixye re: —Cuaclin. Seba açuib, chan. Ut sa' junpať quit'ane' li cadena chi ruk'. ⁸ Ut li ángel quixye re: —Q'ue la cuak' chacuix ut q'ue la xab chacuok, chan re. Ut laj Pedro quixbanu jo' quiyehé' re. Ut li ángel quixye cui'chic re: —Tz'ap açuib sa' la t'icr ut yo'o chicuix, chan. ⁹ Laj Pedro cõ chirix li ángel. Abanan inc'a' naxnau nak tz'akal yal li yõ chixbanunquíl li ángel. Sa' xch'õl laj Pedro nak visión li yõ chirilbal. ¹⁰ Que'cuulac cuan cui' li jun ch'utal chi soldado ut que'nume' aran. Ut que'cuulac cui'chic cuanqueb cui' li jun ch'utal chic. Ut que'nume' aran toj que'cuulac cuan cui' li puerta ch'ich' li na-ux cui' oc sa' li tenamit. Ut li puerta a'an quixte rib xjunes chiruheb. Que'el ut que'xk'ax x' li nim be. Aran quicanabac xjunes laj Pedro xban li ángel. ¹¹ Laj Pedro quixq'ue retal li c'a'ru quixc'ul ut quixye sa' xch'õl: —Anakuan ninnau chi tz'akal nak li Kacua', a'an li xtaklan chak re li ángel. Xinixcol sa' ruk' laj Herodes. Ut xinixcol ajcui' sa' ruk'eb chixjunileb laj judío li te'raj xbanunquíl raylal cue, chan. ¹² Nak quixtau ru li c'a'ru quixc'ul, laj Pedro cõ sa' rochoch lix María lix na' laj Juan li nayeman Marcos re. Aran ch'utch'uq'ueb nabaleb laj pabanel yoq'ueb chi tijoc. ¹³ Quixt'och't'och'i li puerta li cuan chiru nebal. Ut cõ jun li xka'al xRode xc'aba' chirabinquíl ani cuan aran. ¹⁴ Quixnau ru xyab xcux laj Pedro. Inc'a' quixte li puerta chiru. Xban xsahil xch'õl, cõ sa' anil chixyebal resil reheb li cuanqueb sa' cab nak laj Pedro cuan chire puerta. ¹⁵ Eb li cuanqueb sa' cab inc'a' que'xpab li quixye. —Xloco' açuu, chanqueb re. Abanan lix Rode quixye cui'chic reheb nak yal nak a'an laj Pedro. Que'chak'oc ut que'xye re: —A'an yal xmuhel, chanqueb re. ¹⁶ Nak yoq'ueb chi atinac, laj Pedro toj yõ ajcui' chixtoch'bal li puerta. Nak que'xte li puerta que'ríl laj Pedro. Sachsoq'ueb xch'õl que'cana. ¹⁷ Quixtaksi li ruk' re nak te'xcanab chokinc, ut quixserak'i reheb chanru nak qui-isic sa' tz'alam xban li Kacua'. Quixye reheb: —Yehomak resil a'in re laj Jacobo ut reheb chixjunileb laj pabanel, chan. Ut chirix a'an cõ sa' jalan na'ajej. ¹⁸ Nak quisakeu que'xq'ue retal nak ma' ani chic laj Pedro sa' tz'alam. C'ajo' nak que'sach xch'õleb li soldado chirilbal li c'a'ru quic'ulman. Yoq'ueb chixyebal chi ribileb rib: —¿C'a'ru xc'ul laj Pedro? ¿Bar xco? chanqueb. ¹⁹ Ut laj Herodes quixtakla xsiq'uinquíl. Nak inc'a' que'xtau quixq'ue sa' xbeneb laj c'ac'alenel ut quixtakla xcamsinquileb. Chirix a'an laj Herodes qui-el Judea ut cõ chi cuanc aran Cesarea.

Lix camic laj Herodes

²⁰ Laj Herodes yo xjosk'il sa' xbeneb laj Tiro ut laj Sidón. Eb a'an que'chal sa' comonil. Ut que'xk'unbesi laj Blasto li natenk'an re li rey. Que'xtz'ama chiru nak a'an taatinak chirixeb chiru li rey re nak taruk te'xc'am rib sa' usilal riq'uin xban nak sa' xtenamit li rey na-el xtzacaemkeb. ²¹ Laj Herodes quixxakab jun li cutan re nak taatinak riq'üneb laj Tiro ut laj Sidón. Quixtikib rib riq'uin chabil ak' c'ajo' xchak'al ru li neque'rocsi li rey. Quic'ojla sa' lix na'aj bar narakoc cui' atin ut qui-oc chi atinac riq'üneb li tenamit. ²² Ut eb li tenamit que'oc chixyebal chi cau xyab xcux: —Li yõ chi atinac macua' cuink. A'an Dios, chanqueb. ²³ Ut sa' ajcui' li honal a'an, jun x-ángel li Kacua' quixq'ue jun yajel sa' xben laj Herodes xban nak quixq'ue rib chixlok'onihéb li tenamit ut inc'a' quixq'ue xlok'al li Dios. Quimotzo'in ut a'an quicamsin re. ²⁴ Sa' eb li cutan a'an li ratin li Kacua' yõ chi abic yalak bar. Ut nabaleb yoq'ueb chi pabanc re. ²⁵ Que'suk'i chak Jerusalén laj Bernabé ut laj Saulo nak ac que'xbanu lix c'anjeleb. Que'xc'am chirixeb laj Juan, li neque'xye ajcui' Marcos re.

13

Que'xtiquib lix c'anjel laj Bernabé ut laj Saulo

¹ Sa' xyankeb laj pabanel aran Antioquia cuanqueb profeta ut cuanqueb aj tzolonel. A'aneb a'in: laj Bernabé, laj Simón li neque'xye Niger re, laj Lucio Cirene xtenamit, laj Manaén li quiq'uiesic riq'uin laj Herodes li acuabej, ut laj Saulo. ² Nak yoqueb chi tijoc chiru li Dios ut chi ayunic, li Santil Musik'ej quixye reheb: —Que'homakeb xjuneseb laj Saulo ut laj Bernabé re nak te'xbanu li c'anjel a'in li sic'bileb cui' ru inban, chan. ³ Que'xbanu lix ayun ut que'tijoc nak que'xq'ue li ruk'eb sa' xbeneb laj Saulo ut laj Bernabé. Tojo'nak que'xchak'rabiheb. ⁴ Laj Saulo ut laj Bernabé que'coeb Seleucia jo' quiehe' reheb xban li Santil Musik'ej. Que'el aran ut que'coeb chiru ha' toj Chipre. ⁵ Ut nak que'cuulac Salamina, que'xch'olob xyalal li ratin li Dios sa' eb li cab li neque'xch'utub cui' ribeb laj judío. Ut laj Juan Marcos yo ajcui' chixtenk'anquileb. ⁶ Yoqueb chixbeninquil chixjunil li na'ajej li sutsu sa' ha'. Que'cuulac sa' li tenamit Pafos. Aran que'xtau jun aj tul aj judío. Barjesús lix c'aba'. Li cuink a'an aj balak'. Naxye nak sa' xc'aba' li Dios naatinac. Abanan moco yal ta. ⁷ Li cuink a'an cuan riq'uin laj Sergio Paulo, li q'uebil xcuanquil chi taklanc sa' li na'ajej a'an. Laj Sergio Paulo, li cuan xna'leb, quixtakla xbokbaleb laj Saulo ut laj Bernabé xban nak quiraj rabinquil li ratin li Dios. ⁸ Abanan yo chi ch'i'ch'i'inc laj Barjesús laj tul. (Chi jalbil ru li c'aba'ej a'an naraj naxye Elimas.) Yo chixch'i'ch'i'inquileb xban nak inc'a' quiraj nak tapabank laj Sergio Paulo. ⁹ Xban nak cuan li Santil Musik'ej riq'uin, laj Saulo li nayeman ajcui' aj Pablo re, quixnau nak inc'a' us xna'leb laj Barjesús. Jo'can nak quixca'ya sa' ru. ¹⁰ Ut quixye re: —Laat chanchanaj laj tza. Laat aj tic'ti'. Xic' nacacuil li tiq'uila. Junes balak'ic ut mausalal nacabanu. Laat nacapo' ru li rusilal li Kaçua'. ¹¹ Anakuan li Kaçua' tarakok atin sa' aben. Tatmutz'ok' ut najt inc'a' tailok xnak' acuu, chan laj Pablo. Ut sa' junpat quimoy ut quik'ojyino' sa' xnak' ru. Quixyal xsic'bal ani tach'ilonk re. ¹² Ut nak laj Sergio Paulo quiril li c'a'ru quixc'ul laj tul, quixpab li Kaçua'. Sachso xch'ol chirabinquil li tipleb chirix li Kaçua'.

Laj Pablo ut laj Bernabé que'xch'olob xyalal aran Antioquia xcuent Pisidia

¹³ Laj Pablo que'el Pafos sa' jucub jo'queb ajcui' li rochben ut que'coeb Perge xcuent Panfilia. Aran que'xcanab ribeb ut laj Juan Marcos quisuk'i Jerusalén. ¹⁴ Eb a'an que'nume' Perge ut que'cuulac Antioquia xcuent Pisidia. Sa' li hilobal cutan que'oc sa' li cab li neque'xch'utub cui' ribeb laj judío ut que'c'ojla aran. ¹⁵ Eb laj c'amol be que'ril xsa' li chak'rab ut que'ril ajcui' xsa' li hu li que'xtz'iba li profeta. Ut chirix a'an que'xye re laj Pablo: —Ex kas kitz'in, cui cuan li c'a'ru teye re xq'uebal xcacuil xch'oleb li tenamit, takaj rabinquil anakuan, chanqueb. ¹⁶ Quixakli laj Pablo ut quixtaksi li ruk' re xyebal aneb nak inc'a' chic te'chokink. Quixye: —Ex aj judío ut laex li maçua'ex aj judío, li nequelok'oni li Kaçua', abihomak li tinye ere. ¹⁷ Li Dios li neque'xlok'oni li ratal xc'ajol laj Israel, a'an quixsiq'ueb ru li kaxe'tonil yucua'. Quirosobtesiheb ut quixtamresiheb nak cuanqueb aran Egipto. Ut riq'uin xnimal xcuanquil quirisihab sa' li tenamit a'an. ¹⁸ Ca'c'al chihab quixcuy chak rilbaleb nak yoqueb chak chi numec' sa' li chaki ch'och'. ¹⁹ Quixsach ruheb cuukub li xninkal ru tenamit sa' li na'ajej Chanaán ut li na'ajej a'an quicana chok' reheb laj Israel. ²⁰ Chixjunil a'in quic'ulman chiru cahib ciento riq'uin mero ciento chihab. Chirix a'an li Dios quixq'ueheb aj rakol atin chi taklanc sa' xbeneb toj qui-oc laj Samuel li profeta. ²¹ Chirix

chic a'an que'xtz'ama xreyeb. Ut li Dios quixq'ue laj Saúl chok' xreyeb. A'an quitaklan sa' xbeneb chiru ca'c'al chihab. Laj Saúl a'an ralar laj Cis xcomoneb li ralar xc'ajol laj Benjamin. ²² Ut nak qui-iscic laj Saúl, li Dios quixq'ue laj David chok' xreyeb ut quixye: —Xinsic' ru laj David ralar laj Isai. Nacuulac chicuu na'leb li cu'ink a'an. A'an tixbanu chixjunil li c'a'ru nacuj lain, chan. ²³ Ut sa' xyankeb li ralar xc'ajol a'an, li Dios quixq'ue chi yo'lac li Jesús laj Colol re li tenamit Israel jo' quixyechi'i reheb. ²⁴ Nak toj maji' nac'ulun li Jesús, laj Juan yo' chixch'olobanquil chiruheb chixjunileb laj Israel nak tento te'xyot' xch'ol te'xjal xc'a'ux ut te'xc'ul li cubi ha'. ²⁵ Nak ac rakec' re xbanunquil lix c'anjel, laj Juan quixye, “¿Anihin lain nak nequec'oxla? Moco lain ta li yoquex chiroybeninquil. Chalc ban re chicuix li yoquex chiroybeninquil. A'an nim xcuanquil chicuu lain. Moco inc'ulub ta xhitbal xc'amal lix xab,” chan laj Juan. ²⁶ Ex kas kitz'in, laex ralar xc'ajol laj Abraham, ut laex li ma'cua'ex aj judío li nequexucua ru li Dios, taklanbil chak chok' ere laj Colonel. ²⁷ Li cuanqueb Jerusalén ut eb li neque'taklan sa' xbeneb li tenamit inc'a' que'xtau ru li que'xye eb li profeta. Inc'a' que'xnau nak li Jesús, a'an laj Colonel. Abanan nak que'xk'axtesi chi camc li Jesús, quitz'akloc ru li atin li que'xye li profeta, li na-ile' chiruheb rajlal sa' li hilobal cutan. ²⁸ Usta inc'a' que'xtau xmac, que'xtz'ama chiru laj Pilato nak tixq'ue chi camc li Jesús. ²⁹ Nak ac xc'ul chixjunil li raylal li quiyehé' chak chirix xbaneb li profeta junxil, que'risi chiru cruz ut que'xmuk. ³⁰ Abanan li Dios quixcuaclesi cui'chic chi yo'yo sa' xyankeb li camenak. ³¹ Ut chiru nabal cutan qui-ile' ru xbaneb li que'ochbenin re junxil nak qui-el Galilea ut co' Jerusalén. Ut a'aneb chic neque'yehoc resil li que'ril reheb li tenamit anakuan. ³² Jo'can ajcui' lao yo'co chixch'olobanquil cheru li chabil esilal a'in: nak li Dios quixcuaclesi cui'chic chi yo'yo li Jesucristo. ³³ Quitz'akloc ru chok' ke lao li alal c'ajolbej li quixyechi'i chak li Dios reheb li kaxe'tonil yucua' junxil jo' tz'ibanbil retalil sa' li hu Salmos li naxye chi jo'ca'in: Laat li tz'akal cualal. Anakuan xating'ue sa' acuanquil, chan li Dios. (Sal. 2:7) ³⁴ Quixcuaclesi cui'chic chi yo'yo sa' xyankeb li camenak ut inc'a' chic tacamk jo' tz'ibanbil retalil sa' li hu Isaías li naxye chi jo'ca'in: Lain texcuosobtesi ut ting'ue ere li matan li quinyechi'i re laj David junxil. (Is. 55:3) ³⁵ Ut naxye ajcui' sa' li Salmos: Inc'a' tacanab chi k'ac lix tibel la Santil Alal. (Sal. 16:10) ³⁶ Relic chi yal laj David nak toj yo'yok quic'anjelac chiru lix tenamit jo' quiraj li Dios. Quicam ut quimuke' chixc'atk lix xe'tonil yucua' ut quik'a lix tibel. ³⁷ Abanan li jun li quicuaclesic cui'chic chi yo'yo xban li Dios, a'an inc'a' quik'a lix tibel. ³⁸ Jo'can ut nak chenuhak laex, kas kitz'in, nak nakajultica cheru nak ca'aj cui' sa' xc'aba' li Jesús li quicuaclic cui'chic chi yo'yo cuan xcuibal xsachbal le mac. ³⁹ Inc'a' quiticobresic xch'oleb li kaxe'tonil yucua' riq'uin xbanunquil li naxye sa' lix chak'rab laj Moisés, abanan anakuan naru chic tatitobresic kach'ol riq'uin xpabanquil li Jesús. ⁴⁰ Jo'can nak cheq'uehak retal chi us re nak inc'a' tachalk sa' eben li raylal li que'xye chak li profetas junxil. ⁴¹ A'an a'in li que'xtz'iba li profeta junxil:

Cherabihak, laex li nequextz'ektanan re li cuatin. Chisachk ena'leb ut hexosok'ta. Lain yoquin chixbanunquil jun li sachba ch'olej sa' eb li cutan a'in. Li sachba ch'olej li yoquin chixbanunquil inc'a' raj tepab cui yal ani ta junak taserak'ink ere. (Hab. 1:5)

⁴² Nak que'el laj Pablo ut laj Bernabé sa' li cab li neque'xch'utub cui' ribeb laj judío, li ma'cua'eb aj judío que'xtz'ama chiru laj Pablo nak tachalk cui'chic sa' li hilobal cutan jun chic re nak tixch'olob cui'chic xyalal chiruheb. ⁴³ Nak

que'xchak'rabiheb li tenamit, nabaleb laj judío jo'queb ajcui' li que'oc sa' xyankeb a'an que'xtake laj Pablo ut laj Bernabé. Laj Pablo ut laj Bernabé yoqueb chixq'uebal xna'leheb re nak te'cuank sa' xyalal jo' naraj li Dios. ⁴⁴ Sa' li hilobal cutan jun chic, yal cuib oxib aj chic li inc'a' que'cuulac chi abinc nak que'xch'utub ribeb chixjunileb li cuanqueb sa' li tenamit chirabinquil li ratin li Dios li tixye laj Pablo. ⁴⁵ Ut nak que'rili q'uila tenamit eb li neque'c'amoc be sa' xyankeb laj judío, c'ajo' nak que'cako' xch'oleb. Que'oc chixcuech'inquil laj Pablo. Que'xhob ut que'xmajecua. ⁴⁶ Laj Pablo ut laj Bernabé que'xye chi cauheb xch'ol: —Relic chi yal nak xben cua raj ere laex aj judío xkaye resil li ratin li Dios. Abanan laex xetz'ektana ut xec'oxla nak moco ec'ulub ta li junelic yu'am. Jo'can nak anakcuan takaye resil reheb li macua'eb aj judío. ⁴⁷ Tento takaye xban nak jo'can coxtakla cui' chak li Kacua' Dios nak quixye: Xatinxakab re tach'olob xyalal chiruheb li macua'eb aj judío ut taye resil li colba-ib jun sut sa' ruchich'och'. (Is. 49:6)

⁴⁸ Nak que'rabi li c'a'ru quixye laj Pablo, li macua'eb aj judío que'saho' sa' xch'oleb ut que'xq'ue xcuanquil li ratin li Dios. Que'paban li jo' q'uial li quixye li Dios nak tacuank xyu'ameb chi junelic. ⁴⁹ Ut yo rabinquil resil li ratin li Dios sa' chixjunil li na'ajej a'an. ⁵⁰ Eb laj judío que'xtacchi'i chak eb li ixk li neque'xq'ue xcuanquil lix pabaleb, li neque'q'uehe' xlok'al jo'queb ajcui' li cuink li cuanqueb xcuanquil sa' li tenamit. Que'xyo'ob jun ra xic' sa' xbeneb laj Pablo ut laj Bernabé. Ut que'risiheb sa' lix tenamiteb. ⁵¹ Laj Pablo ut laj Bernabé que'xchik'chik'i li poks chi rokeb nak que'el sa' li tenamit re xc'utbal nak inc'a' us que'xbanu reheb. Ut chirix a'an que'coeb Iconio. ⁵² Ut eb laj pabanel c'ajo' xsahil sa' xch'oleb ut li Santil Musik'ej cuan riq'uineb.

14

Laj Pablo ut laj Bernabé que'xc'ul raylal xban nak que'xch'olob xyalal aran Iconio

¹ Nak que'cuulac Iconio, laj Pablo ut laj Bernabé que'oc sa' li cab li neque'xch'utub cui' ribeb laj judío. Que'xch'olob li xyalal chiruheb ut nabaleb aj judío que'paban jo'queb ajcui' li macua'eb aj judío. ² Ut eb laj judío li inc'a' que'paban, que'xtacchi'ihéb li macua'eb aj judío re nak te'xpo' xch'oleb sa' xbeneb laj pabanel. ³ Abanan laj Pablo ut laj Bernabé najt que'cana aran. Ut xban nak cauheb xch'ol riq'uin li Kacua' que'xch'olob xyalal li rusilal li Dios. Ut li Kacua' yo chixq'uebal xcuanquil li ratineb xban nak yo chixtenk'anquileb chixbanunquil li milagros ut li sachba ch'olej. ⁴ Que'xjach ribeb li tenamit. Cuanqueb li que'oquen chirixeb laj judío ut cuanqueb li que'oquen chirixeb li apóstol. ⁵ Sa' xyankeb li xic' neque'iloc reheb laj Pablo ut laj Bernabé cuanqueb aj judío ut cuanqueb macua'eb aj judío. Que'xjunaji ribeb riq'uineb li neque'taklan sa' li tenamit ut que'xc'ub ru chanru nak te'xrahobtesi ut te'xcuti chi pec laj Pablo ut laj Bernabé. ⁶ Abanan laj Pablo ut laj Bernabé que'rabi resil li yoqueb chixc'ubanquil ut que'elelic chiruheb. Coeb sa' eb li tenamit Listra ut Derbe xcuent Licaonia ut que'coeb ajcui' sa' eb li c'alebal li cuanqueb chi xjun sutam. ⁷ Ut aran yoqueb chixch'olobanquil resil li colba-ib.

Que'xcuti laj Pablo chi pec aran Listra

⁸ Aran Listra cuan jun li cuink inc'a' naru nabec. Chalen sa' xca'ch'inal inc'a' us li rok. Li cuink a'an chunchu aran. ⁹ Yo chirabinquil li c'a'ru yo chixyebal laj Pablo. Laj Pablo quixca'ya li cuink ut quixq'ue retal nak li cuink a'an quixpab nak naru taq'uirtesik. ¹⁰ Jo'can nak laj Pablo quixye re

chi cau xyab xcux: —Cuaclin. Xaklin chi us, chan. Ac taꝥuaclik ut qui-oc chi bec li cuink. ¹¹ Nak li tenamit que'ril li c'a'ru quixbanu laj Pablo, que'xjap reheb chixyebal sa' ratinobaleb laj Licaonia: —Xe'chal sa' kayank li dios. Chanchaneb cuink, chanqueb. ¹² Laj Bernabé que'xq'ue xc'aba' chok' Júpiter, ut laj Pablo Mercurio que'xq'ue chok' xc'aba' xban nak a'an aj c'amol be chi atinac. ¹³ Li rochoch laj Júpiter lix dioseb a'an xuan chire li tenamit. Laj tij li nac'anjelac chiru lix dioseb a'an cuan chire li tenamit. Laj tij li nac'anjelac chiru lix dioseb quixc'am chire li tenamit li cuacax ut li cotobanbil utz'u'uj. Quiraj raj xmayejanquil chiruheb li apóstol rochbened li tenamit. ¹⁴ Nak que'xq'ue retal li c'a'ru yoꝥueb li tenamit, laj Pablo ut laj Bernabé que'xpej li rak'eb retalil nak inc'a' quicuulac chiruheb li c'a'ru yoꝥueb chixbanunquil li tenamit. Ut que'coeb sa' anil sa' xyankeb li tenamit ut que'xye chi cau xyab xcuxeb: ¹⁵ —Ex tenamit, ¿c'a'ut nak nequebanu chi jo'can? Lao yal cuinko jo' laex. Juntak'eto eriq'uin. A'an aj e nak xochal arin sa' eyank chixyebal ere nak tecanab li jo' majo'il na'leb. Sic'omak ban li yo'yoꝥuil Dios li quiyiban re li choxa, li ruchich'och', li palau ut chixjunil li c'a'ru cuan. ¹⁶ Junxil li Dios quixcanabeb li tenamit chi cuanc jo' que'raj eb a'an. ¹⁷ Rig'uin li usilal li naxbanu ke, junelic yo' chixc'utbesinuil chiku nak a'an li Dios. A'an naxc'ut chiku nak a'an yal re sa' xben chixjunil. A'an naq'uehoc re li hab. A'an naq'uehoc re chi uchinc li kacuimk chi nabal, ut a'an ajcui' nac'ojoban re li kach'ol rig'uin li katzacaemk ut rig'uin lix sahil kach'ol, chan laj Pablo. ¹⁸ Usta laj Pablo ut laj Bernabé que'xch'olob xyalal chiruheb li tenamit, abanan ra sa nak que'xc'ul xch'ol nak inc'a' te'mayejak chiruheb. ¹⁹ Que'cuulac eb laj judío li que'chal Antioquia ut Iconio. Que'xtacchi'ihheb nabaleb li tenamit. Que'xcuti chi pec laj Pablo ut que'risi chire li tenamit. Sa' xch'oleb a'an nak camenak chic laj Pablo que'xcanab. ²⁰ Laj Pablo quiril nak quisute' xbaneb laj pabanel. Quicuacli ut co sa' li tenamit. Ut sa' xcab li cutan co cui'chic Derbe rochben laj Bernabé.

Laj Pablo co cui'chic Antioquia xcuent Siria chixq'uebal xcacuual xch'oleb laj pabanel

²¹ Nak que'xch'olob resil li colba-ib sa' li tenamit Derbe, nabaleb que'paban. Chirix chic a'an que'suk'i cui'chic sa' eb li tenamit Listra, Iconio ut Antioquia. ²² Yoꝥueb chixq'uebal xcacuul xch'oleb laj pabanel. Que'xye reheb nak te'xpab li Kacua' chi anchaleb xch'ol ut inc'a' te'xcanab xpabanquil. Que'xye reheb nak tento te'xcuy xnumsinuil li raylal re nak te'oc sa' lix nimajcual cuanquilal li Dios. ²³ Que'xxakab aj c'amol be re li junjank ch'utal chi aj pabanel. Que'xbanu lix ayun ut que'tijoc sa' xbeneb re xk'axtesinquileb sa' ruk' li Kacua' li ac xe'paban. ²⁴ Nak yoꝥueb chi xic que'nume' sa' li na'ajej Pisidia ut que'cuulac Panfilia. ²⁵ Que'xye resil li evangelio aran Perge ut que'coeb Atalia. ²⁶ Que'el aran ut que'coeb chiru ha' toj Antioquia sa' li na'ajej li que'taklac cui' chi c'anjelac chiru li Kacua'. Que'canabac sa' ruk' li Dios re nak a'an tajlok reheb. Jo'ca'in nak que'xchoy li c'anjel li quiq'uehe' reheb re te'xbanu. ²⁷ Nak que'cuulac Antioquia que'xch'utub chixjunileb laj pabanel ut que'xserak'i reheb chixjunil li quixbanu li Kacua' reheb. Que'xserak'i ajcui' reheb chanru nak li Dios quixq'ue li evangelio reheb li macua'eb aj judío. ²⁸ Laj Pablo ut laj Bernabé najt que'cana rig'uineb laj pabanel sa' li na'ajej a'an.

te'xbanu laj pabanel li maçua'eb aj judío

¹ Cuanqueb aj pabanel que'chal chak Judea. Que'oc chixyebal reheb laj pabanel: —Inc'a' naru texcolek' cui inc'a' tebanu li circuncisión jo' naxye li chak'rab li quiq'uehe' re laj Moisés, chanqueb. ² Riq'uin a'an que'xtiquib xcuech'inquil ribeb riq'uin laj Pablo ut laj Bernabé chirix li na'leb a'in. Ut que'xc'ub ru nak laj Pablo ut laj Bernabé te'xic Jerusalén chixpatz'bal reheb li apóstol ut reheb laj c'amol be ma tento nak te'xc'ul li circuncisión re nak te'colek'. Cuanqueb ajcui' cuib oxib laj pabanel coeb chirixeb.

³ Que'taklac xbaneb laj pabanel aran Antioquia. Nak yoqueb chi numec' Fenicia ut Samaria, que'xye resil nak que'paban li maçua'eb aj judío. Ut c'ajo' nak que'saho' sa' xch'oleb chixjunileb laj pabanel rabinquil nak yoqueb chi pabanc. ⁴ Ut nak que'cuulac Jerusalén, que'c'ule' xbaneb li apóstol, eb laj c'amol be jo'queb ajcui' chixjunileb laj pabanel. Ut que'xserak'i reheb chanru nak li Dios quixtenk'aheb riq'uin li c'anjel que'xbanu.

⁵ Abanan cuanqueb cuib oxib laj pabanel aj fariseo. Eb a'an que'xye: —Eb laj pabanel li maçua'eb aj judío, tento te'xbanu li circuncisión. Tento te'xbanu li c'a'ru naxye li chak'rab li quiq'ue ke laj Moisés, chanqueb. ⁶ Que'xch'utub ribeb li apóstol ut eb laj c'amol be chixs'bal c'a'ru te'xbanu riq'uin li ch'a'ajquilal a'in.

⁷ Ut nak ac xe'xcuech'i ribeb chi us chirix li na'leb a'in, laj Pedro quicuacli ut qui-oc chi atinac. Quixye reheb: —Ex herman, laex nequenau nak ac junxil quixsic' chak cuu li Dios sa' eyank re tnye resil li colba-ib reheb li maçua'eb aj judío re nak te'pabank ajcui' eb a'an. ⁸ Li Dios naxnau c'a'ru nanume' sa' xch'ol li junjnk. Quixc'ut chiku nak naxraheb a'an nak quixq'ue li Santil Musik'ej reheb jo' nak quixq'ue ke lao.

⁹ Moco jalan ta chic li colba-ib li xq'ue ke lao chiru li xq'ue reheb a'an. Quixcuy quixsach lix maqueb xban nak xe'paban. ¹⁰ Anakcuan ut çc'a'ut nak yoquex chixyalbal rix li Dios riq'uin xq'uebal li ik a'in sa' xbeneb laj pabanel li maçua'eb aj judío? Çc'a'ut nak tepuersiheb chixbanunquil li naxye li chak'rab li inc'a' xoru chixbanunquil lao chi moco eb li kaxe'tonil yucua'?

¹¹ Yal xban rusilal li Kaçua' Jesús nak xopaban ut xocole' jo' eb ajcui' a'an, chan laj Pedro.

¹² Que'xcanab atinac chixjunileb li ch'ut'ch'uqueb aran ut que'oc chirabinquil nak laj Pablo ut laj Bernabé yoqueb chixserak'inquil chanru nak li Dios quixtenk'aheb chixbanunquil li milagro ut li sachba ch'olej sa' xyankeb li maçua'eb aj judío. ¹³ Nak que'rake' chi atinac, laj Jacobo quichak'oc ut quixye: —Ex inherman, abihomak li oc cue yxebal ere.

¹⁴ Laj Simón Pedro ac xye ere chanru nak li Dios quixtiquib rosobtesinquileb li maçua'eb aj judío. Quixsiq'ueb ru sa' xyankeb li ani te'pabank re. ¹⁵ Ut a'an ajcui' li que'xtz'iba chak retalil li profeta junxil li naxye chi jo'ca'in:

¹⁶ Ut chirix a'in lain tinchalk ut tincualesi cui'chic lix tenamit laj David, li t'ananak anakcuan. Tinyib cui'chic li tz'ac li sutsu cui' ut tinyib cui'chic li juq'uinbil. Tinq'ueheb cui'chic xcuanquil laj Israel,

¹⁷ re nak tine'xpab li maçua'eb aj judío. Tine'xpab chixjunileb li sic'bileb ru inban chok' cualal inc'ajol, chan li Kaçua' Dios.

¹⁸ Ut li Kaçua' Dios li quiyehoc chak re a'in, a'an ajcui' li tabanunk re. (Amós 9:11-12)

¹⁹ Jo'can nak lain ninye nak inc'a' takapuersi reheb chixbanunquil li naxye li chak'rab li maçua'eb aj judío li yoqueb chixpabanquil li Kaçua'. ²⁰ Li tento takabanu, a'an tz'ibac riq'uin eb ut xxebal reheb nak inc'a' te'xmux rib riq'uin xtzacanquil li tzacaemk mayejanbil chiruheb li yibanbil dios. Inc'a' te'co'betak te'yumbetak. Ut inc'a' te'xtiu xtibel li yatz'bil xul chi moco

te'xtzaca li quic'. ²¹ Jo'ca'in ajcui' naxye li chak'rab li quiq'uehe' re laj Moisés xban li Dios. Ut chalen chak najter cuan li ani najultican re sa' eb li cab li neque'xch'utub cui' ribeb laj judío rajlal hilobal cutan, chan laj Jacobo.

Lj hu li que'xtz'iba reheb li macua'eb aj judío

²² Eb li apóstol, ut eb laj c'amol be rochbeneb chixjunileb laj pabanel que'xsic' ruheb li te'xtakla Antioquía chirixeb laj Pablo ut laj Bernabé. Ut que'xsiq'ueb ru laj Silas ut laj Judas, aj Barsabás neque'xye ajcui' re. Eb li cuñk a'in q'uebileb xcuanguil xbaneb li rech aj pabanelil. ²³ Que'xtz'iba jun li hu ut que'xtakla chirixeb laj Judas ut laj Silas. Jo'ca'in naxye sa' li hu que'xtakla: Ex herman, li macua'ex aj judío, lao li apóstol, ut eb laj c'amol be jo'queb ajcui' chixjunileb laj pabanel nakatakla xsahil ech'ol laex li cuanquex sa' eb li tenamit Antioquía, Siria ut Cilicia. Sahak taxak sa' ech'ol. ²⁴ Xkabi resil nak cuanqueb li xe'el arin sa' kayank ut xe'coeb aran sa' le tenamit chech'i'ch'i'inquil ut chixpo'bal ech'ol riq'uin li c'a'ru neque'xye. Abanan moco lao ta xotaklan reheb. ²⁵ Jo'can nak xkach'utub kib ut xkac'ub ru nak takasic' ruheb li ani takatakla eri'uin chirixeb laj Bernabé ut laj Pablo, li raroqueb kaban. ²⁶ Eb li kaherman a'in ac xe'xk'axtesi ribeb chi camc sa' xc'aba' li Kacua' Jesucristo. ²⁷ Ut xkasic' ruheb laj Judas ut laj Silas ut xkataklaheb eri'uin re nak te'xch'olob cheru li c'a'ru xkatz'iba sa' li hu a'in. ²⁸ Xc'ul xch'ol li Santil Musik'ej jo' ajcui' lao nak inc'a' texkapuersi chixbanunquil chixjunil li naxye sa' li chak'rab. Ca'aj cui' eb li na'leb a'in tento tebanu. ²⁹ Inc'a' tetzaca li tzacaemk mayejanbil chiru li yibanbil dios chi moco tetzaca li quic' chi moco tetzaca xtibel li yatz'bil xul. Ut inc'a' temux erib riq'uin co'betac yumbetac. Cui tecol erib chiru chixjunil a'in, us tebanu. Cherilak erib, chan laj Jacobo. ³⁰ Eb li cuñk li que'taklac coeb Antioquía. Que'xch'utub chixjunileb laj pabanel ut que'xk'axtesi reheb li hu li que'xc'am. ³¹ Nak que'r'il xsa' li hu, c'ajo' nak que'saho' sa' xch'oleb laj pabanel ut que'c'ojla xch'oleb riq'uin li c'a'ru quitaklac xyebal reheb. ³² Laj Judas ut laj Silas q'uebileb xmatan chixch'olobanquil xyalal li ratin li Dios. Que'xch'olob xyalal chiruheb li ch'utch'ueb aran ut que'xq'ue xcacuilal xch'oleb ut que'xc'ojob xch'oleb riq'uin li atin li que'xye reheb. ³³ Najt que'cana sa' xyankeb. Mokon chic que'chak'rabjc re nak te'suk'ik cui'chic Jerusalén riq'uineb laj pabanel li que'taklan reheb Antioquía. Ut que'xtz'ama rusilal li Dios sa' xbeneb. ³⁴ Abanan laj Silas toj quiraj canac aran. ³⁵ Laj Pablo ut laj Bernabé que'cana ajcui' aran Antioquía. Yoqueb chixc'utbal li ratin li Dios ut yoqueb chixch'olobanquil xyalal li colba-ib. Ut cuanqueb ajcui' nabaleb li que'tenk'an reheb.

Laj Pablo quixjach rib riq'uin laj Bernabé ut co' xca' sut chirula' aninuil laj pabanel

³⁶ Mokon chic laj Pablo quixye re laj Bernabé: —Toxic cui'chic sa' eb li tenamit conume' cui' chak chixyebal ratin li Dios re takil chanru cuanqueb laj pabanel li cuanqueb sa' eb li na'ajej a'an, chan. ³⁷ Ut laj Bernabé quiraj raj xc'ambal chirixeb laj Juan li neque'xye ajcui' Marcos re. ³⁸ Abanan inc'a' quixc'ul xch'ol laj Pablo xban nak junxil laj Juan Marcos quixjach rib riq'uineb aran Panfilia ut inc'a' chic co' chirixeb chixbanunquil li c'anjel. ³⁹ Que'xcuech'i' ribeb laj Pablo ut laj Bernabé ut que'xcanab ribeb. Laj Bernabé co' aran Chipre chiru ha' ut quixc'am laj Juan Marcos chirix. ⁴⁰ Laj Pablo quixsic' ru laj Silas re tixc'am chirix. Eb laj pabanel li cuanqueb aran Antioquía que'xk'axtesiheb laj Pablo ut laj Silas sa' ruk' li Kacua' nak que'el

aran. ⁴¹ Quilaje'xbeni li na'ajej Siria ut Cilicia. Que'xch'olob xyalal chiruheb laj pabanel ut que'cacuu xch'oleb sa' xpabaleb.

16

Laj Timoteo ço chirixeb laj Pablo ut laj Silas

¹ Laj Pablo quicuulac sa' eb li tenamit Derbe ut Listra. Ut aran quixtau jun aj pabanel aj Timoteo xc'aba'. Lix na', a'an jun aj pabanel aj judío ut lix yucua', a'an aj griego. Maçua' aj judío. ² Çhabil neque'xye chirix laj Timoteo eb laj pabanel li cuanqueb Listra ut Iconio. ³ Laj Pablo quiraj xc'ambal laj Timoteo chirix. Jo'can nak quixbanu li circuncisión re. Inc'a' quiraj nak te'ch'inanç xch'oleb laj judío li cuanqueb sa' eb li na'ajej aran xban nak chixjunileb que'xnau nak lix yucua' laj Timoteo maçua' aj judío. ⁴ Ut nak yoqueb chi numec' sa' li junjunk chi tenamit, yoqueb chixyebal reheb laj pabanel nak tento te'xbanu li c'a'ru que'xc'ub ru eb li apóstol jo'queb ajcui' laj c'amol be li cuanqueb aran Jerusalén. ⁵ Jo'ca'in nak yoqueb chi q'ujc laj pabanel sa' xpabaleb. Ut rajlal cutan yoqueb chi tamc.

Jun li cujnk aj Macedonia quic'ute' chiru laj Pablo sa' visión

⁶ Li Santil Musik'ej quixc'ut chiruheb nak inc'a' te'xic chixch'olobanquil resil li colba-ib sa' li na'ajej Asia. Jo'can nak que'çöeb Frigia ut que'nume' ajcui' sa' li na'ajej Galacia. ⁷ Nak que'cuulac Misia, que'raj raj xic Bitinia. Abanan li Santil Musik'ej inc'a' quixcanabeb re te'xic aran. ⁸ Jo'can nak yal que'nume' Misia ut çöeb Troas. ⁹ Nak cuanqueb aran sa' jun li k'ojyin quic'ute' jun li visión chiru laj Pablo. Jun li cujnk aj Macedonia xakxo chiru nak quiril. Yo chixtz'amanquil chiru ut quixye re: —Çalkat sa' katenamit Macedonia ut choatenk'a, chu'ux re nak quiril. ¹⁰ Ut nak ac xc'ute' li visión chiru laj Pablo, sa' junpat quikacauresi kib laç chi xic Macedonia. Kanau chi tz'akal nak li Dios yo çhi taklañc ke aran chixyebal resil li colba-ib reheb li cuanqueb aran.

Lix Lidia quipaban nak laj Pablo quixch'olob xyalal aran Filipos

¹¹ Co-el aran Troas ut tjc ço chiru ha' toj Samotracia. Ut cuulajak chic cocuulac Neápolis. ¹² Chirix a'an ço Macedonia sa' li nimla tenamit Filipos. Li tenamit a'an cuan xcuent Roma. Cocuan cuib oxib cutan sa' li tenamit a'an. ¹³ Ut sa' li hilobal cutan ço chire li tenamit cuan cui' jun li nima' sa' li na'ajej li neque'tijoc cui' eb laj judío. Coc'ojla ut co-oc chixyebal resil li colba-ib reheb li ixk li que'ch'utla aran. ¹⁴ Jun reheb li ixk a'an xLidia xc'aba'. Tiatira xtenamit. A'an nac'ayin çhabil t'icr. Naxpab li Dios ut yo çhi abjnc xban nak li Dios quixc'ut chiru nak tixq'ue retal li yo chixyebal laj Pablo. ¹⁵ Quixc'ul li cubi ha' rochbened chixjunileb li cuanqueb sa' rochoch, ut quixye ke: —Cui nequepab nak laj xinpab li Kaçua' çhi anchal inch'ol, naru nequexcana çhi hilanc sa' li cuochoch, çhan ke. Ut quirelaji ku çhi canaç.

Laj Pablo ut laj Silas que'q'uehe' sa' tz'alam aran Filipos

¹⁶ Sa' jun li cutan yoço chi xic chi tijoc nak kac'ul jun li xka'al aj k'e. Cuan maus aj musik'ej riq'uin. A'an jun moç ut naxsic' nabal xtumin lix patrón riq'uin k'ehjnc. ¹⁷ Li xka'al a'an yo çhikatakenquil. Japjo re chixyebal: —Eb li cujnk a'in a'an xmoçeb li nimajcual Dios. Yoqueb chixch'olobanquil çhiku çhanru nak taruk tocolek', çhan. ¹⁸ Nabal cutan quixbanu chi jo'can. Nak ac xtitz' chirabinquil, laj Pablo quixxakab rib, ut quiril li xka'al, ut quixye re li maus aj musik'ej: —Sa' xc'aba' li Kaçua' Jesucristo, tinye açue: Elen riq'uin li xka'al a'in, çhan. Ut sa' ajcui' li hønal a'an, li maus aj musik'ej qui-el

riq'uin. ¹⁹ Nak que'xq'ue retal lix patrón li xka'al nak inc'a' chic taruk tixsic' xtumineb, que'xchap laj Pablo ut laj Silas ut que'xc'am sa' popol chiruheb laj rakol atin. ²⁰ Nak que'xxakab chiru laj rakol atin, que'xye: —Eb li cunjk a'in, a'aneb aj judío ut yoq'ueb chikach'i'ch'i'inquil sa' li katenamit. ²¹ Yoq'ueb chixc'utbal jalan na'leb sa' li katenamit. Lao inc'a' naru nakac'ut chi moco naru takabanu li neque'xye xban nak lao aj Roma, chanqueb. ²² Ut que'xtub rib li tenamit chixjitbaleb. Eb laj rakol atin que'xk'ichi li rak'eb laj Pablo ut laj Silas ut que'xtakla xsac'baleb riq'uin che'. ²³ Nak ac xe'tacuasic chi us, que'q'uehe' sa' tz'alam. Ut eb laj rakol atin que'xye reheb laj ilol tz'alam nak te'ril chi us laj Pablo ut laj Silas re nak inc'a' te'elelik. ²⁴ Ut nak quieye' chi jo'can, que'c'ame' ut que'q'uehe' sa' tz'alam sa' jun li na'ajej li cuan toj chi sa' ut que'nat'e' li rok sa' che'. ²⁵ Tuku chic k'o'jyin nak laj Pablo ut laj Silas yoq'ueb chi tijoc ut yoq'ueb chi bichanc re xlok'oninquil li Dios. Ut eb li cuanqueb chi prexil yoq'ueb chi abinc. ²⁶ Mac'a' sa' xch'oleb nak quichal jun nimla hic. Qui-ec'asic chi cau li tz'alam, ut quilaje'teli lix puertil. Ut quilaje'hite' li cadena li bac'boqueb cui' li prex. ²⁷ Ut nak qui-aj ru laj ilol tz'alam, quiril nak teto lix puertil li tz'alam. Quixchap lix ch'ich' ut oc raj re chixcamsinuil rib. Sa' xch'ol a'an nak xe'elelic chixjunileb li prex. ²⁸ Ut laj Pablo quixjap re chi cau ut quixye: —Macamsi acuib. Chikajunilo cuanco arin, chan. ²⁹ Ut laj ilol tz'alam quixpatz' lix xam ut qui-oc chi sa' li tz'alam chirilbal. Nasicot xban xxiu nak quixcut rib chi rokeb laj Pablo ut laj Silas. ³⁰ Laj ilol tz'alam quirisiheb xjuneseb laj Pablo ut laj Silas ut quixye reheb: —¿C'a'ru us tinbanu re nak tincokel'? ³¹ Eb a'an que'xye: —Pab li Kacua' Jesucristo. Tatcolek' laot jo'queb ajcui' li cuanqueb sa' la cuochoch, chan laj Pablo. ³² Ut quixch'olob xyalal li ratin li Kacua' chiru a'an jo' ajcui' chiruheb li jo' uial li cuanqueb sa' li rochoch. ³³ Ut sa' ajcui' li honal a'an laj ilol tz'alam quirisiheb sa' tz'alam laj Pablo ut laj Silas. Quixch'aj ru lix toch'oleb xban nak que'saq'ue'. Ut ticto quicubsic xha' laj ilol tz'alam rochbeneb chixjunileb li cuanqueb sa' li rochoch. ³⁴ Quixc'ameb laj Pablo ut laj Silas sa' rochoch ut quixq'ueheb xtzaacemk. C'ajo' nak quisaho' sa' xch'ol nak quixpab li Dios rochbeneb li cuanqueb sa' rochoch. ³⁵ Nak quisakeu, eb laj rakol atin que'xtakla xyebal re laj ilol tz'alam nak tixcanabeb chi xic eb li cunjk a'an. ³⁶ Laj ilol tz'alam quixye reheb: —Eb laj rakol atin xe'xtakla chak xyebal nak tex-ach'abak. Jo'can nak ayukex chi mac'a' ec'a'ux, chan. ³⁷ Laj Pablo quixye reheb: —Inc'a'. Xosaq'ue' chiruheb li tenamit chi maji' que'xrak atin sa' kaben. Xoe'xq'ue sa' tz'alam usta lao aj Roma. Ut anakuan, te'raj toe'risi chi mukmu. Inc'a' naru chi jo'can. Chalkeb ban a'an ut choe'risihak, chan. ³⁸ Ut eb li takl que'coeb chixyebal re laj rakol atin li c'a'ru quixye laj Pablo. C'ajo' nak que'xucuac nak que'rabi nak laj Pablo ut laj Silas, a'aneb aj Roma. ³⁹ Nak que'cuulac, que'xk'unbesiheb ut que'xtz'ama chiruheb nak te'elk sa' li tenamit. ⁴⁰ Nak que'el sa' tz'alam laj Pablo ut laj Silas, coxe'ocak sa' rochoch lix Lidia. Nak ac xe'ril ruheb laj pabanel, que'xq'ue xcacuilal xch'oleb ut que'coeb.

17

Ll ch'a'ajquilal que'xc'ul laj Pablo ut laj Silas nak cuanqueb Tesalónica

¹ Nak yoq'ueb chi xic laj Pablo ut laj Silas que'nume' Anfipolis ut Apolonia. Ut chirix a'an, que'cuulac Tesalónica bar cuan cui' jun li cab li neque'xch'utub cui' ribeb laj judío. ² Laj Pablo qui-oc sa' li cab li neque'xch'utub cui' ribeb laj judío jo' c'aynak chixbanunuil. Oxib li hilobal cutan quixnumsi aran ut yo chixch'olobanquil chiruheb li xyalal li naxye sa' li Santil Hu.

³ Yo chixch'olobanquil chiruheb nak li Cristo quixc'ul nabal li raylal jo' tenebanbil sa' xben ut quicuacui cui'chic chi yo'yo sa' xyankeb li camenak. Quixye reheb: —Li Jesús li yoquin chixyebal ere, a'an li Cristo laj Colonel, chan. ⁴ Cuanqueb aj judío que'paban ut que'cana chirochbeninquil laj Pablo ut laj Silas. Jo'can ajcui' que'xbanu nabaleb laj griego li neque'xlok'oni li Dios. Ut nabaleb li ixk li na'noqueb ru que'paban. ⁵ Ut eb laj judío li inc'a' que'paban, c'ajo' nak que'josk'o' xban xcakaleb xch'ol. Que'ratina jun ch'utal li cuñk inc'a' useb xna'leb li junes sa' be neque'cuan. Ut li jun ch'utal chi cuñk a'an que'oc chixchik'bal xjosk'ileb li tenamit. Xban nak yoqueb xjosk'il, que'oc sa' rochoch laj Jasón chixsic'baleb laj Pablo ut laj Silas re te'xc'ameb chiruheb li tenamit. ⁶ Que'r'il nak inc'a' que'xtau laj Pablo ut laj Silas. Que'xchap laj Jasón rochben cuib oxibeb laj pabanel ut que'xc'am chiruheb li neque'taklan sa' li tenamit. Japjoqueb re chixyebal: —Eb li cuñk a'an, yoqueb chixpo'bal xch'oleb li tenamit sa' chixjunil li ruchich'och' ut anakuan xe'chal arin chixpo'bal xch'oleb li katenamit. ⁷ Ut laj Jasón xc'uleb sa' rochoch. Yoqueb chixk'etbal lix chak'rab laj César li Acuabej. Yoqueb chixyebal nak cuan jun chic li rey, a'an li Jesús, chanqueb. ⁸ Li q'uila tenamit jo'queb ajcui' li neque'taklan sa' li tenamit que'sach xch'oleb chirabinquil li c'a'ru yoqueb chixyebal eb a'an. ⁹ Eb li neque'taklan sa' li tenamit que'xye reheb laj Jasón ut li rochben nak tento te'xtoj riq'uin tumin li reliqueb. Ut nak ac xe'xc'ul li tumin, que'ach'abac laj Jasón ut eb li rochben.

Laj Pablo ut laj Silas que'xch'olob xyalal aran Berea

¹⁰ Sa' ajcui' li k'o'jyin a'an eb laj pabanel li cuanqueb aran que'risi laj Pablo ut laj Silas sa' li tenamit a'an ut que'xtaklaheb toj Berea. Nak que'cuulac aran, que'coeb sa' li cab li neque'xch'utub cui' ribeb laj judío. ¹¹ Eb li cuanqueb aran Berea k'axal k'unek xch'ol chiruheb li cuanqueb Tesalónica. Que'xc'ul chi sa sa' xch'oleb li ratin li Dios li yo chixyebal laj Pablo. Ut rajlal cutan que'xtzol sa' li Santil Hu re rilbal ma jo'can tana naxye. ¹² Nabaleb laj judío que'paban sa' xyankeb a'an. Cuanqueb ajcui' ixk aj griego xninkaleb ru que'paban. Ut que'paban ajcui' nabaleb li cuñk aj griego. ¹³ Que'rabi resil laj judío li cuanqueb Tesalónica nak laj Pablo yo chixjulticanquil li ratin li Dios aran Berea. Ut que'coeb aran chixpo'bal xch'oleb li tenamit. ¹⁴ A'ut eb laj pabanel sa' junpat que'xtakla laj Pablo chire li palau re nak taxic sa' jalan na'ajej. Aban laj Silas ut laj Timoteo toj que'cana Berea. ¹⁵ Eb li que'coeb chi canabanc re laj Pablo, que'xc'am toj sa' li tenamit Atenas. Nak que'suk'i Berea, laj Pablo quixtakla resil chirixeb nak laj Silas ut laj Timoteo te'xic Atenas chi junpat.

Laj Pablo quixch'olob xyalal chiruheb li tzolbileb li cuanqueb aran Atenas

¹⁶ Nak laj Pablo yo chiroybeninquileb laj Silas ut laj Timoteo sa' li tenamit Atenas, quixq'ue retal nak k'axal cui'chic nabaleb li yibanbil Dios cuanqueb sa' li tenamit a'an. C'ajo' nak quiraho' sa' xch'ol. ¹⁷ Jo'can nak qui-oc chixch'olobanquil lix yalal chi tz'akal chiruheb li tenamit sa' li cab li neque'xch'utub cui' ribeb laj judío jo'queb ajcui' li macua'eb aj judío li que'xlok'oni li Dios. Ut rajlal cutan quixch'olob li xyalal chiruheb li cuanqueb sa' c'ayil. ¹⁸ Cuanqueb cuñk aj epicúreos ut eb aj estoicos xc'aba'eb li neque'xc'oxla nak k'axal cuan xna'lebeb. Eb a'an que'oc chixcuech'inquil rix li c'a'ru yo chixyebal laj Pablo. Ut yoqueb chixyebal: —¿C'a'ru yo chixyebal li cuñk a'an li junes atinac naxbanu? Ut cuan cui'chic yoqueb chi yehoc re: —Jo' li xchal anchal xyebal resil jalanil dios arin sa' katenamit, chanqueb. Que'xye chi jo'can xban nak laj Pablo yo chixch'olobanquil resil li colba-ib

sa' xc'aba' li Jesucristo jo' ajcui' chirix lix cuaclijiqueb cui'chic li camenak chi yo'yo. ¹⁹ Jo'can nak que'xc'am laj Pablo sa' li na'ajej li neque'xch'utub cui' ribeb li k'axal cuanqueb xna'leb. Areópago xc'aba' li na'ajej a'an. Ut que'xye re: —¿Ma tarúk taye ke c'a'ru xyalal li ac' tijleb a'in li yocat chixyebal? ²⁰ Ma jun sut kabiom li na'leb a'in. Takaj takanau c'a'ru xyalal, chanqueb re. ²¹ Sa' eb li cutan a'an chixjunileb laj Atenas ut eb li jalaneb xtenamit li cuanqueb aran, maç'a' chic c'a'ak re ru neque'xc'oxla. Ca'aj chic xranquil ut atinac chirix li ac' na'leb neque'xbanu. ²² Ut laj Pablo quixakli chiruheb li cuanqueb sa' li na'ajej a'an, ut quixye reheb: —Ex cuñk aj Atenas, yoquin chixq'uebal retal nak nequepab chixjunil li c'a'ak re ru. ²³ Nak yoquin chi bec sa' le tenamit xebinq'ue retal li c'a'ru nequelok'oni ut xintau ajcui' jun li artal tz'ibanbil chiru “Re li Dios li Inc'a' Naubil Ru”. Li Dios li nequelok'oni laex chi inc'a' nequenau ru, a'an ajcui' li yoquin chixch'olobanquil xyalal cheru. ²⁴ Ut a'an ajcui' li Dios, li quiyiban re li ruchich'och' ut chixjunil li c'a'ak re ru cuan. A'an laj echal re li choxa ut li ruchich'och'. A'an inc'a' nacuan sa' junak cab yibanbil xban cuñk. ²⁵ Chi moco a' ta li cuñk naq'uehoc c'a'ak re ru re a'an. A'an ban naq'uehoc ke li kayu'am ut a'an naq'uehoc li kamusik'. A'an li naq'uehoc chixjunil li c'a'ru cuan. ²⁶ Rig'uin jun chi cuñk quixyo'obtesi chixjunileb li cristian li cuanqueb sa' ruchich'och'. Ut a'an yal re jo' najtil te'cuank li junjunk sa' ruchich'och'. Ut a'an ajcui' quiq'uehoc re lix na'ajej li junjunk chi tenamit. ²⁷ Quixbanu chi jo'can re nak li junjunk te'xsic' li Dios ut mare te'xtau nak te'xsic'. Ut relic chi yal moco ch'a'aj ta xtaubal cui te'xsic' chi anchaleb xch'ol. ²⁸ A'an naq'uehoc kayu'am ut sa' xc'aba' a'an nak yo'yoco ut noco-ec'an. Jo' quixye jun laj bichanel sa' eyank: —Relic chi yal nak lao ralar xc'ajol li Dios, chan. ²⁹ Jo'can nak cui lao ralar xc'ajol li Dios, inc'a' naru takac'oxla nak li Dios chanchan ta li oro, malaj li plata chi moco li pec li yibanbil yal rig'uin xc'a'ux ut xna'lebeb li cuñk. ³⁰ Li Dios inc'a' quixq'ue sa' xbeneb li tenamit lix maqueb sa' eb li cutan nak inc'a' que'xtau ru li xyalal. Abanan anakuan naxjultica chiruheb chixjunileb li tenamit nak te'xyot' xch'ol te'xjal xc'a'ux. ³¹ Li Dios ac' xxakab jun li cutan re tarakok atin sa' xbeneb chixjunileb li cuanqueb sa' ruchich'och'. Ut quixxakab li ani tarakok atin sa' tiquilal. Quixc'ut chiku nak tz'akal yal xban nak quixcuaclesi cui'chic chi yo'yo sa' xyankeb li camenak, chan laj Pablo. ³² Nak eb li cuanqueb xna'leb que'rabi li yo' chixyebal chirix lix cuaclijiqueb li camenak chi yo'yo, cuan que'se'en re ut cuan ajcui' que'yehoc re: —Takaj takabi cui'chic li c'a'ru yocat chixyebal sa' junak chic cutan, chanqueb. ³³ Ut chirix a'an, laj Pablo qui-el sa' xyankeb. ³⁴ Cuanqueb ajcui' li que'xc'ul xch'ol li quixye laj Pablo ut que'xpab li Jesús. Sa' xyankeb li que'paban cuan laj Dionisio. A'an jun reheb li que'taklan sa' li tenamit. Ut quipaban ajcui' jun li ixk xDámaris xc'aba'. Ut cuanqueb ajcui' cuib oxib chic que'paban.

18

Eb laj pabanel li cuanqueb Corinto que'xtiquib xch'utubanquil ribeb chi lok'oninc

¹ Nak ac' xc'ulman a'in, laj Pablo qui-el Atenas. Ut co Corinto. ² Ut aran quixtau jun li cuñk aj judío. Aj Aquila xc'aba'. Ponto xtenamit. Inc'a' najter xc'ulunic Italia rochben lix Priscila li rixakil. Que'el aran Roma xban nak laj Claudio li Acuabej quixye nak chixjunileb laj judío te'elk sa' li tenamit a'an. Laj Pablo co chirula'anquileb. ³ Ut quicana rochbeneb chi c'anjelac xban nak juntak'et li c'anjel neque'xbanu. Neque'yiban t'icr re muhebal. ⁴ Sa' li hilobal cutan rajlal naxic laj Pablo sa' li cab li neque'xch'utub cui' ribeb laj Judío.

Aran quiatnac riq'ueineb ut quixch'olob xyalal chiruheb laj judío jo'queb ajcui' li maçua'eb aj judío. ⁵ Nak ac xe'suk'i chak laj Silas ut laj Timoteo Macedonia, laj Pablo quixk'axtesi rib chi junaj cua chixch'olobanquil lix yalal reheb laj judío nak li Jesús, a'an li Cristo, laj Colonel li yechi'inbil xban li Dios. ⁶ Abanan eb a'an inc'a' que'cuulac chiru li yo chixyebal laj Pablo. Que'oc chi majecuanc. Jo'can nak laj Pablo quixchik'chik'i li rak' ut quixye reheb: —Cui læx inc'a' texcolek', a' yal ere. Sa' eben læx cuan li maç. Lain maç'a' inmaç xban nak ac xinye ere li xyalal. Chalen anakcuan lain tinch'olob xyalal reheb li maçua'eb aj judío, chan. ⁷ Jo'can nak laj Pablo qui-el sa' xyankeb ut ço chi cuanc sa' rochoch jun li cuñk maçua' aj judío. Aj Justo xc'aba'. Li cuñk a'an naxlok'oni li Dios. Li rochoch cuan chixc'atk li cab li neque'xch'utub cui' ribeb laj judío. ⁸ Laj Crispo, li nac'amoc be sa' li cab li neque'xch'utub cui' ribeb, quixpab Li Kaçua' rochbened li cuanqueb sa' li rochoch. Nabaleb aj Corinto que'paban nak que'rabi resil li colba-ib. Ut que'cubsic xha'eb. ⁹ Sa' jun li k'o'yjin li Kaçua' quixc'utbesi jun li visión chiru laj Pablo ut quixye re: —Matxucuac chi atinac. Ch'olob ban li xyalal chiruheb li tenamit. ¹⁰ Lain cuankin acuiq'uin. Ma' ani tabanunk raylal acue xban nak nabaleb li cualal inc'ajol sa' li tenamit a'in, chan li Dios re laj Pablo sa' li visión. ¹¹ Jo'can nak laj Pablo quicana aran jun chihab riq'uin cuakib po ut yo chixch'olobanquil xyalal li rañin li Dios chiruheb.

Laj Galión li cuan chi taklanc aran Acaya quixye nak laj Pablo maç'a' xmaç

¹² Nak laj Galión cuank chi taklanc aran Acaya, eb laj judío que'xc'ub ru chi ribileb rib nak te'xchap laj Pablo. Que'xchap ut que'xc'am sa' popol re nak tarakek' atin sa' xben. ¹³ Ut que'xye: —Li cuñk a'in yo chixyebal reheb li tenamit chanru nak te'xlok'oni li Dios. Li na'leb li naxye a'an, moco naxc'uluban ta li chak'rab, li q'uebil ke xbaneb laj Roma, chanqueb. ¹⁴ Oc raj re chi atinac laj Pablo nak quichak'oc chak laj Galión ut quixye reheb laj judío: —Ex aj judío, cui ta xk'et xchak'rabebe laj Roma malaj ut cui ta cuan junak inc'a' us xbanu, tento raj tinch'i'ch'i'i cuib cherabinquil. ¹⁵ Abanan cui yal chirix atinac ut c'aba'ej ut chirix le chak'rab yoquex chi jitoc chirix, tento nak læx tesic' xyalal. Lain inc'a' nacuai rakoc atin chirix li c'a'ak re ru a'in, chan. ¹⁶ Ut quirisiheb sa' li popol. ¹⁷ Eb laj griego que'xchap laj Sóstenes li nataklan sa' li cab li neque'xch'utub cui' ribeb laj judío. Que'xsac' ut que'xtacuasi chiru li popol ut laj Galión maç'a' quixye.

Laj Pablo quisuk'i cui'chic Antioquia ut ço cui'chic rox sut chirula'aninquileb laj pabanel

¹⁸ A'ut laj Pablo toj quicana aran nabal cutan. Tojo'nak quixchak'rabiheb laj pabanel ut qui-el. Ço chiru ha' toj Siria rochbened lix Priscila ut laj Aquila. Aran sa' li tenamit Cencrea quixbes li rismal. A'an retalil nak quixbanu li c'a'ru quixyechi'i re li Dios. ¹⁹ Nak que'cuulac Efeso laj Pablo quixcanabeb lix Priscila ut laj Aquila ut ço sa' li cab li neque'xch'utub cui' ribeb laj judío chixch'olobanquil lix yalal chiruheb laj judío. ²⁰ Ut eb a'an que'xtz'ama chiru nak toj façanak chic ca'ch'inak riq'ueineb. Abanan laj Pablo inc'a' quixsume canaç. ²¹ Quixchak'rabiheb ban ut quixye reheb: —Tento nak tinxic chixnumsinquil li nink'e Jerusalén xban nak cuulac re xk'ehil. Lain tinchalk cui'chic eri'uin cui jo'can naraj li Dios, chan. Ut qui-el aran Efeso. ²² Nak quicuulac Cesarea, ço Jerusalén. Ut nak ac xq'ueheb xsahil xch'oleb laj pabanel, ço Antioquia. ²³ Inc'a' najt quicuan aran nak ço ut quinume' sa' eb li na'ajej Galacia ut Frigia ut yo chixq'uebal xcacuulal xch'oleb laj pabanel.

Laj Apolos quixch'olob xyalal nak li Jesús, a'an li Cristo

²⁴ Quicuulac Efeso jun li cujnk aj judío, aj Apolos xc'aba'. Alejandría xtenamit. K'axal naxnau atinac chi chabil ut naxnau chi us li tz'ibanbil sa' li Santil Hu. ²⁵ Quixtzol rib chi us ut naxnau chanru xpabanquil li Kacua'. Ut quixq'ue xch'ol chi atinac chi tz'akal xch'olobanquil resil li Jesús, usta ca'aj cui' quixnau chirix li cubi ha' li quixbanu laj Juan. ²⁶ Qui-oc chi atinac chi cau xch'ol sa' li cab li neque'xch'utub cui' ribeb laj judío. Nak que'rabi lix Priscila ut laj Aquila li yo chixyebal, que'risi xjunes laj Apolos ut que'xch'olob li xyalal chi tz'akal chiru. ²⁷ Nak ac yo xc'oxlanquil xic laj Apolos aran Acaya, eb laj pabanel que'xq'ue xcacuil xch'ol re taxic. Ut que'xtz'iba jun li hu ut que'xtakla reheb laj pabanel li cuanqueb aran. Que'xye reheb nak te'xc'ul chi sa sa' xch'ol. Ut nak quicuulac aran, laj Apolos quixtenk'aheb chi chabil li ac xe'paban xban rusilal li Dios. ²⁸ Ut quiratinaheb laj judío chi cau xch'ol chiruheb chixjunileb li tenamit. Ut quixch'olob xyalal chiruheb chi tz'akal nak li Jesús, a'an li Cristo, jo' tz'ibanbil sa' li Santil Hu.

19

Eb lix tzolom laj Juan que'xc'ul li Santil Musik'ej aran Efeso

¹ Nak laj Apolos cuan Corinto laj Pablo quinume' sa' eb li na'ajej toj quicuulac Efeso. Ut aran quixtauheb jun ch'utaleb laj pabanel. ² Quixye reheb: —¿Ma quec'ul li Santil Musik'ej nak quexpaban? chan laj Pablo reheb. Ut eb a'an que'xye: —Inc'a' nakanau nak cuan ta li Santil Musik'ej, chanqueb. ³ Ut laj Pablo quixye reheb: —¿Chanru nak quicubsic eha'? Eb a'an que'xye: —Li cubi ha' li xkac'ul, a'an li quixbanu laj Juan, chanqueb. ⁴ Laj Pablo quixye reheb: —Laj Juan quixcubsieheb xha' li que'xyot' xch'ol ut que'xjal xc'a'ux. Quixye reheb nak te'pabank sa' xc'aba' li Jesucristo li tol-elk mokon, chan. ⁵ Nak que'rabi a'an, que'xtz'ama li cubi ha' ut quicubsic xha'eb sa' xc'aba' li Kacua' Jesús. ⁶ Laj Pablo quixq'ue li ruk' sa' xbeneb ut que'xc'ul li Santil Musik'ej. Que'atinac sa' jalan atinobal ut que'xye resil li c'aru quic'utbesic chiruheb xban li Dios. ⁷ Cuanqueb tana cablaju chi cujnk li que'paban sa' xyankeb.

Eb laj pabanel que'xtiquib xch'utubanquil ribeb chi lok'onjnc aran Efeso

⁸ Chiru oxib po laj Pablo quixch'olob li xyalal chiruheb laj Efeso chi mac'a' xxiu sa' li cab li neque'xch'utub cui' ribeb laj judío. Quixyal xk'e xc'utbal chi tz'akal lix yalal lix nimajcual cuanquial li Dios. ⁹ Cuanqueb li que'xcacuibresi xch'oleb ut inc'a' que'raj pabanc. Que'oc chixmajecuanquil li evangelio chiruheb chixjunileb. Jo'can nak laj Pablo quixcanab xch'olobanquil li xyalal aran sa' li cab li neque'xch'utub cui' ribeb laj judío. Ut quixc'ameb laj pabanel chirix. Rajlal cutan quixc'ut li xyalal chiruheb sa' li cab li natzoloc cui' jun li cujnk aj Tirano xc'aba'. ¹⁰ Cuib chihab quixbanu chi jo'ca'in. Ut chixjunileb li cuanqueb Asia, eb laj judío, jo'eb ajcui' li macua'eb aj judío, que'rabi li ratin li Kacua' Jesús. ¹¹ Ut li Kacua' Dios quixq'ue xcuauquil laj Pablo chixbanunquil li sachba ch'olej. ¹² Usta ca'aj cui' lix t'icr ut lix sut laj Pablo neque'xq'ue sa' xbeneb li yaj, neque'q'uira. Ut neque'el li maus aj musik'ej riq'uineb. ¹³ Cuanqueb aj judío neque'xye nak neque'xnau risinquileb li maus aj musik'ej ut neque'xbeni ribeb chixbanunquil. Que'xyal xpatz'bal xc'aba' li Kacua' Jesús sa' xbeneb li cuan maus aj musik'ej riq'uineb ut que'xye: —Sa' xc'aba' li Jesús li naxjultica laj Pablo, tinye ere elenkex riq'uin li cujnk a'an, chanqueb. ¹⁴ Cuukubeb chi cujnk li yoqueb chi banunc re a'in. Ralaleb jun li cujnk aj judío, aj Esceva xc'aba'. A'an li xbenil aj tij.

15 Sa' jun li cutan jun li maus aj musik'ej quichak'oc ut quixye reheb: — Ninnau ani li Jesús, ut ninnau ajcui' ani laj Pablo. Ut laex, ¿anihex? Ut ¿ani xq'uehob ećuanquil chi isinc maus aj musik'ej? chan reheb. 16 Li cujnk li cuan maus aj musik'ej riq'uin, quixcut rib sa' xbeneb. A'an k'axal cui'chic cau rib chiruheb. Tacuasibileb ut pejeleb chic li rak'eb nak que'elelic sa' li cab a'an. 17 Chixjunileb li cuanqueb Efeso que'rabi resil li c'a'ru quic'ulman, jo' aj judío jo' eb ajcui' li maćua'eb aj judío. Quichal xxiuheb chixjunileb ut k'axal cui'chic que'xq'ue xlok'al li Kaćua' Jesús. 18 Ut nabaleb li que'paban que'chal ut que'xxoto lix maćueb chiru li Dios chiruheb chixjunileb li cuanqueb aran. 19 Nabaleb laj tul que'chal ut que'xc'am chak lix huheb li nac'anjelac chiruheb re tulac ut que'xc'at chiruheb chixjunileb li tenamit. Nak que'xbir rix lix tz'ak chixjunil li que'xc'at, qui-el lajeb roxc'al mil (50,000) chi tumin plata. 20 Ut li raćin li Kaćua' yo' chi elc resil yalak bar ut yo' ajcui' chi c'utunc xcuanquil li Dios. 21 Nak ac xnume' chixjunil a'in, laj Pablo quixc'oxla xic toj Jerusalén, nak acak xbeni chak Macedonia ut Acaya. Quixye: —Nak acak xinnume' aran, tento ajcui' tinxic Roma chirilbaleb laj pabanel li cuanqueb aran, chan. 22 Jo'can nak quixtaklaheb Macedonia laj Timoteo ut laj Erasto, li neque'tenk'an re. Ut laj Pablo toj quicana aran Asia.

Laj tenol ch'ich' xic' que'rabi li c'a'ru quixye laj Pablo

23 Ut sa' eb li cutan a'an quitićla jun nimla ch'a'ajquilal xban nak nabaleb yoqueb chixpabanquil li Dios. 24 Jun li cujnk aj tenol plata, aj Demetrio xc'aba'. A'an naxyib riq'uin plata li coc' ochoch re lix Diana lix dioseb. Ut nabal li tumin neque'xc'ul li neque'trabajic rochben. 25 Quixch'utubeb chixjunileb li neque'c'anjelac chiru jo'queb ajcui' chixjunileb laj tenol plata ut quixye reheb: —Laex nequenau nak riq'uin li c'anjel a'in nakabanu, nakac'ul nabal li katumin. 26 Ac erabiom resil nak laj Pablo ac xtacchi'i nabaleb li cuanqueb aran Efeso jo' ajcui' sa' chixjunil li tenamit xćuent Asia. Ac nequenau nak yo' chixyebal reheb nak moco dioseb ta li yal yibanbil xban cujnk. 27 Mare anchal taśachk li kac'anjel xban a'an. Ut mare anchal taťz'ektanak ajcui' xlok'al li rochoch lix Diana li kalok'laj dios. Mare taśachk lix cuanquilal li kadios li neque'xlok'oni chixjunileb aran Asia, jo' ajcui' li cuanqueb sa' chixjunil li ruchich'och', chan laj Demetrio. 28 Ut eb li ch'utch'uqueb aran c'ajo' nak que'josk'o' nak que'rabi li c'a'ru quixye. Que'xjap reheb chixyebal: —jNim xcuanquil lix Diana li kadios lao aj Efeso! chanqueb. 29 C'ajo' nak que'josk'o' li tenamit. Inc'a' chic jultiqueb re c'a'ru neque'xbanu. Jun xiquiqueb nak coeb chixsic'bal laj Gayo ut laj Aristarco li que'chal chak Macedonia rochben laj Pablo. Ut quelonbileb nak que'c'ame' toj sa' li na'ajej li neque'xch'utub cui' ribeb. 30 Ut laj Pablo quiraj raj xic chi aćinac riq'uineb li tenamit, abanan eb laj pabanel inc'a' que'xcanab chi xic. 31 Cuanqueb cuib oxib li ramig laj Pablo li neque'c'amoc be sa' li tenamit. A'aneb aj Roma. Eb a'an que'xtakla xyebal re laj Pablo nak inc'a' taćic sa' li na'ajej li neque'xch'utub cui' ribeb li tenamit. 32 Chixjunileb li que'xch'utub ribeb aran yoqueb chixjapbal reheb ut inc'a' chic jultiqueb re li c'a'ru neque'xye. Lix q'uialeb li tenamit inc'a' que'xnau c'a'ut nak que'xch'utub ribeb aran. 33 Ut que'risi sa' xyankeb li tenamit laj Alejandro. A'an quixtaksi li ruk' re te'xcanab chokinc. Quiraj raj aćinac re xcolbal rib chiruheb li tenamit. 34 Nak que'ril nak a'an aj judío junaj xyab xcuxeb chixjunileb chixyebal: —jNim xcuanquil lix Diana li kadios lao aj Efeso! chanqueb. Ut ca'ch'in chic ma' cuib or que'xjap reheb chixyebal a'an. 35 Nak

ac xk'unbesiheeb li tenamit laj tz'ib li nac'anjelac sa' popol, quixye reheb: — Laex aj Efeso, ¿ma cuan ta bi' junak inc'a' naxnau nak li katenamit Efeso, a'an li nac'ac'alen re li rochoch lix Diana, li kalok'laj dios? Chixjunileb neque'xnau nak li jalam uch a'an chalenak chak sa' choxa. ³⁶ Li kadios inc'a' taruk xsachbal ru. Jo'can nak meq'ue ejosk'il. C'oxlahomak rix chi us li c'a'ru tebanu. ³⁷ ¿C'a'ut nak xec'ameb chak li cujnk a'in arin? Eb a'an inc'a' yoqueb chixmuxbal ru le dios, chi moco yoqueb ta chixmajecuanquil. ³⁸ Cui ut laj Demetrio ut eb laj tenol ch'ich' li neque'c'anjelac riq'uin cuan junak ani te'xjit, teto li popol ut cuanqueb aj rakol atin. Te'jitok aran re nak taruk tayibak ru lix ch'a'ajquilaleb. ³⁹ Cui ut teraj xc'ubanquil junak c'a'ak re ru, takach'utub kib ut sa' xyalal takac'ub ru. ⁴⁰ Anakcuan xiu xiu cuanco. Cui nocoe'xjit riq'uin li mululij ib yoco, ut cui eb laj Roma li neque'taklan sa' kaben te'xpatz' ke c'a'ut nak yoco chixmululinquil kib, mac'a' naru takacol cui' kib, chan. ⁴¹ Ut nak quirake' chixyebal a'in, quixchak'rabiheeb li tenamit.

20

Laj Pablo co Macedonia ut Grecia

¹ Ut nak ac xnume' li mululij ib, laj Pablo quixbokeb laj pabanel riq'uin. Quixq'ueheb xna'leb, quixk'aluheb, quixchak'rabiheeb ut co Macedonia. ² Nak ac xrula'aniheeb li cuanqueb sa' li na'ajej Macedonia, ut nak ac xq'ueheb xna'leb chi chabil, co aran Grecia. ³ Oxib po quicuan aran Grecia ut xic raj re Siria chiru ha' nak quirabi resil nak eb laj judío te'xram sa' xbe. Jo'can nak co cui'chic Macedonia. ⁴ Qui-ochbenic toj Asia xbaneb laj Sópater li lalal laj Pirro, Berea xtenamit; laj Aristarco ut laj Segundo, Tesalónica xtenamiteb; ut laj Gayo, Derbe xtenamit; rochbeneb laj Timoteo, laj Tíquico ut laj Trófimo, Asia xtenamiteb. ⁵ Eb a'an coeb chi ubej ut aran Troas coe'roybeni. ⁶ Lao toj kanumsi li nink'e nak nacua'e' li caxlan cua mac'a' xch'amal. Chirix a'an coo aran Filipos chiru ha'. Nak ac xnume' ob cutan coxe'katau aran Troas, ut cocana cuukub cutan aran. ⁷ Ut sa' xben li cutan re li xaman, ch'utch'uqueb laj pabanel chi cua'ac sa' comonil. Laj Pablo yo chixtzolbaleb. Ac cuulajak naxic. Tuktu k'o'jyjn toj yo chi atinac. ⁸ Cuanqueb nabal li xam lochloqueb sa' li na'ajej bar ch'utch'uco cui' toj sa' xben li cab. ⁹ Jun li saj al, aj Eutico xc'aba', c'o'jc'o sa' li ventana. Xban nak quinajto' k'o'jyjn laj Pablo chi atinac, quicube xcuara laj Eutico, ut quit'ane' chak sa' rox tasal li cab. Toj tak'a quinak. Ut camenak chic nak que'xcuaclesi. ¹⁰ Laj Pablo quicube tak'a, quixc'utzub rib sa' xben li al, quixk'alu ut quixye reheb: — Meq'ue ec'a'ux. Yo'yo, chan. ¹¹ Quitake' cui'chic, quixjachi li caxlan cua, ut que'cua'ac. Ut qui-oc cui'chic chi atinac. Ac xsakeu chic nak quixcanab atinac. Chirix a'an qui-el sa' xyankeb ut co. ¹² Ut li al yo'yo nak que'xc'am. Ut c'ajo' nak quisaho' sa' xch'oleb. ¹³ Lao coo toj Asón chiru ha' chixc'ulbal laj Pablo. A'an co chi ch'och'el xban nak jo'can quiraj. ¹⁴ Nak cocuulac Asón kanume'c'am laj Pablo ut coo Mitilene. ¹⁵ Sa' xcab li cutan coo chiru ha' ut cocuulac sa' xca'yabal Quío. Jo' cuulajak chic co-el aran ut cocuulac aran Samos. Ut coxohilank sa' li tenamit Trogilio. Toj sa' li cutan jun chic cocuulac Mileto. ¹⁶ Laj Pablo ac cuan sa' xch'ol nak inc'a' tanumek' Efeso re nak inc'a' tabayk Asia. Yo chixsebanquil rib xban nak taraj cuanc sa' li nink'e Pentecostés aran Jerusalén.

Laj Pablo quixchak'rabiheeb li neque'c'amoc be sa' xyankeb laj pabanel aran Efeso

¹⁷ Nak toj cuan Mileto quixtakla chak xbokbaleb li nequec'amoc be sa' ryankeb laj pabanel aran Efeso re te'xic riq'uin. ¹⁸ Ut nak que'cuulac riq'uin aran Mileto, quixye reheb: —Laex nequenau nak chalen cuoquic Asia sa' xyalal cuanquin sa' eyank. ¹⁹ Nak yoquin chi c'anjelac chiru li Kaçua' quincubsi incuanquil ut quinyabac xban li raylal ut li yalec' li quichal sa' inben xbaneb laj judío. ²⁰ Lain xinch'olob chi tz'akal li xyalal cheru. Mac'a' xinmuk cheru. Quinch'olob ban xyalal chiruheb li tenamit jo' ajcui' sa' eb li cab. ²¹ Yoquin chixjulticanquil chiruheb laj judío ut chiruheb li maçua'eb aj judío, nak te'xyot' xch'ol ut te'xjal xc'a'ux chiru li Dios ut te'pabank sa' xc'aba' li Kaçua' Jesucristo. ²² Anakcuan tenebanbil sa' inben xban li Santil Musik'ej xic Jerusalén. Ut inc'a' ninnau c'a'ru tinc'ul aran. ²³ Ca'aj cui' ninnau nak li Santil Musik'ej quixc'ut chicuu nak sa' li junjünk chi tenamit tinnumek' cui', tinc'ul raylal ut tine'xq'ue sa' tz'alam. ²⁴ Abanan lain maç'a' ninxucua, chi moco ninra lin yu'am chok' cue injunes. Abanan nacujaj nak tinchoy lin c'anjel chi sa sa' inch'ol. Ut ninnau nak taklanbilin xban li Kaçua' Jesús chixyebal resil li evangelio li quixq'ue li Dios xban li rusilal. ²⁵ Lain xinch'olob chak xyalal lix nimajcual cuanquilal li Dios sa' eyank laex. Ut ninnau ajcui' nak ma jun chic ere laex tailok cuu. ²⁶ Jo'can nak anakcuan lain ninye ere nak lain maç'a' inmaç cui laex inc'a' texcolek', ²⁷ xban nak ac xinch'olob chi tz'akal re ru li na'leb li taklanbilin cui' xban li Dios. ²⁸ Jo'can nak ilomak erib chi us laex ut ilomakeb laj pabanel li xe'q'uehe' cheril xban li Santil Musik'ej, li quixlok'eb riq'uin lix lok'laj quiq'uel. Cherilak laj pabanel jo' nak naril chi us lix carner li pastor. ²⁹ Lain ninnau nak tinelk sa' eyank, chanchanakeb laj xoj nak te'chalk li jalaneb xna'leb chixpo'bal ru le pabal. Eb a'an inc'a' te'ril xtok'obal eru. ³⁰ Ut sa' eyank ajcui' laex cuankeb li te'oc chixyebal c'a'ak re ru inc'a' yal re xk'unbesinqueleb laj pabanel re te'xic chirixeb. ³¹ Yo'on cuankex ut chijulticok' ere nak chiru oxib chihab, chi k'ek chi cutan yoquin chi yabac ut inc'a' xinhilan chixch'olobanquil ena'leb chejunjunktal. ³² Anakcuan ut ex herman, texink'axtesi sa' ruk' li Dios ut li ratin li quixq'ue chak ere xban lix rahom chitenk'ank ere chi q'uic sa' le pabal. Ut a'an ajcui' taq'uehok ena'aj sa' ryankeb li sic'bileb ru xban li Dios. ³³ Laex nequenau nak lain inc'a' xinrahi ru lix tumin jalan, chi moco lix biomal, chi moco li rak'eb. ³⁴ Ut nequenau ajcui' nak lain xinc'anjelac riq'uin cuuk' re xsic'bal li c'a'ru cue jo' ajcui' li c'a'ru reheb li cuanqueb cuochben. ³⁵ Riq'uin chixjunil li xinbanu, xinc'ut cheru chanru xtenk'anqueleb li te'raj tenk'ac. Chijulticok' ke li quixye li Kaçua' Jesús: K'axal us li q'uehoc chiru li c'uluc, chan. ³⁶ Ut nak quirake' chixyebal chixjunil a'in, laj Pablo quixcuik'ib rib ut qui-oc chi tijoc rochbeneb chixjunileb. ³⁷ C'ajo' nak que'yabac chixjunileb. Que'xk'alu laj Pablo ut que'rutz' ru. ³⁸ C'ajo' xrahil que'rec'a nak que'rabi li atin li quixye laj Pablo nak inc'a' chic te'ril ru. Ut nak co, coxe'xcanab chak chire li palau cuan cui' li jucub.

21

Eb laj pabanel que'xye re laj Pablo nak inc'a' raj taxic Jerusalén

¹ Nak coe'xcanab laj pabanel chire ha', co-oc sa' li jucub ut coo toj Cos. Ut sa' xcab li cutan cocuulac Rodas. Chirix chic a'an, cocuulac Pátara. ² Aran quirkatau jun li jucub xic re Fenicia. Co-oc chi sa' ut coo. ³ Nak yoco chi xic Siria conume' sa' xjayal li tenamit Chipre, li nacana sa' katz'e. Chirix chic a'an cocuulac Tiro ut aran quicanaban ik li jucub. ⁴ Aran katauheb cuib oxib laj pabanel ut cocana cuukub cutan riq'uineb. Ut eb laj pabanel que'xye

re laj Pablo nak quic'ute' chiruheb xban li Santil Musik'ej nak inc'a' taxic Jerusalén. ⁵ Nak ac xnume' li cuukub cutan, co-el sa' li tenamit Tiro ut cōo. Ut que'cōeb laj pābanel chikacananbanquil rochbeneb li rixakil ut lix coc'aleb. Nak cocuulac chire li palau, cocuik'la ut co-co chi tijoc. ⁶ Nak corake' chi tijoc, quikachak'rabiheb ut cōo sa' li jucub. Ut eb a'an que'suk'i cui'chic sa' li rochocheb. ⁷ Nak cocuulac Tiro corake' chi bec chiru ha' ut cōo sa' li tenamit Tolemaida. Quikaq'ue xsahil xch'ōleb laj pābanel li cuanqueb aran ut cocana jun cutan riq'uineb. ⁸ Jo' cuulajak chic cōo Cesarea. Nak cocuulac aran, cōo sa' rochoch laj Felipe laj yehol resil li colba-ib. A'an jun reheb li cuukub li que'siq'ue' ruheb Jerusalén re te'xtenk'ahēb li apóstol. ⁹ A'an cuan cahib xrabīn toj tuk' ixeb. Eb li xka'al a'an neque'yehoc rātin profeta. ¹⁰ Ac cuan cutan kacuulajic aran Cesarea nak quicuulac jun profeta quichal chak Judea, aj Agabo xc'aba'. ¹¹ Li cuṽnk a'an quicuulac chikilbal. Quixchap lix c'amal xsa' laj Pablo. Quixbac' li ruk' ut li rok riq'uin. —Jo'ca'in xc'ut chicu li Santil Musik'ej, chan. —Laj echal re li c'amal sa' a'in tabaq'uek' li ruk' ut li rok xbaneb laj judío aran Jerusalén ut tak'axtesjik sa' ruk'eb li maṽua'eb aj judío, chan. ¹² Nak quikabi li c'a'ru quixye, laṽo ut eb li cuanqueb aran quikat'ama chiru laj Pablo nak inc'a' taxic Jerusalén. ¹³ Abanan laj Pablo quichak'oc ut quixye ke: —¿C'a'ut nak yoṽquex chi yabac ut chixq'uebal xrahil inch'ol? Lain cau inch'ol, moco ca'aj cui' ta re tinbaq'uek'. Re aj ban cui' nak tincamsik aran Jerusalén sa' xc'aba' li Kaṽua' Jesús, chan. ¹⁴ Laṽo inc'a' coru chixjalbal ru lix c'a'ux laj Pablo. Jo'can nak maṽca' chic kaye re. Chi-uxk ta jo' naraj li Kaṽua', chanco.

Laj Pablo cōo Jerusalén chirilbal laj Jacobo li nac'amoc be chiruheb laj pābanel

¹⁵ Chirix chic a'an quikacauresi kib ut cōo Jerusalén. ¹⁶ Cuanqueb aj pābanel aj Cesarea cōeb chikix. Quikac'ameb sa' li rochoch laj Mnasón Chipre xtenamit. Ac najter aj pābanel. Ut aran cohilan. ¹⁷ Nak cocuulac Jerusalén, eb laj pābanel coe'xc'ul chi saheb sa' xch'ol. ¹⁸ Jo' cuulajak chic laj Pablo cōo chirilbal laj Jacobo ut laṽo cōo chirix. Ac ch'ut'ch'uṽqueb aran chixjunileb li neque'c'amoc be sa' xyankeb laj pābanel. ¹⁹ Ut nak ac xq'ueheb xsahil xch'ol, laj Pablo quixserak'i reheb chixjunil li quixbanu li Dios sa' xyankeb li maṽua'eb aj judío nak yo chi c'anjelac sa' xyankeb. ²⁰ Nak que'rabi a'in que'xbantioxi chiru li Dios. Ut que'xye re laj Pablo: —Laṽt nacacuil, at herman, jarub mil eb laj judío ac xe'pāban. Ut chixjunileb a'an neque'xq'ue xch'ol chixbanunquil li naxye li chak'rab. ²¹ Ac xe'rabi resil nak laṽt yoṽcat chixc'utbal chiruheb laj judío, li cuanqueb sa' xyankeb li maṽua'eb aj judío, nak inc'a' te'xbanu li circuncisión reheb li ralaṽ xc'ajol, chi moco te'xbanu li c'a'ru c'aynakeb xbanunquil laj judío. ²² ¿C'a'ru takabanu? Anakcuan te'rabi resil nak laṽt cuancat arin. ²³ Banu li c'a'ru yoṽco chixyebal aṽue. Cuanqueb cahib chi cuṽnk sa' kayank te'rakek' xbanunquil li c'a'ru que'xyechi'i chiru li Dios. ²⁴ C'ameb li cuṽnk a'in chaṽcuix. Aṽuochbenakeb nak tabanu li c'a'ru tento xbanunquil xban nak inc'a' tento te'xbanu li circuncisión. Li c'a'ru tento te'rabi li Dios. Taṽch'ajobresi aṽuib laṽt ut taq'ue chi besec' li rismaleb ut tatoj lix besaleb. Chi jo'can te'xq'ue retal nak moco yaṽ ta li yoṽqueb chixyebal chaṽcuix. Banu chi jo'can re nak te'xnau nak inc'a' yoṽcat chixk'etbal li chak'rab. ²⁵ Ac xotz'ibac riq'uineb li que'pāban sa' xyankeb li maṽua'eb aj judío. Ac xkatakala xyebal reheb nak inc'a' tento te'xbanu li circuncisión. Li c'a'ru tento te'xbanu, a'an a'in: inc'a' naru te'xtzaca li tzacaemk mayejanbil chiruheb li yibanbil dios, chi moco te'xtzaca li quic', chi moco te'xtiu xtibel li yatz'bil xul.

Ut inc'a' te'co'betak te'yumbetak, chanqueb re laj Pablo. ²⁶ Cuulajak chic laj Pablo quixc'ameb li cahib chi cuñk chirix. Ut quixch'ajobresi rib rochbened nak qui-oc sa' li templo chixyebal reheb c'a'ru cutanquil te'xq'ue lix mayej li junjnk re nak tatz'aklok ru li xch'ajobresinquil ribeb li que'xbanu.

Laj Pablo quichape' sa' li templo xbaneb laj c'amol be sa' xyankeb laj Judío

²⁷ Nak ac numec' re li cuukub cutan, cuanqueb laj judío que'chal chak Asia. Nak que'ríl laj Pablo sa' li templo, que'josk'o' ut que'xtiquib jun li ch'a'ajquilal sa' li tenamit ut que'xchap laj Pablo. ²⁸ Japjoqueb re chixyebal: —Ex aj Israel, choetenk'a. A'an a'in li cuñk li napo'oc xna'lebeb li tenamit yalak bar chixtz'ektanquil li katenamit, jo' ajcui' li chak'rab li quixq'ue ke laj Moisés. Ut naxtz'ektana li templo a'in. Jo' cui' anchal xrocsiheb li maçua'eb aj judío sa' li templo ut riq'uín a'an, xmux ru li Santil Na'ajej, chanqueb. ²⁹ Que'xye a'an xban nak que'ríl ru laj Tróximo aj Efeso chirochbeninquil sa' li tenamit. Sa' xch'oleb a'an nak laj Pablo qui-ocsin re laj Tróximo sa' li templo. ³⁰ Jo'can nak k'axal cui'chic quichal xjosk'ileb li tenamit. Japjoqueb re nak que'xchap laj Pablo ut quelonbil que'xbanu re, nak que'risi sa' li templo. Ut que'xtz'ap li oquebal chi junpat.

Eb laj Roma que'xcol laj Pablo chiruheb laj judío

³¹ Oqueb raj re chixcamsinuil nak quiehe' chak re li coronel nak chixjunil li tenamit Jerusalen yoqueb chixmulunuil ribeb xbaneb xjosk'il. ³² Ut li coronel quixc'ameb nabal li soldado chirix jo' ajcui' li cuanqueb xcuanquil sa' xbeneb li soldado, ut coeb sa' anil bar ch'utch'uqueb cui' li tenamit. Nak li tenamit que'ríl li coronel rochbened chak li soldado, que'xcanab xtacuasinquil laj Pablo. ³³ Ut li coronel quixchap laj Pablo. Quixtakla xbac'bal riq'uín cuib chi cadena. Ut quixpatz' ani a'an ut c'a'ru xmaç. ³⁴ Ut li tenamit jalan jalan yoqueb chixyebal ut inc'a' nach'ola ru li c'a'ru yoqueb chixyebal. Li coronel quiril nak inc'a' quixtau c'a'ru tz'akal xmaç. Quixtakla xcanabanuil laj Pablo sa' li cuartel. ³⁵ Nak que'cuulac cuan cui' li gradas, pakpo nak quic'ame' xbaneb li soldado xban nak li tenamit yoqueb xjosk'il sa' xben ut inc'a' neque'xcanab chi numec'. ³⁶ Li q'uila tenamit yoqueb chi xic chirixeb ut japjoqueb re chixyebal: —jCamsihomak li cuñk a'an! chanqueb.

Laj Pablo quiatinac re xcolbal rib

³⁷ Nak ac oqueb re chirocsinquil sa' li cuartel laj Pablo, quixye re li coronel: —¿Ma taruk tatcuatina junpatak?— Ut li coronel quixye: —Nacanau pe' atinac sa' li atinobal griego. ³⁸ ¿Ma maçua' laät li cuñk laj Egipto li quitiquiban jun ch'a'ajquilal inc'a' mas najter? ¿Ma maçua' laät catc'amoc reheb li cahib mil chi cuñk aj camsinel sa' li chaki ch'och'? chan. ³⁹ Quichak'oc laj Pablo ut quixye: —Inc'a'. Lain aj judío. Yo'lajenakin sa' li tenamit Tarso li cuan xcuent Cilicia. Na'no ru lin tenamit. Tintz'ama chaçuu nak tinacanab chiratinanquileb li tenamit, chan. ⁴⁰ Ut nak qui'uehe' xlesens chi atinac xban li coronel, laj Pablo quixakli sa' li gradas. Quixtaksi li ruk' re nak te'xcanab chokinc. Ut nak que'xcanab chokinc, laj Pablo qui-oc chi atinac sa' ratinobaleb laj judío ut quixye reheb:

22

¹ Ex cuas cuitz'in, ut laex li nequexc'amoc be sa' xyankeb laj judío. Abihomak li tinye ere anakuan re xcolbal cuib, chan. ² Que'rabi nak yo chiratinanquileb sa' ratinobaleb. Que'xcanab chokinc ut que'rabi li c'a'ru quixye. Ut laj Pablo qui-oc chi atinac. ³ —Relic chi yal nak lain aj judío. Yo'lajenakin Tarso xcuent Cilicia. Ut arin quinq'ui Jerusalén. Quintzol cuib

riq'uin laj Gamaliel chirix li chak'rab li quiq'uehe' chak reheb li kaxe'tonil yucua'. Chi anchal inch'ol ninq'ue xlok'al li Dios jo' yoquex laex anakcuan. ⁴ Xic' neque'cuil li neque'paban re li aq'uil na'leb a'in toj retal quinq'ueheb chi camsic. Quinchapeb ut quinq'ueheb sa' tz'alam, jo' cujnk jo' ixk. ⁵ Li xbenil aj tij, jo' ajcui' eb li neque'taklan sa' xyankeb laj judío, neque'xnau nak tz'akal yal li yoquin chixyebal. Eb a'an que'xq'ue jun li hu cue retalil nak que'xq'ue inlesens chixchapbaleb laj pabanel li cuanqueb Damasco, ut tinc'ameb chak chi prexil arin Jerusalén re te'rahobtesik.

Laj Pablo quixserak'i reheb chanru nak quipaban

⁶ Abanan nak ac cuulac cue Damasco, ca'ch'in na chic ma' cua'leb, ma'c'a' sa' inch'ol nak quinixsut jun li chanchan xam k'axal saken quichal chak sa' choxa. ⁷ Quint'ane' chi ch'och' ut quicuabi jun xyab cuz quixye cue, “At Saulo, at Saulo, ¿c'a'ut nak yocat chinrahobtesinquit?” chan cue. ⁸ Lain quinchak'oc ut quinye, “¿Anihat laa, Ka'cua'?” chanquin. Ut a'an quixye cue, “Lain li Jesús laj Nazaret li yocat chixrahobtesinquit.” chan cue. ⁹ Li cuanqueb cuochben que'ril chi tz'akal li chanchan xam ut c'ajo' nak que'xucuac. Abanan inc'a' que'rabi li atin li quiyeh' cue. ¹⁰ Quinpatz' re, “Ka'cua', ¿c'a'ru ta'cuaj tinbanu?” Ut li Ka'cua' quixye cue, “Cuaclin. Ayu Damasco ut aran tayehek' acue chixjunil li c'a'ru tenebanbil sa' aben re tabanu,” chan. ¹¹ Ut lain inc'a' chic nin-iloc xban nak k'axal nalemtz'un li chanchan xam. Ch'ilonbilin aj chic xbaneb li cuanqueb cuochben nak cojn toj Damasco. ¹² Jun li cujnk aj Ananías xc'aba' quicuulac chicuilbal. Naxbanu jo' naxye li chak'rab li quiq'uehe' re laj Moisés. Chabil neque'xyc chirix li cujnk a'an chixjunileb laj judío li cuanqueb aran. ¹³ Nak quicuulac cuanquin cui', quixakli chinc'atk ut quixye cue, “At hermano Saulo, chat-ilok cui'chic,” chan cue. Ut sa' ajcui' li honal a'an qui-iloc cui'chic li xnak' cuu ut quicuul ru laj Ananías. ¹⁴ Ut quixye cui'chic cue, “Li Dios li que'xlok'oni chak li kaxe'tonil yucua', a'an quisic'oc chak acuu re nak tanau ut tabanu li c'a'ru naraj a'an. A'an naraj nak ta'cuil ru li jun li Tjic Xch'ol ut ta'cuabi li c'a'ru tixye acue. ¹⁵ Laa' taye reheb chixjunileb li c'a'ru xacuabi ut li c'a'ru xacuul. ¹⁶ ¿C'a'ut nak nacabay acuib? Cuaclin. Li Dios tixcuy tixsach la' ma'c nak ta'yaba lix c'aba'.” Ut c'ul li cubi ha',” chan cue. ¹⁷ Chirix chic a'an, quinsuk'i cui'chic Jerusalén. Nak yoquin chi tijoc sa' li templo, quic'utbesic' chicuu jun li visión. ¹⁸ Ut quicuul li Ka'cua' nak quixye cue, “Seba acuib. Elen chi junpat arin Jerusalén xban nak arin Jerusalén inc'a' te'raj rabinquit li xyalal li ta'ch'olob chiruheb chicuu lain,” chan cue. ¹⁹ Lain quinye re, “At Ka'cua', chixjunileb neque'xnau nak lain cojn sa' li junjnk chi cab li neque'xch'utub cui' ribeb laj judío chixchapbaleb laj pabanel re nak te'q'uehek' sa' tz'alam ut te'saq'uek'.” ²⁰ Nak que'xcamsi laj Esteban li quich'oloban li xyalal cha'cuix, lain cuanquin ajcui' aran. Yoquin chiribal ut quisaho' inch'ol riq'uin lix camic. Ut lain ajcui' quin-iloc re li rak'eb li que'camsin re,” chanquin re. ²¹ Ut li Ka'cua' quixye cue, “Ayu xban nak lain ta'tintakla chi najt sa' xyankeb li ma'cua'eb aj judío,” chan cue, chan laj Pablo. ²² Ut nak li tenamit que'rabi nak taxic riq'uineb li ma'cua'eb aj judío, c'ajo' nak que'po'. Inc'a' chic que'xcuy rabinquit xban nak yo' xjosk'ileb. Ut japoqueb reheb chixyebal: —Camsihomak li cujnk a'in. Inc'a' us nak yo'yok, chanqueb. ²³ Yoqueb chixjapbal reheb ut yoqueb chixk'ichbal li rak' ut yoqueb chixcutbal li poks sa' ik' xban xjosk'ileb. ²⁴ Ut li coronel quixtaklaheb li soldado re te'xc'am sa' cuartel laj Pablo. Quixye reheb nak te'xsac' re nak tixye xyalal c'a'ut nak japoqueb reheb li tenamit chixyebal chi jo'can. ²⁵ Nak ac xe'xbac', laj Pablo quixye re li capitán li cuan aran: —¿C'a'ru naxye

li chak'rab? ¿Ma naru xsac'bal junak cuṅk aj Roma chi toj maji' rakbil atin sa' xben? chan. ²⁶ Quisach xch'ol li capitán nak quirabi li c'a'ru quixye laj Pablo. Cq sa' anil ut quixye re li coronel: —¿C'a'ru tapanu riq'uin li cuṅk a'in? A'an tz'akal aj Roma, chan. ²⁷ Ut quichal li coronel ut quixye re laj Pablo: —Ye cue li xyalal. ¿Ma laät aj Roma?— Ut laj Pablo quixye re: —Lain.— ²⁸ Quichak'oc li coronel ut quixye: —Lain nabal li tumin xing'ue re nak tinc'ulek' chok' aj Roma, chan. Ut laj Pablo quixye re: —A'ut lain chalen chak sa' inyo'lajic, lain ajcui' chak aj Roma, chan. ²⁹ Jo'can nak que'xcanab laj Pablo xjunes. Inc'a' chic que'xrahobtesi. Jo'can ajcui' li coronel. Qui-oc xxiu nak quixnau nak laj Pablo a'an tz'akal aj Roma xban nak que'xbac' riq'uin cadena.

Laj Pablo quic'ame' chiruheb li neque'taklan sa' xbeneb laj judío

³⁰ Jo' cuulajak chic li coronel quixtakla xhitbal lix bac'bal laj Pablo. Ut quixtakla xbokbaleb lix benil aj tij ut eb li neque'taklan sa' xbeneb laj Judío ut quixxakab laj Pablo chiruheb. Quiraj xtaubal xyalal chi tz'akal c'a'ru xmac laj Pablo nak yo' xjitbal xbaneb laj judío.

23

¹ Laj Pablo quixca'yaheb li neque'taklan sa' xbeneb laj judío ut quixye reheb: —Ex cuech tenamitil, lain c'ojc'o inch'ol riq'uin li xinbanu chiru li Dios chalen toj sa' li cutan anakcuan, chan. ² Laj Ananías li xyucua'il aj tij quixye reheb li cuanqueb chixc'atk laj Pablo nak te'xsac' sa' re. ³ Ut laj Pablo quixye re: —A' li Dios tasac'ok acue laät. Chanchanat jun li tz'ac bonbil ru. Laät chunchucac'at aran chi rakoc atin sa' inben jo' naxye li chak'rab. Ut laät xak'et li chak'rab nak xatakla insac'bal, chan. ⁴ Eb li cuanqueb chixc'atk que'xye re: —Laät yocac'at chixhobbal li xyucua'il aj tij li nac'anjelac chiru li Dios, chanqueb. ⁵ Quichak'oc laj Pablo ut quixye reheb: —Ex cuech tenamitil, chinecuy, inc'a' ninnau nak a'an ta xyucua'il aj tij. Tz'ibanbil retalil sa' li Santil Hu naxye chi jo'ca'in: Inc'a' tatz'ektana li nataklan sa' le tenamit. (Ex. 22:28) ⁶ Nak quixq'ue retal laj Pablo nak sa' xyankeb li ch'utch'uqueb aran cuanqueb aj saduceo ut cuanqueb ajcui' aj fariseo, quixye reheb chi cau xyab xcux: —Laex aj judío, cuech tenamitil, lain aj fariseo. Ut aj fariseo ajcui' inyucua'. Xban nak ninpab nak te'cuaclik' cui'chic chi yo'yo li camenak, jo'can nak yo' xrakbal atin sa' inben lain, chan laj Pablo. ⁷ Ut nak quixye a'in, inc'a' chic junaj xc'a'uxeb laj fariseo ut eb laj saduceo ut que'oc chixcuech'inquil rib. ⁸ Eb laj saduceo inc'a' neque'xpab nak neque'cuaclic' cui'chic chi yo'yo li camenak, chi moco neque'xpab nak cuan ángel, chi moco neque'xpab nak cuan Musik'ej. Abanan eb laj fariseo neque'xpab chixjunil a' c'a'ak re ru a'in. ⁹ Ut neque'xejejnac chixcuech'inquil ribeb. Ut eb laj tz'ib xcomoneb laj fariseo yoqueb chixcolbal rix laj Pablo. —Ma jun mac nakatau chirix li cuṅk a'in. Mare anchal junak musik'ej, mare anchal junak ángel x-atinan re. Inc'a' naru topletik riq'uin li Kacua', chanqueb. ¹⁰ K'axal cui'chic que'xcuech'i ribeb. Quichal xxiu li coronel ut quixc'oxla nak mare te'xpedasi laj Pablo. Quixbokeb li soldado ut quixtaklaheb chiringuil laj Pablo chiruheb re te'xc'am cui'chic sa' li cuartel. ¹¹ Chiru li jo'jyin a'an li Kacua' quixc'ut rib chiru laj Pablo ut quixye re: —Cauhak ach'ol, at Pablo. Jo' nak xach'olob li yal chicuix arin Jerusalén, jo'can ajcui' nak toxach'olob li yal chicuix aran Roma, chan.

Eb laj c'amol be sa' xyankeb laj judío que'xc'ub ru chanru nak te'xcamsi laj Pablo

¹² Cuulajak chic cuanqueb laj judío que'xch'utub ribeb ut que'xc'ub ru c'a'ru te'xbanu. Que'xye riq'uin juramento nak inc'a' te'cua'ak chi moco te'uc'ak cui inc'a' te'xcamsi laj Pablo. ¹³ Numenakeb na ca'c'al chi cuink li que'xc'ub ru xcamsinquil laj Pablo. ¹⁴ Que'coeb riq'uineb li xbenil aj tij ut riq'uineb li neque'c'amoc be sa' xyankeb laj judío ut que'xye reheb: —Lao xkac'ub kib ut xkabanu li juramento nak inc'a' totzacank cui inc'a' takacamsi laj Pablo. ¹⁵ Jo'can nak laex rochbeneb li neque'taklan sa' xbeneb laj judío yehomak re li coronel nak tixtakla chak arin laj Pablo cuulaj. Ye re nak teraj tenau tz'akal xyalal chirix. Lao ac xkacauresi kib re nak takacamsi nak toj maji' nac'ulun arin, chanqueb. ¹⁶ Ut lix yum li ranab laj Pablo quirabi li c'a'ru yoqueb chixc'ubanquil. Co riq'uin laj Pablo sa' cuartel ut quixserak'i re li c'a'ru yoqueb chixc'ubanquil chirix. ¹⁷ Jo'can nak laj Pablo quixbok jun li capitán ut quixye re: —C'am li al a'in riq'uin li coronel xban nak cuan c'a'ru tixye re, chan. ¹⁸ Ut li capitán quixc'am li al riq'uin li coronel ut quixye: —Laj Pablo li prex xinixbok ut xtz'ama chicuu nak tinc'am chak acuiq'uin li al a'in. Cuan c'a'ru tixye acue, chan. ¹⁹ Ut li coronel quixchap chi ruk'. Quixc'am xjunes ut quixpatz' re: —¿C'a'ru tacuaj xyebal cue? chan re. ²⁰ Ut li al quixye: —Eb laj judío xe'xc'ub ribeb re xtz'amanquil chacuu nak tatakla cuulaj laj Pablo re taxic chiruheb li neque'taklan sa' li templo. Xe'xye nak toj cuan c'a' re ru te'raj te'xtau xyalal chirix. A'an moco yal ta. Raylal ban te'raj xbanunquil re. ²¹ Mabanu c'a'ru te'xye xban nak numenak ca'c'al chi cuink te'ramok re sa' be re xcamsinquil. Eb a'an que'xc'ub rib. Que'xbanu li juramento ut que'xye nak inc'a' te'cua'ak chi moco te'uc'ak cui inc'a' te'xcamsi laj Pablo. Anakcuan yoqueb chiroybeninquil c'a'ru taye laät, chan li al. ²² Ut li coronel quixchak'rabi li al ut quixye re nak ma'ani aj e tixye li c'a'ru quixye resil re.

Laj Pablo quic'ame' chiru laj Félix li acuabej

²³ Li Coronel quixtakla xc'ambal cuib li capitán ut quixye reheb nak te'xcauresi cuib ciento chi soldado, ut lajeb xcac'al li te'xic chirix cacuay ut cuib ciento li cuanqueb xlan re te'xic toj Cesarea sa' beheb or re k'ojoyin. ²⁴ Ut quixye ajcui' nak te'xcauresi li cacuay li taxic cui' laj Pablo. Te'ril chi us re nak mac'a' tixc'ul nak te'xc'am riq'uin laj Félix li acuabej. ²⁵ Ut quixtz'iba ajcui' jun li hu re tixtakla chirixeb. Naxye chi jo'ca'in: ²⁶ Lain laj Claudio Lisias. Nintakla xsahil ach'ol, at acuabej Félix. Laät li k'axal nim acuanquil. ²⁷ Li cuink a'in li yoquin chixtaklanquil acuiq'uin quichape' xbaneb laj judío. Oqeb raj re chixcamsinquil nak quebintau ut quinmak' chiruheb lain cuochbeneb li soldado xban nak quinq'ue retal nak a'an tz'akal aj Roma. ²⁸ Ut quicuj raj xnaubal c'a'ru xmac nak yoqueb chixchapbal. Jo'can nak quinc'am chiruheb li neque'taklan sa' xyankeb laj judío. ²⁹ Lain quiq'ue retal nak yoqueb chixjitbal yal xban lix chak'rabeb a'an. Ninnau nak mac'a' xmac re te'xcamsi, chi moco re te'xq'ue sa' tz'alam. ³⁰ Ut xcuabi ajcui' resil nak eb laj judío que'xc'ub ru chanru nak te'xcamsi. Jo'can nak quintakla chi junpat acuiq'uin. Xinye ajcui' reheb li yoqueb chi jitoc chirix nak te'xye acue c'a'ru xmac. Chacuil acuib, chan re li acuabej sa' li hu li quixtakla laj Claudio. ³¹ Eb li soldado que'xc'am laj Pablo jo' quiyeh' reheb. Que'xc'am chi k'ek toj sa' li tenamit Antipatris. ³² Ut sa' li cutan jun chic eb li soldado li que'coeb chi rok que'suk'i cui'chic sa' li cuartel. Ut eb li cuanqueb chirix cacuay que'coeb riq'uin li acuabej chixcanabanquil laj Pablo. ³³ Nak que'cuulac Cesarea, que'xk'axtesi li hu re li acuabej, ut que'xk'axtesi ajcui' laj Pablo. ³⁴ Ut li acuabej nak quiril xsa' li hu, quixpatz' re laj Pablo bar xtenamit. Nak quirabi

nak a'an aj Cilicia, quixye re: ³⁵—Chalkeb cuan laj jitol açue, tojo'nak takabi c'a'ru açuac, chan re. Ut quixtakla laj Pablo sa' rochoch laj Herodes. Aran que'xtz'ap sa' jun li na'ajej ut que'xc'ac'ale re nak inc'a' taçelelik.

24

Laj Pablo quiqatinac re xcolbal rib chiru laj Félix

¹ Nak ac xnume' chic ob cutan, quicuulac Cesarea laj Ananías li xyucua'il aj tij. Cuanqueb rochben cuib oxib li neque'c'amoc be sa' xyankeb laj judío, ut cuan jun naatinac chirixeb, aj Tértulo xc'aba'. Que'cuulac riq'uin li acuabej chixjitbal laj Pablo. ² Nak quic'ame' laj Pablo, laj Tértulo qui-oc chixjitbal laj Pablo chiru laj Félix li acuabej ut quixye: —Kacua' Félix, sa' aç'aba' la'at cuanco sa' tuktuqu'il usilal. Xban nak chàbil nacattaklan sa' kabèn, jo'can nak yoco chi usaç sa' li katenamit. ³ Riq'uin a'in nasaho' kach'ol chikajunilo yalak bar sa' li na'ajej a'in. Ut nakabantioxi chàcuu, at acuabej Félix. ⁴ Nintz'ama chàcuu nak tabanu usilal ke. Taçuabi taxak li oc ke chixtz'amanqu'il chàcuu. Junpat ajcui' tatkach'i'ch'i'i. ⁵ Lao xkaq'ue retal nak li cu'ink a'in k'axal yibru xna'leb. Naxtiqub ra xic' sa' xyankeb chixjunileb laj judío sa' chixjunil li ruchich'och'. Ut a'an najolomin re li jun ch'utal aj Nazareno neque'xye re. ⁶ Quiraj raj xmuxbal ru li katemplo. Jo'can nak xkachap, ut quikaj raj xrakbal atin sa' xben jo' naxye li kachak'rab. ⁷ Abanan laj Lisis li coronel qui-ouen chirix ut sa' josk'il quixmak' chiku. ⁸ A'an quixye nak laj jitol re tento te'chalk açuiq'uin. Taruk ajcui' tapatz' re a'an re tanau chi tz'akal li c'a'ru yoco chixjitbal cui', chan. ⁹ Ut eb laj judío li que'cuulac rochben, que'xye nak yal li yo' chixyebal laj Tértulo. ¹⁰ Ut li acuabej quixbok laj Pablo ut quixye re nak taatinac. Ut laj Pablo quixye: —Lain ninnau nak nabal chihab açuoguc chok' aj rakol atin sa' li tenamit a'in. Jo'can nak chi maç'a' inc'a'ux titye li c'a'ru tincol cui' cuib. ¹¹ La'at naru tattz'ilok atin chirix li titye. Cablaju cutan anakuan inc'ulunic chi tijoc aran Jerusalén. ¹² Lain inc'a' yoquin chixyo'obanqu'il ra xic' sa' xyankeb li tenamit. Ma' ani nintacchi'i, chi moco sa' li templo, chi moco sa' li cab li neque'xch'utub cui' ribeb laj judío, chi moco sa' li tenamit. ¹³ Ut eb laj jitol cue inc'a' naru neque'xye nak yal li c'a'ru yoqueb chixyebal xban nak maç'a' junak retalil naru naxc'ut nak yal. ¹⁴ Lain titye xyalal açue. Ninlok'oni li Dios li que'xlok'oni chak li kaxe'tonil yucua'. Ninpab li evangelio li neque'xye nak moco yal ta. Ninpab chixjunil li tz'ibanbil sa' li chak'rab li quiq'uehe' re laj Moisés, jo' ajcui' li que'xtz'iba li profetas. ¹⁵ Lain cau inch'ol chixpabanqu'il li Dios jo' neque'xbanu li yoqueb chi jitoc cue. Lain ninpab ajcui' nak te'cuaclik cui'chic chi yo'yo li camenak, jo' li tiqub xch'ol jo' ajcui' li inc'a' tiqub xch'ol. ¹⁶ Jo'can nak ninq'ue inch'ol chixbanunqu'il li us re nak maç'a'ak inmaç chiru li Dios chi moco chiruheb li cuas çuiz'in. ¹⁷ Q'uila chihab ma' anihin sa' lin tenamit Jerusalén. Jo'can nak xinsuk'i chi mayejac chiru li Dios ut re xq'uebal ca'ch'inak lix tenk'anquileb li neba' li cuanqueb aran. ¹⁸ A'an a'in li yoquin chixbanunqu'il nak quine'xtau sa' li templo laj judío li que'chal chak Asia. Toje' xinrake' xbanunqu'il li c'a'ru quinyechi'i chiru li Dios. Ac xinbanu li nabanuman re xsantobresinqu'il cuib. Moco nocotububnac ta chi moco yoco ta chi yo'obanc ch'a'ajquial. ¹⁹ Eb laj judío li que'chal chak Asia, a'aneb raj li xe'chal arin chinjitbal chàcuu cui cuan ta c'a'ru tine'xjit cui'. ²⁰ Xyehakeb anakuan chàcuu li neque'taklan sa' xbeneb laj judío li cuanqueb arin cui cuan c'a'ru inc'a' us xinbanu nak quine'xc'am chiruheb laj rakol atin. ²¹ Ca'aj cui' a'in lin maç chiruheb: Nak xakxoquin chiruheb, quinye chi cau xyab incux nak te'cuaclik cui'chic chi

yo'yo li camenak. Sa' xc'aba' a'an nak oc ere chixrakbal atin sa' inben, chanquin reheb, chan laj Pablo. ²² Laj Félix ac rabiom resil li pabal a'an. Yal re xbaybaleb nak quixye: —C'ulunk cuan laj Lisias ut tinchoy xtz'ilbal rix li yoqex chixyebal, chan. ²³ Ut quixtakla cui'chic laj Pablo sa' li na'ajej li tz'aptz'o cui' xbaneb. Ut quixtakla ajcui' xyebal re li capitán nak tixq'ue xlesens chiratinanquileb lix comon li jo' q'uial te'raj chalç chirula'aninguil ut chixq'uebal c'a'ru re. ²⁴ Inc'a' chic q'uila cutan chirix a'in nak quicuulac cui'chic laj Félix rochben lix Drusila li rixakil. Li ixk a'an aj judío. Laj Félix quixbok laj Pablo riq'uin re nak tixch'olob chiru chanru xpabanquill li Kacua' Jesucristo. ²⁵ Ut nak laj Pablo yo chixch'olobanquill lix yalal li tiq'uial, li cuyuc ib, ut li rakba atin chalel, quichal xxiu laj Félix. Quixye re laj Pablo. —Anakuan ayu. Nak tixq'ue rib chicuu tintakla cui'chic abokbal, chan. ²⁶ Sa' xch'ol laj Félix nak tatuminak ru xban laj Pablo re taisik sa' tz'alam. Jo'can nak nabal sut quixtakla xbokbal ut quiatinac riq'uin. ²⁷ Xban nak quiraj nak us taçanaç riq'uineb laj judío, jo'can nak quixcanab chi prexil laj Pablo. Nak ac xnume' cuib chihab, laj Félix qui-el chok' acuabej ut qui-oc laj Porcio Festo chok' rekaj.

25

Laj Pablo quic'ame' chiru laj Festo li acuabej li toj qui-oc sa' xcuanquill

¹ Oxib cutan chic roquic chok' acuabej laj Festo, nak qui-el Cesarea ut co toj Jerusalén. ² Ut que'cuulac riq'uin laj Festo eb li xbenil aj tij ut eb li neque'c'amoc be sa' xyankeb laj judío re xjitbal laj Pablo. ³ Que'xtz'ama chiru laj Festo nak tixbanu li usilal, tixtakla cui'chic Jerusalén laj Pablo xban nak que'xc'oxla xrambal sa' be re xcamsinquill. ⁴ Quichak'oc laj Festo ut quixye reheb: —Laj Pablo ac cuan chi prexil aran Cesarea ut c'ac'alenbil chi us. Ut chi seb tinxic lain aran, chan. ⁵ Ut quixye ajcui' reheb: —Eb laj c'amol be sa' eyank te'xic chicuix. Cui cuan xmac li cuink a'in, che'xjitak, chan reheb. ⁶ Quicuan tana chic cuakxakibak malaj ut lajebak cutan chic sa' xyankeb ut quisuk'i Cesarea. Sa' xcab li cutan nak quic'ojla sa' li na'ajej li narakoc cui' atin, quixtakla xc'ambal laj Pablo riq'uin. ⁷ Nak quicuulac, quisute' xbaneb laj judío li que'chal Jerusalén. Junes raylal que'xye chirix laj Pablo nak que'xjit. Abanan inc'a' qui-el chi yal li c'a'ru que'xye xban nak mac'a' junak c'a'ru tixc'ut nak yal li yoqueb chixyebal. ⁸ Ut laj Pablo qui-oc cui'chic chi atinac re xcolbal rib chiruheb ut quixye: —Chi moco lix chak'rabeb laj judío chi moco lix templo li Kacua' quinsach xcuanquill. Chi moco cuan ta junak mac xinbanu chiru li acuabej César, chan. ⁹ Laj Festo quiraj nak us taçanaç riq'uineb laj judío. Jo'can nak quixye re laj Pablo: —¿Ma taçuaç xic toj Jerusalén ut aran tarakmanç atin sa' aben chicuu? chan re. ¹⁰ Laj Pablo quixye: —Cuanquin chiru li rakba atin li cuan sa' xcuent li acuabej César. Jo'can nak arin ajcui' tarakek' atin sa' inben. Ac nacanau ajcui' laaç nak mac'a' inmac chiruheb laj judío. ¹¹ Cui ut cuan junak mac xinbanu re nak tento tine'xcamsi, chine'xcamsihak. Lain inc'a' ninxuca li çamç. Abanan cui inc'a' yal li yoqueb chixyebal chicuix, ma ani taruk tak'axtesink cue sa' ruk'eb a'an. Lain tintz'ama nak li acuabej César li k'axal nim xcuanquill tarakok atin sa' inben, chan laj Pablo. ¹² Ut laj Festo quiatinac riq'uineb laj q'uehol na'leb. Tojo'nak quixye re laj Pablo: —Cui li acuabej César taçuaç tarakok atin sa' aben, naru ajcui' tatintakla riq'uin, chan.

Laj Festo quixserak'i re li rey Agripa li c'a'ru yo chixc'ulbal laj Pablo

¹³ Ac xnume' na chic cuib oxib cutan nak li rey Agripa ut lix Berenice li ranab que'cuulac Cesarea chirula'aninguil laj Festo. ¹⁴ Ac cuan cutan xcuulajiqüeb aran, nak laj Festo quixch'olob chiru li rey li yo chixc'ulbal laj Pablo: —Jun li cuñk quicanabac chi prexil xban laj Félix, chan re. ¹⁵ Ut nak quincuulac Jerusalén que'chal cuiq'uin lix benil aj tij ut eb li neque'c'amoc be sa' xyankeb laj judío. Que'xtz'ama chicuu nak tinrak atin sa' xben ut tinteneb camc sa' xben. ¹⁶ Abanan lain quinye reheb nak eb laj Roma moco c'aynakeb ta chixtenebanquil camc sa' xben junak cuñk yal chi jo'can. Tento nak cuank chiruheb laj jitol re, re nak tixcol rib a' yal c'a'ru tajitek' cui'. ¹⁷ Nak que'c'ulun arin eb laj c'amol be sa' xyankeb laj judío, inc'a' quinbay. Sa' li cutan jun chic ticto cöin sa' li na'ajej li ninrakoc cui' atin. Ut quintakla xc'ambal laj Pablo. ¹⁸ Sa' inch'öl lain nak k'axal nim li mac quixbanu. Abanan nak que'c'ulun arin li yoqueb chi jitoc re, inc'a' que'jitoc chirix jo' quinc'oxla. ¹⁹ Li c'a'ru yoqueb cui' chixjitbal, a'an chirix lix pabaleb, ut chirix jun li cuñk Jesús xc'aba', ac camenak ut laj Pablo naxye nak yo'yo. ²⁰ Lain inc'a' xinnau c'a'ru tinbanu riq'uin li ch'a'ajquilal a'in. Jo'can nak xinpatz' re laj Pablo ma taraj xic Jerusalén ut aran tarakmank atin sa' xben. ²¹ Ut laj Pablo quixtz'ama chicuu nak taroybeni re nak laj César li acuabej li k'axal nim xcuankuil tarakok atin sa' xben. Jo'can nak xintakla cui'chic xtz'appal sa' tz'alam toj tacuulak xk'ehil nak tintakla riq'uin li acuabej César, chan laj Festo. ²² Ut li rey Agripa quixye re laj Festo: —Lain nacuaij raj rabinquil li c'a'ru naxye li cuñk a'an, chan. Ut laj Festo quixye re: —Cuulaj ajcui' naru tacuabi, chan. ²³ Cuulajak chic que'oc sa' li na'ajej li neque'rakoc cui' atin li rey Agripa rochben lix Berenice. K'axal chabil xtikibanquileb. Rochbened li coronel ut eb li ninkeb xcuankuil sa' li tenamit. Ut laj Festo quixtakla xc'ambal laj Pablo. ²⁴ Quixye: —At rey Agripa ut chixjunilex li ch'utch'uquex arin, cue' li cuñk li yoqueb chixjitbal chixjunileb laj judío li cuanqueb arin Cesarea jo'queb ajcui' li cuanqueb Jerusalén. Neque'xjap re chixtz'amanquil chicuu nak tacamsik. ²⁵ Abanan nak xin-oc chi rakoc atin sa' xben xinq'ue retal nak mac'a' xmac re tacamsik. A'an xtz'ama nak li acuabej César tarakok atin sa' xben. Jo'can nak xinye nak tento taxic Roma riq'uin li acuabej. ²⁶ ¿C'a' ta cui' ru tintakla xyebal re li acuabej chirix li cuñk a'in? Jo'can nak xinc'am chak cheru laex ut chacuu laet, at rey Agripa, re nak tetz'il atin chirix. Mare chi jo'can cuan c'a'ru tintakla xyebal chirix. ²⁷ Ninnau nak moco us ta xtaklanquil junak prex chi inc'a' tataklaq xyebal c'a'ru xmac, chan laj Festo.

26

Laj Pablo quiatinac chiru laj Agripa re xcolbal rib

¹ Li rey Agripa quixye re laj Pablo: —Anakuan naru tat-atinac re tacol acuib, chan. Ut laj Pablo quixtaksi li ruk' ut qui-oc chi atinac re tixcol rib. ² Quixye: —At rey Agripa, nasaho' sa' inch'öl nak taruk tinatinac acuiq'uin re tincol cuib chiruheb laj c'amol be sa' xyankeb laj judío li yoqueb chi jitoc cue. ³ K'axal cui'chic us xban nak laet nacanau chixjunil li c'a'ru c'aynakeb xbanunquil eb laj judío ut nacanau chanru lix na'lebeb. Jo'can ut nak nintz'ama chacuu nak tacuy rabinquil li c'a'ru oc cue xyebal. ⁴ Chixjunileb laj judío neque'xnuu chanru lin yu'am nak xincuan chak sa' lin tenamit chalen chak sa' insajilal ut toj anakuan. Jo'can ajcui' aran Jerusalén neque'xnuu cuu. ⁵ Eb a'an neque'xnuu cuu chalen chak sa' inca'ch'inal. Cui te'raj, taruk te'xch'olob xyalal chicuix. Lain aj fariseo xcomoneb li neque'xq'ue xch'öl chixbanunquil chixjunil li naxye sa' li chak'rab jo' naraj

li kapabal. ⁶ Ut anakcuan laex yoquex chi rakoc atin sa' inben yal xban nak yoquin chiroybeninquil li quixyechi'i chak li Dios junxilaj reheb li kaxe'tonil yucua'. ⁷ Li cablaju xtepaleb laj Israel yoqueb chiroybeninquil nak te'xc'ul li yechi'inbil chak reheb xban li Dios. Chi k'ek chi cutan neque'xlok'oni li Dios. At rey Agripa, xban xyo'oninquit a'an nak yoqueb chinjitbal eb laj judío. ⁸ ¿C'a'ut nak laex inc'a' nequepab nak li Dios tixcuaclesiheb cui'chic chi yo'yo li camenak? ⁹ Yal nak junxil lain xinc'oxla nak us xrahobtesinquireb li neque'xpab li Jesús aj Nazaret. ¹⁰ Lain quin'ueheb chi tz'apec' sa' tz'alam nabaleb laj pabanel. Ut q'uebil incuanquil chixbanunquil a'an xbaneb li xbenil aj tij. Ut nak neque'camsic laj pabanel, lain quin-oquen ajcui' chirixeb re te'camsik. A'in quillajinbanu aran Jerusalén. ¹¹ Nabal sut quintakla xsac'baleb sa' li cab li neque'xch'utub cui' ribeb laj judío. Quinquersiheb chixmajecuanquil xc'aba' li Jesús. Xban nak c'ajo' injosk'il sa' xbaneb, quebintake yalak bar sa' eb li jalanil tenamit re xbanunquil raylal reheb. ¹² A'in yoquin chixbanunquil nak coin Damasco. Q'uebil incuanquil ut taklanbilin xbaneb li xbenil aj tij. ¹³ Chacuabi at rey, li yoquin xyebal. Cua'leb re cutan nak quinixsut jun li chanchan xam sa' be. Li xam a'an quichal chak sa' choxa. Nalem tz'un. Naxk'ax ru nak nalem tz'un ru li sak'e. Quinixsut lain ut que'sute' ajcui' li yoqueb chi xic chicuix. ¹⁴ Nak cot'ane' chikajunil chiru che'och', quicuabi jun xyab cuy yo' chi atinac cui'quin. Quixye cue sa' ratinobaleb laj judío, "At Saulo, at Saulo, ¿c'a'ut nak yocat chinrahobtesinquit? Yocat chixtacuasinquil acuib ajunes jo' naxbanu li boyx li inc'a' na-abin chiru laj echal re nak yo' chixberesinquil," chan cue. ¹⁵ Ut lain quinye re, "¿Anihat laet, Kacua'?" Ut li Kacua' quixye cue, "Lain li Jesús li yocat chinrahobtesinquit. ¹⁶ Anakcuan ut cuaclin. Lain xinc'utbesi cuib chacuu re nak tatinakab chok' aj c'anjel chicuu. Laet tatch'olobank xyalal li c'a'ak re ru xacuul jo' ajcui' li c'a'ak re ru toj tinc'utbesi chacuu. ¹⁷ Lain tincolok acue chiruheb li xic' neque'iloc acue, jo' eb laj judío, jo' eb li macua'eb aj judío, ut tatintakla anakcuan sa' xyankeb li macua'eb aj judío. ¹⁸ Chanchan nak tateonk li xnak' ruheb nak tatch'olob li xyalal chiruheb. Chanchan nak te'elk sa' li k'o'jyin ut te'oc sa' cutan nak te'xtau ru li xyalal. Te'elk rubel xcuanguil laj tza ut te'oc rubel xcuanquil li Dios. Riq'uin inpabanquil lain, tacuyek' tasachek' lix maqueb, ut tacuank xna'ajeb sa' xyankeb li sic'bileb ru xban li Dios," chan cue li Kacua'. ¹⁹ Jo'can ut nak inc'a' xink'etk'eti cuib chiru li quixc'utbesi rib chicuu li quichal chak sa' choxa, at rey Agripa. ²⁰ Ut xben cua quinch'olob xyalal chiruheb li cuanqueb Damasco ut Jerusalén. Chirix a'an quinch'olob xyalal chiruheb laj judío li cuanqueb Judea, jo' ajcui' chiruheb li macua'eb aj judío. Quinye reheb nak tento te'yot'ek' xch'oleb te'xjal xc'a'uxeb ut te'xk'axtesa ribeb re li Dios ut te'xbanu li us jo' xc'ulubeb li ac xe'paban. ²¹ Sa' xc'aba' a'an nak quine'xchap eb laj judío sa' li templo ut que'raj raj incamsinquil. ²² Abanan lain tenk'anbilen xban li Dios toj chalen anakcuan. Yoquin chixch'olobanquil li yal chirix li c'a'ru tac'ulmank. Ninch'olob xyalal chiruheb chixjunileb, li cuanqueb xcuanquil jo' ajcui' li mac'a'eb xcuanquil. Mac'a' junak aq'uil na'leb yoquin chixyebal. Li yoquin chixyebal, a'an ajcui' li que'xch'olob xyalal eb li profeta ut laj Moisés. ²³ Que'xye nak tento tacamsik li Cristo, laj Colonel li yechi'inbil xban li Dios, abanan a'an li xben li tacuaclik cui'chic chi yo'yo sa' xyankeb li camenak ut tixch'olob xyalal li evangelio reheb laj judío jo'queb ajcui' li macua'eb aj judío, chan laj Pablo. ²⁴ Nak laj Pablo yo' chi atinac chi jo'can re xcolbal rib, laj Festo quixjap re chixyebal: —Loc acuu laet, Pablo. K'axal nabal li tzoloc xabanu ut a'an yo' chi qcobresinc acuu, chan. ²⁵ Ut laj Pablo quixye re: —At Festo, k'axal nim

acuanquil. Lain moco loç ta cuu. Li c'a'ru yoquin chixyebal açue, a'an tz'akal yal. ²⁶ Li rey Agripa naxnau chixjunil li c'a'ak re ru a'in. Jo'can nak yoquin chi atinac chiru chi maç'a' inxiu. A'an naxnau chixjunil a'in xban nak moco quic'ulman ta chi mukmu, chan. ²⁷ Ut laj Pablo quixye re li rey Agripa: — At rey Agripa, çma nacapab li c'a'ru que'xtz'iba li profeta? Lain ninnau nak nacapab, chan laj Pablo. ²⁸ Li rey Agripa quichak'oc ut quixye re: —Riq'uin li c'a'ru xaye xak'unobresin inch'ol. Ca'ch'in chic ma xinpaban aban, chan. ²⁹ Ut laj Pablo quixye: —Xq'ue taxak açue li Dios nak tatpabank laät jo' eb ajcui' chixjunileb li yoqueb chi abinc cue anakcuan. Usta ch'a'aj cheru, usta inc'a', texpabank taxak jo' nak xinpaban lain, abanan inc'a' raj texbaq'uek' riq'uin cadena, jo' nak bac'boquin lain, chan. ³⁰ Ut nak quirake' chixyebal li atin a'in, que'cuacli li rey ut lix Berenice jo' ajcui' laj Festo ut eb li que'c'ojla chixc'atk. ³¹ Ut nak yoqueb chi elc sa' li na'ajej a'an, que'xye chi ribileb rib: —Li cujnk a'in maç'a' xmaç. Maç'a' junak maç xbanu re taçamsik chi moco re cuank sa' tz'alam, chanqueb. ³² Ut laj Agripa quixye re laj Festo: —Taruk raj rach'abanquil li cujnk a'in cui ta inc'a' xtz'ama nak tarakok atin li acuabej César sa' xben, chan li rey Agripa.

27

Laj Pablo quitaklaç aran Roma

¹ Nak quich'ola li kaxiquic chiru ha' toj Italia, laj Pablo rochbened li jun ch'ol chic li cuanqueb chi prexil, que'k'axtesic sa' ruk' jun li capitán aj Julio xc'aba'. A'an xcomoneb li jun ch'utal chi soldado re li acuabej César. ² Co-oc sa' jun li jucub li quichal chak sa' li tenamit Adramitio. Li jucub a'an ac xic re. Coo kochben laj Aristarco li quichal chak Tesalónica xcuent Macedonia. Li jucub tãnumek' chixc'atk eb li na'ajej xcuent Asia. ³ Ut sa' li cutan jun chic cocuulac Sidón. Laj Julio quixbanu usilal re laj Pablo. Quixcanab chi xic riq'üneb laj pabanel li cuanqueb aran re nak taçenk'ak xbaneb. ⁴ Co-el aran Sidón sa' li jucub. Nak yoço chi xic, coxonumek' nach' riq'uin Chipre xban nak chiku yo chi çalç li ik'. ⁵ Conume' jun pac'al li palau cuan cui' li tenamit Cilicia ut Panfilia. Ut cocuulac sa' li tenamit Mira li cuan sa' xcuent Licia. ⁶ Aran quixtau jun li jucub li capitán re Alejandría. Ac xic re Italia ut corocsi sa' li jucub a'an re toxic. ⁷ Nabal cutan cobec chiru ha' chi timil. Ra sa nak cocuulac sa' xjayal li tenamit Gnido. Xban nak k'axal cau li ik', jo'can nak quikajal kabe. Conume' cuan cui' li tenamit Salmón ut çoo sa' li na'ajej Creta li sutsa sa' ha'. ⁸ K'axal ch'a'aj ut k'axal timil cocuulac sa' jun li tenamit "Chabil Oquebal" neque'xye re. Nach' riq'uin a'an cuan li tenamit Lasea. ⁹ Nabal cutan cobay sa' li na'ajej a'an ut xiu xiu chic li xic chiru ha' xban nak cuulac re li habalk'e. Jo'can nak laj Pablo qui-oc chixq'uebal xna'lebeb laj ch'e'ol jucub. ¹⁰ Quixye reheb: —Ex cuas cuitz'in, yoquin chixq'uebal retal nak li xic chiru ha' k'axal ch'a'aj. Nabal li raylal takac'ul chi jo'ca'in. Moco ca'aj cui' ta xiu xiu re li jucub ut li rik. Xiu xiu aj ban cui' chok' ke lao, chan laj Pablo. ¹¹ Abanan li capitán inc'a' quixq'ue xcuauquil li c'a'ru quixye laj Pablo. A' ban chic li c'a'ru que'xye laj eçal re li jucub ut laj ch'e'ol re, a'an chic li que'xbanu. ¹² Ut xban nak maç'a' junak na'ajej bar taruk te'xnumsi cui' li habalk'e chi sa sa' xch'oleb, li xq'uialeb que'xye nak us li elc aran cui taruk te'cuulac Fenice re te'xnumsi li habalk'e aran. A'an jun li tenamit xcuent Creta. Sa' li na'ajej a'an cuan cuib li oquebal re li jucub. Jun nacana sa' li suroeste ut li jun chic nacana sa' li noroeste.

Li cak-sut-ik' li quixq'ue nak yoqueb chi numec' sa' li palau

¹³ Nak ac yo li ik' li nachal sa' li sur, que'xc'oxla nak naru te'xic. Jo'can nak que'xtiquib xic. Yoqueb chi xic chire li palau nach' riq'uin li na'ajej Creta. ¹⁴ Junpat na chic nak quichal jun cacuil ik'. Lix cau ok li ha' yo chixsac'bal rib chiru li jucub. Euroclodón xc'aba' li ik' a'an li nachal chak sa' li noroeste. ¹⁵ Inc'a' chic que'xcuy xmetz'eu li cacuil ik' laj ch'e'ol re li jucub. Jo'can nak quikacanab kib re toxc'am. Ut li jucub quic'ame' xban li ik'. ¹⁶ Cocuulac cuan cui' jun sjiril li ch'och' Clauda xc'aba' sutsu sa' ha'. Ra sa nak coru xtaksinquil li ch'ina jucub li yo chi queloc xban li nimla jucub. ¹⁷ Nak kataksi sa' li nimla jucub, c'ajo' nak que'xucuac li cristian. Que'xc'oxla nak mare tat'ilk li jucub sa' li samaib. Que'xcubsi xt'icrul li jucub ut yoco chi xic chi jo'can. ¹⁸ Jo' cuulajak chic toj cau ajcui' li ik'. C'ajo' nak yo chirec'asinquil li jucub. Jo'can nak quikatiquib xjebbal li rik ut kacut sa' li palau. ¹⁹ Sa' rox li cutan quikisi sa' li jucub li c'a'ru nac'anjelac re li jucub, re nak inc'a' chic alak li jucub. ²⁰ Chiru nabal cutan inc'a' qui-iloc li sak'e chi moco li chahim chiru k'o'jyin. K'axal cau li cak-sut-ik' ut xiu xiu cuanco. Inc'a' chic nakayo'oni nak tocolek' ta. ²¹ Ac xnume' nabal cutan ut maji' nakayal cua. Jo'can nak laj Pablo quixakli sa' xyiheb ut quixye reheb: —Ex cuas cuitz'in, k'axal us raj quinerabi ta. Inc'a' raj co-el chak Creta. Cui ta inc'a' xo-el, inc'a' raj xkac'ul li raylal a'in ut inc'a' raj xosachoc. ²² A'ut anakcuan tinye ere nak mexc'oxlac. Cauhak ban ech'ol xban nak ma' ani ke tacamk. Ca'aj cui' li jucub tasachk. ²³ Sa' li k'o'jyin a'in xc'utbisi rib chicuu jun x-angel li Dios laj echal cue, li ninc'anjela ru. ²⁴ Li ángel xye cue, “Matxucuac, at Pablo, xban nak tento nak tatcuulak riq'uin li acuabej César. Xban xanimal rusilal li Kacua, ma' jun reheb li cuanqueb acuochben te'camk,” chan cue. ²⁵ Jo'can nak cauhak ech'ol, ex cuas cuitz'in. Lain cau inch'ol riq'uin li Dios nak tac'ulmank jo' xye cue li ángel. ²⁶ Abanan tento nak tocutek' xban li ha' sa' jun na'ajej sutsu sa' ha', chan laj Pablo reheb. ²⁷ Cuib xaman na yoco chi c'uluc raylal. Li ha' yo chikac'ambal yalak bar chiru li palau Adriático xc'aba' xban li cacuil ik'. Tuku chic k'o'jyin nak eb laj ch'e'ol jucub que'xc'oxla nak ac cuulaqueb re chi ch'och'el. ²⁸ Que'xcubsi jun li c'am re xbisbal xchamal li ha'. Toj cuan cuaklaju xcac'al metro xchamal nak que'xbis. Nak que'jiloc chic ca'ch'in, que'xq'ue cui'chic li bisleb ut cuukub xca'c'al metro chic lix chamal. ²⁹ C'ajo' lix xiuheb xban nak que'xc'oxla nak mare tacutek' li jucub sa' xyank pec xban lix cau ok li palau. Jo'can nak que'xq'ue sa' li ha' chirix li jucub cahib li ninki ch'ich' ancla xc'aba' re raj xxakabanquil li jucub. Ut neque'raj ta ac xsakeu. ³⁰ Ut eb laj ch'e'ol jucub que'raj elelic sa' li jucub. Que'xq'ue li ch'ina jucub sa' ha' ut que'xbanu ribeb nak te'raj xq'uebal li ch'ich' ancla sa' ha' chiru li jucub. ³¹ Laj Pablo quixye re li capitán ut reheb ajcui' li soldado: —Cui inc'a' neque'cana eb a'in sa' li jucub, laex inc'a' taruk texcolek', chan. ³² Jo'can nak eb li soldado que'xyoc' lix c'amal li ch'ina jucub ut que'xcanab chi sachc sa' li palau. ³³ Nak qui-oc chi cutanoc', laj Pablo quixq'ue xcacuail xch'oleb chixjunileb ut quixye reheb nak te'cua'ak. Quixye reheb: —Cuib xaman anakcuan eroquic chi oybeninc ut chixcuybal esa' chi mac'a' nequetzaca. ³⁴ Nintz'ama cheru nak texcua'ak re nak cauhakex ut ma' jun ere tacamk, chan reheb. ³⁵ Ut nak quixye a'an, quixchap jun li caxlan cua ut quixbantioxi chiru li Dios chiruheb chixjunileb li cuanqueb aran. Ut nak quixjach, qui-oc chixcua'bal. ³⁶ Riq'uin a'in quic'ojla xch'oleb chixjunileb ut que'oc ajcui' chi cua'ac eb a'an. ³⁷ Chikajunilo li cuanco sa' li jucub, cuanco cuib ciento riq'uin cuaklaju xcac'al (276). ³⁸ Nak ac xe'rake' chi cua'ac, que'oc cui'chic chixjebbal li rik li jucub ut que'xcut chi ha' li trigo re nak tasebok' li rik. ³⁹ Nak quicutano' que'xq'ue retal nak cuanqueb sa' jun na'ajej inc'a' neque'xnu

ru. Aran na-oc jun li nima' sa' li palau ut aran cuan jun li na'ajej sa' samaib chire li palau. Aran que'xc'oxla nak taruk te'xhiltesi li jucub. ⁴⁰ Que'xyoc' lix c'amal li anclas ut que'xcanab chi subunc sa' li ha'. Que'xcotz ajcui' lix bac'bal li ch'ich' li naberesin re li jucub. Ut que'xtaksi cui'chic li nimla t'icr li naramoc re li ik'. Ut yoqueb chi xic chire li ha'. ⁴¹ Li jucub quic'ame' xban li ik' bar neque'xc'ul cui' rib li nima' ut li palau. Aran quit'il sa' samaib li ru'uj li jucub. Inc'a' chic qui-ec'an sa' xna'aj. Ut li jucub yo chi jorec' xban lix cau ok li palau. ⁴² Eb li soldado que'xc'oxla nak us te'xcamsiheb chixjunil li prex re nak inc'a' te'xcut rib chi numxic chiru ha' re te'xcol rib. ⁴³ Abanan li capitán quiraj xcolbal laj Pablo. Jo'can nak quixpo' ru lix c'a'uxeb li soldado ut quixye reheb nak li ani naxnau numxic xcutakeb rib xben cua sa' ha' ut te'numxic re nak te'elk chi ch'och'el. ⁴⁴ Cuan li que'el chiru tz'alam che' ut cuan que'xchap c'a'ak re ru re li jucub. Jo'ca'in nak que'cole' chixjunileb ut que'el chi ch'och'el.

28

Laj Pablo quicuulac sa' li na'ajej Malta

¹ Nak ac cuanco chic chi ch'och'el, quikanau nak li na'ajej a'an, li sutsu sa' ha', a'an Malta xc'aba'. ² Li cuanqueb aran c'ajo' li usilal que'xbanu ke. Coe'xc'ul sa' xyalal chikajunilo ut que'xtz'ab jun xam xban nak c'ajo' li hab ut c'ajo' li que. ³ Laj Pablo quixxoc chak jun k'al li ruk' che' chaki ut quixq'ue sa' li xam. Jun li c'ambolay quielelic xban xtkicual li xam ut quixtiu li ruk' laj Pablo. T'uyt'u quicana. ⁴ Li cuanqueb sa' li na'ajej Malta, nak que'ril li c'ambolay t'uyt'u chi ruk', que'xye chi ribileb rib: —Relic chi yal nak li cuink a'in, a'an aj camsinel. Xcole' chak chiru li palau, abanan inc'a' taçanabak chi yo'yo arin chi inc'a' tixc'ul xtojbal rix lix mac, chanqueb. ⁵ Ut laj Pablo quixchik' li ruk' ut li c'ambolay quit'ane' sa' xam ut mac'a' quixc'ul laj Pablo. ⁶ Eb a'an yoqueb chiroybeninquil jok'e tasipok laj Pablo ut tat'anek' chi camenak. Najt que'roybeni ut nak que'ril nak mac'a' quixc'ul, que'xjal lix c'a'uxeb ut que'xye: —Dios tana li cuink a'an, chanqueb. ⁷ Aran cuan xc'alebal laj Publio li cuan xcuanquil sa' li na'ajej Malta. A'an coxc'ul sa' xyalal ut riq'uin cohilan chiru oxib cutan. ⁸ Lix yucua' laj Publio t'ant'o sa' ch'at. Yo xtik ut yo xquic' sa'. Laj Pablo qui-oc sa' li na'ajej li cuan cui'. Quixq'ue li ruk' sa' xben nak quitijoc ut quiq'uirtesic. ⁹ Nak que'rabi resil nak ac xq'uirtesic lix yucua' laj Publio, nabaleb li yaj li cuanqueb sa' li na'ajej a'an, que'cuulac riq'uin laj Pablo ut que'q'uirtesic. ¹⁰ Ri'uin li usilal qui-ux reheb, k'axal cui'chic coe'xra ut que'xq'ue nabal c'a'ru ke. Ut nak ac xic ke nabal li c'a'ru ke que'xsi ke re taç'anjelak ke chiru be.

Laj Pablo quicuulac Roma ut quiqtinac riq'uineb laj c'amol be sa' xyankeb laj judío

¹¹ Ut nak quinume' oxib po, co-oc sa' jun li jucub re Alejandría li yo chixnumsinquil li habalk'e sa' li na'ajej Malta. Li jucub a'an cuan retailil lix dioseb chiru. Cástor ut Pólux xc'aba'eb. ¹² Cocuulac sa' li tenamit Siracusa ut aran cohilan oxib cutan. ¹³ Chirix chic a'an coo cui'chic chiru ha' ut cocuulac sa' li tenamit Regio. Cuulajak chic quiticla li ik' li nachal sa' li sur. Yo li ik' chalen nak cocuulac sa' li na'ajej Puteoli. ¹⁴ Sa' li na'ajej a'an cuanqueb aj pabanel katauheb. Eb a'an que'xtz'ama chiku nak tocanak cuukubak cutan riq'uineb. Ut chirix a'an coo cui'chic Roma. ¹⁵ Eb laj pabanel li cuanqueb Roma que'rabi resil nak cuulac ke. Cuanqueb laj pabanel que'chal chi c'uluc ke toj cuan cui' li c'ayil Apio xc'aba' ut cuanqueb ajcui' que'c'uluc ke toj sa' li na'ajej Oxib Tabernas. Nak quiril ruheb laj pabanel, laj Pablo

quixbantioxi chiru li Dios ut quic'ojla xch'ol. ¹⁶ Nak cocuulac Roma, li capitán quixk'axtesiheb li prex re li coronel. Ut laj Pablo quicanabac chi cuanc xjunes rochben jun li soldado li na-iloc re. ¹⁷ Nak ac xnume' chic oxib cutan, laj Pablo quixbokeb li neque'c'amoc be sa' xyankeb laj judío li cuanqueb Roma. Nak acak xe'ch'utla quiatinac riq'uineb re xcolbal rib, ut quixye reheb: —Ex cuas cuitz'in, lain inc'a' xinmācob chiruheb li cuech tenamitil chi moco xink'et lix chak'rabeb li kaxe'tonil yucua'. Abanan xinchape' Jerusalén xbaneb laj judío, ut xine'xk'axtesi sa' ruk'eb laj Roma. ¹⁸ Ut eb laj Roma nak que'rakoc atin sa' inben, ma jun inmac que'xtau re incamsinquit. Que'raj raj cuach'abanquil. ¹⁹ Abanan eb laj judío inc'a' que'raj quine'risi. Jo'can nak quintz'ama chiruheb nak li acuabej César tarakok atin sa' inben. Moco chixjitbal ta lin tenamit xinchal. ²⁰ A'an aj e nak xintakla ebokbal. Xcuaj rilbal eru ut xcuaj atinac eriq'uin. Sa' xc'aba' li jun li nakayo'oni lao aj Israel nak bac'boquin anakcuan riq'uin li cadena a'in, chan reheb. ²¹ Ut eb a'an que'xye: —Lao ma jun hu xkac'ul chalenak ta Judea, ut ma jun li kas kitz'in xc'ulun chajitbal chi moco chixyebal junak c'a'ak re ru inc'a' us chacuix. ²² Takaj rabinquil c'a'ru nacac'oxla chirix a'an xban nak kabiom nak yalak bar xic' neque'rabi li tijleb chirix li Jesús, chanqueb. ²³ Jo'can nak que'xxakab jun li cutan re nak te'cuulac riq'uin sa' li cab li cuan cui'. Nabaleb que'cuulac riq'uin laj Pablo re nak tixch'olob xyalal chiruheb chirix lix nimajcual cuanquilal li Dios. Quixnumsi li cutan chixch'olobanquil li xyalal chirix li Jesús jo' tz'ibanbil sa' lix chak'rab laj Moisés jo' ajcui' li que'xtz'iba li profeta re nak te'xpab li Jesús. ²⁴ Cuan que'paban re li c'a'ru yo chixyebal. Abanan cuan ajcui' li inc'a' que'xpab. ²⁵ Cuanqueb li inc'a' que'cuulac chiruheb li c'a'ru yo chixyebal laj Pablo, ut que'oc chi elc. Nak ac xiqueb re, laj Pablo quixye li atin a'in: —Yal ajcui' li quixc'utbesi li Santil Musik'ej chiru li profeta Isaías chirixeb li kaxe'tonil yucua' nak quixye:

²⁶ Ayu ut taye reheb li tenamit chi jo'ca'in: Yokex chirabinquil, abanan moco tetau ta ru lix yalal li c'a'ru terabi; ut yokex chirilbal, abanan inc'a' teq'ue retal c'a'ru xyalal li c'a'ru teril.

²⁷ Xban nak cacuubresinbil lix ch'oleb li tenamit a'in, jo'can nak inc'a' te'xtau xyalal. Inc'a' saken te'abink ut inc'a' saken te'lok re nak inc'a' te'xtau xyalal li c'a'ru te'ril ut inc'a' te'xtau xyalal li te'rabi. Inc'a' te'xtau xyalal, chi moco te'xjal xc'a'ux, chi moco tebing'uirtesi, chan li Dios. (Is. 6:9-10.)

²⁸ Jo'can nak chenuhak nak li resil li colba-ib li naxq'ue li Dios quiq'uehe' reheb li macua'eb aj judío. A'an eb chic te'abink re, chan laj Pablo. ²⁹ Nak que'rabi a'in, eb laj judío que'coeb ut yoqueb chixcuech'inquil rib. ³⁰ Cuib chihab quicuan aran Roma laj Pablo sa' li cab li quixto'oni. Ut quixc'uleb chi sa sa' xch'ol chixjunileb li que'cuulac riq'uin. ³¹ Yo chixch'olobanquil lix yalal lix nimajcual cuanquilal li Dios ut yo chixyebal resil li Kacua' Jesucristo chi mac'a' xxiu. Ut ma ani quiramoc chiru xyebal.

Li Hu li Quixtz'iba li San Pablo reheb laj Roma

Xq'uebal xsahileb xch'ol

¹ Laj laj Pablo laj c'anjel chiru li Kaçua' Jesucristo. Sic'bil chak cuu xban li Dios chok' x-apóstol ut taklanbilin chixyebal resilal li colba-ib. ² Li Dios quixyechi'li li colba-ib a'in chalen chak najter ut eb li profetas que'xtz'iba retalil sa' li Santil Hu. ³ A'an a'in resilal li Kaçua' Jesucristo li Ralal li Dios. Li Kaçua' Jesucristo tz'akal cujnk xban nak quíyo'la arin sa' ruchich'och' riq'uin jun reheb li ralal xc'ajol laj David. ⁴ Li Kaçua' Jesucristo a'an tz'akal Dios. Numtajanak lix santilal. Riq'uin lix nimal xcuanquil, li Dios quixcuaclesi cui'chic chi yo'yo sa' xyankeb li camenak re xc'utbal chiku nak a'an tz'akal Ralal li Dios. ⁵ Sa' xc'aba' li Kaçua' Jesucristo q'uebilin chok' apóstol xban li Dios re xch'olobanquil xyalal chiruheb li tenamit yalak bar re nak te'xpab li Jesucristo ut te'xbanu li c'a'ru naraj. ⁶ Jo'can ajcui' laex sic'bil ajcui' eru, ut laex chic ralal xc'ajol li Kaçua' Jesucristo. ⁷ Yoquin chi tz'ibac eriq'uin laex li cuanquex aran sa' li tenamit Roma. Raroquex ut bokbilex xban li Dios ut laex aj santil pabanel. Li usilal ut li tuktuquilal chi cuanc eriq'uin xban li Dios Acuabej ut xban li Kaçua' Jesucristo.

Laj Pablo naraj xic Roma

⁸ Xben cua ninbantioxu chiru li Dios sa' xc'aba' li Kaçua' Jesucristo xban nak yalak bar na-abiman resil nak tz'akal nequepab li Cristo. ⁹ Ninc'anjelac chiru li Dios ut chi anchal inch'ol ninye resil li Kaçua' Jesucristo li Ralal li Dios. Li Dios naxna nak junelic yoquin chi tijoc cherix. ¹⁰ Cui li Dios naxq'ue cue, chi seb tincuulak eriq'uin. A'an li nintz'ama junelic chiru li Dios. ¹¹ Nacuaj rilbal eru ut nacuj etenk'anquil re nak cauhaqex sa' le pabal. ¹² Ut nacuj rilbal eru re nak takatenk'a kib sa' li kapabal, laex jo' ajcui' lain, xban nak junaj li kapabal. ¹³ Ex herman, nacuj nak tenau nak nabal sut ninc'oxla raj xic eriq'uin, abanan toj maji' naru ninxic. Mare cuan raj te'pabank aran nak te'rabi ratin li Dios li tinch'olob xyalal chiruheb jo' nak que'paban chak chicuu sa' eb li tenamit quinnume' cui' chak. ¹⁴ Tenebanbil sa' inben c'anjelac sa' xyankeb laj griego jo' ajcui' li maçua'eb aj griego. Tinc'anjelac sa' xyankeb li tzolbibleb jo' ajcui' li inc'a' tzolbibleb. ¹⁵ Jo'can nak nacuj tinch'olob xyalal li colba-ib cheru laex li cuanquex Roma.

Lix cuanquil li colba-ib

¹⁶ Inc'a' ninxutanac chixch'olobanquil xyalal li colba-ib xban nak a'an lix nimal xcuanquil li Dios re xcolbal chixjunil li te'pabank re. Li colba-ib xben cua q'uebil reheb laj judío ut q'uebil ajcui' reheb li maçua'eb aj judío. ¹⁷ Lix yalal li colba-ib naxc'ut chiku nak ca'aj cui' riq'uin xpabanquil li Dios tic chic li kach'ol chiru ut cuanko chi sum atin riq'uin, jo' naxye sa' li Santil Hu: Li tic xch'ol riq'uin xpabanquil li Dios cuan xyu'am chi junelic. (Hab. 2:4)

¹⁸ Li Dios yo' chak xjosk'il toj sa' choxa sa' xbeneb laj mak. Riq'uin lix mausilaleb neque'xtz'ektana lix yalal ut neque'xmuk ajcui' chiruheb li ras ritz'in. ¹⁹ Chixjunil li c'a'ak re ru nanauman chirix li Dios, ac ch'olch'o chiruheb. A' li Dios ajcui' quic'utbesin chiruheb. Aban inc'a' neque'xq'ue xcuanquil li xyalal. ²⁰ Chalen chak sa' xticlajic li ruchich'och' nac'utun xcuanquil ut xlok'al li Dios riq'uin li c'a'ak re ru quilajxyib. Nac'utun nak a'an li tz'akal Dios ut k'axal nim xcuanquil chi junelic. Jo'can nak maç'a' junak atin te'xcol cui' rib chiru xjosk'il li Dios. ²¹ Neque'xnau nak cuan

li Dios, aban inc'a' que'xq'ue xlok'al chi moco que'bantioxin chiru. Ca'aj cui' li jo' majo'il na'leb neque'xc'oxla ut xban a'an nak quik'ojyino' ru lix c'a'uxe. ²² Eb a'an neque'xye nak cuanqueb xna'leb abanan maç'a'eb xna'leb. ²³ Inc'a' neque'xlok'oni li yo'yoqu'il Dios. A' chic lix jalam uch li cujnk li nacam, a'an chic neque'xlok'oni. Ut lix jalam uch li xul neque'xq'ue chok' xdioseb jo' li xul li neque'rupupic ut li xul li neque'bec, jo'queb ajcui' li neque'xjucuqui rib chiru ch'och'. ²⁴ Jo'can nak li Dios quixtz'ektanaheb sa' xyibal ru lix mausilaleb toj retal neque'xc'ut xxutaheb chi ribileb rib xban nak neque'xbanu li jo' majo'il na'leb. ²⁵ Inc'a' que'xpab li tz'akal Dios. A' chic li tic'ti' que'xq'ue xcuanquil. Que'xnima ru ut que'xq'ue xlok'al li c'a'ak re ru yibanbil xban li Dios ut inc'a' que'xlok'oni li tz'akal Dios. Ca'aj cui' li tz'akal Dios a'an xc'ulub li lok'onic chi junelic. Jo'can taxak. ²⁶ Li Dios quixtz'ektanaheb sa' lix xutanalil na'leb xban lix mausilaleb. Ut eb li ixk inc'a' chic que'raj cuanc riq'üneb lix belom. Riq'uin ban chic li rech ixkilal que'xbanu li moco uxc ta naraj. ²⁷ Ut jo'can ajcui' li cujnk inc'a' chic que'raj li ixk li quicanabac reheb xban li Dios. Que'tikcuo' xjolomeb xban lix mausilaleb chi ribileb rib ut yoqueb chixbanunquil li tz'ekbetal aj na'leb riq'uin rech cujnkilal. Ut que'xc'ul ajcui' xtojbal rix lix mausilaleb jo' xc'ulubeb. ²⁸ Xban nak inc'a' neque'xc'oxla li Dios, jo'can nak que'tz'ektanaç xban li Dios sa' li tz'ekbetal aj na'leb chixbanunquil li moco uxc ta naraj. ²⁹ Numtjajenakeb xyibal ru lix na'lebeb ut lix mausilaleb. Aj yumbeteb ut aj co'beteb. Neque'xra ru li c'a'ru cuan reheb li ras ritz'in ut k'axal josk'eb. Numtjajenakeb chi aj cakal, aj camsihomeb ras ritz'in, aj pleteb, aj balak'eb ut aj molol atineb. ³⁰ Junes yo'obanc atin neque'xbanu chirixeb li ras ritz'in. Xic' neque'ril li Dios. Neque'hoboc. Neque'xnimobresi rib ut k'etk'eteb. Aj k'abaneleb ut aj k'etoleb ratin xna' xyucua'. ³¹ Inc'a' neque'xtau xyalal. Inc'a' neque'xbanu li c'a'ru neque'xsume xbanunquil. Inc'a' neque'rahoc. Inc'a' neque'cuyuc maç, ut inc'a' neque'uxtanan u. ³² Ac ch'olch'o chiruheb li c'a'ru quixye li Dios. Neque'xnau nak lix tojbal rix li maç, a'an li camc. Aban toj yoqueb ajcui' chixbanunquil li maç. Ut maçua' ca'aj cui' a'an neque'xbanu. Neque'saho' ajcui' sa' xch'ol chirilbaleb li ras ritz'in nak yoqueb chixbanunquil li inc'a' us.

2

Li Dios narakoc atin sa' tiquial

¹ ¿Anihat laa't nak tatrakoc atin sa' xbeneb la' cuas açuizt'in? Cui nacarak atin sa' xbeneb la' cuas açuizt'in ut toj yocac ajcui' chixbanunquil li inc'a' us laa't jo' yoqueb a'an, raylal ajcui' yocac chixbokbal sa' aben ut tarakek' atin sa' aben. ² Nakanau nak li Dios tic' xch'ol ut a'an tarakoc atin chi tz'akal sa' xbeneb li neque'banun re li mausilal. ³ Laa't nacatrakoc atin sa' xbeneb li neque'banun re li mausilal ut nacabanu ajcui' li mausilal laa't. ¿C'a'ru nacaye? ¿Ma inc'a' ta bi' tatxq'ue li Dios chixtojbal rix amaç laa't? ⁴ ¿Ma tatz'ektana lix nimal ruxtan li Dios? ¿Ma tatz'ektana lix cuyum ut lix k'unil xch'ol? ¿Ma inc'a' nacaq'ue retal nak xban lix nimal rusilal li Dios naraj nak tayot' açh'ol tajaç aç'a'ux? ⁵ Aban laa't cau açh'ol. Jo'can nak inc'a' nacayot' açh'ol inc'a' nacajaç aç'a'ux. Ut riq'uin a'an yocac chixbokbal xjosk'il li Dios sa' aben. Toxaçuil xjosk'il nak taçuulak xk'ehil nak li Dios tarakoc atin sa' tiquial. ⁶ Sa' li cutan a'an li Dios tixq'ue xk'ajcamunquil li junjunc a' yal chanru lix yehom xbanuhomeb. ⁷ Li Dios tixq'ue xyu'am chi junelic li ani naxq'ue xch'ol chixbanunquil li chabilal li naraj li Dios re nak tixtau lix lok'al, lix nimanquil ru, ut lix yu'am chi junelic. ⁸ Aban riq'uin xjosk'il li Dios tixq'ueheb chixtojbal xmaqueb li neque'xnimobresi rib ut inc'a' neque'raj

xpábanquil li xyáal. Eb a'an ca'aj cui' li inc'a' us neque'xc'oxla. ⁹ Raylal ut ra xic' tachalk sa' xbeneb chixjunileb li neque'banun re li inc'a' us. Xben cua tachalk sa' xbeneb laj judío ut tachalk ajcui' sa' xbeneb li macua'eb aj judío. ¹⁰ Aban li Dios tixq'ue xcuanquil, xlok'al ut tuktuquil usilal reheb chixjunileb li neque'banun re li chabíal. Tixq'ue xben cua reheb laj judío ut tixq'ue ajcui' reheb li macua'eb aj judío. ¹¹ Li Dios inc'a' naxsic' ru li junjunk. Junajo ban chiru. ¹² Li ani neque'macob chi inc'a' neque'xnau li chak'rab li quiq'uehe' re laj Moisés xban li Dios, tarakek' atin sa' xbeneb ut te'sachk usta inc'a' neque'xnau li chak'rab. Ut chixjunileb li neque'xnau li chak'rab ut neque'macob, tarakek' ajcui' atin sa' xbeneb jo' naxye sa' li chak'rab. ¹³ Chiru li Dios inc'a' tic' xch'ol junak yal riq'uin xnaubal li chak'rab. Aban li neque'banun re li naxye li chak'rab tiqueb xch'ol chiru li Dios. ¹⁴ Li macua'eb aj judío inc'a' neque'xnau li chak'rab li quiq'uehe' re laj Moisés. Abanan usta mac'a' li chak'rab, cuan ajcui' nak neque'xbanu jo' naxye sa' li chak'rab xban nak neque'rec'a sa' xch'ol c'a'ru li us ut c'a'ru li inc'a' us. ¹⁵ Nac'utun riq'uin lix yehom xbanuhomeb nak ac neque'xnau c'a'ru naxye sa' li chak'rab usta ma jun sut rabiomeb li chak'rab. Neque'rec'a sa' xch'ol'eb ma us malaj inc'a' us li yoqueb chixbanunquil. ¹⁶ Xakabanbil li Jesucristo xban li Dios re tarakok atin sa' xbeneb chixjunileb nak taçuulak xk'ehil. Li Cristo naxnau chanru lix ch'ol li junjunk usta mukmu chiku lao. Jo'can naxye resilal li colba-ib li ninjultica lain.

Eb laj judío ut lix chak'rab laj Moisés

¹⁷ Laat aj judío, ut riq'uin a'an nacanimobresi açuib, ut nacaye nak li Dios a'an aj echal açue. Ut nacac'ojob aç'ol riq'uin lix chak'rab laj Moisés. ¹⁸ Xban nak xatzol li chak'rab, nacanau c'a'ru naraj li Dios. Nacanau c'a'ru li us ut nacanau c'a'ru li inc'a' us. ¹⁹ Nacaq'ue açuib jo' aj c'utul xbeheb li mutz'. Nacaye nak laat xcutaneb li cuanqueb sa' k'ojyin. Ninc'ut li xyáal chiruheb, chancat. ²⁰ Nacaye nak laat aj tzolol reheb li inc'a' tzolbibleb ut li inc'a' neque'xnau xyáal. Nacaye nak sa' li chak'rab nacatau ana'leb chi tz'akal ut aran nacatau xyáal. ²¹ Cui laat nacatzoleb li jalan chic, ¿c'a'ut nak inc'a' nacatzol açuib laat? Laat nacach'olob xyáal nak inc'a' us li elk'ac. ¿C'a'ut nak toj yocat ajcui' chi elk'ac laat? ²² Laat nacaye nak inc'a' us li muxuc caxar. ¿C'a'ut nak toj nacatmuxuc caxar laat? Cui xic' nacacuul eb li yibanbil dios, ¿c'a'ut nak nacatxic chi elk'ac sa' li rochoheb? ²³ K'axal nim açuanquil nak nacacuec'a açuib xban nak nacanau li chak'rab li quiq'uehe' re laj Moisés. Abanan nacatz'ektana li Dios riq'uin nak nacak'et lix chak'rab. ²⁴ Jo' naxye sa' li Santil Hu: Sa' ec'aba' læx aj judío, neque'xmajecua li Dios li macua'eb aj judío. (Is. 52:5) ²⁵ Relic chi yal li circuncisión cuan xyáal cui nacapab li chak'rab li quiq'uehe' re laj Moisés xban li Dios. Aban cui nacak'et lix chak'rab mac'a' na-oc cui' nak xac'ul li circuncisión. ²⁶ Cui junak cujnk macua' aj judío inc'a' naxc'ul li circuncisión, aban naxpab ut naxbanu li c'a'ru naxye li chak'rab, li cujnk a'an taq'uehek' ajcui' sa' ajl sa' xyankeb li que'xc'ul li circuncisión. ²⁷ Usta inc'a' xc'ul li circuncisión cui naxbanu tz'akal li tz'ibanbil sa' li chak'rab, li cujnk a'an naxc'ut axutan ut tarakek' atin sa' aben xban nak nacak'et li chak'rab. Mac'a' na-oc cui' açue nak xac'ul li circuncisión, chi moco nak nacanau li tz'ibanbil sa' li chak'rab cui inc'a' nacabanu li c'a'ru naxye. ²⁸ Li tz'akal aj judío macua' aj judío yal xban xc'ulbal li circuncisión. Riq'uin ban xpábanquil li chak'rab. Lix yáal li circuncisión macua' ca'aj cui' li na-ux riq'uin li tz'ejcualej. ²⁹ Li tz'akal aj judío naxpab chi tz'akal lix chak'rab li Dios. Ut li tz'akal circuncisión inc'a'

nac'ulman riq'uin xbanunquil li chak'rab. A'an ban li naxbanu li Santil Musik'ej sa' li ram li junjunk. Ut lix lok'al laj pabanel inc'a' naq'uehe' xbaneb li cujnk. Li Dios ban naq'uehoc xlok'al.

3

¹ ¿C'a'ru rusil li cuanc chok' aj judío? Ut, ¿c'a'ru rajbal xc'ulbal li circuncisión? ² Li cuanc chok' aj judío, a'an a'in li rusil: nak li Dios quixq'ue li ratin reheb xben cua. ³ Cuanqueb laj judío inc'a' que'xbanu li quixye li Dios. ¿Ma yal sa' xmaqueb ta bi' a'an nak li Dios inc'a' tixq'ue li quixyechi'? ⁴ ¡Ma jok'e bi'an! Li Dios yal naatinac usta chixjunileb li cristian aj tic'ti'eb. Jo' tz'ibanbil sa' li Santil Hu li quixye laj David re li Dios. Quixye chi jo'can: Junelic yal nacatatinac. Usta nacate'xk'aba, aban mac'a' amac. ⁵ Cuanqueb neque'yehoc nak riq'uin li mausilal nac'utun chi us li rusilal li Dios. Jo'can nak us xbanunquil li mausilal re nak tac'utunk xchabilal li Dios. Inc'a' us cui li Dios nocoq'ue chi xtojbal li kamaç, chanqueb. Aban macua' a'an li naxye li Dios. Inc'a' naru nakaye nak inc'a' toxq'ue chixtojbal li kamaç xban nak nakanau nak tic xch'ol li Dios. Jo'can nak tixq'ue chixtojbal xmaç laj mac. ⁶ Relic chi yal nak tic xch'ol li Dios. Cui ta inc'a', ¿chan raj ru nak tixrak atin sa' xbeneb li cuanqueb sa' ruchich'och'? ⁷ Ut cuanqueb ajcui' li neque'yehoc nak riq'uin li tic'ti'ic neque'xbanu, taq'uehek' xcuanquil li yal li naxye li Dios ut k'axal cui'chic talok'onik ru li Dios. Ut cui riq'uin li katic'ti' nalok'onic ru li Dios, ¿c'a'ut nak naxye nak lao aj mac chi jo'canan? ⁸ Us cui nakabanu li mausilal re nak tanimak xlok'al li Dios, chanqueb. ¿C'a'ru nequeye laex? ¿Ma takabanu li inc'a' us re nak tanimak xlok'al li Dios? Ma jaruj taruk taq'uemanx xlok'al li Dios riq'uin li kamausilal. Cuan li neque'yehoc nak a'an a'in li tijleb ninch'olob xyalal, abanan moco jo'can ta li yoguín chixyebal. Li neque'yehoc re a'an xc'ulubeb nak te'xtoj rix lix maqueb.

Ma ani tic xch'ol

⁹ ¿C'a'ru takaye chirix a'in? ¿Ma k'axal chabilo ta bi' lao aj judío chiruheb li macua'eb aj judío? Relic chi yal nak inc'a'. Chikajunilo ban lao aj maco, lao aj judío jo'queb ajcui' li macua'eb aj judío. ¹⁰ Jo' tz'ibanbil sa' li Santil Hu: Ma ani tic xch'ol chiru li Dios. Yal ta jun.

¹¹ Ma ani nata'oc ru li xyalal. Ma ani naraj xsic'bal li Dios. (Sal. 14:2)

¹² Chixjunileb xe'xtz'ektana li Dios, ut jun xiquiqueb nak xe'xbanu li mausilal. Jo'can nak ma jun nabanun re li us. Yal ta jun.

¹³ C'ajo' xyibal ru neque'atinac. Chanchan xchuhil li camenak sa' li muklebal. Ut junes balak'inc neque'xbanu. Li c'a'ak re ru neque'xye chanchan xmay c'anti' li nacamsin. (Sal. 5:9; 140:3)

¹⁴ Riq'uin xtz'umaleb re neque'majecuan ut junes xic' aj atin na-el sa' reheb. (Sal. 10:7)

¹⁵ Sa' junpat neque'chal xjosk'il. Neque'xrahobtesi ut neque'xcamsi li ras ritz'in.

¹⁶ Yalak bar neque'xic junes raylal ut ra xic' neque'xbanu chak reheb li ras ritz'in.

¹⁷ Ut inc'a' neque'cuan sa' usilal. Junes pletic neque'xbanu. (Is. 59:7-8)

¹⁸ Inc'a' neque'xxucua ru li Dios chi moco neque'x-xlok'i. (Sal. 36:1)

¹⁹ Nakanau nak chixjunil li tz'ibanbil sa' li chak'rab, a'an reheb li cuanqueb rubelxcuanquil li chak'rab. A'an aj e nak cuan li chak'rab re nak chixjunileb te'xnau nak cuanqueb xmaç ut mac'a' chic naru te'xye, re te'xcol cui' rib chiru li Dios nak tarakek' atin sa' xbeneb. ²⁰ Ma jun tic xch'ol chiru li Dios

yal riq'uin xbanunquíl li c'a'ru naxye li chak'rab. Li chak'rab nac'anjelac re xc'utbal chiku nak lao aj maç.

Riq'uin li kapqbal natıco' li kach'ol

²¹ Li Dios quixc'utbesi chiku chanru nak taruk taııcok' li kach'ol. Moco riq'uin ta xbanunquíl li c'a'ru naxye li chak'rab. Ch'olobanbil li xyalal xban li chak'rab ut xbaneb ajcui' li profeta nak maııua' riq'uin xbanunquíl li c'a'ru naxye li chak'rab taııcok' li kach'ol chiru li Dios. ²² Taııcobresik ban li kach'ol chiru li Dios riq'uin xpabanquíl li Kaııua' Jesucristo. Chixjunileb li te'pabank re, li Dios tixııcobresi lix ch'oleb. Moco jalan ta li junjunk chiru li Dios. ²³ Chixjunileb xe'maçob ut inc'a' neque'xc'ul li lok'al li naxq'ue li Dios. ²⁴ Ut xban li rusilal li Dios, chixjunileb li neque'paban, neque'xmatani xtııquılal xch'oleb sa' xc'aba' li Kaııua' Jesucristo laj Colonel. ²⁵ Li Dios quixtakla chak li Kaııua' Jesucristo chi camc re xcuybal xmaııueb li te'pabank re. Riq'uin li quixbanu quic'utun lix tııquılal xch'ol li Dios. Xban lix nimal xcuyum, inc'a' quixq'ue sa' xch'ol lix maııueb li tenamit li que'maçob chak junxil. ²⁶ Ut anakcuan sa' eb li cutan a'in, nac'utun lix tııquılal xch'ol li Dios riq'uin nak naxııcobresi xch'ol li ani napaban sa' xc'aba' li Jesucristo. ²⁷ ¿C'a'ru takanimobresi cui' kib? Maııa'. Inc'a' naru takanimobresi kib xban nak maııua' riq'uin xbanunquíl li naxye li chak'rab natııco' li kach'ol. Natııco' ban li kach'ol riq'uin xpabanquíl li Cristo. ²⁸ Nakanau nak taııcok' li kach'ol riq'uin xpabanquíl li Cristo. Maııua' riq'uin xbanunquíl li naxye li chak'rab. ²⁹ ¿Ma ca'aj cui' eb laj judııo te'colek' xban li Dios? Inc'a'. Li Dios tixcoleb ajcui' li maııua'eb aj judııo. ³⁰ Nakanau nak jun ajcui' li Dios. Ut a'an naxııcobresi xch'oleb laj judııo xban lix pabaleb jo' ajcui' li maııua'eb aj judııo. ³¹ ¿Ma nakasach xcuanquıl li chak'rab xban xpabanquíl li Cristo? Inc'a'. Riq'uin ban xpabanquıl li Cristo yoco chixq'uebal xcuanquıl li chak'rab.

4

Xban nak cuan xpabıl laj Abraham, jo'can nak quitııobresic xch'ol xban li Dios

¹ Anakcuan tinatinak chirix laj Abraham li kaxe'tonil yucua'. ¿Ma quitııobresic xch'ol chiru li Dios riq'uin lix yehom xbanuhom? Inc'a'. ² Cui ta riq'uin yehom xbanuhom quitııobresic xch'ol laj Abraham, cuan raj c'a'ru quixnimobresi cui' rib. Abanan maııua' raj chiru li Dios. ³ Tz'ııbanbil sa' li Santil Hu nak laj Abraham quixpab li c'a'ru quixye li Dios. Ut xban lix pabal, li Dios quixye nak laj Abraham a'an jun cuıınk tııc xch'ol. (Gn. 15:6) ⁴ Li ani natrabajic naxc'ul xtojbal. Lix tojbal naxc'ul a'an moco yal xmatan ta xban nak ac xtoj rix. ⁵ Aban li colba-ııb inc'a' natojman rix. A'an yal jun matan naxq'ue li Dios reheb laj maç li neque'paban re. Xban nak neque'paban, tııcobresinbileb xch'ol xban li Dios. ⁶ Laj David quixye nak us xak re li naxmatani xtııquılal xch'ol riq'uin li Dios chi maııua' xban xyehom xbanuhom. Yal chi matan ban naxc'ul lix tııquılal xch'ol. ⁷ Laj David quixye chi jo'ca'in:

Us xak reheb li cuybil sachbil xmaııueb, xban nak inc'a' chic nanak sa' xch'ol li Dios lix maııusilaleb.

⁸ Us xak reheb li inc'a' chic neque'c'oxlac lix maııueb xban li Dios. (Sal. 32:1-2)

⁹ ¿Ut aniheb li te'cuyek' te'sachek' lix maç? ¿Ma ca'aj cui' li que'xc'ul li circuncııon? Inc'a'. Reheb aj ban cui' li inc'a' que'xc'ul li circuncııon. Ac xinye li c'a'ru tz'ııbanbil sa' li Santil Hu chirix laj Abraham. Xban nak cuan xpabıl laj Abraham, li Dios quixye nak a'an jun cuıınk tııc xch'ol. (Gn. 15:6)

¹⁰ Laj Abraham maji' naxc'ul li circuncisión nak li Dios quixye nak li cuiñk a'an tic xch'ol. ¹¹ Mokon chic laj Abraham quixc'ul li circuncisión jo' retalil nak a'an jun cuiñk tic xch'ol chiru li Dios xban lix pabal. Laj Abraham quixpab li Dios nak maji' naxc'ul li circuncisión. Jo'can nak nayeman nak laj Abraham a'an xyucua'eb chixjunileb li neque'xpab li Dios ut neque'q'uehe' sa' ajl sa' xyankeb li tiq'ueb xch'ol usta inc'a' neque'xc'ul li circuncisión. ¹² Ut laj Abraham xyucua'eb ajcui' li que'xc'ul li circuncisión. Maçua' ca'aj cui' xban nak que'xc'ul li circuncisión. Xyucua'eb aj ban cui' xban nak que'xpab li Dios jo' nak quixpab li Dios laj Abraham nak toj maji' naxc'ul li circuncisión.

Xban li pabal nac'ulman li naxyechi'i li Dios

¹³ Li Dios quixyechi'i re laj Abraham jo' ajcui' reheb li rala' xc'ajol nak eb a'an te'echanink re li ruchich'och'. Maçua' riq'uin xbanunquil li naxye li chak'rab nak te'rechani. Quiyechi'ic ban reheb xban nak quipaban laj Abraham ut li Dios quixye nak laj Abraham a'an jun cuiñk tic xch'ol. ¹⁴ Cui ta ca'aj cui' li cuanqueb rubel xcuanquil li najter chak'rab li te'echanink re li yechi'inbil xban li Dios, maç'a' raj na-oc cui' li kapabal. Ut maç'a' raj na-oc cui' li yechi'inbil xban li Dios. ¹⁵ Nachal xjosk'il li Dios sa' xbeneb li neque'k'etoc re li chak'rab. Xban nak cuan li chak'rab, cuan li k'etoc atin. Cui ta maç'a' li chak'rab, maç'a' raj k'etoc atin. ¹⁶ Xban nak cuan xpabal laj Abraham, li Dios quixyechi'i li mañan re xban xñimal rusilal. Ut quixyechi'i ajcui' reheb chixjunileb li rala' xc'ajol. Li yechi'inbil maçua' ca'aj cui' reheb li cuanqueb rubel xcuanquil li chak'rab. Reheb aj ban cui' chixjunileb li neque'paban jo' nak quipaban laj Abraham. Jo'can nak nayeman nak laj Abraham a'an li kayucua' chikajunilo xban nak a'an laj c'amol be chiku sa' li kapabal. ¹⁷ Tz'ibanbil sa' li Santil Hu li quixye li Dios re laj Abraham: Xating'ue chok' xxe'tonil yucua' li q'uila tenamit. (Gn. 17:5)

Ut chiru li Dios toj cuan ajcui' xcuanquil li c'a'ru quixyechi'i re laj Abraham. Laj Abraham quixpab li Dios li nacuaclsin cui'chic reheb li camenak chi yo'yo ut yal riq'uin rañin naxyo'obtesihieb li c'a'ak re ru toj maç'a'. ¹⁸ Laj Abraham quixpab li quixye li Dios ut quiroybeni li quiyechi'ic re usta inc'a' naxnau chanru nak taq'uehek' re li rala' xc'ajol. Jo'can nak a'an xyucua'eb li q'uila tenamit jo' quiyeh'e' re xban li Dios, —Te'q'uiñk la cualal aç'ajol, chu'ux re xban li Dios. (Gn. 15:5) ¹⁹ Ca'ch'in chic ma' o'c'al chihab cuan re laj Abraham. A'an naxnau nak xban xtixilal inc'a' raj chic taçuanq rala' xc'ajol. Ut naxnau ajcui' nak li Sara inc'a' naq'uiresin. Aban inc'a' quich'inan xch'ol laj Abraham. Quixpab ban chi tz'akal nak taçuanq rala' xc'ajol. ²⁰ Inc'a' quixcuiba xch'ol chi moco quixcanab roybeninquil lix mañan li quiyechi'ic re xban li Dios. Cacuuc ban chic quixbanu sa' lix pabal ut quixlok'onil li Dios. ²¹ Laj Abraham quixpab chi anchal xch'ol nak li Dios k'axal nim xcuanquil ut tixq'ue li c'a'ru naxyechi'i. ²² Ut xban lix pabal laj Abraham, li Dios quixye nak a'an jun cuiñk tic xch'ol. ²³ Ut moco ca'aj cui' ta sa' xc'aba' laj Abraham nak quitz'ibac retalil nak tic xch'ol xban lix pabal. ²⁴ Quitz'ibac aj ban cui' sa' kac'aba' lao. Li Dios naxye nak tic ajcui' li kach'ol lao cui takapab chi tz'akal li quicuaclsin re li Kaçua' Jesucristo chi yo'yo sa' xyankeb li camenak. ²⁵ Li Jesucristo quixk'axtesi rib chi camc xban li kamac ut quicuacli cui'chic chi yo'yo sa' xyankeb li camenak re xtìcobresinquil li kach'ol chiru li Dios.

5

Chanru nak natauman li tiq'uil ch'olej

¹ Jo'can ut nak ticobresinbil chic li kach'ol chiru li Dios xban li kapabal, ut cuanco chic sa' usilal riq'uin li Dios xban li Kaçua' Jesucristo. ² Xban

nak nakapab li Jesucristo nakac'ul lix nimal rusilal li Dios. Jo'can nak cau kach'ol sa' li kapabal. Ut nasaho' kach'ol xban nak nakanau nak totz'akonk ajcui' sa' lix nimal xlok'al li Dios. ³ Ut moco ca'aj cui' ta nasaho' kach'ol nak totz'akonk sa' lix lok'al li Dios. Nasaho' aj ban cui' sa' kach'ol nak nakac'ul li raylal. Nakanau nak riq'uin xc'ulbal li raylal nakatzol li cuyuc. ⁴ Ut xban li cuyuc nacacuu kach'ol sa' li kapabal, ut xban xcacuulal kach'ol nakayo'oni li yechi'inbil ke xban li Dios. ⁵ Li c'a'ru nakayo'oni nakanau nak takac'ul, xban nak k'axal nocoxra li Dios ut naxc'ut chiku lix nimal xraham xban li Santil Musik'ej li q'uebil chak ke. ⁶ Lao inc'a' naru nakacol kib yal kajunes. Abanan quicuulac xk'ehil nak quicam li Kaçua' Jesucristo re kacolbal lao aj maç. ⁷ Moco yalak ani ta tixq'ue rib chi camc sa' xc'aba' junak ras rjtz'in usta chabil li ras rjtz'in chiru. Abanan cui k'axal tjç xch'ol li ras rjtz'in, mare cuan ajcui' junak tixq'ue rib chi camc sa' xc'aba' a'an. ⁸ A'ut li Dios naxc'utbesi chiku nak k'axal nocoxra xban nak toj aj maço chak nak quicam li Cristo sa' kac'aba'. ⁹ Ut anakuan tjç chic li kach'ol chiru li Dios xban xcamic li Jesucristo. Jo'can nak relic chi yal nak sa' xc'aba' li Cristo tocolek' chiru lix josk'il li Dios sa' xk'ehil li rakba atin. ¹⁰ Nak toj aj maço chak xic' nakil li Dios. Aban li Dios xoxc'am sa' usilal riq'uin sa' xc'aba' lix camic li Ralal. Ut anakuan nakanau chic nak cuanco sa' usilal riq'uin li Dios ut colbilo xban nak li Cristo quicuaclicui' chic chi yo'yo. ¹¹ Ut moco ca'aj cui' ta li kacolbal quixq'ue li Dios. Naxq'ue aj ban cui' lix sahilal kach'ol sa' xc'aba' li Kaçua' Jesucristo li quic'amoc ke sa' usilal riq'uin li Dios. ¹² Jo'ca'in nak quiticla li maç sa' ruchich'och', yal xban jun chi cujnk aj Adán xc'aba'. Ut xban li maç cuan li camc ut chixjunileb neque'cam xban nak chixjunileb xe'maçob. ¹³ Nak toj maji' quiq'uehe' li chak'rab re laj Moisés, ac cuan li maç sa' ruchich'och'. Aban inc'a' nayeman nak cuanqueb xmaç xban nak toj maç'a' li chak'rab re xc'utbal chiruheb nak a'an eb aj maç. ¹⁴ Chalen nak quicuan chak laj Adán toj nak quiq'uehe' lix chak'rab laj Moisés, chixjunileb quilaje'cam usta inc'a' que'maçob riq'uin xk'etbal xchak'rab li Dios jo' quixbanu laj Adán nak quixk'et li atin li quiehe' re xban li Dios. Xban laj Adán quiticla chak li maç ut li camc, ut xban li Cristo cuan li colba-ib ut li yu'am chi junelic. ¹⁵ A'ut li mañan naxq'ue li Dios moco juntak'et ta riq'uin li maç quixbanu laj Adán li xben cujnk. Li camc cuan sa' xbeneb chixjunileb xban nak quik'etoc atin laj Adán. Aban sa' xc'aba' li Jesucristo nabaleb neque'xc'ul li colba-ib li naxq'ue li Dios. Ut k'axal cui'chic numtajanak li rusilal naxq'ue ke. ¹⁶ Li maç quixbanu laj Adán inc'a' naru xjuntak'etanquil riq'uin li colba-ib quixq'ue li Dios xban nak k'axal nim xcuanquil li colba-ib. Xban nak quimaçob laj Adán, jo'can nak cuan li tojba maç. Aban li mañan li naxq'ue li Dios naxtjçobresi li kach'ol ut sa' xc'aba' li Jesucristo nabaleb te'colek'. ¹⁷ Xban lix maç laj Adán, chixjunileb cuanqueb rubel xcuanquil li camc. Aban xban xnimal rusilal li Dios, nabaleb te'xc'ul li mañan li naxq'ue li Dios, a' li tjiquil ch'olej, ut taçuank xcacuul xch'oleb sa' lix pabaleb sa' xc'aba' li Kaçua' Jesucristo. ¹⁸ Xban lix k'etba atin laj Adán cuan li tojba maç sa' xbeneb chixjunileb li cuanqueb sa' ruchich'och'. A'ut xban lix tjiquilal xch'ol li Cristo, maç'a' chic xcuanquil li tojba maç sa' xbeneb. Cuank ban chic xyu'ameb chi junelic. ¹⁹ Jo'can nak xban lix k'etba atin laj Adán, nabaleb que'cana chok' aj maç. Ut xban nak li Jesucristo quixbanu li c'a'ru quixye li Dios, nabaleb te'tjçok' xch'ol chiru li Dios. ²⁰ Li chak'rab quiq'uehe' re xc'utbal nak numtajanak li maç. Ut nak quinumta li maç, k'axal cui'chic quinumta li rusilal li Dios sa' xben li maç. ²¹ Xban nak cuan li maç, cuan ajcui' li camc. Abanan xban xnimal rusilal, li Dios naxq'ue xtiqulal li kach'ol ut li kayu'am chi junelic sa' xc'aba' li Kaçua' Jesucristo.

6

Camenako xban li maç, aban yo'yoço sa' xc'aba' li Jesucristo

¹ ¿C'a'ru takaye chirix chixjunil a'in? ¿Ma toj yoço ajcui' chixbanunquil li maç re nak k'axal cui'chic tanumtak li rusilal li Dios sa' kaben? ² ¡Ma jok'e! Mamin taruk. Chanchan nak ac camenako lao xban nak moco cuan ta chic xcuanquil li maç sa' kaben. Cui maç'a' chic xcuanquil li maç sa' kaben, ¿c'a'ut nak toj yoço chi maçobc? ³ Relic chi yal nequenau nak lao xkac'ul li cubi ha' xban nak xkapab li Jesucristo. Nak xkac'ul li cubi ha' chanchan nak xocam kochben li Jesucristo xban nak xkacaban xbanunquil li kanajter na'leb. ⁴ Jo'can nak rig'uin xc'ulbal li cubi ha', chanchan nak ac xocam ut xomuke' kochben li Cristo re nak tocuaclik cui'chic chi yo'yo ut tocuank sa' li aq'uil yu'am, jo' nak li Jesucristo quicuacli cui'chic chi yo'yo sa' xyankeb li camenak rig'uin xymal xlok'al ut xcuanquil li Dios Acuabej. ⁵ Cui lao xotz'akon kochben li Cristo sa' lix camic, jo'can ajcui' nak totz'akon sa' lix cuaclijic cui'chic chi yo'yo sa' li ac' yu'am. ⁶ Nakanau nak li kanajter na'leb quiq'uehe' chiru cruz rochben li Cristo. Naraj naxye nak quisache' xcuanquil li kanajter na'leb nak quicam li Cristo. Ut anakuan inc'a' chic cuanco rubel xcuanquil li maç jo' nak xocuan chak junxil nak xkac'anjela chak ru li maç. ⁷ Li ac xcam inc'a' chic namaçob. Jo'can ajcui' lao cui camenak chic li kanajter na'leb, inc'a' chic yoço chixbanunquil li maç. ⁸ Cui ac xocam kochben li Cristo, nakanau nak yo'yoço ajcui' kochben sa' li ac' yu'am. ⁹ Lao nakanau nak li Jesucristo quicuacli cui'chic chi yo'yo sa' xyankeb li camenak. Li Cristo inc'a' chic taçamk xban nak maç'a' chic xcuanquil li cam sa' xben. ¹⁰ Jun sut ajcui' quicam li Cristo ut anakuan yo'yo chic. Quicam re xsachbal xcuanquil li maç. Ut anakuan yo'yo chic li Cristo re xq'uebal xlok'al li Dios. ¹¹ Jo'can ajcui' laex. Cheq'uehak retal nak chanchan ajcui' nak camenakex ut maç'a' chic xcuanquil li maç sa' eben. Ac' chic le yu'am q'uebil ere xban li Kaçua' Jesucristo ut junajex chic rig'uin. Yo'yoçquex re nak textc'anjelak chiru li Dios. ¹² Jo'can nak meq'ue chic erib rubel xcuanquil li maç ut mebanu chic li c'a'ru naxrahi ru le ch'ol. ¹³ Chi moco cheq'ue erib chixbanunquil li maçusal. Chek'axtesi ban erib sa' ruk' li Dios. Xban nak ac xec'ul li ac' yu'am chanchan nak xexcuacli cui'chic chi yo'yo sa' xyankeb li camenak. Jo'can nak cheq'ue le rok eruk' chi c'anjelak chiru li Dios re xbanunquil li us. ¹⁴ Inc'a' chic cheq'ue erib rubel xcuanquil li maç. Anakuan cuanquex rubel xcuanquil lix nimal rusilal li Dios. Moco cuanquex ta chic rubel xcuanquil li chak'rab li quiq'uehe' re laj Moisés.

Inc'a' chic toc'anjelak chiru li maç

¹⁵ Anakuan cuanco sa' rusilal li Dios. Moco cuanco ta chic rubel xcuanquil li chak'rab. ¿Ma yal xban nak inc'a' cuanco rubel xcuanquil li chak'rab nak tomaçobk? ¡inc'a' bi'an! ¹⁶ Ac nequenau nak cui teq'ue erib chi c'anjelak chiru junak patrón, a'an chic tatakank ere. Jo'can ajcui' cui teq'ue li maç chok' epatrón ut teq'ue erib chok' aj c'anjel chiru, texcank. Aban cui teq'ue erib chi taklac xban li Dios, taçicobresik le ch'ol. ¹⁷ Junxil cuanquex rubel xcuanquil li maç. A'ut anakuan, bantiox re li Dios, chi anchal ech'ol nequepab li tijleb li xek'axtesi cui' erib. ¹⁸ Anakuan colbilex chic chiru li maç. Ut xek'axtesi erib jo' aj c'anjel chiru li Dios chixbanunquil li tiçuilal. ¹⁹ Ninch'olob xyalal cheru rig'uin xserak'inquil chirix li nakac'ul arin sa' ruchich'och' re nak tetau ru li ninye. Junxil xek'axtesi erib chixbanunquil li jo' majo'il na'leb ut li c'a'ak re ru chi maçusal. A'ut anakuan, chek'axtesihak erib chixbanunquil li tiçuilal re nak textcuank sa' santilal chiru li Dios. ²⁰ Nak

toj nequec'anjela chak ru li maç, maç'a' na-oc cui' ere li tiçuilal. ²¹ ¿C'a'ru le k'ajcamunquíl xec'ul nak xebanu chak li maúsilal? Maç'a'. Ca'aj cui' xec'ut chak exutan. Li c'a'ru naxq'ue li maç, a'an li camc. ²² Anakcuan colbilex chic chiru li maç ut k'axtesinbilex chic chi c'anjelac chiru li Dios. Ut le k'ajcamunquíl a'an le santobresinquíl ut le yu'am chi junelic. ²³ Lix tojbal rix li maç, a'an li camc. Aban li maçan naxq'ue ke li Dios, a'an li junelic yu'am sa' xc'aba' li Kaçua' Jesucristo laj Colol ke.

7

Li chak'rab naxc'ut chiku c'a'ru li maç

¹ Ex herman, læex nequenau c'a'ru naxye sa' li chak'rab. Nequenau nak li chak'rab cuan xcuanguíl sa' xbeneb li toj yo'yoqueb. ² Nak nasumla junak ixk junaj chic ru riç'uin lix belom. Tz'ibanbil sa' li chak'rab nak inc'a' chic naru neque'xjach rib a' yal jo' najtil yo'yok li belomej. Aban cui nacam li belomej, li camc najachoc reheb ut li ixk nacana xjunes. ³ Cui toj yo'yo lix belom ut naxsume jalan chic cujnk, a'an naxmux ru lix sumlajic. Cui nacam li belomej, maç'a' chic xcuanguíl li chak'rab a'an sa' xben li ixk. Moco tixmux ta chic ru lix sumlajic cui nasumla riç'uin jalan chic cujnk. ⁴ Jo'can ajcui' lao, ex inherman. Xban nak xkapab li Jesucristo chanchan kochben nak quicam li Cristo. Ut maç'a' chic xcuanguíl lix chak'rab laj Moisés sa' kaben. Ut maç'a'o chic rubel xcuanguíl li chak'rab. Lao reho chic li Cristo li quicuacuí cui'chic chi yo'yo sa' xyankab li camenak re nak toc'anjelac chiru li Dios. ⁵ Junxil xkabanu chak li c'a'ru inc'a' us li quixrahi chak ru li kach'ol. Li chak'rab quixc'ut chiku c'a'ru li inc'a' us ut a' chic li inc'a' us quicuulac chiku xbanunquíl. Ut riç'uin xbanunquíl a'an cuan li camc. ⁶ A'ut anakcuan chanchan li camenako xban nak li najter chak'rab maç'a' chic xcuanguíl chok' ke lao. Maçua' chic li chak'rab yal re sa' kaben. Ut inc'a' chic yoco chi c'anjelac rubel xcuanguíl li chak'rab tz'ibanbil chak najter. Anakcuan nococ'anjelac chiru li Dios sa' li ac' yu'am li naxq'ue ke li Santil Musik'ej.

Li chak'rab ut li maç

⁷ ¿C'a'ru takaye chirix a'in? ¿Ma takaye nak inc'a' us li chak'rab? Inc'a'. Ma jok'e takaye chi jo'can. Ninye ere nak cui ta maç'a' li chak'rab, inc'a' raj xinnau c'a'ru li maç. Moco xinnau ta raj nak inc'a' us xrabal ru li jalan aj e, cui ta inc'a' tz'ibanbil sa' li chak'rab chi jo'ca'in: Ma ra ru li c'a'ru re la çuas açuítz'in. ⁸ Li chak'rab quic'utuc chicuu c'a'ru li maç. Xban nak ac ninnau chic c'a'ru li maç, k'axal cui'chic quinq'ue inch'ol chixbanunquíl. Cui ta maç'a' li chak'rab maç'a' raj li maç. ⁹ Nak toj maji' ninnau c'a'ru naxye li chak'rab, moco ninc'oxla ta nak lain aj maç ut inc'a' xinnau nak inc'ulub ta li camc. Aban nak xinnau li chak'rab, xinnau nak lain aj maç. Ut cue li camc. ¹⁰ Li chak'rab xq'ue raj inyu'am, abanan nak quicuabi chanchan incamsinquíl quixbanu. ¹¹ Li chak'rab çabil ut xq'ue raj cue li yu'am, abanan li maç xinixbalak'i. Ut xban li chak'rab, li maç xinbanu xq'ue li camc sa' inben. ¹² Relic chi yal nak li chak'rab q'uebil chak xban li Dios, a'an santil chak'rab, ut li kataklanquíl xban li Dios santo ajcui', tiç ut çabil. ¹³ ¿Ma taruk tinye nak li çabil chak'rab quic'amoc chak li camc sa' inben? Inc'a'. Inc'a' naru tinye chi jo'can xban nak maçua' li chak'rab quic'amoc chak re li camc. Aban li maç quic'amoc chak re li camc sa' inben. Li chak'rab quixc'ut chicuu lix yibal ru li maç. Jo'can nak li çabil quixc'ut chicuu li inc'a' us. Ut li inc'a' us a'an li maç. ¹⁴ Nakanau nak li chak'rab musik'anbil xban li Dios. Aban lain yal cujnk. Jo'can nak ninmaçob. ¹⁵ Inc'a' nintau ru c'a'ut nak ninbanu li inc'a' us. Nacuaj raj xbanunquíl li us, abanan a' chic li inc'a' us li ninbanu.

Xic' raj nacuil li inc'a' us aban a'an chic li ninbanu. ¹⁶ A' chic li inc'a' nacua'j xbanunqu'il, a'an chic li ninbanu ut riq'uin a'an ninq'ue retal nak li chak'rab chabil xban nak naxc'ut chicuu nak inc'a' us li ninbanu. ¹⁷ Jo'can nak macua' chic lain li ninbanun re li inc'a' us, aban li mac li cuan cuiq'uin, a'an natakan cue. ¹⁸ Lain ninnau nak moco chabilin ta. Chalen sa' inyo'lajic lain chak aj mac. Nacua'j raj xbanunqu'il li us, abanan inc'a' ninru chixbanunqu'il. ¹⁹ Lain nacua'j raj xbanunqu'il li us, aban inc'a' ninbanu. A' chic li mausilal ninbanu, li inc'a' raj nacua'j xbanunqu'il. ²⁰ Cui lain ninbanu li inc'a' nacua'j xbanunqu'il, macua' chic lain ninbanun re; aban li mac li cuan cuiq'uin, a'an li natakan cue. ²¹ A'an a'in li ninc'ul: Nak nacua'j raj xbanunqu'il li us, a' chic li inc'a' us li ninbanu. ²² Nasaho' sa' lin ch'ol riq'uin lix chak'rab li Dios ut a'an li nacua'j xbanunqu'il. ²³ Aban xban nak yal cujinkin, nacuec'a nak cuan jun li ch'a'ajqu'ilal sa' li cuam naramoc re chicuu li us li nacua'j raj xbanunqu'il. Ut li ch'a'ajqu'il a'an, a'an li mac li toj cuan cuiq'uin, ut chanchan li cuanquin chi prexil xban. ²⁴ jC'ajo' xtok'obal cuu! ¿Ani tacolok cue chiru lin najter na'leb li nac'amoc chak re li camc sa' inben? ²⁵ Ca'aj cui' li Ka'cua' Jesucristo tacolok cue chiru lin najter na'leb. Ac xink'axtesi cuib rubel xcuanqu'il lix chak'rab li Dios ut ac' chic lin na'leb. Ninq'ue inch'ol chixpabanqu'il li Dios, aban xban nak yal cujinkin, toj cuan lin najter na'leb cuiq'uin. Abanan ninbantioxi chiru li Dios xban nak li Ka'cua' Jesucristo tatenk'ank cue re nak tincanab xbanunqu'il lin najter na'leb.

8

Li Santil Musik'ej nocoxtenk'a chi cuanc sa' tiqu'ilal

¹ Anakcuan ut mac'a' chic li tojba mac sa' xbeneb li neque'paban re li Cristo, li inc'a' chic neque'xbanu li neque'xrahi ru lix ch'oleb. Neque'xbanu ban li naraj li Santil Musik'ej. ² Lix cuanqu'il li Santil Musik'ej li naq'uehoc yu'am sa' xc'aba' li Jesucristo, a'an nacoloc cue chiru lix cuanqu'il li mac ut li camc. ³ Li najter chak'rab inc'a' naru toxcol chiru li mac ut li camc. Mac'a' xcuanqu'il re kacolbal xban nak inc'a' nocoru chixbanunqu'il li naxye. Inc'a' nocoru chixbanunqu'il li naxye xban nak chalen chak sa' kayo'lajic lao aj mac. Aban li Dios xoxcol chiru li mac. Quixtakla chak li Jesucristo li Ralal chi tz'eju'aloc' sa' ruchich'och'. Li Ka'cua' Jesucristo quixmayeja rib re xsachbal xcuanqu'il li mac. ⁴ Li Cristo quixsach xcuanqu'il li mac re nak naru takabanu li tiqu'ilal jo' naxye sa' li chak'rab. Inc'a' chic takabanu li naxrahi ru li kach'ol. Anakcuan takabanu li c'a'ru naxye li Santil Musik'ej. ⁵ Ut eb li toj neque'xbanu li najter na'leb, ca'aj cui' li c'a'ru naxrahi ru lix ch'oleb neque'xc'oxla xbanunqu'il. Abanan eb li neque'cuan jo' naxye li Santil Musik'ej, eb a'an neque'xq'ue xch'ol chixbanunqu'il li c'a'ru naraj li Santil Musik'ej. ⁶ Cui ca'aj cui' li naxrahi ru li kach'ol nakac'oxla, a'an naxc'am chak li camc sa' kaben. Cui nakaq'ue kach'ol chixbanunqu'il li naraj li Santil Musik'ej, a'an naxq'ue ke li kayu'am chi junelic ut naxq'ue ajcui' ke li tuktuqu'il usilal. ⁷ Li toj yoqeb chixbanunqu'il li naxrahi ru lix ch'oleb, cuanqueb sa' xiq'u'ilal riq'uin li Dios ut inc'a' neque'raj xcubsinqu'il rib rubel xcuanqu'il lix chak'rab li Dios chi moco neque'ru chixbanunqu'il. ⁸ Jo'can nak li toj neque'xbanu li naxrahi ru lix ch'oleb, inc'a' nasaho' xch'ol li Dios riq'uin li neque'xbanu. ⁹ Abanan laex inc'a' chic yoquex chixbanunqu'il li naxrahi ru le ch'ol. Yoquex ban chixbanunqu'il li c'a'ru naraj li Santil Musik'ej cui yal nak cuan li Santil Musik'ej eriq'uin. Li ani mac'a' li Santil Musik'ej riq'uin, a'an macua' re li Cristo. ¹⁰ Cui li Cristo cuan eriq'uin, usta ac tenebanbil li camc sa' eben xban li mac, yo'yo le musik' xban nak ticobresinbil chic le

ch'ol xban li Dios. ¹¹ Li Santil Musik'ej, a'an li quicuaclesin cui'chic re chi yo'yo li Cristo sa' xyankeb li camenak. Cui li Santil Musik'ej quicuaclesin re li Cristo, a'an ajcui' taçuaclesin re le tz'ejcual chi yo'yo re li junelic yu'am xban nak li Santil Musik'ej cuan eriç'uin. ¹² Jo'can ut ex inherman, tento nak tebanu li naraj li Santil Musik'ej ut maçu'a' li c'a'ru naxrahi ru le ch'ol. ¹³ Cui toj yoquex chixbanunquill li naxrahi ru le ch'ol, texcamk. Aban cui riç'uin etenkanquill xban li Santil Musik'ej, tecanab xbanunquill le yehom ebanuhom li quilajebanu chak junxil, taçuank eyu'am chi junelic. ¹⁴ Chixjunileb li nequebanun re li c'a'ru naraj li Santil Musik'ej, a'aneb tz'akal ralaç'ajol li Dios. ¹⁵ Laex xec'ul li Santil Musik'ej ut mac'a' chic exiu. Moco jo'quex ta junak li moç naxxucua ru lix patrón. Xban nak li Santil Musik'ej cuan kiç'uin, laç ban tz'akal ralaç'ajol li Dios. Jo'can nak nakaye "at inYucua'" re nak nocotijoc. ¹⁶ Li Santil Musik'ej naxch'olob xyalal chiku, ut nakec'a sa' li kam nak laç chic ralaç'ajol li Dios. ¹⁷ Ut xban nak laç ralaç'ajol li Dios, kochben li Cristo nak takeçhani chixjunil li quixyechi'i ke li Dios. Cui totz'akonk riç'uin li raylal li quixc'ul li Cristo, jo'can nak toxotz'akonk ajcui' kochben sa' lix nimal xlok'al. ¹⁸ Lain ninye nak li raylal yoço chixc'ulbal anakuan inc'a' takaç'ue sa' kach'ol xban nak moco juntak'et ta riç'uin li usilal takac'ul mokon xban nak numtajanek cui'chic lix nimal xlok'al li rusilal li Dios tixq'ue ke. ¹⁹ Chixjunil li c'a' re ru yibanbil xban li Dios yoçueb chi xyo'oninquill nak taçuulak xk'ehil nak li Dios tixq'ue xlok'aleb li ralaç'ajol. ²⁰ Li ruchich'och' tz'ektananbil xban li Dios. Moco yal quiraj ta nak quitz'ektanaç. Xban nak ac jo'can chak sa' xch'ol li Dios. Abanan li ruchich'och' toj yo chixyo'oninquill nak taçolek'. ²¹ Jo'can nak li ruchich'och' taçolek' chiru li tz'ektanaç. Ut xban xnimall rusilal li Dios, taçolek' li ruchich'och', jo' nak te'colek' li ralaç'ajol li Dios. ²² Nakanau nak li ruchich'och' chalen anakuan cuan sa' raylal ut yo chiroybeninquill nak tausak. Li ruchich'och', a'an jo' jun li ixk yo chixc'ulbal li raylal nak ac q'uiraç re. ²³ Macua' ca'aj cui' li ruchich'och' naxc'ul li raylal. Nayot'e' ajcui' li kach'ol laç aj pabanel xban li raylal nakac'ul, usta ac xkac'ul li Santil Musik'ej. Li Santil Musik'ej a'an xben li kamaçan naxq'ue ke li Dios. Yoço chiroybeninquill nak li Dios toxç'ul jo' tz'akal ralaç'ajol ut tajalak li katz'ejcual ut tixq'ue li kalok'al. ²⁴ Xban nak nocopaban, colbilo. Aban cuan ajcui' li maçan toj maji' nakac'ul ut a'an li toj yoço chiroybeninquill. Cui ta ac xkac'ul chixjunil, inc'a' raj chic yoço chi oybeninc. ²⁵ Aban li c'a'ru nakoybeni inc'a' nakil ru ut tento takacuy roybeninquill. ²⁶ Ut li Santil Musik'ej nocoxtenk'a xban nak maç'a' naru nakabanu kajunes. Inc'a' nakanau chanru nak totijok chi moco nakanau c'a'ru takatz'ama. Aban li Santil Musik'ej natz'aman chixk chiru li Dios riç'uin yot'ba ch'olej inc'a' naru xyebal yal riç'uin atin. ²⁷ Li Dios naxnau c'a'ru cuan sa' kach'ol ut naxnau ajcui' lix c'a'ux li Santil Musik'ej. Ut li Santil Musik'ej natz'aman chixk laç aj pabanel jo' naraj li Dios.

Li Jesucristo naxc'ut chiku nak li Dios nocoxra

²⁸ Li Dios naxsuk'isi chok' usilal chixjunil li c'a'ak re ru neque'xc'ul li neque'rahoc re li Dios, a' li bokbileb chixbanunquill li c'a'ru naraj li Dios. ²⁹ Chalen sa' xtiçlajic li Dios quixnau aniheb li te'pabank re. Jo'can nak quixsiç'ueb ru ut quixc'uleb chok' ralaç'ajol. Quixxakab li Jesucristo li Ralal re nak a'anak li xben alalbej sa' xyankeb li ralaç'ajol. ³⁰ Najter chak k'e cutan li Dios ac cuan sa' xch'ol ani li sic'bileb ru xban, ut li sic'bileb ru a'an li quixbokeb; ut li quixbokeb, quixt'icobresi lix ch'oleb ut naxq'ueheb ajcui' xlok'al. ³¹ ¿C'a'ru takaye chirix a'in? Cui li Dios cuan kiç'uin, eb li xic' neque'iloc ke inc'a' te'numtaç sa' kaben. ³² Usta li Acuabej Dios k'axal

raro li Lalal xban, inc'a' quixcol chiru li camc. Quixk'axtesi ban chi camc sa' kac'aba' lao. Cui quixq'ue li Lalal re camc, *¿ma inc'a' ta bi' tixq'ue ke chixjunil li c'a'ak re ru quixyechi'i ke?* ³³ *¿Ani taruk tayehok re nak cuanqueb xmac li sic'bileb ru xban li Dios? Ma ani, xban nak li sic'bileb ru ticobresinbileb chic lix ch'ol chiru li Dios.* ³⁴ *¿Ani taruk taq'uehok reheb laj pabanel sa' tojba mac? Ma ani xban nak li Jesucristo quicam sa' kac'aba' ut li Dios quixcuaclesi cui'chic chi yo'yo sa' xyankeb li camenak. Anakcuan a'an cuan sa' xnim uk' li Dios ut yo chi atinac chixix chiru li Dios.* ³⁵ *¿C'a'ru taruk taisink ke riq'uin li Cristo li narahoc ke? Mac'a'. Li ra xic' inc'a' naru torisi, chi moco li raylal, chi moco li ch'a'ajquilal, chi moco li xic' ilec', chi moco li cue'ej, chi moco li cuanc sa' neba'il, chi moco li camsjc. Mac'a' naru taisink ke riq'uin li Cristo li narahoc ke.* ³⁶ *Jo'ca'in tz'ibanbil sa' li Santil Hu:*

Cuulaj cuulaj yoqueb chixc'oxlanquil kacamsinquil sa' ac'aba'. Chiruheb a'an chanchano li carner li neque'c'ame' chi camsjc. (Sal. 44:22)

³⁷ *Aban li Jesucristo nocoxra ut nocoxtenk'a chixcuybal ut chixnumsinquil chixjunil li raylal nakac'ul.* ³⁸ *Ninnau chi tz'akal nak mac'a' naru taisink ke riq'uin lix rahom li Dios. Li camc inc'a' naru torisi riq'uin lix rahom chi moco li c'a'ak re ru nakac'ul sa' li kayu'am. Eb li angel inc'a' naru toe'risi chi moco eb li cuanqueb xcuanquil sa' ruchich'och', chi moco lix cuanquil li c'a'ak re ru chi musik'ejil. Li c'a'ak re ru nakac'ul anakcuan inc'a' naru torisi riq'uin xraham li Dios chi moco li c'a'ak re ru tachalk.* ³⁹ *Li c'a'ak re ru cuan takec', chi moco li c'a'ak re ru cuan tak'a sa' ruchich'och' inc'a' naru torisi riq'uin lix rahom li Dios. Chi yal, mac'a' naru taisink ke riq'uin lix rahom li Dios. Quixc'ut chiku nak nocoxra nak quixq'ue li Jesucristo chi camc re kacolbal.*

9

Li Dios quixsiq'ueb ru laj Israel

¹ *Yoquin chixyebal li xyalal xban nak ninpab li Jesucristo. Inc'a' nintic'ti'ic. Nacuec'a sa' lin ch'ol nak yal li ninye ut li Santil Musik'ej nac'utuc chicuunak nak yal.* ² *Ra nacuec'a ut nayote'e' inch'ol xban nak eb laj judio lin tenamit inc'a' neque'raj xpabanquil li Cristo.* ³ *Tinq'ue raj cuib chi tz'ektanac ut chi isic riq'uin li Cristo cui ta riq'uin a'an taruk tebintenk'a re te'colek'.* ⁴ *A'an eb li lalal xc'ajol laj Israel. Li Dios quixsiq'ueb ru ut quixc'uleb chok' lalal xc'ajol, ut quixc'ut lix lok'al chiruheb retalil nak cuan riq'uineb. Quixbanu li contrato riq'uineb ut quixq'ue lix chak'rab reheb. Quic'ute' chiruheb chanru te'xlok'oni li Dios sa' xyalal ut cuan c'a' re ru quixyechi'i li Dios reheb.* ⁵ *A'aneb li lalal xc'ajol li kaxe'tonil yucua' laj Abraham, laj Isaac ut laj Jacob. Ut sa' xyankeb a'an quiyola li Cristo nak quitz'ejcualo' ut cuan'ulun sa' ruchich'och'.* *Lok'oninbil taxak chi junelic li Cristo li k'axal nim xcuanquil sa' xbeneb chixjunileb. Jo'can taxak.* ⁶ *Li Dios quixq'ue li quixyechi'i reheb laj Israel. Aban moco chixjunileb ta que'xc'ul li yechi'inbil xban li Dios xban nak moco chixjunileb ta tz'akaleb aj Israel. Aban inc'a' ninye nak li Dios inc'a' quixq'ue li quixyechi'i reheb laj Israel.* ⁷ *Cuanqueb li lalal xc'ajol laj Abraham inc'a' que'xc'ul li quixyechi'i li Dios xban nak macua'eb a'an li lalal xc'ajol li yechi'inbil re laj Abraham najter xban li Dios nak quixye re: Sa' xc'aba' laj Isaac te'cuank la cualal ac'ajol li xinyechi'i acue. (Gn. 21:9-12)* ⁸ *A'in naraj naxye nak moco chixjunileb ta li lalal xc'ajol laj Abraham sic'bileb ru xban li Dios. Ca'aj cui' li yechi'inbil re xban li Dios, a'aneb li tz'akal lalal xc'ajol li Dios.* ⁹ *A'an a'in li quixyechi'i li Dios re laj Abraham nak quixye re: Nak tolinelk sa' li chihab jun chic, lix Sara cuank chic lix c'ula'al telom. (Gn. 18:10)* ¹⁰ *Lix Rebeca quicuan cuib lix coc'al ut junaj lix yucua'eb. Lix yucua'eb*

a'an, a'an laj Isaac li kaxe'tonil yucua'. ¹¹ Toj maji' neque'yo'la lix coc'al lix Rebeca nak quisiq'ue' ru li jun xban li Dios. Moco riq'uin ta lix yehom xbanuhom nak quisiq'ue' ru xban nak maji' neque'xbanu li us chi moco li inc'a' us. Riq'uin a'an nakanau nak li Dios inc'a' naxsic' ru junak riq'uin lix yehom xbanuhom. Naxsic' ban ru jo' naraj a'an. ¹² Li Dios quiatnac riq'uin lix Rebeca ut quixye re nak li asbej tac'anjelak chiru li itz'inbej. ¹³ Tz'ibanbil sa' li Santil Hu li ratin li Dios li quixye: Lain xinsic' ru laj Jacob, ut laj Esaú xintz'ektana. (Mal. 1:2) ¹⁴ ¿C'a'ru takaye chirix a'an? ¿Ma takaye nak maçua' tiquilal li naxbanu li Dios? Ma jok'e takaye chi jo'can. ¹⁵ Inc'a' naru takaye a'an xban nak a'in li quixye li Dios re laj Moisés: Lain tincuil xtok'obaleb ru li ani nacua'j xtok'obanquil ru, ut tincuuxtana ajcui' ru li ani nacua'j ruxtananquil ru. (Ex. 33:19) ¹⁶ Li sic'bil ruheb moco sic'bileb ta ru xban nak jo'can neque'raj eb a'an chi moco riq'uin ta xyehom xbanuhomeb. Yal riq'uin ban xanimal ruxtan li Dios nak sic'bil ruheb. ¹⁷ Jo'ca'in nak tz'ibanbil sa' li Santil Hu li atin li quixye li Dios re laj Faraón: Xatinxakab chok' xreyeb laj Egipto re nak tac'utunk lin cuanquilal aban. Chi jo'can tayemank cuesilal yalak bar sa' chixjunil li ruchich'och'. (Ex. 9:16) ¹⁸ Jo'can nak li Dios naril xtok'obal ru li ani naraj xtok'obanquil ru ut naxcacuubresi xch'ol li ani naraj xcacuubresinquil xch'ol sa' li mausilal.

Li Dios naq'uehoc sa' tojba maç ut na-uxtanan u

¹⁹ Mare nacaye chi jo'ca'in, Cui li Dios naxcacuubresi xch'ol junak sa' li mausilal, ¿chanru nak li Dios tixye nak cuan xmaç junak? Cui jo'can naraj li Dios, ¿ani taruk tapo'ok ru li c'a'ru naraj li Dios? mare chancat. ²⁰ Aban lain tixye açue, ¿anihat laät nak tacuech'i rix li c'a'ru naxbanu li Dios? Junak li cuc inc'a' taruk tixye re laj pac'ol re, ¿C'a'ut nak xinayib chi jo'ca'in? ²¹ A' yal re laj pac'onel chanru nak tixyib li tixpac'. Cui naraj naru tixyib cuib chi uc'al riq'uin junaj chi seb. Naru tixpac' junak sec' çhabil, sic'bil ru lix c'anjel, ut li jun chic mare re tac'anjelak re yalak c'a'ru. ²² Chanchan a'an li naxbanu li Dios. A'an yal re c'a'ru tixbanu. Xc'ulubeb raj li cuanqueb sa' ruchich'och' li rakba atin ut li çamc. Li Dios quixc'ut raj lix josk'il ut lix cuanquilal. Abanan k'axal nim xcuyum sa' xbeneb. ²³ Ut riq'uin lix nimal rusilal quiruxtana ku ut quixc'ut chiku lix lok'al. Junxil sic'bil çhak ku xban re nak totz'akonk sa' lix lok'al. ²⁴ Lao sic'bil ku xban li Dios. Cuan sic'bileb çhak ru sa' xyankeb laj judío ut cuan sic'bileb çhak ru sa' xyankeb li maçua'eb aj judío. ²⁵ Jo'ca'in quixye li Dios jo' tz'ibanbil sa' li Santil Hu xban laj Oseas: Tacuulak xk'ehil nak lain tixye "cualal inc'ajol" reheb li maçua'eb cualal inc'ajol. Eb a'an inc'a' sic'bileb çhak ru inban. Anacuan tixye reheb: "raroquex inban". (Os. 2:23)

²⁶ Ut sa' li na'ajej bar quiyeh'e' cui' reheb: "Laex maçua'ex cualal inc'ajol", aran ajcui' tayehek' reheb: "Laex tz'akal ralal xc'ajol li yo'yoquil Dios". (Os. 1:10)

²⁷ Jo'ca'in quixye laj Isaías chirixeb laj Israel: Usta nabaleb li ralal xc'ajol laj Israel jo' xq'uial li samaib chire li palau, aban moco q'uiheb ta li te'colek'.

²⁸ Xban nak li Kaçua' chi seb tarakok atin chi tz'akal sa' xbeneb li ralal xc'ajol laj Israel. (Is. 10:22-23)

²⁹ Quixye ajcui' laj Isaías chi jo'ca'in: Cui ta inc'a' quixcanab kalal kac'ajol nak quixsach ru li katenamit li Kaçua' Dios, li k'axal nim xcuanquil, jo' raj li Sodoma ut li Gomorra nak co-oso'. (Is. 1:9)

Eb laj judío ut li colba-ib

³⁰ A'an a'in xyalal li yoco chixyebal: Eb li ma'cua'eb aj judío inc'a' yoq'ueb chixsic'bal li ti'quíl ch'olej riq'uin xbanunquíl li naxye li chak'rab, ut xban nak que'paban, que'ticobresic xch'oleb. ³¹ Ut eb laj judío yoq'ueb chixsic'bal li ti'quíl ch'olej riq'uin xbanunquíl li naxye li chak'rab, aban inc'a' que'xtau. ³² ¿C'a'ut nak inc'a' que'xtau? Xban nak moco yoq'ueb ta chixsic'bal li ti'quíl ch'olej riq'uin xpabanquíl li Cristo. Que'xsic'ban li ti'quílal riq'uin xbanunquíl li naxye li chak'rab. Ut xban a'an, chanchan que'xtich rib chiru jun li pec. Ut li pec a'an retalil li Cristo. Ut li neque'xtich rib chiru, a'an li neque'tz'ektan re li Cristo. ³³ Tz'ibanbil sa' li Santil Hu li quixye li Dios: Q'uehomak retal xban nak lain ting'ue jun li pec aran Sión. Nabaleb li tenamit te'xtich rokeb chiru ut te't'aneq'. Abanan li ani tapabank re a'an, inc'a' tarahok' xch'ol mokon xban nak tixc'ul li c'a'ru yechi'inbil re xban li Dios. (Is. 28:16)

10

¹ Ex inherman, relic chi yal nacua'j nak eb laj Israel te'colek'. A'an li nintz'ama junelic chiru li Dios. ² Lain ninnau nak neque'x-oxlok'i li Dios, abanan toj maji' neque'xnau chanru xpabanquíl li Dios. ³ Ut inc'a' neque'xnau chanru nak nat'ico' li kach'ol chiru li Dios. Que'xyal xticobresinquíl xch'oleb chiru li Dios yal xjuneseb rib. Ut inc'a' que'raj xbanunquíl li yebil xban li Dios. ⁴ Nak quic'ulun li Cristo sa' ruchich'och', quirake' xc'anjel li chak'rab li quiq'uehe' re laj Moisés xban li Dios. Ut chixjunileb li te'pabank re li Cristo te'ticok' xch'oleb chiru li Dios.

Chikajunilo naru tocolek'

⁵ Laj Moisés quitz'ibac chirix li chak'rab ut quixye: Cui ani tixpab li chak'rab ut tixbanu chi tz'akal li c'a'ru naxye, a'an tic xch'ol chiru li Dios ut ta'cuank xyu'am. ⁶ Anakcuan lao ticobresinbil chic li kach'ol chiru li Dios riq'uin xpabanquíl li Cristo. Sa' li Santil Hu naxye chi jo'ca'in: Inc'a' taye sa' a'ch'ol ¿ani tatak'ek' sa' choxa re xtz'amanquíl chiru li Cristo nak ta'cubek chak sa' ruchich'och'? Mäye chi jo'can xban nak ac c'ulu'jenak sa' ruchich'och'. ⁷ Chi moco taye ¿ani ta'cubek cuanqueb cui' li camenak re xcuaclesinquíl li Cristo sa' xyankeb li camenak? Inc'a' naru taye chi jo'can xban nak ac cuaclijenak chi yo'yo. ⁸ Jo'ca'in naxye li Santil Hu: Ac nequenau lix yalal ut nequeserak'i resilal li quixye li Dios ut cuan ajcui' sa' le ch'ol. Lix yalal a'an nak tento takapab li Cristo ut a'an li pabal li nakach'olob xyalal cheru. ⁹ Cui riq'uin xtz'umal acue tach'olob xyalal nak li Jesús a'an li Cristo li Lalal li Dios, ut cui tapab chi anchal a'ch'ol nak li Dios quicuaclesin cui'chic re chi yo'yo sa' xyankeb li camenak, tatcolek'. ¹⁰ Li ani naxpab li Cristo chi anchal xch'ol ut naxch'olob xyalal riq'uin xtz'umal re, a'an nat'ico' xch'ol chiru li Dios ut ta'colek'. ¹¹ Jo'ca'in tz'ibanbil sa' li Santil Hu: Li ani tapabank re a'an, inc'a' tarahok' xch'ol mokon xban nak tixc'ul li c'a'ru yechi'inbil re xban li Dios. (Is. 28:16) ¹² Chiru li Dios juntak'eteb laj judío riq'uin li ma'cua'eb aj judío xban nak jun ajcui' li Ka'cua' sa' xbeneb chixjunileb. Ut nim li ruxtan sa' xbeneb chixjunileb li neque'yaban re lix c'aba'. ¹³ Jo'ca'in tz'ibanbil sa' li Santil Hu: Yalak ani tayabank re xc'aba' li Ka'cua', a'an ta'colek'. ¹⁴ Abanan ¿chanru nak te'xyaba xc'aba' li Ka'cua' cui toj maji' neque'xpab? Ut ¿chanru nak te'xpab cui toj maji' neque'rabi resil? Ut ¿chanru nak te'rabi resil li Ka'cua' cui ma' ani nach'oloban xyalal chiruheb? ¹⁵ Ut ¿chanru nak tach'olobak chak xyalal chiruheb cui ma' ani taklanbil xban li Ka'cua'? Jo'ca'in tz'ibanbil sa' li Santil Hu: C'ajo' xlok'al eb li neque'xic yalak bar chixyebal resil li colba-ib, li naq'uehoc tuktuquíl usilal. (Is. 52:7) ¹⁶ Aban moco chixjunileb ta que'paban

re li resil li colba-ib. Laj Isaías quixye: At Kaçua', moco q'uiheb ta li xe'paban li resil li colba-ib li nakajultica chiruheb. (Is. 53:1) ¹⁷ Jo'can nak li pabal natauman riq'uin rabinquil resil li Jesucristo. ¹⁸ Ut lain ninye, çma yal ta bi'nak eb laj Israel inc'a' que'rabi chak resil junxil? Que'rabi. çC'a'ut nak inc'a'? Xban nak tz'ibanbil chi jo'ca'in sa' li Santil Hu: Sa' chixjunil li ruchich'och' qui-el resil ut jun sut rubel choxa quicuulac li ratineb. (Sal. 19:4) ¹⁹ Ut ninye ajcui', çma inc'a' ta bi' que'xtau xyalal a'in eb laj Israel? Que'xtau raj aban inc'a' que'raj. Laj Moisés quixye reheb li c'a'ru quixye li Dios. Quixye chi jo'ca'in:

Sa' inc'aba' lain tecakali jun li tenamit maçua'eb intenamit. Ut tinchik' ejosk'il sa' xbeneb a'an, li inc'a' neque'xnau xyalal, xban nak eb a'an li te'cuuxtana ru. (Dt. 32:21)

²⁰ Laj Isaías cau xch'ol chixyebal li c'a'ru quixye li Dios nak quixye: A' chic li inc'a' yoqueb chinsic'bal, a'aneb chic li xe'ta'oc cue. Quinc'utbesi cuib chiruheb li inc'a' yoqueb chinsic'bal. (Is. 65:1)

A'an li quixye li Dios chirixeb li maçua'eb aj judío.

²¹ Ut chirixeb laj judío li Dios quixye:

Junelic yoquin chixbokbaleb laj Israel re nak te'chalk cuiq'uin. Abanan eb a'an inc'a' neque'abin chicuu. Neque'xk'et ban li cuatin. (Is. 65:2)

11

Moco q'uiheb ta li que'cole' sa' xyankeb laj Israel

¹ Tinpatz' ere, çma xe'tz'ektanac laj Israel xban li Dios chi jo'canan? çChi yal nak inc'a'! Lain ajcui' aj Israel lain ut lain ralal xc'ajol laj Benjamín ut laj Abraham. ² Li Kaçua' Dios inc'a' quixtz'ektana lix tenamit, li quixsiq'ueb ru junxil chok' ralal xc'ajol. çMa inc'a' nequenau c'a'ru tz'ibanbil sa' li Santil Hu chirix laj Elías nak quitjoc chiru li Dios chixjitbaleb laj Israel? Quixye:

³ At Kaçua', quilaje'xcamsi la profetas ut quilaje'xjuc' la artal; lain xincana injunes ut jo'can ajcui' lain, te'raj incamsinuil. ⁴ Li Dios quichak'oc ut quixye re: Sic'bileb ru inban cuukub mil chi cuink chok' cue. Eb a'an inc'a' que'xcuik'ib ribeb chixlok'oninuil li y'ibanbil dios aj Baal, chan. ⁵ Jo'can ajcui' sa' eb li cutan a'in. Cuan ajcui' li quixsiq'ueb ru li Dios riq'uin lix nimal ruxtan usta moco q'uiheb ta. ⁶ Moco riq'uin ta xyehom xbanuhomeb nak quixsiq'ueb ru. Yal riq'uin ban lix nimal ruxtan li Dios nak quixsiq'ueb ru. Cui ta quixsiq'ueb ru sa' xc'aba' xyehom xbanuhomeb, a'an maçua' raj chic xban xnimal ruxtan li Dios. ⁷ Nakaq'ue retal nak moco chixjunileb ta laj Israel que'xtau rusilal li Dios li yoqueb chinsic'bal. Ca'aj cui' li sic'bileb ru que'xtau, usta moco q'ui eb ta. Ut li jun ch'ol chic que'cauubresic lix ch'oleb ut inc'a' que'xbanu li quiraj li Dios. ⁸ Jo'ca'in tz'ibanbil sa' li Santil Hu:

Que'canabac xban li Dios jo' eb li aleb xch'ol li inc'a' neque'xtau xyalal. Cuanqueb xnak' ru ut inc'a' neque'r'il c'a'ru li us. Cuanqueb xxic ut inc'a' neque'raj rabinquil lix yalal. Chalen anakcuan inc'a' neque'raj xtaubal xyalal. (Is. 29:10)

⁹ Tz'ibanbil ajcui' sa' li Santil Hu li quixye laj David nak quitjoc: Eb li nink'e neque'xbanu chisuk'ik taxak chok' raylal sa' xbeneb. Raylal taxak tachalk sa' xbeneb re nak te'xtoj rixeb lix maqeb li yoqueb chixbanunuil.

¹⁰ Che'moyk ta li xnak'eb ru re nak inc'a' chic te'ilok, ut inc'a' te'xtau xyalal. Che'c'utzlak ta li rixeb chi junaj cua xban li raylal li yoqeb chixc'ulbal. (Sal. 69:23)

Lix colbaleb li maçua'eb aj judío

¹¹ Lajin ninye nak usta que'xtich rib laj judío, inc'a' que't'ane' chi junaj cua. Naraj naxye nak usta que'xtz'ektana li Cristo eb laj judío toj naru te'pabank ut te'colek'. Xban nak que'xk'et ratin li Dios eb laj judío, jo'can nak li colba-ib quiq'uehe' reheb li macua'eb aj judío re nak eb laj judío te'xrahi ru li colba-ib ut te'xpab li Cristo. ¹² Xban nak que'xk'et li ratin li Dios eb laj judío, li rusilal li Dios quiq'uehe' reheb chixjunileb li cuanqueb sa' ruchich'och'. Reheb raj laj judío li osobtesic, aban que'xtz'ektana. Jo'can nak quiq'uehe' reheb li macua'eb aj judío. Ut k'axal cui'chic li sahil ch'olejil takac'ul nak te'pabanklix q'ualeb laj judío ut te'q'uehek' sa' ajl sa' kayank lao li ac colbilo. ¹³ Anakcuan tinatinak eriq'uin laex li macua'ex aj judío. Lajin taklanbilin xban li Dios chixyebal resil li colba-ib ere. Ut ning'ue xlok'al lin c'anjel. ¹⁴ Mare chi jo'can te'yot'ek' xch'oleb laj judío li cuech tenamitil ut te'xpab li Cristo jo' xebanu laex ut te'colek'. ¹⁵ Xban nak que'tz'ektanac laj judío, li macua'eb aj judío que'c'ame' sa' usilal rig'uin li Dios. Ut k'axal numtajenak li xlok'al nak eb laj judío te'colek'. Chanchan te'cuaclik chak chi yo'yo sa' xyankeb li camenak. ¹⁶ Cui k'axtesinbil sa' ruk' li Dios li xben caxlan cua na-el, k'axtesinbil ajcui' lix comon. Ut cui k'axtesinbil sa' ruk' li Dios lix xe' li che', k'axtesinbil ajcui' chixjunil li ruk'. A'in naraj naxye: Xban nak li Dios quixsic' ru laj Abraham, jo'can nak sic'bil ajcui' ruheb li ralal xc'ajol. ¹⁷ Texinjuntak'eta rig'uin li che' olivo. Eb laj judío chanchan li chabil che' aubil ut ch'olaninbil chi us. Aban cuan li ruk' qui-isic ut a'an retalil eb laj judío li que'tz'ektanan re li Cristo. Ut laex li macua'ex aj judío chanchanex li ruk' li che' li moco aubil ta. Yal xjunes quimok chak. Ut anakcuan yoquex chi tz'akonc rig'uin li usilal li quiyechi'ic re laj Abraham xban li Dios. ¹⁸ Jo'can nak mexnumta chiru li ruk' li che' li que'isic xban nak laex yal ruk'ex ajcui' li che'. Chenauhak nak moco laex ta nequexq'uehoc xyu'am lix xe' li che', aban lix xe' naq'uehoc eyu'am laex. ¹⁹ Mare teye laex, que'isic li ruk' li che' re nak lao toletzek' sa' xna'ajeb. ²⁰ Yal ajcui' nequeye, aban xban nak inc'a' neque'paban jo'can nak que'isic. Ut laex chic quexletze' sa' xna'ajeb a'an xban nak nequexpaban. Jo'can nak chexucua ru li Dios ut menimobresi erib. ²¹ Cui li Dios quirisi eb laj judío, li tz'akal ruk' li che', ¿ma toja' ta chic laex inc'a' texrisi cui inc'a' texpabank? ²² Cheq'uehak retal nak k'axal chabil li Dios, abanan najosk'o' ajcui' sa' xbeneb li neque'tz'ektanan re li Cristo. Rig'uin cacuil atin narakoc atin sa' xbeneb li neque'k'etoc re li ratin. Chabilak eriq'uin laex cui texcuank junelic sa' li rusilal. Cui inc'a' nequexcuan sa' li rusilal tex-isik ajcui' laex. ²³ Jo'can nak cui eb laj judío te'pabank, eb a'an te'letzek' cui'chic sa' lix tonaleb. Li Dios nim xcuanquil chixc'ulbaleb cui'chic ut chixcuybal lix maqueb. ²⁴ Laex macua'ex aj judío, nequexinjuntak'eta rig'uin li che' olivo li yal quimok chak. Quex-isic rig'uin li che' a'an ut quexletze' sa' li aubil che'. Eb laj judío nequebinjuntak'eta rig'uin li tz'akal ruk' li che' olivo li aubil. Inc'a' ch'a'aj nak te'letzek' cui'chic xban li Dios rig'uin li aubil che' xban nak a'aneb tz'akal ruk' li che'.

Li Dios naruxtana ruheb chixjunileb

²⁵ Ex herman, nacuj nak tenau jun li na'leb mukmu nak quicuan, li quic'utbesic chak xyalal chicuu. Cui tenau a'in inc'a' tenimobresi erib rig'uin xc'oxlanquil nak cuan ena'leb. Eb laj judío li inc'a' que'paban que'cacuubresic lix ch'oleb. Abanan eb a'an te'pabank ajcui' nak talaje'pabank lix q'ualeb li macua'eb aj judío. ²⁶ Jo'can nak te'colek' chixjunileb laj Israel jo' tz'ibanbil retalil sa' li Santil Hu li quixye li Dios:

Aran Sión taçhalk chak laj Colonel ut a'an tixcuy xmaqueb li ralal xc'ajol laj Israel. (Is. 59:20-21)

²⁷ Ut lajn tincuyeb xmaç jo' quinye reheb nak quinq'ue li contrato reheb junxil. (Is. 27:9)

²⁸ Xban nak eb laj judío que'xtz'ektana li colba-ib, moco cuanqueb ta sa' usilal riq'uin li Dios. A'an quic'ulman re nak texpabank laex li maçua'ex aj judío. Abanan li Dios naxraheb laj judío sa' xc'aba'eb lix xe'tonil yucua'eb xban nak eb a'an ac sic'bileb chak ru xban li Dios. ²⁹ Li Dios inc'a' naxjal xc'a'ux riq'uin li c'a'ru naxyechi'i ke, chi moco naxjal xc'a'ux nak quixsic' ku. ³⁰ Ut laex, li maçua'ex aj judío, laex aj k'etol ratin li Dios nak quexcuan chak. Ut eb laj judío que'xk'et ajcui' chak ratin li Dios. Jo'can nak laex chic x-uxtañac eru xban li Dios. ³¹ Eb laj judío que'xk'et chak ratin li Dios. Abanan taçuulak xk'ehil nak te'pabank ut te'uxtañak ajcui' ruheb xban li Dios jo' nak x-uxtañac eru laex. ³² Li Dios quiril nak chixjunileb li cuanqueb sa' ruchich'och' aj maqueb. Jo'can nak quixcanabeb chixbanunquíl lix mausilaleb xbaneb lix k'etba atin. Aban toj cuan ajcui' ruxtan li Dios sa' xbaneb. ³³ Relic chi yał nak k'axal numtajanek li ruxtan li Dios. A'an naxnau chixjunil. Numtajanek cui'chic lix na'leb. Ma ani nata'oc ru chanru nak narakoc atin. Ut ma ani nata'oc ru li naxbanu. ³⁴ Jo'ca'in tz'ibanbil sa' li Santil Hu: Ma ani nana'oc re xc'a'ux li Kaçua'. Ma ani naru naq'uehoc xna'leb. (Is. 40:13-14) ³⁵ Ma ani naru naq'uehoc c'a'ru re li Dios re nak taq'uehek' ta cui'chic rekaj re xban li Dios. (Job 35:7; 41:11) ³⁶ Chixjunil li c'a' re ru cuan, riq'uin li Dios nachal chak. Li Dios quiyiban re chixjunil ut a'an aj eçal re chixjunil. Lok'oninbil taxak li Kaçua' Dios chi junelic k'e cutan. Jo'can taxak.

12

Chikak'axtesihak li kayu'am re li Dios

¹ Ex herman, sa' xc'aba' xnimal ruxtan li Dios nintz'ama cheru nak chek'axtesi erib rubel rok ruk' li Kaçua' jo' jun yo'yoquíl mayej santobresinbil xban li Dios, ut chi anchal ech'ol chexc'anjelak chiru re nak sahak xch'ol li Kaçua' eriq'uin. Ut riq'uin xbanunquíl a'an, yokex chixlok'oninquíl li Dios chi tz'akal re ru. ² Mebanu chic jo' neque'xbanu li toj maji' neque'paban. K'axtesihomak ban erib rubel rok ruk' li Dios re nak a'an tix-ac'obresi le ch'ol ut le c'a'ux, ut tenau chic li c'a'ru naraj li Dios. Chexcuank sa' çhabilal, ut chi tz'akalak re ru le yu'am re nak sahak xch'ol li Dios eriq'uin. ³ Xban ruxtan li Dios nak q'uebil cue lin c'anjel. Jo'can nak ninch'olob xyalal cheru re nak inc'a' tenimobresi erib. Cheq'uehak ban xcuanquíl le c'anjel q'uebil ere xban li Dios sa' xc'aba' le pabal. ⁴ Nabal pay ru xcha'al li junjunk chi tz'ejcualej, ut jalan jalank xc'anjel li junjunk. ⁵ Jo'can ajcui' lao aj pabanel. Junajo chi tz'ejcualej nak cuanco riq'uin li Cristo. Nabal, abanan junajo sa' li kapabal. Ut chikajunilo kacha'al kib chi kibil kib. ⁶ Jalan jalank li kamatan q'uebil ke re toc'anjelak xban xnimal rusilal li Dios. Chikaq'uehak chi c'anjelac eb li mañan a'in. Li ani q'uebil xmañan chixch'olobanquíl xyalal li colba-ib, tento tixch'olob xyalal. Chic'anjelak jo' naraj lix pabal q'uebil re xban li Dios. ⁷ Li ani q'uebil xmañan re tenk'anc, chitenk'ank chi sa sa' xch'ol. Li ani q'uebil xmañan chixtzolbaleb li ras ritz'in, chixtzolakeb sa' xyalal. ⁸ Li ani cuan xmañan re q'uehoc na'leb, chiq'uehoc na'leb sa' xyalal. Li ani cuan xmañan re sihinc, chisihjnk chi anchal xch'ol. Li ani cuan xmañan chi c'amoc be chiruheb li ras ritz'in, chixq'uehak xch'ol chixbanunquíl sa' xyalal. Li ani cuan xmañan re uxtañanc u, chiruxtannahak ru li ras ritz'in chi anchal xch'ol.

Lix c'anjeleb laj pabanel

⁹ Mexrahoc chi yal xcab rix ech'ol. Chera ban erib chi ribil erib chi anchal ech'ol. Chetz'ektana chi junaj cua li inc'a' us ut cheq'uehak ech'ol chixbanunquil li us. ¹⁰ Cherahak erib chi ribil erib chi anchal ech'ol xban nak ecomon erib sa' le pabal. Ut che-oxlok'i erib chi ribil erib. ¹¹ Q'uehomak ech'ol chi c'anjelac chiru li Kacua' chi anchal ech'ol. Mexc'anjelac chi yal minbil eru. Chexc'anjelac ban chiru li Kacua' chi anchal ech'ol. ¹² Chisahok' sa' ech'ol xban nak cuan c'a'ru nequeroybeni. Checuyak li raylal li nachal sa' eben. Ut junelic chextijok. ¹³ Chetenk'a le rech aj pabanelil li cuanqueb sa' raylal ut cheq'uehak rochochnal laj c'anjel chiru li Dios, li yal numequeb re. ¹⁴ Chetz'ama rusilal li Dios sa' xbeneb li xic' neque'iloc ere. Metz'ama raylal sa' xbeneb. ¹⁵ Chisahok' sa' ech'ol riq'ueheb li saheb sa' xch'ol. Ut chiyot'ek' ajcui' ech'ol riq'ueheb li neque'yot'e' xch'ol xban li raylal li yoqueb chixc'ulbal. ¹⁶ Junajak ech'ol chi ribil erib. Menimobresi erib chiruheb le ras eritz'in, ut meç'oxla nak numtajanek ena'leb. ¹⁷ Cui na-ux raylal ere, meq'ue rekaj riq'uin raylal. Cheq'uehak ban ech'ol chixbanunquil li c'a'ru us, li nanauman nak a'an li tz'akal chabil. ¹⁸ Li jo' q'uial texruk chixbanunquil, chebanuhak re nak texcuank sa' usilal riq'ueheb le ras eritz'in. ¹⁹ Ex herman, macua' laex texq'uehok rekaj li raylal na-ux ere. Checanabak ban chixjunil sa' ruk' li Dios. Ca'aj cui' a'an laj rakol atin xban nak jo'ca'in tz'ibanbil sa' li Santil Hu: Ca'aj cui' lain naru ting'uehok rekaj. Ut lain tinrahobtesiheb riq'uin li c'a'ru quilaje'xbanu, chan li Dios. (Dt. 32:35) ²⁰ Jo'can nak cui li xic' na-iloc ere tatz'ocak, cheq'ue chi cua'ac. Cui tachakik re, q'uehomak chi uc'ac. Chebanuhak usilal reheb ut riq'uin a'an te'xq'ue retal nak xutanal li yoqueb chixbanunquil. ²¹ Mech'inan ech'ol riq'uin li inc'a' us li neque'xbanu ere. Q'uehomak ban ech'ol chixbanunquil li us. Chi jo'can tecoloni xnumsinquil li inc'a' us.

13

Tento takaq'ueheb sa' xnak' ku li q'uebileb sa' xc'anjel

¹ Chexpabank chiruheb li neque'taklan sa' xben li tenamit. Ma ani cuanxcuanquil chi taklan cui inc'a' ta q'uebil re xban li Dios. Eb li cuanquebxcuanquil sa' xben li tenamit, a' li Dios quixakaban reheb. ² Jo'can nak li ani inc'a' napaban chiruheb li cuanquebxcuanquil, naxk'et li c'a'ru xakabanbil xban li Dios. Ut yo chixbokbal li tojba mac sa' xben. ³ Li neque'banun re li us moco xiu xiu ta cuanqueb chiruheb li cuanquebxcuanquil. A' li neque'banun mausilal xiu xiu cuanqueb chiruheb li neque'taklan sa' xben li tenamit. Cui inc'a' nequeraj nak xiu xiu cuankex chiruheb li cuanquebxcuanquil, chebanuhak li us, ut eb a'an te'xye nak chabilex. ⁴ Eb a'an cuanqueb sa' xc'anjel xban li Dios re etenk'anquil. Cui nequebanu li inc'a' us, chexxucuak xban nak cuanquebxcuanquil re te'rakok atin sa' eben xban nak a'an xakabanbileb xban li Dios ut neque'xrahobtesi li neque'x'etoc re li chak'rab. ⁵ Jo'can nak tento texpabank chiruheb li cuanquebxcuanquil sa' xben li tenamit. Macua' yal re nak inc'a' texq'uehek' chixtojbal rix le mac; re aj ban cui' nak c'ojc'ok ech'ol riq'uin xbanunquil li c'a'ru us. ⁶ Jo'can nak tento xtojbal li naxpatz' li popol. Tento xtojbal xban nak li cuanqueb sa' xc'anjel xakabanbileb xban li Dios, ut a'an lix c'anjeleb. ⁷ Chetojak li c'a'ak re ru tento xtojbal. Cheq'uehakxcuanquileb li cuanqueb sa'xcuanquil ut che-oxlok'iehb li cuanqueb sa' xc'anjel.

Chocuank sa' xyalal riq'ueheb li kas kitz'in

⁸ Ma ani aj iqu'in chicuank ec'as. Ut cherahak erib chi ribil erib xban nak li ani naxra li ras ritz'in naxbanu li c'a'ru naxye li chak'rab. ⁹ Jo'ca'in

naxye sa' li chak'rab: Matmuxuc caxar; maçamsi açuas açuizt'in; mat-elk'ac, matyo'oban atin chirix la puas açuizt'in; maçahi ru li jalan aj e. Ut cui tara la puas açuizt'in jo' nak nacara açuib laat, riq'uin a'an yocac chixbanunquil chixjunil li naxye li chak'rab. ¹⁰ Li ani narahoc inc'a' naxbanu raylal re li ras ritz'in. Li narahoc naxbanu chi tz'akal li naxye li chak'rab. ¹¹ Chikabanu chixjunil a'in xban nak nakanau nak yo chak chi nach'oc xk'ehil nak tatz'aklok ru li kacolbal nak tol-elk cui'chic li Jesucristo. Yo'on taxak cuanko xban nak yo chak chi nach'oc lix c'ulunic chiru nak copaban chak lao. ¹² Chanchan nak yo chi numec' li k'ojoyin ut yo chi sakeuc. Chikacanabak xbanunquil li inc'a' us li neque'xbanu li toj cuanqueb sa' xk'ojoyinal ru li maç. Chikacolak kib chiru li inc'a' us riq'uin xcuanquil li Jesucristo. ¹³ Xban nak cuanco chic sa' xcutan saken li Jesucristo, chocuanq sa' xyalal jo' junak tz'akal aj pabanel. Inc'a' chic tomacobk riq'uin li calaç, chi moco riq'uin li num cua'ac num u'ac, chi moco riq'uin muxuc caxar, chi moco riq'uin co'betac yumbetac, chi moco riq'uin li c'a'ak chic re ru chi mausilalil. Ut inc'a' chic topletik chi moco toçacalink. ¹⁴ Kak'axtesihak ban kib chi tz'akal rubel rok ruk' li Kaçua' Jesucristo re nak a'an chic tatenk'ank ke riq'uin lix nimal xcuanquil. Ut inc'a' chic takabanu li mausilal li naxrahi ru li kach'ol nak toj maji' nakapab li Cristo.

14

Chetenk'aheb li k'uneb xch'ol sa' lix pabaleb

¹ Chec'ulakeb chi sa sa' ech'ol li toj k'uneb xch'ol sa' lix pabaleb ut meçuech'i rixlix c'a'uxeb. ² Cuan neque'xc'oxla nak moco maç ta xtzacanquil chixjunil li c'a'ak re ru natzacamañ. Cuanqueb ajcui' li toj k'uneb xch'ol sa' lix pabaleb neque'xc'oxla nak maç xtzacanquil li tib. ³ Li ani naxtzaca chixjunil li c'a'ak re ru natzacaman inc'a' naru tixtz'ektana li ani inc'a' naxtzaca chixjunil li c'a'ak re ru. Ut li ani inc'a' naxtzaca chixjunil li c'a'ak re ru inc'a' naru naxcuech'i rix li jun chic li naxtzaca chixjunil xban nak a'an ac xc'ule' ajcui' xban li Dios. ⁴ Laat inc'a' naru nacatracoc atin sa' xben lix moş la puas açuizt'in. A' lix patrón tayehok re ma us malaj inc'a' us li yo chixbanunquil. Jo'can nak li nimajcual Dios a'an nataklan re li junjunk ut a'an nayehoc reheb ma us malaj inc'a' us li yoqueb chixbanunquil. Ut li Dios tatenk'ank reheb chixbanunquil li us. ⁵ Cuan neque'c'oxlan nak k'axal lok' junak cutan chiruheb li cutan jun ch'ol chic. Ut cuan ajcui' neque'c'oxlan re nak juntak'et xlok'al chixjunileb li cutan. Abanan tento nak li junjunk tixc'oxla chi us chanru tixbanu. ⁶ Li ani naxq'ue xlok'al junak li cutan, a'an naxbanu re xlok'oninquil li Dios. Ut jo'can ajcui' li nati'oc tib naxbanu a'an re xlok'oninquil li Dios ut naxbantioxi ajcui' chiru li Dios. Ut li ani inc'a' nati'oc tib, xlok'oninquil ajcui' li Dios naxbanu nak inc'a' nati'oc tib, ut naxbantioxi ajcui' chiru li Dios. ⁷ Ma ani yo'yo ta yal xjunes rib. Ut ma ani ajcui' nacam chi yal xjunes rib xban nak maçua' lao yal ke sa' xben li kayu'am. ⁸ Nak yo'yoço nakaq'ue xlok'al li Kaçua' Dios riq'uin li kayu'am. Ut nak nococam, nakaq'ue ajcui' xlok'al riq'uin li kacamic. Jo'can ut cui yo'yoço ut cui nococam a' yal re li Dios sa' kaben xban nak a'an chic laj echal ke. ⁹ Jo'can nak quicam li Jesucristo, ut quicuacli cui'chic chi yo'yo re nak a'anak li Kaçua' reheb li yo'yoqueb jo' eb ajcui' li camenakeb. ¹⁰ ¿C'a'ut nak nacatracoc atin sa' xben la cüech aj pabanelil? Ut ¿c'a'ut nak nacatz'ektanaheb aj pabanel? Inc'a' naru tabanu chi jo'can xban nak sa' jun cutan li Cristo tarakok atin sa' kaben chikajunilo. ¹¹ Tz'ibanbil sa' li Santil Hu li quixye li Dios:

Relic chi yal ninye ere nak chixjunileb te'xcuik'ib rib chicuu ut tine'xlok'oni ut chixjunileb te'xye riq'uin xtz'umal re nak lain li tz'akal Dios. (Is. 45:23)

¹² Jo'can nak chikajunilo toxkak'axtesi li kayehom kabanuhom chiru li Dios.

Inc'a' taxak tach'inank xch'ol la herman qban laa

¹³ Chikacananabak xcuech'inquil kib chi kibil kib ut chikabanu li us re nak li kech aj pabanelil inc'a' te'ch'inank xch'oleb sa' lix pabaleb chi moco te'oc cui'chic chi macobc kaban. ¹⁴ Xban nak ninpab li Cristo, jo'can nak ninnau nak mac'a' rec' xtzacangunil li c'a'ak re ru. Abanan cui junak narec'a sa' xch'ol nak mac xtzacangunil junak tzacaemk, us cui inc'a' tixbanu. ¹⁵ Cui riq'uin li c'a'ru nacatzaca nach'inan xch'ol la cuech aj pabanelil, a'an naraj naxye nak inc'a' nacara la cuech aj pabanelil. Mapo' xch'oleb la cuech aj pabanelil riq'uin li c'a'ru nacatzaca xban nak li Jesucristo quicam ajcui' sa' xc'aba' eb a'an. ¹⁶ Laa nacanao nak us li yocat chixbanunquil, abanan chaq'uehak retal li c'a'ru tabanu re nak ma ani tayehok nak inc'a' us li yocat chixbanunquil. ¹⁷ Lix cuanquial li Dios inc'a' nakatau riq'uin c'a'ru nakatzaca chi moco riq'uin li c'a'ru nakuc'; natauman ban riq'uin li tiquial, li tuktuquil usilal ut li sahil ch'olejil li naxq'ue ke li Santil Musik'ej. ¹⁸ Jo'can nak li ani nac'anjelac chiru li Cristo sa' tiquial ut chi sa sa' xch'ol, li Dios nasaho' xch'ol riq'uin. Ut naq'uehe' ajcui' xlok'al xbaneb li ras ritz'in. ¹⁹ Jo'can nak chikaq'uehak kach'ol chi cuanc sa' tuktuquil usilal riq'uineb li kas kitz'in. Ut chikatenk'a kib chi kibil kib re nak toq'uk sa' li kapabal. ²⁰ Mapo' xc'anjel li Dios riq'uin li c'a'ak re ru nacatzaca. Yal nak chixjunil naru xtzacangunil. Abanan cui la herman nach'inan xch'ol riq'uin li nacatzaca, inc'a' us li yocat chixbanunquil. ²¹ Li us xbanunquil, a'an a'in: cui nach'inan xch'ol la herman xban nak nacatti'oc tib ut nacat-uc'ac vino, matti'oc tib ut mat-uc'ac vino. Inc'a' tabanu li c'a'ak re ru tach'inank cui' xch'ol la herman re nak inc'a' tamacobc aban. ²² Cui nacanao chi tz'akal nak us yocat chixbanunquil, canab sa' ruk' li Dios. Us xak re li ani narec'a sa' xch'ol nak moco mac ta li yo chixbanunquil. ²³ Cui junak narec'a sa' xch'ol nak mac xtzacangunil junak tzacaemk, ut cui naxtzaca, a'an cuan xmac chiru li Dios. Cui nakec'a sa' li kam nak inc'a' us xbanunquil li c'a'ru nakabanu, ut cui nakabanu, yoco chi macobc.

15

Chikatenk'ahab li kas kitz'in

¹ Lao, li ac cau kach'ol sa' li kapabal, chikacuyeb xmac li toj k'unek xch'ol sa' xpabaleb ut takatenk'ahab sa' li ch'a'ajquial. Inc'a' chikasic' li us ca'aj cui' chok' ke lao. ² Tento takabanu li us reheb li kech aj pabanelil re nak te'q'uk sa' lix pabal ut re nak sahak sa' xch'oleb. ³ Li Cristo inc'a' quixbanu li quiraj xjunes rib. Quixbanu ban li naraj li Dios. Quixtenk'ahab chixjunileb. Jo'can nak quixc'ul jo' tz'ibanbil sa' li Santil Hu: Sa' inben quinak la majecuanquil li que'xbanu eb li que'hoboc acue. (Sal. 69:9) ⁴ Chixjunil li c'a'ak re ru quitz'ibac chak najter sa' li Santil Hu, re katzolbal nak quitz'ibac chak. Nocoxtenk'a re nak inc'a' tach'inank li kach'ol ut naxc'ojob li kach'ol re nak takacuy roybeninuil nak taz'aklok ru li kacolbal. ⁵ Li Dios chitenk'ank ere re nak inc'a' tach'inank ech'ol ut a'an chiq'uehok xcacuil le ch'ol. A'an chitenk'ank ere chi cuanc sa' usilal chi ribil erib ut junajak le ch'ol jo' naraj li Jesucristo. ⁶ Li Dios chitenk'ank ere re nak junajak le ch'ol nak telok'oni li Acuabej Dios, lix Yucua' li Jesucristo.

Li colba-ib reheb ajcui' li maꝓua'eb aj judío

⁷ Chec'ulak sa' eyaꝓk chi sa sa' ech'ol le rech aj paꝓanelil jo' nak li Cristo coxc'ul laꝓ. Jo'can chebaꝓuhak re xq'uebal xlok'al li Dios. ⁸ Lain ninye ere nak li Cristo quic'ulun chi c'anjelac chiku lao aj judío. Riq'uin a'in naxc'utbesi chiku nak li Dios xq'ue li quixyechi'i chak reheb li kaxe'tonil yucua'. ⁹ Quic'ulun ajcui' chixtenk'anquileb li maꝓua'eb aj judío re nak te'xlok'oni li Dios xban nak k'axal nim li ruxtaꝓ. Tz'ibanbil chi jo'ca'in sa' li Santil Hu:

Jo'can nak lain tatinlok'oni sa' xyankeb li maꝓua'eb aj judío. Ut tinbichañk ajcui' re ałok'oninquil. (Sal. 18:49)

¹⁰ Ut naxye ajcui' sa' li Santil Hu chi jo'ca'in:

Chisahok' taxak ech'ol, laex li maꝓua'ex aj judío, erochbened laj judío lix tenamit li Dios. (Dt. 32:43)

¹¹ Ut naxye cui'chic sa' li Santil Hu:

Laex li maꝓua'ex aj judío, chelok'oni li Kaꝓua' ut chixjunileb taxak li tenamit che'xnimak ru li Dios. (Sal. 117:1)

¹² Tz'ibanbil ajcui' sa' li Santil Hu li quixye laj Isaías:

Sa' xyankeb li ratal xc'ajol laj David li ratal laj Isai taꝓ'ulunꝓ laj Colonel, li xakabanbil xban li Dios. Ut a'an taꝓuaꝓk xcuaꝓquil sa' xbened li maꝓua'eb aj judío. Ut a'an li yoꝓeb chixyo'oninquil. (Is. 11:10)

¹³ Li Dios a'an li kayo'on. A'an taxak chiq'uehok xsahil ech'ol chi nabal ut tixq'ue ajcui' ere li tuktuquil usilal xban nak nequexpaꝓan. Xban nak cuan xcuaꝓquil li Santil Musik'ej eriq'uin, cauħak taxak ech'ol chi oybeninc. ¹⁴ Ex hermaꝓ, lain ninnau nak chaꝓilex ut nequenau li xyalaꝓ ut nequeq'ue ajcui' ena'leb chi ribil erib. ¹⁵ Abanan sa' li hu a'in cau ca'ch'in li aꝓin xintz'iba eriq'uin re nak inc'a' taꝓachk sa' ech'ol li xinye. Ninbaꝓu a'in sa' xc'aba' lin c'anjel li quixq'ue cue li Dios. ¹⁶ Lain ninc'anjelac chiru li Jesucristo sa' xyankeb li maꝓua'eb aj judío. Lin c'anjel a'an xch'olobanquil xyalaꝓ li colba-ib re nak eb li maꝓua'eb aj judío te'xk'axtesi rib chiru li Dios. Ut li Dios taꝓahok' sa' xch'ol riq'uiheb, ut te'santobresik' xban li Santil Musik'ej.

¹⁷ Ninq'ue xlok'al lin c'anjel xban nak a'an xc'anjel li Dios. Moco injunes ta ninc'anjelac. A' li Cristo natenk'an cue. ¹⁸ Maꝓ'a' inxiu chixyebal resil li c'anjel xinbaꝓu sa' xc'aba' li Cristo nak xinc'anjelac sa' xyankeb li maꝓua'eb aj judío xban nak maꝓua' injunes xinc'anjelac. Li Jesucristo xtenk'an cue nak xinc'ameb xbe re nak te'xpab li Dios riq'uin lin yehom inbaꝓuhom. ¹⁹ Xinjultica resil li Jesucristo chiruheb riq'uin li milagros ut li sachba ch'olej ut riq'uin xcuaꝓquil li Santil Musik'ej. Yałak bar quinbeni xyebal resil li colba-ib. Quintiquib Jerusalén, ut quinsuti chixjunileb li na'ajej toj retal quincuulac Ilirico. ²⁰ Jo'can nak quinq'ue inch'ol chixyebal resil li Jesucristo bar toj maji' rabiomeb resil xban nak inc'a' nacuaꝓ c'anjelac sa' li na'ajej ac tiquibanbil cui' c'anjelac junxil. ²¹ Jo'ca'in tz'ibanbil sa' li Santil Hu: Li maꝓ jun sut yebil resilal li Cristo reheb, te'rabi. Ut nak te'rabi resil, te'xtau xyalaꝓ.

Laj Pablo naxc'oxla xic sa' li tenamit Roma

²² Q'uila sut xcuaꝓ raj xic eriq'uin abanan xban nak nabal inc'anjel toj maji' naxq'ue rib chicuu. ²³ Ac cuan nabal chihab cuoquic chixc'oxlanquil xic eriq'uin. Ut anakcuan xinchoy lin c'anjel arin sa' li na'ajej cuanquin cui'. ²⁴ Ninc'oxla nak toxinnumek' cherilbal nak tinxic España. Nacuaꝓ rilbal eru re nak taꝓahok' inch'ol ut nacuaꝓ ajcui' nak tinꝓenka' re nak taꝓuꝓk tinxic España. ²⁵ Ut anakcuan xic cue chi rilbaleb laj paꝓanel li cuanqueb aran Jerusalén. Ut tinc'am jun maꝓan re xtenk'anquileb. ²⁶ Eb laj paꝓanel li cuanqueb aran Macedonia ut Acaya x-ala sa' xch'oleb xtaklanquil jun li

matan chok' reheb li neba' li cuanqueb sa' xyankeb li herman aran Jerusalén. ²⁷ Qui-ala sa' xch'oleb xtenk'anquileb ut us ajcui' nak te'xbanu xban nak eb a'an maçua'eb aj judío ut sa' xc'aba'eb laj judío nak que'xc'ul li colba-ib. Jo'can nak us nak te'xtenk'aheb laj pabanel aj judío riq'uin xq'uebal reheb li c'a'ak re ru nac'anjelac chiruheb. ²⁸ Ut ca'aj cui' toxink'axtesi li tumin a'in, toxinnumek' eriq'uin ut tinxic España. ²⁹ Nak tincuulak eriq'uin, ninnau nak numtajanak li kosobtesinquil takac'ul xban li Cristo. ³⁰ Ex herman, nintz'ama cheru nak tingtenk'a sa' le tij sa' xc'aba' li Jesucristo ut sa' xc'aba' ajcui' li rahoc ib li q'uebil ke xban li Santil Musik'ej. ³¹ Chextijok chicuix re nak li Dios taçolok cue chiruheb li inc'a' neque'raj pabanc aran Judea. Ut chextijok ajcui' re nak eb laj pabanel aran Jerusalén te'xc'ul li xtenk'anquileb chi saheb sa' xch'ol. ³² Cui li Dios naraj, chincuulak ta eriq'uin chi sa' inch'ol. Ut chisahok' taxak kach'ol sa' comonil riq'uin xjulticanquil li Cristo nak toxincuanq eriq'uin. ³³ A' taxak li Dios, li naq'uehoc tuktuquul usilal, chicuanq eriq'uin chejunilex. Jo'can taxak.

16

Laj Pablo naxtakla xsahileb xch'ol

¹ Nacuaj tinye ere nak li kaherman lix Febe, a'an tz'akal aj pabanel ut a'an aj tenk'anel sa' li iglesia li cuan aran Cencrea. ² Ut nak taçuulak aran eriq'uin, chec'ulak a'an sa' xc'aba' li Kaçua' jo' xc'ulubeb laj pabanel. Ut chetenk'ahak riq'uin c'a'ak re ru taraj cui' tenk'ac xban nak ac xtenk'aheb ajcui' nabal li herman ut xinixitenk'a ajcui' lain. ³ Cheq'uehak xsahil xch'ol laj Aquila ut lix Priscila, eb li cuech aj c'anjelil sa' xc'aba' li Jesucristo. ⁴ Usta xiu xiu chok' reheb xcolbal rix lin yu'am, aban que'xq'ue xch'oleb chintenk'anquil. Ninbantioxi chiruheb. Maçua' ca'aj cui' lain ninbantioxin chiruheb. Neque'bantioxin aj ban cui' laj pabanel li maçua'eb aj judío. ⁵ Cheq'ue ajcui' xsahil xch'oleb li herman li neque'xch'utub rib sa' li rochoch laj Aquila ut lix Priscila. Cheq'ue xsahil xch'ol laj Epeneto, li raro inban. A'an li xben li quixpab li Jesucristo aran Acaya. ⁶ Cheq'ue xsahil xch'ol lix María. A'an k'axal nac'anjelac sa' eyank laex. ⁷ Cheq'ue xsahil xch'oleb laj Andrónico ut laj Junias. A'aneb aj judío jo' lain. Cuochbened nak cocuan chi prexil. Na'no ruheb xbaneb li apóstol. Eb a'an que'xpab chak li Cristo nak toj maji' ninpaban lain. ⁸ Cheq'ue xsahil xch'ol laj Amplias. A'an ninra ajcui' sa' xc'aba' li Kaçua'. ⁹ Ut cheq'ue xsahil xch'ol laj Urbano li kech aj c'anjelil sa' xc'aba' li Cristo, ut laj Estaquix li ninra. ¹⁰ Cheq'ue xsahil xch'ol laj Apeles. A'an inc'a' quich'inan xch'ol sa' lix pabal nak quiyale' ralenquil. Ut cheq'ue xsahil xch'oleb li cuanqueb sa' rochoch laj Aristóbulo. ¹¹ Cheq'ue xsahil xch'ol laj Herodión. A'an cuech tenamitil xban nak a'an aj judío ajcui'. Ut cheq'ue ajcui' xsahil xch'oleb li cuanqueb sa' rochoch laj Narciso li ac xe'paban. ¹² Cheq'ue xsahil xch'oleb lix Trifena ut lix Trifosa li yoqueb chi c'anjelac sa' xc'aba' li Kaçua'. Ut cheq'ue xsahil xch'ol lix Pérsida, li nakara sa' xc'aba' li Cristo xban nak a'an naxq'ue xch'ol chi c'anjelac chiru li Dios. ¹³ Cheq'ue xsahil xch'ol laj Rufo, li sic'bil ru chi c'anjelac chiru li Kaçua', ut cheq'ue xsahil xch'ol lix na'. A'an chanchan ajcui' inna' chicuu lain. ¹⁴ Cheq'ue xsahil xch'ol laj Asíncrito, laj Flegonte, laj Hermas, laj Patrobas, laj Hermes, jo'queb ajcui' chixjunileb laj pabanel, li neque'xch'utub rib riq'uineb chi xlok'oninquil li Dios. ¹⁵ Cheq'ue xsahil xch'ol laj Filólogo ut lix Julia, laj Nereo ut li ranab. Ut cheq'ue xsahil xch'ol laj Olimpas jo' eb ajcui' chixjunileb laj pabanel li neque'xch'utub rib riq'uineb

chixlok'oninquit li Dios. ¹⁶ Q'uehomak xsahil ech'ol chi ribil erib riq'uin santil utz'uc u. Chixjunileb laj pabanel neque'xtakla xsahil ech'ol sa' xc'aba' li Jesucristo. ¹⁷ Ut nintz'ama cheru, ex herman, nak cheq'uehak retal li neque'yo'oban jachoc ib sa' eyank ut neque'raj xpo'bal ru le pabal, li tzolbilex cui'. Mejunaji erib riq'uineb a'an. ¹⁸ Eb a'an inc'a' neque'xbanu li c'a'ru naraj li Kacua' Jesucristo. Ca'aj cui' li c'a'ru neque'xrahi ru lix ch'oleb, a'an li neque'xbanu. Ut riq'uin k'unil atin neque'k'unbesin ut neque'xbalak'i li inc'a' cauheb xch'ol sa' xpabaleb. ¹⁹ Chixjunileb neque'na'oc re nak laex cau teq'ue ech'ol chixbanunquil li us ut mebanu li inc'a' us. ²⁰ Ut li Kacua' Dios, li naq'uehoc li tuktuquil usilal, a'an tixsach xcuanguil laj tza ut textenk'a re nak laex chic texnumtak sa' xben. Li rusilal li Kacua' Jesucristo chicuank eriq'uin. ²¹ Naxtakla xsahil ech'ol laj Timoteo, li cuech aj c'anjelil. Ut neque'xtakla xsahil ech'ol laj Lucio, laj Jasón ut laj Sosípater. Eb a'an cuech tenamitil. ²² Laj Tercio. Yoquin chixtz'ibanquil li hu a'in li tixtakla ere laj Pablo. Ut nintakla ajcui' xsahil ech'ol sa' xc'aba' li Cristo. ²³ Naxtakla ajcui' xsahil ech'ol laj Gayo, li naq'uehoc cuochochnal. Ut sa' ajcui' li rochoch a'an neque'xch'utub rib laj pabanel. Laj Erasto, laj c'ulul tumin sa' li tenamit, naxtakla xsahil ech'ol. Ut naxtakla ajcui' xsahil ech'ol laj Cuarto. ²⁴ A' taxak li rusilal li Kacua' Jesucristo chicuank eriq'uin chejunilex laex. Jo'can taxak.

Laj Pablo naxlok'oni li Kacua' Dios

²⁵ Chikalok'onihak taxak li Kacua' Dios, li cuan xcuanguil re xq'uebal xcacuulal kach'ol sa' li kapabal. Ninch'olob xyalal cheru chirix li colba-ib sa' xc'aba' li Jesucristo. Najter k'e cutan mukmu chak li xyalal chiku; aban anakcuan c'utbesinbil chic lix yalal chiku. ²⁶ Anakcuan xcutano' xyalal chiku xban li Santil Hu li tz'ibanbil chak junxil xbaneb li profeta. Que'xtz'iba chak li atin jo' quiyehé' reheb xban li Dios, li mac'a' roso'jic. Ut a'in yo' xch'olobanquil xyalal yalak bar sa' chixjunil li ruchich'och' re nak chixjunileb li tenamit te'rabi ut te'pabank. ²⁷ Li jun chi Dios, li naxnau chixjunil, chicuank xlok'al sa' xc'aba' li Kacua' Jesucristo anakcuan ut chi junelic k'e cutan. Jo'can taxak.

Li Xben Hu li Quixtz'iba li San Pablo reheb laj Corinto

Xq'uebal xsahileb xch'ol

¹ Lain laj Pablo. Sic'bil chak cuu xban li Dios re nak tinc'anjelak chok' x-apóstol li Jesucristo xban nak jo'can quiraj li Dios. Cuochben laj Sóstenes li cuech aj pabanelil. ² Yoquin chixtz'ibanquil li hu a'in eriq'uin laex aj pabanel li cuanquex sa' li tenamit Corinto. Santobresinbilex sa' xc'aba' li Jesucristo ut sic'bil eru xban li Dios chok' ralal xc'ajol. Ut sic'bil ajcui' ruheb chixjunileb li cuanqueb yalak bar li neque'xyaba xc'aba' li Jesucristo. A'an li kaDios chikajunilo lao li nocopaban re. ³ Chicuañk taxak eriq'uin li usilal ut li tuktuquilal li nachal riq'uin li Dios li kaYucua' ut riq'uin li Kaçua' Jesucristo.

Li rusilal li Dios nequec'ul sa' xc'aba' li Cristo

⁴ Junelic ninbantioxi chiru li Dios nak nintjoc cherix laex ut ninbantioxi ajcui' chiru li Dios nak xematani li rusilal li Dios sa' xc'aba' li Jesucristo. ⁵ Xban nak junajex chic riq'uin li Cristo, xematani li rusilal li Dios. Chabil chic nequec'atinac ut chabil chic le na'leb xban nak nequenau chic li xyälal. ⁶ Ac xematani li rusilal li Dios ut nac'utun nak yal li quinye ere chirix li Cristo. ⁷ Ac xematani li usilal li naxq'ue li Santil Musik'ej ut mac'a' chic nequeroybeni. Ca'aj chic lix c'ulunic li Kaçua' Jesucristo nequeroybeni. ⁸ Li Dios yok' chixq'uebal xcacuub le ch'ol chalen toj sa' roso'jic li cutan re nak mac'a'ak emac sa' li cutan nak tol-elk li Kaçua' Jesucristo. ⁹ Li Dios junelic naxq'ue li naxyechi'i ut a'an ajcui' li quisiç'oc eru re nak texcuañk chi sum atin riq'uin li Ralal, a' li Kaçua' Jesucristo.

Xq'uebal xna'lebeb laj pabanel re nak junajakeb xch'ol

¹⁰ Ex inherman, sa' xc'aba' li Kaçua' Jesucristo nintz'ama cheru nak junajak le na'leb. Mac'a'ak li jachoc ib sa' eyañk. Junajak ban le c'a'ux ut junajak le ch'ol. ¹¹ Ninye ere chi jo'ca'in xban nak lix comoneb lix Cloé xe'yehoc resil cue nak cuan cuech'inc ib sa' eyañk. ¹² ¿C'a'ut nak jalan jalañk nequec'oxla chejunktal? Cuan neque'xye: Lao xtzolom laj Pablo. Ut cuan neque'xye: Lao xtzolom laj Apolos. Ut cuan ajcui' li neque'xye: Lao xtzolom laj Pedro ut cuan cui'chic neque'xye: Lao xtzolom li Cristo. ¹³ Abanan lain tinpatz' ere, ¿ma nabal ta bi' li Cristo? Inc'a'. Jun ajcui'. ¿Ma quinq'uehe' ta bi' lain chiru cruz sa' ec'aba' laex? ¿Ma sa' inc'aba' ta bi' lain quec'ul li cubi ha'? ¹⁴ Ninbantioxi chiru li Dios nak macua' lain quincubsin eha'. Ca'aj cui' laj Crispo ut laj Gayo quincubsi xha'eb. ¹⁵ Cui ta lain quincubsin eha', mare raj quec'oxla nak quinbanu sa' inc'aba' lain. ¹⁶ Ut quincubsi ajcui' xha'eb li cuanqueb sa' rochoch laj Estéfanas. Inc'a' chic jultic cue ma cuan chic quincubsiheb xha'. ¹⁷ Li Cristo inc'a' quinxakla chak chi cubsinc ha'. Quinxakla ban chak chixjulticanquil resil li colba-ib. Abanan macua' riq'uin atin ch'a'aj xtaubal ru xyälal quinañinac. Cui ta riq'uin atin ch'a'aj xtaubal ru quinañinac, cuan raj inc'a' que'ta'oc ru ut taçañk raj chi mac'a' rajbal xcamic li Cristo chiruheb.

Xjulticanquil Xcamic li Cristo

¹⁸ Nak neque'rabi resil lix camic li Cristo chiru li cruz, mac'a' na-oc cui' chiruheb li te'xic sa' xbalba. Tontil na'leb a'an chanqueb. Aban chiku lao li ac

xocole' k'axal lok' a'an xban nak a'an xcuanquil li Dios. ¹⁹ Jo'ca'in tz'ibanbil retalil sa' li Santil Hu:

Tinsacheb xcuanquil li cuanqueb xna'leb xjuneseb rib.

Tintz'ektana xc'a'uxeb li neque'rec'a rib nak cuanqueb xna'leb.

²⁰ Chiru li Dios mac'a' neque'oc cui' li cuanqueb xna'leb xjuneseb. Mac'a' neque'oc cui' laj tzolonel. Ut mac'a' neque'oc cui' li neque'xnau atinac chirix lix na'leb li ruchich'och'. Lix na'leb li ruchich'och' tontil na'leb ut mac'a' na-oc cui' chiru li Dios. ²¹ Li Dios naxnau chixjunil. Ac cuan sa' xch'ol li Dios nak li cuanqueb sa' ruchich'och' ma' jaruj te'xtau ru xna'leb li Dios yal xjuneseb rib. Jo'can nak quiraj xcolbaleb li te'pabank re li resil li colba-ib usta cuan li neque'yehoc re nak tontil na'leb li yoco chixjulticanquil cheru chirix li Cristo. ²² A'in tontil na'leb chiruheb laj judío xban nak te'raj nak tac'utek' junak milagro chiruheb. Tontil na'leb chiruheb li macua'eb aj judío xban nak ca'aj cui' xna'leb li ruchich'och' neque'xq'ue xcuanquil.

²³ Aban lao nakach'olob xyalal nak li Cristo quicam chiru li cruz re kacolbal. Abanan li camc chiru cruz xutanal chiruheb laj judío ut inc'a' neque'raj xtaubal xyalal lix camic li Cristo. Jo'can nak chiruheb laj judío li xyalal lix camic li Cristo chanchan jun li pec neque'xtich rokeb chiru. Jo'can ajcui' chiruheb li macua'eb aj judío, li xyalal lix camic li Cristo tontil na'leb chiruheb. ²⁴ Abanan chiku lao li sic'bil ku xban li Dios, usta lao aj judío

usta macua'o aj judío, riq'uin xcamic li Cristo chiru cruz nakil xcuanquil li Dios nak coxcol ut nakanau chic chanru xna'leb li Dios. ²⁵ K'axal cui'chic cuan xna'leb li Dios chiruheb li cuink usta yal tontil na'leb chiruheb li inc'a' neque'paban. Usta neque'xye nak mac'a' xcuanquil li Dios, k'axal cui'chic nim xcuanquil chiru xcuanquileb li cuink. ²⁶ Ex herman, cheq'ue retal chanru xanquex nak quixiq'ue' eru xban li Dios. Moco nabalex ta cuan ena'leb jo' xna'leb li ruchich'och'. Moco nabalex ta li cuan elok'al ut inc'a'

nabaleb sa' eyank cuanqueb xcuanquil sa' xc'aba'eb lix na' xyucua'. ²⁷ Li mac'a'eb xna'leb chiruheb li cuink, li Dios quixsiq'ueb ru re nak te'c'utek' xxutaneb li cuanqueb xna'leb sa' ruchich'och'. Ut li mac'a'eb xcuanquil sa' ruchich'och' li Dios quixsiq'ueb ru re nak te'c'utek' xxutaneb li cuanqueb xcuanquil sa' ruchich'och'.

²⁸ Li Dios quixsiq'ueb ru li tz'ektanabileb li mac'a'eb xlok'al ut li inc'a' neque'q'uehe' xcuanquil xbaneb li cuanqueb sa' li ruchich'och'. Quixsiq'ueb ban ru re xcubsinuil xcuanquileb li cuanqueb xna'leb sa' ruchich'och'. ²⁹ Quixbanu chi jo'ca'in re nak ma' ani tixnimobresi rib chiru li Kacua'.

³⁰ Yal xban rusilal li Dios nak junajex chic riq'uin li Jesucristo. Li Jesucristo quixakabac xban li Dios re xq'uebal kana'leb. Quixakabac chixticobresinuil li kach'ol chiru li Dios ut chikasantobresinuil. Ut sa' xc'aba' li Cristo cuybil sachbil li kamac. ³¹ Jo'can nak ca'aj cui' li Kacua' takanimobresi. Jo'ca'in tz'ibanbil retalil sa' li Santil Hu: Mikanimobresi kib. Chikanimobresihak ban xcuanquil li Kacua'.

2

¹ Jo'can ut ex herman, nak xincuulac eriq'uin chixch'olobanquil xyalal li ratin li Dios, inc'a' xinatinac riq'uin atin ch'a'aj xtaubal ru ut inc'a' xinatinac re xc'utbal nak cuan inna'leb. ² Xban nak inc'a' xcuaj xc'utbal nak cuan inna'leb, jo'can nak ca'aj cui' chirix lix camic li Cristo chiru li cruz xinatinac. ³ Nak cuanquin eriq'uin ninsicsot xban inxiu nak yooquin chi atinac eriq'uin xban nak inc'a' cau inch'ol. ⁴ Nak xinch'olob xyalal cheru inc'a' xinatinac riq'uin atin jo' neque'xbanu li cuanqueb xna'leb sa' ruchich'och'. Xinch'olob ban xyalal cheru jo' quixc'ut chicuu li Santil Musik'ej, ut li Santil Musik'ej quiq'uehoc xcuanquil li cuatin. ⁵ Lain inc'a'

xinatinac eriq'uin jo' neque'xbanu li cuanqueb xna'leb xban nak inc'a' nacuj nak tacuan̄k epab̄al sa' xc'aba' xna'lebeb li cūink; sa' xc'aba' ban xcuanquil li Dios xexpaban.

Li Dios naxc'ut chiku li xyalal

⁶ Li ac cauheb xch'ol sa' lix pabaleb, neque'katina riq'uin atin moco yalak ani ta tata'ok ru. A'in macua' xna'leb li ruchich'och' chi moco xna'lebeb li neque'taklan sa' ruchich'och'. Lix na'lebeb na-oso' jo' nak neque'oso' eb a'an.

⁷ Abanan lain ninch'olob xyalal li na'leb li quixq'ue li Dios. Li na'leb a'an mukmu nak quicuan chak junxil. Inc'a' natauman ru nak quicuan. Abanan chalen chak najter k'e cutan nak toj maji' quixyib li ruchich'och' ac cuan chak sa' xch'ol li Dios nak tixq'ue li kalok'al ut li kalok'al, a'an li kacolbal. ⁸ Ma jun li neque'taklan sa' ruchich'och' que'xtau ru li na'leb a'in. Cui ta que'xtau ru, inc'a' raj que'xcamsi chiru cruz li Kacua' Jesucristo, laj echal re li lok'al.

⁹ Jo'ca'in tz'ibanbil sa' li Santil Hu chirix li kalok'al:

Li inc'a' na-ilman ru chi moco na-abjc chi moco nac'oxlac xbaneb li cūink, a'an li quixc'ub li Dios chok' reheb li neque'rahoc re. (Is. 64:4; 65:17)

¹⁰ Aban li Dios quixc'utbesi chiku li na'leb a'in xban li Santil Musik'ej. Li Santil Musik'ej naxnau chixjunil lix na'leb li Dios li k'axal ch'a'aj xtaubal ru.

¹¹ Ma ani nana'oc re c'a'ru cuan sa' xch'ol li junjunk. Ca'aj cui' li junjunk nana'oc re. Jo'can ajcui' lix c'a'ux li Dios. Ma ani nana'oc re. Ca'aj cui' li Santil Musik'ej nana'oc re.

¹² Li Dios quixq'ue ke jun li Musik'ej. Macua' yal xmusik' cūink li cuan kiq'uin. A' lix Santil Musik' li Dios, a'an li cuan kiq'uin. Li Dios quixq'ue ke li Santil Musik'ej re nak takatau ru li c'a'ru naxq'ue ke riq'uin xnimal rusilal.

¹³ Inc'a' yoco chi atinac chirix li na'leb a'in riq'uin atin xkac'oxla kajunes. Yoco ban chi atinac riq'uin atin quic'utbesic chiku xban li Santil Musik'ej. Li xyalal li naxc'ut chiku li Santil Musik'ej lao nakach'olob chiruheb li cuan li Santil Musik'ej riq'uineb.

¹⁴ Li ani mac'a' li Santil Musik'ej riq'uin inc'a' naxc'uluban li xyalal li naxc'ut li Santil Musik'ej. A'an tontil na'leb chiru xban nak inc'a' naxtau ru. Ca'aj cui' li ani cuan li Santil Musik'ej riq'uin naru tixtau ru xban nak li Santil Musik'ej a'an li nac'utuc re li xyalal chiru.

¹⁵ Li ani cuan li Santil Musik'ej riq'uin naxnau bar cuan li yal ut naxnau ajcui' bar cuan li inc'a' yal. Ut li ani mac'a' li Santil Musik'ej riq'uin inc'a' naxtau ru lix na'leb li cuan li Santil Musik'ej riq'uin.

¹⁶ Jo'ca'in tz'ibanbil sa' li Santil Hu: Ma ani nana'oc re lix c'a'ux li Kacua'. Ma ani naru naq'uehoc xna'leb. Ma ani naxnau lix c'a'ux li Dios yal xjunes. Abanan xban nak lao cuan li Santil Musik'ej kiq'uin, cuan ajcui' lix c'a'ux li Cristo kiq'uin.

3

Yal aj c'anjelo chiru li Dios

¹ Ex inherman, nak cuanquin eriq'uin inc'a' quiru quinatinac eriq'uin jo' ninatinac riq'uineb li ac cauheb xch'ol sa' lix pabaleb. Laex chanchan mac'a' li Santil Musik'ej eriq'uin. Jo'can nak ninatinac eriq'uin jo' nak ninatinac riq'uineb li toj k'un xch'oleb sa' lix pabaleb.

² Li xyalal xincho'olob cheru chanchan nak leche xinq'ue cheruc'. Moco cacuil tzacaemk ta xinq'ue ere xban nak laex toj maji' nequexq'ui. Naraj naxye nak toj maji' ninch'olob cheru li na'leb li ch'a'aj xtaubal ru xban nak toj maji' nequexq'ui sa' le pabal ut mam̄in tetau ru.

³ Inc'a' texruk xtaubal ru anakcuan xban nak toj nequebanu li c'a'ru naxrahi ru le ch'ol. Nak toj cuan li cakalinc ib ut li cuech'inc ib sa' eyank, ma inc'a' ta bi'yoquex chi xbanunquil li c'a'ru naxrahi ru le ch'ol? Ut laex nequejuntak'eta erib riq'uineb li toj mac'a' li Santil Musik'ej riq'uineb.

⁴ Laex toj maji' junaj le ch'ol. Cuan li neque'xye, "lain

nintake laj Pablo". Ut cuan cui'chic li neque'xye, "lain nintake laj Apolos". Cui jo'can yoquex chixyebal, ¿ma inc'a ta bi' toj yoquex chixjuntak'etanquil erib riq'üneb li toj maji' neque'paban? ⁵ ¿Ani ta bi' laj Apolos? Ut, ¿anihin ta bi' lain? Lao yal aj c'anjel chiru li Kacua'. Xkach'olob xyalal cheru nak xepab li Kacua'. Ut chi kacabichalo nococ'anjelac jo' taklanbilo cui' xban li Kacua'. ⁶ Chanchano aj acuinel nak nococ'anjelac chiru li Dios. Chanchan auc xinbanu nak xinye resil li colba-ib ere. Ut chanchan t'akresinc quixbanu laj Apolos nak quixch'olob lix yalal cheru. Abanan a' li Dios quiq'uehoc lix mokic. ⁷ Jo'can nak chi moco laj acuinel chi moco laj t'akresinel cuan xcuanquil. Ca'aj cui' li Dios li naq'uehoc xmokic cuan xcuanquil. ⁸ Laj acuinel ut laj t'akresinel juntak'eteb xcuanquil chiru li Dios ut chi xjunkaleb te'xc'ul xk'ajcamunquil a' yal chanru lix c'anjeleb. ⁹ Lao kech aj c'anjelil kib chiru li Dios. Ut laex chanchanex li ch'och' li nakac'anjala ru. Ut li Dios a'an laj echal re li ch'och'. Ut chanchanex ajcui' jun li cab yoco chixyibanquil ut li Dios, a'an laj echal re li cab a'an. ¹⁰ Xban nak sic'bil cuu xban li Dios chi c'anjelac chiru jo' jun aj tz'ac chabil, jo'can nak xinnau xjolominquil li c'anjel. Chanchan nak xinyib xcimiento li cab nak xinye resil li colba-ib ut jalan chic te'cablak sa' xben nak te'xch'olob li xyalal cheru. Ut li junjunk chixq'uehak retal nak tz'akal re ru lix c'anjel tixbanu. ¹¹ Tixq'ue retal chanru lix c'anjel xban nak ac q'uebil lix cimientu li cab. Ut ma' ani naru tixq'ue junak chic li cimientu chiru li ac q'uebil. Ut a'an li Kacua' Jesucristo. ¹² Cuan li te'cablak sa' xben li cimientu a'an riq'uin li c'a'ak re ru najt naxcuy jo' li oro, li plata li li tertuquil pec. Ut cuan li te'cablak sa' xben riq'uin li inc'a' naxcuy jo' li che', li cuc ut li q'uim. Lix yalal a'an, a'in: nak cuan li te'c'anjelak chi chabil chiru li Dios ut cuan inc'a'. ¹³ Lix c'anjel li junjunk tac'utunk nak tol-elk cui'chic li Kacua' Jesucristo chi rakoc atin. Chanchan nak tanumsik sa' xam lix c'anjel naxbanu re rilbal ma tasok' malaj inc'a'. ¹⁴ Cui lix c'anjel inc'a' tasachek', nac'utun nak us lix c'anjel ut li jun a'an tixc'ul lix k'ajcamunquil. ¹⁵ Cui ut lix c'anjel junak inc'a' tz'akal re ru, lix c'anjel tasachk chanchan c'atbil nak tasok'. Ut li jun a'an tacolek', abanan chanchan tanumek' sa' xam nak tacolek'. ¹⁶ ¿Ma inc'a ta bi' nequenau nak laex rochochex li Dios? ¿Ma inc'a ta bi' nequenau nak li Santil Musik'ej cuan eriq'uin? ¹⁷ Li rochoch li Dios a'an santo. Cui ani naxtiquib li jachoc ib sa' eyank, li jun a'an yo chixjuc'bal rochoch li Dios xban nak laex aj pabanel rochochex chic li Dios. Ut li Dios tixsach li ani naxtiquib xjachbal ruheb laj pabanel. ¹⁸ Ma' ani taxak tixbalak'i rib xjunes. Cui cuan junak sa' eyank narec'a nak cuan xna'leb sa' li ruchich'och' a'in, chixcubsihak rib ut tixbanu jo' li mac'a' naxnau re nak tixtau xna'leb chi tz'akal. ¹⁹ Lix na'leb li ruchich'och', a'an tontil na'leb chiru li Dios. Jo'ca'in tz'ibanbil sa' li Santil Hu:

Li Dios naxcanabeb chixsachbaleb rib xban lix sebaleb xch'ol li ani neque'rec'a nak cuanqueb xna'leb xjuneseb rib. (Job 5:13)

²⁰ Ut tz'ibanbil ajcui' sa' li Santil Hu li naxye:

Li Dios naxnau nak mac'a' na-oc cui' lix c'a'uxeb li neque'xye nak cuanqueb xna'leb xjuneseb rib. (Sal. 94:11)

²¹ Jo'can nak ma' ani tixnimobresi ru junak cuink riq'uin li c'a'ru naxbanu xban nak chixjunil li c'a'ak re ru q'uebil ere xban li Dios re nak tac'anjelak cheru. ²² Usta laj Apolos, usta lain, usta laj Pedro, lao yal aj c'anjelo cheru. Usta li ruchich'och', usta li yu'am, usta li camc, ere ajcui' re nak te'c'anjelak cheru. Chixjunil li cuan anakuan ere laex ut ere ajcui' li toj chalel chiku. ²³ Chixjunil li c'a'ak re ru, ere laex. Abanan laex rehex li Cristo ut li Cristo, a'an re li Dios.

4

Quebilo chi c'anjelac chiru li Kacua'

¹ Jo'can nak chenuhac nak lao yal aj c'anjelo chiru li Cristo ut q'uebil sa' kabən xch'olobanquil lix yalal li colba-ib li quiq'uehe' ke xban li Dios. Li xyalal a'in mukmu nak quicuan chak junxil. ² Li ani sic'bil ru chixch'olobanquil li xyalal tento nak ticak xch'ol. ³ Lain mac'a' nacuaij re cui yoquex chixsic'bal atin chicuix ut mac'a' nacuaij re cui junak aj rakol atin tatz'iloc atin chicuix. Chi moco lain naru tincuech' rix lin c'anjel. ⁴ Lain nacuec'a' nak mac'a' inmac. Abanan moco xban ta a'an nak tinya nak tic'inc'ol. A' li tarakok atin sa' inben a'an li Kacua', ut a'an tayehok re ma us xinbanu malaj inc'a'. ⁵ Jo'can nak mexrakoc atin chirix le ras eritz'in. Cheroybeni toj tacuulak xk'ehil nak tol-elk cui'chic li Kacua' Jesucristo ut a'an tixc'utbesi li inc'a' nanauman anakuan. Tixc'utbesi li c'a'ru nanumi sa' xch'ol li junjunk. Ut li Dios tixq'ue xlok'al li junjunk a' yal chanru lix yehom xbanuhom. ⁶ Ex herman, chixjunil li xinye chirix laj Apolos ut chicuix re etenk'anquil nak xinye. Nacuaij nak tetau ru li c'a'ru xinye. Chetzol erib kiq'uin re nak tebanu jo' tz'ibanbil sa' li Santil Hu. Inc'a' naru tenimobresi erib xban nak nequetake li jun ut nequetz'ektana li jun chic. ⁷ ¿Ma jalanex ta bi' laex chiruheh li jun ch'ol chic nak nequerec'a' erib? ¿Ma macua' ta bi' li Dios quiq'uehoc ere li c'a'ru cuan ere? ¿C'a'ut nak nequenimobresi erib chixyebal nak cuan c'a'ru ere? Inc'a' naru tenimobresi erib xban nak yal xematani li c'a'ru cuan ere riq'uin li Dios. ⁸ Ac xc'ojla ech'ol xban nak sa' ech'ol laex nak ac xetau ena'leb. Chanchanex li biom sa' le pabal nak nequec'oxla. ¿Ma laex chic rey nak nequec'oxla? Sa' ech'ol laex nak mac'a' kacuanquil. Us raj ac ta cuan xetau ena'aj chok' rey, re nak tocuank ajcui' raj lao chi taklanc erochben. ⁹ Nak ninc'oxla lain li Dios xoxq'ue lao li apóstol chi mac'a' kacuanquil. Chanchano junak aj mac' li ac xtenebac camc sa' xben ut q'uebilo chiruheh li ángel ut chiruheh li cuink re toe'ril. ¹⁰ Laex nequec'oxla nak mac'a' kana'leb xban nak nakach'olob resil li Cristo ut laex cuan ena'leb xban nak nequenau nabal chirix li Cristo nak nequec'oxla. Lao mac'a' kacuanquil ut laex cuan ecuanquil nak nequec'oxla. Sa' ech'ol laex nak laex nequex-oxlok'ic ut lao tz'ektananbilo. ¹¹ Toj chalen anakuan yoco chixcuybal kasa' ut tachakik ke. Mac'a' chic kak'. Sac'bilo ut mac'a' kochoch. ¹² Cau nocotrabajic re xnumsinquil li cutan junjunk. Nak neque'xbanu mausilal ke, lao nakabanu usilal reheb. Ra neque'xbanu ke li xic' neque'iloc ke ut nakacuy xnumsinquil li raylal li neque'xbanu ke. ¹³ Nak nocohobe' inc'a' nakasume ru. Neque'katina ban sa' usilal. Chalen anakuan tz'ektananbilo xbaneb chixjunileb. Mac'a' noco-oc cui' nak noco'eril. Chanchano li mul chiruheh. ¹⁴ Macua' re xc'utbal eputan nak yoquin chixyebal ere chi jo'ca'in. Re ban xq'uebal ena'leb xban nak chanchanex li cualal inc'ajol chicuu ut raroquex inban. ¹⁵ Usta cuan lajebak mil li neque'ch'oloban xyalal li Cristo cheru, abanan lain li xinyehoc ere resil li colba-ib junxil nak xexpaban. Jo'can nak lain le yucua' sa' xc'aba' li Jesucristo. ¹⁶ Jo'can ut nak nintz'ama cheru nak tetzol erib cuiq'uin ut tebanu jo' ninbanu lain. ¹⁷ A'an aj e nak xintakla eriq'uin laj Timoteo. A'an tixjultica ere nak li c'a'ru yoquin chixch'olobanquil chirix li Cristo, a'an ajcui' li yoquin chixbanunquil. Ninch'olob chi tz'akal lix yalal yalak bar chiruheh chixjunileb laj pabanel. Laj Timoteo chanchan li cualal ut raro inban. Tz'akal re ru lix pabal sa' xc'aba' li Jesucristo. ¹⁸ Cuan li xe'k'etk'eto' sa' eyank. Eb a'an neque'xye nak ninxucua. Jo'can nak inc'a' chic ninxic eriq'uin. ¹⁹ A'an moco yal ta. Cui li Dios naxq'ue cue, chi seb tincuulak

eriq'uin. Aran toxintau xyalal. Tincuil ma ca'aj cui' atinac neque'xnau li k'etk'eteb. Toj aran tincuil ma yal na nak cuan xcuanquil li Dios riq'uibeb. ²⁰ Lix nimajcual cuanquilal li Dios, tento tac'utunk sa' li kayu'am. Moco ca'aj cui' ta riq'uin katin tac'utunk xcuanquil li Dios. ²¹ Lain ninpatz' ere c'a'ru teraj. ¿Ma teraj nak texink'us chi cau nak tincuulak eriq'uin? ¿Malaj ut teyib le yu'am re nak tincuulak riq'uin rahoc ut tulanil?

5

Li rakoc qtin sa' xbeneb laj co'bet ut laj yumbet

¹ Yalak bar x-abiman resil nak cuan li jo' majo'il na'leb sa' eyank xban nak jun li cujnk quixmak' rixakil lix yucua'. C'ajo' xyibal ru li yoqueb chixbanunquil sa' eyank. Eb li macua'eb aj pabanel inc'a' neque'xbanu chi jo'can. ¿Ma toja' ta chic laex texbanunk re chi jo'can? ² Laex neque'etk'eti erib ut toj cuan li mac sa' eyank. Naraho' raj ech'ol ut nayot'e' raj ech'ol xban xyibal ru li mac li yo xbanunquil sa' eyank. Li ani xmacob chi jo'can xerisi raj sa' eyank. ³ Usta najt cuanquin eriq'uin junelic yoquin chec'oxlanquil. Lain ninnau nak li cujnk a'an cuan xmac. Usta ma anihin chak eriq'uin, abanan li Cristo quixc'ut chicuu nak li jun a'an cuan xmac ut tento nak tixtoj rix lix mac. ⁴ K'axal us raj nak tech'utub erib sa' xc'aba' li Jesucristo ut tec'ub c'a'ru tebanu chirix a'an. Chanchan nak cuanquin eriq'uin xban nak yoquin chi tijoc cherix. Ut lix nimal xcuanquil li Jesucristo chicuank eriq'uin ut chextenk'a. ⁵ Isihomak li cujnk a'an sa' eyank. Nak cuank chic sa' ruk' laj tza tixc'ul li raylal ut riq'uin li raylal tixc'ul, tixcanab taxak xbanunquil li mausilal re nak naru tacolek' nak tol-elk cui'chic li Jesucristo. ⁶ Menimobresi erib riq'uin xc'oxlanquil nak us yoquex chixbanunquil. Laex nequexinjuntak'eta riq'uin xk'emal li caxlan cua. Laex nequenau nak usta ca'ch'in ajcui' lix ch'amal naq'ueman, naxch'amobresi chixjunil li k'em. Naraj naxye nak inc'a' naru nacuan li mac sa' xyankeb laj pabanel re nak inc'a' te'xc'am xbeheb li jun ch'ol chic chi macobc. ⁷ Canabomak chi junaj cua li najteril na'leb re nak mac'a'ak chic li mac eriq'uin. Chanchanaxech chic lix k'emal li caxlan cua mac'a' xch'amal xban nak li Jesucristo quirisi le mac. Eb laj judio que'xmajeja li carner re xjulticanquil li pascua ut jo'can ajcui' li Jesucristo a'an lix carner li Dios li quixmajeja rib re risinuil li kamac. ⁸ Jo'can nak chikacananabak li najter na'leb li naq'uehoc ke chi macobc. Li najter na'leb a'an chanchan lix ch'amal li caxlan cua. Ut lao chanchanako li xk'emal li caxlan cua mac'a' xch'amal. Naraj naxye nak ticak chic li kach'ol ut tz'akal re ru li kayu'am. ⁹ Sa' li hu li quintz'iba eriq'uin junxil, lain xinye ere nak inc'a' tejunaji erib riq'uibeb laj co'bet ut laj yumbet. ¹⁰ Nak xinye ere chi jo'can moco yoquin ta chi atinac chirixeb laj co'bet ut laj yumbet li toj maji' neque'paban. Yoquin ban chi atinac chirixeb li neque'xye rib nak aj pabaneleb ut toj neque'xra ru biomal ut neque'elk'ac ut toj neque'lok'onin jalanil dios. Cui ta xinye ere nak inc'a' texcuank sa' xyankeb li toj maji' neque'paban, inc'a' raj naru texcuank sa' ruchich'och'. ¹¹ Li c'a'ru xinye, a'an chirixeb li neque'xye rib nak aj pabaneleb ut yoqueb chixbanunquil li moco uxc ta naraj. Mare naxye rib nak aj pabanel ut a'an aj yumbet ut aj co'bet malaj aj rahol ru biomal. Mare nalok'onin jalanil dios, malaj aj hobonel. Mare aj calajenak malaj aj elk'. Inc'a' texcuank sa' xyankeb a'an chi moco texcua'ak rochbeneb. ¹² Macua' lain tinrakok atin sa' xbeneb li toj maji' neque'paban. A' li Dios, a'an li tarakok atin sa' xbeneb. ¹³ Abanan lao torakok atin sa' xbeneb li kech aj pabanelil li yoqueb chi macobc sa' kayank. Jo'can nak tento terisi sa' eyank li cujnk a'an li yo chi macobc.

6

Mec'ameb le rech aj pabanelil sa' rakleb atin

¹ Cui cuan junak sa' eyank cuan xch'a'ajquiall riq'uin junak xherman, ¿ma taruk ta bi' taxic chiruheb laj rakol atin re li ruchich'och'? ¿Ma inc'a' raj us nak riq'ueineb laj pabanel taxic? ² ¿Ma inc'a' nequenau nak sa' jun cutan lao aj pabanel torakok atin sa' xbeneb chixjunileb li cuanqueb sa' ruchich'och'? Ut cui lao torakok atin sa' xbeneb li cuanqueb sa' ruchich'och', ¿c'a'ut nak inc'a' taruk takayib ru li kach'a'ajquiall sa' xyalal chi kibil kib? ³ ¿Ma inc'a' nequenau nak sa' jun cutan torakok atin sa' xbeneb li ángel? Ut cui torakok atin sa' xbeneb li ángel, ¿c'a'ut nak inc'a' taruk torakok atin sa' xben li kach'a'ajquiall arin sa' ruchich'och'? ⁴ Cui cuan li plet sa' eyank, ¿c'a'ut nak nequeq'ue chi rakoc atin sa' eben li macua'eb aj pabanel? ⁵ Nequec'ut exutan nak nequeq'ue chi rakoc atin sa' eben li macua'eb aj pabanel. ¿Ma mac'a' ta bi' junak sa' eyank cuan xna'leb re tarakok atin sa' eben laex aj pabanel? ⁶ Abanan laex nequec'am le rech aj pabanelil chiru junak aj rakol atin macua' aj pabanel. ⁷ Nak nequec'am le rech aj pabanelil sa' rakleb atin nac'utun nak toj maji' nequetau xyalal. K'axal us raj nak tecuy li rahobtesic ut li elk'ac ut inc'a' texxic riq'uin aj rakol atin. ⁸ Abanan laex inc'a' nequecuy. Laex ban chic li nequex-elk'ac ut nequebanu li mausilal reheb le rech aj pabanelil. ⁹ ¿Ma inc'a' nequenau nak eb li inc'a' tiq'ueb xch'ol inc'a' te'rechani lix nimajcual cuanquiall li Dios? Mebalak'i erib. Eb laj co'bet ut eb laj yumbet inc'a' te'rechani lix nimajcual cuanquiall li Dios, chi moco li neque'lok'onin re li jalanil dios, chi moco eb laj muxul caxar. Ut eb li cuink li neque'macob riq'ueineb li rech cuinkilal inc'a' ajcui' te'rechani lix nimajcual cuanquiall li Dios. Jo'can nak mebalak'i erib chi xc'oxlanquil nak us yoquex cui toj yoquex chixbanunquil li mausilal a'in. ¹⁰ Eb laj elk' ut eb li neque'xrahi ru li biomal inc'a' te'rechani lix nimajcual cuanquiall li Dios, chi moco laj calajenak, chi moco laj majecuanel, chi moco laj balak' te'rechani lix nimajcual cuanquiall li Dios. ¹¹ Usta cuanqueb junjunk sa' eyank jo'can que'xbanu chak, abanan anakcuan cuybil sachbil chic lix maqueb. Santobresinbileb chic ut ticobresinbileb chic lix ch'ol sa' xc'aba' li Kacua' Jesucristo ut xban li Santil Musik'ej.

Chenima ru li Dios riq'uin le yehom ebanuhom

¹² Cuan li neque'yehoc: Lain naru tinbanu chixjunil li c'a'ru tincuj xbanunquil. Yal nak naru xbanunquil chixjunil abanan moco chixjunil ta us xbanunquil. Lain naru ninbanu chixjunil li nacuaaj, abanan inc'a' tinbanu cui nacuec'a' nak junes a'an taxic inch'ol chirix. ¹³ Li Dios quixiyib li tzacaemk re li kasa' ut quixiyib li kasa' re li tzacaemk. Yal ajcui', aban tacuulak xk'e'hil nak li Dios tixsach li tzacaemk jo' ajcui' li katibel. Li Dios inc'a' coxyo'obtesi re li co'betac yumbetac. Coxyo'obtesi ban re nak toc'anjelak chiru li Kacua'. Ut li Kacua' a'an li na-iloc ke. ¹⁴ Li Dios li quicuaclesin re li Kacua' Jesucristo chi yo'yo sa' xyankeb li camenak, a'an ajcui' tacuaclesin ke chi yo'yo riq'uin lix cuanquil. ¹⁵ ¿Ma inc'a' nequenau nak lao aj pabanel jo' li rok ruk' li Kacua' Jesucristo? ¿Ma taruk ta bi' takajunaji kib riq'ueineb li ixk li neque'xc'ayi rib? Ma jok'e naru xban nak lao rok ruk' li Cristo ut junajo chic riq'uin nak cuanco. ¹⁶ ¿Ma inc'a' nequenau nak li ani namacob riq'uin junak ixk aj mac junajeb chi tz'ejcualej neque'cana? Tz'ibanbil sa' li Santil Hu nak junajakeb chi tz'ejcualej chi xcabichaleb. ¹⁷ Ut ani naxjunaji rib riq'uin li Kacua', a'an junaj chic riq'uin sa' musik'ej. ¹⁸ Mebanu chic li mausilal. Chixjunil li c'a'ak re ru chi maquil k'axal yibru. Abanan li co'betac yumbetac k'axal cui'chic yibru xban nak li ani namacob chi toj maji' sumsu, li jun a'an naxmux rib

xjunes rib. ¹⁹ ¿Ma inc'a' nequenau nak laex rochochex li Santil Musik'ej xban nak li Santil Musik'ej li quixq'ue ere li Dios cuan eriq'uin? Jo'can nak moco laex ta nequetakla erib ejunes. Laex rehex chic li Dios. ²⁰ Lok'bilex chic chi terto etz'ak. Jo'can nak ticak le yu'am ut chelok'oni li Dios xban nak rehex chic.

7

Xch'olobanquil xyalal chirix li sumlac ut li cuanc chok' aj pabanel

¹ Xetakla chak xpatz'bal cue chirix li sumlac ut anakcuan tinsume le hu. Us raj chok' re li cuink nak mac'a'ak rixakil. ² Abanan us cui tasumlak re nak inc'a' tamacobk. Te'sumlak re nak li cuink te'cuanc rixakil chi xjunkaleb ut li ixk te'cuanc xbelom chi xjunkaleb. ³ Tento nak li cuink tacuanc riq'uin li rixakil ut li ixk tacuanc riq'uin lix belom jo' neque'raj chi ribileb rib. ⁴ Li ixakilbej moco a'an ta yal re sa' xben xjunes rib; aban chic lix belom yal re sa' xben. Jo'can ajcui' li belomej. Moco a'an ta yal re sa' xben xjunes rib; a' ban chic li rixakil yal re sa' xben. ⁵ Cui li belomej naraj cuanc riq'uin li rixakil, li ixakilbej inc'a' naru tixye inc'a'. Ut cui li ixakilbej naraj cuanc riq'uin lix belom, li belomej inc'a' naru tixye inc'a'. Naru te'xc'ub chi ribileb rib nak te'x-oxlok'i rib chi ribileb rib jarubak cutan re nak te'xq'ue xch'oleb chi tijoc. Abanan te'cuanc cui'chic mokon chi ribileb rib re nak inc'a' te'alek xban laj tza xban nak inc'a' te'xcuy cuanc xjuneseb. ⁶ Lain yal ena'leb yoquin chixq'uebal. Moco yoquin ta chixyebal ere nak tento tebanu. Laex yal ere chanru teraj tebanu. ⁷ Lain nacua'j raj nak mac'a'ak erixakil jo' lain mac'a' cuixakil. Abanan moco juntak'eto ta chikajunilo. Li junjunk cuan xmatan q'uebil re xban li Dios. Jo'can nak cuan li neque'sumla xban nak jo'can naraj li Dios ut cuan li inc'a' neque'sumla ut saheb sa' xch'ol xjuneseb xban nak jo'can naraj li Dios. ⁸ Ut ninye reheb li inc'a' sumsuqueb ut reheb li xmalca'an nak us raj chok' reheb nak te'canak xjuneseb jo' lain. ⁹ Ut cui inc'a' naru neque'xcuy rib, sumlakeb. K'axal us nak tasumlak junak chiru nak yok chixrabal ru junak re nak tacuanc riq'uin chi inc'a' sumsuqueb. ¹⁰ Anakcuan tixye reheb li ac sumsuqueb nak li ixakilbej inc'a' naru tixjach rib riq'uin lix belom. Li chak'rab a'in macua' lain xinyehoc re injunes. Q'uebil ban xban li Kacua'. ¹¹ Ut cui li ixakilbej tixjach rib riq'uin lix belom, li ixk a'an tacuanc xjunes ut inc'a' chic tixsic' jalan cuink. Abanan us raj cui tixc'am cui'chic rib sa' usilal riq'uin lix belom. Ut jo'can ajcui' li belomej, inc'a' ajcui' naru tixjach rib riq'uin li rixakil. ¹² Lain nacua'j xq'uebal ca'ch'inak chic le na'leb. A'in macua' xyehom li Kacua', aban lain ninnau nak us xbanunquil. Cui junak cuink naxpab li Dios ut li rixakil toj maji' napaban ut naxc'ul xch'ol li ixk cuanc riq'uin, li cuink a'an inc'a' naru tixcanab chi moco tixjach rib riq'uin li rixakil. ¹³ Ut cui junak ixk naxpab li Dios ut lix belom toj maji' napaban, ut naxc'ul xch'ol li cuink cuanc riq'uin, li ixk a'an inc'a' naru tixcanab chi moco tixjach rib riq'uin lix belom. ¹⁴ Us cui inc'a' te'xjach rib. Li belomej li toj maji' napaban, a'an lok' chiru li Dios sa' xc'aba' li rixakil. Ut li ixakilbej li toj maji' napaban, a'an lok' chiru li Dios sa' xc'aba' lix belom li napaban. Cui ta inc'a' jo'can, lix coc'al eb a'an chanchaneb raj lix coc'aleb li macua'eb rala' xc'ajol li Dios. Abanan cui inc'a' te'xjach rib, lix coc'aleb lok' chiru li Dios sa' xc'aba' li jun li napaban. ¹⁵ Cui li belomej macua' aj pabanel ut inc'a' chic naraj cuanc riq'uin li rixakil xban nak aj pabanel chic li ixk, naru te'xjach rib. Ut cui li ixakilbej macua' aj pabanel ut inc'a' chic naraj cuanc riq'uin lix belom xban nak li cuink aj pabanel chic, naru ajcui' te'xjach rib. Chi jo'can tacanak laj pabanel chi mac'a' chic tach'i'ch'i'ink re xban nak li Dios naraj nak tocuanc sa' xyalal. ¹⁶ At ixakilbej, la'at inc'a' nacanau ma tapabank

la belom aban. Jo'can ajcui' laat, belomej, inc'a' nacanau ma tapabank la cuixakil aban. ¹⁷ Li junjunk chicuank jo' naraj li Dios. Us cui cuan acuixakil nak xapab li Cristo. Cui mac'a' acuixakil, us ajcui'. Tatcanak jo' nak cuancat nak xatpaban. A'an a'in li nequebinchak'rabi cui' chixjunibet laj pabanel yalak bar. ¹⁸ Cui junak ac xc'ul li circunció'n nak tapabank, li jun a'an inc'a' tixc'oxla xjalbal li retalil li circunció'n. Ut cui junak tapabank ut toj maji' naxc'ul li circunció'n, li jun a'an inc'a' ajcui' tento nak tixc'ul li circunció'n. ¹⁹ Li ani naxc'ul li circunció'n juntak'et riq'u'in li ani inc'a' naxc'ul xban nak li circunció'n mac'a' xcuanquil. Li k'axal us xbanunquil, a'an xpabanquil lix chak'rab li Dios. ²⁰ Jo' nak cuan junak nak quisiq'ue' ru xban li Dios, jo'can ajcui' tacanak. ²¹ Cui cuancat rubel xcuanquil la patrón nak li Dios quixsic' acuu, matc'oxlac chirix a'an. Abanan cui naxq'ue rib nak tat-elk rubel xcuanquil la patrón, naru nacat-el sa' xyalal. ²² Li ani cuan rubel xcuanquil lix patrón nak quisiq'ue' ru xban li Ka'cua', li jun a'an libre chic cuan chiru li Dios. Ut li jun li inc'a' cuan rubel xcuanquil lix patrón nak quisiq'ue' ru, lok'bil chic xban li Cristo chi c'anjelac chiru. ²³ Jo'can ajcui' laex. Lok'bilex chic xban li Cristo chi tertó etz'ak. Jo'can nak meq'ue chic erib rubel xcuanquil li inc'a' useb xna'leb. Meq'ue erib chi taklac re xbanunquil li inc'a' naraj li Dios. ²⁴ Ex herman, jo' nak cuanquex nak quisiq'ue' eru xban li Dios, jo'can ajcui' texcanak. ²⁵ Lain tinye ere li ninc'oxla chirixeb li saj ixk ut li saj cu'ink. Usta ma'cua' ratin li Ka'cua', us cui tex-ab'ink chicuu xban nak riq'u'in xnimat ruxtan li Ka'cua' naxq'ue inna'leb chixyebal ere lix yalal. ²⁶ Xban li rahobtesic cuan sa' kaben, ninc'oxla nak us cui inc'a' te'sumlak li toj maji' sumsu'queb. ²⁷ Abanan cui sumsu'quex, me'canab le rixakil. Ut cui inc'a' sumsu'quex, us ajcui' cui inc'a' tesic' erixakil. ²⁸ Abanan cui texsumlak moco mac ta a'an. Ut jo'caneb ajcui' li saj ixk. Moco mac ta cui te'sumlak. Abanan k'axal cui'chic nabal li raylal sa' x'beneb li sumsu'queb. Lain inc'a' raj nacuaj nak tec'ul li raylal. ²⁹ Ex inherman, li bar cuan nacuaj xyebal, a'an a'in: Yo'queb chi numec' li cutan sa' junpat. Jo'can nak laex li cuan erixakil ma'cua' ca'aj cui' le rixakil tec'oxla. Cheq'uehak ban ech'ol chi c'anjelac chiru li Ka'cua'. ³⁰ Usta sa sa' kach'ol, usta ra sa' kach'ol, usta cuan kabiomal usta mac'a', chikaq'uehak ban kach'ol chi c'anjelac chiru li Ka'cua' Dios. ³¹ Meq'ue ech'ol chirix li c'a'ru cuan ere sa' li ruchich'och' a'in, xban nak chixjunil li c'a'ru cuan sa' ruchich'och' taosok'. ³² Nacuaj raj nak mac'a' c'a'ru taxic cui' ech'ol. Li cu'ink li mac'a' rixakil naxq'ue xch'ol chi c'anjelac chiru li Ka'cua' Dios ut chixbanunquil li bar cuan naraj li Ka'cua' Dios. ³³ Ut li cu'ink cuan rixakil tento nak tixq'ue xch'ol chi c'anjelac re nak tacuank c'a'ru reheb ut tixq'ue xch'ol chixbanunquil li naraj li rixakil re nak sahak sa' xch'ol. Jo'can nak cuib ru lix c'a'ux xban nak naxc'oxla li Ka'cua' Dios ut naxc'oxla li rixakil. ³⁴ Jo'can ajcui' li ixk li cuan xbelom. Cuib ru lix c'a'ux xban nak naxc'oxla li Ka'cua' Dios ut tento ajcui' nak tixc'oxla lix c'anjel sa' rochoch ut naxbanu c'a'ru naraj lix belom. Ut li ixk li mac'a' xbelom naxq'ue xch'ol chi c'anjelac chiru li Ka'cua' Dios ut naxbanu jo' naraj li Dios. ³⁵ Moco re ta nak inc'a' texsumlak nak ninye ere chi jo'ca'in. Re ban etenk'anquil. Lain nacuaj nak tebanu li us. Nacuaj nak tek'axtesi erib chi c'anjelac chiru li Ka'cua' chi anchal ech'ol. ³⁶ Cui junak yucua'bej naxc'oxla nak us tasumlak lix rabin xban nak ac cuan xchihab, us nak tixbanu li naxc'oxla xbanunquil. Tixsumub lix rabin. Moco mac ta cui tasumlak. ³⁷ Li yucua'bej ma' ani naminoc ru. Naru tixbanu li naxc'oxla nak us xbanunquil. Ut cui na-ala sa' xch'ol nak inc'a' tixsumub lix rabin, chabil ajcui' naxbanu nak inc'a' tixsumub. ³⁸ Jo'can nak li ani naxsumub lix rabin, chabil naxbanu. Ut li inc'a'

naxsumub lix rabin, k'axal cui'chic us naxbanu. ³⁹ Li ixk li sumsu tento nak taçuank riq'uin lix belom a' yal jo' najtil yo'yok lix belom. Ut cui nacam lix belom a'an chic yal re ani aj iq'uin taşumlak. Abanan cui naraj sumlaç, tento nak riq'uin junak aj pabanel taşumlak. ⁴⁰ Abanan ninc'oxla lain nak k'axal us raj nak li xmalca'an taçanak xjunes ut inc'a' chic taşumlak. Li na'leb a'in li xinye ere, a'an q'uebil cue xban li Santil Musik'ej.

8

Xq'uebal xna'lebeb chirix li tzacaemk mayejanbil chiruheb li yibanbil Dios

¹ Cuan cuib oxib cuatin tinye ere chirix li tzacaemk mayejanbil chiruheb li yibanbil dios. Nakanau nak chikajunilo ac xkatzol kib chirix a'in. Abanan toj cuan sa' eyank neque'xc'oxla nak neque'xnu chixjunil ut riq'uin a'an neque'xk'etk'eti rib. Aban li ani narahoc, a'an naxtenk'a li rech aj pabanelil chi q'ujic sa' lix pabal. ² Li ani narec'a nak cuan xna'leb, li jun a'an toj maji' naxtau li xyalal chi tz'akal. ³ Abanan li ani narahoc re li Dios, li Dios naxnau nak a'an li ralar xc'ajol. ⁴ Anakcuan tinatinak chirix li tzacaemk mayejanbil chiruheb li yibanbil dios. Lao nakanau nak li yibanbil dios maç'a' neque'oc cui' xban nak moco dioseb ta. Nakanau nak jun ajcui' li Dios cuan. ⁵ Cuan neque'yehoc re nak cuan nabal li dios jo' sa' choxa jo' sa' ruchich'och'. Dios ut Kaçua' neque'xye reheb. Ut yal nak cuan nabaleb li yibanbil dios. ⁶ Abanan lao aj pabanel nakanau nak jun ajcui' li Dios cuan. Ut li Dios Acuabej a'an li quiyiban re chixjunil li c'a'ru cuan. Coxyo'obtesi lao re nak takalok'oni a'an. Ut jun ajcui' li Kaçua' cuan, a' li Jesucristo. Ut sa' xc'aba' a'an cuan chixjunil ut sa' xc'aba' a'an nak cuan li colba-ib. ⁷ Abanan moco chixjunileb ta neque'xtau ru li xyalal a'in chirix li mayejanbil tzacaemk. C'aynakeb chalen chak najter chixpabanquil li yibanbil dios, ut anakcuan nak neque'xtzaca li tzacaemk mayejanbil chiru li yibanbil dios neque'xc'oxla nak yoqueb chixq'uebal xlok'al li yibanbil dios. Ut xban nak toj k'uneb xch'ol sa' lix pabal, neque'xc'oxla nak neque'xmux ru lix pabaleb. ⁸ Moco xban ta li katzacaemk nak toçuank chi sum atin riq'uin li Dios. Li tzacaemk inc'a' naxnimobresi xcuanguil li kapabal chi moco naxpo' li kapabal. ⁹ Naru tetzaca li mayejanbil tzacaemk. Abanan cheq'uehak retal nak inc'a' teluctasi xch'ol li toj k'uneb xch'ol sa' lix pabaleb xban nak nequetzaca a'an. Cheq'uehak retal nak inc'a' taoc cui'chic chi maçobc eban laex. ¹⁰ Laex nequenau li xyalal a'in. Nequenau nak moco maç ta tzacanquil li tzacaemk mayejanbil. Abanan cui' junak aj pabanel toj k'un xch'ol sa' xpabal taïlok ere nak c'ojc'oquex sa' mex chi cua'ac cuan cui' li yibanbil dios, mare a'an tixtzaca li mayejanbil chiruheb li yibanbil dios ut tixc'oxla nak xmux ru lix pabal. ¹¹ Laex nequenau nak naru tetzaca li mayejanbil tzacaemk. Abanan, mare yal emaç laex nak taoc cui'chic chi maçobc li toj maji' nacacuu sa' xpabal. Laex nequenau nak li Cristo quicam ajcui' sa' xc'aba' eb a'an. ¹² Cui eban laex nak yoqueb chi luctaç xch'oleb le rech aj pabanelil li toj k'uneb xch'ol sa' lix pabal, yoquex chi maçobc chiruheb a'an. Ut yoquex ajcui' chi maçobc chiru li Cristo. ¹³ Jo'can nak cui li nintzaca naxq'ue chi maçobc li cuech aj pabanelil, ma jok'e chic tintiu li mayejanbil tib xban nak inc'a' nacuj nak te'maçobk inban lain.

9

Tento nak tixc'ul xtojbaj laj c'anjel chiru li Dios

¹ ¿Ma inc'a' ta bi' naru tinbanu li c'a'ru nacuj lain? ¿Ma inc'a' ta bi' lain apóstol? Lain quicuil ru li Kaçua' Jesucristo. Ut sa' inc'aba' lain nak

xexpaban xban nak lain xinyehoc ere resil li colba-ib. ² Mare cuan li inc'a' neque'q'uehoc incuanquil nak lain apóstol. Abanan relic chi yal nak lain apóstol xban nak lain xinyehoc ere resil li colba-ib. Jo'can nak xepab li Cristo. ³ Riq'uin li atin a'in nequebinsume li neque'yehoc re nak macua' in apóstol. ⁴ ¿Ma inc'a' ta bi' raj tento ajcui' nak tinetenk'a' lain riq'uin lin tzacaemk? ⁵ Eb li ritz'in li Kacua' Jesucristo cuanqueb rixakil ut neque'xc'am chixixeb bar neque'xic. Ut jo'can ajcui' naxbanu li apóstol Pedro. ¿Ma inc'a' ta bi' raj taruk tinsumlak riq'uin junak ixk aj pabanel lain ut tinc'am chicuix bar tinxic jo' neque'xbanu eb li apóstol jun ch'ol chic? ⁶ Malaj ut nequec'oxla nak ca'aj cui' lain ut laj Bernabé cau totrabajik re nak takasic' katzacaemk. ⁷ Junak soldado, ¿ma inc'a' ta bi' tixc'ul lix tojbal? Ut junak aj acuinel, ¿ma inc'a' ta bi' tixtzaca li ru li racuimk? Ut junak aj q'uirisinel cuacax, ¿ma inc'a' ta bi' taruc' re lix leche lix cuacax? ⁸ Li c'a'ru yoquin chixyebal macua' yal xc'a'ux cuimk. A'an tz'ibanbil sa' li chak'rab li quiq'uehe' re laj Moisés. ⁹ Tz'ibanbil sa' lix chak'rab laj Moisés chi jo'ca'in: Mabac' xtz'umal re li boyx nak yo' chi c'anjelac re risinquit rix li trigo. Li Dios macua' ca'aj cui' chirix li boyx naatinac. ¹⁰ ¿Ma macua' ta bi' chixix lao aj c'anjel chiru li Dios yo' chi atinac? ¿Ma inc'a' ta bi' taruk takac'ul katojbal lao aj c'anjel chiru li Dios? Li ani na-au naroybeni ru li racuimk ut jo'can ajcui' laj k'olonel naroybeni ajcui' nak tatz'ak ru li acuimk. ¹¹ Lao xoyehoc resil li colba-ib ere. ¿Ma inc'a' ta bi' naru nocoetenk'a' laex riq'uin li c'a'ru takaj lao re xnumsinquil li cutan junjunk? ¹² Cui laex nequetenk'a' li jun ch'ol chic li kech aj c'anjelil, ¿ma toja' ta chic lao inc'a' toetenk'a'? Lao inc'a' xkatz'ama ere nak toetenk'a'. Xkacuy ban xnumsinquileb li cutan yal chi jo'can xban nak lao inc'a' xkaj nak tach'inank ech'ol chirabinquil li resil li Cristo. ¹³ ¿Ma inc'a' ta bi' nequenau nak eb laj judío li neque'c'anjelac sa' rochoch li Dios, tento ajcui' nak neque'tz'ak li c'a'ru namayejac sa' rochoch li Dios? A'an naraj naxye nak eb li neque'c'anjelac sa' li artal neque'tz'ak ajcui' lix tibel li mayejanbil xul. ¹⁴ Jo' nak neque'tenk'ac eb laj judío li neque'c'anjelac sa' rochoch li Dios, jo'can ajcui' nak te'xc'ul lix tenk'anquileb li yoqueb chi c'anjelac chiru li Dios anacuan xban nak jo'can quixye li Kacua'. ¹⁵ Abanan lain inc'a' xintz'ama ere nak tinetenk'a', chi moco yoquin ta chixyebal a'in re nak tinetenk'a'. Inc'a' nacua'j tintojek' xban nak nasaho' sa' inch'ol nak ninye resil li colba-ib chi mac'a' intojbal. Us raj nak tincamk xban tz'ocac chiru nak tinetoj ut tinsach li sahil ch'olejil li ninc'ul xban xyebal resil li colba-ib chi mac'a' intojbal. ¹⁶ Lain inc'a' ninnimbrosi cuib xban nak ninch'olob xyalal li colba-ib. Taklanbilin chi c'anjelac xban li Dios. K'axal ra raj chok' cue cui ta inc'a' ninjultica resil. ¹⁷ Cui ta yoquin chixbanunquil yal xban nak nacua'j lain, tino'oni raj intojbal. Abanan yoquin chixbanunquil lin c'anjel xban nak tenebanbil sa' inben xban li Dios xyebal resil li colba-ib. ¹⁸ ¿C'a'ru ink'ajcamunquil yoquin chixc'ulbal? Ca'aj cui' li sahil ch'olejil naxq'ue cue li Dios xban nak ninjultica resil li colba-ib chi mac'a' intojbal. Lain taruk raj tinc'ul intojbal eriq'uin abanan inc'a' nacua'j.

Laj Pablo quixnau c'anjelac sa' xyankeb li jalan jalank xna'lebeb

¹⁹ Lain moco taklanbilin ta xban cuimk, abanan ninq'ue cuib chi c'anjelac chiruheb chixjunileb re nak te'xpab li Cristo inban lain. ²⁰ Nak cuanquin sa' xyankeb laj judío lain ninbanu jo' neque'xbanu laj judío re nak te'xpab li Cristo. Cuan li toj neque'xq'ue xcuanquil lix chak'rab laj Moisés. Nak cuanquin sa' xyankeb a'an, ninbanu li naxye lix chak'rab laj Moisés re nak te'xpab li Cristo inban lain. ²¹ Eb li macua'eb aj judío moco cuanqueb ta

rubel xcuanguil lix chak'rab laj Moisés. Nak cuanquin sa' xyankeb a'an, ninbanu jo' neque'xbanu eb a'an re nak te'xpab li Cristo inban lain. Abanan a'an inc'a' naraj naxye nak inc'a' ninbanu li naxye li Dios. Inc'a' ninbanu li inc'a' us. Lain ninbanu li naxye li Cristo. ²² Nak cuanquin sa' xyankeb li toj k'uneb xch'ol sa' lix pabal, nincubsi cuib chiruheb re nak te'cacuuk xch'ol sa' xpabaleb inban lain. Naraj naxye nak ninjuntak'eta cuib riq'uin chixjunileb re nak naru tinch'olob xyalal chiruheb. Ninbanu chi jo'can re nak te'colek'. ²³ Chixjunil a'in nalajinbanu re nak naru tinch'olob xyalal li colba-ib chiruheb li cuas cujtz'in ut re nak tintz'akonk ajcui' lain riq'uin li naxyechi'i li Dios.

Laj Pablo quixq'ue xch'ol chi c'anjelac chiru li Dios

²⁴ Nequexinjuntak'eta riq'ueineb li neque'xyal xk'e chi alinac. ¿Ma inc'a' ta bi' nequenau nak eb li neque'alinalac chixjunileb neque'xyal xk'e chi alinalac? Abanan jun ajcui' naxc'ul xmatan. Jo'can ut laex cheq'uehak ech'ol chi pabanc re nak tec'ul ematan riq'uin li Dios. ²⁵ Li ani naxyal xk'e chi alinalac naxcuy li raylal re nak tacacuuk xmetz'eu. Neque'xbanu a'an re xc'ulbal junak matan na-oso'. Jo'can ajcui' lao aj pabanel nakacuy li raylal ut nakac'ul ajcui' kamatan. Abanan li matan nakac'ul lao inc'a' na-oso'. A'an cuan chi junelic. ²⁶ Li ani naalinac naxyal xk'e re nak tixc'ul lix matan. Jo'can ajcui' lain. Ninq'ue inch'ol chi c'anjelac chiru li Dios re nak tinc'ul inmatan. Moco yoquin ta chixyalbal inmetz'eu jo' li nasac'oc sa' ik' chi mac'a' rajbal. Ninq'ue ban inch'ol chi c'anjelac sa' xyalal chiru li Dios. ²⁷ Nintacuasi cuib ut ninq'ue inch'ol chi c'anjelac. Inc'a' ninbanu li nacuj lain. Ninbanu ban li naraj li Dios. Inc'a' nacuj nak lain chic inc'a' tinc'ul lin matan mokon nak acak xinye resil li colba-ib reheb li cuas cujtz'in.

10

Eb laj Israel que'xtz'ek xmataneb

¹ Ex inherman, lain nacuj nak texc'oxlak ca'ch'inak chirix li c'a'ru que'xc'ul li kaxe'tonil yucua' nak que'el sa' li tenamit Egipto. Li Dios quixtakla li chok chi c'amoc be chiruheb ut chixjunileb que'nume' jun pac'al li Caki Palau nak quixjach rib re te'numek'. ² Chanchan nak que'cube xha'eb sa' li chok ut sa' li Caki Palau ut riq'uin a'an que'xc'ul xch'oleb nak laj Moisés tac'amoc be chiruheb. ³ Ut chixjunileb que'xcua' li maná li choxahil cua li quixtakla chak li Dios. ⁴ Chixjunileb que'ruc' li ha' li quiq'uehe' reheb xban li Dios. Li ha' a'an qui-el chak sa' li sakonac. Ut li sakonac a'an, a'an retalil li qui-ochbenin reheb nak yoqueb chi numec' sa' li chaki ch'och'. ⁵ Abanan moco chixjunileb ta que'xbanu jo' naraj li Dios. Lix q'uialeb que'xk'et ratin li Dios ut xban nak inc'a' que'xbanu jo' naraj li Dios, jo'can nak que'cam sa' li chaki ch'och' ut inc'a' que'oc sa' li tenamit Canaan. ⁶ Chixjunil a'an nac'utuc chiku nak inc'a' takarahi ru li inc'a' us jo' que'xbanu eb a'an. ⁷ A'an naxc'ut chiku nak inc'a' takalok'oni li yibanbil dios jo' que'xbanu eb a'an. Jo'ca'in tz'ibanbil sa' li Santil Hu chirixeb: Eb li tenamit que'cua'ac ut que'uc'ac ut que'xajoc re xlok'oninquil li cuacax oro. (Ex. 32:6) ⁸ Ut naxc'ut ajcui' chiku nak inc'a' us li co'betac yumbetac jo' que'xbanu eb a'an ut chiru jun cutan quilaje'cam oxib xca'c'al mil (23,000) chi tenamit xban li mausilal que'xbanu. ⁹ Mikaq'ue xjosk'il li Kaçua' Dios jo' que'xbanu eb a'an nak que'xbanu li mausilal ut que'ti'e' xbaneb li c'anti' li quixtakla li Kaçua' Dios ut que'cam. ¹⁰ Chi moco tocuech'ok, jo' que'xbanu eb a'an. Ut xbaneb lix mausilal que'camsic xban li ángel li quixtakla chak li Dios. ¹¹ Li c'a'ru que'xc'ul li kaxe'tonil yucua' a'an tz'ibanbil retalil sa' li Santil Hu re nak lao

takaq'ue retal ut inc'a' takabanu jo' que'xbanu eb a'an xban nak cuulac re li roso'jic li cutan. ¹² Jo'can nak li ani narec'a nak cau xch'ol sa' lix pabal chixq'uehak retal lix yu'am re nak inc'a' taoc chi macobc. ¹³ Moco jalan ta chic li alec nequec'ul laex chiru li neque'xc'ul chixjunileb. Abanan li Dios tic xch'ol. A'an inc'a' nocoxcanab chi alec cui inc'a' takacuy xnumsinquil. A'an ban natenk'an ke chixcuybal xnumsinquil. ¹⁴ Jo'can ut ex inherman, raroquex inban, melok'oni chic li jalanil dios. ¹⁵ Lain ninch'olob xyalal cheru xban nak cuan ena'leb. Ut laex naru teye ma us li ninye malaj inc'a'. ¹⁶ Nak nakabanu li lok'oninc re xjulticanquil lix camic li Cristo, nocotioxin chiru li Dios. Nak nakuc' li xya'al li uva, ¿ma inc'a' ta bi' junajo riq'uin li Cristo xban nak quihoye' xquiq'uel chiru li cruz sa' kac'aba'? Ut nak nakatzaca li caxlan cua li najachiman, ¿ma inc'a' ta bi' junajo riq'uin li Cristo xban nak quicam chiru li cruz sa' kac'aba'? ¹⁷ Usta nabalo, jun ajcui' li caxlan cua najachiman ut nakacuotzi. A'an retalil nak lao junajo chic riq'uin li Cristo. ¹⁸ Cheq'ue retal laj Israel. Eb a'an que'xtzaca li tib li que'xmajeja chiru li Dios. A'an retalil nak cuanqueb chi sum atin riq'uin li Dios. ¹⁹ ¿C'a'ru xyalal li yoquin chixyebal? ¿Ma yo'yo ta bi' li yibanbil dios? Inc'a'. Ut, ¿ma cuan ta bi' xcuanquil li tib li namajejac chiruheb? Mac'a' xban nak mac'a' xcuanquil li yibanbil dios. ²⁰ Lain inc'a' ninye nak cuan xcuanquil li yibanbil dios, chi moco ninye nak li mayejanbil tib cuan xcuanquil. Li yoquin chixyebal, a'an a'in: eb li inc'a' neque'xpab li tz'akal Dios neque'majejac, aban macua' chiru li Dios neque'majejac. Chiru ban li maus aj musik'ej. Ut lain inc'a' nacuj nak yokex chi oquenc sa' lix na'lebeb li maus aj musik'ej. ²¹ Inc'a' naru teruc' xsa' li sec' re xjulticanquil xcamic li Kacua' Jesús, ut teruc' ajcui' xsa' li sec' re xq'uebal xlok'al li maus aj musik'ej. Chi moco naru tecua' li caxlan cua re xjulticanquil xcamic li Kacua' Jesucristo ut tecua' ajcui' li cua mayejanbil chiruheb li maus aj musik'ej. ²² Inc'a' us cui takaq'ue xjosk'il li Kacua' riq'uin xlok'oninquit li yibanbil dios. ¿Ma lao ta bi' nim kacuanquil chiru li Kacua'? Ma jok'e xban nak lao mac'a' kacuanquil.

Chixjunil li c'a'ak re ru takabanu rehak xlok'oninquit li Dios

²³ Cuan li neque'yehoc re nak naru nakabanu chixjunil li nakaj. Yal nak naru nakabanu, abanan moco chixjunil ta us xbanunquil. Yal nak naru xbanunquil chixjunil, abanan moco chixjunil ta li c'a'ru nakabanu nocoxtenk'a chi q'ujic sa' li kapabal. ²⁴ Mesic' li us ca'aj cui' chok' ere laex. Chesic' aj ban cui' li us chok' reheb le ras eritz'in. ²⁵ Naru tetzaca chixjunil li tib nac'ayiman sa' li c'ayibal, ut mepatz' ma mayejanbil chiru li yibanbil dios re nak mac'a'ak ec'a'ux nak tetzaca. ²⁶ Naru tetzaca xban nak li Kacua' Dios a'an laj echal re li ruchich'och' ut a'an ajcui' laj echal re chixjunil li cuan sa' ruchich'och'. ²⁷ Cui junak macua' aj pabanel tatxbok chi cua'ac riq'uin ut cui naxc'ul ach'ol xic riq'uin, li c'a'ru tixq'ue chatzaca, chac'ul. Abanan inc'a' tapatz' ma mayejanbil li tzacaemk a'an re nak mac'a'ak ac'a'ux nak tatzaca. ²⁸ A'ut cui junak naxye acue nak li tzacaemk a'an mayejanbil chiru li yibanbil dios, inc'a' tatzaca a'an re nak inc'a' tach'inak xch'ol li xyehoc acue nak mayejanbil tzacaemk ut re ajcui' nak inc'a' taoc xc'a'ux. ²⁹ Inc'a' yoquin chixyebal a'in chirix la c'a'ux laat. Yoquin chi atinac re nak inc'a' tach'inank xch'ol li jun chic aban laat.

Ma're junak ere tachak'ok ut tixye cue, ¿c'a'ut nak inc'a' tinbanu li naru tinbanu yal xban nak jalan chic naxye nak inc'a' us xbanunquil? ³⁰ Ut cui lain nintioxin chirix li c'a'ru nintzaca, ¿c'a'ut nak tacuech'ik rix li c'a'ru tintzaca? cha'ak. ³¹ Lain tixye ere li xyalal. Chixjunil li c'a'ru tetzaca ut chixjunil li c'a'ru tebanu, chebanuhak re xq'uebal xlok'al li Kacua' Dios. ³² Mebanu li

c'a'ak re ru napo'oc xch'oleb le ras eritz'in usta aj judío, usta macua'eb aj judío. Chi moco tebanu li c'a'ru tapo'ok xch'ol le rech aj pabanelil. ³³ Jo'can nak lain ninyal ink'e chixbanunquil li us re xtenk'anguil chixjunileb. Lain inc'a' yoquin chixsic'bal li us chok' cue lain injunes. Yoquin ban chixsic'bal li us chok' reheb chixjunileb re nak taruk te'colek'.

11

¹ Jo'can ut nak laex chetzolak erib cuiq'uin xban nak lain xintzol cuib riq'uin li Cristo. ² Ex inherman, c'ajo' nasaho' sa' inch'ol nak ninjultico' ere ut yoquex chixbanunquil li tijleb xexintzol cui'. ³ Abanan cuan chic c'a' re ru nacuaq xyebal ere. A'an a'in: li belomej, a'an najolomin re li rixakil ut li Cristo, a'an najolomin re li cujnk ut li Dios, a'an najolomin re li Cristo. ⁴ Cui junak cujnk inc'a' narisi lix punit nak na-oc chi tijoc ut nak na-oc chixyebal ratin li Dios, li jun a'an inc'a' naxq'ue xlok'al li Cristo. ⁵ Ut cui junak ixk inc'a' naxtz'ap lix jolom nak tatijok ut nak tixye ratin li Dios, li ixk a'an naxc'ut xxutan lix belom. Chanchaneb li ixk li besbileb chixjunil li rismal xjolom. ⁶ Jo'can nak cui li ixk inc'a' naxtz'ap xjolom, chixbesak chixjunil li rismal xjolom. Ut cui inc'a' naraj xbesbal li rismal xjolom xban nak naxc'oxla nak xutanal chok' re, k'axal us chok' re li ixk a'an cui tixtz'ap lix jolom. ⁷ Inc'a' us nak tixtz'ap xjolom li cujnk xban nak li cujnk yibanbil jo' li rilobal li Dios ut naxc'ut xlok'al li Dios. A'ut li ixk naxc'ut xlok'al lix belom. ⁸ Li cujnk inc'a' quiy'o'obtesic chak xban li Dios riq'uin li ixk; aban li ixk quiy'o'obtesic chak riq'uin li cujnk. ⁹ Ut li cujnk inc'a' quiy'o'obtesic sa' xc'aba' li ixk. Li ixk ban quiy'o'obtesic sa' xc'aba' li cujnk. ¹⁰ Jo'can nak li ixk tixtz'ap lix jolom ut a'an retalil chiruheb li ángel nak li cujnk cuan xcuanguil sa' xben. ¹¹ Chiru li Kaçua' ma jun cuan xcuanguil chi moco li cujnk chi moco li ixk xban nak juntak'eteb chiru li Dios. ¹² Ut jo' nak li ixk quiy'o'obtesic riq'uin li cujnk, jo'can ajcui' li cujnk nayo'la riq'uin li ixk. Li cujnk jo' ajcui' li ixk yo'obtesinbileb xban li Dios jo' ajcui' chixjunil li c'a'ak re ru cuan. ¹³ ¿C'a'ru nequec'oxla laex? ¿Ma us nak li ixk tatijok chiru li Dios cui inc'a' tixtz'ap lix jolom? ¹⁴ Ac nequenal nak ac re li cujnk nak inc'a' tixcanab chi chamoc' li rismal xjolom. Xutanal chok' re li cujnk cui naxcanab chi chamoc' li rismal xjolom. ¹⁵ Abanan li ixk a'an xlok'al nak cham li rismal xjolom xban nak q'uebil re xban li Dios re xtz'apbal lix jolom. ¹⁶ Ut cui cuan junak ere naraj cuech'inc chirix a'in, lain tixye re a'an nak lao li apóstol jo' ajcui' eb laj pabanel c'aynako chixbanunquil chi jo'can yalak bar.

Li Lok'onjnc re Xjulticanquil lix Camic li Jesucristo

¹⁷ Nacuaq ajcui' xyebal ere nak cuan li inc'a' us yoquex chixbanunquil. Nak nequech'utub erib chixlok'oninquil li Dios macua' li us nequebanu. A' chic li inc'a' us nequebanu. ¹⁸ Li xben tixye ere, a'an a'in: xcuabi resil nak inc'a' junaj le ch'ol ut junes xcuech'inquil erib nequebanu nak nequech'utub erib chi lok'onjnc re xjulticanquil lix camic li Jesucristo. Ut lain ninc'oxla nak mare yal ajcui' li c'a'ru xcuabi. ¹⁹ Nak nacuan li cuech'inc ib sa' eyang, riq'uin a'an nac'utan ani li tz'akal aj pabanel ut ani inc'a'. ²⁰ Laex nequech'utub erib chi tzacanc ut nequeye nak yoquex chixbanunquil li lok'onjnc. Abanan macua' chic xjulticanquil lix camic li Kaçua' nequebanu. A' ban chic le re nequebanu. ²¹ Cuan li neque'xseba rib chixc'ulbal lix cua ut inc'a' neque'xc'oxla li jun ch'ol chic. Xban a'an cuan li nabal neque'tz'ak ut cuan li neque'cala ut cuan li neque'cana chi te'tz'ocak xban nak inc'a' neque'tz'ak. ²² ¿Ma mac'a' ta bi' erochoch bar textzacank cui' nak nequebanu chi jo'can? Yoquex chixtz'ektananquileb le rech aj pabanelil ut yoquex

chixc'utbal xxutaneb li mac'a' cuanqueb re. ¿C'a'ru tinye ere? ¿Ma tinye ere nak us yoquex chixbanunquil? Ma jok'e tinye nak us yoquex. ²³ Ac xinc'ut cheru li xyalal li cua'a' re xjulticanquil lix camic li Jesucristo. A'an ajcui' li quixc'ut chicuu li Kaçua'. Sa' ajcui' li k'ojoyin nak toj maji' quik'axtesic li Kaçua' Jesucristo quixchap li caxlan cua. ²⁴ Ut nak quixbantioxi chiru li Dios, quixjachi li caxlan cua ut quixye reheb: Tzacahomak. A'an a'in lin tibel rahobtesinbil sa' ec'aba' læex. Chebanuhak li caxlan cua a'in re xjulticanquil li usilal xinbanu ere, chan. ²⁵ Ut nak que'rake' chi cua'ac quixchap ajcui' li sec' ut quixye: Li uc'a a'in, a'an retalil li Ac' Contrato riq'uin li Dios. Taxakabank re xcuanquil xban lin quiq'uel tahoyek'. Rajlal nak teruc' xsa' li sec' a'in, chebanuhak re xjulticanquil lin camic sa' ec'aba' læex, chan li Jesús. ²⁶ Jo'can nak ninye ere rajlal nak tetzaca a caxlan cua a'in ut teruc' xsa' li sec' a'in, tejultica xcamic li Cristo. Chebanuhak a'an toj taç'ulunk cui'chic li Kaçua' Jesucristo. ²⁷ Jo'can ut li ani tixcua' li caxlan cua ut taruc' li uc'a re xjulticanquil lix camic li Kaçua' Jesucristo ut inc'a' naxq'ue xlok'al li Cristo, li jun a'an yo chi macobc chiru li Kaçua' ut yo chixtz'ektananquil xcuanquil lix camic li Kaçua' Jesucristo. ²⁸ Jo'can ut li junjünk tento tixq'ue retal ma tic lix yu'am sa' lix pabal nak toj maji' naxc'ul li caxlan cua ut li uc'a. ²⁹ Li ani naxc'ul li caxlan cua ut li uc'a chi inc'a' naxq'ue xcuanquil lix camic li Kaçua' Jesucristo, tojba mac naxbok sa' xben. ³⁰ A'in ut xyalal nak nabal yajeb ut mac'a'eb xmetz'eu sa' eyank ut cuanqueb ajcui' ac xe'cam. ³¹ Abanan cui nakec'a kib nak tic li kayu'am nak nakatzaca inc'a' tento nak li Kaçua' tixrak atin sa' kaben. ³² Ut nak narakman atin sa' kaben xban li Kaçua' nocok'use' re nak inc'a' tz'ektananbilako kochbened li inc'a' neque'paban. ³³ Jo'can ut ex inherman, nak tech'utub erib chixbanunquil li lok'oninc re xjulticanquil lix camic li Kaçua' Jesucristo, cheroybene erib chi ribil erib re nak sa' comonil tebanu. ³⁴ Cui cuan junak sa' eyank tatz'ocak, chicua'ak chak sa' rochoch re nak inc'a' tebok raylal sa' eben nak tech'utub erib. Toj cuan chic c'a'ak re ru inc'a' xinye ere. Nak tincuulak cherilbal tinch'olob xyalal cheru li toj maji' xinye ere.

12

Li kamatan q'uebil ke xban li Santil Musik'ej

¹ Ex inherman, lain nacuj nak tetau ru li xyalal li matan li naxq'ue li Santil Musik'ej re li junjünk re nak taç'anjelak chiru li Dios. ² Nak toj maji' nequexpaban chak queq'ue chak xcuanquil li yibanbil dios li inc'a' neque'atinac ut queq'ue erib chi balak'ic riq'uin xpabanquileb. ³ Jo'can nak nacuj tenau nak li ani cuan li Santil Musik'ej riq'uin, ma jok'e tixmajecua li Jesús. Ut ma ani taruk tixye chi anchal xch'ol nak li Jesús a'in li Kaçua' cui mac'a' li Santil Musik'ej riq'uin. ⁴ Jalan jalank li kamatan naxq'ue ke li Santil Musik'ej re nak toc'anjelak chiru li Kaçua'. Abanan li Santil Musik'ej jun ajcui' ut a'an naq'uehoc re chixjunil. ⁵ Jalan jalank li kac'anjel chiru li Kaçua' abanan jun ajcui' li Kaçua' cuan sa' kaben ut ca'aj cui' chiru a'an nococ'anjelac. ⁶ Jalan jalank li c'anjel nocox'ue cui' li Dios. Abanan jun ajcui' li Dios ut a'an li natenk'an ke chi xbanunquil li c'anjel li naxq'ue ke. ⁷ Riq'uin li matan q'uebil re li junjünk nac'utun nak cuan li Santil Musik'ej riq'uin, ut li matan a'an q'uebil re, re xtenk'anquileb chixjunileb laj pabanel. ⁸ Cuan li q'uebileb xmatan xban li Santil Musik'ej re q'uehoc chabil na'leb ut cuan li q'uebileb xmatan xban li Santil Musik'ej re xch'olobanquil li yal. Abanan jun ajcui' li Santil Musik'ej li naq'uehoc re xmatan li junjünk. ⁹ Cuan li q'uebileb xmatan xban li Santil Musik'ej chi xpabanquil nak te'xc'ul li c'a'ru

neque'xtz'ama chiru li Dios. Ut cuan ajcui' q'uebileb xmatan xban li Santil Musik'ej re xq'uirtesinquileb li yaj. Abanan jun ajcui' li Santil Musik'ej li naq'uehoc xmatan li junjunk. ¹⁰ Cuan q'uebileb xmatan chi banunc milagro ut cuan q'uebileb xmatan chi xch'olobanquil resil li c'a'ru quic'utbesic chiru xban li Dios. Ut cuan q'uebileb xmatan re xtaubal ru cui li Santil Musik'ej cuan riq'uin junak malaj ut cuan li maus aj musik'ej riq'uin. Ut cuan q'uebileb xmatan chi atinac sa' jalan atin inc'a' natauman ru ut cuan ajcui' q'uebileb xmatan chi jaloc ru li jalanil atin. ¹¹ Abanan chixjunil li matan a'in q'uebil ke xban li jun chi Santil Musik'ej. A'an naq'uehoc xmataneb li junjunk jo' naraj a'an.

Junajo nak cuanco riq'uin li Cristo

¹² Li jun chi tz'ejcualej tz'akal re ru. Cuan rok ruk'. Cuan chixjunil. Usta jalan jalank lix cha'al cuan, abanan jun ajcui' chi tz'ejcualej nak cuan. Jo'can ajcui' lao aj pabanel. Nabalo, abanan junajo chi tz'ejcualej riq'uin li Cristo. ¹³ Chikajunilo junajo riq'uin li Cristo usta aj judio, usta macua' aj judio, usta lok'bil mos, usta inc'a'. Xkac'ul li cubi ha' sa' xc'aba' li jun chi Santil Musik'ej ut chikajunilo cuan li Santil Musik'ej kig'uin. Jo'can nak junajo riq'uin li Cristo. ¹⁴ Li jun chi tz'ejcualej moco jun ta ajcui' lix cha'al cuan. Nabal pay ru lix cha'al cuan re ut jalan jalank xc'anjel li junjunk. ¹⁵ Cui naru raj taatinak li rok junak li tz'ejcualej, zma naru tixye macua'in xcomon li tz'ejcualej xban nak macua'in li ruk'? zMa yal xban ta bi' nak macua' uk'ej nak macua'ak xcomon li tz'ejcualej? ¹⁶ Cui lix xic junak li tz'ejcualej tixye: macua'in xcomon li tz'ejcualej xban nak macua'in li xnak' ru, zma yal ta bi' xban nak macua' xnak' u, nak macua'ak xcomon li tz'ejcualej? ¹⁷ Cui ta chixjunil li tz'ejcualej xnak' u, zchan raj ru nak to-abjnk? Ut cui ta chixjunil li tz'ejcualej xic, zchan raj ru nak takutz' li c'a'ak re ru? ¹⁸ Abanan li Dios quixq'ue sa' xna'aj chi tz'akal re ru lix cha'al li katz'ejcual jo' quiraj a'an. ¹⁹ Cui ta jun pay ajcui' ru lix cha'al li tz'ejcualej, li tz'ejcualej a'an inc'a' raj tz'akal re ru nak cuan. ²⁰ Abanan nabal pay xcha'al li tz'ejcualej cuan, ut li tz'ejcualej jun ajcui'. ²¹ Cui naru raj taatinak li xnak' u inc'a' naru tixye re li uk'ej: laat inc'a' nacatc'anjelac chicuu. Chi moco naru tixye li jolomej re li okej: laex inc'a' nequexc'anjelac chicuu. ²² K'axal ban chic nabal xc'anjeleb lix cha'al li katz'ejcual li chanchan mac'a'eb xc'anjel. ²³ Cuan xcha'al li katz'ejcual naka-oxlok'i ut cuan ajcui' xcha'al li katz'ejcual nocoxutanac xban ut nakatz'ap re xq'uebal xlok'al. ²⁴ Ut lix cha'al li katz'ejcual li inc'a' nocoxutanac xban, a'an inc'a' nakatz'ap. Abanan li Dios quixq'ue chixjunil lix cha'al li katz'ejcual ut quixq'ue xlok'al li junjunk. ²⁵ Quixq'ue xlok'al chixjunil xcha'al li tz'ejcualej re nak mac'a'ak xch'a'ajquial li tz'ejcualej. Chixjunil ban lix cha'al li tz'ejcualej te'xtenk'a rib chi ribeleb rib. ²⁶ Cui junak xcha'al li tz'ejcualej ra naxc'ul, naraho' ajcui' chixjunil li tz'ejcualej. Ut cui junak xcha'al li tz'ejcualej naq'uehe' xlok'al, chixjunil li tz'ejcualej naq'ueman ajcui' xlok'al. ²⁷ Jo'can ajcui' lao aj pabanel. Junajo chi tz'ejcualej riq'uin li Cristo. Chikajunkalo lao rok ruk' li Cristo ut li junjunk cuan xc'anjel chiru li Dios. ²⁸ Li xchalal li tz'ejcualej jalan jalank xc'anjel li junjunk. Jo'can ajcui' nak jalan jalank xmataneb laj pabanel q'uebileb re xban li Dios re nak te'c'anjelac chiru. Xben, cuanqueb li q'uebileb xmatan chi c'anjelac chok' apostol. Xcab, cuanqueb li q'uebileb xmatan chi c'anjelac chok' profeta. Rox, cuanqueb li q'uebileb xmatan chi c'anjelac chok' aj tzolonel. Ut cuanqueb li q'uebileb xmatan chixbanunquileb li milagro. Cuanqueb li q'uebileb xmatan chixq'uirtesinquileb li yaj; cuanqueb li q'uebileb xmatan chixtenk'anquileb li ras ritz'in. Cuanqueb li q'uebileb xmatan chi taklanc; ut

cuanqueb ajcui' q'uebileb xmatan chi atinac sa' jalanil atin inc'a' natauman ru. ²⁹ ¿Ma chixjunileb ta bi' apostoleb? ¿Ma chixjunileb ta bi' profeteb? ¿Ma chixjunileb ta bi' neque'xch'olob xyalal li ratin li Dios? ¿Ma chixjunileb ta bi' neque'banun milagro? ³⁰ ¿Ma chixjunileb ta bi' neque'q'uirtesin yaj? ¿Ma chixjunileb ta bi' neque'atinac sa' jalanil atin? ¿Ma chixjunileb ta bi' neque'jaloc ru li jalanil atin? ³¹ Moco juntak'et ta xmataneb li junjunk. Jalan jalank ban xmataneb. Chesic'ak le matan li k'axal chabil re xtenk'anquileb le rech aj pabanelil. Anakcuan tinye ere jun li na'leb k'axal cui'chic tento xbanunquil. Ut a'an a'in: nak tera erib chi ribil erib.

13

Li rahoc, a'an li k'axal lok'

¹ Cui ta lain q'uebil inmatan xban li Dios chi atinac sa' ratinobaleb li cuiñk ut cui ta cuan inmatan chi atinac sa' ratinobaleb li angel, abanan cui inc'a' ninraheb li cuas cuiñt'in, lain chanchanin li ch'ich' natambac xyab ut chanchanin li campana natzintzot xyab chi mac'a' rajbal. ² Ut cui ta q'uebil inmatan xban li Dios chixyebal li naxc'ut chicuu, ut cui ta ninnau chixjunil li c'a'ak re ru ut cui ta nintau ru li xyalal, abanan cui inc'a' ninraheb li cuas cuiñt'in mac'a' nin-oc cui'. Ut cui ta cuan tz'akal inpabal re nak tajalek' xna'aj junak li tzul, abanan cui inc'a' ninraheb li cuas cuiñt'in, mac'a' nin-oc cui'. ³ Cui ta tinsi chixjunil li c'a'ru cuan cue re tinq'ueheb chi cua'ac li neba' ut cui ta tink'axtesi cuib chi c'atec' xban lin pabal, ut cui inc'a' ninraheb li cuas cuiñt'in, mac'a' na-oc cui' li ninbanu. ⁴ Li ani narahoc, naxcuy li raylal ut k'axal chabil. Li ani narahoc inc'a' nacakalin, inc'a' naxnimobresi rib ut inc'a' naxk'etk'eti rib. ⁵ Li ani narahoc inc'a' nahoboc. Inc'a' naxsic' xchabilal xjunes rib. Li ani narahoc inc'a' najosk'o' ut inc'a' naxq'ue sa' xch'ol li c'a'ru naxc'ul. ⁶ Li ani narahoc inc'a' nasaho' xch'ol nak eb li ras rjtz'in neque'xbanu li inc'a' us. Nasaho' ban xch'ol nak cuanqueb sa' xyalal. ⁷ Li ani narahoc inc'a' naraho' xch'ol xban li c'a'ru na-ux re xbaneb li ras rjtz'in. Junelic ban cau xch'ol chirixeb. Li ani narahoc inc'a' nach'inan xch'ol. Naxcuy ban xnumsinquil chixjunil li raylal. ⁸ Li rahoc tacuank chi junelic. Tacuulak xk'ehil nak inc'a' chic tac'anjelak li matan re cuanc chi profetil ut tacuulak xk'ehil nak inc'a' chic tac'anjelak li matan re atinac sa' jalanil atin. Ut tacuulak xk'ehil nak inc'a' chic tac'anjelak li matan re xtaubal ru chixjunil. Abanan li rahoc inc'a' nalaj, inc'a' na-oso'. Cuank ban chi junelic. ⁹ Usta cuanqueb li cuan xmataneb anakcuan re xnaubal li c'a'ak re ru, abanan ca'ch'in ajcui' neque'xnau. Usta cuanqueb li cuan xmataneb chixyebal li c'a'ru nac'utbesic chiruheb xban li Dios, abanan ca'ch'in ajcui' li nac'ute' chiruheb. ¹⁰ Ut nak tatz'aklok ru chixjunil li naraj xbanunquil li Dios, inc'a' chic te'c'anjelak eb li matan a'in li inc'a' tz'akal re ru. ¹¹ Nak toj ca'ch'inin chak quinatnac jo' neque'atinac li coc'al. Quinc'oxlac jo' neque'c'oxlac li coc'al. Ut quinbanu jo' neque'xbanu li coc'al. Abanan nak quincuinquilo' quincanab xbanunquil lix na'lebeb li coc'al. ¹² Anakcuan ca'ch'in ajcui' nakanau. Chanchan nak noco-iloc sa' junak lem moy moy ru. Abanan sa' jun cutan takil ru li Dios ut takanau chic chixjunil chi tz'akal jo' nak li Dios naxnau ku lao. ¹³ Jo'can nak li pabal, li yo'oninc ut li rahoc cuank chi junelic. Abanan li k'axal nim xcuankuil sa' xyankeb li oxib a'in, a'an li rahoc.

14

Li atinac sa' jalanil atin li inc'a' natauman ru

1 Jo'can nak ninye ere, cheq'uehak ech'ol chi rahoc ut chesic'ak le maṭan li naxq'ue li Santil Musik'ej. Li maṭan li k'axal lok', a'an xyebal resil li c'a'ru yo chi xc'utbal cheru li Dios. 2 Li ani naatinac sa' jalanil atin inc'a' naatinac riq'uin li rech cristianil. Riq'uin ban li Dios naatinac. Ut ma ani nata'oc ru li c'a'ru naxye. Riq'uin xcuanguil li Santil Musik'ej naxye li xyalal li inc'a' natauman ru. 3 Ut li ani naxye resil li nac'ute' chiru xban li Dios, li jun a'an naxtenk'aheb li rech aj pabanelil sa' lix pabaḷeb. Naxch'olob xyalal chiruheb ut naxc'ojobeb xch'ol. 4 Li ani naatinac sa' jalanil atin naxtenk'a rib xjunes rib. Abanan li ani naxch'olob xyalal li raṭin li Dios, li jun a'an naxtenk'aheb li rech aj pabanelil sa' lix pabaḷeb. 5 Nacuaj raj nak chejunilex tex-atinak ta sa' jalanil atin li inc'a' natauman ru. Abanan k'axal cui'chic nacuaj raj nak chejunilex teye resil reheb le ras eritz'in sa' le raṭinobaḷ c'a'ru quic'ute' cheru xban li Dios. K'axal us nak teye li raṭin li Dios sa' le raṭinobaḷ chiru li atinac sa' jalanil atin li inc'a' natauman ru. Abanan cui junak naatinac sa' jalanil atin, tento nak tajalmank ru li raṭin re nak eb laj pabanel te'xtau ru li c'a'ru tixye ut te'tenk'ak xban. 6 Ex inherman, ¿c'a'ru taoc cui' ere nak tincuulak eriq'uin ut tinaṭinak eriq'uin sa' jalanil atin li inc'a' natauman ru? Maç'a' aj e. Abanan cui tinaṭinak eriq'uin sa' le raṭinobaḷ, texintenk'a nak tinch'olob xyalal cheru jo' quic'ute' chicuu xban li Dios. Ut taç'anjelak cheru cui tinye ere li raṭin li Dios ut tinye ere c'a'ru taç'ulmank jo' tz'ibanbil sa' li Santil Hu. 7 Ut jo'can ajcui' li c'a'ak re ru inc'a' yo'yo jo' li xolb ut li arpa. Cui inc'a' nach'e'man chi tz'akal inc'a' nac'utun li c'a'ru yo chixyabasinguil ut maç'a' rajbal nak nach'e'man. 8 Ut nak tayabasik li trompeta re xbokbaleb li soldado, cui inc'a' ch'olch'o ru lix yab, ¿ma te'xcauresi ta bi' rib chi xic chi pletic? 9 Ut jo'can ajcui' laex cui inc'a' nequex-atinac chi tz'akal re ru, ¿chanru nak taṭaumank ru li c'a'ru yoquex chixyebal? Yal na-oso' sa' ik' ut maç'a' rajbal li teye. 10 Yal nak q'uila pay chi atinobaḷ cuan sa' ruchich'och' ut chixjunil cuan xyalal ut natauman ru. 11 Abanan cui lain inc'a' nintau ru li raṭinobaḷ junak, li jun a'an maç'a' rajbal nak yok chi atinac cuiq'uin ut maç'a' ajcui' rajbal nak yokin chi atinac riq'uin. 12 Laex nequeraj xc'ulbal li maṭan naxq'ue li Santil Musik'ej. Abanan lain ninye ere chesic'ak li maṭan li natenk'an reheb chixjunileb laj pabanel. 13 Ut li ani cuan xmaṭan chi atinac sa' jalanil atin, li inc'a' natauman ru, chixtz'amahak chiru li Dios re nak taruk tixye xyalal li c'a'ru quixye sa' li jalanil atin re nak taruk tixch'olob xyalal chiruheb li rech aj pabanelil. 14 Cui lain tintijok sa' jalanil atin lin musik' taṭijok ut lain inc'a' nintau ru li c'a'ru tinye chi moco tixtenk'aheb li cuech aj pabanelil. 15 ¿C'a'ru tinbanu chi jo'canan? Tintijok riq'uin lin musik' chi inc'a' tintau ru li tinye ut tento ajcui' nak tintijok riq'uin lin c'a'ux re nak taṭaumank ru li c'a'ru tinye. Ut tinbichank riq'uin lin musik' chi inc'a' tintau ru li tinye ut tinbichank ajcui' riq'uin lin c'a'ux re nak taṭaumank ru li c'a'ru tinye. 16 Cuan li inc'a' neque'xtau ru li xyalal chirix li jalanil atin. Cui yoçat chixlok'oninguil li Dios ca'aj cui' riq'uin la musik', eb a'an inc'a' te'xtau ru li taye xban nak yoçat chi atinac sa' jalanil atin. ¿Chan put ru nak te'xye "jo'can taxak" cui inc'a' neque'xtau ru li yoçat chixyebal? 17 Yal nak yoçat chixlok'oninguil li Dios, abanan li jun chic inc'a' taṭenk'ak xban la tij xban nak inc'a' naxtau ru li c'a'ru yoçat chixyebal. 18 Nimbantioxi chiru li Dios nak nabal sut ninatinac sa' jalanil atin. Laex inc'a' quex-atinac nabal sut sa' jalanil atin jo' lain. 19 Aban lain ninye nak sa' xyankek laj pabanel k'axal us raj nak tinye cuib oxibak chi atin li te'xtau ru re nak tebintzol chi tz'akal chiru nak tinye lajebak mil chi atin sa' jalanil atin ut inc'a' te'xtau ru li tinye. 20 Ex inherman, chanchanakex li c'ula'al xban nak eb li c'ula'al inc'a' neque'xbanu li maṣuilal. Abanan mexc'oxlac jo' neque'c'oxlac li coc'al.

Tz'akalak ban re ru le c'a'ux xban nak moco coc'alex ta chic. ²¹ Jo'ca'in tz'ibanbil sa' li Santil Hu li quixye li Dios najter chirixeb laj Israel: Eb lin tenamit inc'a' neque'raj rabinquil li cuatin. Jo'can nak sa' jalan atinobal tincuatinaheb. Tintakla jalan xtenamit chixyebal li cuatin reheb. Abanan chi moco chi jo'can tine'rabi, chan li Ka'cua'. (Is. 28:11-12)

²² Ri'q'uin a atin a'in nakanau nak li matan re atinac sa' jalan atinobal, a'an q'uebil jo' retalil lix cuanquial li Dios chiruheb li ma'cua'eb aj pabanel. Ut li matan re xyebal li c'a'ru naxc'utbesi li Dios, a'an q'uebil re xtenk'anquileb laj pabanel. ²³ Nak eb laj pabanel te'xch'utub ribeb ut cui chixjunileb te'oc chi atinac sa' jalan atin inc'a' natauman ru, cui te'oc aran li ma'cua'eb aj pabanel malaj te'oc aran li inc'a' neque'xtau ru li na'leb a'in, te'xye nak loqueb ru. ²⁴ Abanan cui eb laj pabanel te'xch'olob xyalal li c'a'ru quiyeh'e' reheb xban li Dios, nak tox-oc sa' xyankeb junak ma'cua' aj pabanel malaj li toj maji' naxtau ru li xyalal a'an, li jun a'an tixq'ue retal nak a'an aj ma'c ut tixq'ue ajcui' retal li c'a'ru yo chirabinquil. ²⁵ Li Dios tixc'ut chiru chi tz'akal c'a'ru cuan sa' xch'ol. Ut li jun a'an tixcuik'ib rib ut tixlok'oni li Dios ut tixye nak relic chi yal li Dios cuan sa' xyankeb laj pabanel.

Tz'akal re ru tebanu nak tech'utub erib

²⁶ Ex herman, a'an a'in li nacua'j xyebal ere. Nak tech'utub erib chixlok'oninquil li Dios, jalan jalank tebanu chejunkalex. Cuan tixc'am chak junak bich; cuan li taq'uehok na'leb; cuan li tayehok re li quic'ute' chiru xban li Dios; cuan li tayehok junak na'leb riq'uin jalan atin ut cuan ajcui' li tajalok ru li tayemank sa' li jalanil atin. Abanan chixjunil li tebanu, chebanuhak re xtenk'anquileb laj pabanel chi q'ui'c sa' lix pabaleb. ²⁷ Cui cuanqueb li te'raj atinac sa' jalanil atin, naru neque'atinac cuibak malaj oxibak ut chixjunkaleb te'atinak. Ut cuank ajcui' junak chic li tajalok ru li te'xye. ²⁸ Abanan cui ma' ani naru tajalok ru li jalanil atin, inc'a' te'atinak sa' jalanil atin sa' li ch'utubaj ib. Yal sa' xch'oleb ban te'atinak chiru li Dios. ²⁹ Cheq'ueheb chi atinac cuibak malaj oxibak li profeta li neque'yehoc resil li c'a'ru quic'ute' chiruheb xban li Dios, ut li jun ch'ol chic te'tz'ilok atin chirix re xnaubal ma riq'uin na li Dios xchal chak li xe'xye. ³⁰ Ut cui cuan c'a'ru tac'utek' xban li Dios chiru li ani c'o'jc'o aran sa' li ch'utubaj ib, li jun a'an tixtz'ama chiru li yo chi atinac nak tixye li c'a'ru xc'ute' chiru xban li Dios. Ut li ani yo chi atinac chixq'uehak xna'aj re taatinak. ³¹ Chejunjunkalex taruk teye li c'a'ru xc'ute' cheru xban li Dios re nak chixjunileb laj pabanel te'xtzol rib ut ta'ca'cuuk xch'oleb sa' lix pabaleb. ³² Cui yal nak li Dios xc'utuc cheru li c'a'ru teye, li Dios textenk'a chiroybeninuil jok'e tex-oc chi atinac re nak chi jo'can chejunjunkalex tex-atinak. ³³ Li Dios inc'a' naraj nak ta'cuank li po'oj ib sa' xyankeb laj pabanel. Naraj ban can cuank li tuktuqu'il usilal sa' xyankeb. ³⁴ Eb li ixk inc'a' te'atinak sa' li ch'utubaj ib re xlok'oninquil li Dios. Te'xpa'b a'in xban nak jo'can tz'ibanbil sa' lix chak'rabe' laj judio. Jo'ca'in na-uxman sa' xyankeb chixjunileb laj pabanel yalak bar. ³⁵ Cui cuan c'a' re ru te'raj xnaubal che'xpatz'ak reheb lix belom nak te'cuulak sa' rochoheb ut a'an tixch'olob xyalal. Xutanal chok' reheb chi taatinak junak ixk sa' xyankeb nak ch'utch'u'queb chixlok'oninquil li Dios. ³⁶ Chijulticok' ere nak ma'cua'ex la'ex quextiquiban chak re li ratin li Dios. Ac cuan ajcui' chalen chak junxil. Ut moco ca'aj cui' ta la'ex quex-abin re. ³⁷ Mare cuan sa' eyank li naxc'oxla nak a'an profeta malaj naxc'oxla nak cuan jun chic xmatan q'uebil re xban li Santil Musik'ej. Cui jo'can naxc'oxla, chixnauhak nak li yoquin chixtz'ibanquil sa' li hu a'in, a'an ajcui' li chak'rab q'uebil cue xban li Dios. ³⁸ Ut cui cuan junak inc'a' naxpa'b li yoquin chixtz'ibanquil, la'ex inc'a'

ajcui' tepab li c'a'ru tixye a'an. ³⁹ Jo'can ut ex inherman, cheq'uehak ech'ol chixch'olobanquil xyalal li c'a'ru quic'ute' cheru xban li Dios ut meram chiru li ani naraj atinac sa' jalanil atin. ⁴⁰ Abanan li c'a'ru tebanu nak tech'utub erib, chebanuhak chixjunil chi tz'akal re ru ut sa' xyalal.

15

Lix cuaclijic chi yo'yo li Jesucristo sa' xyankeb li camenak

¹ Anakcuan ex inherman, tinch'olob cui'chic cheru li resil li colba-ib. Li resil a'an, a'an li ac xinye ere ut xec'uluban sa' ech'ol ut riq'uin a'an cau chic ech'ol sa' le pabal. ² A'an a'in li xyalal li xinch'olob cheru, li xexcole' cui'. Laex colbilex chic cui nequexpaban chi tz'akal ut inc'a' nequecanab xpabanquil. Abanan cui inc'a' nequepab chi anchal ech'ol, mac'a' rajbal nak xexpaban. ³ Li c'a'ru quixc'ut li Kacua' chichuu, a'an ajcui' li xinch'olob cheru. Lix yalal a'an k'axal nim xcuanquil ut a'an a'in: nak li Kacua' Jesucristo quicam re xtojbaj rix li kamac jo' tz'ibanbil najter sa' li Santil Hu xbaneb li profeta. ⁴ Jo' nak que'xtz'iba chak li profeta najter, jo'can quic'ulman. Li Kacua' Jesucristo quimuke' ut quicuacli cui'chic chi yo'yo sa' rox li cutan. ⁵ Chirix a'an li Kacua' Jesucristo quixc'ut rib chiru li apóstol Pedro ut quixc'ut ajcui' rib chiruheb chixjunileb li apóstol. ⁶ Ut chirix chic a'an quixc'ut rib chiruheb numenak ob ciento chi aj pabanel nak ch'utch'uqueb. Sa' xyankeb a'an cuanqueb nabaleb toj yo'yoqueb anakcuan ut cuanqueb ajcui' li ac camenakeb. ⁷ Ut mokon li Kacua' Jesucristo quixc'ut rib chiru laj Jacobo ut quixc'ut ajcui' rib chiruheb chixjunileb li apóstol. ⁸ Ut chirix chixjunil a'an, quixc'ut ajcui' rib chichuu lain, usta lain chanchanin jun c'ula'al toj maji' naxtau xk'ehil xyo'lajic xban nak lain toj maji' ninyo'la sa' lin pabal nak quixc'ut rib chichuu. ⁹ Lain cubenak incuanquil chiruheb chixjunileb li apóstol ut macua' raj inc'ulub nak lainak apóstol xban nak lain xinrahobtesihab chak laj pabanel. ¹⁰ Abanan xban rusilal li Dios nak lain apóstol. Ut li rusilal li Dios inc'a' quicana chi mac'a' rajbal xban nak k'axal cau cui'chic ninc'anjelac chiru chixjunileb li apóstol. Aban macua' injunes ninc'anjelac. Li Dios natenk'an cue xban xniml rusilal li xinmatani. ¹¹ Mac'a' naxye cui xerabi resil li colba-ib riq'uineb li apóstol jun ch'ol malaj cuiq'uin lain. Juntak'et li resil li colba-ib li nakajultica chikajunilo ut a'an li xepab laex.

Eb li camenak te'cuaclik cui'chic chi yo'yo

¹² Ac xkach'olob xyalal cheru nak li Cristo quicuacli cui'chic chi yo'yo sa' xyankeb li camenak. Abanan toj cuan sa' eyank li neque'yehoc re nak inc'a' te'cuaclik cui'chic chi yo'yo li camenak. ¹³ Cui inc'a' te'cuaclik cui'chic chi yo'yo eb li camenak, inc'a' raj yal nak quicuacli cui'chic chi yo'yo li Jesucristo sa' xyankeb li camenak. ¹⁴ Cui ta inc'a' quicuacli cui'chic chi yo'yo li Jesucristo, mac'a' raj xyalal li nakajultica resil, ut mac'a' raj rajbal li xepab. ¹⁵ Ut cui ta inc'a' quicuacli chi yo'yo li Cristo sa' xyankeb li camenak, xocana raj lao chok' aj balak' riq'uin li xkaye chirix li Dios xban nak xkach'olob xyalal nak li Dios quixcuaclesi cui'chic chi yo'yo li Cristo. Abanan inc'a' raj quixcuaclesi chi yo'yo cui yal nak inc'a' te'cuaclik cui'chic chi yo'yo li camenak. ¹⁶ Cui ta inc'a' yal nak te'cuaclik cui'chic chi yo'yo li camenak, inc'a' raj yal nak quicuacli cui'chic chi yo'yo li Cristo. ¹⁷ Cui ta li Cristo inc'a' quicuacli cui'chic chi yo'yo, mac'a' raj rajbal le pabal. Toj cuanxer raj ajcui' sa' le mac. ¹⁸ Cui ta jo'can, eb li que'xpab li Cristo li que'cam sachenakeb raj ajcui' xban lix maqueb. ¹⁹ Cui ta ca'aj cui' re li kayu'am arin sa' ruchich'och' nak xkapab li Cristo, xkabalak'i raj kib ut k'axal tok'obaj raj

ku tocanak chiruheb chixjunileb li kas kitz'in. ²⁰ Abanan relic chi yal nak li Cristo quicuaclesic cui'chic chi yo'yo sa' xyankeb li camenak. A'an li xben li quicuaclic chi yo'yo chiruheb chixjunileb li te'cuaclesik cui'chic chi yo'yo. ²¹ Xban nak quimacob laj Adán, jo'can nak chikajunilo nococam. Abanan xban nak quicuaclic cui'chic chi yo'yo li Jesucristo, cuan ajcui' xcuaclijiqueb li camenak chi yo'yo. ²² Jo'can nak sa' xc'aba' laj Adán li kaxe'tonil yucua' nak chikajunilo nococam. Ut sa' xc'aba' li Jesucristo, chixjunileb li neque'paban re te'cuaclic cui'chic chi yo'yo ut te'q'uehek' xyu'am chi junelic. ²³ Ut nak te'cuaclic cui'chic chi yo'yo eb li camenak, moco jun cuaclijiqueb ta nak te'cuaclic chak. Li xben li quicuaclic chak chi yo'yo, a'an li Jesucristo. Ut mokon nak tol-elk cui'chic li Jesucristo, te'cuaclic chak eb li que'paban re. ²⁴ Ut chirix chic a'an aca' chic li roso'jic li ruchich'och' ut li Cristo tixsacheb xcuauquil chixjunileb li neque'taklan sa' ruchich'och' ut tixsach ajcui' xcuauquileb li Musik'ej. Ut chirix a'an li Cristo tixk'axtesi lix cuauquil sa' ruk' li Dios Acuabej. ²⁵ Li Cristo cuank xcuauquil chi taklan toj retal tixq'ueheb rubel rok chixjunileb li xic' neque'iloc re. ²⁶ Ut li tasachek' xcuauquil toj sa' roso'jic, a'an li camc. ²⁷ Tz'ibanbil retalil sa' li Santil Hu nak li Acuabej Dios quixq'ue chixjunil li c'a'ak re ru rubel xcuauquil li Cristo. Abanan li Cristo inc'a' nafaklan sa' xben li Acuabej Dios xban nak li Dios, a'an li quiq'uehoc re lix cuauquilal. ²⁸ Ut nak acak xcanabac xban li Dios chixjunil li c'a'ak re ru rubel xcuauquil li Cristo li Alalbej, tojo'nak li Cristo tixk'axtesi ajcui' rib rubel xcuauquil li Acuabej Dios, li quiq'uehoc xcuauquil li Cristo sa' xben chixjunil, ut li Dios a'anak chic yal re sa' xben chixjunil. ²⁹ Cuan ca'ch'in chic tixyechirix lix cuaclijiqueb chi yo'yo li camenak. Cuanqueb sa' eyank li neque'cubsic xha'eb chok' ruchil xcubi ha' li camenak. Cui inc'a' neque'xpab nak te'cuaclic li camenak, ¿c'a'ut nak neque'xbanu chi jo'can? ³⁰ Ut cui inc'a' te'cuaclic chi yo'yo li camenak, ¿c'a'ut nak lao aj yehol resil li colba-ib nakaq'ue kib chi rahobtesic cui mac'a' xyalal li yoco chixbanunquil? ³¹ Ex inherman, relic chi yal ninye ere nak rajlal cutan cuan li neque'raj incamsinquit xban nak ninye resil li colba-ib. Abanan nasaho' sa' inch'ol xban nak xepab li Cristo. ³² Ut cui inc'a' te'cuaclic chi yo'yo li camenak, ¿c'a' raj ru tinra nak tinc'ul li raylal arin Efeso? Chanchan nak yoquin chi pletic riq'uineb li jost' aj xul nak cuanquin arin sa' xyankeb li tenamit. Mac'a' raj rajbal a'an cui inc'a' takac'ul kak'ajcamunquil chirix li kacamic. K'axal us raj cui takabanu jo' li inc'a' neque'xpab nak te'cuaclic chi yo'yo li camenak li neque'xye cua'ako, uc'ako xban nak cuulaj ca'bej nococam. ³³ Meq'ue erib chi balak'ic xbaneb li neque'atinac chi jo'can. Mejunaji erib riq'uineb li inc'a' useb xna'leb xban nak li inc'a' useb xna'leb neque'xpo' xch'oleb li chabileb xna'leb. ³⁴ Chec'oxla chi us li yoquec chixbanunquil ut mexmacob chic. Cuanqueb sa' eyank li toj maji' neque'xpab li Dios. Re xc'utbal exutan nak ninye ere chi jo'ca'in. ³⁵ Mare cuan li neque'yehoc, ¿chanru nak te'cuaclic cui'chic chi yo'yo li camenak? ¿Chanru te'cutunk nak te'cuaclic? ¿Ma te'cuaclic cui'chic chi tz'akal re ruheh? chanqueb. ³⁶ Mac'a' ena'leb. C'oxlankek ca'ch'inak chirix li auc. Li iyaj na-auman inc'a' namok cui inc'a' nak'a li rix xben cua. ³⁷ Macua' li ratz'um li acujmk na-auman. A' li riyajil ban na-auman usta trigo malaj c'a' chic ru chi iyajil. ³⁸ Ut li Dios naxq'ue li ratz'um chi ch'ina'us jo' naraj a'an. A' yal c'a'ru li iyaj tarau junak, a'an ajcui' li ratz'um tixq'ue. ³⁹ Nabal pay ru li iyaj ut nabal pay ajcui' ru li ratz'um na-el. Ut jo'can ajcui' nabal pay ru li tibeje. Jalan xtibel li cristian chiru xtibel li xul. Ut jalan xtibel li car chiru xtibel li xul li neque'rupupic. ⁴⁰ Ut jalaneb ajcui' li ángel sa' choxa chiku lao ut jalaneb lix lok'al chiru li kalok'al lao arin sa' ruchich'och'. ⁴¹ Jalan cui' xlok'al li sak'e ut jalan cui'

xlok'al li po ut jalan ajcui' xlok'al li चाहिम ut jalan jalank lix lok'al li junjunk chi चाहिम. ⁴²Jo'can ajcui' lao. Jalan chic li kalok'al nak tocuaclik cui'chic chi yo'yo chirix li kacamic. Nak nococam, nocomuke' ut nak'a li katibel, abanan nak tocuaclik cui'chic chi yo'yo jalanako chic ut inc'a' chic tocam. ⁴³Nak namuke' junak camenak mac'a' xcacuilal chi moco xlok'al. Abanan nak tacuaclik cui'chic chi yo'yo, k'axal nimak xlok'al ut cuank chic xcuanquil. ⁴⁴Nak nococam namuke' li katibel xban nak yal ch'och' oquenak. Abanan nak tocuaclik cui'chic chi yo'yo, musik'ejo chic. Nak cuanco sa' ruchich'och' cuan li katibel nak'a na-oso'. Abanan sa' choxa jalanako chic ut tacuank li kayu'am chi junelic. ⁴⁵Tz'ibanbil sa' li Santil Hu chi jo'ca'in:

Laj Adán li xben cuink quiq'uehe' xmusik' nak quiy'o'obtesic xban li Dios. Abanan li xcab Adán, a' li Kacua' Jesucristo, a'an musik'ej ut a'an li naq'uehoc kayu'am chi junelic.

⁴⁶Jo'can nak li katibel arin sa' ruchich'och', a'an na-oso'. Abanan li kamusik' li naxq'ue ke li Dios, a'an inc'a' na-oso'. Cuan ban chi junelic. ⁴⁷Nak quiy'o'obtesic laj Adán xban li Dios, ch'och' qui-oc. Abanan li Jesucristo moco yo'obtesinbil ta. A'an musik'ej ut sa' choxa quichal chak. ⁴⁸Jo'can nak chikajunilo arin sa' ruchich'och' yal tibelo jo' laj Adán. Ut nak tocuaclik cui'chic chi yo'yo, laako chic musik'ej jo' li Cristo li quichal chak sa' choxa. ⁴⁹Anakcuan cuan katibel jo' li re laj Adán. Li tibelej a'an ch'och' oquenak. Abanan sa' jun cutan laako chic jo' li Cristo li quichal chak sa' choxa. ⁵⁰Ex inherman, li nacua'j xyebal ere, a'an a'in: li katibel ut li kaquiq'uel inc'a' taoc sa' lix nimajcual cuanquilal li Dios xban nak a'an nak'a. Li bar cuan nak'a inc'a' naru tarechani lix nimajcual cuanquilal li Dios xban nak a'an inc'a' nak'a. ⁵¹Nacua'j ajcui' nak tenau lix yalal li mukmu nak quicuan chak junxil. A'an a'in: moco chikajunilo ta lao aj pabanel tocamk, abanan chikajunilo tojalanok'. ⁵²Sa' roso'jic li cutan nak taec'ank chak li trompeta, tojalanok' sa' junpat sa' jun mutz'il u. Nak taec'ank chak li trompeta eb laj pabanel li ac camenakeb te'cuaclik cui'chic chi yo'yo ut inc'a' chic te'camk. Ut eb laj pabanel li toj yo'yoqueb te'jalanok'. ⁵³Li katibel arin sa' ruchich'och' nak'a. Tento nak tajalak re nak inc'a' chic tak'ak. Ut li kayu'am li na-oso' sa' ruchich'och' tajalak riq'uin jun ac' yu'am inc'a' chic taosok'. ⁵⁴Nak acak xjalano' li katibel li nak'a, ut nak acak xjalano' li kayu'am li na-oso', aran tatz'aklok ru li quitz'ibac chak najter xbaneb li profeta nak que'xye chak chi jo'ca'in:

Sachbil xcuanquil li camc chi junaj cua xban nak xnumta xcuanquil li Cristo sa' xben. (Is. 25:8)

⁵⁵Li camc mac'a'ak chic xcuanquil sa' kabén.

Mac'a' chic li raylal takac'ul xban li camc. (Os. 13:14)

⁵⁶Xban nak cuan li mac, jo'can nak cuan li camc. Nak mac'a'ak chic li mac, mac'a'ak chic li camc. Ut li chak'rab mac'a'ak chic xcuanquil sa' kabén.

⁵⁷Jo'can ut chikabantioxi re li Dios nak mac'a' chic xcuanquil li camc sa' kabén sa' xc'aba' li Kacua' Jesucristo. ⁵⁸Jo'can ut ex inherman, raroquex inban, cauhaq taxak ech'ol sa' le pabal. Mich'inan le ch'ol. Cheq'uehak ban ech'ol chi c'anjelac chiru li Kacua'. Ut chenuhak nak li jo' q'ual tebanu sa' xc'aba' li Kacua' cuan rajbal.

16

Li xten'anquileb laj pabanel li cuanqueb Jerusalén

¹Anakcuan nacua'j xyebal ere chanru tebanu riq'uin li tumin li yoquex chixxocbal re xtenk'anquileb le rech aj pabanelil li cuanqueb aran Jerusalén.

Jo' xinye reheb laj pabanel aran Galacia, jo'can ajcui' tinye ere laex. ² Rajlal xaman, sa' li xben cutan re li xaman, chejunjunkalex teq'ue li jo' q'ual texruk a' yal jo' nimal le tojbal tec'ul. Ut li tumin a'in ac xocbilak eban nak tincuulak eriç'uin re nak inc'a' yokex chi xococ tumin nak tincuulak lain. ³ Ut tesic' ruheb li ani te'xic Jerusalem chixcanabanquill li tumin. Ut nak tincuulak eriç'uin, tintz'iba li hu te'xc'am nak te'xic Jerusalén chixk'axtesinquill li tumin reheb laj pabanel. ⁴ Cui naxq'ue rib nak tinxic lain, cuochbened nak toxic.

Laj Pablo yo chixcauresinquill lix xiquic Corinto

⁵ Nak tinxic eriç'uin, xben cua toxinnumek' Macedonia. ⁶ Mare tinbayk ca'ch'inak eriç'uin. Mare toj tinnumsi li habalk'e eriç'uin re nak cuank sa' ech'ol nak tinetenk'a chi xic toja' yal na bar tinxic. ⁷ Inc'a' nacuj nak yal numec' cue nak tincuulak eriç'uin. Nacuj ban tincuank jarubak cutan eriç'uin cui jo'can naraj li Kaçua' Dios. ⁸ Abanan toj tinnumsi li nink'e Pentecostés arin Efeso tojo'nak tinxic eriç'uin. ⁹ Yo chi elc chi us lin c'anjel arin xban nak nabale neque'raj rabinquill resil li colba-ib. Abanan cuan ajcui' li xic' neque'rabi resil li colba-ib. ¹⁰ Cui taçuulak laj Timoteo eriç'uin, cheç'ulak chi sa sa' ech'ol re nak sahak sa' xch'ol a'an ut maç'a'ak xc'a'ux nak cuank sa' eyank. A'an yo chi c'anjelac chiru li Kaçua' jo' nak ninc'anjelac lain. ¹¹ Jo'can ut ma ani chitz'ektanank re. Chetenk'a riq'uin li c'a'ru re, re nak taçalk cui'chic cuiç'uin sa' xyalal. Lain yoquin chiroybeninquill nak taçalk cui'chic cuiç'uin rochbened li herman. ¹² Nabal sut xintz'ama chiru li hermano Apolos nak taxic eriç'uin rochbened li herman. Abanan a'an quirec'a sa' xch'ol nak toj maji' taruk chi xic. Nak tixq'ue rib taçuulak aran cherilbal.

Laj Pablo naxrak lix hu

¹³ Mich'inan ech'ol sa' le pabal. Cauhak taxak ech'ol chi pabanc ut meq'ue erib chi alec. Yo'on cuankex ut chepabak li Kaçua' chi anchal ech'ol, usta nachal raylal sa' eben. ¹⁴ Ut chixjunil li c'a'ru tebanu, chebanuhak chi anchal ech'ol xban nak nequera le ras eritz'in. ¹⁵ Ex inherman, laex ac nequenau nak laj Estéfanos ut li rixakil jo'queb ajcui' li ralal xc'ajol, a'aneb li xben que'paban aran Acaya. Eb a'an que'xq'ue xch'ol chi c'anjelac chiruheb li rech aj pabanelil. ¹⁶ Jo'can nak tintz'ama cheru nak tex-abink chiru laj Estéfanos jo'queb ajcui' chixjunileb li neque'tenk'an ut neque'c'anjelac sa' eyank. ¹⁷ Nasaho' sa' inch'ol nak xe'c'ulun cuiç'uin laj Estéfanos ut laj Fortunato ut laj Acaico. Eb a'an xe'tenk'an cue chok' eruchil laex nak ma anihex cuiç'uin. ¹⁸ Que'xq'ue xcacuul inch'ol. Chanru nak xextenk'ac laex xbaneb, jo'can ajcui' nak xine'xtenk'a lain. Jo'can nak che-oxlok'iheb li herman a'an. ¹⁹ Chixjunileb laj pabanel li cuanqueb Asia neque'xtakla xsahil ech'ol sa' xc'aba' li Kaçua'. Neque'xtakla ajcui' nabal xsahil ech'ol eb li herman laj Aquila ut lix Priscila. Ut neque'xtakla ajcui' nabal xsahil ech'ol chixjunileb laj pabanel li neque'xch'utub rib sa' rochoch laj Aquila. ²⁰ Chixjunileb laj pabanel li cuanqueb arin neque'xtakla xsahil ech'ol. Ut jo'can ajcui' laex, cheq'uehak xsahil ech'ol cheribil erib riq'uin santil utz'uc u. ²¹ Lain laj Pablo. Riq'uin cuuk' yoquin chixtz'ibanquill li atin a'in re xq'uebal xsahil ech'ol. ²² Li Kaçua' Jesucristo chi seb taçalk. Cui cuan junak sa' eyank inc'a' naxra li Jesucristo, chi çalc ta raylal sa' xben. ²³ A' taxak li rusilal li Kaçua' chicuank eriç'uin. ²⁴ K'axal nequexinra chejunilex xban nak junajo chic sa' xc'aba' li Kaçua' Jesucristo. Jo'can taxak.

Li Xcab Hu li Quixtz'iba li San Pablo reheb laj Corinto

Xq'uebal xsahileb xch'ol

¹ Lain laj Pablo. Sic'bil cuu xban li Dios chok' x-apóstol li Jesucristo xban nak jo'can quiraj li Dios. Cuochben laj Timoteo li kech aj pabanelil. Yoquin chixtz'ibanquil li hu a'in eriq'uin laex aj pabanel li cuanquex sa' li tenamit Corinto ut reheb ajcui' chixjunileb laj pabanel li cuanqueb sa' chixjunil li na'ajej Acaya. ² Chicuan̄k taxak eriq'uin li usilal ut li tuktuquilal li nachal chak riq'uin li Dios li kaYucua' ut riq'uin li Kaçua' Jesucristo.

Laj Pablo nabantioxin chiru li Dios

³ Lok'oninbil taxak li Dios lix Yucua' li Kaçua' Jesucristo. Li Dios, a'an li kaYucua' ut junelic naruxtana ku ut naxc'ojob kach'ol. ⁴ Naxc'ojob kach'ol sa' chixjunil li karaylal re nak taruk takac'ojob xch'oleb li cuanqueb sa' raylal. Jo' nak naxc'ojob kach'ol li Dios lāo, jo'can ajcui' nak takac'ojob xch'oleb li cuanqueb sa' raylal. ⁵ Jo' nak nocotz'akon riq'uin li q'uila raylal li quixc'ul li Cristo, jo'can ajcui' nak nac'ojobac kach'ol xban li Cristo, re nak naru takac'ojob xch'oleb li kech aj pabanelil. ⁶ Lāo nocorahobtesic re nak laex texcolek' ut tac'ojobac ech'ol. Naxc'ojob kach'ol li Dios re nak lāo takac'ojob ech'ol laex nak yoquex chixcuybal xnumsinquil li raylal jo' li nakacuy lāo. ⁷ Lāo nakanau nak cau ech'ol sa' le pabal. Nakanau nak tec'ul li raylal jo' yoco chixc'ulbal lāo. Abanan nakanau ajcui' nak tac'ojobac ech'ol nak yokex chixc'ulbal li raylal jo' nak nac'ojobac kach'ol lāo. ⁸ Ex inherman, nacuaaj nak tenau jo' q'uial li raylal xkac'ul sa' li na'ajej Asia. K'axal ra xkac'ul chak ut xkac'oxla nak inc'a' chic takacuy xnumsinquil. Lāo xkac'oxla nak inc'a' chic toe'xcanab chi yo'yo. ⁹ Xkac'oxla nak ac tenebanbil camc sa' kaben. Us ajcui' nak quikac'ul chi jo'can re nak cuank xcacuuilal kach'ol riq'uin li Dios li nacuaaclesin re li camenak chi yo'yo ut inc'a' takac'oxla nak cuan xcacuuilal kach'ol kajunes kib. ¹⁰ Li Dios, a'an li quicoloc chak ke chiru li camc nak corahobtesic. Ut nakanau chi tz'akal nak a'an tacolok ke chi junelic. ¹¹ Abanan nakatz'ama ajcui' cheru nak junelic textijok chikix. Cui nabaleb li neque'tijoc chikix, nabaleb ajcui' li te'bantioxink chiru li Dios nak torosobtesi. ¹² K'axal nasaho' kach'ol xban nak nakanau nak sa' tiq'uilal nococuan sa' ruchich'och'. Ut chi anchal kach'ol xocuan sa' tiq'uilal nak xocuan eriq'uin laex. Moco xban ta nak cuan kana'leb kajunes lāo nak cuanco sa' tiq'uilal. Li Dios ban natenk'an ke riq'uin lix nimal ruxtan. ¹³ Moco sa' jaljoquil ru atin ta nintz'ibac eriq'uin. Tz'akal re ru li nintz'iba. Nacuaj nak tetau ru chi tz'akal li nintz'iba eriq'uin chicuix lain. ¹⁴ Cuan tana li xetau ru ut cuan tana inc'a'. Abanan nacuaaj nak tetau ru chi tz'akal nak lain x-apóstol li Jesucristo re nak sahak sa' ech'ol cuiq'uin nak tol-elk li Jesucristo ut sahak ajcui' inch'ol lain eriq'uin laex. ¹⁵ Ca' sut raj xinc'oxla numec' eriq'uin xban nak ninnau nak xinç'ul raj chi sa sa' ech'ol. Jo'can nak xinnume' raj eriq'uin nak xinçal arin Macedonia. ¹⁶ Ut ninc'oxla numec' eriq'uin nak tinsuk'ik. Ut ninnau nak tinetenk'a laex chi xic aran Judea. ¹⁷ ¿C'a'ru nequec'oxla chirix a'in? ¿Ma inc'a' ta bi' ninc'oxla chi us li c'a'ru ninye? ¿Ma yal xcab rix inch'ol ta bi' li c'a'ru yoquin chixbanunquil? ¿Ma hon ta bi' ninye us ut junpat chic tinye inc'a' jo' neque'xbanu li maji' neque'xpab li Cristo? ¹⁸ Li Dios naxnau nak inc'a' yoquin chixyebal ere us cui nacuec'a

nak inc'a' taruk tinbanu. ¹⁹ Li Jesucristo li Ralal li Dios ma jun sut quixye us cui a'an naxnau nak inc'a' tixbanu. A'an junelic yal li c'a'ru naxye. Ut lain cuochbenede laj Silvano ut laj Timoteo nakach'olob xyalal li Cristo cheru laex. ²⁰ Chixjunil li yechi'inbil ke xban li Dios, nakac'ul sa' xc'aba' li Jesucristo. Jo'can nak sa' xc'aba' li Jesucristo nakaye "jo'can taxak" re xq'uebal xlok'al li Dios. ²¹ Sa' xc'aba' li Jesucristo, li Dios naxq'ue xcacuulal kach'ol sa' li kapabal lao jo' ajcui' laex. Ut a'an ajcui' quisis'oc chak ku re nak toc'anjelak chiru. ²² Ut li Dios quixtakla chak li Santil Musik'ej chi cuanc kiq'uin chok' retalil nak reho chic. Xban nak li Santil Musik'ej cuan kiq'uin, nakanau chi yal nak takac'ul chixjunil li quixyechi'i ke. ²³ Lain inc'a' xcuaj ek'usbal. Jo'can nak inc'a' xcoin eriq'uin aran Corinto. Li Dios naxnau nak yal li yoquin chixyebal. ²⁴ Moco yoco ta xminbal eru sa' le pabal. Ac cau ech'ol sa' le pabal. Yoco ban chetenk'anquil re nak sahak ech'ol sa' le pabal.

2

¹ Jo'can nak xinc'oxla nak toj maji' chic tinxic eriq'uin xban nak inc'a' nacuaj xq'uebal xrahil ech'ol. ² Cui inmac lain nak tarahok' ech'ol, zani ta chic taq'uehok xsahil inch'ol lain xban nak ca'aj cui' laex nequeq'ue xsahil inch'ol? Cui ta xincuulac eriq'uin xinq'ue raj xrahil ech'ol. ³ Jo'can nak xintz'iba li hu li xintakla eriq'uin. Inc'a' xcoin eriq'uin xban nak inc'a' xcuaj xraho' inch'ol eban laex li xeq'ue raj xsahil inch'ol. Ninnau nak nasaho' ajcui' ech'ol laex cui sa sa' inch'ol lain. ⁴ Nak xintz'ibac eriq'uin xinyot'e' ut xinyabac xban nak xraho' sa' inch'ol. Inc'a' xintz'ibac eriq'uin re xq'uebal xrahil ech'ol. Re ban nak tenau nak k'axal raroquex inban.

Checuyak xmac li quixbanu li inc'a' us

⁵ Li ani quixq'ue xrahil inch'ol xban li inc'a' us quixbanu, moco ca'aj cui' lain ta quixq'ue xrahil inch'ol. Quixq'ue aj ban cui' xrahil ech'ol laex. Aban mare cuan ajcui' inc'a' quiraho' xch'ol xban. Abanan ninnau nak cuan ajcui' que'raho' xch'ol xban. Inc'a' nacuaj xk'usbal chi k'axal cau. ⁶ Tz'akal lix k'usbal li yo chixc'ulbal eriq'uin. ⁷ Us cui tecuy xmac anakcuan ut tec'ojob xch'ol xban nak naru nach'inan cui'chic xch'ol. ⁸ Nintz'ama cheru nak chec'utak chiru nak nequera. ⁹ Xban a'an nak xintz'ibac eriq'uin junxil. Ut xintz'ibac ajcui' xban nak nacuaj xnaubal ma tebanu chixjunil li c'a'ru ninye ere. ¹⁰ Cui tecuy xmac a'an lain tincuy ajcui' xmac. Li ani tecuy xmac laex, tincuy ajcui' xmac lain. Cui ani nincuy xmac, a'an ninbanu re etenk'anquil ajcui' laex. Ut li Cristo naxnau nak ninbanu chi anchal inch'ol. ¹¹ Takacuy xmac re nak laj tza inc'a' tanumtak sa' kaben xban nak chikajunilo ac nakanau nak a'an cuan xna'leb chi balak'ic.

Laj Pablo ra sa' xch'ol xban nak ma' ani laj Tito aran Troas

¹² Nak quincuulac sa' li tenamit Troas chi c'anjelak chiru li Kacua', k'axal que'xq'ue xch'ol chirabinquil nak quinch'olob xyalal li colba-ib sa' xc'aba' li Jesucristo. ¹³ Abanan nak quincuulac Troas quiraho' inch'ol xban nak ma' ani aran li kaherman Tito chixyebal cue chanru cuanquex. Jo'can nak quinchak'rabiheb ut quinc'ulun arin sa' li na'ajej Macedonia.

Lao taklanbilo xban li Dios chixch'olobanquil xyalal chirix li Jesucristo

¹⁴ Nakabantioxi re li Dios xban nak yalak bar nocoxic li Cristo nac'amoc be chiku ut naxq'ue kacuanquilal chi elc chi us riq'uin chixjunil. Nak nakach'olob xyalal li Cristo, chanchan xboç li sununquil ban li naxic yalak bar. ¹⁵ Chanchano li sununquil ban li quixmajeja li Cristo chiru li Dios. Lix boç nacuulac riq'uineb li neque'cole' ut nacuulac ajcui' riq'uineb li

neque'sach. ¹⁶ Chiruheb li neque'sach chanchan xchuhil li camenak li nacamsin. Abanan chiruheb li neque'cole' chanchan jun sununquil ban li naq'uehoc yu'am. ¿Ani tz'akal cuan xna'leb chixch'olobanquil li xyalal li colba-ib? ¹⁷ Ca'aj cui' lao li taklanbilo xban li Dios. Chi anchal kach'ol nococ'anjelac chiru li Dios sa' xc'aba' li Cristo xban nak reho chic. Moco juntak'eto ta riq'uineb li jun ch'ol chic li inc'a' neque'xq'ue xlok'al li ratin li Dios. Chanchaneb aj yaconel nak neque'xsic' xtumineb riq'uin xyebal li ratin li Dios.

3

Li xyalal chirix li ac' contrato

¹ ¿Ma yoquin ta bi' chixnimobresinuil cuib nak neque'oxla laex nak ninye nak lain aj c'anjel chiru li Dios? ¿Ma tento ta bi' nak cuank li kahu jo' neque'xbanu li jun ch'ol chic re xyebal resil aniheb re nak tepab li c'a'ru neque'xye? ¿Ma naru ta bi' takapatz' li kahu ere laex? ² Laex chanchanex li kahu tz'ibanbil sa' li kach'ol ut chixjunileb naru te'ril. Nak te'ril le chabial te'xq'ue retal nak chabil li kac'anjel. ³ Le yu'am laex chanchan jun li hu tz'ibanbil xban li Cristo. Ut lao xkach'olob li xyalal cheru. Li hu a'in moco tz'ibanbil ta chiru pec chi moco tz'ibanbil ta riq'uin tinta. Tz'ibanbil ban sa' le ram xban lix Musik' li yo'yoquil Dios. ⁴ Naru nakaye a'in xban nak cau kach'ol riq'uin li Dios sa' xc'aba' li Jesucristo. ⁵ Ma jun c'anjel naru nakayo'ob kajunes, chi moco naru nakac'oxla xbanunquil. Li Dios ban naxq'ue kacuanquil chixbanunquil li c'a'ru nakabanu. ⁶ Li Dios naxq'ue kacuanquil chixch'olobanquil li xyalal li ac' contrato, li natauman cui' li ac' yu'am. Li ac' yu'am inc'a' natauman riq'uin xbanunquil li c'a'ru tz'ibanbil sa' li chak'rab xban nak li chak'rab naxteneb li camc sa' kaben. Li ac' yu'am q'uebil ke xban li Santil Musik'ej. ⁷ Li chak'rab li quiq'uehe' re laj Moisés tz'ibanbil chiru pec ut quic'utun xlok'al li Dios nak quixq'ue li chak'rab a'in. Quilemtz'un li rilobal laj Moisés ut eb laj Israel inc'a' que'xcuy rilbal usta junpat ajcui' quicuan sa' li rilobal laj Moisés lix lok'al li Dios. Li najter chak'rab a'in li quic'amoc chak re li camc sa' kaben quic'ulun riq'uin xlok'al li Dios. ⁸ Abanan k'axal numtjenak cui'chic xlok'al li c'anjel li naxbanu kiq'uin li Santil Musik'ej. ⁹ Cui cuan xlok'al li najter chak'rab li quic'amoc chak li tojba mac sa' kaben, k'axal cui'chic numtjenak xlok'al li ac' yu'am li naxq'ue ke li Santil Musik'ej li naq'uehoc xtiq'uilal li kach'ol chiru li Dios. ¹⁰ Li chak'rab cuan xlok'al junxil. Abanan inc'a' naxtao xlok'al li ac' yu'am xban nak numtjenak cui'chic xlok'al. ¹¹ Cui cuan xlok'al li najter chak'rab li quinume' xcuanquil, k'axal cui'chic nim xlok'al li ac' yu'am li cuan chi junelic. ¹² Xban nak nakanau nak lix lok'al li ac' yu'am mac'a' roso'jic, jo'can nak k'axal cau kach'ol chixch'olobanquil li xyalal ut mac'a' nakamuk cheru. ¹³ Inc'a' nakabanu jo' quixbanu laj Moisés najter nak quixtz'ap li rilobal riq'uin t'icr re nak eb laj Israel inc'a' te'ril nak yo chi elc lix lok'al. ¹⁴ Xban xcacuual xch'oleb inc'a' que'xtau ru nak lix lok'al li najter chak'rab taelk. Ut chalen anakuan inc'a' ajcui' neque'xtau ru. Chanchan nak li t'icr a'an toj yo chi ramoc chiruheb li xyalal nak neque'rabi li najter chak'rab. Ut li t'icr a'an na-el ca'aj cui' riq'uin xpabanquil li Cristo. ¹⁵ Chalen anakuan nak neque'rabi lix chak'rab laj Moisés, chanchan nak junak t'icr naramoc re li xyalal chiruheb ut inc'a' neque'xtau ru. ¹⁶ Abanan li t'icr a'an na-el nak junak tixpab li Kaqua' Jesucristo. ¹⁷ Ut li Kaqua', a'an ajcui' li Santil Musik'ej. Li ani cuan li Santil Musik'ej riq'uin, a'an moco cuan ta chic rubel xcuanquil li chak'rab chi moco li mac. Libre ban chic cuan. ¹⁸ Lao aj pabanel moco

tz'aptz'o ta li kilobal riq'uin t'icr re xtz'appbal xlok'al li Dios jo' quixbanu laj Moisés. Chanchano ban jun lem nak nakac'ut xlok'al li Kacua'. Ut li Kacua' a'an ajcui' li Santil Musik'ej li nocoxjalanobresi ut naxq'ue kalok'al re nak yoko xc'utbal xlok'al li Cristo.

4

Li c'anjel q'uebil ke xban li Dios k'axal lok'

¹ Yal xban rusilal li Dios nak quixq'ue ke li c'anjel a'in re xch'olobanquil xyalal li ac' contrato. Jo'can nak inc'a' nach'inan kach'ol. ² Nakatz'ektana chi junaj cua xbanunquil li mausilal li moco uxc ta naraj li neque'xbanu li jun ch'ol chic. Inc'a' nocobalak'in. Ut inc'a' nakapo' ru li ratin li Dios. Nakach'olob ban chi tz'akal li xyalal re nak chixjunileb te'xq'ue retal nak sa' xyalal cuanco chiru li Dios. ³ Cui inc'a' natauman ru li xyalal li colba-ib li nakach'olob lao, a' li inc'a' neque'xtau ru, a'an eb li neque'sach. ⁴ Inc'a' neque'xtau ru xban nak laj tza naramoc re lix yalal chiruheb li inc'a' neque'paban. Naxbanu a'an re nak inc'a' te'xtau ru li xyalal li colba-ib li nac'utuc chiku lix lok'al li Cristo, ut lix lok'al li Dios. ⁵ Inc'a' yoco chixch'olobanquil cheru nak lao toepab. Yoco ban chixch'olobanquil xyalal nak li Jesucristo a'an li Kacua'. Ut lao yal aj c'anjelo cheru sa' xc'aba' li Jesucristo. ⁶ Nak toj k'o'jyin chak ru li ruchich'och', li Dios quixye, "Chicuank li cutan re xcutanobresinuil ru li ruchich'och'." Ut a'an ajcui' li nacutanobresin re li kac'a'ux re nak naru takanau chanru lix lok'al li Dios. Ut li Jesucristo naxc'ut chiku lix lok'al li Dios. ⁷ Lao chanchano li ch'och' uc'al li naxocman cui' li tertio xtz'ak. Lao yal tz'ejcualo. Abanan li Dios naxcutanobresi li kac'a'ux re nak tac'utunk nak lix nimajcual cuanquilal li Dios li cuan kiq'uin, moco ke ta. Re ban li Dios.

Cauhak kach'ol sa' li kapabal re nak takacuy xnumsinuil li raylal nakac'ul

⁸ Q'uila pay chi raylal nachal sa' kaben, abanan nakacuy xnumsinuil. Cuan nak inc'a' nakatau ru li yoco chixc'ulbal abanan inc'a' nach'inan kach'ol. ⁹ Nacorahobtesic, abanan li Dios inc'a' nocoxcanab kajunes. Cuan nak nocoe'xsac' xban nak neque'raj kacamsinuil. Abanan li Dios nacoloc ke chiruheb. ¹⁰ Yalak bar nocoxic cuan ketalil chiru li katibel nak neque'xyal kacamsinuil jo' que'xbanu re li Cristo. Nakacuy a'an re nak tac'utunk chiruheb chixjunileb nak li Cristo yo'yo ut a'an nacoloc ke chiru li camc. ¹¹ Junelic neque'raj kacamsinuil xban nak nococ'anjelac chiru li Jesucristo. Abanan inc'a' nocoe'xcamsi xban nak li Cristo yo'yo ut cuan xcuanquil sa' kaben usta yal cuinko. ¹² Abanan xban nak nakacuy li raylal, laex tacuank le yu'am chi junelic. ¹³ Cau kach'ol sa' li kapabal. Jo'ca'in tz'ibanbil sa' li Santil Hu li quixye laj David. "Cuan inpabal. Jo'can nak ninatinac chirix", chan. Jo'can ajcui' lao, cuan ajcui' kapabal. Jo'can nak nocoatinac chirix. ¹⁴ Nakanau nak li Dios quicuaclesin cui'chic re chi yo'yo li Kacua' Jesucristo. Jo'can ajcui' lao. Nakanau nak toxcuaclesi cui'chic chi yo'yo jo' nak quixcuaclesi li Jesucristo ut tox'am riq'uin kochbenakex laex. ¹⁵ Chixjunil li raylal nakac'ul, a'an re erabal laex re nak tec'ul li rusilal li Dios. Cui nabaleb te'c'uluk re li rusilal li Dios, nabaleb ajcui' te'bantioxink chiru li Dios ut te'xq'ue xlok'al. ¹⁶ Jo'can nak inc'a' nach'inan kach'ol. Li katibel yo chi laj, yo chi osoc'. Abanan li kam ac'obresinbil rajlal cutan xban li Dios. ¹⁷ Li raylal li nakac'ul arin sa' ruchich'och', a'an junpat ajcui' ut nakacuy xnumsinuil. Li raylal nakac'ul, yo chikacauresinuil re jun li kalok'al mac'a' jo' xchak'al ru ut tacuank chi junelic. ¹⁸ Inc'a' nakaq'ue kach'ol chirix li cuan arin sa' ruchich'och', li na-ilman ru. Nakaq'ue ban kach'ol chirix li cuan aran sa'

choxa, li inc'a' na-ilman ru. Li c'a'ru na-ilman ru nalaj na-oso'. Abanan li inc'a' na-ilman ru cuan chi junelic.

5

Ac' chic li katz'ejcual takac'ul sa' choxa

¹ Li katz'ejcual arin sa' ruchich'och' chanchan jun li ochoch li na-oso'. Lao nakanau nak li katz'ejcual arin sa' ruchich'och' na-oso'. Abanan tacuanq' chic jun katz'ejcual sa' choxa li tixq'ue ke li Dios. Moco jo' ta li ochoch arin sa' ruchich'och' li na-oso' xban nak yibanbil xban cu'ink. Li katz'ejcual aran sa' choxa inc'a' taosok'. Cuanq' ban chi junelic. ² Nak cuanco sa' li tz'ejcualaj a'in, noco-ayaynac ut nakaj ta ac xkatau li katz'ejcual sa' li choxa li tixq'ue ke li Dios. ³ Macua'ako musik'ej chi mac'a' li katz'ejcual. Tacuanq' ban li katz'ejcual li tixq'ue ke li Dios. ⁴ Nak cuanco arin sa' ruchich'och' riq'uin li katz'ejcual a'in, noco-ayaynac xban li raylal nakac'ul. Inc'a' raj chic nakaj li katz'ejcual li na-oso'. Macua' xban nak nakaj camc. Xban nak nakaj ta ac xkatau li katz'ejcual sa' choxa li tacuanq' chi junelic. ⁵ A' li Dios a'an li coxcauresi re nak naru takac'ul li katz'ejcual sa' choxa. Ut quixq'ue ke li Santil Musik'ej re nak takanau chi tz'akal nak takac'ul li c'a'ru naxyechi'i ke. ⁶ Jo'can nak junelic cau kach'ol riq'uin li Dios nak cuanco sa' ruchich'och'. Nakanau nak jo' najtil cuanco sa' ruchich'och', moco cuanco ta chak riq'uin li Kacua' Jesucristo sa' choxa. ⁷ Nak yo'yoco arin sa' ruchich'och', toj maji' nakil ru li Kacua'. Abanan cau kach'ol nak li Kacua' cuan kiq'uin. ⁸ Lain ninye nak cau kach'ol riq'uin li Dios. Nakaj raj camc ut xcanabanquil li katz'ejcual a'in re nak naru toxic sa' choxa chi cuanc riq'uin li Kacua' Jesucristo. ⁹ Jo'can nak junelic nakaq'ue kach'ol chixbanunquil li c'a'ru naraj li Kacua' usta cuanco arin sa' ruchich'och' malaj sa' li Santil Choxa. ¹⁰ Nakanau nak chikajunilo toxkak'ut kib chiru li Cristo re nak a'an tarakok atin sa' kaben. Ut li junjunk tixc'ul lix k'ajcamunquil a' yal chanru lix yehom xbanuhom nak xcuan sa' ruchich'och', ma us malaj inc'a' us quixbanu.

Chocuank chi sum qtin riq'uin li Dios

¹¹ Jo'can nak nakaxucua ru li Dios ut nakaq'ue kach'ol chixch'olobanquil lix yalal. Ut li Dios naxnau chi tz'akal nak tic li kach'ol. Ut lain nacuj nak tenau ajcui' laex. ¹² Inc'a' yoquin chixyebal a'in ere re xnimobresin- quil cuib. Yoquin ban chixq'uebal ena'leb re nak tasahok' ech'ol cuiq'uin ut re nak tenau xsumenquil li yoq'ueb chixnimobresinquil rib riq'uin lix yehom xbanuhomeb ut inc'a' neque'xq'ue xcuanquil li tiq'uil ch'olej. ¹³ Cuan neque'yehoc nak inc'a' tuktu kajolom. Abanan li c'a'ru nakabanu, a'an re xq'uebal xlok'al li Dios. Cui laex nequec'oxla nak tuktu kajolom, us, xban nak us chok' ere laex li c'a'ru nakabanu. ¹⁴ Xban nak k'axal nocoxra li Cristo, jo'can nak nakaq'ue kach'ol chi c'anjelac chiru. Nakanau chi tz'akal nak li Cristo quicam sa' kac'aba' lao chikajunilo. Ut xban nak quicam a'an, chikajunilo camenako chic chiru li mac. ¹⁵ Quicam sa' kac'aba' chikajunilo lao re nak inc'a' yo'yoko yal chi jo'can chixbanunquil li c'a'ru nakaj kajunes kib. Yo'yoko ban re nak takabanu li c'a'ru naraj li Cristo li quicam ut quicuacui cui'chic chi yo'yo sa' kac'aba' lao. ¹⁶ Inc'a' chic nakaq'ue retal chanru nak cuanqueb li junjunk sa' ruchich'och'. Anakcuan lao chic aj pabanel ut jalan chic li kana'leb. Junxil nak toj maji' nocopaban inc'a' xkaq'ue xcuanquil li Cristo xban nak xkac'oxla nak yal cu'ink. Abanan anakanan nakanau chic lix yalal. ¹⁷ Jo'can ut cui junak xpab li Cristo, ac'obresinbil a'an. Lix yu'am quicuan junxil xnume' ut anakcuan ac' chic lix yu'am. ¹⁸ Chixjunil a'in xkamatanu riq'uin li Dios ut a'an ajcui' li quic'amoc ke sa' usilal riq'uin sa'

xc'aba' li Jesucristo. Ut a'an ajcui' li quixakaban ke chixch'olobanquil xyalal li colba-ib re nak cuan li te'pabank ut te'cuank sa' usilal riq'uin li Dios. ¹⁹ A'an a'in li yoquin chixyebal: Li Dios coxc'am cui'chic sa' usilal riq'uin sa' xc'aba' li Cristo. Ut inc'a' chic naxq'ue sa' xch'ol li kamac. Li Dios quixk'axtesi ke li c'anjel a'in re nak takach'olob xyalal re nak li ani te'pabank te'c'amek' sa' usilal riq'uin li Dios. ²⁰ Jo'can ut nak lao taklanbilo sa' xc'aba' li Jesucristo. Li Dios naxto'oni lix tz'umal ke re nak taatinak eriq'uin. Sa' xc'aba' li Jesucristo nakatz'ama cheru nak chec'amakerib sa' usilal riq'uin li Dios. ²¹ Li Jesucristo ma jun sut quimacob. Abanan li Dios quixq'ue li kamac sa' xben li Cristo re nak sa' xc'aba' a'an, lao takatau lix tiquilal kach'ol li naxq'ue li Dios.

6

¹ Lao aj c'anjelo chiru li Dios ut a'an natenk'an ke chixch'olobanquil lix yalal cheru. Laex li ac xec'ul li rusilal li Dios. Nintz'ama cheru nak inc'a' tcanab chi mac'a' rajbal. Cheq'uehak ban xcuanquil. ² Jo'ca'in tz'ibanbil sa' li Santil Hu: Nak xcuulac xk'ehil, xayaba inc'aba' ut xatcuabi. Sa' xk'ehil xc'ulbal li colba-ib, xatintenk'a, chan li Dios. (Is. 49:8) Jo'can nak lain ninye ere nak anakuan xk'ehil xc'ulbal li rusilal li Dios. Anakuan ajcui' naru texcolek'. ³ Lao inc'a' nakaj xbanunquil li c'a'ak re ru li taramok re chiruheb li ani te'raj pabanc re nak ma ani tacuech'ok rix li c'anjel li yoco chixbanunquil. ⁴ Chixjunil li nakabanu, a'an nac'utuc re nak lao aj c'anjelo chiru li Dios. Nakacuy xnumsinquil chixjunil li raylal, li rahobtesic ut li rahil ch'olejil li nakac'ul. ⁵ Xosaq'ue', xoq'uehe' sa' tz'alam, xe'xtub rib sa' kaben re kacamsinuil, xkacacuasi kib chi c'anjelac, xoyo'lec, ut xkacuy kasa' xban nak mac'a' katzacaemk. ⁶ Riq'uin a'in nequenau nak lao aj c'anjelo chiru li Dios. Sa' tiquilal yoco chixbanunquil. Nakanau li xyalal. Nabal li raylal nakacuy ut cuanco sa' usilal. Li Santil Musik'ej cuan kiq'uin ut chi anchal kach'ol nocorahoc. ⁷ Nakach'olob li xyalal cheru. Chixjunil li nakabanu, nakabanu riq'uin lix cuanquil li Dios. Junak li soldado cuan xch'ich' re pletic sa' lix nim uk' ut cuan xch'ich' sa' lix tz'e re xcolbal rib. Ut li kach'ich' lao, a'an xtiquilal li kach'ol. ⁸ Cuan li neque'xq'ue kalok'al ut cuan ajcui' li neque'xsach cuanunquil. Cuan li neque'hoboc ke ut cuan ajcui' li neque'oxlok'in. Ut cuan ajcui' li neque'yehoc re nak lao aj balak'. Abanan lao junelic nocoatinac sa' xyalal. ⁹ Cuan li neque'xbanu jo' li inc'a' neque'xnau ku, abanan chixjunileb neque'xnau ku. Ca'ch'in chic ma xocam, abanan toj yo'yoco. K'axal ra xkac'ul abanan li Dios inc'a' nocoxcanab chi camsic. ¹⁰ K'axal ra cuanco, abanan junelic sa' sa' kach'ol. Neba'o, abanan nabal neque'xc'ul xbiomal nak nakach'olob chiruheb li xyalal. Mac'a' cuan ke arin sa' ruchich'och', abanan nakanau nak biomo xban nak cuan li rusilal li Dios kiq'uin. ¹¹ Ex herman, laex li cuanquex Corinto, nequexinra. Jo'can nak xinye ere chixjunil li cuan sa' inch'ol. ¹² Lain nequexinra laex, abanan laex nac'utun cheru nak inc'a' niquinera. ¹³ Yoquin chi atinac eriq'uin jo' nak naatinac junak li yucua'bej riq'uin li ralar xc'ajol. Nintz'ama cheru nak tinera jo' nak nequexinra lain.

Melok'oni chic li yibanbil dios

¹⁴ Mejunaji erib riq'uineb li toj maji' neque'paban. ¿Ma naru ta bi' tacuank sa' comonil li tiquilal riq'uin li mausilal? ¿Ma naru ta bi' tacuank chi sum atin li santilal riq'uin li mac? ¹⁵ ¿Ma naru ta bi' tacuank chi sum atin li Cristo riq'uin laj tza? ¿Ma naru ta bi' te'cuank chi sum atin laj pabanel riq'uineb li toj maji' neque'paban? ¹⁶ ¿Ma xc'ulubeb ta bi' li yibanbil dios nak te'cuank sa' rochoch li yo'yoquil Dios? Mamin taruk. Lain ninye ere nak lao aj pabanelo, lao li rochoch li yo'yoquil Dios. Li Dios, a'an li quixye chi jo'ca'in:

Lajin tincuan̄k riq'uineb ut tincuochebniheb. Lajnak lix Dioseb a'an, ut a'anakeb li cualal inc'ajol, chan. (Lv. 26:12)

¹⁷ Ut li Kacua' quixye cui'chic chi jo'ca'in:

Jo'can utan chex-elk sa' xyankeb li neque'xlok'oni li yibanbil dios. Mebanu chic li neque'xbanu li jun ch'ol chic nak neque'xlok'oni li yibanbil dios. Checanabak chi junaj cua ut lajin texinc'ul chi sa sa' inch'ol.

¹⁸ Ut lajinak chic le Yucua' ut laexak chic li cualal inc'ajol, chan li Kacua' li k'axal nim xcuanguil. (Is. 52:11)

7

¹ Jo'can ut ex inherman, chixjunil a'in yechi'inbil ke lao. Jo'can nak chikacanabak chixjunil li mausilal li namuxuc ru li katibel ut li kam. Xban nak nakaxucua ru li Dios chikaq'ue kach'ol chi cuanc sa' santilal.

Laj Pablo quisaho' sa' xch'ol nak que'xjal xc'a'uxeb laj Corinto

² Nintz'ama cheru nak choera. Mac'a' xkabanu ere. Ma ani xkabanu raylal re ut ma ani xkapo' xch'ol ut ma ani xkabalak'i. ³ Inc'a' xinye a'in re ek'usbal. Ac xinye ere nak junelic nequexinra. Junelic cuankex sa' inch'ol nak yo'yokin ut chalen toj sa' lin camic. ⁴ Cau inch'ol eriq'uin ut nasaho' inch'ol xyebal eresilal. C'ojc'o inch'ol eban. Usta yoquin chixc'ulbal li raylal, abanan k'axal sa sa' inch'ol. ⁵ Chalen kac'ulunic arin Macedonia ma bar naru nocohilan. Yalak bar nocorahobtesic ut neque'raj pletic kig'uin. Ut yo ajcui' kac'a'ux cherix laex. ⁶ Abanan li Dios naxc'ojob xch'oleb li raheb sa' xch'ol. Ut a'an quixq'ue xcacuulal kach'ol riq'uin lix c'ulunic laj Tito. ⁷ Moco ca'aj cui' ta riq'uin xc'ulunic laj Tito nak quisaho' inch'ol. Ri'q'uin ban ajcui' rabinquil nak laj Tito sa sa' xch'ol eriq'uin. Quixserak'i ke nak laex teraj rilbal cuu ut quixye cue nak xyote' ech'ol nak xraho' inch'ol eban. Ut quixye ajcui' cue nak niquinec'oxla. K'axal cui'chic quisaho' inch'ol chirabinquil a'an. ⁸ Usta xraho' inch'ol junxil nak xraho' ech'ol laex xban li hu quintakla eriq'uin, abanan inc'a' nayot'e' inch'ol nak quintakla xban nak ninnau nak junpat ajcui' xraho' ech'ol xban. ⁹ Anakcuan nasaho' sa' inch'ol. Moco xban ta nak xraho' ech'ol inban. Ri'q'uin ban nak xyote' ech'ol ut xejal ce'a'ux. Xecuy li raylal a'an jo' naraj li Dios. Anakcuan nequetau ru nak moco ra ta xkabanu ere. ¹⁰ Cui junak naraho' xch'ol xban li inc'a' us naxbanu, li jun a'an nextau lix colbal xban nak nayot'e' xch'ol ut naxjal xc'a'ux jo' naraj li Dios. Ut ma ani naraho' xch'ol xban li colba-ib. Abanan cui junak naraho' xch'ol xban li inc'a' us naxbanu ut inc'a' nayot'e' xch'ol, li jun a'an inc'a' nextau li colba-ib. ¹¹ Q'uehomak retal chanru nak xextenk'ac xban nak xecuy li raylal jo' naraj li Dios. Quixq'ue xcacuyl ech'ol sa' le pabal. Anakcuan nequeraj rilbal cuu ut nequeraj xpatz'bal xcuylbal le mac. Nachal chic ejosk'il ut exiu xban li inc'a' us li neque'xbanu li cuanqueb sa' eyank. Nequeraj nak laj mac te'xtoj rix lix maqueb. Ri'q'uin chixjunil a'in nac'utun nak laex mac'a' emac riq'uin li c'a'ru quic'ulman. ¹² Jo'can ut nak xintz'iba li hu a'an inc'a' xinbanu sa' xc'aba' li quibanun mausilal chi moco sa' xc'aba' li quic'uluc raylal. Xinbanu ban re nak chic'utunk chiru li Dios nak c'ojc'o ech'ol cuiq'uin. ¹³ Xban nak xebanu li c'a'ru xinye ere, quic'ojla lin ch'ol. Ut k'axal cui'chic nasaho' lin ch'ol riq'uin lix sahil xch'ol laj Tito eriq'uin laex nak xeq'ue xcacuulal xch'ol. ¹⁴ Nequenau nak junelic ninye ere li xyalal. Ut inc'a' xinc'ut inxutan nak xinye re laj Tito nak xec'ut le chabilchir. ¹⁵ Ut laj Tito k'axal cui'chic nequexra nak najultico' re chanru nak xec'ul a'an sa' xyalal ut xeq'ue xcuanguil nak xebanu li c'a'ru quixye ere. ¹⁶ Nac'ojla inch'ol riq'uin li c'a'ru nequebanu ut sa inch'ol eriq'uin.

8

Chosihink chi sa sa' kach'ol

¹ Anakcuan, ex inherman, nacuj nak tinserek'i ere chanru nak li Dios riq'uin xnimal ruxtan yo chixtenk'anquileb laj pabanel li cuanqueb Macedonia chixbanunquil li usilal. ² Quiyale' rix lix pabaleb xban li q'uila raylal xe'xc'ul. Abanan numtajanek lix sahil xch'oleb. Usta k'axal neba'eb, abanan chanchan biomeb xban nak nabal xe'xsi re xtenk'anquileb li rech aj pabanelil. ³ Lain ninnau nak que'xq'ue li jo' q'uial que'ru xq'uebal ut toj que'xq'ue cui'chic xtz'akob chi anchaleb xch'ol. ⁴ Qui-ala sa' xch'oleb tenk'anc. Ut que'xye ke nak chi anchaleb xch'ol que'raj xtenk'anquileb li rech aj pabanelil li cuanqueb Jerusalén. ⁵ Inc'a' xkac'oxla nak nabal ta te'xq'ue. Que'xk'axtesi rib chiru li Dios ut que'xyech'i' ajcui' rib chikatenk'anquil jo' naraj li Dios. ⁶ Jo'can nak xkatz'ama chiru laj Tito nak taxic cui'chic eri'uin re nak textenk'a xchoybal li c'anjel xetiquib xban xchabilal ech'ol. A'an ajcui' li quitiquiban re xxochal li mayej a'in. ⁷ Laex cau ech'ol sa' le pabal. Nequenau li xyalal ut nequenau xch'olobanquil li yal. Nequeq'ue ech'ol chi c'anjelac jo' naraj li Dios, ut nococera. Jo'can nak nakatz'ama cheru nak cheq'ue le mayej chi anchal ech'ol. ⁸ Lain inc'a' yoquin xminbal eru. Yoquin ban chixyebal ere chanru nak eb laj Macedonia neque'xq'ue xmayej chi anchaleb xch'ol ut nacuj ajcui' xnaubal ma chi anchal ech'ol nequexrahoc laex. ⁹ Laex ac nequenau nak k'axal nim li rusilal li Kacua' Jesucristo. A'an quixcanab chak lix biomal sa' choxa ut quicuan sa' neba'il arin sa' ruchich'och' yal eban laex. Quixbanu chi jo'ca'in yal re nak laex teg'ul li biomal li naxq'ue li Dios. ¹⁰ Nacuj xyebal ere c'a'ru ninc'oxla chirix le mayej. Us cui techoy xbanunquil li xetiquib jun haber. Laex li xben li queye nak textenk'ank. Ut laex ajcui' li xben li queti'quib xbanunquil. ¹¹ Jo'can nak us cui techoy xbanunquil li xetiquib junxil. Chi anchal ech'ol xetiquib tenk'anc. Anakcuan teg'ue li jo' nimal jo' ch'inal naxq'ue rib cheru. ¹² Li ani na-ala sa' xch'ol xq'uebal xmayej, li Dios naxc'ul lix mayej a' yal jo' nimal cuan chiru. Li Dios inc'a' naxpatz' li mac'a' chiru. ¹³ Inc'a' yoquin chixyebal a'in re nak li jun ch'ol te'tenk'ak chi nabal ut laex texcanak chi mac'a' chic cuan ere. Nacuj ban nak cuank ere laex ut cuank ajcui' reheb li jun ch'ol chic re nak ma ani tacanak chi mac'a' cuan re. ¹⁴ Anakcuan riq'uin li jo' q'uial cuan ere, chetenk'aheb li mac'a' cuan reheb. Mare sa' jun cuan mac'a' cuank ere laex ut a'an eb chic te'tenk'ank ere riq'uin li jo' q'uial cuan reheb a'an. ¹⁵ Jo'ca'in tz'ibanbil sa' li Santil Hu chirix li maná li quixq'ue li Dios: Li ani quixxoc nabal, mac'a' qui-ela'an chiru. Ut li ani ca'ch'in quixxoc, quitz'akloc ajcui' chiru. (Ex. 16:18)

Laj Tito quitaklac chixtenk'anquileb laj Corinto

¹⁶ Ninbantioxi chiru li Dios xban nak laj Tito naxq'ue xch'ol chetenk'anquil jo' nak ninq'ue inch'ol lain. ¹⁷ Quintz'ama chiru laj Tito nak taxic eri'uin ut quixc'ul xch'ol. Toj maji' ajcui' nintz'ama chiru nak a'an ac x-ala sa' xch'ol nak taxic eri'uin. ¹⁸ Yoco chixtaklanquil jun chic li herman eri'uin rochenb laj Tito. A'an na'no ru xbaneb chixjunileb laj pabanel yalak bar xban nak chabil li c'anjel naxbanu re xch'olobanquil li xyalal li colbaib. ¹⁹ A'an li quixakabac xbaneb laj pabanel re taxic chikix nak toxic chixcanabanquil li matan a'in. Li matan a'in, a'an re xq'uebal xlok'al li Kacua' ut re nak te'xnau li kech aj pabanelil nak nakaj xtenk'anquileb. ²⁰ Yoco chixbanunquil li c'anjel a'in chi us re nak ma ani tacuech'ok rix li kac'anjel nak toxic chixcanabanquil li nimla matan a'in. ²¹ Nakaq'ue kach'ol chixbanunquil li c'a'ru us; moco ca'aj cui' ta chiru li Dios. Chiruheb aj ban cui'

li cujnk. ²² Ut yoco chixtaklanquil jun chic li kaherman chirixeb. Q'uila cua xkaq'ue retal nak naxq'ue xch'ol chixbanunquil li c'a'ak re ru re xtenk'anquil li rech aj pabanelil. Xban nak a'an cau xch'ol eriq'uin, jo'can nak sa xch'ol chi xic eriq'uin. ²³ Cui ani te'patz'ok chirix laj Tito, teye reheb nak a'an cuech aj c'anjelil. Cuochben che'tenk'anquil. Ut eb li cuib chic chi herman, a'an taklanbileb xbaneb laj pabanel. Xban nak tiq'ueb xch'ol sa' lix pabal, neque'xq'ue xlok'al li Cristo. ²⁴ Nak te'cuulak eriq'uin chec'ulakeb sa' xyalal. Chec'ut chiruheb nak nequera le rech aj pabanelil. Chi jo'can yalak bar taq'uehek' retal nak yal li chabil esil li xinye cherix.

9

¹ Inc'a' tento tintz'ibak eriq'uin chirix li matan li tetakla riq'ueb laj pabanel aran Jerusalen. ² Ninnau nak chi anchal ech'ol nequeraj xtenk'anquileb. Ut xinye eresilal reheb laj Macedonia. Xinye chi jo'ca'in: Laj pabanel li cuanqueb Acaya chalen jun haber qui-ala sa' xch'oleb xtenk'anquileb li rech aj pabanelil, chanquin reheb. Ut xban nak laex yoquex chixq'uebal ech'ol chi tenk'anc eb a'an te'raj ajcui' tenk'anc. ³ Ut yoquin chixtaklanquileb li herman a'in eriq'uin re nak textenk'a chixcauresinuil le mayej re nak taelk chi yal li c'a'ru xinye cherix. ⁴ Cui maji' cauresinbil le mayej nak tincuulak cuochbeneb li herman aj Macedonia, tec'ut inxutan lain xban nak ac xinserak'i reheb nak cauresinbil le mayej ut tec'ut ajcui' exutan laex. ⁵ Jo'can nak xinc'oxla nak us xtaklanquileb li herman xben cua nak toj maji' ninxic lain. Textenk'a cauresinuil li mayej li xeyechi'i. Ut nak tincuulak, ac xocbilak eban, re nak tac'utunk nak moco minbil ta eru chixq'uebal. Xeq'ue ban xban nak nequeraj xbanunquil. ⁶ Cheq'uehak retal li na'leb a'in: li ani ca'ch'in narau, ca'ch'in ajcui' li tixk'ol. Ut li ani nabal narau, nabal ajcui' tixk'ol. ⁷ Li junjnk tixq'ue li jo' g'uial taalak sa' xch'ol xq'uebal. Inc'a' tixq'ue chi ra sa' xch'ol, chi moco minbilak ta ru xban nak li Kacua' naxra li ani naxq'ue chi sa sa' xch'ol. ⁸ Nim xcuanquil li Dios. Ut a'an tixq'ue ere chixjunil re nak junelic tatz'aklok ere li c'a'ak re ru nac'anjelac ere ut re ajcui' nak taruk textenk'ank riq'uin chixjunil li chabil c'anjel. ⁹ Jo'ca'in tz'ibanbil sa' li Santil Hu: Li ani naxtenk'a li neba' chi anchal xch'ol, lix chabilal a'an cuan chi junelic. (Sal. 112:9) ¹⁰ Li Dios junelic naxq'ue li iyaj re laj acuinil ut naxq'ue li kacua. Ut a'an tixq'ue ajcui' li c'a'ru tac'anjelak ke. Ut tixq'ue rekaj ut tixtambresi a' yal chanru nocosihin. ¹¹ Li Dios junelic naxq'ue chi nabal li c'a'ru ere re nak taruk tetenk'aheb chi anchal ech'ol li mac'a' cuanqueb re. Ut nabaleb ajcui' li te'bantioxink chiru li Dios riq'uin li matan li xetakla chixix. ¹² Macua' ca'aj cui' xtenk'anquileb li herman yoquex nak nequebanu li usilal a'in. Yoquex ban ajcui' xq'uebal xlok'al li Dios xban nak eb li herman neque'bantioxin chiru li Dios eban laex. ¹³ Ut neque'xq'ue ajcui' xlok'al li Dios xban nak cau ech'ol laex sa' le pabal. Moco ca'aj cui' ta riq'uin nak nequeye nak nequexpan nak nac'utun le pabal. Nac'utun ban ajcui' xban nak nequeq'ue ech'ol chixtenk'anquileb li mac'a' cuanqueb re. Ut chi jo'can nequetenk'a chixjunileb laj pabanel. ¹⁴ Te'xq'ue retal nak lix nimal rusilal li Dios cau eriq'uin. Jo'can nak laex raroquex xbaneb li herman ut te'tijok cherix. ¹⁵ Bantiox re li Dios nak quixq'ue ke li matan li k'axal numtajenak xlok'al. Ut li matan a'in, a'an li Kacua' Jesucristo.

10

Laj Pablo naxch'olob xyalal lix cuanquil q'uebil re xban li Dios

1 Anakcuan cuan c'a'ak re ru nacuj xyebal ere chirixeb li neque'atinac chicuix. Cuan li neque'yehoc chi jo'ca'in: Laj Pablo tulan nak cuan eriq'uin; abanan nak ma ani sa' eyank jalan chic lix na'leb ut nak natz'ibac chak eriq'uin, k'axal cau naatinac, chanqueb chicuix. Ut lain nintz'ama cheru nak chexc'oxlac bayak chirix li Jesucristo. A'an tulan ut k'un xch'ol. 2 Jo'can nak inc'a' nacuj atinac chi cau. Usan cui nak tincuulak eriq'uin inc'a' tento nak toj tingatinac eriq'uin chi cau. Lain naru ajcui' nequebinsume li neque'atinac chicuix ut neque'xye nak li c'a'ru yoquin chixbanunquil, a'an yal xna'leb cujnk. 3 Yal nak cujnk. Abanan inc'a' yoco chi pletic jo' neque'xbanu li kech cujnkilal arin sa' ruchich'och'. Riq'uin ban li mausilal yoco chi pletic. 4 Ut li kac'anjelebal re pletic riq'uin li mausilal macua' jo' li c'anjelebal re ruchich'och'. Re ban li Dios ut k'axal nim xcuanquil re xsachbal chixjunil lix c'anjel li mausilal. 5 Nakasach xcuanquileb li neque'cuech'in rix lix c'anjel li Dios. Ut nakasach ajcui' xcuanquil chixjunil lix yehom xbanuhom li cujnk li naramoc re chiruheb li kas kitz'in li rusilal li Dios. Nakacanab sa' ruk' li Dios lix na'lebeb a'an re nak chijalax lix na'lebeb xban li Cristo ut te'xbanu li c'a'ru naraj a'an. 6 Ninnau nak tincuulak eriq'uin naru tink'useb li toj yoqueb chixbanunquil li inc'a' us. Abanan inc'a' nacuj texink'us laex. Nacuj ban nak tejal le c'a'ux ut tebanu li naraj li Dios. 7 Laex nequeq'ue retal ca'aj cui' li c'a'ru na-ilman ru ut inc'a' nequexc'oxlac chirix li c'a'ru cuan sa' li rameb li junjnk. 8 Ma cuan junak sa' eyank naxye nak a'an aj c'anjel chiru li Cristo? Cui cuan, us ajcui'. Abanan tento nak tixq'ue retal nak jo'can ajcui' lao aj c'anjelo chiru li Cristo. 8 Mare nequec'oxla nak yoquin chixnimobresinuil cuib riq'uin lin c'anjel. Abanan lin c'anjel q'uebil cue xban li Kacua' re nak texintenk'a. Macua' re esachbal. Inc'a' ninc'oxlac riq'uin li c'a'ru ninbanu xban nak li Dios xq'ue incuanquil chixbanunquil. 9 Inc'a' nacuj nak tec'oxla nak yal re xq'uebal exiu nak nintz'ibac eriq'uin. 10 Cuan li neque'atinac chicuix ut neque'xye chi jo'ca'in: Laj Pablo naxtz'iba lix hu riq'uin cacuil atin re nak toxucuak xban. Abanan nak cuan sa' kayank, yo xxiu ut mac'a' na-oc cui' li c'a'ru naxye, chanqueb chicuix. 11 Li neque'atinac chi jo'can che'xq'uehak retal nak cau xingatinac nak xintz'iba li hu a'in eriq'uin. Ut jo'can ajcui' tinbanu nak tincuulak eriq'uin. 12 Inc'a' nakaj xbanunquil jo' neque'xbanu li neque'xnimobresi rib riq'uin li c'a'ru neque'xbanu. Mac'a' xna'lebeb. Neque'xnimobresi rib riq'uin lix na'lebeb xjuneseb rib. 13 Lao inc'a' nakanimobresi kib riq'uin li moco q'uebil ta ke xbanunquil. Li c'a'ru nocoatinac chirix, a'an li c'anjel q'uebil ke xban li Dios re toc'anjelak ajcui' eriq'uin laex aj Corinto. 14 Lain li xben quincuuulac eriq'uin chixch'olobanquil resil li colba-ib sa' xc'aba' li Jesucristo. Ut inc'a' xinbanu li macua' cue xbanunquil. Tenebanbil sa' inben xban li Dios xyebal resil li colba-ib ere. 15 Inc'a' ninnimobresi cuib riq'uin li c'anjel li neque'xbanu li jun ch'ol chic. Lain nacuj raj nak texq'ulik sa' le pabal re nak tintenk'a chixyebal resil li colba-ib yalak bar. Abanan inc'a' tinxic bar moco q'uebil ta cue re tinxic. 16 Nacuj xic sa' jalan na'ajej chixch'olobanquil xyalal li colba-ib bar toj maji' xrabiomeb resil li colba-ib. Inc'a' nacuj xnimobresinuil cuib riq'uin li c'anjel ac tiquibanbil xban jalan chic aj c'anjel. 17 Jo'ca'in tz'ibanbil sa' li Santil Hu: Inc'a' takanimobresi kib. Chikanimobresihak ban xlok'al li Kacua'. 18 Cuan li neque'xye ribeb nak chabileb. Abanan mac'a' na-oc cui' li neque'xye. A' li k'axal lok', a'an nak li Dios tixye nak li jun a'an chabil.

¹ Usan cui tinecuy chic ca'ch'inak usta tontil atin cheru laex li c'a'ru tinye ut cherabihak li c'a'ru tinye ere. ² Lain k'axal nequexinc'oxla jo' nak li Dios nequexc'oxla. Ut nacuj nak ca'aj cui' li Cristo tetake. Jo' nak li yucua'bej naxk'axtesi lix rabin chi sumlac riq'uin jun chi cuiñk, jo' can ajcui' nak xexink'axtesi riq'uin li Cristo. A'an jo' li belomej. ³ Abanan yoquin chi c'oxlac cherix xban nak ninnau chanru nak quibalak'ic lix Eva xban li c'anti'. Mare anchal texbalak'ik laex ut mare inc'a' chic tepab li Cristo chi anchal ech'ol ut mare inc'a' chic telok'oni. ⁴ Ninc'oxlac cherix xban nak cuan li neque'cuulac sa' eyank ut nequeq'ue ech'ol chirabinquil li c'a'ru neque'xye, usta jalan neque'xc'ut cheru chirix li Jesucristo. Ut nequepab li c'a'ru neque'xye usta jalan neque'xye chirix li Santil Musik'ej. Ut naxc'ul ech'ol nak jalan neque'xc'ut cheru chirix li colba-ib li ac xepab xben cua. ⁵ Eb a'an neque'xye nak apostoleb ut neque'xnimobresi rib ut neque'xye nak k'axal chabileb. ¿Ma cubenak ta bi' incuanquil lain chiruheb a'an? ⁶ Mare inc'a' ninnau atinac chi chabil, abanan ninnau chi tz'akal li xyalal li ratin li Dios. Ut junelic ninc'ut cheru chi tz'akal li xyalal. ⁷ Lain xinch'olob cheru li xyalal li ratin li Dios ut mac'a' c'a'ru xexinch'i'ch'i'i cui'. Yal chi matan xinch'olob li xyalal li colba-ib cheru ut xincubsi incuanquil re nak texcolek'. ¿Ma ra ta bi' xinbanu ere? ⁸ Cuan nak xinc'ul inten'anguil re xnumsinquil li cunan riq'uin li kech aj pabanelil li cuanqueb sa' jalan tenamit. Jo' can nak xru xinc'anjelac eriq'uin laex. ¿Ma inc'a' ta bi' us li xinbanu? ⁹ Nak quincuan chak eriq'uin, cuan nak mac'a' cuan cue. Abanan inc'a' xexinch'i'ch'i'i riq'uin intzacaemk. Nak que'cuulac li herman aj Macedonia, a'an eb queq'uehoc intumin. Jo' can nak inc'a' quinq'ue sa' eben xq'uebal intzacaemk chi moco ting'ue sa' eben anakcuan. ¹⁰ Xban nak li Cristo cuan cuiq'uin, jo' can nak ninye li yal ut sa' chixjunil li na'ajej Acaya, chixjunileb te'na'ok re nak inc'a' xinq'ue sa' eben inten'anguil. ¹¹ ¿C'a'ru xyalal a'in? ¿Ma naraj ta bi' naxye nak inc'a' nequexinra? Li Dios naxnau nak nequexinra. ¹² Ut inc'a' tincanab xbanunquil li yoquin chixbanunquil xban nak cuan li neque'xye nak juntak'et lix c'anjelab riq'uin lin c'anjel lain. Inc'a' tincanab c'anjelac chi matan xban nak inc'a' nacuj nak te'xjuntak'eta ribeb cuiq'uin. ¹³ Eb li cuiñk a'in neque'xq'ue rib chok' apóstol. Abanan macua' li Cristo quiq'uehoc reheb chok' apóstol. Eb a'an aj balak' ut junes balak'inc neque'xbanu. ¹⁴ Misach ech'ol chirabinquil a'an. Jo' can ajcui' naxbanu laj tza. Cuan nak naxc'utbesi rib jo' angel ut chanchan naxcuanobresi li kana'leb. ¹⁵ Chi moco chisachk ech'ol chirabinquil nak eb laj c'anjel chiru laj tza neque'xc'utbesi rib jo' aj c'anjel sa' tiquilal. Abanan taçuulac xk'ehil nak te'xtoj rix lix mausilaleb.

Li raylal quixc'ul laj Pablo sa' xc'aba' lix c'anjel

¹⁶ Jun sut chic tinye ere nak cherabihak li c'a'ru tinye. Ma jun taxak ere tixc'oxla nak mac'a' inna'leb. Abanan cui nequec'oxla nak mac'a' inna'leb, cherabi li cuatin jo' nak nequex-abin chiruheb li mac'a'eb xna'leb. ¿Ma inc'a' ta bi' raj taruk tinatinak chirix lin cuanquil lain? ¹⁷ Li c'a'ru yoquin chixyebal anakcuan moco q'uebil ta cue xban li Kacua'. Abanan tinye xban nak laex inc'a' nequetau xyalal. Yoquin chi atinac anakcuan jo' neque'xbanu li cuiñk li neque'xnimobresi rib. ¹⁸ Nabaleb neque'xnimobresi rib riq'uin li c'a'ru neque'xbanu arin sa' ruchich'och'. ¿Ma inc'a' ta bi' raj taruk tinnimobresi ajcui' cuib lain? ¹⁹ Laex cuan raj ena'leb nak nequerec'a erib. Abanan nequeq'ue ech'ol chirabinquil li c'a'ru neque'xye li mac'a'eb xna'leb. ²⁰ Cui nequexrahobtesic yal nequecuy. Cui namak'e' li c'a'ru ere cheru, mac'a' nequeye. Cui nequexbalak'ic, yal nequecanab chi jo' can. Ut cui neque'xk'etk'eti rib cheru, a'an chic li nacuulac cheru. Ut

cui nasag'ue' sa' xnak' eru, yal nequecuy. ²¹ ¿Ma xutanal ta bi' chok' cue nak inc'a' naru ninbanu ere jo' neque'xbanu eb a'an? Anakcuan tinatinak eri'q'uin jo' neque'xbanu li mac'a'eb xna'leb ut tinye ere a'in: Cui cuan li neque'xnimobresi rib riq'uin lix yehom xbanuhom, taruk raj ajcui' tinnimobresi cuib lain. ²² Neque'xnimobresi rib xban nak a'an eb aj hebreo. Lain ajcui' aj hebreo lain. Neque'xnimobresi rib xban nak a'aneb aj Israel. Ut lain ajcui' aj Israel lain. Neque'xnimobresi rib xban nak a'aneb rala'c'ajol laj Abraham ut jo'can ajcui' lain. Lain ajcui' rala'c'ajol laj Abraham. ²³ Tinnimobresi ca'ch'inak cuib anakcuan ut tinatinak jo' neque'xbanu li mac'a'eb xna'leb. Neque'xye nak aj c'anjeleb chiru li Cristo. ¿Ma a'aneb ta bi' li k'axal aj c'anjel chiru li Cristo chicuu lain? Inc'a', xban nak lain tz'akalin x-apóstol li Jesucristo. Nabal li raylal ninc'ul sa' xc'aba' li Cristo. Nintacuasi cuib chi c'anjelac. Nabal sut xinq'uehe' sa' tz'alam. Nabal sut xinsaq'ue' ut cuanqueb li neque'raj incamsinquit. ²⁴ Eb laj judío quine'xq'ue chi tz'um. Jun chic ma' ca'c'al chi tz'um ninc'ul chiru li jun sut. Ut ob sut quinc'ul chi jo'can. ²⁵ Oxib sut quinsaq'ue' riq'uin che' ut jun sut quine'xcuti chi pec. Oxib sut quijache' li jucub li cuanquin cui' nak yoquin chi xic jun pac'al li palau. Tz'akal jun cutan ut jun k'o'jyin quincuan sa' li ha' sa' xyi li palau. ²⁶ Yalak bar ninxic xyebal resil li Cristo, xiu xiu cuanquin. Xiu xiu cuanquin nak ninnume' sa' eb li nima'. Xiu xiu cuanquin xbaneb laj elk' ut xbaneb li cuech tenamitil ut xbaneb li macua'eb aj judío. Xiu xiu cuanquin sa' eb li tenamit jo' ajcui' sa' li q'uiche'. Xiu xiu cuanquin nak ninnume' sa' li palau. Xiu xiu cuanquin xbaneb li neque'xq'ue rib jo' aj pabanel. ²⁷ Cau ninc'anjelac ut xincuy li raylal. Xincuy li yo'lec' ut cuan nak mac'a' intzacaemk. Xincuy intz'ocajic ut xincuy inchaki el. Xincuy li que chi inc'a' tz'akal li cuak'. ²⁸ Cuan chic nabal li raylal xinc'ul. Ut chirix chixjunil a'an, k'axal cui'chic ninc'oxlac cuulaj cuulaj chirixeb chixjunileb laj pabanel li cuanqueb yalak bar. ²⁹ Cui cuan li k'un xch'ol li mac'a' xmetz'eu, k'axal nintok'oba ruheb. Cui cuan li neque'ch'inan xch'oleb sa' lix pabaleb, c'ajo' nak naraho' inch'ol ut ninc'oxlac chirixeb. ³⁰ Cui tento tinatinak chirix lin c'anjel, tinatinak chirix li c'a' re ru li naxc'ut nak mac'a' incuanquil injunes re nak inc'a' tanimak cuu lain. ³¹ Li Acuabej Dios, lix Yucua' li Ka'cua' Jesucristo naxnau nak inc'a' nintic'ti'ic. Lok'oninbil taxak li Dios chi junelic k'e cutan. ³² Laj Aretas, a'an li acuabej sa' li tenamit Damasco. Nak cuanquin aran, jun li cu'ink li nac'anjelac chiru laj Aretas, quixtakla xc'ac'alenuil li oquebal sa' li tenamit xban nak quiraj inchapbal. ³³ Abanan xincole' sa' ruk'eb. Li tz'ac li sutbil cui' li tenamit cuan jun lix ventanil. Ut aran quine'xcubi chak sa' jun nimla chacach. Jo'can nak quincole'.

12

Li c'aru quic'utbesic chiru laj Pablo xban li Dios

¹ Ninnau nak mac'a' tinra chirix nak tinnimobresi cuib. Abanan cui tento nak tinbanu, nacua'j xserak'inquil ere c'aru quicuil chanchan matq'uenbil quinbanu. Ut nacua'j xserak'inquil c'aru quixc'utbesi chicuu li Ka'cua'. ² Calaju chihab anakcuan nak quinc'ame' toj sa' li rox tasal li choxa. Inc'a' ninnau ma matq'uenbil quinbanu malaj quinc'ame' chi tz'akal. Ca'aj cui' li Dios naxnau. ³ Inc'a' ninnau chan ta cui' ru nak co'in sa' choxa. Abanan ninnau nak quinc'ame' ut li Dios naxnau chanru quixbanu nak quinx'c'am sa' choxa. ⁴ Ut li c'a'ru quicuabi aran inc'a' naru ninatinac chirix xban nak moco xc'ulub ta junak cu'ink atinac chirix ut inc'a' natauman junak atin re xyebal xban nak k'axal numtajanek xlok'al. ⁵ Naru raj tinnimobresi cuib

riq'uin li c'a'ru quicuabi chak sa' choxa. Abanan ca'aj cui' tinatinak chirix li c'a'ru naxc'ut nak mac'a' incuanquil injunes xban nak yal cuinkin. ⁶ Lain naru raj tinnimobresi cuib xban nak yal li c'a'ru quicuabi chak, abanan inc'a' ninbanu re nak ma' ani tixc'oxla nak k'axal nim incuanquil. Ca'aj cui' li nacuaq, a'an nak laex teq'ue retal lin yehom inbanuhom. ⁷ Li Dios inc'a' quiraj nak tinnimobresi cuib xban li k'axal lok' quilajxc'utbesi chak chicuu. Jo'can nak quiq'uehe' jun li raylal sa' inben. Chanchan li cuan q'uix sa' intibel nak nacuec'a. A'an xtakl laj tza re inrahobtesinquit. Cuan li raylal a'in re nak inc'a' tinnimobresi cuib. ⁸ Oxib sut xintijoc ut xintz'ama chiru li Kacua' nak chirisihak li raylal a'in li yo chi rahobtesinc cue. ⁹ Abanan li Kacua' quixye cue: Inc'a' nacuisi la raylal. Abanan tatintenk'a re nak tacuy xnumsinquit. Lain ning'ue lin cuanquil re li ani naxnau nak mac'a' xcuanquil xjunes, chan cue. Jo'can nak nasaho' sa' inch'ol riq'uin li raylal re nak lix cuanquil li Cristo cuank cuiq'uin. ¹⁰ Jo'can nak nasaho' sa' inch'ol nak mac'a' incuanquil injunes ut nak ninhobe' jo' ajcui' nak ninc'ul li raylal, li ch'a'ajquial ut li rahobtesic sa' xc'aba' li Jesucristo. Nasaho' sa' inch'ol xban nak cui mac'a' incuanquil injunes cuib, ninnau nak cuan incuanquil sa' xc'aba' li Jesucristo.

Laj Pablo yo xc'a'ux chirixeb laj pabanel li cuanqueb Corinto

¹¹ Chanchan nak mac'a' inna'leb nak ninserak'i ere chixjunil li xinc'ul. Inc'a' raj xinye ere. Abanan eban laex nak xinbanu xban nak laex inc'a' nequeq'ue incuanquil chok' apóstol. Laex raj li xexq'uehoc incuanquil. Moco cubenak ta incuanquil lain chiruheb li neque'xq'ue rib chok' apóstol usta mac'a' incuanquil injunes. ¹² Nak cuanquin eriq'uin nabal quincuy ut riq'uin xcuanquil li Dios quilajinbanu li milagro ut li sachba ch'olej li nac'utuc re nak lain tz'akal apóstol. ¹³ Jo' quinbanu chak sa' xyankeb laj pabanel li quinnume' cui' chak, jo'can ajcui' quinbanu nak cuanquin eriq'uin. Li c'a'ru inc'a' xing'ue sa' eben, a'an lin tenk'anquil. ¿Ma mac ta bi' li xinbanu? Checuy inmac cui inc'a' us xinbanu. ¹⁴ Anakcuan ac xincauresi cuib re nak tinix eriq'uin sa' rox sut. Abanan inc'a' texinch'i'ch'i'i riq'uin c'a'ru cue. Macua' li c'a'ru ere ninra. Laex ban li nequexinra. Macua'eb li coc'al li neque'ch'olanin re li yucua'bej. A' li yucua'bej, a'an li nach'olanin reheb li ralal xc'ajol. ¹⁵ Jo'can nak chixjunil li c'a'ru cuan cue chi anchal inch'ol tinsach re etenk'anquil ut tintacuasi cuib re nak texcolek'. Cui k'axal nequexinra, ¿ma inc'a' ta bi' taruk tinera lain? ¹⁶ Chi yal inc'a' xexinch'i'ch'i'i. Abanan mare cuan sa' eyank te'xc'oxla nak ebalak'inquil yoquin. ¹⁷ ¿Chanru nak xexinbalak'i? ¿Ma xexbalak'ic ta bi' xbaneb li ani xintakla eriq'uin? ¹⁸ Lain xintz'ama chiru laj Tito nak taxic eriq'uin ut xintakla li herman chirix. ¿Ma xexbalak'i ta bi' laj Tito? ¿Ma inc'a' ta bi' junaj li kac'a'ux cuochben laj Tito? ¿Ma inc'a' ta bi' junaj li kana'leb? ¹⁹ Mare yal re xcolbal cuib cheru nak nequec'oxla. Abanan moco jo'can ta. Li Dios naxnau chi tz'akal nak sa' xc'aba' li Cristo ninatinac. Ex inherman, chixjunil li ninbanu, a'an re etenk'anquil re nak texq'uij sa' le pabal. ²⁰ Ninc'oxla nak tincuulak eriq'uin mare inc'a' sahak ech'ol cuiq'uin, ut lain mare inc'a' sahak inch'ol eriq'uin xban nak toj cuan li c'a'ak re toj inc'a' us sa' eyank. Mare toj cuan li pletic ut li cakalinc sa' eyank ut mare toj cuan li josk'il ut li nimobresinc ib, malaj ut li k'abanc ut li xic' iloc ut mare toj cuan li k'etk'etil eriq'uin malaj ut li po'oj ib. ²¹ Ninc'oxla nak tincuulak eriq'uin, teç'ut inxutan chiru li Dios xban li c'a'ru yoquex chixbanunquit. Mare tinyabak chirixeb li que'xbanu li inc'a' us ut toj maji' neque'xyot' xch'ol ut toj maji' xe'xjal xc'a'ux riq'uin li mausilal li que'xbanu jo' li muxoc caxar, li co'betac yumbetac ut li c'a'ak chic ru chi mausilal.

13

Laj Pablo naxye c'a'ru tixbanu nak taçuulak riq'üneb laj Corinto

¹ A'in li rox sut nak tincuulak eriç'uin. Cui cuan li tajitek' nak tincuulak, tento nak cuank cuib malaj oxib li testigo chixyebal nak yal lix maç, jo' tz'ibanbil sa' li Santil Hu. ² Nak quincuulac xca' sut eriç'uin, quinq'ueheb çak xna'lebeb li yoqueb chi maçobc jo' ajcui' chejunilex. Ut anakcuan ma anihin sa' eyank ut tinc'olob cui'chic xyalal çeru. Nak tincuulak cui'chic eriç'uin, lajn tebink'us chi cau li ani inc'a' us yoqueb chixbanunquul. Inc'a' chic te'cuil xtok'obal ru. ³ Riq'uin a'in tenau nak ninatinac riq'uin li cuanquul q'uebil cue xban li Cristo. Moco maç'a' ta xcuanquul li Cristo re ek'usbal. K'axal nim ban xcuanquul chek'usbal. ⁴ Cubenak xcuanquul li Cristo nak quicamsjç chiru li cruz. Abanan quicuaçlesjç cui'chic sa' xyankeb li camenak chi yo'yo xban xcuanquul li Dios. Jo' nak quixcubsi xcuanquul li Cristo, jo'can ajcui' takacubsi kacuanquul laç. Abanan yo'yoço xban xcuanquul li Dios ut q'uebil ke li kacuanquul xban li Dios re xk'usbaleb li neque'xbanu li inc'a' us. ⁵ Q'uehomak retal le yu'am. ¿Ma tz'akal re ru le yu'am? ¿Ma chi ançal ech'ol nequexpaban? ¿Ma inc'a' ta bi' nequenau chi tz'akal nak li Cristo cuan eriç'uin? ¿Malaj ut toj maji' nequexpaban? ⁶ Usan cui nak tincuulak eriç'uin, teq'ue retal nak lajn tz'akalin x-apóstol li Jesucristo. ⁷ Lajn junelic nintz'ama chiru li Dios nak inc'a' tebanu li inc'a' us. Inc'a' nintz'ama a'an re nak taç'utunk nak çabil li c'anjel ninbanu sa' eyank. Re ban nak tz'akalak re ru le yu'am. Nacuaj nak tebanu li us usta inc'a' naq'uehe' xcuanquul li c'anjel li ninbanu sa' eyank. ⁸ Laç inc'a' naru nakapo' ru li yal. Nocoç'anjelac ban re xq'uebal xcuanquul li yal. ⁹ Jo'can nak k'axal raj taçahok' sa' inch'ol nak tincuulak eriç'uin cui çabilak chic le yu'am re nak inc'a' tento tinc'ut çeru nak cuan incuanquul re ek'usbal. Nintjoc çerix re nak tz'akalak re ru le yu'am sa' le paçal. ¹⁰ Jo'can nak yoquin chixtz'ibanquul li hu a'in eriç'uin nak toj maji' ninxiç eriç'uin. Nak cuankin cui'chic sa' eyank lajn inc'a' nacuaj texink'us chi cau usta cuan incuanquul re ek'usbal. Li Kaçua' inc'a' quixq'ue lin cuanquul re esachbal. Re ban etenk'anquul sa' le paçal.

Laj Pablo naxq'ueheb xsahil xch'ol ut naxçhak'rabiheb

¹¹ Anakcuan ex inherman, texinçhak'rabi riq'uin a atin a'in: Jalomak le c'a'ux re nak tz'akalak ere eru. Cheq'uehak retal li jo' q'ual xinye ere. Junajak taxak le c'a'ux ut çexcuank sa' xyalal chi ribil erib. Ut cuank eriç'uin li Dios li narahoc ke ut naxq'ue ke li tuktuquul usilal. ¹² Cheq'uehak xsahil ech'ol chi ribil erib riq'uin santil utz'uc u. ¹³ Chixjunileb laj paçanel li cuanqueb arin neque'xtakla xsahil ech'ol. ¹⁴ Chicuañk taxak eriç'uin li rusilal li Kaçua' Jesucristo, ut chicuañk taxak eriç'uin li rahoc ib li naxq'ue li Kaçua' Dios, ut a' taxak li Santil Musik'ej chicuañk eriç'uin. Jo'can taxak.

Li Hu li Quixtz'iba li San Pablo reheb laj Galacia

Xq'uebal xsahileb xch'ol

¹ Lain laj Pablo. Lain x-apóstol li Jesucristo. Moco taklanbilin ta xban cujnk, chi moco sa' xc'aba' junak cujnk. Taklanbilin ban xban li Jesucristo ut xban li Acuabej Dios, li quicuaclesin cui'chic re chi yo'yo li Jesucristo sa' xyankeb li camenak. ² Lain yoquin chixtaklanquil li hu a'in eriq'uin chejunilex laex li cuanquex sa' li junjnk chi iglesia aran Galacia. Ut eb li herman' ta cuanqueb cuochben yoqueb ajcui' chixtaklanquil xsahil ech'ol. ³ Chicuank taxak eriq'uin li usilal ut li tuktuquilal li naxq'ue li Dios li kaYucua' ut li naxq'ue li Kaçua' Jesucristo. ⁴ Li Jesucristo quixk'axtesi rib chi çamç sa' xc'aba' li kamaç xban nak jo'can quiraj li Dios Acuabej. Quixbanu a'an re kacolbal chiru li mausilal sa' li ruchich'och'. ⁵ Lok'oninbil taxak ru li Acuabej Dios chi junelic k'e cutan. Jo'can taxak.

Jun ajcui' li tz'akal evangelio

⁶ Nasach inch'ol eban xban nak k'axal junpat yoquex chixcanabanquil li tz'akal Dios li quisic'oc eru xban li rusilal li Jesucristo. Ut yoquex chixpabanquil jalan tijleb chirix li evangelio li moco yal ta. ⁷ A'in moco naraj ta naxye nak cuan jun chic li evangelio. Lix yalal a'an, a'in: cuanqueb li neque'raj xpo'bal ru li evangelio li naxq'ue li Kaçua' Jesucristo. ⁸ Usta lao, usta junak ángel tachalk sa' choxa chixyebal ere jalan tijleb chirix li evangelio chiru li ac xkach'olob cheru, tz'ektanbilak taxak xban li Dios li ani tabanunk re chi jo'ca'in. ⁹ Ac xkaye a'in ere ut nakaye cui'chic ere, çui junak tixye ere jalan tijleb chirix li evangelio chiru li ac xerabi, tz'ektanbilak taxak xban li Dios li ani tabanunk re chi jo'ca'in. ¹⁰ ¿Ma yal re ta bi' nak te'sahok' xch'ol li cujnk cuiq'uin nak yoquin chixyebal chi jo'ca'in? ¿Ma inc'a' ta bi' yoquin chixyebal chi jo'ca'in re nak sahak xch'ol li Dios cuiq'uin? ¿Ma tincuaj ta bi' tinc'ojob xch'oleb li cujnk? Ma jok'e xban nak cui ta toj nacuj xc'ojobanquil xch'oleb li cujnk maçua'in raj aj c'anjel chiru li Jesucristo.

Nak quisiq'ue' ru laj Pablo chok' apóstol

¹¹ Ex inherman, nacuj nak tenau nak li evangelio li xinch'olob cheru, a'an maçua' yal xc'a'ux cujnk. ¹² Maçua' yal riq'uin junak cujnk quicuabi, chi moco riq'uin ta junak cujnk quintzol cuib. A' ban li Kaçua' Jesucristo, a'an li quic'utbesin re chicuu. ¹³ Ac erabiom ajcui' resil chanru nak quincuan çak sa' lix pabaleb laj judío. Laex nequenau nak k'axal nabal li raylal quinbanu reheb li neque'paban re li Dios ut quinyal ink'e chixsachbal ruheb laj pabanel. ¹⁴ Lain li k'axal cui'chic quinq'ue inch'ol chiruheb li cuech sajilal chixbanunquil li c'a'ru naxye lix pabaleb laj judío. Ut k'axal cui'chic quinbanu li na'leb canabanbil ke xbaneb li kaxe' katon. ¹⁵ Nak toj maji' ninyo'la, xban xnimal rusilal, li Dios ac xsic' çak cuu re tinc'anjelak chiru. ¹⁶ Ut nak li Dios quiraj xc'utbesinquil li Ralal chicuu re nak tinch'olob resil chiruheb li maçua'eb aj judío, inc'a' xinpatz' inna'leb re junak cujnk. ¹⁷ Chi moco çoin ta Jerusalén chi atinac riq'uineb li apóstol li quisiq'ue' ruheb junxil chicuu. Tjic ban çoin Arabia ut mokon quinsuk'i cui'chic Damasco. ¹⁸ Oxib chihab xpabanquil li Dios inban nak çoin Jerusalén re nak tinnau ru laj

Pedro. O'laju cutan quincuan chak riq'uin. ¹⁹ Ut quicuul ru laj Jacobo ritz'in li Kaçua' Jesucristo. Ut chirix chic a'an, ma jun chic reheb li apóstol quicuileb ru. ²⁰ Li Dios naxnau nak tz'akal yal li c'a'ru yoquin chixtz'ibanquil sa' li hu a'in. ²¹ Chirix chic a'an çoin sa' eb li na'ajej xçuent Siria ut Cilicia. ²² Ut toj maji'ak neque'xnau cuu eb laj pabanel sa' xc'aba' li Cristo, li cuanqueb aran Judea. ²³ Yal resil neque'rabi li nayaman chicuix: Li çunk li quirahobtesin reheb laj pabanel junxil, anakcuan a'an chic yo çhi yehoc resil li colba-ib li quiraj raj xsachbal junxil, chanqueb. ²⁴ Ut eb a'an que'xlok'oni ru li Dios nak que'rabi resil nak quinpab li Cristo.

2

Eb li apóstol que'xc'ul laj Pablo chok'rech apostolil

¹ Mokon chic nak ac xnume' çalaju chihab, çoin cui'chic Jerusalén cuochben laj Bernabé. Ut kac'am laj Tito chikix. ² Çoin xban nak li Dios quixc'utbesi chicuul nak tento tinxic Jerusalén. Ut que'xch'utub rib li neque'c'amoc be chiruheb laj pabanel. Ut quinserak'i reheb li resilal li evangelio li yoquin chixjulticanquil reheb li maçua'eb aj judío. Quinch'olob xyalal chiruheb re nak inc'a' taçanak çhi maç'a' rajbal chiruheb li c'a'ru yoquin chixbanunquil jo' ajcui' li ac xinbanu. ³ Laj Tito maçua' aj judío. Abanan eb laj c'amol be inc'a' que'xmin ru chixc'ulbal li circuncisión. ⁴ Abanan cuan ajcui' junjunk que'raj raj xminbal ru xc'ulbal li circuncisión. Eb a'an neque'xye rib nak aj pabaneleb. Que'oc sa' kayank sa' mukmu re xq'uebal retal li usilal cuanco cui' sa' xc'aba' li Jesucristo ma yoço chixpabanquil li najter chak'rab malaj inc'a'. Eb a'an que'raj raj cui'chic kaq'uebal rubel xcuanquil li najter chak'rab. ⁵ Abanan laço ma jok'e kabanu li c'a'ru que'xye ke xban nak laço inc'a' quikaj nak te'xpo' ru li evangelio, li tz'akal yal li ac xerabi. ⁶ Ut eb li ninkeb xcuanquil sa' xyankeb laj pabanel maç'a' que'xye chirix li c'a'ru yoquin chixbanunquil. Maç'a' nacuaç re usta ninkeb xcuanquil. Chiru li Dios juntak'eto. ⁷ Maç'a' que'xye li ninkeb xcuanquil. Que'xq'ue ban retal nak tenebanbil sa' inben xban li Dios xyebal resil li evangelio reheb li maçua'eb aj judío jo' nak quitenebac sa' xben laj Pedro xban li Dios xyebal resil li evangelio reheb laj judío. ⁸ Li Dios quixsic' cuu chok' apóstol re tinc'anjelak sa' xyankeb li maçua'eb aj judío jo' nak quixsic' ru laj Pedro re taç'anjelak sa' xyankeb laj judío. ⁹ Laj Jacobo, laj Pedro ut laj Juan, a'aneb aj c'amol be sa' xyankeb laj pabanel. Nak que'xq'ue retal nak sic'bil cuu xban li Dios, que'xq'ue li ruk'eb cue ut re laj Bernabé. A'an retalil nak kacomon kib çhi c'anjelac chiru li Dios. Ut xkac'ub ru nak lain ut laj Bernabé toc'anjelak sa' xyankeb li maçua'eb aj judío ut eb a'an te'c'anjelak sa' xyankeb laj judío. ¹⁰ Ca'aj cui' li que'xtz'ama çhiku nak che'julticok' ke eb li neba' li cuanqueb Jerusalén, ut a'an li ninq'ue inch'ol chixbanunquil.

Laj Pablo quixye nak inc'a' us yo chixbanunquil laj Pedro aran Antioquia

¹¹ Nak quicuulac laj Pedro Antioquia, lain quink'us xban nak inc'a' us li yo chixbanunquil. ¹² Nak toj maji' neque'cuulac li taklanbileb xban laj Jacobo, laj Pedro nacua'ac riq'uineb li maçua'eb aj judío. Aban nak que'cuulac eb a'an, quirisu rib sa' xyankeb li maçua'eb aj judío xban nak quixxucuaheb ru laj judío li neque'yehoc re nak tento xc'ulbal li circuncisión. ¹³ Eb laj pabanel aj judío que'oc chixbanunquil li ca' pac'alil na'leb li quixbanu laj Pedro toj retal nak qui-oc ajcui' chixbanunquil laj Bernabé xban nak jo'can quic'ame' cui' xbe xbaneb. ¹⁴ Nak quinq'ue retal nak inc'a' yoqueb chixbanunquil

jo' naraj li evangelio, chiruheb chixjunileb laj pabanel quinye re laj Pedro: Yal nak laät aj judío chalen chak sa' la yo'lajic, abanan ac junxil xacanab xbanunquíl li c'aynakeb chixbanunquíl laj judío. ¿C'a'ut nak nacamineb ru li maçua'eb laj judío chixbanunquíl jo' neque'xbanu laj judío? chanquin re.

Ca'aj cui' riq'uin xpabanquíl li Cristo natauman li colba-ib

¹⁵ Lao aj judío chalen chak sa' kayo'lajic ut maçua'o xcomoneb li maçua'eb aj judío, li neque'xye "aj maç" reheb. ¹⁶ Abanan nakanau nak ma ani tañicobresik xch'ol chiru li Dios riq'uin xbanunquíl li c'a'ru naxye li chak'rab. Riq'uin ban xpabanquíl li Jesucristo. Lao xkapab li Kaçua' Jesucristo re tañicobresik kach'ol chiru li Dios riq'uin xpabanquíl li Cristo ut maçua' riq'uin xbanunquíl li naxye li chak'rab cocole'. Riq'uin xbanunquíl li naxye li chak'rab, ma ani tañicobresik xch'ol chiru li Dios. ¹⁷ Cui yoco chixsic'bal xñicobresinquíl kach'ol chiru li Dios sa' xc'aba' li Cristo, ut nak lao chic tota'lik chi cuan kamaç, ¿ma a'an ta bi' naraj naxye nak a' li Cristo yo chi q'uehoc ke chi maçobc? Ma jok'e bi'an. ¹⁸ Cui lain tin-oc cui'chic xpabanquíl nak tañicobresik inch'ol chiru li Dios riq'uin xbanunquíl li naxye li chak'rab, a'an naraj naxye nak chi yal lain aj maç xban nak ac junxil xincanab xpabanquíl li na'leb a'an. ¹⁹ Najter chak'rab xq'uehoc cue chi camc xban nak a'an xc'utuc re chicuu nak lain aj maç. Anakcuan camenakin chic chiru lix cuanquíl li chak'rab re nak yo'yokin rubel xcuanquíl li Dios. ²⁰ Li Jesucristo quicam chiru li cruz ut chanchan nak quinq'uehe' ajcui' lain cuochben. Maçua' chic lain li yo'yoquin. A' chic li Cristo cuan cuiq'uin. Ut ac' chic lin yu'am xban nak xinpab li Jesucristo li Lalal li Dios li quirahoc cue ut quixk'axtesi rib chi camc sa' inc'aba'. ²¹ Jo'can nak inc'a' nintz'ektana xcuanquíl li rusilal li Dios. Cui ta sa' xc'aba' li chak'rab nañicobresic kach'ol, maç'a' raj rajbal nak quicam li Cristo.

3

Li chak'rab ut li pabal

¹ Laex aj Galacia, maç'a' ena'leb. ¿Ani xbalak'in ere nak inc'a' chic yoquex xpabanquíl li xyalal? Nak xkach'olob cheru chanru nak quiq'uehe' li Jesucristo chiru cruz, chanchan nak tz'akal yoquex chirilbal. ² Ca'aj cui' a'in nacuaaj xpatz'bal ere. ¿Ma riq'uin ta bi' xbanunquíl li naxye sa' li chak'rab nak xec'ul li Santil Musik'ej? Ma jok'e. Laex xec'ul li Santil Musik'ej nak xepab li Cristo. ³ ¿Ma k'axal cui'chic maç'a' ena'leb? Cui riq'uin li Santil Musik'ej xetiquib chak xpabanquíl li Jesucristo, ¿ma nequec'oxla anakcuan nak tatz'aklok ru le pabal yal riq'uin li c'a'ak re ru nequebanu ejunes? ⁴ ¿Ma teçanab chi maç'a' rajbal chixjunil li quec'ul chi jo'canan? Lain ninye nak inc'a' tebanu chi jo'can. ⁵ Li Dios naxq'ue li Santil Musik'ej ut naxbanu li milagros eriq'uin. Nacuaj tinpatz' ere a'in: ¿ma naxbanu a'an xban nak nequepab li chak'rab malaj ut xban nak xepab li Cristo li quiyeh'e' resil ere? ⁶ C'oxlankeç ca'ch'inak chirix laj Abraham. Jo' naxye sa' li Santil Hu, laj Abraham quixpab li Dios ut xban nak quipaban, li Dios quixye nak tic chic lix ch'ol. ⁷ Nacuaj nak tenau nak li tz'akal lalal xc'ajol laj Abraham, a'aneb li neque'paban re li Dios. ⁸ Najter k'e cutan nak toj maji' nac'ulun resil li evangelio sa' ruchich'och', ac cuan sa' xch'ol li Dios nak tañicobresik xch'oleb li maçua'eb aj judío nak te'pabank. Jo'can nak tz'ibanbil sa' li Santil Hu li quixye li Dios re laj Abraham: Sa' ac'aba' laät osobtesinbilakeb chixjunileb li tenamit. (Gn. 12:3) ⁹ Jo'can nak li ani neque'paban, osobtesinbileb jo' nak qui-osobtesic laj Abraham xban nak quixpab li Dios. ¹⁰ Chixjunileb li neque'xsic' xtiq'uílal xch'ol riq'uin xbanunquíl li naxye sa' li najter chak'rab,

tenebanbil li tojba maç sa' xbeñeb xban nak jo'ca'in tz'ibanbil sa' li Santil Hu: Tenebanbil li tojba maç sa' xbeñeb li ani inc'a' neque'xbanu chixjunil li tz'ibanbil retail sa' li chak'rab. (Dt. 27:26) ¹¹ Ac ch'olch'o nak ma' ani tañicobresik xch'ol chiru li Dios yal riq'uin xbanunquil li naxye sa' li najter chak'rab xban nak tz'ibanbil sa' li Santil Hu nak ani naxpañ li Dios, tañicobresik xch'ol chiru li Dios ut taçuank xyu'am chi junelic. (Hab. 2:4) ¹² Li chak'rab inc'a' naxye nak topabank. Ca'aj cui' naxye nak tento xbanunquil li naxye re nak taçuank li kayu'am. Jo'ca'in tz'ibanbil sa' li chak'rab: Li ani naxbanu chixjunil li naxye li chak'rab, li jun a'an taçuank xyu'am. (Lv. 18:5) ¹³ Abanan li Jesucristo coxcol chiru li tojba maç li tenebanbil sa' kaben xban li chak'rab. A'an quicoloc ke nak quixq'ue rib chi camc re xtojbal rix li kamac. Jo'ca'in tz'ibanbil sa' li Santil Hu: Tz'ektanabileb chixjunileb li neque'camsic chi t'uyt'u chiru li che'. (Dt. 21:23) ¹⁴ Li Jesucristo quixtoj rix li kamac nak quicam chiru li cruz re nak sa' xc'aba' a'an li macua'eb aj judio te'xc'ul li rosobtesinuil riq'uin li Dios jo' li quix'ul laj Abraham ut re ajcui' nak riq'uin xpabanquil li Jesucristo takac'ul li Santil Musik'ej li quiyechi'ic ke xban li Dios.

Li chak'rab ut li yechi'inbil xban li Dios

¹⁵ Ex inherman, nacuañ xch'olobanquil lix yalal a'in cheru riq'uin li c'a'ru nac'ulman sa' li kayu'am arin sa' ruchich'och'. Junak cuñk nak tixbanu xcontrato, chi acak xakxo xcuauquil, ma' ani chic naru nasachoc re, chi moco tixtik ru. ¹⁶ Jo' tz'ibanbil sa' li Santil Hu, li c'a'ru quiyechi'ic re laj Abraham xban li Dios, quiyechi'ic ajcui' reheb li ralal xc'ajol. Moco yo ta chi atinac chirixeb chixjunileb li ralal xc'ajol. Yo ban chi atinac chirix jun ajcui'. Ut li jun a'an, a'an li Cristo. ¹⁷ A'in ut tinye: Li Dios quixbanu jun li contrato najter riq'uin laj Abraham ut quixxakab xcuauquil sa' xc'aba' li Cristo. Li chak'rab li quiq'uehe' re laj Moisés cañib ciento riq'uin lajeb xca'c'al (430) chihab mokon inc'a' naxsach xcuauquil li contrato li ac xakabanbil xcuauquil, chi moco tixcanab ta chi maç'a' rajbal li yechi'inbil re laj Abraham xban li Dios. ¹⁸ Cui ta naru xc'ulbal li colba-ib riq'uin xbanunquil li naxye li chak'rab, maç'a' raj rajbal li quiyechi'ic re laj Abraham xban li Dios. Abanan li c'a'ru quixyechi'i li Dios re laj Abraham, a'an yal chi mañan quixq'ue. ¹⁹ ¿C'a'ru aj e nak quiq'uehe' li chak'rab? A'an quiq'uehe' re nak tixc'ut chiruheb li tenamit nak a'aneb aj k'etol chak'rab. Ut li chak'rab a'an quicuan xcuauquil toj quic'ulun li Jesucristo li quiyola sa' xyankeb li ralal xc'ajol laj Abraham, li yechi'inbil xban li Dios. Eb li ángel que'c'anjelac chiru li Dios nak que'xye li chak'rab re laj Moisés; ut laj Moisés, a'an li quiyehoc re chiruheb li tenamit. ²⁰ Abanan ma' ani quijaloc atin nak li Dios quixyechi'i li mañan re laj Abraham. A' li Dios, a'an li quibanun re. ²¹ ¿Ma a'in ta bi' naraj naxye nak li chak'rab naxsach xcuauquil li c'a'ru quixyechi'i li Dios? ¡Ma jok'e! Cui ta naru taçuank li kayu'am chi junelic riq'uin xbanunquil li naxye li chak'rab, tañicok' aj raj cui' li kach'ol chiru li Dios xban li chak'rab. ²² Li Santil Hu naxye nak chixjunil li ruchich'och' cuan rubel xcuauquil li maç re nak chixjunileb li te'pabank re li Kaçua' Jesucristo te'xc'ul ajcui' li colba-ib li quiyechi'ic xban li Dios. ²³ Nak toj maji' nac'ulun li Jesucristo sa' ruchich'och', toj cuanco rubel xcuauquil li chak'rab. Chanchan cuanco chi prexil. Yoco chiroybeninuil nak li Dios tixtakla chak li Jesucristo li yechi'inbil xban, re nak riq'uin xpabanquil a'an tocolek'. ²⁴ Jo'can nak li chak'rab, a'an nac'utuc xyalal chiku ut a'an nac'amoc ke riq'uin li Cristo re nak tñicobresinbilak kach'ol riq'uin xpabanquil li Cristo. ²⁵ Anakcuan ut ac xc'uulac xk'ehil xpabanquil li Jesucristo. Jo'can nak maç'a' chic xcuauquil li najter chak'rab

sa' kabən. ²⁶ Anakcuan læex chic ralal xc'ajol li Dios çejunilex xban nak xepab li Jesucristo. ²⁷ Læex xec'ul li cubi ha' ut rehex chic li Cristo. Jalbil chic lə yu'am ut çhabil chic lə na'leb sa' xc'aba' li Jesucristo. ²⁸ Anakcuan ut moco jalan ta chic laj griego chiruheb laj judío, chi moco jalan ta li mōs chiru li patrón, chi moco jalan ta li cujnk, chi moco jalan ta li ixk. Junaj ban chic ku sa' xc'aba' li Jesucristo. ²⁹ Cui læex rehex chic li Cristo, læex ajcui' ralal xc'ajol laj Abraham ut læex terechani ajcui' li c'a'ru quiyechi'ic re laj Abraham xban li Dios.

4

¹ Li nacuaij xyebal ere a'an a'in: nak toj ca'ch'in, li taçchanjnk re li jun cablal chanchan junak mōs. Maç'a' naru naxch'e' xban nak maji' natz'akloc xchihab usta a'an laj eçal re chixjunil. ² Toj cuan rubel xcuanquil li na-iloc re ut li nataklan re toj tatz'aklok ru lix chihab jo' quixye lix yucua'. ³ Jo'can ajcui' læo. Junxil chanchano coc'al. Cocuan rubel xcuanquil li najter na'leb nak toj maji' nakanau bar cuan li yal. ⁴ Abanan nak quicuulac xk'ehil, li Dios quixtakla li Ralal chi yo'lac sa' ruchich'och' riq'uin jun li ixk. Ut quicuan ajcui' rubel xcuanquil li najter çhak'rab. ⁵ Li Dios quixtakla li Ralal re nak a'an taçolok reheb li cuanqueb rubel xcuanquil li çhak'rab. Quixbanu a'in re nak læo naru to-oc çok' ralal xc'ajol. ⁶ Re xc'utbal chiku nak læo chic ralal xc'ajol, li Dios quixtakla li Santil Musik'e'j re nak taçuank kiq'uin. Ut xban nak cuan li Santil Musik'e'j kiq'uin, jo'can nak naru nakaye re li Dios, "at inYucua'." ⁷ Jo'can ut anakcuan maçua'ex chic lok'bil mōs. Læex ban chic ralal li Dios. Ut xban nak læex chic ralal li Dios, terechani ajcui' li yechi'inbil reheb li ralal xc'ajol xban nak jo'can quiraj li Dios.

Laj Pablo yo chi c'oxlac chirixeb laj pabanel li cuanqueb Galacia

⁸ Nak toj maji' nequepab çhak li Dios, quelok'oniheb li maçua'eb tz'akal dios ut quexc'anjelac çhak chiruheb. ⁹ Anakcuan ac xexpaban ut rehex chic li Dios. ¿C'a'ut nak teraj cui'chic suk'ic chi c'anjelac sa' lə najteril na'leb li maç'a' na-oc cui'? Ut ¿c'a'ut nak teraj cui'chic xq'uebal erib rubel xcuanquil li najter çhak'rab? ¹⁰ Læex yoquex cui'chic chixbanunquil lə najteril na'leb nak nequenink'ei eb li cutan, li po ut li chihab ut li c'a'ak chic re ru chi nink'ehil. ¹¹ Nachal inc'a'ux eban. Mære yal maç'a' rajbal nak xinc'anjelac sa' eyank. ¹² Ex inherman, usta lajn aj judío, xcuisi cuib rubel xcuanquil li çhak'rab. Nintz'ama çeru nak tebanu jo' xinbanu lajn. Meq'ue chic erib rubel xcuanquil li çhak'rab. Læex maç'a' junak raylal xebanu cue. ¹³ Læex nequenau nak xban nak quinyajer, quincana Galacia. Jo'can nak quiru quinye resil li evangelio ere xben cua. ¹⁴ Lajn ninnau nak ch'a'aj raj çok' ere cuilbal sa' lin yajel. Abanan inc'a' xinetz'ektana ut inc'a' xic' quineril. Xineril ban jo' junak x-angel li Dios ut xineç'ul jo' nak xec'ul raj li Jesucristo. ¹⁵ ¿Bar cuan lix sahil sa' lə ch'ol querec'a nak quincuan eriq'uin junxil? Li Dios naxnau nak cui ta quiru xbanunquil, querisi raj xnak' lə ru ut queq'ue raj cue. ¹⁶ ¿Ma xic' chic niqunineril anakcuan yal xban nak xinye ere li xyalal chi jo'canan? ¹⁷ Chanchan k'axal nequera eb laj balak'. Abanan maçua' usilal li te'raj eriq'uin. Ebalak'inquil ban li te'raj. Eb a'an te'raj nak terisi erib cuiq'uin re nak eb a'an chic li tetake. ¹⁸ Us cui te'raj etenkanquil cui chi anchal xch'oleb te'xbanu. Abanan tento te'xbanu chi junelic ut maçua' ca'aj cui' nak cuanquin eriq'uin. ¹⁹ Ex inherman, chanchanex incoc'al nak nequexcui. C'ajo' nak nayot'e' inch'ol sa' eç'aba'læex. Chanchan li raylal li naxc'ul li ixk li cuanc re xc'ula'al. C'ajo' naraho' inch'ol nak toj maji' nequek'axtesi erib chi tz'akal rubel rok ruk' li Cristo. ²⁰ Nacuaij ta ac

cuanquin eriq'uin anakcuan re nak tinnau chanru tingtinak eriq'uin. C'ajo' inc'a'ux cherix xban nak inc'a' ninnau chanru cuanquex.

Lix Agar ut lix Sara

²¹ Laex li toj teraj cuanc rubel xcuauquil li najter chak'rab, ¿c'a'ut nak inc'a' nequeq'ue retal li c'a'ru naxye? ²² Tz'ibanbil retalil nak laj Abraham quicuan cuib li ralar, jun riq'uin li lok'bil moş ut li jun chic riq'uin li tz'akal rixakil. (Gn. 21:2-9) ²³ Ut li ralar laj Abraham li quicuan riq'uin li lok'bil moş, a'an moco yechi'inbil ta xban li Dios. Quiyo'la jo' neque'yo'la chixjunileb sa' ruchich'och'. Abanan li ralar li quiyo'la riq'uin li tz'akal rixakil, a'an quiyo'la xban nak yechi'inbil reheb xban li Dios. ²⁴ Cuan xyalal nak quixc'ul chi jo'ca'in laj Abraham. A'an a'in lix yalal: Li cuib chi ixk, a'aneb retalil li cuib chi contrato li quixbanu li Dios riq'uineb laj Abraham ut laj Moisés. Lix Agar, li lok'bil moş, a'an retalil li contrato quixbanu li Dios sa' li tzul Sinaí. Ut li toj cuanqueb rubel xcuauquil li najter chak'rab chanchaneb li lok'bil moş jo' li ralar xc'ajol lix Agar. ²⁵ Lix Agar, a'an retalil li tzul Sinaí li cuan Arabia. A'an ajcui' retalil li tenamit Jerusalén. Ut eb laj Jerusalén chanchaneb li lok'bil moş nak cuanqueb, xban nak toj cuanqueb rubel xcuauquil li najter chak'rab. ²⁶ Abanan lix Sara, a'an retalil li Jerusalén li cuan sa' choxa. Ut laj ralar xc'ajol a'an. ²⁷ Jo'ca'in tz'ibanbil sa' li Santil Hu:

Chisahok' taxak sa' ach'ol, at ixk, li inc'a' nacatq'uiresin. Jap acue xban xsahil ach'ol laet li inc'a' acuec'ahom xrahil li alanc, laet li tz'ektanabilat xban la' belom. Chisahok' taxak sa' ach'ol xban nak k'axal nabal cui'chic la' cualal ac'ajol taçuank chiruheb li ralar xc'ajol li lok'bil moş. (Is. 54:1)

²⁸ Ex inherman, laj jo' laj Isaac. Laj chic ralar xc'ajol li Dios xban li c'a'ru quiyechi'ic re laj Abraham xban li Dios. ²⁹ Najter li alalbej li quiyo'la riq'uin li moş, a'an quirahobtesin re li alalbej li quiyo'la xban xcuauquil li Santil Musik'ej. Ut chalen anakcuan jo'can ajcui' nac'ulman. ³⁰ Aban, ¿c'a'ru naxye sa' li Santil Hu? Naxye chi jo'ca'in: Isi li lok'bil moş rochben lix yum xban nak li alalbej a'an inc'a' naru natz'ak lix jun cablal li yucua'bej. A' ban li alalbej li quiyo'la riq'uin li tz'akal ixakilbej, a'an li taechanink re. (Gn. 21:10) ³¹ Jo'can ut, ex inherman, laj maçua'o ralar xc'ajol li lok'bil moş. Laj ban ralar xc'ajol li tz'akal ixakilbej.

5

Meq'ue chic erib rubel xcuauquil li najter na'leb

¹ Maçua'o chic jo' li lok'bil moş xban nak moco cuanco ta chic rubel xcuauquil li najter chak'rab. Libre ban chic cuanco xban nak li Cristo quicoloc ke chiru xcuauquil li najter chak'rab. Chexcuank ut chi cau ech'ol sa' le pabal ut meq'ue chic erib rubel xcuauquil li chak'rab. ² Lain laj Pablo. Q'uehomak retal li yoquin chixyebal ere. Cui toj nequec'ul li circuncisión re nak tatibobresik ech'ol, a'an naraj naxye nak maç'a' na-oc cui' cheru li Cristo. ³ Jun sut chic ninch'olob li xyalal cheru. Li ani naxc'ul li circuncisión re nak tatibobresik xch'ol, tento nak tixbanu chixjunil li naxye sa' li najter chak'rab. ⁴ Laex li nequeraj xtibobresinquil ech'ol chiru li Dios riq'uin xbanunquil li naxye sa' li chak'rab, nequerisi erib riq'uin li Cristo ut nequerisi ajcui' erib riq'uin li rusilal li Dios. ⁵ Abanan laj yoco chiroybeninquil lix tibobresinquil kach'ol chiru li Dios riq'uin xpabanquil li Cristo xban nak jo'can quic'utbesic chiku xban li Santil Musik'ej. ⁶ Cui laj reho chic li Jesucristo, maç'a' naxye cui takac'ul li circuncisión malaj ut inc'a'. Li k'axal tento xbanunquil, a'an xpabanquil li Jesucristo. Ut cui yal nak nakapab li Cristo, taç'utunk li kapabal

xban nak nocorahoc. ⁷ Us nak quetiquib chak pabanc junxil. ¿Ani xtacchi'in ere nak inc'a' chic yoquex chixpabanquil li yal? ⁸ Li tacchi' a'an inc'a' nachal riq'uin li Dios li quisic'oc eru. ⁹ Usta yal ca'ch'in li levadura li nach'amobresin naq'ueman, a'an naxch'amobresi chixjunil li k'em. ¹⁰ Lain cau inch'ol sa' xc'aba' li Kaçua' Jesucristo nak laex moco jalan ta le c'a'ux chiru lin c'a'ux lain. Li ani yo chi po'oc ru le pabal tixc'ul xtojbal xmac' a' yal ani. ¹¹ Cui ta toj yoquin chixjulticanquil nak tento xc'ulbal li circuncisión inc'a' raj chic tine'xrahobtesi. Cui ta foj yoquin chixbanunquil a'an, yoquin raj risinquit xcuauquil xamic li Cristo chiru li cruz ut inc'a' raj chic te'josk'ok sa' inben. ¹² Li ani yoqueb chi po'oc ru le pabal ut yoqueb chixyebal nak tento xc'ulbal li circuncisión, us raj cui te'xc'ul eb a'an ut te'xset raj ribeb chi junaj cua re nak te'xcanab ch'i'ch'i'inc sa' eyank. ¹³ Ex inherman, laex sic'bil eru re nak libre chic cuankex. Abanan moco xban ta nak libre chic cuanquex nak tex-oc chixbanunquil li naxrahi ru le ch'ol. Chera ban erib ut chetenk'a erib chi ribil erib. ¹⁴ Chixjunil li chak'rab natauman ru riq'uin xbanunquil li jun a'in: Chara la cuas acuitz'in jo' nak nacara acuib laät. (Lv. 19:18) ¹⁵ Ut cui yoquex chixjosk'inquil erib ut yoquex chixrahobtesinquit erib, chexc'oxlak ca'ch'inak. Mare anchal tepo' ru le pabal chi ribil erib.

Chikacanabak kib rubel xcuauquil li Santil Musik'ej

¹⁶ Li nacuj xyebal ere, a'an a'in: Checanabak erib rubel xcuauquil li Santil Musik'ej re nak a'an taberesink ere. Cui tebanu a'an, inc'a' chic tebanu li inc'a' us li nequerahi ru xbanunquil. ¹⁷ Li c'a'ru inc'a' us li nakarahi ru xbanunquil kajunes, a'an xic' na-ile' xban li Santil Musik'ej. Ut li c'a'ru us li naxrahi chok' ke li Santil Musik'ej, a'an inc'a' naxc'am rib riq'uin li nakaj xbanunquil kajunes. Xic' neque'ril rib chi ribil rib ut xban a'an inc'a' nakabanu li us li nakaj raj xbanunquil. ¹⁸ Ut cui laex beresinbilex xban li Santil Musik'ej, moco cuanquex ta chic rubel xcuauquil li najter chak'rab. ¹⁹ Cutan saken c'a'ru li inc'a' us li naka-rahi ru xbanunquil kajunes. A'an eb a'in: muxox caxar, co'betac yumbetac, ut li xutanalil na'leb, ²⁰ lok'oninc yibanbil dios, tulac, xiq'uil uchinc, pletic, cakalinc, josk'inc, yo'obanc ra xic', cuech'ij ib, po'oc ru pabal, ²¹ socuenc, camsinc ras ritz'in, calac, num cua'ac num uc'ac, ut c'a'ak chic re ru jo' eb a'in. Yoquin cui'chic xyebal ere a'in, usta ac inyehom ajcui' ere, nak li neque'banun re li c'a'ak re ru a'in inc'a' te'rechani lix nimajcual cuanquilal li Dios. ²² Abanan li c'a'ru naxq'ue li Santil Musik'ej sa' li kayu'am, a'an li rahoc, sahil ch'olejil, tuktuquil usilal, cuyuc, chabilal, usilal, tiq'uil ch'olej, ²³ tulanil ut cuyuc ib. Mac'a' junak chak'rab naxye nak inc'a' us xbanunquil a'in. ²⁴ Li ani re chic li Jesucristo, chanchan nak quiq'uehe' chiru cruz lix najter na'leb xban nak ac xcanab xbanunquil chi junaj cua li najter na'leb li quixrahi ru xbanunquil junxil. ²⁵ Cui ac' chic li kayu'am q'uebil ke xban li Santil Musik'ej, chikacanabak kib rubel xcuauquil re nak a'an chic taberesink ke. ²⁶ Mikabanu kib nak k'axal nim kacuanquil ut inc'a' chic chikajosk'i kib ut inc'a' chic chikacakali kib.

6

Chikatenk'a kib chi kibil kib chixnumsinquil li ch'a'ajquial

¹ Ex inherman, mare cuan junak erech aj pabanelil taoc cui'chic chi maçobc. Laex li cuanquex chic rubel xcuauquil li Santil Musik'ej tetenk'a sa' tulanil re nak tacacuuk xch'ol sa' xpabal. Ut cheq'uehak retal chi us le yu'am re nak laex inc'a' tex-alek. ² Chetenk'ahak erib chi ribil erib chixnumsinquil

li ch'a'ajquilal nachal sa' eben. Chi jo'can yokex chixbanunquil li c'a'ru taklanbilex cui' xban li Jesucristo. ³ Li ani naxc'oxla nak nim xcuunquil xjunes rib, li jun a'an yo chixbalak'inquil rib xjunes. ⁴ Li junjunk chixq'uehak retal li c'a'ru naxbanu. Cui us li naxbanu, chisahok' xch'ol riq'uin li c'a'ru naxbanu ut inc'a' tac'oxlak chirix li naxbanu li jun chic. ⁵ Tenebanbil sa' xben li junjunk ribbal chanru lix yu'am. ⁶ Li ani yo chixtzolbal li ratin li Dios, tento ajcui' nak tixtenk'a li ani yo chi tzoloc re. ⁷ Mebalak'i erib. Li Dios inc'a' naru xbalak'inquil. Li c'a'ru narau li junjunk, a'an ajcui' li tix'ol. ⁸ Jo'can ajcui' sa' li kayu'am. Li ani naxbanu li inc'a' us li naxrahi ru xbanunquil xjunes rib, li jun a'an tasachk. Abanan li ani naxbanu li c'a'ru naraj li Santil Musik'ej, li jun a'an tacuank xyu'am chi junelic. ⁹ Jo'can nak mexnitz' chixbanunquil li us. Cui inc'a' nach'inan kach'ol nak tacuulak xk'ehil lao takechani li kak'ajcamunquil. ¹⁰ Jo'can ut chikabanuhak usilal reheb chixjunileb li kas kitz'in nak toj naru xbanunquil, ut k'axal cui'chic takabanu reheb li kech aj pabanelil.

Laj Pablo naxq'ue xcuunquil xcamic li Cristo chiru li cruz

¹¹ Anakuan riq'uin cuuk' yoquin chi tz'ibac eriq'uin. Ilomak xnjnkali letra li yoquin chixtz'ibanquil re nak tenau nak lain xintz'iban re. ¹² Eb li neque'raj xminbal eru xc'ulbal li circuncisión yoqueb chixbanunquil a'an re xnimobresinuil ribeb. Yoqueb chixbanunquil a'an xban nak inc'a' neque'raj te'rahobtesik sa' xc'aba' xcamic li Jesucristo chiru li cruz. ¹³ Ma jun reheb li neque'c'uluc re li circuncisión neque'xbanu ta chi tz'akali naxye sa' li najter chak'rab. Abanan eb a'an te'raj nak laex tec'ul li circuncisión ut neque'xmin eru chixc'ulbal. Cui tebanu li c'a'ru neque'xye, te'xnimobresi ribeb xban nak te'xc'oxla nak cuan xcuunquileb sa' eben. ¹⁴ A'ut lain ma jok'e tinnimobresi cuib injunes. Li c'a'ru ninnimobresi xcuunquil lain, a'an lix camic li Kacua' Jesucristo chiru li cruz. Sa' xc'aba' lix camic li Cristo, camenak chic lix na'leb li ruchich'och' chicuu, ut chanchan nak camenakin lain chiru li ruchich'och'. ¹⁵ Usta takac'ul li circuncisión, usta inc'a', mac'a' chic na-oc cui' chiku xban nak reho chic li Jesucristo. Li k'axal lok' a'an li ac' yu'am li naxq'ue ke li Dios. ¹⁶ A' taxak li tuktuquiall ut li uxtananc u chicuank eriq'uin laex li nequexpaban re li xyalal li yoquin chixyebal. Laex li tz'akal ralar xc'ajol li Dios. ¹⁷ Ut chirix chixjunil a'in ma ani ta chic chich'i'ch'i'ink cue xban nak cuan retalil chicuix li rahobtesic li quinc'ul sa' xc'aba' li Kacua' Jesús. ¹⁸ Ex inherman, a' taxak li rusilal li Kacua' Jesucristo chicuank eriq'uin chejunilex. Jo'can taxak.

Li Hu li Quixtz'iba li San Pablo reheb laj Efeso

Laj Pablo quixtakla xsahil xch'oleb

¹ Lain laj Pablo. Lain x-apóstol li Jesucristo xban nak jo'can quiraj li Dios. Yoquin chixtz'ibanquil li hu a'in eriq'uin laex laj pabanel li cuanqueq Efeso. Yoquin chi tz'ibac eriq'uin chejunilex laex li nequeq'ue ech'ol chixpabanquil li Jesucristo. ² Chicuanq taxak eriq'uin li ruxtan ut li tuktuquil usilal li naxq'ue li Dios li kaYucua' ut li naxq'ue li Kacua' Jesucristo.

Li Cristo na-osobtesin ke

³ Lok'oninbil taxak li Dios lix Yucua' li Kacua' Jesucristo. Xban nak junajo chic riq'uin li Cristo, li Dios naxq'ue chak ke chixjunil li kosobtesinuil li nachal chak sa' choxa. ⁴ Nak toj maji' naxyib chak li ruchich'och' li Dios, ac sic'bil chak ku xban sa' xc'aba' li Jesucristo, re nak t'cak li kayu'am ut mac'a'ak chic kamac. ⁵ Xban nak nocoxra, jo'can nak quixsic' chak ku re nak laako chic li ralal xc'ajol sa' xc'aba' li Jesucristo. Quixbanu chi jo'can xban nak jo'can quiraj. ⁶ Jo'can nak chikalok'onihak ru li Dios xban nak yal chi mañan quiruxtaña ku nak quixtakla chak li Ralal li k'axal raro xban. ⁷ K'axal numtjenak li rusilal li Dios li quixq'ue ke xban nak riq'uin xcamic li Jesucristo, cuan kacolbal ut cuybil sachbil chic li kamac. ⁸ Li rusilal quixq'ue ke chi numtjenak xq'uial ut quixq'ue kana'leb re nak takatau ru li xyalal. ⁹ Ut quixc'utbesi chiku li na'leb li mukmu nak quicuan chak junxil, a' li quiala sa' xch'ol xbanunquil nak quixtakla chak li Jesucristo. ¹⁰ Tacuulak xk'ehil nak tatz'aklok ru chixjunil jo' naraj li Dios. Tixjunaji chixjunil li c'a'ru cuan jo' sa' choxa jo' sa' ruchich'och'. Ut a' chic li Cristo tajolomink re chixjunil. ¹¹ Lao aj judío sic'bil ku xban li Dios chok' ralal xc'ajol sa' xc'aba' li Cristo. A'in qui-uxman xban nak jo'can quiraj li Dios ut xban nak a'an yal re sa' xben chixjunil. ¹² Quixbanu chi jo'can re nak lok'oninbilak ru kaban lao li co-oybenin re li Cristo nak toj maji' nac'ulun sa' ruchich'och'. ¹³ Ut jo'can ajcui' laex li macua'ex aj judío. Nak xerabi li xyalal li colba-ib, laex xepab li Cristo ut xec'ul li Santil Musik'ej, li quiyechi'ic ere chok' retalil nak laex chic li ralal xc'ajol. ¹⁴ Li Santil Musik'ej quiq'uehe' ke chok' retalil nak takac'ul chixjunil li yechi'inbil ke xban li Dios ut tatz'aklok ru li kacolbal. Jo'can nak lok'oninbilak ru riq'uin lix nimal xcuanquilal.

Laj Pablo natijoc chirixeb laj pabanel

¹⁵ Lain xcuabi resil nak chi anchal ech'ol nequepab li Kacua' Jesucristo ut xcuabi resil nak nequera le rech aj pabanelil. ¹⁶ Jo'can nak junelic ninbantioxin chiru li Dios ut yoquin chi tijoc cherix. ¹⁷ Nintijoc chiru li nimajcual Dios, lix yucua' li Kacua' Jesucristo, ut nintz'ama chiru nak tixq'ue ena'leb re nak tetau ru chi tz'akal lix na'leb li Dios ut re nak tetau ru li xyalal chi us. ¹⁸ Nintz'ama chiru li Dios nak tixq'ue ena'leb re nak tetau ru c'a'ru le lok'laj mañan li yoquex chiruybeninuil xban nak sic'bil eru xban li Dios. Tec'ul le mañan erochbeneb chixjunileb laj pabanel. ¹⁹ Ut nintz'ama ajcui' chiru li Dios nak tixq'ue ena'leb re nak tenau nak k'axal nim lix cuanquil sa' kaben lao li nocopaban re. ²⁰ Ut a'an ajcui' lix nimal xcuanquil li quicuaclesin li li Cristo chi yo'yo sa' xyankeb li camenak ut quixc'ojob sa' xnim uk' li Dios aran sa' li santil choxa ut quixq'ue xcuanquil. ²¹ K'axal nim xcuanquil li Cristo sa' xbeneb chixjunileb li ángel ut li maus aj musik'ej ut sa' xbeneb li cuanqueb xcuanquil chi taklanc sa' choxa jo'

sa' ruchich'och'. K'axal nim sa' xben chixjunil li c'a'ak re ru li cuanqueb xcuauquil anakcuan ut chi junelic k'e cutan. ²² Li Dios quixq'ue chixjunil rubel xcuauquil li Cristo ut quixq'ue li Cristo chi jolominc reheb laj pabanel ut a'an chic yal re sa' xbeneb. ²³ Li Cristo a'an li najolominc ke laj aj pabanel. Ut laj chanchano li rok ruk' nak cuanco. Junak li tz'ejualej moco tz'akal ta re ru cui maç'a' lix jolom. Jo'can ajcui' junak li jolomej, cui maç'a' li rok ruk' inc'a' tz'akal re ru. Jo'can nak tento nak li Cristo tajolominc ke laj aj pabanel ut laj cuanko jo' li rok ruk' li Cristo.

2

Colbilo xban ximal ruxtan li Dios

¹ Junxil laex li maçua'ex aj judío chanchan camenakex xban li mausilal ut li maç li xebanu chak. ² Xebanu chak li mausilal sa' ruchich'och' ut xeq'ue erib chi taklac xban laj tza li nataklan sa' xbeneb li maus aj musik'ej. A'an li nataklan sa' xbeneb li neque'k'etoc ratin li Dios. ³ Jo'can ajcui' laj aj judío. Junxil xkabanu chak li mausilal li naxrahi ru li kach'ol xbanunquíl. Xkabanu li inc'a' us li xkaj xbanunquíl kajunes. Jo'can nak tento raj takac'ul xtojbal li kamaç jo' eb chixjunileb li inc'a' neque'raj pabanc. ⁴ Abanan k'axal nim li ruxtan li Dios sa' kaben xban nak k'axal nocoxra. ⁵ Nak toj camenako chak sa' li kamaç, riq'uín lix cuaclijic cui'chic chi yo'yo li Cristo, li Dios quixq'ue ke jun ac' yu'am. Yal xban rusilal li Dios nak colbilo. ⁶ Li Dios corisi chak sa' li najter yu'am nak quixcuaclesi chi yo'yo li Jesucristo ut coxq'ue chi tz'akonc sa' lix nimal xlok'al sa' li santil choxa xban nak reho chic li Cristo. ⁷ Chixjunil li usilal a'in quilajxbanu ke sa' xc'aba' li Jesucristo re nak taç'utunk chi junelic k'e cutan nak k'axal nim li ruxtan. ⁸ Yal nak xepab li Jesucristo ut colbilex chic. Abanan yal xban rusilal li Dios nak colbilex. Maçua' xban eyehom ebanuhom. Yal ematan ban xban li Dios. ⁹ Ma ani chixnimobresi rib xban nak maçua' xban eyehom ebanuhom nak colbilex. ¹⁰ Li Dios coxyo'obtesi ut quixq'ue ke li ac' yu'am sa' xc'aba' li Jesucristo re nak chaibilak li kayu'am xban nak ac jo'can c'ubanbil chak xban li Dios junxil re nak chaibilak li kayehom kabanuhom.

Junaj chic ku laj sa' xc'aba' li Cristo

¹¹ Chijulticok' ere chanru nak quexcuan chak junxil. Laex li maçua'ex aj judío tz'ektanabilex xbaneb laj judío li que'xc'ul li circuncisión, ut eb a'an que'xye nak inc'a' tz'akal ere eru xban nak inc'a' quec'ul li circuncisión. ¹² Junxil moco cuan ta li Cristo eriq'uín ut maçua'ex xcomoneb laj Israel. Inc'a' querabi resil li contrato li quiyehoc resil lix c'ulunic laj Colonel. Cuanquex arin sa' ruchich'och' chi maç'a' c'a'ru yoquex chiroybeninquíl ut chi maç'a' li Dios eriq'uín. ¹³ Junxil li Dios maç'a' eriq'uín. Abanan anakcuan rehcx chic xban nak li Cristo quicam chiru li cruz sa' ec'aba'. ¹⁴ Li Cristo, a'an li naq'uehoc ke li tuktuquíl usilal. Xban li Cristo junaj chic ku laj aj judío eriq'uín laex li maçua'ex aj judío. Xban nak quixmayeja rib sa' kac'aba', li Cristo quirisi li kajosk'il li naramoc re chiku li cuanc sa' xyalal chi kibil kib. ¹⁵ Xban nak quixk'axtesi rib chi çamc, li Cristo quirisi xcuauquil li najter chak'rab. Quixbanu a'an re nak tixjunajiheb ru laj judío riq'uín li maçua'eb aj judío ut junajakeb chic riq'uín li Cristo ut cuankeb chic sa' xyalal chi ribileb rib. ¹⁶ Riq'uín lix camic chiru li cruz li Cristo quirisi lix josk'inquíl kib chi kibil kib ut coxc'am cui'chic sa' usilal riq'uín li Dios ut junaj chic ku. ¹⁷ Nak quic'ulun li Cristo sa' ruchich'och' quixch'olob xyalal li colba-ib li naq'uehoc tuktuquíl usilal. Quixch'olob xyalal chiku laj aj judío li ac nakanau xyalal. Ut

quixch'olob ajcui' xyalal cheru laex li macua'ex aj judío li toj maji' nequenau xyalal. ¹⁸ Anakcuan chikajunilo, usta lao aj judío usta macua'o aj judío, naru nococuan chi sum atin riq'uin li Yucua'bej Dios sa' xc'aba' li Cristo. Ut li junaj chi Santil Musik'ej natenk'an ke. ¹⁹ Ut moco jalanex ta chic anakcuan riq'uineb laj judío. Laex ban chic xcomoneb. Junaj chic eru riq'uineb. Laex chic ralal xc'ajol li Dios. ²⁰ Lao aj pabanel chanchano li rochoch li Dios. Chanchano li pec li na-oc sa' xben li cimientó. Ut li cimientó, a'aneb li apóstol ut li profeta. Abanan li tz'akal xakxo cui' li cab, a'an li Jesucristo. ²¹ Lao aj pabanel chanchano li rochoch li Dios. Junajo chic sa' xc'aba' li Jesucristo li tz'akal xakxo sa' kaben re nak tz'akalak ke ku ut k'axtesinbilo chiru li Dios. ²² Jo'can ajcui' laex. Xban nak rehex chic li Cristo, junajex chic riq'uineb laj pabanel. Ut laex ajcui' li rochoch li Dios xban nak li Santil Musik'ej cuan eriq'uin.

3

Laj Pablo bokbil xban li Dios chi c'anjelac sa' xyankeb li macua'eb aj judío

¹ Lajin laj Pablo. Cuanquin chi prexil xban nak ninc'anjelac chiru li Cristo, ut xban nak ninye resil li colba-ib ere laex li macua'ex aj judío. ² Ac xerabi ta na resil nak tenebanbil sa' inben xban li Dios xyebal ere nak li ruxtan li Dios ere ajcui' laex li macua'ex aj judío. ³ Li Dios, a'an quic'utuc re chicuu li na'leb a'an, li mukmu nak quicuan chak junxil. Ac xintz'iba ca'ch'in resil ere chirix li na'leb a'in. ⁴ Nak teril xsa' li hu li xintz'iba eriq'uin, tenau nak ninnau chi tz'akal li xyalal chirix li Cristo, li mukmu nak quicuan. ⁵ Junxil ma' ani nata'oc ru lix yalal li mukmu nak quicuan chak. Abanan anakcuan li Santil Musik'ej quixc'ut li xyalal chiruheb li profeta ut chiku ajcui' lao lix apóstol. ⁶ Li xyalal li na'leb li mukmu nak quicuan chak junxil, a'an a'in: nak laex li macua'ex aj judío, textz'akonk li colba-ib li naxq'ue li Dios kochben lao aj judío. Laex ralal xc'ajolex ajcui' li Dios ut textz'akonk ajcui' riq'uin li yechi'imbil ke xban li Dios xban nak colbilex chic sa' xc'aba' li Cristo. ⁷ Yal rusilal li Dios nak quixq'ue sa' inben xyebal resil li colba-ib ut quixq'ue incuanquil re tinbanu lix c'anjel. ⁸ Lain li k'axal cubenak incuanquil sa' xyankeb chixjunileb li ralal xc'ajol li Dios. Abanan yal xban lix nimal ruxtan li Dios quixq'ue cue li c'anjel a'in re xch'olobanquil cheru lix yalal chirix lix nimal ruxtan li Cristo ut li lok'laj colba-ib sa' xc'aba' a'an. ⁹ Jo'can nak tento tinch'olob yalak bar li xyalal li na'leb li mukmu nak quicuan chak junxil. Chalen chak sa' xtielajic chixjunil li na'leb a'in mukmu chak xban li Dios li quiyiban re chixjunil. ¹⁰ Li Dios quixbanu chi jo'ca'in re xc'utbal chiruheb li cuanqueb xcuauquil sa' choxa nak numtajanek xna'leb li Dios. Te'xnau nak numtajanek xna'leb nak te'xq'ue retal nak quixjunaji ruheb laj judío riq'uineb li macua'eb aj judío chok' ralal xc'ajol. ¹¹ Ac c'ubambil chak junxil chi jo'ca'in xban li Dios nak li Kacua' Jesucristo tixjunajiheb ru li ralal xc'ajol. ¹² Xban nak ac xkapab li Cristo, junajo chic riq'uin. Jo'can nak nakanau chi tz'akal nak naru chic tocuank chi sum atin riq'uin li Dios. ¹³ Jo'can nak nintz'ama cheru nak inc'a' tach'inank ech'ol xban nak yoquin chixc'ulbal li raylal xban xyebal ere xyalal li colba-ib. Chisahok' ban ech'ol xban nak re etenk'anquil xinc'ul li raylal.

C'ajo' nocoxra li Cristo

¹⁴ Nak ninc'oxlac chirix lix na'leb li Dios riq'uin chixjunil li quixbanu, nincui'ib cuib ut ninbantioxin chiru li Acuabej Dios. ¹⁵ Li Acuabej Dios a'an xyucua'eb chixjunil li cuanqueb sa' choxa, jo' ajcui' sa' ruchich'och'. ¹⁶ K'axal nim li rusilal li Dios. Jo'can nak nintz'ama chiru nak li Santil Musik'ej

chiq'uehok eçuanquuil ut xcacuilal eç'ol sa' le pabal. ¹⁷ Ut nintz'ama ajcui' chiru nak chicuank le pabal re nak cuank li Cristo eriq'uin chi tz'akal. Tetau taxak xcacuil le ch'ol riq'uin xrabal li Dios jo' eb ajcui' le ras erjt'in. ¹⁸ Nintz'ama chiru li Dios nak chetauhak taxak ru, jo' ajcui' chixjunileb laj pabanel, nak k'axal nim li karabal xban li Cristo. Numtajanak lix rahom li Cristo. Mac'a' xbisbal ut ma ani tata'ok ru lix lok'al lix rahom li Cristo. ¹⁹ Ma jok'e taruk takatau ru chi tz'akal lix rahom xban nak mac'a' roso'jic ut k'axal lok'. Nintz'ama chiru li Dios nak tixc'ut cheru nak c'ajo' nequexra li Cristo, ut chinujak taxak le ch'ol riq'uin xnimajcual xcuanquil. ²⁰ Lok'oninbil taxak li Dios li k'axal nim xcuanquil chixbanunquil nabal chiru li nakatz'ama. Riq'uin xnimajcual nac'anjelac sa' li kam ut k'axal nim xcuanquil chixbanunquil nabal chiru li nakoybeni. ²¹ Lok'oninbil taxak li Dios anakcuan ut chi junelic k'e cutan kaban lao aj pabanel xban nak junajo chic riq'uin li Cristo. Jo'can taxak.

4

Sa' xc'aba' li Cristo junajo chic lao aj pabanel

¹ Lain cuanquin chi prexil xban xyebal resil li Kaçua' Jesucristo. Lain xintijoc cherix ut anakcuan nintz'ama cheru nak çabilak le yu'am jo' xc'ulubeb li ralat xc'ajol li Dios. ² Checubsihak erib ut chexcuank sa' tulanil ut çabilakex. Checuyak erib chi ribil erib ut cherahak erib chiribil erib. ³ Junajak chic eru xban li Santil Musik'ej. Jo'can nak q'uehomak eç'ol chi cuanc sa' usilal chi ribil erib re nak chexcuank chi junaj eru. ⁴ Lao li ralat xc'ajol li Dios chanchan nak jun chi tz'ejcualaj nak cuanco ut jun ajcui' li Santil Musik'ej naberese ke. Jun ajcui' li kamatan li nakayo'oni sa' comonil, lao li sic'bil ku. ⁵ Jun ajcui' li Kaçua' cuan ut jun ajcui' li kapabal cuan ut jun ajcui' li cubi ha' nakac'ul sa' xc'aba' li Cristo. ⁶ Jun ajcui' li Dios cuan ut a'an li kaYucua' chikajunilo. A'an li cuan sa' kaben chikajunilo. A'an li nac'anjelac sa' li kam chikajunilo ut a'an ajcui' li cuan kiq'uin chikajunilo. ⁷ Abanan jalan jalank li kalok'laj matan li naq'uehe' ke chikajunkal xban li Cristo, a' yal chanru naraj a'an. ⁸ A'in qui-uxman jo' tz'ibanbil sa' li Santil Hu, li naxye chi jo'ca'in:

Nak quitake' sa' choxa li Kaçua', quixc'utbesi nak a'an k'axal nim xcuanquil sa' xben laj tza jo' ajcui' sa' xbeneb li neque'c'anjelac chiru. Ut li Kaçua' quixq'ue xmataneb li ralat xc'ajol. (Sal. 68:18)

⁹ ¿C'a'ru xyalal nak naxye nak li Kaçua' quitake' sa' choxa? Naraj naxye nak xben cua quicube tak'a sa' li ruchich'och'. ¹⁰ Quicube sa' ruchich'och' ut quitake' ajcui' toj sa' li Santil Choxa re nak tacuank xcuanquil sa' xben chixjunil sa' choxa jo' ajcui' sa' ruchich'och'. ¹¹ ¿C'a'ru xyalal nak tz'ibanbil nak quixq'ue xmataneb li ralat xc'ajol li Dios? Naraj naxye nak cuan li quiq'uehe' xmataneb chi c'anjelac jo' apóstol. Cuan li quiq'uehe' xmataneb chi c'anjelac jo' profeta. Cuan li quiq'uehe' xmataneb chixyebal resil li colba-ib. Cuan li quiq'uehe' xmataneb chi c'amoc be chiruheb laj pabanel ut cuan ajcui' li quiq'uehe' xmataneb chixc'utbal lix yalal chiruheb laj pabanel. ¹² Quiq'uehe' xmataneb re nak tz'akalakeb ru sa' xpabaleb ut re nak te'c'anjelac chiru li Dios ut re nak te'xtenk'aheb laj pabanel chi q'uiç sa' xpabaleb. ¹³ Q'uebil ke li kamatan re nak takatenk'aheb laj pabanel chi cacuuc sa' lix pabaleb toj tacuulak xk'ehil nak tatz'aklok ke ku riq'uin lix xuanquil li Cristo ut junajak chic ku xban nak nakapab li Ralat li Dios. Tz'akalak ke ku jo' li Cristo tz'akal re ru. ¹⁴ Moco jo'cakex ta chic li coc'al. Li coc'al neque'xpab li c'a'ak re ru neque'yehe' re. Laex macua'ex chic

coc'al. Jo'can nak meq'ue erib chi balak'ic xbaneb li neque'balak'in riq'uin jalanil tijleb. ¹⁵ Ut chixjunil li nakabanu, chikabanu xban nak nocorahoc. Ut junajak chic ku riq'uin li Cristo. ¹⁶ Li Cristo, a'an najolomin ke lao aj pabanel ut lao jo' li rok ruk'. Li Cristo, a'an nac'amoc be chiku ut junajo chic. Chikajunilo chikatenk'a kib chi kibil kib re nak toq'uik sa' li kapabal xban nak nakara kib chi kibil kib. ¹⁷ A'an a'in li tento tinye ere. Sa' xc'aba' li Kacua' ninye ere nak mebanu chic jo' neque'xbanu li inc'a' neque'paban. Eb a'an neque'xq'ue xch'ol chirix li mac'a' na-oc cui'. ¹⁸ Inc'a' neque'xtau xyalal. Mac'a' riq'uibeb li junelic yu'am li naxq'ue li Dios xban nak inc'a' neque'raj xnaubal li xyalal ut k'axal cauheb xch'ol. ¹⁹ Inc'a' neque'xnu xutanac ut neque'xq'ue rib chixbanunquil li mausilal. Neque'xbanu chixjunil li jo' majo'il aj na'leb. ²⁰ Abanan laex aj pabanel macua' li na'leb a'an li xetzol riq'uin li Cristo. ²¹ Laex xerabi li quixye li Cristo ut xetzol li xyalal li quixc'ut cheru. ²² Jo'can nak chetz'ektana chi junaj cua le najter na'leb. Meq'ue chic erib chi balak'ic xban li mausilal li quixrahi ru le ch'ol junxil. ²³ Ut ac'obresinbilak taxak le ram ut le c'a'ux. ²⁴ Ac'obresinbilak le yu'am ut chexcuank taxak jo' naraj li Dios. Santakex ut chabilakex xban nak nequenau chic li xyalal. ²⁵ Inc'a' chic chextic'ti'ik. Sa' xyalal ban tex-atinak chi ribil erib xban nak junaj chic ku ut kacha'al chic kib chi kibil kib. ²⁶ Cuan nak nequexjosk'o'. Abanan menumsi li cutan chi toj cuan le josk'il sa' le ch'ol re nak inc'a' texmacobk xban. ²⁷ Moco yal xban ta le josk'il nak teg'ue erib chi alec xban laj tza. ²⁸ Li ani na-elk'ac inc'a' chic chi elk'ac. Chi c'anjelac ban sa' xyalal re nak cuank li c'a'ru tixsi reheb li mac'a' cuanqueb re. ²⁹ Mex-atinac yibru aj atin. Riq'uin ban chabil atin tex-atinak re nak te'xq'ue retal li ani yoquex cui' chi atinac ut tetenk'aheb. ³⁰ Mebanu chic li inc'a' us re nak inc'a' tarahok' xch'ol li Santil Musik'ej eban. Li Dios quixq'ue ere li Santil Musik'ej chok' eretalil nak rehcx chic a'an toj sa' li cutan nak tixtz'akobresi le colbal. ³¹ Isihomak sa' le ch'ol chi junaj cua li c'ahinc, li josk'il, ut li po'oc ib. Jo'can ajcui' li chokinc ib ut li majecuanc. Checanabak chi junaj cua chixjunil li mausilal. ³² Chabilakex cheribil erib. Cheruxtana eru chi ribil erib. Ut checuyak emac chi ribil erib jo' nak li Dios quixcuy emac sa' xc'aba' li Cristo.

5

Tento te'cuank sa' xyalal li ralal xc'ajol li Dios

¹ Laex chic li ralal xc'ajol li Dios ut raroquex xban. Jo'can nak chetzolak erib riq'uin li Dios re nak tebanu jo' naraj a'an. ² Cherahak erib chi ribil erib jo' nak coxra lao li Cristo ut quixmayeja rib chiru li cruz re kacolbal. Ut li Dios quisaho' xch'ol riq'uin xban nak chanchan li sununquil ban chiru. ³ Laex chic li ralal xc'ajol li Dios. Jo'can nak inc'a' chic chi cuank li co'betac yumbetac sa' eyank chi moco tex-atinak chirix. Inc'a' tacuank li mausilal sa' eyank. Ut inc'a' terahi ru li jalan aj e. Moco xc'ulub ta chic laj pabanel xbanunquil a'an. ⁴ Inc'a' tayemank sa' eyank li yibru aj atin chi moco li tontil atin chi moco cheye li mayehc' naraj xban nak inc'a' us. Chexbantioxink ban chiru li Dios. ⁵ Tenau chi tz'akal nak li neque'xbanu mausilal inc'a' te'tz'akonk sa' lix nimajcual xcuanquilal li Cristo ut li Dios. Chi moco eb laj co'bet ut eb laj yumbet chi moco li neque'xrahi li jalan aj e xban nak li mac a'an juntak'et riq'uin xlok'oninuil li jalanil dios. ⁶ Meq'ue erib chi balak'ic xbaneb li neque'atinac ut neque'xye nak moco nimla mac ta xbanunquil li c'a'ak re ru a'in, xban nak nachal xjosk'il li Dios sa' xbeneb li neque'k'etoc re li ratin. ⁷ Mejunaji erib riq'uibeb a'an xban nak inc'a' useb xna'leb. ⁸ Junxil quexcuan chak sa' xk'o'jyinal ru li mac. Abanan, anakcuan rehcx

chic li Kaꝓua' ut cuanquex chic sa' xcutan saken. Jo'can nak chexcuank sa' xyalal. ⁹ Li ani quicutanobresic lix ch'ol xban li Dios naxnau lix yalal ut nacuan sa' chabilal ut sa' tiꝓuilal. ¹⁰ Chetauhak xyalal li c'a'ru naraj li Kaꝓua'. ¹¹ Mejunaji chic erib riꝓ'uin eb li inc'a' neque'xnau xyalal ut neque'xbanu li c'a'ak re ru maꝓ'a' na-oc cui'. Laex ban chic texch'olobank re li xyalal chiruheb nak inc'a' us yoꝓueb. ¹² Xutaꝓal chok' ke lao atinac chirix li inc'a' us li neque'xbanu chi mukmu. ¹³ Nak taꝓh'olobak li xyalal chiruheb na-el chi cutanꝓuil nak inc'a' us li yoꝓueb ut neque'xꝓ'ue ajcui' retal eb a'an nak inc'a' us li neque'xbanu. ¹⁴ Nak taꝓutanobresic lix ch'oleb cutan saken chic chanru nak cuanqueb. Jo'ca'in tz'ibanbil sa' li Santil Hu: Ajsi acuu, laꝓ li yoꝓat chi cuarc. Matcana chi camenak sa' la maꝓ, ut li Cristo tixcutanobresi la c'a'ux. (Is. 60:1) ¹⁵ Cheꝓ'uehak retal chanru le yu'am. Mebanu jo' neque'xbanu li inc'a' useb xna'leb. Chebaꝓuhak ban jo' neque'xbanu li cuanqueb xna'leb. ¹⁶ Menumsi li cutan chi maꝓ'a' xyalal. Chebanu ban li us nak taꝓuk tebanu xban nak ch'a'aj li cuanc sa' eb li cutan a'in. ¹⁷ Jo'can nak moco jo'cakex ta li maꝓ'a'eb xna'leb. Chetauhak ban ru li c'a'ru naraj li Kaꝓua'. ¹⁸ Mexcala chic xban nak napo'oc ch'olej. Chinujak ban le ch'ol riꝓ'uin li Santil Musik'ej. ¹⁹ Cheserak'i chi ribil erib lix lok'al li Dios, ut teye li salmos ut texbichank re xlok'oninquil li Kaꝓua'. Chexbichank ut chelok'oni li Kaꝓua' chi anchal ech'ol. ²⁰ Ut junelic chexbantioxink chiru li Acuabej Dios sa' xc'aba' li Kaꝓua' Jesucristo riꝓ'uin chixjunil li c'a'ru nequec'ul.

Cheꝓabak erib chi ribil erib

²¹ Cheꝓabak erib chi ribil erib re xꝓ'uebal xlok'al li Cristo. ²² Ex ixakilbej, cheꝓabak le belom jo' nak nequeꝓab li Kaꝓua' Jesucristo. ²³ Chexꝓabank chiru xban nak a'an li najolomin re li rixakil jo' nak li Cristo najolomin reheb laj ꝓabanel. Abanan li Cristo, a'an ajcui' laj Colol reheb laj ꝓabanel ut eb laj ꝓabanel jo' li rok ruk' li Cristo. ²⁴ Jo' nak neque'ꝓaban laj ꝓabanel chiru li Cristo, jo'can ajcui' nak li ixakilbej teꝓabank chiruheb lix belom riꝓ'uin chixjunil. ²⁵ Jo'can ajcui' laex belomej, cherahak le rixakil jo' nak li Cristo quixraheb laj ꝓabanel nak quixk'axtesi rib chi camc re xcolaleb. ²⁶ Li Jesucristo quixmayeja rib re xsantobresinquileb laj ꝓabanel riꝓ'uin nak te'xc'ul li cubi ha' sa' xc'aba' li Cristo ut riꝓ'uin li raꝓin li Dios. ²⁷ Li Cristo quixbanu a'an re nak tixc'uleb li ralal xc'ajol chi k'axal nim xlok'al, chi maꝓ'a' xmaꝓ ut chi maꝓ'a' xpaltil chiru. ²⁸ Jo'can ajcui' eb li belomej, tento nak te'xra li rixakil jo' nak neque'xra ribeb a'an. Li ani naxra li rixakil, naxra ajcui' rib a'an. ²⁹ Maꝓ ani xic' naril rib. Naxra ban rib ut naxch'olani rib jo' nak li Cristo naxra ut naxch'olani li ralal xc'ajol. ³⁰ Nocoxra ut nocoril xban nak lao jo' rok ruk' li Cristo. Lao jo' lix quix'uel ut jo' lix bakel. ³¹ Li belomej ut li ixakilbej junaj chic ruheb jo' tz'ibanbil sa' li Santil Hu li naxye chi jo'ca'in: Nak taꝓumlak, li cuꝓik tixcanab lix na' xyucua' re nak tixlak'ab rib riꝓ'uin li rixakil. Ut junajak chic ruheb chi xca'bichaleb. ³² K'axal lok' li xyalal li xna'leb a'in. Abanan lain ninye ere nak naxc'ut ajcui' chiku nak lao aj ꝓabanel junajo chic riꝓ'uin li Cristo. ³³ Jo'can nak tinye cui'chic ere nak li belomej chixrahak li rixakil jo' nak naxra rib a'an. Ut li ixakilbej chix-oxlok'i lix belom.

6

¹ Jo'can ajcui' laex, alalbej. Chex-abink chiru le na' eyucua' sa' xc'aba' li Kaꝓua' xban nak a'an k'axal us xbanunꝓuil. ² Che-oxlok'i le na' eyucua'. A'an a'in lix ben kataklanꝓuil cuan c'a'ru yechi'inbil ke cui takabanu a'an. ³ Ut li yechi'inbil ke, a'an a'in: Cui neque-oxlok'i le na' eyucua', k'axal

us tex-êlk ut tãnjatok' ru le yu'am li tixq'ue li Dios arin sa' ruchich'och'.
⁴ Ex na'bej ex yucua'bej, meçhik' xjosk'ileb le rala ec'ajol chi mac'a' rajbal. Cheq'uiresihakeb ban sa' xyalal riq'uin xk'usbaleb ut riq'uin xtijbaleb sa' xc'aba' li Kacua' Jesucristo. ⁵ Ex aj c'anjel, chex-abink chiruheb le patrón arin sa' ruchich'och'. Chexc'anjelak chiruheb chi anchal ech'ol ut sa' xyalal jo' nak nequexc'anjelac chiru li Cristo. ⁶ Moco toj yokeb ta cherilbal nak tebanu le c'anjel re nak sahak xch'ol le patrón eriq'uin. Chexc'anjelak ban chiru le patrón jo' nak yokex chi c'anjelac chiru li Cristo. Chi anchal ech'ol chebanuhak li naraj li Dios. ⁷ Chexc'anjelak chi anchal ech'ol jo' nak yoquex chi c'anjelac chiru li Kacua' ut macua' chiruheb li cujnk. ⁸ Laex nequenau nak cui chabil tebanu chejunjankal a'an ajcui' li rekaj tec'ul riq'uin li Kacua' usta utan epatrón usta mac'a'. ⁹ Jo'can ajcui' laex patrón, jo' nak laj c'anjel nac'anjelac chi anchal xch'ol cheru, jo'can ajcui' nak laex tetaklaheb sa' xyalal. Canabomak xtaklanquileb sa' josk'il. Nequenau nak laex cuan epatrón sa' choxa jo' ajcui' eb a'an. Li patrón, a'an li Kacua' Dios ut a'an moco jun ta sa taril ut jun ta xic' taril.

Li kac'anjelebal q'uebil ke xban li Dios

¹⁰ Toj cuan c'a'ru nacuaq xyebal ere ut a'an a'in: Che'cacuubresik le ch'ol sa' le pabal riq'uin lix nimal xcuanguilal li Kacua' li cuan eriq'uin. ¹¹ Jo'can ut chetikibak erib riq'uin chixjunil lix c'anjelebal li Dios re nak xaxxokex chi tz'akal ut yokex chixcolbal erib chiru laj tza nak yok chebalak'inquil. ¹² Moco yoco ta chixyalbal kak'e riq'uin cujnk. Yoco ban chi pletic riq'uin q'uila pay ru chi maus aj musik'ej li cuanqueb xcuanguil sa' eb li cutan a'in, li neque'taklan sa' ik' ut sa' li ruchich'och' li cuan sa' xk'o'jyjal ru li mac. ¹³ Xban nak nocopletic riq'uin li maus aj musik'ej, jo'can nak cuank eriq'uin chixjunil le c'anjelebal li q'uebil ere xban li Dios re nak cauhak erib chixcolbal erib chiru laj tza yalak jok'e tixyal eralenquil. ¹⁴ Xaxxokex bi' chi cau. A'an a'in li tac'anjelak cheru re xcolbal erib chiru laj tza. Li yal tac'anjelak jo' xc'amal esa' ut li tiq'uil ch'olej tac'anjelak jo' li ch'ich' naramoc re le ch'ol. ¹⁵ Cauresinbilakex re xyebal resil li colba-ib ut a'an tac'anjelak ere jo' exab cherok. ¹⁶ Chirix chixjunil a'in chicuank ajcui' le pabal. Ut a'an tac'anjelak ere jo' le ramleb ch'ich'. Le pabal tac'anjelak re xcolbal erib chiru laj tza nak tixyal eralenquil. Riq'uin a'in taruk techup xxamlel lix tzimaj laj tza. ¹⁷ Li colba-ib tac'anjelak ere jo' nak nac'anjelac re li soldado lix tz'appal xjolom. Li Santil Musik'ej tixc'ut cheru li ratin li Dios. A'an tac'anjelak cheru jo' nak nac'anjelac li ch'ich' chiru li soldado. ¹⁸ Ut yo'on cuankex. Junelic chextijok jo' naxc'ut cheru li Santil Musik'ej. Junelic chextz'amank chiru chi anchal ech'ol nak li Dios tatenk'ank ere. Ut chetz'ama chiru nak tixtenk'ahab chixjunileb li rala xc'ajol li Dios. ¹⁹ Ut chextijok ajcui' chicuix lain re nak chixq'ue taxak cuatin li Dios re xyebal resil li colba-ib ut chixq'ue taxak xcacuual inch'ol chixyebal resil nak li colba-ib reheb ajcui' li macua'eb aj judo. ²⁰ Taklanbilin xban li Dios chixyebal li resila a'an. Ut xban xyebal resil li colba-ib nak cuanquin chi prexil anakuan. Chextijok chicuix re nak tinch'olob xyalal li colba-ib chi cau inch'ol jo' q'uebil cue xbanunquil xban li Dios.

Laj Pablo naxq'ue xsahil xch'oleb

²¹ Ninc'oxla nak teraj tenau chanru cuanquin ut c'a'ru yoquin chixbanunquil. Jo'can nak yoquin chixtaklanquil laj Tiquico eriq'uin. A'an jun li herman k'axal raro kaban, ut chabil aj c'anjel chiru li Dios. A'an tixye ere chanru cuanquin. ²² Yoquin chixtaklanquil laj Tiquico eriq'uin re xserak'inquil ere chanru cuanco arin. Ut nak tenau chanru cuanco,

chic'ojlak taxak ech'ol riq'uin a'an. ²³ A' taxak li tuktuquul usilal li naxq'ue li Acuabej Dios ut li naxq'ue li Kacua' Jesucristo chi cuank eriq'uin laex chejunilex aj pabanel. Ut chi cuank taxak eriq'uin li rahoc ib ut lix cacuilal ech'ol sa' le pabal. ²⁴ Chi cuank taxak li rusilal li Dios eriq'uin chejunilex laex li nequexrahoc re li Kacua' Jesucristo chi anchal ech'ol ut chi junelic. Jo'can taxak.

Li Hu li Quixtz'iba li San Pablo reheb laj Filipos

Laj Pablo quixtakla xsahil xch'oleb

¹ Laj laj Pablo. Yoquin chixtz'ibanquil li hu a'in cuochben laj Timoteo. Lao aj c'anjel chiru li Jesucristo. Li hu a'in, a'an ere laex li nequexc'amoc be sa' xyankeb laj pabanel aran Filipos ut ere ajcui' laex li nequextenk'an sa' li c'anjel aran. Ut ere ajcui' chejunilex laex aj pabanel aran Filipos, li junaj chic eru riq'uin li Jesucristo. ² Chicuan̄k taxak eriq'uin li usilal ut li tuktuquilal li naxq'ue li Dios li kaYucua' ut li naxq'ue li Kaçua' Jesucristo.

Laj Pablo quitjoc chirixeb laj pabanel

³ Rajlal nak nequexjultico' cue, ninbantioxi chiru li Dios. ⁴ Ut junelic nintjoc cherix chi sa sa' inch'ol. ⁵ Nasaho' sa' inch'ol xban nak chalen nak xexpaban xeq'ue ech'ol chintenk'anquil xyebal resil li colba-ib toj chalen anakuan. ⁶ Chalen nak xexpaban, li Dios yo chi c'anjelac eriq'uin. Ut ninnau nak junelic textenk'a toj tatz'aklok ru le pabal sa' li cutan nak tol-elk cui'chic li Jesucristo. ⁷ Xban nak nequeq'ue ech'ol chi c'anjelac chiru li Cristo, jo'can nak junelic nequexinc'oxla ut k'axal sa sa' inch'ol eriq'uin. Laex xextz'akon cuochben riq'uin li usilal li naxq'ue li Cristo. Xextz'akon ajcui' cuiq'uin riq'uin rahil ch'olej nak cuanquin chi prexil ut xextz'akon ajcui' cuiq'uin nak yoquin chixch'olobanquil xyalal li colba-ib reheb li cuanqueb xcuanquil re nak te'xnau nak tz'akal yal li c'a'ru yoçoch chixch'olobanquil. ⁸ Li Dios naxnau nak c'ajo' nequexinra. Ut li rahoc a'in, a'an q'uebil cue xban li Cristo. ⁹ Ut li nintz'ama chiru li Dios nak nintjoc cherix, a'an a'in: nak k'axal cui'chic cherahak erib chi ribil erib. Ut chinumtak taxak li rahoc ut chiq'uehek' taxak ena'leb re xtaubal bar cuan li tz'akal yal. ¹⁰ Nintz'ama chiru li Dios nak textenk'a re nak junelic tenau c'a'ru li us ut c'a'ru li inc'a' us. Ut ticak taxak le ch'ol re nak ma' ani taçuech'ink erix chalen nak tol-elk cui'chic li Jesucristo. ¹¹ Ut riq'uin li chaibilal li q'uebil ere xban li Jesucristo, nequeq'ue xlok'al li Dios.

Li Dios quixsuk'isi chok' usilal li raylal li quixc'ul laj Pablo

¹² Ex inherman, nacua'j nak tenau nak chixjunil li yoquin chixc'ulbal, a'an yo chi c'anjelac re xyebal resil li colba-ib yalak bar. ¹³ Cuan xyalal nak xine'xq'ue sa' tz'alam. Eb laj ilol prex jo'queb ajcui' chixjunileb li cuanqueb sa' li palacio neque'xnau nak cuanquin sa' tz'alam xban nak ninc'anjelac chiru li Cristo. ¹⁴ Ut nabaleb laj pabanel xe'xcacuubresi xch'oleb sa' xpabaleb sa' xc'aba' li Kaçua' xban nak xe'xq'ue retal nak cau inch'ol usta cuanquin chi prexil sa' xc'aba' li Jesucristo. Ut neque'xch'olob xyalal li ratin li Dios chi maç'a' xxiuheb. ¹⁵ Yal nak cuan li neque'xye resil li Cristo yal xban nak niquine'xcakali ut niquine'xcuech'i. Abanan cuan ajcui' li neque'xye resil li Cristo chi anchal xch'oleb ut sa' xyalal. ¹⁶ Neque'xch'olob xyalal xban nak niquine'xra ut neque'xnau nak cuanquin chi prexil xban nak ninq'ue xcuanquil li colba-ib. ¹⁷ Aban li jun ch'ol chic neque'xye resil li Cristo yal xban nak cuan c'a'ru neque'xra ut moco chi anchal ta xch'oleb neque'xbanu. Neque'xbanu chi jo'can yal re xq'uebal xrahil inch'ol nak cuanquin chi prexil. ¹⁸ Abanan maç'a' naxye. Usta chi anchal xch'oleb, usta inc'a', yoqueb chixyebal resil li Jesucristo. Ut nasaho' inch'ol riq'uin a'an. ¹⁹ Ut junelic taçahok' inch'ol xban nak ninnau nak yoquex chi tijoc chicuix. Ut li Santil

Musik'ej natenk'an cue. Jo'can nak nasaho' sa' inch'ol xban nak ninnau nak chixjunil li ninc'ul, li Dios tixsuk'isi chok' usilal chok' cue. ²⁰ Inc'a' nacuaaj xxutanobresinquit cuib riq'uin xbanunquit li c'a'ak re ru inc'a' us. Nacuaaj ban nak junelic cuank xcacuiall inch'ol re xyebal resil li Jesucristo. Nacuaaj xq'uebal xlok'al li Cristo anakuan ut chi junelic riq'uin li ninbanu ut riq'uin ajcui' lin camic. ²¹ Lain, nak toj yo'yoquin, cuanquin chi sum atin riq'uin li Cristo. Abanan k'axal raj cui'chic us li camc chok' cue xban nak ninnau nak tinxic riq'uin. ²² Abanan cui li Dios toj tixq'ue inyu'am sa' ruchich'och' re nak tinc'anjelak chiru li Kacua', inc'a' ninnau bar cuan li k'axal us chok' cue. ¿Ma us nak yo'yoquin malaj ut us nak tincamk? ²³ Ch'a'aj chok' cue xnaubal bar cuan li k'axal us. Nacuaaj raj camc re nak tinxic riq'uin li Cristo. A'an raj li k'axal us chok' cue lain. ²⁴ Abanan chok' ere laex, us nak yo'yokin. ²⁵ Ninnau chi tz'akal nak naru texintenk'a. Jo'can nak ninnau nak tincuan sa' eyank re etenkanquit. Texintenk'a re nak sahak sa' ech'ol nak yokex chi q'ujc sa' le pabal. ²⁶ Ninc'oxla nak tincualak cui'chic eriq'uin ut nak teril cui'chic cuu, tasahok' sa' le ch'ol sa' xc'aba' li Jesucristo. ²⁷ Li k'axal lok' xbanunquit, a'an a'in: Chexcuank sa' xyalal riq'uibeb le ras eritz'in jo' ec'ulub xban nak laex ac xepab li Jesucristo. Usta cuanquin eriq'uin, usta ma anihin, nacuaaj rabinquit resil nak cau ech'ol sa' le pabal. Ut nacuaaj ajcui' rabinquit nak junaj le ch'ol ut junaj ec'a'ux chixyebal resil li colba-ib sa' xc'aba' li Jesucristo. ²⁸ Inc'a' texxucuak chiruheb li xic' neque'iloc ere. Cui laex inc'a' texxucuak, eb a'an te'xq'ue retal nak laex texcolek' ut eb a'an te'sachek'. Ut li Kacua' Dios, a'an li tac'utuk re li na'leb a'in chiruheb. ²⁹ Q'uebil ere le matan xban li Dios re xpabanquit li Cristo. Ut moco ca'aj cui' ta tec'ul li rusilal re xpabanquit. Usilal aj ban cui' nak q'uebil ere xc'ulbal li raylal sa' xc'aba' li Cristo. ³⁰ Ac xeril chanru nak ninyal ink'e chixq'uebal xcuanquit li colba-ib ut nequerabi resil nak toj yo'yoquin ajcui' xyalbal ink'e. Ut nequeyal ajcui' ek'e laex xq'uebal xcuanquit li colba-ib cuochbenex.

2

Chetzolak erib riq'uin li Cristo

¹ Anakuan nacuaaj xpatz'bal ere: ¿Ma cuan xyalal chok' ere laex nak xepab li Cristo? ¿Ma c'ojc'ol ech'ol xban nak raroqex xban li Cristo? ¿Ma junaj ru le ch'ol chejunilex xban li Santil Musik'ej li cuan eriq'uin? ¿Ma nequera erib chi ribil erib? ¿Ma nequeruxtana eru chi ribil erib? ² Anakuan nintz'ama ajcui' cheru nak junajak taxak ech'ol re nak junelic sahak sa' inch'ol eriq'uin. Cherahak erib chi ribil erib ut chexcuank sa' xyalal chi ribil erib ut junajak taxak le c'a'ux. ³ Inc'a' tebanu c'a'ak re ru yal xban nak cuan li c'a'ru tera, chi moco tebanu yal re xnimobresinquit erib. Checubsihak ban erib. Mec'oxla nak k'axal nim ecuanquit chiruheb le ras eritz'in. ⁴ Mexc'oxlac ca'aj cui' chirix c'a'ru us chok' ere laex. Chexc'oxlac aj ban cui' chirix li us taek chok' reheb le ras eritz'in. ⁵ Chetzolak erib riq'uin li Jesucristo re nak juntak'etak le na'leb riq'uin lix na'leb a'an. ⁶ Li Jesucristo tz'akal Dios, aban inc'a' quic'oxlac xcanabanquit lix lok'al. ⁷ Quixcanab ban lix lok'al nak quic'ulun sa' ruchich'och'. Tz'akal cuink jo' lao nak quiyo'la sa' ruchich'och' ut quic'anjelac sa' kayank. ⁸ Ut nak quicuan sa' ruchich'och' quixcubi rib ut quixbanu li quiraj li Dios toj retal nak quicam chiru li cruz. ⁹ Ut xban nak quixbanu chi jo'can, li Dios quixq'ue xnimal xlok'al. "Kacua'" quixq'ue chok' xc'aba' xban nak a'an li k'axal lok' ut li k'axal nim xcuanquit. ¹⁰ Li Dios quixbanu a'an re nak chixjunileb te'xcuik'ib rib chixlok'oninquit li Kacua' Jesucristo nak te'rabi lix c'aba'. Te'xcuik'ib ribeb chixlok'oninquit

chixjunileb li cuanqueb sa' choxa ut li cuanqueb sa' ruchich'och' jo'queb ajcui' li camenakeb. ¹¹ Li Dios quixq'ue xlok'al li Jesucristo re nak chixjunileb te'xh'olob xyalal riq'uin xtz'umal re nak li Jesucristo, a'an li Kaçua' ut te'xq'ue xlok'al li Acuabej Dios.

Eb laj pabanel, a'anakeb lix cutan xsaken li ruchich'och'

¹² Ex inherman, raroquex inban, junelic xexpaban chicu u nak cuanquin chak eriq'uin. Jo'can ajcui' tebanu anakuan nak ma anihin eriq'uin. Junelic chexc'oxlak chirix le colbal. Cheq'uehak taxak ech'ol chixbanunquil li c'a'ru naraj li Kaçua' re nak tatz'aklok ru le colbal. ¹³ Li Dios yo chi c'anjelac eriq'uin ut yo chetenk'anquil re nak sa' le ch'ol taalak chak xbanunquil li c'a'ru naraj ut a'an ajcui' naq'uehoc eçuanquil chixbanunquil. ¹⁴ Meçhoki erib ut meçuech'i erib. Chebanuhak ban chixjunil sa' xyalal. ¹⁵ Chebanuhak chixjunil sa' xyalal re nak chic'utunk nak chi anchal ech'ol nequexpaban ut re nak ma ani taatinak cherix. Laex ralal xc'ajol li Dios ut mac'a'ak emac usta cuanqueb sa' xyankeb laj mac, li inc'a' useb xna'leb. Ut xban nak tic ech'ol, nak yokex chixyebal resil li colba-ib chiruheb, chiruheb chanchanakex li chahim li nalemtz'un chiru k'ojoyin. ¹⁶ Cui jo'can yokex, c'ajo' nak tasahok' sa' inch'ol eriq'uin nak tol-elk cui'chic li Jesucristo. Tasahok' inch'ol xban nak tinnau nak cuan rajbal chixjunil li xinbanu nak xinc'anjelac sa' eyank. ¹⁷ Cui tincamsik xban nak xexintenk'a sa' le pabal, mac'a' naxye. Tasahok' sa' inch'ol nak textz'akonk laex riq'uin li sahil ch'olejil li tinc'ul lain. ¹⁸ Chisahok' taxak sa' kach'ol sa' comonil.

Laj Timoteo ut laj Epafrodito taklanbileb xban laj Pablo riq'uineb laj Filipos

¹⁹ Cui li Kaçua' Jesucristo naraj, chi seb tintakla laj Timoteo cherilbal. Taç'ojlak inch'ol nak tincuabi eresil. ²⁰ Ma jun chic cuan juntak'et xc'a'ux cuiq'uin jo' laj Timoteo. A'an k'axal nac'oxlac ajcui' cherix laex. ²¹ Eb li jun ch'ol chic junes li us chok' reheb a'an neque'xc'oxla ut inc'a' neque'xc'oxla xbanunquil li naraj li Jesucristo. ²² Ac nequenau nak çhabil xna'leb laj Timoteo. Nequenau chanru nak naxq'ue xch'ol chi c'anjelac cuochben chixyebal resil li colba-ib. Ninxtenk'a jo' junak alalbej naxtenk'a lix yucua'. ²³ Jo'can nak nacuaç xtaklanquil laj Timoteo eriq'uin nak ac xinnau chanru tincanak cui' arin. ²⁴ Ut ninnau nak li Kaçua' tinixtenk'a re nak taruk tincuulak chi junpat eriq'uin. ²⁵ Ut ninc'oxla ajcui' nak tento tintakla li herman Epafrodito eriq'uin. A'an naxq'ue ajcui' xch'ol chi c'anjelac cuochben ut a'an li xetakla chak chintenk'anquil sa' eç'aba' laex. ²⁶ Taraj cui'chic rilbal eru. Yo chec'oxlanquil xban nak naxnau nak xerabi resil nak xyajer. ²⁷ Yal nak quiyajer. Ca'ch'in chic ma quicam. Abanan li Dios quiril xtok'obal ru ut quiril ajcui' xtok'obal cuu lain. Jo'can nak quixq'uirtesi. Cui ta quicam, k'axal raj cui'chic quixq'ue xrahil inch'ol. ²⁸ Jo'can nak nacuaç xtaklanquil chi junpat eriq'uin re nak tasahok' sa' ech'ol nak teril cui'chic ru. Ut tasahok' ajcui' sa' inch'ol lain nak taçuulak eriq'uin. Lain ninnau nak a'an chic tatenk'ank ere. ²⁹ Chec'ulak chi k'axal sa sa' ech'ol xban nak kech aj pabanelil kib. Cheq'uehak xlok'al eb laj pabanel jo' li jun a'an. ³⁰ Nak yo chi c'anjelac chiru li Kaçua', ca'ch'in chic ma quicam. Quixq'ue rib sa' raylal re intenk'anquil xban nak ma anihex laex chintenk'anquil.

3

Li tiqwil ch'olej

¹ Anakuan ut, ex inherman, chisahok' taxak sa' le ch'ol xban nak rehex chic li Cristo. Li c'a'ru yoquin chixtz'ibanquil, ac xinye ajcui' ere. Usta ac

xinye ere, tinye cui'chic ere. Inc'a' nintitz' xyebal xban nak ninnau nak tac'anjelak cheru. ² Checol erib chiruheb laj balak'. Eb a'an chanchaneb li tz'i' xban nak mac'a'eb xna'leb. Neque'xye nak inc'a' naru tocolek' cui toj maji' nakac'ul li circuncisión. ³ Lao ac xkac'ul li tz'akal circuncisión xban nak lao nakalok'oni li Dios jo' naxc'ut chiku li Santil Musik'ej. A'an li tz'akal circuncisión. Lao nasaho' li kach'ol nak junajo chic riq'uin li Cristo yal xban xanimal rusilal. Macua' riq'uin li nakabanu lao kajunes. ⁴ Lain xinbanu chixjunil li neque'xye eb a'an nak tento xbanunquil ut naru raj ting'ue xcacuail inch'ol riq'uin. Cui cuan junak naxc'oxla nak ac xbanu chixjunil, us ajcui'. Abanan k'axal cui'chic nabal xinbanu lain chiru a'an. ⁵ Lain tz'akalin aj Israel. Cuakxakib cutan cuan cue nak xinc'ul li circuncisión. Lin na' inyucua' aj hebreo xcomoneb xtepal laj Benjamín. Lain ajcui' xcomoneb laj fariseo li neque'xbanu chixjunil li tz'ibanbil sa' li chak'rab li quiq'uehe' re laj Moisés. ⁶ Xing'ue inch'ol chixbanunquil chixjunil li chak'rab li neque'xbanu laj fariseo toj retal nak quinrahobtesihed laj pabanel. Chiruheb laj fariseo mac'a' inmac xban nak xinbanu chixjunil li tz'ibanbil sa' li chak'rab. ⁷ Junxil chixjunil a'in xing'ue xcuanquil. Abanan anakuan ninye nak mac'a' na-oc cui' xban nak k'axal cui'chic lok' xpabanquil li Cristo. ⁸ Relic chi yal chixjunil li c'a'ak re ru xinbanu chak junxil mac'a' chic na-oc cui' chicuu anakuan xban nak k'axal cui'chic nim xlok'al xpabanquil li Kacua' Jesucristo. Re nak lainak chic re li Cristo, xintz'ektana chixjunil li xinbanu chak junxil. A'an yal mul aj chic chicuu anakuan. ⁹ Lain nacua' nak junajakin riq'uin li Jesucristo. Inc'a' naru tacuan'k xtiquilal inch'ol chiru li Dios yal riq'uin xbanunquil li naxye li chak'rab li quiq'uehe' re laj Moisés. Li Dios naxq'ue xtiquilal inch'ol riq'uin xpabanquil li Cristo. ¹⁰ Xincanab xbanunquil chixjunil li quinbanu chak junxil re nak tincuan'k chi sum atin riq'uin li Cristo. Nacuaj xc'ulbal lix cuanquilal li Dios li quicuacalesin cui'chic re li Cristo chi yo'yo sa' xyankeb li camenak. Nacuaj tintz'akonk riq'uin li raylal li quixc'ul ut nacua'j nak tinbanu jo' quixbanu li Cristo nak quixq'ue rib chi camc. ¹¹ Ut ninyo'oni nak li Dios tinixcuaclesi cui'chic chi yo'yo sa' xyankeb li camenak.

Chikayal kak'e re nak tatz'aklok ru li kapabal

¹² Inc'a' ninye nak ac xtz'aklok ru lin pabal chi moco ninye nak ac xinc'ul chixjunil lix cuanquilal. Abanan yoquin chixyalbal ink'e re nak toxincuechani chixjunil li tinmatani riq'uin li Jesucristo xban nak li Jesucristo quinixq'ue chok' ralar. ¹³ Ex inherman, ninnau nak toj maji' ninc'ul chixjunil li tinmatani riq'uin li Cristo. Abanan li ninbanu, a'an a'in: Nincanab xc'oxlanquil li ac xnume' ut ninq'ue inch'ol chirechaninquil li tachalk mokon. ¹⁴ Ninyal ink'e chirechaninquil lin matan jo' nak naxyal xk'e junak chi alinac re tarechani lix k'ajcamunquil. Abanan li tincuechani lain, a'an li junelic yu'am li naxyechi'i li Dios reheb li neque'paban re li Jesucristo. ¹⁵ A'an taxak li chikara lao chikajunilo li ac cau kach'ol sa' li kapabal. Abanan cui laex inc'a' nequec'oxla chi jo'can, li Dios tac'utuk li xyalal cheru. ¹⁶ Jo'can nak chikac'oxlahak ut chikabanuhak li jo' q'uial nakanau nak us xbanunquil. ¹⁷ Ex inherman, junajak taxak le ch'ol chixbanunquil li ninbanu lain. Lain yoquin chi c'amoc be cheru sa' li tiquilal. Ut chetzolak ajcui' erib riq'ueheb li neque'xbanu jo' ninbanu lain. ¹⁸ Nabal sut ac xinye ere nak cuanqueb li inc'a' us yoqueb chixbanunquil. Riq'uin li inc'a' us neque'xbanu, neque'xtz'ektana lix camic li Cristo chiru li cruz. Nayot'e' inch'ol riq'uin li yoqueb chixbanunquil ut ninyabac xban xrahil inch'ol nak ninye cui'chic ere. ¹⁹ Eb a'an inc'a' us yoqueb. Li c'a'ru neque'xrahi ru xbanunquil, a'an chic lix dioseb chiruheb xban nak junes a'an chic

neque'xc'oxla. Neque'xnimobresi ribeb riq'uin xbanunquill li inc'a' us, usta xut'anal raj chok' reheb. Junes li c'a'ru cuan sa' ruchich'och' neque'xc'oxla. Eb a'an te'sachek' sa' li tojba mac. ²⁰ Abanan lao nococ'oxlac chirix li cuan sa' choxa xban nak lao reho chic li tz'akal Dios ut yoco chiroybeninquill nak tol-elk cui'chic li Kacua' Jesucristo laj Colol ke. ²¹ A'an k'axal nim xcuanquill sa' xben chixjunil li c'a'ak re ru. Ri'q'uin lix nimal xcuanquillal, li Jesucristo tixjal li katibel li mac'a' xcuanquill ut tixq'ue ke jun chic k'axal lok' jo' li re a'an.

4

Junelic taxak cauhaq le ch'ol sa' le pabal

¹ Ex inherman, raroque inban, nacuaq rilbal eru. C'ajo' nasaho' inch'ol eban. Ninc'oxla nak laex jo' jun ink'ajcamunquill riq'uin li c'anjel xinbanu sa' eyank. Junelic taxak cauhaq ech'ol sa' le pabal. ² Ut nintz'ama ajcui' chiruheeb lix Evodia ut lix Sintique nak te'xyib ru lix ch'a'ajquillaleb sa' xyalal re nak junajakeb chic xch'oleb chiru li Kacua'. ³ Laj Sícigo chabil aj c'anjel cuochben. Jo'can nak nintz'ama chiru nak tixtenk'ahab li ixk a'in. Cau xe'c'anjelac chintenk'anquill xyebeal resil li colba-ib. Jo'can ajcui' xbanu laj Clemente ut chixjunileb li cuech aj c'anjelil. Eb a'an tz'ibanbil xc'aba'eb xban li Dios sa' li hu tz'ibanbil cui' xc'aba'eb chixjunileb li colbileb. ⁴ Chisahok' taxak sa' ech'ol chi junelic xban nak junajex chic riq'uin li Kacua'. Ut jun sut chic tinye ere: Chi sa'ok' taxak sa' ech'ol. ⁵ Junelic chexcuank sa' tulanil re nak chixjunileb te'xq'ue retal le chabilal. Ut chijulticok' ajcui' ere nak chi seb tachalk li Kacua'. ⁶ Mac'a' c'a'ak re ru yok cui' ec'a'ux. Cheye ban re li Kacua' c'a'ru le ch'a'ajquillal. Ut junelic nak textijok ut nak textz'amank chiru li Kacua', chexbantioxink ajcui' chiru li Dios. ⁷ Ut li Dios taq'uehok ere li tuktuquill usilal. A'an k'axal lok' chiru chixjunil li c'a'ru nakac'oxla lao. Ut li tuktuquill usilal li naxq'ue li Dios tixc'ojob le ch'ol ut tixtukub le c'a'ux xban nak junajex chic riq'uin li Cristo.

Junelic chexc'oxlak chirix li c'a'ak re ru yal ut chabil

⁸ Ut anakcuan, jun chic nacuaq xyebeal ere. A'an a'in: junelic chexc'oxlak chirix li c'a'ru yal ut li c'a'ru chabil. Chexc'oxlak chirix li tiquillal, li santilal, ut li usilal. Junelic chexc'oxlak chirix li k'axal chabil ut li naru naxq'ue xlok'al li Dios. ⁹ Ut chixjunil li c'a'ru xinye ere ut li c'a'ru xinbanu cheru, a'an ajcui' tebanu laex. Chetzol erib cuiq'uin ut chebanu jo' ninbanu lain. Ut li Kacua' Dios li naq'uehoc tuktuquill usilal tacuaqk eriq'uin.

Laj Pablo naxbantioxi lix matan li quiq'uehe' re xbaneb laj Filipos

¹⁰ K'axal nasaho' sa' inch'ol ut ninbantioxi chiru li Kacua' nak qui-ala chak sa' ech'ol inten'ankuill. Ninnau nak inc'a' xecanab inc'oxlanquill. Junxil inc'a' quixq'ue rib cheru inten'ankuill. ¹¹ Inc'a' yoquin chixyebeal a'in ere xban nak cuan li c'a'ru nacuaq. Ac xintzol cuib chi cuanc chi c'ojc'o inch'ol riq'uin jo' nimal jo' ch'inal cuan cue. ¹² Xinc'ay chi cuan chi mac'a' c'a'ru cue ut xinc'ay ajcui' chi nabal c'a'ru cue. Ac ninnau chanru li cuanc. Sa sa' inch'ol nak cuan incua ut sa ajcui' sa' inch'ol nak mac'a' incua. C'aynakin chi cuanc chi sa sa' inch'ol usta cuan nabal c'a'ru cue, usta mac'a'. ¹³ Lain nincuy xnumsinquill chixjunil li raylal xban nak li Cristo naxq'ue xcacuillal inch'ol re nak tincuy xnumsinquill. ¹⁴ Abanan, ninbantioxi ere nak niqinec'oxla ut nak quinetenk'a nak cuanquin sa' ch'a'ajquillal. ¹⁵ Ex inherman, li cuanquex Filipos, ac nequenaou nak junxil nak xintiquib xyebeal resil li colba-ib, eb li herman li cuanqueb sa' jalan na'ajej inc'a' xine'xtenk'a. Ca'aj cui' laex

xextenk'an cue re xk'axbal li cutan nak xin-el Macedonia. ¹⁶ Ut xingtenk'a ajcui' nak cuanquin Tesalónica. Cuib oxib sut xetakla intumin re nak cuank li c'a'ru taç'anjelak cue. ¹⁷ Inc'a' yoquin xtz'amangunil intenk'angunil ere. Li nacua_j la_{in}, a'an a'in: nak tec'ul le k'ajcamunquil li tixq'ue ere li Dios xban nak nequextenk'an. ¹⁸ Anakcuan cuan chixjunil li c'a'ru nacua_j. Tz'akal ajcui' li c'a'ru cuan cue xban nak xinc'ul lin ra_{bal} li xetakla chak cue chirix laj Epafrodito. Li ma_{tan} a'an li xetakla cue, a'an jun cha_{bil} mayej li nacuulac chiru li Dios. ¹⁹ Lin Dios, a'an aj e_{chal} re chixjunil ut k'axal nim lix lok'al. Tixq'ue ere chixjunil li napalto' ere sa' xc'aba' li Jesucristo. ²⁰ Lok'oninbil taxak li Dios li kaYucua' anakcuan ut chi junelic k'e cutan. Jo'can taxak.

Laj Pablo naxtakla xsahil xch'oleb

²¹ Cheq'ue xsahil xch'oleb chixjunileb li neque'paban re li Jesucristo. Eb li herman li cuanqueb arin cuiq'uin neque'xtakla ajcui' xsahil e_{ch'ol}. ²² Chixjunileb laj pabanel li cuanqueb arin neque'xtakla xsahil e_{ch'ol}. Ut k'axal cui'chic nabal xsahil e_{ch'ol} neque'xtakla laj pabanel li cuanqueb sa' rochoch li acuabej. ²³ Ut chicuank taxak eri_q'uin li rusilal li Ka_{cua}' Jesucristo.

Li Hu li Quixtz'iba li San Pablo reheb laj Colosas

Xq'uebal xsahileb xch'ol

¹ Laj Pablo. Laj x-apóstol li Jesucristo xban nak jo'can quiraj li Dios. Cuochben li hermano Timoteo nak yoquin chixtz'ibanquil li hu a'in. ² Yoquin chi tz'ibac eriq'uin laex li cuanquex aran Colosas. Laex ac xepab chi tz'akal li Jesucristo. Laex chic kech aj pabanelil ut rehex chic li Dios. A' taxak li Dios li kaYucua' chi-osobtesink ere ut tixq'ue taxak ere li tuktuquil usilal.

Laj Pablo quitijoc chirixeb laj pabanel

³ Nak nocotijoc cherix junelic nakabantioxi chiru li Dios lix Yucua' li Kaçua' Jesucristo. ⁴ Nakabantioxi chiru li Dios xban nak xkabi resil nak cau ech'ol chixpabanquil li Jesucristo ut xkabi ajcui' resil nak nequera chixjunileb le rech aj pabanelil. ⁵ Nak xerabi resil li colba-ib, xerabi ajcui' resil li sahil ch'olejl c'ulanbil sa' choxa chok' ere. Xban nak yoquex chixyo'oninguil a'an, nequexpaban ut nequera le rech aj pabanelil. ⁶ Chanru nak xerabi resil li colba-ib laex, jo'can ajcui' nak yoqueb chirabinquil sa' chixjunil li ruchich'och'. Nabal yoqueb chi jalac lix na'lebeb jo' nak xjala le na'leb laex chalen nak xerabi resil li colba-ib ut quetau ru chi tz'akal li rusilal li Dios. ⁷ Lix yalal a'an quich'olobac cheru xban laj Epafra. A'an kochben chi c'anjelac chiru li Cristo ut raro kaban. A'an jun çabil aj c'anjel cheru sa' xc'aba' li Jesucristo. ⁸ Laj Epafra quiyehoc ke nak laex nequera eras eriz'in xban nak li Santil Musik'ej cuan eriq'uin. ⁹ Ut chalen nak quikabi resil nak xexpaban, jo'can nak junelic nocotijoc cherix. Nakatz'ama chiru li Dios nak tixc'ut cheru c'a'ru naraj tebanu. Ut nakatz'ama ajcui' chiru li Dios nak li Santil Musik'ej tixq'ue ena'leb chixtaubal ru li xyalal. ¹⁰ Nocotijoc cherix re nak ticak le yu'am xban nak rehex chic li Kaçua' ut sahak sa' xch'ol li Dios eriq'uin. Junelic chebanuhak li us ut chetauhak ru chi tz'akal lix lok'al li Dios. ¹¹ Nakatz'ama chiru li Dios re nak cuank xcacuil ech'ol xban xnimal xcuanquil li Dios. Chisahok' sa' ech'ol ut checuyak xnumsinquil li c'a'ak re ru nachal sa' eben ut inc'a' tach'inank ech'ol. ¹² Chebantioxi chiru li Acuabej Dios li quiq'uehoc ke chitz'akonk riq'uin li sahil ch'olejl kochbened laj pabanel li ac xe'xtau xyalal. ¹³ Li Dios corisi rubel xcuanquil laj tza ut coxk'axtesi rubel xcuanquil li C'ajolbej li k'axal raro xban li Dios. ¹⁴ Li Lalal li Dios quicam chiru li cruz re kacolbal ut quixcuy quixsach li kamaç.

Xban xcamic li Jesucristo, cuanco chic sa' usilal riq'uin li Dios

¹⁵ Li Dios inc'a' na-ilman ru. Abanan nakanau chanru li Dios xban nak li Lalal quic'ulun sa' ruchich'och' chixc'utbal chiku. Li Jesucristo a'an li k'axal nim xcuanquil chiruheb chixjunil li que'yo'obtesic. ¹⁶ Sa' xc'aba' a'an, li Dios quixyo'obtesi chixjunil li c'a'ak re ru cuan sa' choxa, jo' ajcui' li cuan sa' ruchich'och'. Li Dios quixyo'obtesi chixjunil li na-ilman ru, jo'queb ajcui' chixjunileb li musik'ej, li inc'a' na-ilman ru. A' yal chanru lix c'anjel li junjunk ut lix cuanquileb, li Dios quiy'o'obtesin reheb sa' xc'aba' li Jesucristo ut a'an laj eçal reheb. ¹⁷ Li Cristo ac cuan ajcui' çak nak toj maji' neque'yo'obtesic li c'a'ak re ru. Ut chixjunil li c'a'ak re ru quiy'o'obtesic q'uebil sa' xna'aj ut aran quicana xban nak li Cristo a'an yal re sa' xben. ¹⁸ Ut a'an ajcui' najolomin ke laç aj pabanel ut junajo chic riq'uin li Cristo. A'an li naq'uehoc re li kayu'am. A'an li xben quicuacli cui'chic chi yo'yo sa'

xyankeb li camenak ut a'an li k'axal nim xcuanquil sa' xben chixjunil. ¹⁹ Li Jesucristo, a'an tz'akal Dios ut riq'uin a'an cuan chixjunil li cuanquil xban nak jo'can quiraj li Acuabey Dios. ²⁰ Xban xcamic li Jesucristo, chixjunil li cuan sa' choxa jo' ajcui li cuan sa' ruchich'och' naru tacuan chix sum atin riq'uin li Dios. Ut xban lix quiq'uel li quihoye' chiru li cruz, li Jesucristo quixq'ue li tuktuquil usilal. ²¹ Junxil inc'a' nequepab li Dios. Ut xban li mausilal cuan sa' le ch'ol, xic' nequeril li Dios ut junes li inc'a' us nequebanu. ²² Abanan anakcuan xban lix camic li Cristo quexc'am sa' usilal riq'uin li Dios. Xban nak li Cristo quicam sa' kac'aba', naru toxk'axtesi chiru li Dios chi ac santobresinbilo ut chi mac'a'ak chic kamac ut chi tz'akalak re ru li kapabal. ²³ Abanan tento nak texpabank chi tz'akal ut cauhak ech'ol riq'uin li Dios sa' le pabal. Mecanab xyo'oninuil li yechi'inbil ere sa' xc'aba' li colbaib xban nak laex ac nequenau nak sa' ec'aba' quicam li Jesucristo. Ut li resil li ac xerabi laex yoqheq chirabinuil sa' chixjunil li ruchich'och'. Lain laj Pablo, tenebanbil sa' inben xyebal resilal li colbaib.

Laj Pablo cau xch'ol chi c'anjelac sa' xyankeb li macua'eb aj judio

²⁴ Lain nasaho' sa' inch'ol nak yoqin chixc'ulbal li raylal sa' ec'aba'. Li Cristo quixye nak te'xc'ul li raylal li ralal xc'ajol. Jo'can nak nasaho' sa' inch'ol nak yoqin chi tz'akonc riq'uin li raylal jo' quixc'ul li Cristo sa' xc'aba'eb chixjunileb li nequepaban re. ²⁵ Li Dios xinixq'ue chi c'anjelac chiruheb laj pabanel. Jo'can nak re etenkanuil nak ninc'anjelac cheru re xch'olobanuil chi tz'akal lix yalal li ratin li Dios. ²⁶ Li xyalal a'an mukmu chiruheb chixjunileb nak quicuan chak junxil. Abanan anakcuan moco mukmu ta chic. Li Dios yo chixc'utbesinuil chiruheb li nequepaban re. ²⁷ Li Dios quiraj nak laex li macua'ex aj judio, tenau nak ere ajcui' li colbaib. Li resil a'an mukmu nak quicuan chak. Abanan anakcuan nanauman nak lix yalal li lok'laj esil, a'an a'in: Nak li Cristo cuan eri'uin ut sa' xc'aba' a'an textz'akonk riq'uin lix nimal xlok'al li Dios. ²⁸ A' li Cristo, a'an li nakach'olob xyalal. Nakaq'ue xna'lebeb chixjunil ut nakac' ut xyalal chiruheb chi anchal li kach'ol ut chi anchal li kac'a'ux re nak tz'akalak ru lix pabalab sa' xc'aba' li Jesucristo. ²⁹ Jo'can nak ninyal ink'e chi c'anjelac chi anchal inch'ol ut li Cristo naq'uehoc incacuial chixbanunuil lin c'anjel chiru li Dios.

2

¹ Nacuaj nak tenau nak junelic ninq'ue inch'ol chi tijoc cherix laex jo'can ajcui' chirixeb laj pabanel li cuanqueb aran Laodicea. Nintijoc chirixeb chixjunileb laj pabanel, li ac neque'xnau cuu, jo' ajcui' li inc'a' neque'xnau cuu. ² Ut nintz'ama ajcui' chiru li Dios nak cauhak le ch'ol sa' le pabal. Cherahak taxak erib cheribil erib re nak junajak ech'ol. Lix naubal li na'leb a'in naxq'ue xcacuial le ch'ol. Chetauhak taxak ru chi tz'akal li xyalal li mukmu nak quicuan chak. Li xyalal li mukmu nak quicuan chak, a'an nak li Cristo cuan eri'uin. ³ Ri'uin li Cristo naru nakatau li kana'leb xban nak ca'aj cui' riq'uin li Cristo cuan li tz'akal yal ut a'an naxnau chixjunil. ⁴ Nintakla xyebal ere a'in re nak inc'a' texbalak'ik xbaneb li neque'tacchi'in ere. Chanchan chabil atin neque'xye, abanan moco yal ta li neque'xye. ⁵ Usta ma anihin chak sa' eyank, abanan junelic nequexinc'oxla. Nasaho' sa' inch'ol chirabinuil nak junaj le ch'ol ut cuanquex sa' tiq'uial. Nasaho' ajcui' sa' inch'ol chirabinuil nak anchal ech'ol nak nequepab li Cristo. ⁶ Laex xepab li Cristo ut a'an chic yal re sa' eben. Jo'can nak junajakex taxak riq'uin li Cristo, ut texcuank jo' naraj a'an. ⁷ Chexpabank chi anchal ech'ol ut chetzolac erib riq'uin li Cristo. Cauhak ech'ol chixpabanuil li c'a'ru tzolbilex cui' ut junelic chexbantioxink chiru li Dios.

Li ac'yu'am sa' xc'aba' li Cristo

⁸ Meq'ue erib chi balak'ic xbaneb li neque'xye nak cuan xna'lebeb. Mac'a' na-oc cui' li c'a'ru neque'xye xban nak lix na'lebeb moco riq'u'in li Cristo ta nachal. A'an yal xna'leb li ruchich'och' ut yal xna'lebeb li kaxe' katon.

⁹ Meq'ue erib chi balak'ic xbaneb a'an. Nakanau nak chixjunil lix lok'al li Dios ut lix xuanquil cuan riq'u'in li Cristo. Lix lok'al ut lix cuanquilal quixc'utbesi nak quic'ulun sa' ruchich'och'.

¹⁰ K'axal nim xcuauquil li Cristo sa' xbaneb li neque'taklan ut k'axal nim ajcui' xcuauquil sa' xbaneb li musik'ej. Ut xban nak li Cristo cuan eriq'u'in, nim ajcui' ecuanquil laex ut tz'akal re ru le yu'am xban nak q'uebil ere xban li Cristo.

¹¹ Xban nak xepab li Jesucristo, junajex chic riq'u'in ut chanchan nak xec'ul li circuncisión, aban macua' jo' li circuncisión neque'xbanu laj judío. Li xec'ul laex, a'an nak li Jesucristo quirisi sa' le ch'ol lix rahinquil ru li mausilal.

¹² Nak xec'ul li cubi ha' chanchan nak quexmuke' erochben li Cristo ut quexcuacli cui'chic chi yo'yo xban nak ac' chic le yu'am nak xepab li nimajcal Dios li quicuaclesin cui'chic re li Jesucristo chi yo'yo sa' xyankeb li camenak.

¹³ Junxil camenakex nak quexcuan chak xban li mac ut xban nak maji' isinbil sa' le ch'ol lix rahinquil ru li mausilal. Aban anakuan yo'yoquex chic. Li Dios quicuaclesin cui'chic re li Jesucristo chi yo'yo. Ut jo'can ajcui' laex, yo'yoquex chic xban nak ac' chic le yu'am q'uebil ere xban li Dios ut cuybil sachbil chixjunil le mac.

¹⁴ Cuan tojba mac sa' kaben xban nak xkak'et li chak'rab tz'ibanbil chak najter. Abanan li Dios quixye nak tojbil chic rix chixjunil li kamac xban nak li Jesucristo quicam chiru li cruz sa' kac'aba' lao.

¹⁵ Nak quicam chiru li cruz li Jesucristo, li Dios quirisi xcuauquileb li neque'taklan ut quirisi ajcui' xcuauquileb li maus aj musik'ej. Ut quixc'ut xxutaneb nak quinumta sa' xbaneb.

¹⁶ Mich'inan ech'ol cui ani nacuech'in ere riq'u'in li c'a'ru nequetzaca ut li c'a'ru nequeruc'. Chi moco tach'inank ech'ol cui ani nacuech'in ere xban nak inc'a' nequenink'ei lix nink'eheb. Cuan li neque'xnink'ei lix yo'lajic li po ut li hilobal cutan.

¹⁷ Chixjunil li c'a'ru que'xbanu, a'an yal retalil li c'a'ru tac'ulmank. Abanan, nak quic'ulun li Cristo, quitz'akloc ru li c'a'ru que'xbanu eb a'an.

¹⁸ Cuan li neque'xye nak chabileb ut chanchan nak neque'xcubsi ribeb. Abanan moco yal ta. Lix na'lebeb moco q'uebil ta xban li Dios. Li c'a'ru neque'xbanu, a'an yal c'oxlanbil. Neque'xlok'oni li ángel ut neque'xye cui inc'a' tebanu jo' neque'xbanu eb a'an, inc'a' tec'ul li yechi'inbil ere xban li Dios. Abanan mepab li c'a'ru neque'xye xban nak moco yal ta.

¹⁹ Eb a'an moco cuanqueb ta rubel xcuauquil li Cristo. Jo'can nak neque'xbanu li bar cuan neque'raj eb a'an. Abanan lao aj pabanel, junajo riq'u'in li Cristo ut cau kach'ol riq'u'in xban nak a'an najolomin ke. Ut a'an ajcui' natenk'an ke chi q'uc sa' li kapabal jo' naraj li Dios.

²⁰ Chanchan nak quexcam erochben li Cristo nak xexpaban. Ac' chic le yu'am ut li c'a'ru tzolbilex cui' chak junxil sa' ruchich'och' mac'a' chic xcuauquil sa' eben. ¿C'a'ut nak toj neque'ue erib chi balak'ic ut chixbanunquil le najter na'leb?

²¹ Cuan li neque'xye ere: —Mechap a'an chi moco tech'e' ut metzaca, xban nak mac xbanunquil a'an, chanqueb. ¿C'a'ut nak nequepab li c'a'ru neque'xye?

²² Chixjunil li c'a'ak re ru a'an nalaj na-oso'. Eb li na'leb a'an yal c'oxlanbil ut xna'lebeb li cuink.

²³ Chanchan chabil na'leb li neque'xye. Neque'xtacuasi rib nak neque'lok'onin ut neque'xrahobtesi rib. Chanchan nak neque'xcubsi xcuauquileb chi ribileb rib. Aban a'an inc'a' naxjal lix na'leb xban nak moco neque'xcanab ta xrahinquil ru li mausilal.

3

¹ Chanchan nak xexcuacli cui'chic chi yo'yo erochben li Cristo nak

xexpaban. Ac' chic le' yu'am. Jo'can nak q'uehomak ech'ol chixbanunquil li chabil na'leb ut chexc'oxlak chirix li cuan sa' choxa bar cuan cui' li Cristo c'ojc'o sa' xnim uk' li Dios xban nak k'axal nim xcuanguil. ² Junelic chec'oxla li Dios ut meç'oxla chic lix mausalil li ruchich'och'. ³ Lix mausalil li ruchich'och' maç'a' chic xcuanguil sa' eben. Chanchan camenakex chiru. Ac colbilex chic chiru li mausalil xban nak junajex chic riq'uin li Cristo, ut li Cristo junaj riq'uin li Dios. ⁴ Ca'aj cui' riq'uin li Jesucristo cuan kayu'am. Ut nak tol-elk cui'chic li Jesucristo tixc'utbesi nak lao li ralat xc'ajol, ut totz'akonk riq'uin lix lok'al.

Mebanu chic li najter na'leb

⁵ Xban nak ac' chic le' yu'am, canabomak chi junaj cua xrahinquil ru li inc'a' us jo' li co'betac yumbetac, ut li maus aj na'leb. Ut canabomak xrahinquil ru li mausalil. Ut merahi ru li biomal xban nak li xrahinquil ru li biomal, a'an chanchan ajcui' xlok'oninquit li jalanil dios. ⁶ Riq'uin xbanunquil li mausalil a'in nachal xjosk'il li Dios ut naxteneb li tojba maç sa' xbeneb li neque'k'etoc re li ratin. ⁷ Jo'can ajcui' quebanu chak laex junxil nak toj cuanquex chak sa' li maç. ⁸ Aban anakuan mebanu chic chixjunil li c'a' re ru a'in: mexjosk'o', mepo' erib chi ribil erib, mebanu li mausalil, mexk'aban, ut mex-atinac sa' yibru atin. ⁹ Mextic'ti'ic. Mebanu chic chixjunil li mausalil a'in xban nak chixjunil li c'a'ak re ru quebanu chak najter ac xerisi sa' le' ch'ol. ¹⁰ Anakuan ac' chic le' yu'am. Li Dios, a'an li quijaloc re le' yu'am ut a'an tatenk'ank ere cuulaj cuulaj chixtzolbal erib riq'uin re nak tetau ru chi tz'akal chanru li Dios ut tebanu li naraj a'an. ¹¹ Lao aj pabanel juntak'eto chiru li Dios xban nak junajo sa' li ac' yu'am. Moco jalaneb ta laj griego chiruheb laj judio. Moco jalaneb ta li tzolbible chiruheb li inc'a' tzolbibleb. Moco jalaneb ta li xe'xbanu li circuncisión chiruheb li inc'a' xe'xbanu. Moco jalan ta li junjunk usta jalan xtenamit. Moco jalaneb ta li cuanqueb xpatrón chiruheb li maç'a'eb xpatrón. Li k'axal lok' xc'oxlanquil a'an a'in: Li Jesucristo cuan riq'uibeb li junjunk li neque'paban re ut junajo chic sa' xc'aba' li Jesucristo. ¹² Li Dios k'axal nequexra ut quixsic' eru chok' ralat xc'ajol. Jo'can nak chexcuank sa' tiq'uial. Chetok'oba ruheb le' ras eritz'in ut chetenk'aheb. Mek'etk'eti erib. Chexcuank sa' tulanil ut checuyak li raylal. ¹³ Checuyak erib chiribil erib. Ut cui cuan junak cuan xmaç cheru, checuyak xmaç. Jo' nak quixcuy emaç li Kaçua', jo'can ajcui' chebanu laex. ¹⁴ Li k'axal lok' xbanunquil chiru chixjunil li c'a'ak re ru a'in, a'an li rahoc ib xban nak riq'uin a'an junajak li kac'a'ux ut tz'akalak re ru li takabanu. ¹⁵ Junajakex taxak sa' le' pabal xban nak sic'bil eru xban li Dios. Chicuank li tuktuq'uial sa' le' ch'ol li naxq'ue li Cristo re nak texcuank sa' xyalal. Ut junelic chebantioxu chiru li Dios li usilal xbanu ere. ¹⁶ Li ratin li Cristo chicanak sa' ech'ol chi junelic re nak cuank ena'leb. Chetzolak erib cheribil erib ut chetenk'a erib cheribil erib sa' le' pabal. Chexbichank re xlok'oninquit li Dios. Chexbichank jo' naxc'ut cheru li Santil Musik'ej ut junelic chebantioxink chiru li Dios. ¹⁷ Ut chixjunil li c'a'ru teye ut tebanu, chebanuhak re xq'uebal xlok'al li Jesucristo. Ut junelic chebantioxink chiru li Acuabej Dios sa' xc'aba' li Kaçua' Jesucristo.

Chexcuank sa' xyalal riq'uibeb le' ras eritz'in

¹⁸ Ex ixakilbej, chepabak le' belom jo' ec'ulub xbanunquil xban nak laex chic aj pabanel. ¹⁹ Ut laex belomej, cherahak le' rixakil ut mexjosk'o' riq'uibeb. ²⁰ Ut jo'can ajcui' laex alalbej, junelic chexpabank chiruheb le' na' eyucua' xban nak a'an li nacuulac chiru li Kaçua' Dios. ²¹ Ex yucua'bej, meç'hila le' ralat ec'ajol chi maç'a' rajbal re nak inc'a' tach'inank

xch'oleb. ²² Ex aj c'anjel, junelic chexpabank chiruheb le patrón. Chanru nak nequexc'anjelac nak yo cherilbal le patrón, jo'can ajcui' texc'anjelak nak inc'a' yo cherilbal. Mexc'anjelac re xnimobresinquil erib. Chexc'anjelak ban chi anchal le ch'ol xban nak laex nequera li Kacua' Dios. ²³ Nak yoqueux chi c'anjelac chiru le patrón, yoqueux ajcui' chi c'anjelac chiru li Kacua' Dios xban nak laex rehex chic li Dios. Jo'can nak chixjunil li c'a'ru tebanu, chebanuhak chi anchal ech'ol. ²⁴ Jo'can chebanu xban nak laex ac nequenau nak li Kacua' Dios taq'uehok le k'ajcamunquil li yechi'inbil ere xban nak li Kacua' Jesucristo, a'an li tz'akal patrón sa' eben ut yoqueux chi c'anjelac chiru. ²⁵ Li ani tixbanu li inc'a' us tixc'ul xtojbaj xmac a' yal c'a'ru lix mac xban nak li Dios inc'a' naxsic' ru ani tixq'ue chixtojbaj xmac.

4

¹ Ex patrón, chexcuank sa' usilal riq'ueineb laj c'anjel cheru ut sa' xyalal chetaklaheb xban nak laex nequenau nak cuan epatrón sa' choxa. ² Mecanab tijoc. Chextijok chi anchal ech'ol ut junelic chexbantioxink chiru li Dios. ³ Ut nak yokex chi tijoc, chextijok ajcui' chak chixix lao re nak tixq'ue ke li Dios xyebal resil li colba-ib sa' xc'aba' li Cristo. Li xyalal li colba-ib, a'in mukmu nak quicuan chak. Laex nequenau nak cuanquin chi prexil xban xyebal resil li colba-ib. ⁴ Ut chextijok ajcui' chak chicuix re nak tinruk chixch'olobanquil chi tz'akal li xyalal jo' naraj li Dios. ⁵ Chexcuank sa' xyalal riq'ueineb li macua'eb aj pabanel ut yalak bar cuankex chi k'ek chi cutan junelic tech'olob xyalal li colba-ib chiruheb. ⁶ Junelic chabil chex-atinak. Sic'omak chanru tex-atinak riq'ueineb re nak te'xq'ue xch'ol chirabinquil. Ut chenuhak chanru xsumenquil li c'a'ru te'xpatz' ere.

Xq'uebal xsahileb xch'ol laj pabanel

⁷ Li hermano Tíquico raro kaban ut chabil aj c'anjel chiru li Dios cuochben lain. A'an tayehok resil ere chanru cuanquin arin. ⁸ A'an aj e nak tintakla eriq'uin. Tixye ere chanru nak cuanco arin ut tixq'ue ajcui' xcacuil ech'ol sa' le pabal. ⁹ Taxic ajcui' li kaherman Onésimo rochben. A'an erech tenamitil. A'an tic xch'ol ut raro kaban. Ut a'aneb te'yehok resil ere li c'a'ru yocho chixc'ulbal arin. ¹⁰ Laj Aristarco li cuochben nak cuanco sa' tz'alam nextakla ajcui' xsahil ech'ol. Nextakla ajcui' xsahil ech'ol laj Marcos li rech'alal laj Bernabé. Ac xintakla xyebal ere nak taçuulak laj Marcos eriq'uin. Nak taçuulak eriq'uin, chec'ulak sa' xyalal chi sa sa' ech'ol. ¹¹ Ut nextakla xsahil ech'ol laj Justo. Aj Jesus ajcui' nayeman re. Ca'aj eb cui' li oxib a'an sa' xyankeb laj pabanel aj judío li yoqueb chi tenk'anc cue chixyebal resil li colba-ib. Ut neque'xc'ojob inch'ol. ¹² Jo'can ajcui' laj Epafras nextakla ajcui' xsahil ech'ol. A'an erech tenamitil ut a'an aj c'anjel chiru li Cristo. Junelic yo chi tijoc cherix re nak texcuank sa' xyalal ut cauhak ech'ol sa' le pabal chixbanunquil chi tz'akal jo' naraj li Dios. ¹³ Lain nacuaij nak tenau nak laj Epafras junelic nequexc'oxla ut junelic yo chi tijoc cherix. Ut natijoc ajcui' chirixeb li cuanqueb Laodicea jo'queb ajcui' li cuanqueb aran Hierápolis. ¹⁴ Nextakla ajcui' xsahil ech'ol laj Lucas, laj banonel li k'axal raro kaban. Jo'can ajcui' laj Demas nextakla xsahil ech'ol. ¹⁵ Cheq'ue xsahil xch'oleb laj pabanel li cuanqueb aran Laodicea. Ut cheq'ue ajcui' xsahil xch'ol li xNinfas, jo'queb ajcui' laj pabanel li neque'xch'utub rib sa' li rochoch chixlok'oninguil li Dios. ¹⁶ Nak acak xeril xsa' li hu a'in laex, tetakla riq'ueineb laj pabanel li cuanqueb Laodicea, re nak te'ril ajcui' xsa' li hu eb a'an. Ut nacuaij nak laex teril xsa' li hu li xintakla riq'ueineb a'an. ¹⁷ Ut cheyehak ajcui' re laj

Arquipo nak chixq'uehak xch'ol chixbanunquil li c'anjel li quiq'uehe' re xban li Kacua' Dios. ¹⁸ Lain laj Pablo. Riq'uin cuuk' yoquin chixtz'ibanquil li cuib oxib chi atin a'in re xq'uebal xsahil sa' ech'ol. Nintz'ama cheru nak misach sa' ech'ol nak cuanquin chi prexil. A' taxak li Kacua' Dios chiosobtesink ere. Jo'can taxak.

Li Xben Hu li Quixtz'iba li San Pablo reheb laj Tesalónica

Xq'uebal xsahil xch'oleb

¹ Lajin laj Pablo. Cuochben laj Silvano ut laj Timoteo. Yoço chi tz'ibac eriq'uin laex laj pabanel li cuanquex aran Tesalónica. Laex rehex chic li Yucua'bej Dios ut li Kaçua' Jesucristo. A' taxak li usilal ut li tuktuquillal chicuank eriq'uin, li naxq'ue li Dios li kaYucua' ut li Kaçua' Jesucristo.

Tz'akal re ru lix pabaleb laj Tesalónica

² Junelic nocotioxin chiru li Dios nak nocotijoc cherix chejunilex laex. ³ Nak nocotijoc chiru li Dios, junelic cuan sa' kach'ol chanru le çabilal xban le pabal. Cuan sa' kach'ol le çabil c'anjel xban nak nequexrahoc ut cuan ajcui' sa' kach'ol nak k'axal cau ech'ol chixyo'oninguil li Kaçua' Jesucristo. ⁴ Ex inherman, raroquex xban li Dios ut nakanau nak sic'bil eru xban. ⁵ Nakanau a'an xban nak macua' ca'aj cui' riq'uin atin quicuulac li resil li evangelio eriq'uin. Riq'uin aj ban cui' lix cuanquil li Santil Musik'ej ut xenau nak tz'akal yal li xkach'olob cheru. Ac xeq'ue retal chanru li kana'leb nak xocuan sa' eyank chetenk'anquil. ⁶ Xetzol erib kiq'uin ut riq'uin li Kaçua' Jesucristo. Usta nabal li raylal xec'ul, abanan xerabi li resilal riq'uin li sahil ch'olejil li quiq'uehe' ere xban li Santil Musik'ej. ⁷ Jo'can nak laex chic aj c'amol be chiruheb chixjunileb laj pabanel li cuanqueb sa' li na'ajej Macedonia ut Acaya. ⁸ Anakuan eban laex nak yalak bar qui-abic resil rañin li Dios. Macua' ca'aj cui' Macedonia ut Acaya. Qui-abic ban ajcui' sa' chixjunil li na'ajej. Yalak bar qui-abic resil nak laex xepab li Dios. Jo'can nak laç inc'a' chic tento nak takaye resil le pabal. ⁹ Yalak bar yoqueb chixserak'inquil chanru nak coec'ul nak cocuulac eriq'uin ut yoqueb chixserak'inquil chanru nak quecanab xlok'oninguil li yibanbil dios ut quepab ut nequexc'anjelac chic chiru li tz'akal Dios, li yo'yo. ¹⁰ Ut yoqueb ajcui' xserak'inquil chanru nak yoquex chirobeninquil nak taçalk çhak toj sa' choxa li Jesucristo li Lalal li Dios, li quicuaclesic cui'chic chi yo'yo sa' xyankeb li camenak xban li Dios ut a'an li taçolok ke chiru li rakba atin li taçalk sa' kaben.

2

Lix c'anjel laj Pablo aran Tesalónica

¹ Ex inherman, laex ac nequenau nak moco xcana ta chi mac'a' rajbal nak xocuulac eriq'uin. ² Usta ac xkac'ul li rahobtesic ut usta ac xohobe' aran Filipos, abanan li Dios xq'uehoc xcacuul kach'ol chixyebal resil li colba-ib ere laex. Inc'a' xoxucuaç usta cuanqueb li k'axal xic' neque'iloc ke. ³ Moco yoço ta chixbalak'inquil kib. Tz'akal yal ban li yoço xyebal ere. Moco cuan ta junak kac'a'ux inc'a' us sa' eben, chi moco yoço ta chebalak'inquil. ⁴ Nakach'olob ban xyalal jo' naraj li Dios xban nak a'an c'ojc'o xch'ol sa' kaben ut a'an quixakaban ke re xyebal resil li evangelio. Inc'a' nakabanu jo' neque'cuulac chiru li cristian. Nakabanu ban jo' nacuulac chiru li Dios li nana'oc re chanru li kac'a'ux. ⁵ Laex nequenau nak ma jun cua xoatinac eriq'uin yal re ek'unbesinuil. Li Dios naxnau nak laç inc'a' xoatinac eriq'uin yal xban nak cuan li c'a'ru nakaj. ⁶ Chi moco xkasic' ta kalok'al riq'uineb li cristian, chi moco eriq'uin chi moco riq'uineb jalan, usta xru raj xkaye ere nak teq'ue kalok'al xban nak laç x-apóstol li Jesucristo. ⁷ Sa' tulanil

ban xocuan sa' eyank jo' junak na'bej naxq'uiresiheb sa' tulanil lix coc'al. ⁸ K'axal nequexkara. Maçua' raj ca'aj cui' xyebal resil li colba-ib li naxq'ue li Dios li xkabanu. Xru aj raj cui' xkak'axtesi li kayu'am sa' ec'aba' laex xban nak k'axal nequexkara. ⁹ Laex herman, ac nequenau chanru nak xoc'anjelac chi k'ek chi cutan re nak inc'a' texkach'i'ch'i'i riq'uin li c'a'ru ke ut re nak xru xkaye ere resil li colba-ib li naxq'ue li Dios. ¹⁰ Laex nequenau chi tz'akal, ut naxnau ajcui' li Dios, chanru nak cocuan sa' santilal ut sa' tiquuilal sa' eyank. Maç'a' c'a'ru cok'use' cui' nak cocuan sa' eyank laex aj pabanel. ¹¹ Jo' naxbanu junak li yucua'bej riq'uineb li lalal xc'ajol, jo'can ajcui' xkabanu lao eriq'uin nak xkaq'ue ena'leb chejunjunkalex. ¹² Xkaq'ue xcacuilal ech'ol ut xkatz'ama ajcui' cheru nak textcuank sa' xyalal jo' xc'ulubeb li lalal xc'ajol li Dios li quisic'oc eru re nak textz'akonk ajcui' laex riq'uin lix nimajcual cuanquial ut lix lok'al. ¹³ Junelic nakabantioxi chiru li Dios nak quepab li ratin li Dios li xkach'olob cheru. Moco ratin cuink ta quepab. Ratin li Dios ban quepab. Ut yal ajcui' nak a'an ratin li Dios. Ut a'an li yo chi jaloc re le yu'am laex aj pabanel. ¹⁴ Ut laex herman xec'ul ajcui' li raylal jo' que'xc'ul li lalal xc'ajol li Dios li neque'paban sa' xc'aba' li Jesucristo li cuanqueb Judea. Xexrahobtesic xban le rech tenamitil jo' que'xc'ul eb a'an xbaneb laj judio, li rech tenamitil. ¹⁵ Eb laj judio que'xcamsi li Kaçua' Jesucristo ut que'xcamsi ajcui' eb li profeta ut coe'xyolesi lao. Inc'a' neque'xbanu li nacuulac chiru li Dios ut k'axal xic' neque'ril li ras ritz'ineb. ¹⁶ Xic' neque'rec'a nak nakach'olob xyalal chiruheb li maçua'eb aj judio re nak te'colek'. Ut riq'uin li mausilal neque'xbanu rajlal, k'axal cui'chic nanumta lix maqueb. Abanan yal jun nak quichal xjosk'il li Dios sa' xbeneb.

Laj Pablo taraj cui'chic xic chirilbaleb laj pabanel li cuanqueb Tesalónica

¹⁷ Ex herman, usta ma aniho sa' eyank, abanan junelic nequexkac'oxla. Toje' ajcui' xo-el eriq'uin nak ac takaj cui'chic rilbal eru. ¹⁸ Xkaj raj xic eriq'uin. Lain laj Pablo. Cuib oxib sut xinyal xic cherilbal. Abanan laj tza quiramoc chiku. Jo'can nak inc'a' cco. ¹⁹ ¿C'a'ru nakoybeni ut c'a'ru lix saylal li kach'ol? ¿Ut c'a'ru li tok'ajcamuk cui' nak tol-elk cui'chic li Kaçua' Jesucristo? ¿Ma inc'a' ta bi' sa' ec'aba' laex takac'ul li kak'ajcamunquill? ²⁰ Laex li kalok'al ut lix saylal li kach'ol.

3

¹ Xban a'an nak k'axal takaj raj rabinquil eresil. Inc'a' chic xkacuy roybeninquil. Jo'can nak lao xocana arin Atenas kajunes. ² Ut xkatakla li hermano Timoteo eriq'uin. A'an laj c'anjel chiru li Dios chixyebal resil li colba-ib sa' xc'aba' li Cristo. Laj Timoteo tixq'ue xcacuilal ech'ol sa' le pabal ut tixq'ue ajcui' ena'leb. ³ Inc'a' nakaj nak tach'inak ech'ol xban li raylal a'in. Laex nequenau nak takac'ul li raylal. ⁴ Nak toj cuanco chak sa' eyank xkaye resil ere nak takac'ul li raylal lao aj pabanel. Ac nequenau laex nak jo'can quic'ulman. ⁵ Jo'can nak xintakla laj Timoteo eriq'uin xban nak inc'a' chic xincuy roybeninquil resil chanru cuanqueb sa' le pabal. Mare anchal xelac xban laj tza ut li kac'anjel mare chicanak chi maç'a' rajbal. ⁶ Toje' xsuk'i chak laj Timoteo eriq'uin ut a'an xc'am chak jun çabil esilal cherix chanru nak cau ech'ol sa' le pabal ut chanru nak nequexrahoc. Ut xye ajcui' ke nak rajlal nocoç'oxla jo' ajcui' nak nequexkac'oxla lao. Laex nequeraj rilbal ku ut jo'can ajcui' lao nakaj rilbal eru laex. ⁷ Riq'uin a'in, ex herman, sa' chixjunil li raylal li yoço chixc'ulbal, nac'ojla kach'ol chirabinquil nak cau ech'ol sa' le pabal. ⁸ Ut anakcuan naru chic tocuank chi sa sa' kach'ol xban nak nakanau nak cau ech'ol sa' epabal sa' xc'aba' li Jesucristo. ⁹ Inc'a' nakatau

chanru nak takabantioxi chiru li Dios riq'uin lix sahil li kach'ol nequeq'ue ke sa' xc'aba' le pabal. Li Dios naxnau nak c'ajo' xsahil li kach'ol eban laex. ¹⁰ Chi k'ek chi cutan nakatz'ama chiru li Dios nak takil cui'chic eru re nak takaq'ue xcacuuil ech'ol sa' le pabal. ¹¹ A' taxak li Dios li kaYucua' ut a' taxak li Kaçua' Jesucristo chitenk'ank ke re nak taruk toxic cui'chic eriç'uin. ¹² A' taxak li Kaçua' chitenk'ank ere re nak tera erib cheribil erib ut chi anchal ech'ol cherahak taxak le ras eritz'in jo' nak nequexkara laex. ¹³ A' taxak li Dios li kaYucua' chiq'uehoc xcacuuil ech'ol. Tz'akalak taxak re ru le pabal. Mac'a'ak taxak emaq chiru li Dios nak taçhalk li Jesucristo rochbeneb li ac colbibleb.

4

Li Dios naraj nak tz'akalak re ru li kayu'am

¹ Ut anakuan ex inherman, cuan cui'chic c'a'ru nacuj xtz'amanquil cheru sa' xc'aba' li Kaçua' Jesucristo. A'an a'in: nak chexcuan taxak sa' tiçuilal jo' naraj li Dios ut rajlal yokex chixbanunquil chi jo'can jo' xkac'ut cheru lao. Ac yoquex chixbanunquil, abanan k'axal cui'chic tebanu. ² Laex ac nequenau le taklanquil q'uebil kaban sa' xc'aba' li Kaçua' Jesucristo. ³ Li Dios naraj nak texcuank sa' santilal. Mexco'betac mexyumbetac. ⁴ Eb laj pabanel tento nak te'sumlak sa' xyalal ut che'xnauhak cuanc sa' tiçuilal chi ribileb rib ut te'xq'ue xlok'al chi ribileb rib. ⁵ Eb li inc'a' neque'xnau ru li Dios, neque'xbanu li yibru na'leb li neque'xrahi ru xbanunquil. Mebanu jo' neque'xbanu eb a'an. ⁶ Ma ani tixmux rib riq'uin xmak'bal rixakil junak cujnk ut ma ani tixmux rib riq'uin xmak'bal xbelom junak ixk. Inc'a' te'xbanu chi jo'can xban nak li Kaçua' Jesucristo tarakok atin sa' xben chixjunileb li neque'banun re li na'leb a'an, jo' ac yebil ere kaban. ⁷ Li Dios inc'a' quixsic' ku re nak yoko chixbanunquil li mausilal. Quixsic' ban ku re nak tocuank sa' santilal. ⁸ Jo'can nak li ani natz'ektanan re li tijleb a'in, maçua' cujnk li naxtz'ektana. A' ban li Dios li naq'uehoc ke li Santil Musik'ej, a'an li naxtz'ektana. ⁹ Inc'a' tento nak tintz'ibak eriç'uin chirix chanru nak tera erib cheribil erib xban nak ac c'utbil ajcui' cheru xban li Dios nak tento tera erib cheribil erib. ¹⁰ Us yoquex nak nequeraheb chixjunileb li cuanqueb Macedonia. Abanan nintz'ama cheru, ex herman, nak k'axal cui'chic chebanu chi jo'can. ¹¹ Cheq'uehak ech'ol chi cuanc sa' xyalal. Mech'i'ch'i'i li ani cuan c'a'ru re. Chexc'anjelak re nak taçuank c'a'ru ere re xnumsinquil li cutan junjnk jo' xexkatakla cui'. ¹² Cui tebanu chi jo'can, oxlok' tex-ilek' xbaneb li maçua'eb aj pabanel, ut inc'a' yokex chixch'i'ch'i'inquil jalan re li c'a'ru teraj.

Li Kaçua' Jesucristo taçhalk cui'chic

¹³ Nakaj ut ex herman nak tetau xyalal chirixeb li ac xe'cam re nak inc'a' tarahok' ech'ol jo' neque'xbanu li jun ch'ol chic li maç'a' neque'roybeni. ¹⁴ Lao nakapab nak li Jesús quicam ut quicuail cui'chic chi yo'yo. Ut nakapab ajcui' nak li jo' q'uialeb que'paban re li Cristo, li Dios tixcuaclesiheb cui'chic chi yo'yo sa' xyankeb li camenak ut tixc'ameb chak rochben nak taçhalk cui'chic li Jesucristo. ¹⁵ A'in ratin li Kaçua' Jesucristo nakaye ere, nak cui lao toj yo'yoko sa' lix c'ulunic li Kaçua' Jesucristo, maçua' lao li toc'amek' xben cua. A' li ac camenakeb, a'an eb li te'c'amek' xben cua riq'uin li Kaçua'. ¹⁶ Ut nak taçubek chak li Kaçua' Jesucristo sa' choxa, tixjap re chi taklanç. Li xbenil angel tixjap re chi bokoc, ut tayabasik xtrompeta li Dios. Ut li te'cuaclik xben cua, a'aneb li ac camenakeb, li que'paban re li Cristo. ¹⁷ Aca' chic lao li toj yo'yoko tosapuk takec' sa' li chok kochbenakeb a'an re xc'ulbal li Kaçua'

Jesucristo sa' ik'. Ut cuṅko junelic riq'uin li Kaṅua' Jesucristo. ¹⁸ Jo'can ut nak chec'ojob ech'ol cheribil erib riq'uineb a ṅtin a'in.

5

Yo'on cuṅko ut aj-ajak ku sa' li kapabā

¹ Ut chirix lix k'ehil ut lix cutanquil xc'ulunic li Kaṅua' Jesucristo, maṅ'a' rajbal tintz'ibak eriq'uin xban nak ac nequenau chic lix yalal. ² Laex nequenau chi us nak lix cutanquil lix c'ulunic li Kaṅua' Jesucristo, taṅhalk chi ma ani nana'oc re jok'e, jo' nak nachal laj elk' chi maṅ'a' sa' kach'ol. ³ Nak eb li tenamit yokeb chixyebal, "Cuanco sa' tuktuquil usilal ut maṅ'a' c'oxlac", tojo'nak taṅhalk roso'jiqueb sa' junpaṅ chi maṅ'a'ak sa' xch'oleb jo' nak nachal xraylal li yaṅ aj ixk chi maṅ'a' sa' xch'ol. Ut eb a'an inc'a' te'colek' chiru li raylal taṅhalk sa' xbeneb. ⁴ A'ut laex herman, moco sa' k'ojyin ta chic cuanquex. Ac nequenau chic lix yalal. Li Jesucristo inc'a' taṅhalk chi maṅ'a'ak sa' ech'ol jo' nak nachal laj elk'. ⁵ Lao aj pabanel moco cuanco ta chic sa' k'ojyin. Cuanco ban chikajunilo sa' cutan saken ut nakanau chic li xyalal xban nak reho chic li Cristo. ⁶ Junelic yo'on taxak cuṅko ut yoko taxak chiroybeninuil lix c'ulunic li Jesucristo. Inc'a' takabanu jo' neque'xbanu li jun ch'ol chic. Aj-ajak ban ku sa' li kapabā. ⁷ Eb li neque'cuar, chi k'ek neque'cuar ut eb li neque'cala, chi k'ek neque'cala. ⁸ A'ut lao, li ac nakanau chic xyalal, yo'on taxak cuṅko. Li rahoc ut li kapabā, a'an taxak taṅ'anjelak ke re kacolbal jo' nak li soldado naxcol rib riq'uin li ch'ich' li naxq'ue chire xch'ol. Ut li kacolbal li yoco chiroybeninuil, a'an taṅ'anjelak ke jo' nak nac'anjelak li punit ch'ich' chiru li soldado re xcolbal rib. ⁹ Li Dios inc'a' quixsic' ku re nak toxq'ue chixtojbal rix li kamaṅ. Quixsic' ban ku re tocolek' sa' xc'aba' li Kaṅua' Jesucristo. ¹⁰ A'an quicam sa' kac'aba' re nak usta yo'yoco usta ac camenako chic nak taṅ'ulunk, taṅuṅk kayu'am chi junelic kochben a'an. ¹¹ Jo'can ut nak chec'ojob ech'ol cheribil erib ut cheq'uehak xcacuil ech'ol cheribil erib jo' li ac yoquex chixbanunuil.

Laj Pablo naxq'ue xna'lebeb laj pabanel

¹² Ex herman, nakatz'ama cheru nak oxlok' cherileb li ani neque'c'anjelac chiru li Kaṅua' Jesucristo sa' eyank. Eb a'an neque'c'amoc be cheru ut a'an neque'q'uehoc eṅa'leb. ¹³ Che-oxlok'iheb ut cherahakeb chi anchal ech'ol xban nak neque'xq'ue xch'ol chi c'anjelac sa' eyank. Chexcuṅk sa' usilal cheribil erib. ¹⁴ Nakatz'ama cheru, ex herman, chek'useb li yal subuc cutan neque'xbanu. Cheq'uehak xcacuil xch'oleb li neque'ch'inan xch'oleb ut chetenk'a' ajcui' li toj k'uneb xch'ol sa' xpabāleb. Ut chicuṅk eṅuyum riq'uineb chixjunileb. ¹⁵ Cheq'uehak retal nak ma ani junak sa' eyank chixq'ue rekaj li maṅsilal qui-ux re riq'uin maṅsilal. Chebanuhak ban chi junelic li c'a'ru us cheribil erib ut riq'uin chixjunileb. ¹⁶ Junelic chisahok' sa' ech'ol. ¹⁷ Junelic chextjok. ¹⁸ Chextioxink riq'uin chixjunil li c'a'ru neque'ul xban nak jo'can naraj li Dios eriq'uin laex xban nak junajex chic riq'uin li Jesucristo. ¹⁹ Merisi xcuanguil li Santil Musik'ej eriq'uin. Cheq'uehak ban chi c'anjelac eriq'uin, jo' naraj a'an. ²⁰ Metz'ektana li esil li neque'xye li profeta. ²¹ Cheq'uehak ban retal chixjunil ut chec'ulahak sa' ech'ol li c'a'ru us. ²² Ut chetz'ektana chixjunil li maṅsilal. ²³ A' taxak li Dios li naq'uehoc tuktuquil usilal chisantobresink ere chi tz'akal ut a'an taxak chi-osobtesink re le ram, le c'a'ux ut le rok' eruk' re nak tecxuṅk chi tz'akal ere eru chi maṅ'a'ak ek'usbal sa' xc'ulunic li Kaṅua' Jesucristo. ²⁴ Li Dios, li quisc'oc eru, a'an tic xch'ol chixbanunuil li c'a'ru naxye ut a'an tasantobresink ere.

Laj Pablo naxchak'rabiheb

²⁵ Ex herman, chextijok chikix lao. ²⁶ Ut cheq'uehak xsahileb xch'ol chixjunileb li herman riq'uin santil utz'uc u. ²⁷ Chi anchal inch'ol nintz'ama cheru sa' xc'aba' li Jesucristo nak chi-ilek' xsa' li hu a'in chiruheb chixjunileb li herman. ²⁸ A' taxak li usilal li naxq'ue ke li Kacua' Jesucristo, chicuank eriq'uin. Jo'can taxak.

Li Xcab Hu li Quixtz'iba li San Pablo reheb laj Tesalónica

Xq'uebal xsahileb xch'ol

¹ Laj Pablo. Cuochochen laj Silvano ut laj Timoteo nak yoco chixtz'ibanquil li hu a'in eriq'uin laex laj pabanel li cuanquex aran Tesalónica. Laex reheb chic li Dios li kaYucua' ut reheb chic li Kaçua' Jesucristo. ² A' taxak li usilal ut li tuktuquialal chicuank eriq'uin, li naxq'ue li Dios li kaYucua' ut li Kaçua' Jesucristo.

Li Kaçua' Jesucristo taçhalk chi rakoc atin

³ Ex inherman, inc'a' nakacanab xbantioxinquil chiru li Dios sa' ec'aba' laex. Tento takabantioxi chiru li Dios xban nak yo chi cacuuc ech'ol sa' le pabal ut k'axal cui'chic nequera erib cheribil erib. ⁴ Jo'can nak k'axal sa sa' kach'ol chixserak'inquil resil le pabal reheb li neque'paban re li Dios yalak bar. Nakaye reheb chanru nak nequexpaban chi anchal ech'ol ut cau ech'ol nak yoquex chixcuybal xnumsinquil li raylal ut li ra xic'. ⁵ Xban nak nequecuy xnumsinquil li raylal nac'utun nak li Dios yo chetenk'anquil. Li Dios tarakok atin sa' tiquialal. Tento nak tecuy li raylal re nak li Dios tixye nak ec'ulub oc sa' lix nimajcual cuanquialal ut sa' xc'aba' ajcui' a'an nak yoquex chixc'ulbal li raylal. ⁶ K'axal tic xch'ol li Dios. Jo'can nak tixq'ue raylal sa' xbeneb li neque'rahobtesin ere. ⁷ Abanan laex li yoquex chixc'ulbal raylal, li Dios texq'ue chi hilanc kochben lao ut inc'a' chic takac'ul raylal. A'in taç'ulmank nak li Kaçua' Jesucristo tixc'utbesi chak rib nak taçhalk toj sa' choxa. Taçhalk rochbenakeb chak lix ángel li cuanqueb xcuanquil. ⁸ Chanchan li rak' xam nak taçhalk li Kaçua' Jesucristo riq'uin xnimalk' al chi rakoc atin. Tixq'ueheb chixtojbalk xmaqueb li ani inc'a' neque'paban re li Dios jo' ajcui' li ani inc'a' neque'raj rabinquil resil li colba-ib li naxq'ue li Kaçua' Jesucristo. ⁹ Lix tojbal rixeb lix mac li tixq'ue, a'an li sachc chi junelic nak te'isik chiru li Kaçua' Jesucristo ut chiru lix nimal xlok'al ut lix cuanquialal. ¹⁰ Chixjunil a'in taç'ulmank sa' li cutan nak tol-elk cui'chic li Kaçua' Jesucristo. Sa' li cutan a'an li Jesucristo talok'onik xbaneb chixjunileb li neque'paban re. Laex cuanquex sa' xyankeb a'an. Reheb chic li Cristo xban nak ac xepab li xyalal li xkach'olob cheru. ¹¹ Jo'can nak junelic nocotijoc cherix ut nakatz'ama chiru li Dios nak chabilakex taxak re nak ec'ulubak cuanc chok' ralar xc'ajol li Dios. Nakatz'ama chiru nak riq'uin taxak xnimalk' xuanquil, textenk'a chixbanunquil li us re nak tz'akalak re ru le yehom ebanuhom sa' xc'aba' le pabal. ¹² Nocotijoc cherix re nak laex junelic tenima xlok'al li Kaçua' Jesucristo. Ut laex tex-oxlok'ik ajcui' xban nak reheb chic li Cristo. A' taxak li Dios ut li Kaçua' Jesucristo riq'uin xnimalk' rusilal chitenk'ank ere re nak jo'can taxak chi-uxmank.

2

¹ Ex inherman, anakcuan tinch'olob xyalal cheru chirix lix c'ulunic li Kaçua' Jesucristo ut lix ch'utubanquil kib riq'uin. ² Nintz'ama cheru nak meq'ue erib chi balak'ic xbaneb li te'yehok nak ac xcuulac xk'ehil lix c'ulunic li Kaçua' Jesucristo. Mare tayehok' ere xban junak li profeta, malaj xban junak cuink taatinak eriq'uin, malaj xban junak tatz'ibak eriq'uin ut tixye nak lao xkatz'iba li hu a'an. Abanan mepab li c'a'ru te'xye eb a'an xban nak moco yal ta. ³ Mac'a' ta c'a'ru chexbalak'ik cui'. Li Kaçua' Jesucristo

inc'a' tachalk chi maji'ak natz'ektanac li Dios xbaneb nabal chi tenamit. Ut tachalk ajcui' li cujnk laj k'etol chak'rab. A'an li tac'uluk re li sachc chi junaj cua. ⁴ A'an tixq'ue xcuanguil xjunes rib ut xic' taril yalak c'a' chi diosil ut li c'a'ak re ru nalok'oniman sa' ruchich'och'. Tixnimobresi rib sa' xben chixjunil toj retal nak tac'ojlak sa' rochoch li Dios ut a'an chic tixq'ue rib chok' dios. ⁵ ¿Ma inc'a' jultic ere nak quinye chak ere chixjunil a'in nak toj cuanguin chak eriq'uin? ⁶ Laex ac nequenau c'a'ru li naramoc re nak toj maji' nachal laj k'etol chak'rab. Abanan nak tac'uulak xk'ehil, tac'ulunk. ⁷ Li mausilal ac cuan sa' ruchich'och', abanan toj maji' nanumta chi us. Tac'uulak xk'ehil nak li Dios inc'a' chic tixram li mausilal ut li mausilal tanumtak arin sa' ruchich'och'. ⁸ Sa' eb li cutan a'an tac'utbesik laj k'etol chak'rab. Tojo'nak li Kacua' Jesucristo tac'ulunk riq'uin xnimal xlok'al. Taapusik laj k'etol chak'rab xban li Kacua' ut aran taosok'. Chi jo'can tasachek' chixjunil lix cuanguil sa' xc'ulunic li Kacua' Jesucristo. ⁹ Laj k'etol chak'rab tachalk riq'uin xcuanguil laj tza. Tixc'utbesi nak cuan xcuanguil chixbanunquul li milagros ut sachba ch'olej re xbalak'inquul li cristian. ¹⁰ Tixbalak'ihheb li te'sachek' xban nak que'xtz'ektana li xyalal li quicoloc raj reheb. ¹¹ Jo'can nak li Dios tixq'ueheb chixpabanquul li moco yal ta. ¹² Li Dios quixbanu chi jo'ca'in riq'uineb re nak te'xc'ul xtojbal xmaqueb chixjunileb li inc'a' que'paban re li yal. A' ban chic li mausilal quicuulac chiruheb xbanunquul.

Li Dios quixsic' ku re nak tocolek'

¹³ Ex inherman, tento nak lao tobantioxjnk chiru li Dios cherix laex. Raroquex xban li Kacua' Jesucristo. Li Dios quisc'oc chak eru chalen chak sa' xticlajic re nak texcolek' xban nak santobresinbilex chic xban li Santil Musik'ej ut xban nak nequepab li yal. ¹⁴ A'an aj e nak li Dios quixsic' eru re nak tepab li evangelio li xkach'olob cheru re nak textz'akonk riq'uin lix nimal xlok'al li Kacua' Jesucristo. ¹⁵ Jo'can ut ex herman, cauhaq taxak ech'ol sa' le pabal. Mecanab xpabanquul le tijbal li xkach'olob cheru nak xoatinac eriq'uin. Chi moco teanab xpabanquul li c'a'ru xkatakla xyebal ere sa' li hu li xkatakla eriq'uin. ¹⁶ Li Kacua' Jesucristo ut li Dios li kaYucua', li narahoc ke, xban xnimal rusilal naxc'ojob kach'ol chi junelic ut naxq'ue xcacuulal kach'ol chi oybenjnc. ¹⁷ A'an ta ajcui' chic'ojobank ech'ol ut chiq'uehok eacuulal re xyebal ut re xbanunquul li c'a'ru us.

3

Laj Pablo naxtz'ama chiruheb nak te'tijok chirix

¹ Ut anakuan ex inherman, cuan cui'chic c'a'ru nacuaq xtz'amanquul cheru. Nintz'ama cheru nak textijok chikix re nak tayemank li ratin li Kacua' Jesucristo yalak bar ut che'xq'ue xlok'al ut che'pabank taxak jo' nak quexpaban laex. ² Chextijok ajcui' chikix re nak li Dios tac'olok ke chiruheb li cujnk li inc'a' useb xna'lebeb ut neque'banun re li mausilal xban nak moco chixjunileb ta neque'paban re li Dios. ³ A'ut li Kacua' Jesucristo, a'an tic xch'ol ut junelic naxbanu li c'a'ru naxye. A'an taq'uehok xcacuulal ech'ol ut a'an ajcui' tac'olok ere chiru laj tza. ⁴ Ut c'ojc'o kach'ol sa' eben laex sa' xc'aba' li Kacua' Jesucristo nak yoquex chixbanunquul li xkajultica cheru ut nakanau nak tebanu li bar cuan takaye ere. ⁵ A' taxak li Kacua' Jesucristo chitenk'ank ere chixnaubal nak raroquex xban li Dios ut chicuank taxak eriq'uin li cuyuc li naxq'ue li Cristo.

Tento nak totrabajik re nak cuank c'a'ru ke

⁶ Ut nakajultica cheru ex herman, sa' xc'aba' li Jesucristo nak cherisi erib riq'ueineb li herman li yal subuc cutan neque'xbanu ut inc'a' neque'xpab le tijbal q'uebil ere kaban. ⁷ Laex ac nequenau ajcui' chanru xkabanu nak xocuan eriq'uin. Chebanu jo' xkabanu lao. Inc'a' xosubuc cutan nak xocuan eriq'uin. ⁸ Inc'a' xocua'ac yal chi matan. Inc'a' xkac'ul katenk'anquil nak xocuan sa' eyank. Xkatacuasi ban kib chi c'anjelac chi k'ek chi cutan re nak tacuank c'a'ru ke re xnumsinquil li cutan junjunk ut ma' ani xkach'i'ch'i'i sa' eyank. ⁹ Moco xban ta nak macua' ta kac'ulub xc'ulbal katenk'anquil nak xkabanu a'an. Xkabanu chi jo'can yal re nak tetzol erib kig'uin. ¹⁰ Ut nak toj cuanco chak eriq'uin, xkajultica li xyalal a'in cheru: li ani inc'a' naraj trabajic, inc'a' taq'uehek' xcua. ¹¹ Nakaye a'in ere xban nak xkabi resil nak cuan junjunk sa' eyank yal subuc cutan yoqueb. Junes moloc atin neque'xbanu ut inc'a' neque'raj trabajic. ¹² Sa' xc'aba' li Kacua' Jesucristo, ninye reheb li inc'a' neque'raj trabajic nak tento te'trabajic sa' xyalal re nak tacuank c'a'ru reheb re xnumsinquil li cutan junjunk. ¹³ Ut laex, ex herman, inc'a' taxak textitz'k chixbanunquil li us. ¹⁴ Cui ut cuan junak sa' eyank inc'a' naraj xpabanquil li atin a'in li xkatz'iba ere sa' li hu a'in, cheq'uehak retal a'an. Ut merochbeni erib riq'uin re nak taxutanak. ¹⁵ Abanan inc'a' xic' teril. Cheq'uehak ban xna'leb jo' nak naq'uehe' xna'leb junak li itz'inbej.

Laj Pablo naxchak'rabiheb

¹⁶ A' taxak li Kacua' Jesucristo li naq'uehoc tuktuquil usilal, chiq'uehok ere li tuktuquilal chi junelic riq'uin yalak c'a'ru nequec'ul. A' taxak li Kacua' Jesucristo chicuank eriq'uin chejunilex. ¹⁷ Lain laj Pablo. Riq'uin cuuk' yoquin chixtz'ibanquil lin c'aba' jo' c'aynakin chixbanunquil rajlal nak nintz'iba li hu. A'an retalil nak lain xintaklan re li hu a'in. Ut yoquin chixtaklanquil xsahil ech'ol. ¹⁸ A' taxak li usilal li naxq'ue li Kacua' Jesucristo chicuank eriq'uin chejunilex. Jo'can taxak.

Li Xben Hu li Quixtz'iba li San Pablo re laj Timoteo

Laj Pablo nextakla xsahil xch'ol laj Timoteo

¹ Lain laj Pablo. Taklanbilin xban li Jesucristo chi c'anjelac chiru xban nak jo'can quiraj li Dios laj Colol ke. Ut jo'can ajcui' quiraj li Kaçua' Jesucristo li kayo'on. ² At Timoteo, yoquin chi tz'ibac açuiq'uin. Chanchanat li tz'akal cualal nak cuancat xban nak chicuu xapab li Cristo. Chicuanak taxak açuiq'uin li usilal, li uxtan ut li tuktuquikal li naxq'ue li Dios li kaYucua' ut li naxq'ue li Kaçua' Jesucristo.

Laj Timoteo tixch'olob xyalal chiruheb laj pabanel re nak inc'a' te'xpab laj balak'

³ Nacuaj nak tatcanak aran Efeso jo' quintz'ama çacuu nak çoin Macedonia. Tatcanak aran re nak tak'useb li yoqueb chi balak'inc sa' xyankeb laj pabanel. Taye reheb nak te'xcanab xc'utbal li inc'a' yal. ⁴ Ut taye ajcui' reheb nak che'xcanabak xcuech'inquil rix aniheb lix xe' xtonaleb xban nak li na'leb a'an maç'a' roso'jic ut maç'a' na-oc cui'. Taye reheb nak inc'a' chic te'xpab li xe'tonil na'leb. Li na'leb a'in junes yo'oban cuech'inc ib naxbanu. Inc'a' nocoxtenk'a xbanunquil li c'anjel q'uebil ke xban li Dios. Ca'aj cui' li kapabal natenk'an ke. ⁵ At Timoteo, lix yalal li c'a'ru yoquin chixyebal açue, a'an a'in. Xcanabakeb li balak'inc. Che'xq'ue ban xch'ol chixrabaleb li rech aj pabanelil. Ut te'xraheb cui te'cuank sa' tiquikal chi maç'a'ak li c'a'ak re ru nach'i'ch'i'in reheb sa' xc'a'uxeb ut cui te'pabank chi anchaleb xch'ol. ⁶ Eb a'an inc'a' neque'xq'ue retal li xyalal a'in. A' chic li maç'a' na-oc cui' neque'xq'ue xch'ol chixcuech'inquil rix. ⁷ Neque'raj raj xch'olobanquil xyalal li çak'rab. Aj c'utul çak'rab nak neque'xye rib. Abanan inc'a' ajcui' neque'xtau ru li c'a'ru neque'xc'ut usta chanchan neque'xtau ru chi tz'akal li c'a'ru yoqueb chixyebal.

Tento takanau c'a'ru aj e nak q'uebil li çak'rab

⁸ Lao nakanau nak li çak'rab çabil cui nakatau ru c'a'ru aj e nak q'uebil xban li Dios. ⁹ Jo'can nak nacuj nak teq'ue retal nak li çak'rab moco q'uebil ta reheb li tiq'ueb xch'ol. Reheb ban li inc'a' neque'abin ut li neque'k'etoc re li çak'rab. Reheb ajcui' li inc'a' useb xna'leb ut eb laj maç. Reheb ajcui' li inc'a' neque'paban re li Dios chi moco cuanqueb junak xpabaleb. Ut reheb ajcui' laj çamsinel ut li neque'çamsi xna' xyucua'eb. ¹⁰ Li çak'rab reheb laj co'bet laj yumbet ut reheb li neque'maçob riq'uin rech cuinkilal rech ixkilal. Reheb ajcui' li neque'elk'ac cristian. Reheb ajcui' li neque'tic'ti'ic ut li neque'xpatz' xc'aba' li Dios riq'uin yo'obanbil atin. Li çak'rab reheb chixjunleb li neque'xbanu li c'a'ak chic re ru chi mausilal li napo'oc ru li katijbal li tz'akal yal. ¹¹ Li katijbal a'an li quic'ute' chiku xban li lok'laj colba-ib li naxq'ue ke li nimajcual Dios, li tenebanbil sa' inben xyebal resilal yalak bar.

Laj Pablo naxbantioxi chiru li Cristo li rusilal

¹² Ninbantioxi chiru li Kaçua' Jesucristo xban nak a'an xc'ojob xch'ol sa' inben ut xinixxakab chi c'anjelac chiru. Ut a'an naq'uehoc incuanquil chixbanunquil. ¹³ Quixq'ue cue li c'anjel a'in usta ac xinmajecua li Jesucristo ut xinrahobtesi eb laj pabanel ut xinhibeb. Abanan li Jesucristo quiruxтана cuu xban nak toj maji' ninnau bar cuan li tz'akal yal ut toj maji' ninpaban.

¹⁴ Ut li Kaçua' Jesucristo numtajanek cui'chic li cuosobtesinguil quixq'ue. Quixq'ue inpabal ut quixq'ue cue li rahoc li nakatau nak junajo chic riq'uin li Cristo. ¹⁵ Nakanau nak tz'akal yal ut xc'ulub nak takapab chi anchal li kach'ol nak li Cristo Jesús quic'ulun sa' ruchich'och' chixcolbaleb laj mac. Ut lain li k'axal numtajanek inmac sa' xyankeb chixjunileb nak quincuan. ¹⁶ Usta lain k'axalin aj mac nak quincuan, abanan li Jesucristo quiruxtana cuu re nak tixc'utbesi nak k'axal nim lix cuyum re xcuybal xsachbal li mac. Quixc'ut chiruheb lix nimal lix cuyum nak quixcuy inmac lain. A'an quiraj nak lain tinc'amok be chiruheb li ani te'pabank re li Jesucristo ut te'xc'ul li junelic yu'am. ¹⁷ Lok'oninbil taxak li tz'akal Rey li cuan chi junelic k'e cutan, li inc'a' nacam ut inc'a' na-ilman ru, li junaj chi Dios li numtajanek xna'leb. Chikalok'onihak taxak anakcuan ut chi junelic k'e cutan. Jo'can taxak.

Laj Pablo quixye re laj Timoteo chanru taç'anjelac chiru li Dios

¹⁸ At Timoteo, chanchanat li cualal chicuu nak nacatcuil. Tinq'ue acue la taklanquil jo' que'xye li profeta chacuix junxil. Li atin que'xye, a'an taq'uehok xcacuil ach'ol chixbanunquil li c'anjel q'uebil acue. Jo'can ut nak yal ak'e chi c'anjelac chiru li Kaçua'. ¹⁹ Cauhak taxak ach'ol sa' la pabal ut mac'a' taxak li c'a'ru taç'h'i'ch'i'ink acue sa' la ch'ol nak yocat chi c'anjelac chiru li Dios. Ninye acue a'in xban nak cuanqueb li xe'xcanab xbanunquil li tiquil ch'olej. Inc'a' que'xq'ue retal li c'a'ru yo chi ch'i'ch'i'inc reheb lix c'a'ux. Ut riq'uin a'an yoqueb chixtz'ektanunquil lix pabaleb. ²⁰ Sa' xyankeb a'an cuan laj Himeneo ut laj Alejandro. Ac xink'axtesiheb sa' ruk' laj tza re xc'ajtesinquireb ru re nak inc'a' chic te'xmajecua li Dios.

2

Tento nak totijok chirixeb li kas kitz'in jo' ajcui' chirixeb li cuanqueb sa' xcuauquil

¹ Anakcuan a'an a'in li tinye ere: cheq'uehak ech'ol chi tijoc chirixeb chixjunileb le ras eritz'in. Chextz'amank ut chexbantioxink chiru li Kaçua' nak textijok. ² Chextijok chirixeb li rey ut chixjunileb li cuanqueb sa' xcuauquil re nak cuanko sa' xyalal ut tuktuk kach'ol. Ut mac'a' taxak tach'i'ch'i'ink ke sa' li kapabal ut tucak taxak li kach'ol. ³ Chextijok chirixeb chixjunileb xban nak a'an li us xbanunquil ut a'an li nacuulac chiru li Dios laj Colol ke. ⁴ Li Dios naraj nak chixjunileb te'colek' ut te'xtau ru chi tz'akal c'a'ru li yal. ⁵ Ut li yal, a'an a'in: nak jun ajcui' li Dios cuan ut jun ajcui' li na-oquen ut naatinac chixik chiru li Dios. A'an li Kaçua' Jesucristo li quitz'ejcualo' nak quic'ulun sa' ruchich'och'. ⁶ Ut a'an ajcui' li quixq'ue rib chi camc sa' kac'aba' lao re nak taruk tocolek' chikajunilo. Ut nak quicuulac xk'ehil, li Cristo quixc'utbesi chiku li xyalal a'in nak quicam chiru li cruz. ⁷ Ut lain li taklanbilin xban li Dios chixyebal resil li xyalal a'in chiruheb li macua'eb aj judio. Taklanbilin chixyebal resil re nak te'xnau c'a'ru li yal ut te'pabank. Moco tic'ti' ta li yoquin chixyebal. Tz'akal yal nak xakabanbilin chixyebal li resilal reheb.

Che'cuank sa' xyalal eb laj pabanel nak ch'utch'ukeb chixlok'oninuil li Dios

⁸ Yalak bar ch'utch'uquex chixlok'oninuil li Dios, nacua'j nak eb li cuink te'c'amok be chi tijoc. Abanan, tento nak tucak xch'oleb li cuink a'in ut mac'a'ak xjosk'il chi moco te'cuech'ink. ⁹ Ut nacua'j ajcui' nak eb li ixk che'xtikibak rib chi chabil jo' xc'ulub junak aj pabanel ut inc'a' te'xnimobresi rib riq'uin lix tikibanquil chi moco te'xtikib rib yal re nak te'rahek' ru. Jo' ajcui' riq'uin xyibanquil li rismal xjolom. Jo' li c'a' re ru te'xq'ue cui' xsahob ru jo' li oro ut li tertouquil pec. Inc'a' te'xq'ue xcuauquil li neque'xq'ue chok'

xсахоб руheb. ¹⁰ Li ixk li napaban re li Dios, moco riq'uin ta xtikibanquil rib cuan xch'ina'usal. Riq'uin ban lix tiquilal xch'ol. ¹¹ Nak tech'utub erib, eb li ixk inc'a' te'serak'ik. Te'xq'ue ban xch'ol chi tzoloc ut che'pabank chiruheb li cuanqueb xcuauquil. ¹² Lain inc'a' ninq'ueheb li ixk chixch'olobanquil xyalal chiruheb li cheguel cuink, chi moco ninq'ueheb xcuauquil sa' xbeneb li cuink. Eb li ixk inc'a' te'atinak sa' li ch'utubaj ib. ¹³ Ninye a'in xban nak laj Adán quiyo'obtesic xben cua xban li Dios ut chirix a'an quiyo'obtesic lix Eva. ¹⁴ Ut macua' laj Adán li quibalak'ic. A' lix Eva, a'an li quibalak'ic toj retal nak quimacob nak quixk'et ratin li Dios. ¹⁵ Li Dios quixye nak li ixk riq'uin raylal taq'uiresink. Abanan, cuankeb xyu'am chi junelic cui cauhaveb xch'ol sa' lix pabaleb ut cui neque'rahoc ut cui cuanqueb sa' tiquilal ut sa' tuktuquilal.

3

Tento nak chabilak lix na'leb li tac'amok be sa' xyankeb laj pabanel

¹ Yal li neque'xye nak cui cuan junak na-ala sa' xch'ol oc chok' aj c'amol be sa' xyankeb laj pabanel, chabil li naxc'oxla xbanunquil. ² Abanan li ani naxc'oxla oc chok' aj c'amol be, tento nak cuank sa' xyalal re nak ma' ani taatinak chirix. Junak ajcui' li rixakil. Macua'ak aj calajenak. Tento nak sebak xch'ol ut chabilak xna'leb re nak q'uebilak xlok'al. A'anak aj q'uehol ochochnal ut xixq'uehak xch'ol chixc'utbal lix yalal chi tz'akal re ru. ³ Laj c'amol be macua'ak aj calajenak ut macua'ak aj sic'ol plet. Macua'ak aj rahol ru tumin. Tulanak ban ut cuank sa' xyalal. ⁴ Tento nak tixnau taklanc sa' li rochoch re nak li rala' xc'ajol te'x-oxlok'i ut te'abink chiru. ⁵ Cui junak li cuink inc'a' naxnau taklanc sa' li rochoch, zchan ta ru nak taruk tac'amok be sa' xyankeb li rech aj pabanenil? ⁶ Tento nak laj c'amol be acak xq'ui sa' lix pabal. Mare anchal tixnimobresi rib ut tat'ane' sa' li tojbal mac' quit'ane' cui' laj tza. ⁷ Ut tento ajcui' nak chabilak resil lix na'leb yalak bar xbaneb li toj maji' neque'paban. Mac'a'ak xk'usbal re nak inc'a' tixq'ue rib chi alec xban laj tza.

Tento nak chabilak lix na'lebeb li neque'c'anjelac sa' xyankeb laj pabanel

⁸ Ut jo'can ajcui' li neque'c'anjelac sa' xyankeb laj pabanel. Tento nak ticakeb xch'ol. Ut li c'a'ru te'xye te'xbanu, che'xbanuhak ajcui'. Macua'akeb aj calajenak. Ut inc'a' te'xsic' xtumineb riq'uin balak'inc. ⁹ Mac'a' tach'i'ch'i'ink reheb sa' lix c'a'uxeb ut te'xq'ue xcuauquil li kalok'laj pabal li c'utbesinbil chiku xban li Dios. ¹⁰ Jo'can nak xben cua, tat'ilek' atin chirixeb. Cui mac'a' nanauman chirixeb, te'q'uehek' chi c'anjelac sa' xyankeb laj pabanel. ¹¹ Jo'can ajcui' li rixakileb li neque'c'anjelac sa' xyankeb laj pabanel. Chabilakeb lix na'leb. Macua'akeb aj molol atin. Macua'akeb aj calajenak. Ticakeb ban xch'ol ut ticakeb lix c'a'ux riq'uin chixjunil. ¹² Eb laj c'anjel sa' xyankeb laj pabanel, junak ajcui' li rixakil ut te'xnau taklanc sa' xbeneb li rala' xc'ajol. Ut te'xnau ajcui' rilbal lix jun cablal. ¹³ Eb li te'c'anjelac chi chabil, te'oxlok'ik ut te'cacuuk xch'oleb chixyebal resil li kapabal sa' xc'aba' li Jesucristo.

Lix xe' xtional li kapabal

¹⁴ Usta yoquin chi tz'ibac acuiq'uin chirix la taklanquil, at Timoteo, cuan sa' inch'ol nak chi seb tincuulak acuiq'uin. ¹⁵ Abanan mare tinbayk chi cuulac. Jo'can nak yoquin chi tz'ibac acuiq'uin re nak tanau chanru te'c'anjelac li te'xakabak chi c'anjelac sa' xyankeb li neque'paban re li yo'yoquil Dios. Ut lao aj pabanel, lao li nakaq'ue xcuauquil ut nakacol rix li katijbal li tz'akal

yal. ¹⁶ Relic chi yal k'axal lok' li katijbal li quixc'ut chiku li Dios. Naxc'ut chiku li xyalal li kapabal sa' xc'aba' li Jesucristo. Li xyalal a'an a'in: Li Cristo quitz'ejcualo' nak quic'ulun sa' ruchich'och'. Xakabanbil xcuanquil xban li Santil Musik'ej. Qui-ile' ru xbaneb li ángel. Ut a'an li ch'olobanbil resil sa' chixjunil li ruchich'och'. Ut nabaleb li que'paban re sa' ruchich'och'. Ut quic'ame' sa' choxa riq'uin xnimal xlok'al.

4

Li maus aj musik'ej naxc'ut li tijleb inc'a' yal

¹ Li Santil Musik'ej naxc'ut li xyalal chi tz'akal nak sa' eb li cutan chalel cuan li te'xcanab xpabanquil li tijleb li tz'akal yal. Ut te'balak'ik xban li tijleb li inc'a' yal li neque'xq'ue li maus aj musik'ej. ² Tic'ti' li neque'xc'ut eb laj balak'. Inc'a' chic neque'rec'a nak inc'a' us yoqueb. Chanchan nak c'atbil riq'uin ch'ich' lix c'a'uxeb xban li tic'ti' li neque'xye. Jo'can nak inc'a' neque'xq'ue retal nak inc'a' us yoqueb chixbanunquil. ³ Eb a'an neque'xye nak inc'a' us li sumlac ut neque'xye ajcui' nak cuan li tzacaemk inc'a' us xtzacanquil. Abanan moco yal ta li neque'xye. Li Dios quiq'uehoc re li tzacaemk a'in re nak tatzacak. Ut lao aj pabanel li nakanau li xyalal, nakatzaca ut nakabantioxi chiru li Dios nak quixq'ue ke li katzacaemk. ⁴ Chixjunil li quixyo'obtosi li Dios, a'an chabil. Mac'a' xtz'ektananquil. Nakabantioxi chiru li Dios ut nakatzaca. ⁵ Mac'a' xtz'ektananquil xban nak li Dios quixye nak us xtzacanquil ut xban nak nocotijoc sa' xben. Jo'can nak osobtesinbil chic xban.

Quiq'uehe' xna'leb laj Timoteo re nak tacuanq sa' tiquilal

⁶ At Timoteo, cui nacach'olob xyalal li tijleb a'in chiruheb laj pabanel, laakat jun chabil aj c'anjel chiru li Jesucristo. Ut laat yokat chi q'ucic sa' la pabal riq'uin li xyalal ut riq'uin li chabil tijleb li yocat chixpabanquil. ⁷ Chatz'ektana chi jun aj cua chixjunil li najter serak' li yal tontil na'leb naxye, li mac'a' na-oc cui'. Ut q'ue ach'ol chixbanunquil li c'a'ru naraj li Dios. ⁸ Nayeman nak us nak takatzol kib chixch'olaninuil kib re nak cauhalo. Abanan li k'axal cui'chic lok' a'an xtzolbal kib re nak cauhalo kach'ol sa' li kapabal xban nak riq'uin li kapabal cuan li rusilal li Dios kiq'uin anakcuan arin sa' ruchich'och' ut cuank ajcui' li kayu'am chi junelic. ⁹ Relic chi yal nak a'an li tz'akal xyalal li yoquin chixyebal, ut chixjunileb taxak te'pabank re. ¹⁰ Xban nak li yo'yoquil Dios, a'an li kayo'on, jo'can nak yoco xyalbal kak'e chi c'anjelac chiru. A'an naxyechi'i li colba-ib reheb chixjunileb. Abanan, ca'aj cui' li ani te'pabank re, a'aneb li te'colek'. ¹¹ A'an a'in li tijleb li tac'ut chiruheb la cuech aj pabanelil. Tach'olob lix yalal chiruheb. ¹² Ut laat, at Timoteo, chatcuank sa' xyalal ut chat'atinak sa' xyalal. Charaheb la cuas acujtz'in. Cauhak taxak ach'ol sa' la pabal ut ticak taxak la yu'am. Jo'can taxak tabanu re nak ma' ani chitz'ektanank acue xban la sajilal. Che'xtzol ban ribeb acuiq'uin xban nak yokat chixc'ambaleb xbe sa' tiquilal. ¹³ Roybeninuil tincuulak eriq'uin, q'ue ach'ol chi rilbal xsa' li Santil Hu chiruheb laj pabanel. Q'ueheb xna'leb ut tach'olob xyalal chiruheb. ¹⁴ Chaq'ue taxak ach'ol chi c'anjelac jo' quiq'uehe' acue xban li Dios. Li c'anjel a'in q'uebil acue nak eb li profeta que'atinac chacuix ut nak eb laj c'amol be sa' xyankeb laj pabanel que'xq'ue li ruk'eb sa' aben. ¹⁵ Q'ue ach'ol chixbanunquil chixjunil li xinye acue re nak chixjunileb te'xq'ue retal nak tic la yu'am ut te'xq'ue ajcui' retal nak us yo'chi elc li c'anjel yocat chixbanunquil. ¹⁶ Q'ue retal chi us li c'a'ru

tabanu jo' ajcui' li c'a'ru tatzoleb cui'. Cui tabanu chi jo'can, tatcolek' lāat ut te'colek' ajcui' li ani te'ab̄ink re li c'a'ru taje.

5

Laj Timoteo tixq'ue xna'lebeb laj pabanel sa' xyqal

¹ Māk'useb li chequel cūink sa' josk'il. Q'ueheb ban xna'leb jo' la yucua' çaçuu nak taçuilleb. Ut chaq'ueheb ajcui' xna'leb li saj cūink jo'queb açūitz'in çaçuu nak taçuilleb. ² Ut chaq'ueheb xna'leb li chequel ixk jo' la na' çaçuu nak taçuilleb. Ut chaq'ueheb ajcui' xna'leb li saj ixk jo'queb la cuanab çaçuu nak taçuilleb. Chaq'ueheb xna'leb riq'uin xtiquilal açh'ol.

Laj Pablo quixch'olob xyqal chanru nak te'tenk'ak li xmalca'an

³ Cha-oxlok'iheb li xmalca'an ut chatenk'aheb cui yal nak mā ani chic neque'tenk'an reheb. ⁴ Abanan cui cuan ralar xc'ajol, a'an eb chic te'tenk'ank reheb. Tenta nak te'xtzol rib chixbanunqūil chi jo'ca'in re nak te'xnau rilbal lix jun cablaleb. Te'xnau xk'ajcamunqūil lix na' xyucua' jo' nacuulac chiru li Dios. ⁵ Li xmalca'an li jun ātal, ca'aj chic riq'uin li Dios nayo'in. Naxnumsi li cutan ut li k'ōjȳin chi tijoc ut naxtz'ama chiru li Dios nak tātenk'ak. ⁶ Abanan li xmalca'an li naxsic' xsahil xch'ol junes riq'uin li naxrahi ru, li jun a'an chanchan ac camenak xban lix maç usta toj yo'yo. ⁷ Taçh'olob li xyalal a'in chiruheb chixjunileb laj pabanel re nak maç'a'ak xk'usbaleb. ⁸ Tenta nak junak laj pabanel tixtenk'aheb li rech'alal. Ut k'axal cui'chic tento nak tixch'olaniheb li cuanqueb sa' li rochoch. Cui inc'a' naxbanu a'an, li jun a'an inc'a' naxq'ue xcuangūil lix pabal ut k'axal cui'chic nim lix maç chiruheb li toj maji' neque'xpab li Dios. ⁹ Mā ani junak xmalca'an tatz'ibak xc'aba' sa' xyankeb li neque'tenk'ac xbaneb laj pabanel cui toj maji' naxbanu oxc'al chihab. Ut maçua'ak aj muxul ru xsumlajic nak quicuan. ¹⁰ Tenta ajcui' nak li xmalca'an na'noç ru riq'uin li chabilal ac xbanu. Ac xq'uiresiheb lix coc'al sa' xyalal. Quixc'ul li rula' sa' xyalal nak que'cuulac sa' rochoch. Quixch'aj li rokeb li rech aj pabanelil. Quixtenk'aheb li yoqueb chixc'ulbal li raylal. Cui çabil li c'anjel quixbanu, naru tixc'ul lix tenk'anqūil. ¹¹ Abanan, li xmalca'an li toj saheb inc'a' tatz'ibak xc'aba'eb sa' xyankeb li neque'xc'ul xtenk'anqūil xban nak māre te'xra cui'chic ru li sumlaç ut māre anchal inc'a' chic te'xq'ue xch'ol chi c'anjelac chiru li Cristo. ¹² Ut māre anchal che'cuech'ik rix xban nak inc'a' chic te'c'anjelac chiru li Cristo jo' que'xyechi'i xbanunqūil. ¹³ Ut jo' cui' anchal neque'xtzol ribeb chi subuc cutan nak neque'xic sa' li junjunk chi cab. Ut maçua' ca'aj cui' subuc cutan neque'xbanu. Neque'xtzol aj ban cui' li moloc ātin ut li q'uehoc etal ut neque'xye li moco yehec' ta naraj. ¹⁴ Jo'can nak nacuj nak li xmalca'an li toj saheb te'sumlaç cui'chic. Che'cuank ralar xc'ajol ut che'xjolomi lix jun cablar re nak inc'a' tohobek' lāo aj pabanel xbaneb li xic' neque'iloc ke. ¹⁵ Ninye a'in xban nak cuanqueb li xmalca'an li ac que'risi ribeb sa' kayank ut yoqueb chixbanunqūil li c'a'ru naraj laj tza. ¹⁶ Cui junak aj pabanel usta ixk usta cūink, cuan junak rech'alal xmalca'an, tento nak tixtenk'a. Inc'a' tixq'ue nabal li ik sa' xbaneb li rech aj pabanelil li neque'tenk'an reheb li xmalca'an li maç'a'eb ralar xc'ajol.

Laj Pablo quixye chanru te'xbanu laj pabanel li te'c'amok be sa' xyqankeb

¹⁷ Oxlok'inbilakeb li neque'c'amok be chi çabil sa' xyankeb laj pabanel. Ut xc'ulub ajcui' nak te'xc'ul xk'ajcamunqūil xban nak neque'xq'ue xch'ol chixch'olobanqūil xyalal li rātin li Dios ut chixtzolbaleb laj pabanel. ¹⁸ Jo'ca'in tz'ibanbil sa' li Santil Hu: Maçac' xtz'umal re li boyx nak yo

chixyek'inquil ru li trigo re risinquit sa' rix. Canab ban chixcua'bal ca'ch'inak re, nak yo chi c'anjelac. (Dt. 25:4) Jo'can ajcui' laj c'anjel. Tz'ibanbil ajcui' retalil nak tento ajcui' nak tixc'ul lix tojbal. ¹⁹ Mapab li ani tajitok re junak aj c'amol be sa' xyankeb laj pabanel cui yal jun ajcui' li najitoc re. Cuanq ban cuib oxibak li te'jitok re, re nak tapabak nak yal lix mac. ²⁰ Ut li ani cuan xmac, us xk'usbal chiru chixjunileb laj pabanel re nak li jun ch'ol chic aj c'amol be te'xucuak ut te'xc'oxla chi us li c'a'ru te'xbanu. ²¹ Jo' chiru li Dios, jo' chiru li Kacua' Jesucristo, jo' ajcui' chiruheb li santil angel, lain nintz'ama chacuu nak tabanu la taklanquil yoquin chixyebal acue. Ut inc'a' tasic' ru junak. Juntak'etakeb ban chixjunileb nak tacuilfeb. Jun xxiqic nak tak'useb li ani cuanqueb xmac. ²² Maq'ue junak chi c'amoc be sa' junpat sa' xyankeb laj pabanel. Xben cua tacuil chanru lix yu'am xban nak cui laat taxakab chi c'anjelac chi junpat ut na-oc chi macobc, cuan ajcui' mac sa' aben laat. Chatcuank ban chi tic la ch'ol. ²³ Xban nak cuan xyajel la sa', macuuc' junes ha'. Naru tacuuc' ca'ch'inak li vino re xbanbal. ²⁴ Maxakab junak aj c'amol be chi junpat chi c'anjelac xban nak cuanqueb li cujnk nac'utun c'a'ru lix maqueb ut cuan li rakba atin sa' xbeneb. Ut cuanqueb cui'chic toj mokon nac'utun c'a'ru lix maqueb. ²⁵ Ut cuan ajcui' li neque'banun re li chabilal. Cuan nak nac'utun li chabilal neque'xbanu ut cuan nak inc'a' nac'utun. Abanan, toj mokon chic tac'utunk li us neque'xbanu.

6

Laj Pablo quixye chanru te'xbanu li mos riq'uineb lix patrón

¹ Eb li mos aj pabaneleb te'x-oxlok'i lix patroneb re nak ma ani tamajecuank re lix c'aba' li Dios chi moco te'xtz'ektana li katijbal. ² Moco xban ta nak rech aj pabaneleb lix patrón nak inc'a' te'xq'ue sa' xnak'eb ru. Tento aj ban cui' nak te'xq'ue xch'ol chi trabajic xban nak rech aj pabanelil li neque'c'uluc re li chabil c'anjel neque'xbanu ut xban nak raroqueb ajcui' xban li Dios. At Timoteo, a'an a'in li tach'olob xyalal chiruheb laj pabanel.

Eb laj balak' inc'a' us xna'lebeb

³ Cuan li neque'c'utuc re jalan tijleb li moco yal ta. Moco neque'xpad ta li yal li quixc'ut chiku li Kacua' Jesucristo. Jalan cui' lix pabaleb. ⁴ Eb li cujnk a'an mac'a' neque'xnau. Junes xnimobresinquit rib neque'xbanu. Ca'aj cui' xcuech'inquil ribeb chirix atin nacuulac chiruheb. Ut riq'uin a'an nachel li cakalinc, li hoboc, li k'abanc ut li cuibanc ch'olej. ⁵ Eb li cujnk a'in, junes cuech'inc neque'xbanu. Moco tuku ta xc'a'uxeb ut moco yal ta li neque'xye. Neque'xc'oxla nak riq'uin lix pabaleb te'xtau xtumineb. Majunaji acuib riq'uineb a'an. ⁶ Yal nak k'axal lok' li pabal chok' reheb li neque'xc'ojob xch'ol riq'uin li jo' nimal jo' ch'inal cuan reheb. ⁷ Mac'a' cuan ke nak coyo'la sa' ruchi'och' ut mac'a' ajcui' takac'am nak tocamk. ⁸ Jo'can nak cui cuan katzacaemk ut cui cuan kat'icr re xtz'apbal kib, c'ojc'ok kach'ol riq'uin a'an. ⁹ Abanan eb li neque'rahoc ru li biomal, neque'xq'ue rib chi alec ut neque'xbanu li yibru aj na'leb. A'an napo'oc ru lix c'a'uxeb ut riq'uin chixjunil li inc'a' us neque'xbanu, neque'xsach lix pabaleb. ¹⁰ Li xrahinquit ru li tumin, a'an xxe' xtónal chixjunil li mausilal. Cuanqueb li que'xtz'ektana lix pabal xban xrahinquit ru li tumin. Ut q'uila raylal que'xbok sa' xbeneb. Ut neque'yot'ot'nac sa' xch'oleb riq'uin li inc'a' us neque'xbanu.

Laj Pablo quixye re laj Timoteo chanru nak tac'anjelac chiru li Dios

¹¹ Ut laat, at Timoteo, laat aj c'anjel chiru li Dios. Mabanu li mausilal li neque'xbanu eb a'an. Q'ue ban ach'ol chi cuanc sa' tiq'uila. Chara li Dios ut

chatpabank chiru. Charaheb la cuas acuitz'in. Chacuy li raylal ut chatcuank sa' tulanil. ¹² Yal ak'e chi q'uc sa' la pabal ut q'ue ach'ol chirechaniquil li junelic yu'am, li bokbilat cui' xban li Dios. Laat xaye ut xac'utbesi chi tz'akal la pabal chiruheb nabal. ¹³ Sa' xc'aba' li Dios li naq'uehoc yu'am, lain nintz'ama chacuu nak tabanu la taklanquil. Ut nintz'ama ajcui' chacuu sa' xc'aba' li Jesucristo li quich'oloban xyalal chi mac'a' xxiu chiru laj Poncio Pilato. ¹⁴ Ut la taklanquil, a'an a'in: chabanu chixjunil li taklanbilat cui' xban li Kacua'. Tjacak la ch'ol ut mac'a'ak ak'usbal toj retal tac'ulunk cui'chic li Kacua' Jesucristo.

Lok'oninbilak taxak li Dios anakcuan ut chi junelic

¹⁵ Nak tixtau xk'ehil li Dios tixc'utbesi cui'chic chiku li Jesucristo. Li Dios, a'an k'axal lok' ut junaj ajcui'. A'an li Rey li k'axal nim xcuanquil sa' xbeneb chixjunileb li rey li cuanqueb sa' ruchich'och'. Ut a'an ajcui' li Kacua' li k'axal nim xcuanquil sa' xbeneb chixjunileb li cuanqueb xcuanquil. ¹⁶ Li Dios yo'yo chi junelic. Mac'a' xticlajic ut mac'a' roso'jic. A'an cutan saken chi junelic ut ma ani naru na-oc riq'uin xban nak k'axal lok'. Inc'a' ilbil ru chi moco nile' ru sa' ruchich'och'. Chikaq'uehak taxak xlok'al ut chikalok'onihak taxak xban nak k'axal nim lix cuanquilal anakcuan ut chi junelic. Jo'can taxak.

Laj Timoteo tixq'ue xna'lebeb li biom

¹⁷ Tach'olob xyalal chiruheb li biom nak inc'a' te'xk'etk'eti ribeb chi moco te'xc'ojob xch'ol sa' xben li biomal li na-oso'. Che'xq'ue ban xch'ol chixyo'oninquil li yo'yoquil Dios. A'an naq'uehoc ke chi nabal chixjunil li c'a'ak re ru. ¹⁸ Chaye reheb nak che'xbanu li us. Chinumtak lix chabilaleb. Che'xnauhak sihinc chi nabal ut chi anchaleb xch'ol. ¹⁹ Cui neque'xbanu chi jo'can yoqueb chixc'ulanquil lix rabaleb sa' choxa ut riq'uin a'an c'ojc'ok xch'oleb. Che'xbanuhak chi jo'can re nak tacuank lix yu'ameb chi tz'akal re ru ut chi numtajenak xsahil xch'oleb.

Laj Pablo quixrak lix hu riq'uin xq'uebal xna'leb laj Timoteo

²⁰ At Timoteo, cuank sa' ach'ol li tijleb q'uebil acue xban li Dios. Maq'ue xcuanquil li jo' majo'il serak' ut li cuech'ij ib xban nak mac'a' na-oc cui'. Cuan li neque'yehoc re nak chabil na'leb, abanan moco yal ta. ²¹ Ninye a'in xban nak cuan li que'paban re li na'leb a'in ut xban a'an, que'xcanab xpabanquil li tz'akal yal. A' taxak li rusilal li Dios chicuank eriq'uin.

Li Xcab Hu li Quixtz'iba li San Pablo re laj Timoteo

Laj Pablo nextakla xsahil xch'ol laj Timoteo

¹ Lain laj Pablo. Lain x-apóstol li Jesucristo xban nak jo'can quiraj li Dios. Taklanbilin chixyebal resil li ac' yu'am li yechi'inbil ke xban li Dios, li yu'am li naxq'ue ke li Jesucristo. ² Yoquin chixtz'ibanquil li hu a'in acuiq'uin, at Timoteo. Raroqat inban ut chanchanat tz'akal cualal chiciu nak cuancat. Chicuank taxak acuiq'uin li usilal, li uxtan, ut li tuktuquial, li nachal chak riq'uin li Dios li kaYucua' ut riq'uin li Kaçua' Jesucristo.

Inc'a' toxutañak chixyebal resil li evangelio

³ Junelic ninbantioxi chiru li Dios nak nacatinjultica sa' lin tij chi k'ek chi cutan. Ut maç'a' nach'i'ch'i'in cue sa' li cuam nak ninc'anjelac chiru li Dios jo' que'xbanu lin xe'tonil yucua'. ⁴ Nacuaj raj rilbal cui'chic acuu. Jultic cue chanru nak xatpabac xban xrahil ach'ol ut nacuj nak taşahok' cui'chic inch'ol nak tincuil acuu. ⁵ Nak nintijoc najultico' cue nak chi anchal ach'ol xatpaban. Junxil la na'chin lix Loida jo' ajcui' lix Eunice la na' que'paban chi anchaleb xch'ol ut ninnau nak jo'can ajcui' nak xatpaban laa. ⁶ Jo'can nak ninjultica chaçuu nak chaq'uehak chi c'anjelac la mañan q'uebil acue xban li Dios nak quin'ue li cuuk' sa' aben. ⁷ Maçua' li xucuaç li xkamañani chak riq'uin li Dios. Kacuanquil ban xkamañani riq'uin. Li Dios nocoxtenk'a chixrabaleb li kas kitz'in ut a'an naq'uehoc ke li chabil na'leb. ⁸ Jo'can ut nak matxutañac chixch'olobanquil resil li Kaçua' Jesucristo chi moco tatxutañak inban lain xban nak cuanquin chi prexil xban xyebal resil li Kaçua'. Chaq'ue ban açuib chi tz'akonc riq'uin li raylal nac'ulman sa' xc'aba' li evangelio. Ut li Dios taq'uehoc açuanquil chixcuybal. ⁹ A'an quicoloc ke ut quixsic' chak ku re nak toc'anjelac sa' tiçuilal. Maçua' xban kayehom kabanuhom nak quixsic' ku. Yal xban li rusilal ban, xban nak jo'can quiraj. Sa' xc'aba' li Jesucristo nak quiruxtaña ku, xban nak ac jo'can chak sa' xch'ol junxilaj nak toj maji' quixyib li ruchich'och'. ¹⁰ Li usilal a'in quic'utbesic chiku riq'uin lix c'ulunic sa' ruchich'och' li Kaçua' Jesucristo laj Colol ke. Ut a'an qui-isin re xcuanquil li çame ut quixc'ut chiku li ac' yu'am li maç'a' roso'jic. ¹¹ Li Dios quixakaban cue chi c'anjelac chok' apóstol ut chok' aj tzolol reheb li maçua'eb aj judío re nak tinge resil li colba-ib reheb. ¹² Jo'can nak nincuy chixjunil li raylal ut inc'a' ninxutanac xban nak c'ojc'o inch'ol riq'uin li Kaçua'. A'an li ninpab ut xink'axtesi cuib sa' ruk'. Ninnau nak a'an tañenk'ank cue toja' yal nak taç'ulunk cui'chic li Jesucristo. ¹³ Chicuank sa' ach'ol li tijleb li tz'akal yal li xinc'ut chaçuu. Ut chicuank la pabal ut chatrahok xban nak rehat chic li Cristo. ¹⁴ Riç'uin xcuanquil li Santil Musik'ej li cuan acuiq'uin, chaç'ulahak sa' ach'ol li xyalal li lok'laj colba-ib k'axtesinbil acue xban li Dios. ¹⁵ Laa nacanau nak chixjunileb laj pabanel li cuanqueb Asia xine'xcanab injunes. Sa' xyankeb a'an cuanqueb laj Figelo ut laj Hermógenes. ¹⁶ Ca'aj chic laj Onesiforo q'uila sut colinril sa' tz'alam ut quixc'ojob inch'ol ut inc'a' quixutañac xban nak bac'boquin chi cadena. A' taxak li Kaçua' Dios chiosobtesinac re li jun cabal a'an. ¹⁷ Nak quic'ulun arin Roma, laj Onesiforo quinxsic' chi anchal xch'ol toj retal quinxtau. ¹⁸ Laa nacanau chi tz'akal nak quixq'ue xch'ol chi tenk'anc aran Efeso. A' taxak li Kaçua' Dios chixutañak ru sa' xk'ehil xc'ulunic li Kaçua' Jesucristo.

2

Tento xcyubal xnumsinquil li raylal sa' xc'aba' li Jesucristo

¹ A'ut anakcuan, at Timoteo, cauhak ač'ol riq'uin li usilal q'uebil ke xban nak reho chic li Cristo Jesús. ² Li xyalal li xinc'ut chačuu chiruheb nabaleb li cristian, a'an ajcui' chajultica chiruheb li cuñk li tiq'ueb xch'oleb re nak eb a'an chic te'c'utuk re chiruheb jalaneb chic. ³ Chattz'akonk riq'uin li raylal li nakac'ul ut chacyak xnumsinquil chixjunil li raylal jo' jun xchabil soldado li Jesucristo. ⁴ Junak soldado inc'a' naru naxsic' jalan xc'anjel xban nak ac sic'bil ru chok' soldado. Naxq'ue ban xch'ol chixbanunquil li nacuulac chiru li nataklan re. ⁵ Ut jo'can ajcui' li naxyal xk'e chi alinac, inc'a' naxc'ul lix mañan cui inc'a' naxbanu chi tz'akal re ru. ⁶ Laj c'alom li nac'anjelac chi cau tento nak a'an li xben li tatz'ak ru li racuimk. ⁷ C'oxlan chirix li oxib chi na'leb li xinye acue ut a' taxak li Kačua' Jesucristo chitenk'añk acue chixtaubal ru li xyalal. ⁸ Chijulticok' acue nak li Jesucristo, a'an xcomoneb li ralar xc'ajol li rey David ut a'an li quicuacli cui'chic chi yo'yo sa' xyañkeb li camenak. A'an a'in li resilal li evangelio li yoquin chixyebal lain. ⁹ Sa' xc'aba' li evangelio yoquin chixc'ulbal li raylal a'in, ut bac'boquin chi cadena. Chanchan nax re junak k'axal nim xmac. Usta bac'boquin, abanan li resil li evangelio tayemañk yalak bar xban nak li ratin li Dios inc'a' naru xmukbal. ¹⁰ Jo'can nak nincuy xnumsinquil chixjunil li raylal li ninc'ul sa' xc'aba'eb li sic'bileb ru xban li Dios re nak eb a'an naru te'xtau li lok'laj colba-ib li naxq'ue li Jesucristo ut te'xtau ajcui' lix lok'al chi junelic. ¹¹ Li atin a'in li oc cue xyebal acue, a'an tz'akal yal: Cui cocom kochben li Cristo, tačuank ajcui' kayu'am kochben. ¹² Cui takacuy xnumsinquil li raylal, taq'uehek' ajcui' kacuanquil xban li Dios kochben li Cristo. Ut cui lao nakatz'ektana, a'an toxtz'ektana ajcui' lao. ¹³ Cuan nak lao inc'a' nakabanu li c'a'ru nakaye, abanan li Dios tic'xch'ol ut junelic naxbanu li c'a'ru naxye. A'an inc'a' nacuiban xch'ol.

Laatak jun chabil aj c'anjel chiru li Dios chi mač'a' c'a'ru taxutanak cui'

¹⁴ Chajultica li xyalal chiruheb laj pabanel. Sa' xc'aba' li Kačua' Dios chayehak reheb nak che'xcanabak xcuech'inquil ribeb chirix atin xban nak a'an mač'a' na-oc cui'. Ca'aj cui' xpo'baleb xch'ol li neque'abin re naxbanu. ¹⁵ Chaq'uehak ač'ol chi c'anjelac chiru li Dios jo' junak tz'akal aj c'anjel mač'a' c'a'ru taxutanak cui'. Chach'olobak chi tz'akal resil li colba-ib chiruheb. ¹⁶ Mat-oquen riq'uin jo' majo'il serak', li mač'a' na-oc cui'. Li neque'banun re chi jo'can k'axal cui'chic neque'xq'ue xch'ol chixbanunquil li mausilal. ¹⁷ Naniman ru li tijleb li neque'xc'ut. Chanchan nak naniman ru junak yajel jo' li cáncer xc'aba'. Jo'can que'xbanu laj Himeneo ut laj Fileto. ¹⁸ Eb a'an que'xcanab xpabanquil li tz'akal yal ut que'xpab li tic'ti'. Neque'xye nak ac que'cuacli chi yo'yo eb li camenak, chanqueb. Ut riq'uin a'an cuan li yoqueb chixpo'bal ruheb lix pabaleb. ¹⁹ Abanan li xyalal q'uebil ke xban li Dios inc'a' naru najalman ru. Jo'ca'in tz'ibanbil sa' li Santil Hu: li Dios naxnau ruheb li ralar xc'ajol, ut chixjunileb li te'xc'aba'in xc'aba' li Kačua', tento nak te'xcanab chi junaj cua li mausilal. ²⁰ Sa' junak xnimar ru cab cuan li sec' yibanbil riq'uin oro ut plata. Ut cuan li ch'och' sec' ut cuan ajcui' li sec' yibanbil riq'uin che'. Cuan li chabil xc'anjel ut cuan li yalak c'a'ru nac'anjelac cui'. ²¹ Cui junak aj pabanel naraj taq'uehek' re jun lix chabil c'anjel xban li Dios, tento nak li jun a'an tixcanab chi junaj cua chixjunil li mausilal. Cui tixbanu chi jo'can, li jun a'an k'axtesinbilac chic chi c'anjelac chiru li Kačua' ut cauresinbilac chic chixbanunquil li chabil c'anjel. ²² Jo'can utan chatz'ektana chi junaj cua li inc'a' us li neque'xrahi ru li toj saheb. Ut q'ue ač'ol chicuank sa' tiq'uilal ut chatpabank chi tz'akal. Charahakeb la

cuas acujtz'in ut chatcuank sa' usilal riq'ueib chixjunileb. Laakat jun sa' xyankeb li tiqueb xch'ol li neque'tijoc chiru li Dios. ²³ Macua'akat jun sa' xyankeb li neque'xcuech'i rib chirix tontil atin li mac'a' aj e. Laat ac nacanau nak li cuech'inc ib junes ra xic' naxq'ue. ²⁴ Junak aj c'anjel chiru li Kacua' macua'ak aj sic'ol ra xic'. Tulanak ban riq'ueib chixjunileb. Cuank xna'leb re xc'utbal li xyalal chiruheb li ras rjtz'in ut nimak xcuyum. ²⁵ Ut sa' tulanil chixch'olobak xyalal reheb li neque'cuech'in rix li xyalal. Mare chan nak li Dios tatenk'ank reheb chixyot'bal xch'oleb, chixjalbal xc'a'uxeb re te'xnau ru li yal. ²⁶ Ut te'risi rib sa' ruk' laj tza li yo chi alenc reheb re nak inc'a' chic te'xbanu li c'a'ru naraj a'an. Ut te'suk'ik taxak sa' li tz'akal xyalal.

3

Tanumtak li mausilal sa' ruchich'och' sa' roso'jiqueb li cutan

¹ Nacuaj ajcui' nak tanau nak k'axal xiu xiu li cutan te'chalk chiku nak tanach'ok chak roso'jiqueb li cutan. ² Eb li cristian junes reheb te'raj. Te'xrahi ru li tumin. Te'xnimobresi xcuanquil xjuneseb rib. Te'xk'etk'eti ribeb. Te'hobok ut te'xk'et ratin xna' xyucua'. Inc'a' te'tioxink ut inc'a' te'xq'ue xcuanquil xpabanquil li Dios. ³ Mac'a'ak rahoc riq'ueib. Mac'a'ak usilal riq'ueib. Telaje'xyo'ob atin chi ribileb rib. Aj k'abanelakeb. Inc'a' te'xcuy rib. Josk'akeb ut xic' te'ril li chabilal. ⁴ Te'xk'axtesi li ras rjtz'in sa' ruk'eb li xic' neque'iloc reheb. Cauhakeb rib chixbanunquil li inc'a' us. Tanumtak lix k'etk'etileb. Inc'a' te'xra li Dios. A' ban chic lix saylal li ruchich'och', a'an chic li te'xra. ⁵ Te'xye rib nak aj pabaneleb, abanan inc'a' te'xq'ue xcuanquil li pabal. At Timoteo, majunaji acuib riq'ueib a'an. ⁶ Sa' xyankeb a'an cuanqueb li cuink li neque'xsic' chanru te'oc sa' eb li cab chi balak'inc ut neque'xc'ut lix tijleb chiruheb li ixk li mac'a'eb xna'leb, li neque'rec'a nak aj maqueb, ut junes li c'a'ak re ru neque'xrahi ru, a'an li neque'xbanu. ⁷ Ut eb li ixk a'in junelic yoqueb chixtzolbal li c'a'ak re ru chi tijleb, abanan inc'a' neque'xtau ru li xyalal. ⁸ Eb a cuink a'an yoqueb chixbanunquil jo' que'xbanu laj Janes ut laj Jambres nak que'xcuech'i rix laj Moisés. Neque'xtz'ektana li yal. Inc'a' useb lix na'lebeb ut mac'a' neque'oc cui' xban nak tz'ektanabil li pabal xbaneb. ⁹ Aban inc'a' ajcui' us taek chiruheb xban nak ch'olch'ok chiruheb chixjunileb nak xmajelil xna'lebeb te'xbanu cui', jo' que'xc'ul laj Janes ut laj Jambres nak que'xcuech'i rix laj Moisés.

Laj Pablo naxq'ue xna'leb laj Timoteo

¹⁰ Abanan laat, Timoteo, ac nacanau li tijleb ninch'olob xyalal. Xaq'ue retal chanru nincuan ut li c'a'ru ninc'oxla xbanunquil. Xaq'ue retal lin pabal ut chanru nak nincuyuc ut chanru ninrahoc. Ut xaq'ue ajcui' retal chanru xcacuilal lin ch'ol. ¹¹ Ac xaq'ue retal chanru nak xincuy xnumsinquil li ra xic' ut li raylal li xinc'ul xban xyebal resil li evangelio aran sa' eb li tenamit Antioquia, Iconio ut Listra. Chixjunil li raylal quilajincuy xnumsinquil ut li Kacua' xcoloc cue chiruheb chixjunil li raylal a'an. ¹² Ut yal ajcui' nak te'rahobtesik li jo' q'ualeb li te'raj cuanc sa' tiquilal sa' xc'aba' li Jesucristo. ¹³ Ut tanumtak lix mausilaleb laj balak' li inc'a' useb xna'leb. Yoqeb chi balak'inc ut yok ajcui' xbalak'inquileb a'an. ¹⁴ A'ut laat, Timoteo, junelic taxak cauhaq ach'ol chixpabanquil li xyalal li xatzol cui' chak acuib. Ac nacanau nak tz'akal yal ut nacanau aniheb li xatzol cui' chak acuib. ¹⁵ Chalen chak toj sa' aca'ch'inal ac nacanau xsa' li Santil Hu. Nacanau nak a'an li nac'utuc li xyalal chiku nak li colba-ib natauman riq'uin xpabanquil li

Jesucristo. ¹⁶ Chixjunil li tz'ibanbil sa' li Santil Hu, a'an musik'anbil xban li Dios ut nac'anjelac re xc'utbal chiku li xyalal. Nac'anjelac re kak'usbal ut re xq'uebal kana'leb ut naxc'ut chiku chanru nak tocuank sa' tiq'uilal. ¹⁷ Li Santil Hu naxc'ut chiru li nac'anjelac chiru li Dios chanru nak taçuank chi tz'akal re ru lix yu'am ut naxtenk'a a'an re nak cauresinbilak chi tz'akal re xbanunquil chixjunil li chabil c'anjel.

4

¹ Nintz'ama chaçuu sa' xc'aba' li Dios nak tach'olob li xyalal. Ut nintz'ama ajcui' sa' xc'aba' li Kaçua' Jesucristo, li tarakok atin sa' xbeneb li yo'yoqueb ut li camenakeb nak tachalk cui'chic riq'uin lix nimal xcuanquil. ² Lain nintz'ama chaçuu nak tach'olob xyalal li ratin li Dios. Chayal ak'e chixbanunquil chi junelic usta naxq'ue rib chaçuu usta inc'a'. Chatijeb ut chak'useb. Chaq'ue xcacuulal xch'oleb ut chicuank acuyum ut inc'a' taçanab xc'utbal li xyalal chiruheb. ³ Tento nak taç'ut li xyalal chiruheb xban nak taçuulak xk'ehil nak inc'a' chic te'raj rabinquil li tipleb tz'akal ya. A' chic li jun tıbeeb chi aj tzolonel, a'an chic li te'xtake re nak tayehek' reheb c'a'ru li te'raj rabinquil ut a'an chic li te'xq'ue xch'ol chirabinquil. ⁴ Inc'a' chic te'raj rabinquil lix ya. A' chic li serak' li maç'a' na-oc cui', a'an chic li te'raj rabinquil. ⁵ A'ut laa, Timoteo, chaq'uehak retal chi us li c'a'ru tabanu. Chacuyak xnumsinquil li raylal ut chajulticak resil li santil evangelio ut chabanuhak la c'anjel chi tz'akal. ⁶ Ut lain, sa' xc'aba' li Kaçua' taçosok' lin yu'am jo' jun li mayej chiru. Yo' chi cuulac xk'ehil nak tincamsik. ⁷ Xinyal ink'e chixbanunquil li chabil c'anjel. Xinq'ue inch'ol chixbanunquil chi tz'akal li tenebanbil sa' inben xbanunquil ut chi anchal inch'ol xinpaban. ⁸ Anakcuan ca'aj chic lin matan nacuoyneni li naq'uehe' reheb li tiq'ueb xch'ol. Li Kaçua' li narakoc atin sa' tiq'uilal, a'an taq'uehok cue sa' li cutan nak tol-ekl cui'chic. Ut moco ca'aj cui' ta cue lain xinq'ue. Tixq'ue aj ban cui' reheb chixjunil li yoqeb chi oybeninc re lix c'ulunic chi anchaleb xch'ol.

Laj Pablo naxye re laj Timoteo c'a'ru tixbanu

⁹ Chalkat chicuilbal chi junpat. ¹⁰ Cuanquin injunes arin. Laj Demas xinixcanab xban xrahinquil ru li c'a'ak re ru cuan sa' ruchich'och' ut xco sa' li tenamit Tesalónica. Laj Crescente xco Galacia chi c'anjelac ut laj Tito xco sa' li na'ajej Dalmacia. ¹¹ Chixjunileb li neque'tenk'an cue ma' anihob chic. Ca'aj chic laj Lucas cuan cuiq'uin. Jo'can nak nintz'ama chaçuu nak tanume'bok chak laj Marcos ut taç'am chak chaçuix nak tatchalk. A'an tinixtenk'a chi chabil sa' li c'anjel. ¹² Ut laj Tíquico xintakla sa' li tenamit Efeso. ¹³ Nak tatchalk, chac'amak chak cue li capa quincanab chak sa' li tenamit Troas sa' rochoch laj Carpo. Ut chac'amak ajcui' chak li hu. Li k'axal nacuj ru, a'an li tz'um li tz'ibanbil ru. ¹⁴ Laj Alejandro, laj tenol ch'ich', nabal chi raylal xbanu cue. Li Kaçua', a'an li tak'ajcamunk re riq'uin li c'a'ru naxbanu. ¹⁵ Chacolak ajcui' acuib laa chiru a'an xban nak k'axal xic' narabi resil li colba-ib li nakaye. ¹⁶ Nak quinboke' xben cua riq'uin laj rakol atin, ma' ani quiatinac chicuix. Quine'xcanab injunes chixjunileb. Miq'uehe' ta li maç a'in sa' xbeneb. ¹⁷ Abanan li Kaçua' quitenk'an cue ut quixq'ue xcacuulal inch'ol re xjulticanquil chi tz'akal resil li colba-ib re nak chixjunileb li maçu'a'eb aj judio te'rabi resil li evangelio. Jo'can nak quincole' sa' ruk' li cakcoj. ¹⁸ Ut li Kaçua' taçolok cue chiru li maçusalil neque'xc'oxla xbanunquil cue ut tinixc'am sa' lix nimajcual cuanquilal aran sa' choxa. A'an taxak chilok'onimank chi junelic k'e cutan. Jo'can taxak.

Laj Pablo nextakla xsahil xch'oleb laj pabanel li cuanqueb Efeso

¹⁹ Chaq'ueheb xsahil xch'oleb lix Prisca ut laj Aquila jo'queb ajcui' chixjunileb li cuanqueb sa' rochoch laj Onesíforo. ²⁰ Laj Erasto quicana chak aran Corinto. Ut laj Trófimo toj yaj nak quincanab sa' li tenamit Mileto. ²¹ K'axal us cui tatchalk nak toj maji' naticla li habalk'e. Xtakla xsahil ach'ol laj Eubulo, jo'queb ajcui' laj Pudente, laj Lino, lix Claudia ut chixjunileb li herman li cuanqueb arin. ²² A' taxak li Kaçua' chicuank acuiq'uin. Ut a' taxak li rusilal li Dios chicuank eriq'uin laex chejunilex. Jo'can taxak.

Li Hu li Quixtz'iba li San Pablo re laj Tito

Laj Pablo naxq'ue xsahil xch'ol laj Tito

¹ Lajin laj Pablo. Yoquin chi tz'ibac acuiq'u'in, at Tito. Ninc'anjelac chiru li Dios ut lajn x-apóstol li Jesucristo. Xakabanbilin xban li Jesucristo re xtenk'anquileb li sic'bileb ru xban li Dios re nak tz'akalak re ru lix pabaleb. Ut xakabanbilin re xtenk'anquileb re nak te'xtau ru chi tz'akal li xyalal li colba-ib ut tañicobresik lix ch'oleb. ² Ninch'olob li xyalal a'in chiruheb re nak te'pabank ut te'xyo'oni li junelic yu'am. Najter k'e cutan li Dios quixyechi'i chak li junelic yu'am. Li Dios inc'a' natic'ti'ic. ³ Nak quicuulac xk'ehil li Dios laj Colol ke quixc'utbesi li xyalal li colba-ib chiku. Tenebanbil sa' inben xban li Dios xch'olobanquil xyalal li colba-ib yalak bar. ⁴ Yoquin chi tz'ibac acuiq'u'in, at Tito. Laat chanchanat tz'akal cualal sa' xc'aba' li kapabal. Chicuanak taxak acuiq'u'in li usilal ut li tuktuquuilal li naxq'ue li Dios li kaYucua' ut li naxq'ue li Jesucristo laj Colol ke.

Li c'anjel tenebanbil sa' xben laj Tito

⁵ Xatincanab aran sa' li tenamit Creta re nak tac'ub ru li c'a'ru toj yibac naraj ut re nak taxakabeb li te'c'amok be chiruheb laj pabanel sa' li junjunk chi tenamit. Jo' xinye acue, jo'can tabanu. ⁶ Ticak xch'ol li ani taxakab re nak mac'a' tayehek' chirixeb. Junak ajcui' li rixakil ut aj pabanelakeb li ralar xc'ajol. Chabilakeb xna'leb ut te'abink chiruheb lix na' xyucua'. ⁷ Li ani nac'amoc be chiruheb laj pabanel, li jun a'an aj c'anjel chiru li Dios. Jo'can nak tento nak ticak xch'ol re nak ma' ani taatinak chirix. Moco k'etk'etak ta ut moco ch'inpo'ak ta, chi moco tacialak, chi moco tapletik. Ut macua'ak aj rahol ru biomal, chi moco tixsic' xtumin riq'u'in balak'ic. ⁸ Junak aj c'anjel chiru li Dios naxc'uleb li rula' chi sa' xch'ol ut nasaho' ajcui' sa' xch'ol riq'uineb li neque'banun re li us. Laj c'anjel chiru li Dios toj naxc'oxla chi us li c'a'ru naxbanu ut junelic cuank sa' usilal riq'uineb li ras ritz'in. Tic xch'ol ut naxcuy xnumsinquil li raylal ut li alec. ⁹ Inc'a' nach'inan xch'ol sa' lix pabal. Naxpab ban chi anchal xch'ol li xyalal li quic'ute' chiru re nak tixnau xch'olobanquil li xyalal chiruheb li rech aj pabanelil ut tixnau xq'uebal xna'lebeb li neque'cuech'in re li c'a'ru naxye. ¹⁰ Chaq'uehak retal ani taxakab chok' aj c'amol be xban nak nabaleb li inc'a' neque'xtau xyalal. Neque'atinac chi mac'a' rajbal ut neque'xbalak'i li tenamit. K'axal cui'chic nabaleb jo'caneb xna'leb sa' xyankeb li kech aj pabanelil aj judio. ¹¹ Eb a'an tento xk'usbaleb re nak te'xcanab li balak'inc. Yoqeb xpo'bal xch'oleb li junk cabal riq'u'in xc'utbal li moco yal ta. Riq'u'in balak'inc neque'xtau lix tumineb. ¹² Eb laj Creta que'xq'ue jun li cuink aj k'e chok' xprofeteb. Li cuink a'an quixye chi jo'ca'in chirixeb li rech tenamitil: laj Creta junes tic'ti'ic neque'xbanu. Chanchaneb li josk' aj xul. Eb a'an aj num cua'ineleb ut inc'a' neque'raj trabajic, chan. ¹³ Ut yal ajcui' li quixye. Jo'can nak cau chak'useb re nak te'cacuuk xch'oleb sa' lix pabaleb. ¹⁴ Chak'useb re nak inc'a' te'xpab li tic'ti' li neque'xyo'ob laj judio chi moco che'xpab lix chak'rabeb li cuink li neque'tz'ektanan re li tz'akal yal. ¹⁵ Li tiqueb xch'ol, chixjunil li c'a'ak re ru chabil chiruheb xban nak neque'xsic' li c'a'ru chabil. A'ut eb li inc'a' tiqueb xch'ol, mac'a' c'a'ru us chiruheb xban nak numtajanak xyibal ru lix na'lebeb ut inc'a' us lix c'a'uxeb. ¹⁶ Neque'xye nak neque'xpab li Dios, aban riq'u'in li c'a'ru neque'xbanu nac'utun nak moco yal ta. Aj k'etoleb ratin li

Dios ut k'axal yibru lix na'lebeb. Inc'a' useb. Mac'a' junak çabil c'anjel taruk te'xbanu.

2

Laj Tito tenebanbil sa' xben xq'uebal xna'leb laj pabanel

¹ Abanan li c'a'ru tach'olob chiruheb laj pabanel, chaq'uehak retal re nak a'an tz'akal lix yalal li tach'olob chiruheb. ² Chaq'ueheb xna'leb li chequel cuink re nak inc'a' te'calak ut çabilakeb xna'leb. Toj che'xc'oxla chi us li c'a'ru te'xbanu ut che'pabank chi anchaleb xch'ol. Chixjunil li te'xbanu, che'xbanuhak xban nak neque'xra li ras ritz'in ut che'xcuyak li raylal. ³ Ut chaq'ueheb ajcui' xna'lebeb li chequel ixk. Chic'utunk lix lok'aleb riq'uin lix tiquial xch'oleb. Inc'a' te'xyo'ob atin chirixeb li ras ritz'in ut inc'a' te'calak. A'anakeb ban chic aj c'amol be sa' li tiquial. ⁴ Riq'uin lix çabilal li chequel ixk te'xc'ut chiruheb li ixakilbej li toj saheb nak te'xra lix belom jo' ajcui' lix coc'aleb. ⁵ Te'xc'ut chiruheb nak çabilakeb xna'leb, ticakeb lix ch'oleb ut te'ril lix jun cablal chi us. Çabilakeb ut che'pabank chiru lix belomeb. Che'cuank sa' xyalal re nak inc'a' tasachmank xcuanquil li colba-ib q'uebil ke xban li Dios. ⁶ Ut chaq'ueheb ajcui' xna'lebeb li saj cuink re nak te'xc'oxla chi us li c'a'ru te'xbanu re nak te'cuank sa' tiquial. ⁷ Ut riq'uin chixjunil li c'a'ak re ru tabanu, laät tate'amok be chiruheb sa' tiquial. Chi anchalak ach'ol ut çabilak la yu'am nak tac'ut li xyalal chiruheb. ⁸ Ut nak tatatinak, tz'akal re ru li c'a'ru taye re nak ma ani taçuech'ink rix li c'a'ru taye. Chi jo'can te'xutanak li xic' neque'iloc ke ut mac'a' c'a' re ru naru te'xye chikix lao aj pabanel. ⁹ Chaq'ueheb ajcui' xna'lebeb li mos re nak che'abink chiruheb lix patroneb. Inc'a' te'sumenk. Che'xbanuhak ban li c'a'ru tayehek' reheb re nak sahakeb sa' xch'ol lix patrón riq'ueineb. ¹⁰ Inc'a' che'relk'a li c'a'ru reheb lix patroneb. Che'xbanuhak ban lix c'anjel chi çabil ut chi anchalakeb xch'ol re nak taq'uehek' xlok'al li resilal li Dios li kaColonel riq'uin chixjunil li te'xbanu. ¹¹ Li Dios quixc'utbesi lix nimal ruxtan re xcolbaleb chixjunileb li cuanqueb jun sut rubel choxa. ¹² Lix nimal ruxtan li Dios naxc'ut chiku nak li Dios naraj nak takacanab xbanunquil li mausilal. Chikacanab xbanunquil li inc'a' us li naxrahi ru li kach'ol. Sa' xyalal ban chikanumsihak li cutan sa' li ruchich'och' a'in. Tocuank sa' tiquial riq'ueineb li kas kitz'in ut chikabanuhak taxak li naraj li Dios. ¹³ Jo'can taxak yoko nak yoko chiroybeninquil li lok'laj cutan nak tol-elk cui'chic li Jesucristo li nakayo'oni. Sa' li cutan a'an tac'utbesik chiku lix lok'al li kanimajcual Dios, li Jesucristo laj Colol ke. ¹⁴ A'an quixk'axtesi rib chi camc sa' kac'aba' lao re nak tocelek chiru li mausilal. Quixbanu a'an re xticosresinguil li kach'ol ut re nak chikaq'uehak kach'ol chixbanunquil li us. ¹⁵ Chixjunil li na'leb a'in li yoquin xtz'iban-quil acuiq'uin, a'an li tach'olob chiruheb. Chaq'ueheb xna'leb ut çak'useb cui inc'a' us yoqueb xban nak tenebanbil sa' aben xban li Dios xbanunquil. Ut ma ani chitz'ektanank acue.

3

Li c'a'ru us te'xbanu laj pabanel

¹ Chajultica ajcui' chiruheb nak che'pabank chiru li acuabej. Ut che'pabank ajcui' chiruheb chixjunileb li cuanqueb sa' xcuanquil. Ut sebak xch'oleb chixbanunquil li çabil c'anjel. ² Ut çaye ajcui' reheb nak inc'a' te'xyo'ob atin chirixeb li ras ritz'in ut inc'a' te'cuch'ink. K'unakeb ban xch'ol ut çabilakeb. Ut che'cuank sa' usilal riq'ueineb chixjunileb li ras ritz'in. ³ Lao

junxil inc'a' us li kana'leb nak xocuan chak. Xkak'et ratin li Dios ut inc'a' xo-abin chiruheb li cuanqueb xcuanquil. Xkaq'ue kib chi balak'ic. Xkabanu chak li mausalil li naxrahi ru li kach'ol. Xkanumsi li cutan xbanunquil li mausalil. Xocakalin ut xic' nakil kib chi kibil kib. ⁴ Abanan quicuulac xk'ehil nak li Dios laj Colol ke quixc'utbesi chiku li rusilal ut li ruxtan. ⁵ Li Dios soxcol ut xorisi sa' li kanajter na'leb. Macua' xban kayehom kabanuhom chi moco xban lix tiquilal li kach'ol. Yal xban lix nimal ruxtan li Dios nak coxcol. Cuybil sachbil chic li kamac ut ac'obresinbil chic li kayu'am xban li Santil Musik'ej. ⁶ Xban nak li Jesucristo quicam re kacolbal, numtajanak li kosobtesinquil xban li Dios nak quixq'ue chak li Santil Musik'ej chi cuanc kiq'uin. ⁷ Jo'ca'in quixbanu re nak taticok' li kach'ol xban ximal rusilal li Dios ut takechani li junelic yu'am li yoco chiroybeninquil. ⁸ Li atin a'in li xinye acue, a'an li tz'akal yal. Lain nacuj nak tach'olob li xyalal a'in chiruheb li ac xe'xpa' li Dios re nak te'xq'ue xch'ol chi c'anjelac sa' chabilal. Li xyalal a'in k'axal chabil ut tac'anjelac chiruheb chixjunileb. ⁹ Matz'il rix li c'a'ak re ru chi atinul li mac'a' rajbal ut macuech'i rix lix xe' xtonal li junjunk. Ut macuech'i rix li chak'rab li quiq'uehe' re laj Moisés. Mac'a' aj e xbanunquil a'an xban nak li cuech'inc mac'a' na-oc cui'. ¹⁰ Ut cui junak cuink aj po'ol ch'olej yo chi tacchi'inc sa' xyankeb laj pabanel, taq'ue xna'leb jun sut malaj cuib sut ut cui inc'a' na-abin chacuu, inc'a' chic texcuank sa' comonil riq'uin. ¹¹ Nanauman nak li jun a'an ac xpo' xch'ol ut namacob xban nak naraj tixpo' xch'oleb laj pabanel. A'an raylal naxc'am chak sa' xben xjunes rib.

Laj Tito quiyehé' re c'a'ru tixbanu

¹² Tintakla acuiq'uin laj Artemas malaj ut laj Tiquico. Nak taçuulac acuiq'uin, tatxic chi junpat Nicópolis. Aran toxingtau xban nak ninc'oxla nak us tinnumsi li habalk'e aran. ¹³ Chaq'ue ach'ol chixtenk'anquileb nak te'elk aran laj Apolos jo' ajcui' laj Zenas laj na'ol chak'rab. Chatenk'aheb nak te'xic re nak cuank c'a'ru reheb ut mac'a' chipaltok reheb. ¹⁴ Eb li kech aj pabanelil tento nak te'xtzol rib xbanunquil li usilal ut te'xtzol ajcui' xtenk'anquileb li tenk'ac te'raj re nak inc'a' taçanank chi mac'a' rajbal lix pabaleb.

Xq'uebal xsahil xch'oleb laj pabanel

¹⁵ Chixjunileb li cuanqueb cuochben neque'xtakla xsahil ach'ol. Ut chaq'ue ajcui' xsahileb xch'ol li kech aj pabanelil. Nakara kib chi kibil kib xban nak junaj li kapabal. A' taxak li rusilal li Dios chicuank eriq'uin chejunilex. Jo'can taxak.

Li Hu li Quixtz'iba li San Pablo re laj Filemón

Xq'uebal xsahileb xch'ol

¹ Lain laj Pablo. Cuanquin chi prexil sa' xc'aba' li Jesucristo. Cuochben li kaherman Timoteo yoquin chixtz'ibanquil li hu a'in, at Filemón. Laat kech aj c'anjelil chiru li Cristo ut raroqat kaban. ² Li hu a'in re ajcui' lix Apia, li kech aj pabanelil ut reheb ajcui' laj pabanel li neque'xch'utub rib sa' la cuochoch chixlok'oninquil li Dios, ut re ajcui' laj Arquipo li kech aj pabanelil. A'an li qui-ochbenin chak ke sa' li c'anjel chixyebal resil li colba-ib. ³ Chicuanq taxak eri'uin li usilal ut li tuktuqilal li naxq'ue chak ke li Dios li kaYucua' ut li naxq'ue li Kaçua' Jesucristo.

Tz'akal re ru lix pabäl laj Filemón

⁴ Junelic ninbantioxi chiru lin Dios nak nintijoc chaçui. ⁵ Ninbantioxi chiru li Dios nak nacuabi resil nak nacapab chi tz'akal li Jesucristo ut ninbantioxi chiru nak nacaraheb chixjunileb laj pabanel. ⁶ Ut nintz'ama ajcui' chiru li Dios nak tatxten'ka re nak tac'utunq chanru la pabal. Ut nak te'ril li rusilal li Jesucristo cuan acuiq'uin, te'q'uiq sa' xpabaleb. ⁷ At inherman, c'ajo' nak nasaho' ut nac'olja inch'ol nak xcuabi resil chanru nak nacaraheb laj pabanel ut nacaq'ue xcacuual xch'oleb.

Laj Pablo quixtz'ama chiru laj Filemón nak tixcuy xmaq laj Onésimo

⁸ Anakcuan nacuaq xtz'amanquil jun usilal chaçuu. Lain la herman sa' xc'aba' li Cristo ut cuan incuanquil chixyebal açue c'a'ru tabanu. ⁹ Abanan inc'a' tinmin açuu chixbanunquil. Tintz'ama ban li usilal chaçuu xban nak nakara kib. Lain ac xintix ut cuanquin chi prexil sa' xc'aba' li Cristo. ¹⁰ Li usilal nintz'ama chaçuu, a'an chirix laj Onésimo. Chanchan li cualal chiciu nak cuan xban nak chiciu quixpab li Jesucristo nak cuanquin chi prexil. ¹¹ Junxil laj Onésimo inc'a' quic'anjelac chi us chaçuu. Abanan anakcuan çabil aj c'anjel chic chaçuu laat ut chiciu ajcui' lain. ¹² Tintakla cui'chic acuiq'uin ut nak tac'ul a'an, chanchan ajcui' nak tinac'ul lain. ¹³ Lain xcuaj raj nak xcana ta cuiq'uin. Naru raj tac'anjelac chiciu chok' açuuchil laat nak cuanquin chi prexil xban xyebal resil li colba-ib. ¹⁴ Abanan inc'a' nacuaq xminbal açuu chixbanunquil li usilal a'in. Nacuaq ban nak tabanu a'an chi anchal aç'ol. Jo'can nak maç'a' xinbanu chi inc'a' ta tanau laat. ¹⁵ Cuan xyalal nak qui-el jarubak cutan acuiq'uin. Mare lix yalal a'an nak quijala lix yu'am ut anakcuan taçuanq acuiq'uin chi junelic. ¹⁶ Anakcuan maçua' chic jo' lok'bil moç nak taçuanq acuiq'uin. Anakcuan k'axal lok' chic chiru junak moç xban nak anakcuan aherman chic sa' xc'aba' li Jesucristo. Raro inban lain, ut laat k'axal cui'chic nak tara xban nak amos ut aherman ajcui' sa' xc'aba' li Kaçua'. ¹⁷ Laat nacanau nak lain açuech aj c'anjelil. Jo'can nak chac'ulak laj Onésimo jo' nak niqinaç'ul lain. ¹⁸ Ut cui cuan junak xmaq chaçuu, chaq'uehak sa' inben lain. Ut cui cuan xc'as acuiq'uin, lain tintoj lix c'as chaçuu. ¹⁹ Lain laj Pablo. Ut riq'uin cuuk' yoquin chixtz'ibanquil li atin a'in. Lain tintojok re chaçuu. Ut lain naru raj tinye açue nak k'axal cui'chic cuan la c'as chiciu. Laat cuan la yu'am chi junelic xban nak lain xinch'olob xyalal chaçuu. ²⁰ Jo'can ut herman, banu li usilal a'in sa' xc'aba' li Kaçua'. Ut li usilal nintz'ama chaçuu, a'an nak tac'ul laj Onésimo sa' xyalal. Chac'ojob taxak inch'ol xban nak lao aj pabanel ut kacomon kib sa' xc'aba' li Jesucristo. ²¹ Nintz'ibac acuiq'uin xban nak ninnau chi yal nak tabanu li usilal cue.

Ut ninnau ajcui' nak li t̄ab̄anu, a'an k'axal cui'chic nabal chiru li nintz'ama ch̄acuu. ²² Ut nintz'ama ajcui' ch̄acuu nak t̄acauresi li cuochochnal. Yoquin chixyo'oninquil nak tinxic cui'chic eriq'uin j̄o' yoquex chixtz'amanquil chiru li Dios.

Eb laj p̄banel neque'xtakla xsahil xch'ol laj Filemón

²³ Laj Epafra cuochben chi prexil sa' xc'aba' li Jesucristo. A'an naxtakla ajcui' xsahil ach'ol. ²⁴ Ut neque'xtakla ajcui' xsahil ach'ol laj Marcos, laj Aristarco, laj Demas ut laj Lucas. Cuochbened a'an nak yoco chi c'anjelac chiru li Jesucristo. ²⁵ A' taxak li rusilal li K̄acua' Jesucristo chicuank eriq'uin. Jo'can taxak.

Li Hu reheb laj Hebreo

Li C'ajolbej naxcutanobresi chiku li xlok'al li Acuabej Dios

¹ Najter k'e cutan li Kaçua' Dios q'uila sut quixtaklaheb chak li profeta chixyebal li ratin riq'uineb li kaxe'tonil yucua'. Quixsiq'ui xyalal chanru nak tixch'olob xyalal chiruheb. ² Aban anakcuan macua'eb chic li profeta neque'yehoc re li ratin li Dios. A' chic li Dios C'ajolbej. Sa' xc'aba' a'an, li Dios quixyib li ruchich'och' ut chixjunil li c'a'ak re ru cuan. Chixjunil li quixyib quicana sa' ruk' li Dios C'ajolbej. ³ Li Ralal li Dios, a'an nacutanobresin re lix lok'al li Acuabej Dios. Ut a'an ajcui' nac'utuc chiku chanru lix na'leb. Li Ralal li Dios, a'an nacutun re li ruchich'och' riq'uin lix cuanquilal li ratin xban nak a'an yal re sa' xben li ruchich'och'. Ut nak ac xmayeja rib re risinguil li kamaç, li Ralal li Dios cõ sa' choxa ut quic'ojla sa' xnim uk' li Dios Acuabej, li k'axal nim xcuanquil.

Li Dios C'ajolbej k'axal nim xcuanquil chiruheb li ángel

⁴ Li cuanquil quiq'uehe' re k'axal nim cui'chic chiru xcuanquileb li ángel xban nak a'an li Ralal li Dios. Lix c'aba' quiq'uehe' xban li Acuabej Dios, a'an k'axal lok' cui'chic chiru lix c'aba'eb li ángel. ⁵ Nakanau nak k'axal lok' xban nak li Dios ma jun cua quixye re junak ángel: Laat li cualal; anakcuan xinq'ue acuanquil. (Sal. 2:7)

Chi moco quixye ta chirix junak ángel:

Lainak lix yucua' ut a'anak li cualal. (2 Sam. 7:14)

⁶ Nak quixtakla chak li junaj chi Ralal sa' ruchich'och', li Dios quixye: Chilok'onik ru xbaneb chixjunileb li ángel.

⁷ Quixye cui'chic li Dios chirixeb li ángel:

Xinyibeb lin ángel chanchaneb li ik' ut chanchaneb ajcui' li rak' xam nak neque'c'anjelac chicuu. (Sal. 104:4)

⁸ Aban li Dios quixye re li C'ajolbej:

Lā nimajcual cuanquilal, at Dios, xakxok chi junelic k'e cutan. Junelic sa' tiq'uilal nacattaklan.

⁹ Li tiq'uilal nacuulac chaçuu ut li mausilal xic' nacacuul. Jo'can nak sic'bil acuu inban lain li nimajcual Dios. Lain la Dios. K'axal numtajejak li sahil ch'olej xinq'ue acue laat chiru li xinq'ue reheb chixjunileb la cuech aj c'anjelil. (Sal. 45:6-7)

¹⁰ Li Dios quixye cui'chic re li C'ajolbej:

Laat, at Kaçua', sa' xticlajic cayib li ruchich'och' ut riq'uin ajcui' acuu' cayib li choxa.

¹¹ Eb a'an te'osok' aban laat cuankat chi junelic. Chixjunil a'an te'k'elok' jo' li t'icr.

¹² Junak t'icr na-oso' ut najalman. Jo'can ajcui' nak taosok' li ruchich'och' ut li choxa.

Aban laat inc'a' nacatjale'. Cuankat ban chi junelic k'e cutan. (Sal. 102:25-27)

¹³ Li Dios ma jun cua quixye re junak ángel jo' quixye re li Ralal:

Tatc'ojlak sa' innim uk' toj retal tinq'ueheb rubel la cuok li xic' neque'iloc acue. (Sal. 110:1)

¹⁴ Inc'a' quixye a'an reheb li ángel xban nak li ángel yal musik'eheb chi c'anjelac chiru li Dios. Li Dios nataklan chak reheb chixtenk'anquileb li te'echanjink re li colba-ib.

2

Li colba-ib k'axal lok'

¹ Xban nak li Cristo k'axal lok' chiruheb li ángel, jo'can nak takaq'ue kach'ol chixpabanquil li c'a'ru xkabi, re nak inc'a' tasachk sa' kach'ol lix yalal. ² Li esilal yebil xbaneb li ángel tz'akal yal ut eb li inc'a' que'paban ut eb li que'xk'et li chak'rab, que'xc'ul xtojbal xmaqueb jo' xc'ulubeb. ³ Cui eb a'an que'xc'ul xtojbal xmac, zchan put ru nak tocolek' lao chiru li tojba mac cui nakatz'ektana li lok'laj colba-ib li quixyechi'i ke li Kacua' Jesucristo? Li Jesucristo quixyechi'i ke li kacolbal k'axal lok'. Ut chirix a'an, eb li que'abin re li ratin, a'an eb ajcui' que'ch'oloban lix yalal chiku. ⁴ Li Dios quixc'ut chiku nak tz'akal yal a'an riq'uineb li retalil ut li milagro li quilajxbanu riq'uin lix nimal xcuanquilal. Ut naxc'ut ajcui' chiku nak yal xban nak naxq'ue li Santil Musik'ej reheb li junjunk. Jo'can nak ac xmatan xmatan li junjunk jo' naraj li Dios.

Li Kacua' Jesucristo quitz'ejcualo' re kacolbal

⁵ Yoco chi atinac chirix li ac' ruchich'och' li tachalk. Li Dios inc'a' quixq'ue xcuanquileb li ángel re nak te'taklan k sa' xben a'an. ⁶ Jo'ca'in tz'ibanbil sa' li Santil Hu:

At inDios, li cujnk mac'a' xcuanquil. zC'a'ut nak nacac'oxlaheb? Li cujnk mac'a'eb xcuanquil. zC'a'ut nak nacaq'ue ach'ol chirixeb?

⁷ Xacubsi ca'ch'in xcuanquil chiruheb li ángel. Abanan xaq'ue xnimal xlok'al. Ut xaxakab xcuanquil sa' xbeneb la c'anjel xabanu riq'uin acuk'.

⁸ Laat xaq'ue chixjunil li c'a'ak re ru rubel xcuanquil li cujnk. (Sal. 8:4-6)

Ut nak li Dios quixq'ue chixjunil li c'a'ak re ru rubel xcuanquil li cujnk, mac'a' cuan inc'a' ta napaban chiru. A'ut anakuan toj maji' nakil nak chixjunil li c'a'ak re ru cuan neque'paban chiru. ⁹ Abanan nacaq'ue retal chanru nak li Jesucristo quinimac ru ut quiq'uehe' xlok'al. Usta quicubsjc xcuanquil jarubak cutan chiruheb li ángel, nak quitz'ejcualo', quiq'uehe' xlok'al xban li raylal quixc'ul nak quicam sa' kac'aba' lao. Xban lix nimal rusalil li Dios, li Jesucristo quicam re xcolbal chixjunileb li cuanqueb sa' ruchich'och'. ¹⁰ Riq'uin xc'ulbal li raylal, li Jesucristo quitz'akobresjc ru chiru li Dios. Li Kacua' Dios quiyiban re chixjunil li c'a'ak re ru. Xban a'an nak a' li Dios yal re sa' xben. Jo'can nak quixtakla chak li Jesucristo chi xc'ulbal li raylal ut quicam re xtojbal rix li kamac. Ut a'an ajcui' laj c'amol be chiruheb li ralar xc'ajol li te'tz'akonk sa' lix lok'al. ¹¹ Lao nocosantobresjc xban li Kacua' Jesucristo. Lao ut li Jesucristo junaj ajcui' li kachoxahil Yucua'. Xban a'an li Jesucristo inc'a' naxutañac chixyebal nak lao lix herman. ¹² Quixye chi jo'ca'in:

At inYucua', tinch'olob acuesilal chiruheb lin herman. Sa' xyankeb li ch'ut'ch'uqueb tinbicha la lok'al. (Sal. 22:22) ¹³ Ut quixye cui'chic: Cauhak inch'ol riq'uin li Dios.

Ut quixye ajcui':

Cue'quin arin lain, cuochbeneb li ralar xc'ajol li Dios li xk'axtesi sa' cuuk'. (Is. 8:17-18)

¹⁴ Yal nak lao ut li Jesucristo junaj li kachoxahil Yucua'. Li Jesucristo quitz'ejcualo' jo' lao. Quicuan xqiq'uel. Quicuan xbabel ut xtibel. Li Jesucristo quicam. Riq'uin lix camic, li Kacua' Jesucristo quixsach xcuanquil laj tza, xban nak sa' xc'aba' laj tza nak cuan li camc. ¹⁵ Chalen chak sa' kayo'lajic, nakaxucua ru li camc. Aban riq'uin lix camic li Kacua' Jesucristo quirisi li kaxiu chiru li camc. ¹⁶ Relic chi yal li Kacua' Jesucristo inc'a' quichal chixtenk'anquileb li ángel. Quichal ban chixtenk'anquileb li ralar xc'ajol

laj Abraham. (Ut laŋ ajcui' ralał xc'ajol laj Abraham, xban nak nakapał li Cristo.) ¹⁷ Xban nak li Jesucristo quic'ulun chixtenk'anquileb li cuanqueb sa' ruchich'och' tento nak quitz'ejcualo' jo' eb lix herman. Chi yal nak quitz'ejcualo' re nak taruxta na ku ut tixtoj rix li kamaç. Li Jesucristo a'an lix yucua'il aj tij chi c'anjelac chiru li Dios. ¹⁸ Li Kaçua' Jesucristo quixc'ul li raylal ut quiyale' ralenquil. Aban, inc'a' quixq'ue rib chi ałec. Jo'can nak nim xcuanquil chixtenk'anquileb li neque'yale' ralenquil.

3

K'axal nim xcuanquil li Kaçua' Jesucristo chiru xcuanquil laj Moisés

¹ Ex herman, laex sic'bil eru xban li Dios chok' ralał xc'ajol. Cheq'uehak ech'ol chixc'oxlanquil li Jesucristo. A'an li quitaklaç chak xban li Dios chi c'anjelac jo' xyucua'il aj tij sa' li kapabal. ² Li Jesucristo quipaban chi tz'akal chiru li Dios li quixakaban chak re chi c'anjelac jo' xyucua'il aj tij. Ut laj Moisés quipaban ajcui' chiru li Dios nak quic'anjelac chi c'amoc be chiruheb laj Israel. ³ Abanan li Jesucristo numtajenak cui'chic xlok'al chiru xlok'al laj Moisés. Li Jesucristo, a'an chanchan jun aj cablanel. Li ani nayiban junak cab, a'an k'axal nim xcuanquil sa' xben usta k'axal chałil li cab li naxyib. ⁴ Li junjunk chi ochoch cuan ani nayiban re; a'ut li quiyiban re chixjunil li c'a'ak re ru cuan, a'an li Kaçua' Dios. ⁵ Relic chi yal nak laj Moisés quipaban chiru li Dios ut quic'amoc be chiruheb laj Israel. Quixch'olob xyalał li c'a'ru taç'ulman k mokon. Laj Moisés yal aj c'anjel chiru li Dios. ⁶ Aban li Kaçua' Jesucristo, a'an tz'akal Ralał li Dios ut cuan xcuanquil chi taklañc sa' xbeneb li ralał xc'ajol li Dios. Laŋ li ralał xc'ajol li Dios cui ca'aj cui' riq'uin li Dios nocoyo'onin ut cauhak kach'ol sa' li kapabal toj sa' roso'jic li cutan.

Naru to-oc chi hilanc riq'uin li Dios

⁷ Li Kaçua' Jesucristo k'axal nim xcuanquil. Jo'can nak takabi li rałin li naxye li Santil Musik'ej: Cherabihak anakcuan li cuałin. ⁸ Mebanu jo' que'xbanu le xe'tonil yucua' nak que'xk'et chak li cuałin. Que'cuech'oc ut neque'ayaynac ut que'xyal inch'i'ch'i'inquil nak cuanqueb chak sa' li chaki ch'och'. ⁹ Aran que'xq'ue injosk'il le xe'tonil yucua'. Chiru ca'c'al chihab que'ril li usilał li quilajinbanu reheb. Abanan junelic yoqueb chixq'uebal injosk'il. ¹⁰ Xban a'an nak quinqo' inch'ol sa' xbeneb li tenamit a'in. Ut quinye: Junelic neque'xcuiba xch'oleb ut inc'a' neque'raj xbanunquil lix yalał. Inc'a' neque'xbanu li c'a'ru nacuał. ¹¹ Nak quichal injosk'il ut quinye, relic chi yal nak ma jok'e te'oc chi hilanc sa' li chałil na'ajej c'ubanbil inban, chan li Dios. (Sal. 95:7-11) ¹² Ex herman, cheq'uehak retal nak ma jun taxak sa' eyank inc'a' tixpał li Dios xmaç lix mausilał. Mare anchal tixtz'ektana li yo'yoquil Dios. ¹³ Cheq'uehak ban ena'leb cheribil erib rajlal cutan nak toj naru xbanunquil. Chetenk'a erib cheribil erib re nak ma jun tabalak'ik xban li maç, xban nak li nabalak'ic xban li maç inc'a' chic naraj xbanunquil li c'a'ru naraj li Dios. ¹⁴ Totz'akonk riq'uin xlok'al li Jesucristo cui nakaq'ue kach'ol chixpabanquil. Chanru nak xkatiquib chak xpałanquil li Kaçua', jo'can taxak toj chalen sa' roso'jic li cutan. ¹⁵ Jo'ca'in tz'ibanbil sa' li Santil Hu li quixye li Dios: Cherabihak li cuałin anakcuan. Mecacuubresi ech'ol jo' que'xbanu chak le xe'tonil yucua' nak que'xk'et chak li cuałin. (Sal. 95:7-8)

¹⁶ ¿Aniheb li que'k'etoc chak re li ratin li Dios li quixye reheb? A'aneb chixjunileb li que'el chak Egipto nak laj Moisés quic'amoc be chiruheb. ¹⁷ ¿Ani sa' aj ben quijosk'o' li Dios chiru li ca'c'al chihab? Sa' xbeneb li que'maqob ut que'cam sa' li chaki ch'och'. ¹⁸ Ut, ¿aniheb aj e quixye li Dios nak relic chi yal inc'a' te'oc chi hilanc riq'uin sa' li chabil na'ajej? Reheb li que'k'etoc re lix chak'rab. ¹⁹ Ut relic chi yal xbaneb lix k'etba atin, inc'a' que'oc chi hilanc sa' li chabil na'ajej.

4

¹ Li Dios toj yo ajcui' chixyechi'inquil li oc chi hilanc sa' li chabil na'ajej. Abanan chikabanu cuent re nak ma jun taxak sa' kayank inc'a' taoc sa' li hilobal a'an. ² Lao xkabi resil li colba-ib jo' nak que'rabi resil najter. Abanan mac'a' qui-oc cui' reheb nak que'rabi xban nak inc'a' que'paban. ³ Xban nak lao xkapab li Dios, to-oc chi hilanc riq'uin sa' li chabil na'ajej. Li Dios quiatinac chirixeb li kaxe'tonil yucua' nak quixye: Nak quichal injosk'il, quinye nak relic chi yal ma jok'e te'oc chi hilanc cuiq'uin. Quixye a'an us ta ac ch'olch'o nak cuan li na'ajej re hilanc chalen nak li Dios quixrak lix c'anjel nak quixyib li ruchich'och'. ⁴ Tz'ibanbil sa' li Santil Hu chirix li xcuuk li cutan li naxye chi jo'ca'in: Ut li Dios quixrak lix c'anjel ut quihilan sa' xcuuk li cutan. (Gn. 2:2) ⁵ Ut tz'ibanbil ajcui' sa' li Santil Hu chirixeb li inc'a' que'paban: Inc'a' te'oc chi hilanc cuiq'uin. (Sal. 95:11) ⁶ Que'rabi li ratin li Dios najter ut cuan li inc'a' que'oc chi hilanc riq'uin xban nak inc'a' que'paban. Aban li ani napaban anakcuan toj naru taoc chi hilanc riq'uin. ⁷ Najter cuanqueb laj Israel inc'a' que'paban. Ut nak ac xnume' q'uila chihab, li Dios quixyechi'i cui'chic li hilobal nak quiatinac riq'uin laj David. Ut laj David quixtz'iba li quiyeh'e' re li naxye chi jo'ca'in: Anakcuan cherabi taxak li cuatin ut mecacuubresi le ch'ol, chan. ⁸ Eb li que'paban sa' xyankeb laj Israel que'oc chi hilanc sa' li na'ajej Canaan nak laj Josué quic'amoc be chiruheb. Abanan macua' a'an li tz'akal na'ajej re hilanc chi junelic. Cui ta a'an li tz'akal hilobal, inc'a' raj chic quixye li Dios nak toj naru to-oc chi hilanc riq'uin. ⁹ Jo'can nak toj cuan li lok'laj na'ajej re hilanc reheb li neque'paban re li Dios. ¹⁰ Li ani ac x-oc chi hilanc riq'uin li Dios, a'an ac xhilan chi tz'akal, jo' nak li Dios quihilan nak quixrak lix c'anjel. ¹¹ Chikaq'uehak kach'ol chixpabanquil li Dios re nak to-oc chi hilanc riq'uin. Ma ani taxak ke inc'a' taoc xban xk'etba atin jo' que'xbanu chak junxil nak inc'a' que'paban. ¹² Li ratin li Dios yo'yo ut k'axal nim xcuanquil. Chanchan jun ch'ich' ca' pac'al xk'esnal. Riq'uin lix nimal xcuanquil, li ratin li Dios nacuulac toj sa' xchamal li kam. Ut naxc'utbesi chiku chanru li kana'leb ut chanru li kac'a'ux. ¹³ Ma ani naru tixmuk rib chiru li Dios xban nak a'an quiyiban re chixjunil li c'a'ak re ru cuan. Cutan saken chiru li Dios li kayehom kabanuhom. Mac'a' mukmu chiru li Dios li toxkach'olob cui' kayehom kabanuhom.

Li Kacua' Jesucristo, a'an tz'akal xyucua'il aj tij

¹⁴ Li Kacua' Jesucristo, li Ralal li Dios, a'an lix yucua'il aj tij chok' ke. Quitake' sa' choxa ut cuan chak riq'uin li Dios Acuabej. Yo chak chi oquenc chixik chiru li Dios. Jo'can nak cauhak taxak kach'ol sa' li kapabal. ¹⁵ Li Jesucristo a'an xyucua'il aj tij chok' ke lao. Naxtok'oba ku xban nak naxnau nak moco k'axal cau ta li kach'ol. Nak quicuan arin sa' ruchich'och', li Jesucristo quiyale' ralenquil jo' nak nayale' kalenquil lao. Aban li Jesucristo inc'a' quimacob. ¹⁶ Chotijok chi anchal kach'ol chiru li nimajcual Dios. A'an taril xtok'obal ku ut riq'uin xnimaj rusilal toxtenk'a nak cuanko sa' junak raylal.

5

¹ Sa' xyankeb laj judío cuanqueb xyucua'il aj tij. Li junjunk sic'bil ru sa' xyankeb li cuñk chi c'anjelac chiru li Dios. Naxtenk'aheb li tenamit riq'uin xq'uebal li mayej quic' ut li c'a'ak chic re ru chi mayejil re xtojbäl rix lix maqheb. ² Li xyucua'il aj tij, a'an yal cuñkeb jo' lao. Jo'can nak naxtok'oba ruheb ut naxtenk'aheb sa' usilal li neque'macöb xban nak inc'a' neque'xnau xyalal li yoqheb chixbanunquil. ³ Xban nak yal cuñk li xyucua'il aj tij, jo'can nak rajlal namayejac re xtojbäl rix lix mac a'an. Ut namayejac ajcui' re xtojbäl rix lix maqheb chixjunileb li tenamit. ⁴ Lix c'anjel li xyucua'il aj tij k'axal lok', aban ma jun naxyo'ob xc'anjel yal xjunes rib. Eb a'an sic'bil ruheb xban li Dios. Li Dios naxxakabeb chi c'anjelac jo' nak quixakabac laj Aarón najter. ⁵ Jo'can ajcui' li Jesucristo. Moco yal xjunes ta quixxakab rib chi c'anjelac chok' xyucua'il aj tij. Aban li Dios quiq'uehoc re lix lok'al ut quixq'ue chi c'anjelac nak quixye re: At cualal, anakuan xinq'ue acuanquil. (Sal. 2:7) ⁶ Quiyehe' cui'chic re xban li Dios jo' naxye sa' li Santil Hu: Laat aj tij chi junelic jo' nak quicuan laj Melquisedec. (Sal. 110:4) ⁷ Nak li Jesucristo quicuan arin sa' ruchich'och' quiyabac nak quitijoc. Chi cau xyab xcux quitz'aman chiru li Dios, li cuan xcuanquil chi coloc re chiru li camc. Ut li Dios quirabi lix tij xban nak quixk'axtesi rib re xbanunquil lix c'anjel li Dios. ⁸ Usta Ralal li Dios li Jesucristo, quixc'ul ajcui' li raylal ut quixc'ut chiku chanru li pabanc riq'uin li raylal quixc'ul. ⁹ Riq'uin li raylal li quixc'ul li Jesucristo quitz'akobresic ru chi c'anjelac chok' xyucua'il aj tij. Ut sa' xc'aba' a'an cuan li colba-ib chi junelic reheb li te'pabank re. ¹⁰ Li Dios quixxakab li Jesucristo chok' xyucua'il aj tij jo' nak quicuan laj Melquisedec.

K'axal xiu xiu chok' ke cui taquibank li kach'ol

¹¹ Toj cuan raj chic nabal naraj ch'olobac xyalal cheru chirix a'in. Abanan ch'a'aj xch'olobanquil xyalal xban nak inc'a' chic nequeraj rabinquil. ¹² Anakuan laex raj chic aj tzolonel xban nak ac junxil nequexpaban. Abanan taraj toj tac'utek' cui'chic cheru li ac xetzol chak junxil nak xepab chak li Dios. Chanchanex chic li c'ula'al li toj natu'uc li toj maji' natzacan. ¹³ Laex nequenau nak junak c'ula'al toj natu'uc toj mac'a' xna'leb. Inc'a' naxnau bar cuan li us ut bar cuan li inc'a' us. ¹⁴ Eb li chequel cristian jalan xtzacaemkeb. Moco sic'bil ta ru li neque'xtzaca. A'an retalil nak ac xe'q'ui sa' xpabaleb ut neque'xnau chic bar cuan li us ut bar cuan li inc'a' us.

6

¹ Jo'can nak inc'a' yokex chi c'oxlac junes chirix li xetzol chak sa' xtclajic le pabal. Toj cuan ban nabal tetzol chirix li Cristo re nak texq'ujk sa' le pabal. Ac nequenau nak macua' riq'uin kayehom kabanuhom natauman li colba-ib. Riq'uin ban xpabanquil li Dios. ² Ac nequenau xyalal li cubi ha'. Nequenau xyalal li xq'uebal li kuk' sa' xbeneb laj pabanel. Ac nequenau nak te'cuaclic cui'chic chi yo'yo li camenak. Ut nequenau ajcui' nak taacuulak xk'ehil nak tarakek' atin chi junaj cua sa' xbeneb li maji' neque'paban. ³ Anakuan chikaq'ue kach'ol chixtzolbal kib re nak toq'ujk sa' li kapabal. Jo'can takabanu cui li Dios naxq'ue ke. ⁴ Cuanqueb li ac xe'xtau xyalal. Xe'xc'ul li rusilal li Dios. Xe'xc'ul li Santil Musik'ej. ⁵ Neque'xnau nak yal li ratin li Dios. Ac xe'tz'akon ca'ch'in riq'uin lix cuanquil li ac' ruchich'och' li tachalk. ⁶ Cuan li ac xe'tz'akon riq'uin li rusilal li Dios ut neque'xtz'ektana chirix xch'ol. Chanchan nak yoqheb cui'chic chixq'uebal chiru cruz li Jesucristo, li Ralal li Dios. Yoqheb chixq'uebal chi hobec' ut chi se'ec xbaneb li tenamit. Eb a'an inc'a' chic naru te'yot'ek' xch'ol ut inc'a' chic te'xjal xc'a'ux

xban nak yoq̄ueb chixtz'ekt̄ananquil li Jesucristo. ⁷ Li ani naxbanu li naxye li ratin li Dios, a'an chanchan li ch'och' naruc' li ha'. Ch̄abil li acuimk na-el chiru ut nac'anjelac re laj acuinel. Li ch'och' a'an osobtesinbil xban li Dios. Li ani naxbanu li naraj li Dios osobtesinbil xban li Dios. ⁸ Aban li ani inc'a' naxbanu re li naxye li ratin li Dios, a'an chanchan li ch'och' junes q'ux ut yibru pim na-el chiru; maç'a' na-oc cui' li ch'och' a'an. Li ani inc'a' naxbanu li naraj li Dios, tz'ekt̄ananbibleb xban li Dios ut c'atbil nak te'osok'.

Li Cristo nocoxtenk'a re nak inc'a' tach'inan̄k li kach'ol

⁹ Ex inherman, usta xkaye chi jo'can, ninnau nak laex moco jo'canex ta chic anakuan. Ch̄abil chic le na'leb xban nak colbilex. ¹⁰ Li Dios tic xch'ol. Naxnau chanru le c'anjel. Li Dios naxnau nak nequera a'an. Nac'utun ajcui' nak nequera li Dios xban nak xetenk'a le rech aj p̄abanel junxil ut toj yoq̄uex ajcui' chixtenk'anquileb anakuan. Inc'a' nasach sa' xch'ol li Dios le c'anjel li nequebanu. ¹¹ Takaj nak chejunjunkalex teq'ue ech'ol chixbanunquil li usilal chalen toj sa' roso'jic le yu'am. Chi jo'can teç'ul chi tz'akal le 'ajcamunquil li yechi'inbil ere xban li Dios. ¹² Inc'a' nakaj nak teçuib a ech'ol. Chebanu ban jo' neque'xbanu li neque'paban chi anchal xch'ol. Inc'a' neque'titz'. Neque'xcuy ut neque'rechani li yechi'inbil xban li Dios. ¹³ Maç'a' junak mas nim xcuanquil chiru li Dios. Jo'can nak li Dios quixpatz' xc'aba' chi ribil rib nak quixyechi'i li rosobtesinquil laj Abraham. ¹⁴ Quixye re: Relic chi yal tatcuosobtesi ut tinq'ue chi q'uianc la cualal aç'ajol. (Gn. 22:16-17) ¹⁵ Jo'can nak laj Abraham najt quixcuy roybeninquil ut inc'a' quitiiz' toj retal quixc'ul lix mañan quiyechi'ic re xban li Dios. ¹⁶ Nak na-uxman li juramento napatz'man xc'aba' junak li k'axal nim xcuanquil re nak nach'ola ru li yal ut narake' ajcui' li cuech'inc ib. ¹⁷ Jo'can nak li Dios quixyechi'i li mañan riq'uin juramento. Quiraj xc'utbal chiruheb li te'echan̄ik re nak tz'akal yal li yo chixyebal. Ut inc'a' tixjal ru li ratin. ¹⁸ Jo'can utan nak li cuib chi na'leb a'in inc'a' naru xjalbal ru. A'aneb a'in: xben, nak li Dios quixyechi'i li mañan; ut xcab, nak quixbanu li juramento. Riq'uin a'an nakanau nak li Dios inc'a' natic'ti'ic. Jo'can nak cauhaç taxak li kach'ol. Laç xkasic' li kacolbal riq'uin li Dios ut nakanau nak takechani li quixyechi'i ke. A'an li nakayo'oni. ¹⁹ Nakayo'oni nak takac'ul li junelic yu'am. A'an naxq'ue xcacuil li kach'ol jo' nak li ancla naxchap li jucub chiru li ha'. Cau rib ut inc'a' na-ec'an sa' xna'aj. Xban nak nakapab li Jesucristo, cuanco chi sum atin riq'uin li Dios. ²⁰ Li Jesucristo ac xcq sa' li santil choxa chi jaloc atin chikix. A'an laj c'amol be chiku. Li Jesucristo, a'an tz'akal xyucua'il aj tij chi junelic jo' nak quicuan laj Melquisedec.

7

Laj Melquisedec

¹ Laj Melquisedec a'an li rey re li tenamit Salem. A'an ajcui' laj tij chiru li nimajcual Dios. Laj Melquisedec qui-el chak chixc'ulbal laj Abraham ut quirosobtesi nak quisuk'i chak chixsachbal ruheb li rey. ² Ut li jo' q'uijal quirechani chak laj Abraham sa' li plet riq'ueineb li rey, quix'ue li junjunk sa' xlajetkil re laj Melquisedec. Li c'aba'ej Melquisedec naraj naxye "rey re li tiq̄uilal". Ut li c'aba'ej Salem naraj naxye "tukt̄uquil usilal". Jo'can nak laj Melquisedec, a'an rey re li tiq̄uilal ut rey re li tukt̄uquil usilal. ³ Inc'a' nanauman ani lix yucua' laj Melquisedec chi moco lix na' chi moco lix xe'tonil yucua'. Inc'a' nanauman chirix lix yo'lajic chi moco lix camic. Laj Melquisedec, a'an retalil li Jesucristo ut a'an laj tij chi junelic. ⁴ Q'uehomak retal nak laj Melquisedec, k'axal nim xcuanquil chiru laj Abraham. Laj

Abraham, a'an xyucua'eb laj Israel, abanan quixq'ue re laj Melquisedec li junjunk sa' xlajetkil li quirechani chak sa' li plet. ⁵ Tz'ibanbil sa' li chak'rab li quiq'uehe' re laj Moisés nak eb li cristian te'xq'ue reheb laj tij li junjunk sa' xlajetkil li c'a'ru cuan reheb. Eb laj tij, a'an eb li ralar xc'ajol laj Leví. Que'xbanu chi jo'can usta laj Abraham, a'an lix xe'tonil yucua' chixjunleeb, laj tij jo'queb ajcui' li cristian. ⁶ Laj Melquisedec ma'cua' xcomoneb li ralar xc'ajol laj Leví aban laj Abraham quixq'ue li junjunk sa' xlajetkil re laj Melquisedec. Nim xcuauquil laj Abraham xban nak ac yechi'inbil re li rosobtesinquil xban li Dios. Aban laj Melquisedec k'axal nim cui'chic lix cuauquil. Jo'can nak quirosobtesi laj Abraham. ⁷ Nakanau chi tz'akal nak li na-osobtesin, a'an li nim xcuauquil chiru li na-osobtesic. Jo'can nak nakanau nak nim xlok'al laj Melquisedec chiru xlok'al laj Abraham. ⁸ Eb laj tij aj Israel que'xc'ul ajcui' li junjunk sa' xlajetkil. A'aneb yal cuinkeb ut que'cam. Abanan laj Melquisedec moco quicam ta. Jo'can tz'ibanbil sa' li Santil Hu. ⁹ Eb li ralar xc'ajol laj Leví, a'an eb laj tij. Eb a'an li que'c'uluc re li junjunk sa' xlajetkil li que'xq'ue laj Israel. Laj Abraham a'an lix xe'tonil yucua' laj Leví. Jo'can nak naru xyebal nak eb li ralar xc'ajol laj Leví que'xq'ue li junjunk sa' xlajetkil re laj Melquisedec xban nak laj Abraham quixq'ue li junjunk sa' xlajetkil sa' xc'aba'eb a'an. ¹⁰ Naru xyebal chi jo'can usta toj maji' neque'yo'la li ralar xc'ajol laj Leví xban nak laj Abraham, a'an lix xe'tonil yucua'eb. Riq'uin a'an nakanau nak laj Melquisedec nim xcuauquil chiruheeb li ralar xc'ajol laj Leví. ¹¹ Li ralar xc'ajol laj Leví ut laj Aarón, a'aneb li neque'ch'oloban chiruheeb laj Israel lix yalal lix chak'rab li Dios li quixye laj Moisés. Abanan chi moco li chak'rab chi moco eb laj tij li taruk tacolok ke. Cui ta eb laj tij ut li chak'rab, inc'a' raj chic quitaklac chak junak aj tij k'axal nim xcuauquil jo' nak quicuan laj Melquisedec. Laj tij li quitaklac chak ma'cua' xcomoneb laj Aarón. ¹² Laj tij li quitaklac chak jalan chic lix c'anjel. Jo'can nak quijala ajcui' ru li chak'rab. ¹³ Li atin a'in tz'ibanbil chirix li Jesucristo. A'an ma'cua' ralar xc'ajol laj Leví. A'an ralar xc'ajol laj Judá. Ma jun ralar xc'ajol laj Judá xakabanbil chok' aj tij chi mayejac. ¹⁴ Laj Moisés, nak quiatínac chirixeb laj tij, ma jun cua quixye nak sa' xyankeb ta li ralar xc'ajol laj Judá ta'elk chak junak aj tij. Ut li Jesucristo quiyo'la sa' xyankeb li ralar xc'ajol laj Judá.

K'axal nim xcuauquil li Jesús chiru xcuauquil laj Melquisedec

¹⁵ Riq'uin a'in nanauman nak li Jesucristo nim xcuauquil chiruheeb laj tij li que'cuan sa' xyankeb aj Israel. Li Jesucristo, a'an aj tij jo' nak quicuan laj Melquisedec ut a'an ma'cua' ralar xc'ajol laj Leví. ¹⁶ Li Jesucristo inc'a' quixakabac chok' aj tij jo' quixye li chak'rab. Xakabanbil ban chok' aj tij xban nak nim xcuauquil ut yo'yo chi junelic. ¹⁷ Jo'ca'in tz'ibanbil sa' li Santil Hu chirix li Ka'cua' Jesucristo: Laat aj tij chi junelic jo' nak quicuan laj Melquisedec. (Sal. 110:4) ¹⁸ Jo'can nak li chak'rab li quicuan junxil ma'c'a' chic rajbal xban nak ma'c'a' chic xcuauquil. ¹⁹ Ma ani nacole' xban li chak'rab li quicuan chak junxil. Abanan cuan kayo'on anakcuan k'axal nim xcuauquil chiru li chak'rab. Li kayo'on, a'an li Jesucristo. Ut xban a'an cuanko chi sum atin riq'uin li Dios. ²⁰ Li Jesucristo xakabanbil chok' aj tij xban li Dios riq'uin juramento. ²¹ Abanan ma'cua' riq'uin juramento nak que'xakabac chok' aj tij li ralar xc'ajol laj Leví. A'ut li Ka'cua' Jesucristo xakabanbil chok' aj tij xban li Dios riq'uin juramento. Tz'ibanbil sa' li Santil Hu chi jo'ca'in: Li Dios quiatínac riq'uin li Ralar ut quixye re: Sa' inc'aba' lain tinye acue: Laat laj tij chi junelic jo' nak quicuan laj Melquisedec, chan. Li Dios inc'a' tixjal lix c'a'ux xban nak quixpatz' lix lok'laj c'aba'. (Sal. 110:4)

²² Riq'uin li juramento a'in, sa' xc'aba' li Jesucristo, nim xcuanquil li ac' contrato, ut k'axal lok' chiru li quicuan junxil. ²³ Najter nabaleb laj tij que'cuan chak. Inc'a' que'cana sa' xc'anjel chi junelic li junjunk xban nak neque'cam ut jalan chic nacana chok' rekaj. ²⁴ Aban li Kacua' Jesucristo a'an chic li tz'akal laj tij. Ma jaruj chic tasic'mank junak rekaj xban nak a'an yo'yo chi junelic. ²⁵ Li Jesucristo a'an tz'akal taçolok reheb chixjunileb li neque'paban re li Dios sa' xc'aba' a'an. Li Jesucristo yo'yo chi junelic ut naatinac chirixeb chiru li Dios. ²⁶ Li Kacua' Jesucristo, a'an li tz'akal xyucua'il aj tij. Ut a'an li natenk'an ke chi tz'akal. Moco juntak'et ta lix yu'am riq'uibeb laj maç. Li Jesucristo santo ut maç'a' xmaç. A'an co sa' choxa ut aran quiq'uehe' xnimal xlok'al. ²⁷ Li Jesucristo maçua' jo'queb lix yucua'ileb aj tij li que'cuan sa' xyankeb laj Israel. Eb a'an cuulaj cuulaj neque'xmajeja li xul re xtojbaj rix lix maqueb jo' ajcui' lix maqueb li tenamit. Aban li Jesucristo jun sut ajcui' quixmajeja rib re xtojbaj rix li kamaç. ²⁸ Jo' tz'ibanbil sa' li chak'rab najter, eb li xakabanbil chok' xyucua'il aj tij, a'an yal cuinkeb. Abanan mokon, nak quisache' xcuanquil li chak'rab, li Dios quixxakab riq'uin juramento li Ralal chok' xyucua'il aj tij. Riq'uin ut a'an li Jesucristo tz'akal re ru chi c'anjelac chi junelic.

8

Li Jesucristo, a'an xyucua'il aj tij chok' ke lao

¹ A'an a'in xyalal li yoço chixyebal ere: yal nak cuan jun tz'akal xyucua'il aj tij nac'anjelac chikix. A'an li Jesucristo li c'ojc'o chak sa' xnim uk' li Dios sa' lix nimajcual xcuanquil sa' choxa. ² Li Jesucristo nac'anjelac sa' li Santil Na'ajej sa' choxa li yibanbil xban li Dios, ut maçua' sa' li na'ajej yibanbil xbaneb li cuinke. ³ Chixjunileb li xyucua'il laj tij xakabanbileb chi mayejac xul ut c'a'ak chic re ru chi mayejil. Jo'can ajcui' li Jesucristo tento tixq'ue junak mayej. ⁴ Cui toj cuan ta arin sa' ruchich'och' inc'a' ajcui' taç'anjelac jo' junak reheb laj tij xban nak eb laj tij neque'majejac jo' naxye lix chak'rab laj Moisés. ⁵ Li c'a'ru neque'xbanu eb laj tij yal jun retalil li na-uxman sa' li choxa. Nakanau nak yal retalil xban li c'a'ru quiehe' re laj Moisés nak oc re chixyibanquil li tabernáculo. Li Dios quixye re: Chaq'ue retal ut chabanu chixjunil jo' li retalil quinc'ut chaçuu sa' xben li tzul Sinaí. (Ex. 25:40) ⁶ A'ut lix c'anjel li Jesucristo numtajenak xcuanquil chiru li que'xbanu chak eb laj tij junxil. Sa' li ac' contrato li Jesucristo chic naatinac chikix chiru li Dios. K'axal chaibil li ac' contrato xban nak riq'uin a'an k'axal lok' cui'chic li yechi'inbil ke xban li Dios. ⁷ Cui ta tz'akal re ru li contrato quixbanu chak junxil inc'a' raj chic quixq'ue junak ac' contrato. ⁸ Aban li Dios quiril nak inc'a' us yoqueb chixbanunquil li tenamit li cuanqueb rubel xcuanquil li xben contrato. Jo'can nak quixye reheb li tz'ibanbil sa' li Santil Hu: Taçuulak xk'ehil nak tinbanu junak chic li ac' contrato riq'uibeb li tenamit Israel ut Judá.

⁹ Li contrato a'in maçua' jo' li quinbanu chak reheb lix xe'tonil yucua'eb nak quicuisiheb chak sa' li tenamit Egipto. Inc'a' que'xbanu li naxye li contrato. Xban a'an quebintz'ektana.

¹⁰ A'in li contrato tinbanu riq'uibeb reheb laj Israel. Taçuulak xk'ehil nak ting'ue lin chak'rab sa' lix c'a'uxeb ut ting'ue ajcui' sa' li rameb. Lainak lix Dios ut a'anaheb lin tenamit.

¹¹ Inc'a' chic te'xch'olob xyalal chicuix chiruheb li ras ritz'in xban nak chi coc' chi nink te'xnau chic anihin.

¹² Tincuy lix maqueb ut ma jun cua chic tinc'oxla lix mausilaleb, chan li Dios. (Jer. 31:31-34)

¹³ Nak li Dios quixye nak tixbanu jun chic li ac' contrato a'an naraj naxye nak li najter contrato yo chi sachc xcuanguil ut maç'a' chic xc'anjel taçanåk.

9

Li Tabernáculo a'an retalil li choxa

¹ Li xben contrato cuan xchak'rab naxye chanru nak nalok'oniman li Dios ut cuan jun li muhebal re lok'onjnc yibanbil xbaneb li cujnk tabernáculo xc'aba'. ² Jo'ca'in nak yibanbil li na'ajej. Tasbil sa' xyi riq'uin jun nimla t'icr. Sa' li xben tasal cuan li candil cuukub xxamlel ut cuan ajcui' li mex bar naq'ueman cui' li mayejanbil caxlan cua. Li xben tasal a'an Santil Na'ajej xc'aba'. ³ Li na'ajej li cuan jun pac'al li t'icr, a'an Lok'laj Santil Na'ajej xc'aba'. ⁴ Aran cuan jun xc'atbal li pom yibanbil riq'uin oro, ut cuan ajcui' jun li Lok'laj Çax letzbil oro chirix. Chi sa' li Lok'laj Çax a'an cuan li xar oro bar cui' c'ulanbil li maná. C'ulanbil ajcui' sa' li çax lix xuk' laj Aarón li quituxmec ut qui-atz'umac. Ut c'ulanbil ajcui' aran li cuib chi pec tic ru li tz'ibanbil cui' li lajeb chi chak'rab. ⁵ Ut sa' xben li Lok'laj Çax cuan cuib li querubines yibanbileb riq'uin oro chanchaneb li ángel. A'an retalil nak cuan li Dios aran. Lix xiq'ueb naxc'ul rib sa' xben lix tz'apbal re li çax bar naq'ueman cui' li mayej quic' re xcuylal li maç. Abanan anakcuan inc'a' takach'olob nabal chic chirix a'an. ⁶ Jo'ca'in nak que'c'anjelac sa' li na'ajej li que'xlok'oni cui' li Dios. Rajlal cutan que'oc laj tij sa' li xben tasal chixbanunquil lix c'anjel. ⁷ Aban sa' lix cab tasal ca'aj cui' li xyucua'il aj tij na-oc jun sut chiru li jun chihab. Ut nak na-oc sa' li Lok'laj Santil Na'ajej a'an, naxc'am xquiç'uel li xul ut naxmayeja re taçuyek' lix maç a'an ut re ajcui' nak taçuyek' xmaqueb li tenamit. ⁸ Riç'uin li atin a'in, chirix li lok'onjnc junxil sa' li tabernáculo, li Santil Musik'ej naxc'ut chiku nak moco yalak ani ta naru na-oc toj chi sa' li Lok'laj Santil Na'ajej riq'uin li Dios xban nak toj cuan xc'anjel li najter chak'rab chiruheb ut toj yoqueb chi c'anjelac sa' li xben tasal. Jo'can nak li xben tasal a'an naramoc re li oquebal chiruheb sa' li Lok'laj Santil Na'ajej. ⁹ Chixjunil a'in, a'an jun retalil chok' ke anakcuan nak junxil quilaje'mayejac. Aban li c'atbil mayejut li c'a'ak chic re ru chi mayejil inc'a' quiris lix maqueb. ¹⁰ Sa' lix pabaleb junxil cuan li chak'rab chirix li c'a'ru te'xtzaca ut c'a'ru te'ruc' jo' ajcui' chanru nak te'ch'ajok re xsantobresinquileb rib. Usta inc'a' quijala lix na'lebeb, aban tento que'xbanu li chak'rab a'an toj quicuulac xk'ehil nak li Dios quixjal nak quixq'ue li ac' na'leb. ¹¹ Aban ac xc'ulun li Jesucristo ut a'an chic li tz'akal xyucua'il aj tij chok' ke lao. Ut xkac'ul li rusilal li Dios li quixq'ue ke sa' li ac' contrato. Li Jesucristo inc'a' nac'anjelac sa' junak tabernáculo yibanbil xbaneb li cujnk arin sa' ruchich'och'. K'axal lok' cui'chic li na'ajej li nac'anjelac cui'. ¹² Li Kacua' Jesucristo co sa' li Lok'laj Santil Na'ajej sa' choxa. A'an inc'a' quixmayeja xquiç'uel li chibat chi moco ral cuacax. Quixmayeja ban lix lok'laj quiq'uel. Jun sut ajcui' quixmayeja rib re xq'uebal li kacolbal chi junelic. ¹³ Sa' lix pabaleb junxil cuan nak riq'uin li c'a'ru neque'xbanu laj tij, neque'xmux ru lix c'anjel sa' li tabernáculo. Ut re xsachbal lix paltileb que'xmeyeja li chibat ut li toro. Lix quiq'uel ut lix chahil li c'atbil tuk' ix cuacax narachrachic sa' xbeneb laj tij. ¹⁴ Cui lix quiq'uel li xul naru naxsach lix paltileb, k'axal nim cui'chic xcuanguil lix quiq'uel li Jesucristo xban nak a'an narisi li kamaç. Li Santil Musik'ej quixtenk'a li Jesucristo nak quixmayeja rib chiru li Dios re xtojbalarix li kamaç. Li Jesucristo tz'akal chabil. Maç'a' xmaç ut lix quiq'uel narisi li kamaç li nac'amoc chak re li çamc sa' kaben. Naxsakobresi li kac'a'ux re nak ca'aj cui' chiru li yo'yoquul Dios toc'anjelac. ¹⁵ Anakcuan cuan li ac' contrato xban xcamic li Jesucristo. Chixjunileb li bokbileb xban li Dios

taꝥuaṅk xcuybal lix maꝥueb, eb li que'cuan rubel xcuanquil li xben contrato jo' ajcui' lao li cuanco rubel xcuanquil li ac' contrato. Ut taꝥuaṅk kayu'am chi junelic jo' quixyechi'i li Dios. Li Jesucristo quicam chiru cruz re kacolbal. Riꝥ'uin lix lok'laj quiq'uel quixtoj rix li kamaꝥ. ¹⁶ Laex ac nequenau nak junak cuṅk cuan c'a'ru re naxye c'a'ru tarechani li ralaḷ xc'ajol junjunk. Ut a'an taꝥuxmaṅk nak acak xcam. ¹⁷ Li aṭin a'in maꝥ'a' xc'anjel nak toj yo'yo li xyehoc re. Toj chirix ban lix camic taꝥ'anjelak. ¹⁸ Jo'can nak li xben contrato quixakabaꝥ chak xcuanquil riꝥ'uin xquiq'ueleb li xul nak que'mayejaꝥ. ¹⁹ Nak laj Moisés quixye chixjunil li chak'rab reheb li tenamit, quixchap li coc' ruk' li pim hisopo xc'aba' ut ca'ch'in li caki lana. Quixtz'a sa' xquiq'uel li chibaṭ ut li ral cuacax yubil riꝥ'uin ha'. Quixrachrachi li quic' chiru li hu tz'ibanbil cui' li chak'rab ut quixrachrachi ajcui' sa' xbeneb li tenamit. ²⁰ Tojo'nak quixye reheb: Riꝥ'uin li quic' a'in xakabanbil xcuanquil li contrato li quixq'ue li Dios chok' ere, chan. (Ex. 24:8) ²¹ Ut laj Moisés quixrachrachi li quic' chiru li tabernáculo jo' ajcui' chiru chixjunil li c'a'ak re ru nac'anjelac sa' li tabernáculo re xlok'oninquil li Dios. ²² Jo' tz'ibanbil sa' li chak'rab, tento xsantobresinquil riꝥ'uin quic' chixjunil li quic'anjelac chiruheb. Maꝥ'a' xcuybal li maꝥ cui inc'a' taḥoyek' li quic'.

Riꝥ'uin lix camic li Jesucristo quixtoj rix li kamaꝥ

²³ Jo'can nak tento nak que'xrachrachi lix quiq'uel li xul chiru li tabernáculo jo' ajcui' chiruheb li c'a' re ru cuan chi sa' re xsantobresinquileb. Li tabernáculo yal retalil li choxa. Ut li choxa santobresinbil riꝥ'uin jun mayej k'axal cui'chic lok'. A'an lix lok'laj quiq'uel li Kaꝥua' Jesucristo. ²⁴ Li Cristo inc'a' nac'anjelac sa' junak tabernáculo yibanbil xbaneb li cuṅk. Nac'anjelac ban sa' choxa. Li tabernáculo quicuan, a'an yal retalil li choxa. Li Jesucristo co sa' choxa ut anakcuan aran yo chi jaloc aṭin chikix chiru li Dios. ²⁵ Rajlal chihab na-oc lix yucua'il aj tij sa' li Lok'laj Santil Na'ajej ut naxmajeja xquiq'uel li xul. Aban moco jo'can ta quixbanu li Jesucristo. A'an jun sut ajcui' quixmajeja lix lok'laj quiq'uel nak quicam. ²⁶ Cui ta quixmajeja rib nabal sut, nabal sut raj quicam chalen sa' xtiꝥlajic li ruchich'och'. Aban inc'a' quixbanu chi jo'can. Li Jesucristo quic'unun re xrakbal li xben contrato ut jun sut ajcui' quixmajeja rib. Ut riꝥ'uin a'an cuan xcuybal li maꝥ. ²⁷ Chixjunil li tenamit jun sut ajcui' te'caṅk ut li Kaꝥua' Dios taraꝥkok aṭin sa' xbeneb. ²⁸ Jo'can nak li Jesucristo jun sut ajcui' quixmajeja rib re risinquil lix maꝥueb li q'uila tenamit. Mokon tol-elk cui'chic, aban maꝥua' chic re cuyuc maꝥ tachalk. Tol-elk ban li Jesucristo re xtz'akobresinquil li kacolbal chikajunil li yoꝥo chi yo'oninꝥ re.

10

¹ Li chak'rab li quiq'uehe' re laj Moisés yal retalil li usilal talaje'chalk mokon. Sa' li chak'rab a'an naxye nak te'majejak rajlal chihab aban moco riꝥ'uin ta li mayejaꝥ quitiꝥobresic lix yu'ameb. ² Cui ta riꝥ'uin li mayejaꝥ taek lix maꝥueb inc'a' raj chic neque'mayejaꝥ rajlal chihab. Abanan neque'rec'a sa' li rameb nak toj cuan lix maꝥueb. Jo'can nak inc'a' que'xcanab li mayejaꝥ. ³ Lix yaḷal li mayejaꝥ neque'xbanu a'an re xjulticanquil chiruheb nak toj cuanqueb xmaꝥ. ⁴ Lix quiq'uel li chibaṭ ut li toro inc'a' narisi li maꝥ. ⁵ Jo'can nak li Kaꝥua' Jesucristo, nak ac chalꝥ re sa' ruchich'och', quixye re li Acuabej Dios: Laj ninnau nak laꝥt inc'a' nacacuaj lix quiq'uel li mayej xul. Inc'a' nacuulac chaꝥuu li c'a'ak re ru chi mayejil. Jo'can nak tinaꝥ'ue chi tz'eꝥualoc'.

6 Inc'a' nacuulac chácuu li c'atbil mayej chi moco li c'a'ak re ru chi mayejil re risinquil li maç.

7 Ut quixye: Cue'quin, at Kaçua', tinbanu li nacacuj jo' tz'ibanbil sa' li Santil Hu chicuix. (Sal. 40:6-8)

8 Jo'ca'in quixye li Cristo re li Dios: Inc'a' nacuulac chácuu li c'atbil mayej chi moco li c'a'ak re ru chi mayejil re risinquil li maç. Xelaje'xbanu a'in xban nak jo'can tz'ibanbil sa' li chak'rab junxil. Quixye li atin a'in usta ac tz'ibanbil sa' li chak'rab nak te'mayejak. 9 Ut quixye ajcui': Cue'quin, at Kaçua'. Tinbanu li nacacuj, chan. Jo'can nak li Dios quirisí xcuauquil li mayejac xul ut chok' rekaj li mayej a'an quixq'ue li Jesucristo chi camc chiru li cruz. 10 Li Jesucristo quixbanu li quiraj li Dios nak quixmayeja rib chiru li cruz. Jun sut ajcui' quixmayeja rib, ut riq'uín lix camic cuybil li kamaç ut santobresinbilo. 11 Sa' xyankeb laj Israel, chixjunileb laj tij cuulaj cuulaj neque'mayejac ut li mayej a'an inc'a' narisi li maç. 12 Abanan li Jesucristo jun sut ajcui' quixmayeja rib nak quicam re xcuybal xsachbal li maç. Chirix a'an ço sa' choxa ut quic'ojla sa' xnim uk' li Dios. 13 Ut aran yo' chiroybeninquil nak taçuulak xk'ehil nak tixyek' sa' rok eb li xic' neque'iloc re. 14 Xban nak jun sut ajcui' quixmayeja rib li Jesucristo nak quicam chiru li cruz, maç'a' chic xmaqueb chiru li Dios li santobresinbileb. 15 Jo'can ajcui' li Santil Musik'ej naxç'olob xyalal chiku nak a'an tz'akal yal xban nak jo'ca'in naxye sa' li Santil Hu:

16 A'in li contrato ting'ue reheb, chan li Dios. Taçuulak xk'ehil nak ting'ue lin chak'rab sa' lix c'a'uxeb ut ting'ue ajcui' sa' li rameb.

17 Ut quixye ajcui':

Inc'a' chic tanak inç'ol lix maqueb chi moco lix mausilaleb. (Jer. 31:33-34)

18 Jo'can nak cui ac cuybil sachbil li kamaç, maç'a' chic xc'anjel li mayejac re risinquil li maç.

Naru tocuank chi sum atin riq'uín li Dios

19 Jo'can utan ex herman, anakcuan naru tocuank chi sum atin riq'uín li Dios xban nak quihoye' lix lok'laj quiq'uel li Jesucristo nak quicam chiru li cruz sa' kac'aba'. 20 Riq'uín lix camic li Jesucristo quixsach xcuauquil li t'icr li quicuan sa' li tabernáculo ut quixq'ue li ac' na'leb re xtaubal li junelic yu'am ut anakcuan naru tocuank chi sum atin riq'uín li Dios. 21 Li Jesucristo, a'an lix yucua'il aj tij chok' ke lao li ralex xc'ajol li Dios. 22 Jo'can nak chikaq'ue kib rubel xcuauquil li Dios chi anchal kach'ol ut chi maç'a'ak kaxiu xban nak nakec'a' nak maç'a' chic li kamaç. Ch'ajbil chic li kam xban xquiq'uel li Jesucristo ut subsinbil chic kaha'. 23 Jo'can nak cauhaç taxak kach'ol sa' li kapabal xban nak li Dios naxq'ue li c'a'ru naxyechi'i ke. 24 Chikasíc' chanru takatenk'a kib re nak takara kib ut chikabanu usilal chi kibil kib. 25 Cuanqueb li inc'a' neque'xic sa' li ch'utubaj ib. Abanan inc'a' takabanu jo' neque'xbanu eb a'an. Junelic ban takach'utub kib re xlok'oninquil li Dios. Chikaq'ue xcacuib li kach'ol chi kibil kib. Tento takabanu a'an xban nak chi seb tol-elk li Jesucristo. 26 Cui junelic yoco chi maçobc chi ac nakanau xyalal li rañin li Dios, maç'a' chic xcuybal li kamaç xban nak nakanau nak maç yoco chixbanunquil. 27 Cui junelic yoko chi maçobc, ca'aj chic li rakba atin ut lix xamlal li tojba maç yoco chiroybeninquil bar cui' te'c'atek' li xic' neque'iloc re li Kaçua' Dios. 28 Junxil inc'a' qui-ile' xtok'obal ru li ani quik'etoc re xchak'rab laj Moisés. Cui cuan cuib malaj oxib li que'xye nak yal nak xk'et li chak'rab, quirake' atin sa' xben ut que'xcamsi. 29 Numtajenak cui'chic ra te'xc'ul li neque'tz'ektanan re li Ralex li Dios ut neque'xsach xcuauquil

lix quiq'uel xban nak riq'uin xquiq'uel li Jesucristo xakabanbil xcuauquil li ac' contrato ut santobresinbilo lao. Numtajikan cui'chic ra te'xc'ul li neque'xmajecua li Santil Musik'ej li naq'uehoc ke li rusilal li Dios. ³⁰ Lao nakanau nak li Dios quixye chi jo'ca'in: Ca'aj cui' lain naru ting'uehoc xtojbal rix lix maqueb ut lain tinrahobtesiheb riq'uin li c'a'ru quilaje'xbanu.

Ut quixye cui'chic li Kaçua':

Lain tinrakok atin sa' xben lin tenamit. (Dt. 32:35-36)

³¹ K'axal xucuaajel nak tarakok atin li yo'yoquil Dios sa' xbeneb li neque'tz'ektanan re. ³² Aban chinak sa' ech'ol chanru xec'ul junxil nak toje' xepab li Cristo. Nabal chi raylal quilajec'ul ut inc'a' xch'inan ech'ol. ³³ Cuan sa' eyank li xic' que'ile' ut que'hobe' chiruheb li tenamit. Ut laex quextz'akon riq'uin li raylal li que'xc'ul. ³⁴ Laex quiyot'e' ech'ol chi rilbal le rech aj pabanellil li cuanqueb chi prexil. Ut inc'a' quiraho' sa' le ch'ol nak quimak'e' cheru li c'a'ru ere xban nak nequenau nak sa' li choxa cuan ematan k'axal cui'chic lok'. Le matan li cuan sa' choxa inc'a' nalaj inc'a' na-oso'. ³⁵ Jo'can nak cauhak taxak ech'ol sa' le pabal ut riq'uin a'an cuan ek'ajcamunquil. ³⁶ Laex tento tecuy li c'a'ru na-ux ere re nak tebanu li naraj li Dios. Ut riq'uin a'an tec'ul li yechi'inbil ere xban li Dios. ³⁷ Jo'ca'in tz'ibanbil sa' li Santil Hu: Chi seb tol-elk li Cristo. Inc'a' tabayk chak.

³⁸ Li tic xch'ol xban inpabanquil cuan xyu'am chi junelic. Cui naxcanab inpabanquil, inc'a' tashok' inch'ol riq'uin, chan li Dios. (Hab. 2:3-4)

³⁹ Aban, lao macua'o xcomoneb li neque'xcanab xpabanquil li Dios. Eb a'an te'xic sa' xbalba. Lao nakapab li Dios ut tocolek'.

11

Li Pabal

¹ C'a'ru li pabal? Li pabal a'an xnaubal nak relic chi yal takac'ul li yoco chiroybeninquil. Usta inc'a' nakil ru aban nakanau nak takac'ul. ² Li Dios quisaho' xch'ol riq'ueineb li kaxe'tonil yucua' xban nak que'paban. ³ Xban nak nakapab li ratin li Dios, nakanau nak li Dios quixyib li choxa jo' ajcui' li ruchich'och'. Macua' riq'uin c'a'ak re ru quixyib li ruchich'och'. Yal riq'uin li ratin quixyib. ⁴ Xban lix pabal laj Abel, quixq'ue jun xmayej chabil chiru li quixq'ue laj Cain. Xban lix pabal, li Dios quixye nak tic xch'ol ut quixc'ul lix mayej. Usta camenak chic laj Abel, aban toj cuan retalil chok' ke lao chanru nak quipaban chiru li Dios. ⁵ Xban lix pabal laj Enoc inc'a' quicam. Quic'ame' ban sa' choxa xban li Dios. Inc'a' chic que'xtau xban nak ac' x'ame'. Nakanau nak li Dios quisaho' sa' xch'ol riq'uin nak toj maji' nac'ame' sa' choxa xban nak jo'can tz'ibanbil sa' li Santil Hu. ⁶ Ma jok'e tashok' xch'ol li Dios riq'uin li ani inc'a' napaban. Ma ani naru nachal riq'uin li Dios cui inc'a' naxpab nak cuan li Dios ut nak a'an naxq'ue xk'ajcamunquil li ani nasic'oc re. ⁷ Xban lix pabal laj Noé, li Dios quixye re c'a'ru talajc'ulmank. Ut laj Noé quixpab li quixye li Dios usta toj maji' nac'ulman. Quixyib li nimla jucub cab re xcolbal rib a'an, jo' eb ajcui' li ralar xc'ajol. Ut lix pabal laj Noé quixc'utbesi nak li cuanqueb sa' ruchich'och' inc'a' que'paban. Jo'can nak que'cam. Xban nak quipaban, li Dios quixye nak tic xch'ol laj Noé. ⁸ Xban lix pabal, laj Abraham qui-abin chiru li Dios nak quixye re nak taelk sa' li tenamit cuan cui'. Co sa' li na'ajej li quiyechi'ic re xban li Dios. Nak quiel chak sa' li tenamit, co chi inc'a' naxnau bar xic re. ⁹ Xban lix pabal laj Abraham quicuan sa' li na'ajej li quiyechi'ic re xban li Dios, ut quicuan aran jo' jun jalan xtenamit. Quixyib xmuhebal t'icr xban nak yal numec' re. Jo'can

ajcui' que'xbanu laj Isaac ut laj Jacob xban nak a'aneb li te'ečanink re li c'a'ru quixyechi'i li Dios. ¹⁰ Laj Abraham inc'a' quixyib çabil ochoch, xban nak yo' chiroybeninquil jun xna'aj sa' li santil choxa. Li na'ajej a'an yibanbil xban li Kaçua' Dios ut taçuank chi junelic. ¹¹ Xban lix pabaleb, laj Abraham ut lix Sara quicuau jun lix c'ula'al sa' xtixilaleb, usta lix Sara a'an jun ixk inc'a' naq'uiresin. Aban que'xnau nak te'xc'ul li c'a'ru quiyechi'ic reheb xban li Dios. ¹² Usta ac tix çic laj Abraham nak quiyo'la li ralal, abanan que'tam li ralal xc'ajol. Lix q'uialeb li ralal xc'ajol jo' xq'ual li chahim chiru li choxa ut jo' xq'ual li samaib li cuan chire li palau. Ut inc'a' naru rajlanquileb xban lix q'uialeb. ¹³ Chixjunileb a'an quilaje'cam. Usta inc'a' que'xc'ul chixjunil li c'a'ru quiyechi'ic reheb xban li Dios, que'xpab nak taç'ulmank li yechi'inbil. Jo'can nak saheb sa' xch'ol. Que'xye nak li ruchich'och' a'in maçua' tz'akal xna'ajeb; yal numeleb ban sa' ruchich'och'. ¹⁴ Que'xye chi jo'ca'in xban nak toj yoqueb chiroybeninquil jun lix na'ajeb. ¹⁵ Li na'ajej a'an maçua' li na'ajej que'el cui' çak. Cui ta a'an, quiru raj que'suk'i cui'çic aran. ¹⁶ Aban que'roybeni jun na'ajej k'axal çabil, a' li santil choxa. Jo'can nak li Dios inc'a' naxutanac chixyebal nak a'an lix Dioseb xban nak quixc'ub jun li na'ajej çok' reheb. ¹⁷ Laj Abraham quiyale' lix pabal xban li Dios nak quixye re nak tixmayeja li ralal. Jun ajcui' li ralal cuan, aban xban nak naxpab li Dios, laj Abraham quixq'ue laj Isaac çok' xmayej. ¹⁸ Quixq'ue li ralal çok' xmayej, usta a'an li quiyechi'ic re xban li Dios re nak te'tamk li ralal xc'ajol. ¹⁹ Cui ta quicam laj Isaac, laj Abraham ac naxnau nak nim xcuanguil li Dios re xcuaclesinquil cui'çic chi yo'yo sa' xyankeb li camenak. Naru xyebal nak çanchan a'an quixbanu li Dios xban nak laj Abraham quixk'axtesi li ralal re çamc. Aban quik'axtesic cui'çic re chi yo'yo xban li Dios. ²⁰ Laj Isaac quixpab nak li Dios tixq'ue li quixyechi'i re. Jo'can nak quixye reheb laj Jacob ut laj Esaú nak li Dios taosobtesink reheb nak taçuulak xk'ehil. ²¹ Laj Jacob quixpab nak tixc'ul li quiyechi'ic re xban li Dios. Jo'can nak ac çamc re, laj Jacob quirosobtesiheh li ralal laj José. Ut chirix a'an, laj Jacob quixxulub rib sa' xben lix xuk' ut quixlok'oni li Dios. ²² Xban lix pabal laj José, nak ac çamc re, quixjultica reheb laj Israel nak sa' jun cutan te'elk sa' li tenamit Egipto. Ut quixye ajcui' reheb nak te'xc'am lix bakel nak te'elk sa' li tenamit a'an. ²³ Xban lix pabaleb lix na' xyucua' laj Moisés, nak quiyo'la laj Moisés, oxib po que'xmuk chiru li rey. Que'ril nak c'ajo' xchak'al ru li c'ula'al ut inc'a' que'xucuac chi xk'etbal lix çak'rab li rey nak quixye nak te'camsik li c'ula'al li coc' telom. ²⁴ Xban lix pabal laj Moisés, nak quicuinkilo' inc'a' quiraj nak te'xye nak lix rabin li rey, a'an lix na'. ²⁵ Inc'a' quiraj tz'akonç sa' li sahil ch'olej cuanqueb cui' laj Egipto. Quixnau nak li sahil ch'olej a'an yal nanume'. Quiraj ban xc'ulbal li raylal li yoqueb chixc'ulbal laj Israel lix tenamit li Dios. ²⁶ Naxnau nak k'axal lok' nak tixc'ul li raylal sa' xc'aba' li Cristo chiru xc'ulbal lix biomal li tenamit Egipto. Ut yo' chiroybeninquil lix k'ajcamunquil li taq'uehek' re xban li Dios. ²⁷ Xban xpabal laj Moisés quiel çak sa' li tenamit Egipto ut inc'a' quixucuac chiru li rey usta yo' xjosk'il sa' xben. Quixcacuubresi xch'ol xban nak naxnau nak li Dios cuan riq'uin. Çanchan li yo' chirilbal ru, aban li Dios ma' ani na-iloc ru. ²⁸ Xban lix pabal, laj Moisés quixbanu li pascua jo' quiyeh'e' re xban li Dios. Nak elqueb re Egipto quixtakla xq'uebal xquiq'uel li carner chiruheh li puerta. Ut nak quinume' li ángel chi çamsinc, ma' jun li xben ralaleb laj Israel quixçamsi. ²⁹ Xban lix pabaleb laj Israel, que'nume' sa' xyi li çaki palau. Çaki ch'och' li que'nume' cui'. Ut jo'can ajcui' que'raj xbanunquileb laj Egipto. Aban inc'a' que'ru xban nak li ha' quixjunaji rib sa' xbeneb ut aran que'oso' chixjunileb.

³⁰ Xban lix pabaleb laj Israel, cuukub cutan que'xsuti rix li tenamit Jericó. Ut sa' xcuuk li cutan quit'ane' li tz'ac li sutsu cui' li tenamit. Ut que'rechani li tenamit. ³¹ Lix Rahab a'an jun ixk naxc'ayi rib nak quicuan. Xban nak quipaban, quixtenk'ahab laj Israel li que'chal chixq'uebal retal li tenamit. Xban lix pabal, lix Rahab inc'a' quicam sa' xyankeb li inc'a' que'paban re li Dios. ³² Toj cuan raj nabal tinsarak'i ere, aban inc'a' tatz'aklok li cutan re tinsarak'ik chirix lix pabaleb laj Gedeón, laj Barac, laj Sansón, ut laj Jefte; ut tinya ajcui' raj ere chanru lix pabaleb laj David, laj Samuel, ut eb li profeta. Aban inc'a' tatz'aklok li cutan. ³³ Nak que'pletic riq'uin li jalanil tenamit, xban nak cuanqueb xpabal, que'rechani. Sa' xyalal que'taklan ut xban lix pabaleb que'xc'ul li quiyechi'ic reheb xban li Dios. Cuan li que'q'uehe' sa' xyankeb li cakcoj re te'ti'ek', aban mac'a' que'ux re xbaneb li cakcoj. ³⁴ Xban lix pabaleb inc'a' que'c'at nak que'cute' sa' xam. Cuan que'camsic raj chi ch'ich', aban inc'a' que'yog'ue'. Riq'uin lix pabaleb, que'q'uehe' xcacuulal li mac'a'eb xmetz'eu. Nak que'pletic riq'uineb li jalanil tenamit, que'numta xcuanquil sa' xbaneb xban li Dios toj retal que'rechani li tenamit. ³⁵ Cuanqueb ixk, xban lix pabaleb, que'cuaclic cui'chic lix camenakeb chi yo'yo. Ut cuanqueb ajcui' que'rahobtesic toj retal nak que'cam xban lix pabaleb. Inc'a' que'raj nak te'ach'abak xbaneb li xic' neque'iloc reheb xban nak inc'a' que'raj xtz'ektanankuil li Dios. Ac neque'xnau nak te'xc'ul jun yu'am k'axal chabil sa' choxa nak te'cuaclic cui'chic chi yo'yo. ³⁶ Cuan que'hobe', cuan que'saq'ue', ut cuan que'baq'ue' ut que'q'uehe' sa' tz'alam. ³⁷ Cuan que'camsic chi pec ut cuan que'sete' riq'uin jachleb che'. Que'yale' ralenkuil aban inc'a' que'xtz'ektana li Dios. Ut cuan ajcui' que'camsic riq'uin k'esnal ch'ich'. Quilaje'xbeni rib yalak bar ut riq'uin rix chibat ut rix carner que'xyib li rak'eb. Neba'eb ut rahobtesinbileb. K'axal ra que'xc'ul. ³⁸ Macua' raj xc'ulubeb li inc'a' useb xna'leb nak te'cuank laj pabanel sa' xyankeb. Xban nak que'rahobtesic, eb laj pabanel quilaje'elelic chiruheb ut que'cuan yalak bar sa' li chaki ch'och', sa' tzul, ut que'cuan ajcui' sa' li ochoch pec. ³⁹ Nak nakabi a'in chirixeb laj pabanel, nakanau nak tz'akal re ru lix pabaleb. Aban toj maji' quitz'akloc ru lix colbaleb li quiyechi'ic reheb xban li Dios. ⁴⁰ Li Dios quiraj nak yokeb chi oybeninc re nak te'tz'akonk kochben riq'uin li k'axal lok' yechi'inbil ke. A'an li kacolbal sa' xc'aba' li Jesucristo.

12

Chikac'oxla li Jesucristo

¹ Numtajanak xq'uialeb laj pabanel li que'cuan chak najter. Kaq'uehak retal chanru lix pabaleb. Chanru nak que'paban chak a'an, jo'can ajcui' takabanu lao. Cui junak naraj alinac, narisi chixjunil li naalobresin re ut naxyal xk'e chi alinac. Jo'can ajcui' takabanu lao. Takacanab chixjunil li c'a'ak re ru nach'i'ch'i'in ke sa' li kapabal ut takacanab ajcui' li mac li nachapoc ke. Chikacuyak taxak li c'a'ak re ru tento xcuylal re nak takabanu jo' naraj li Dios. ² Kaq'uehak kach'ol chixtakenkuil li Jesucristo laj c'amol be chiku. A'an naq'uehoc re li kapabal ut naxtz'akobresi ru. Usta xutanal li camc quixc'ul chiru li cruz, abanan inc'a' quixq'ue sa' xch'ol. Ut quixcuy li raylal sa' kac'aba' lao xban nak lix sahilal xch'ol quiq'uehe' re mokon. Ut anakcuan cuan sa' choxa sa' xnim uk' li Dios.

Li Dios nocoxtij xban nak lao li ralal xc'ajol

³ Cheq'uehak retal chanru nak quixcuy li rahobtesic li Jesucristo xbaneb laj mac. Jo'can ajcui' laex. Checuyak li ra xic' ut inc'a' chich'inank ech'ol sa' le pabal. ⁴ Laex toj maji' nequexcamsic xban nak nequeq'ue ech'ol

chixcolbal erib chiru li maç. ⁵ ¿Ma ac xsach sa' ech'ol li c'a'ru quixye li Dios re xch'olobanquil le na'leb? Li Dios naatinac eriq'uin jo' naatinac junak yucua'bej riq'uin lix coc'al. Jo'ca'in tz'ibanbil sa' li Santil Hu: Ex cualal inc'ajol, metz'ektana le tijbal li ninye ere, chi moco chich'inank ech'ol nak nequexink'us.

⁶ Lajin nintij li ani ninra ut nink'us chi cau li ani ninc'ul chok' cualal inc'ajol. (Pr. 3:11-12)

⁷ Tento nak tecuy li tijec' re nak tetau ena'leb. Jo'can nak nequexxtij li Dios xban nak laex li ralar xc'ajol. ¿Ma cuan ta bi' junak alalbej inc'a' natije' xban lix yucua'? ⁸ Cui li Dios inc'a' nequextij jo' nak naxtijeb chixjunileb li ralar xc'ajol, a'an naraj naxye nak laex maçua'ex tz'akal ralar xc'ajol. Ut li Dios maçua' ajcui' tz'akal eyucua'. ⁹ Sa' kaca'ch'inal, li kana' kayucua' nocoe'xk'us ut naka-oxlok'ihéb. ¿Ma toja' ta chíc li kachoxahil yucua' inc'a' takapab nak toxk'us? Cui nakapab li kak'usalb naxq'ue li Dios, cuank kayu'am chí junelic. ¹⁰ Sa' kaca'ch'inal li kana' kayucua' nocoe'xk'us jo' neque'cuulac chiruheb a'an. Aban li Kaçua' Dios nocoxk'us chí tz'akal. Nocoxk'us re nak taçicok' kach'ol ut toxasantobresi xban nak a'an santo. ¹¹ Relic chí yal nak nakac'ul li kak'usalb moco sa ta nakec'a. Ra ban nakec'a nak nocok'use'. Abanan cui nakacuy k'usec' mokon nakatau xyalal nak riq'uin li k'usec' nachabilo' li kayu'am ut taçuklak ajcui' li kach'ol.

K'axal xucujel xtz'ektanquil li ratin li Dios

¹² Checacuubresihak le rok eruk' li maç'a' xmetz'eu. Lix yalal li jaljoquil ru atin a'an a'in: Checacuubresi le ch'ol re nak inc'a' tach'inank ech'ol sa' le pabal. ¹³ Tijobresihomak ru le be re nak li yek inc'a' chic tixbach' li rok; taçacuuk ban. Naraj naxye: tçac taxak le yu'am re nak li toj ac' sa' lix pabal inc'a' tach'inank xch'ol. Te'cacuuk ban xch'oleb sa' lix pabaleb. ¹⁴ Chexcuank sa' tuktuquil usilal riq'uineb le ras eritz'in. Chexcuank sa' tçiquil ut sa' santilal, xban nak cui maç'a' esantilal ma jok'e teril ru li Dios. ¹⁵ Chetenk'a erib cheribil erib sa' le pabal re nak ma jun ere tatz'ektanank li rusilal li Dios. Chebanu cuent re nak inc'a' teyo'ob li c'ahinc ib sa' eyank. Cui jo'can tebanu naru naniman ru li ch'a'ajquillal ut mare nabaleb te'xic cui'chic sa' li maç xban a'an. ¹⁶ Ma ani taxak junak sa' eyank yal tixlak'ab rib chí inc'a' sumsu. Chi moco chebanu jo' quixbanu laj Esaú nak quixtz'ektana lix lok'laj maçan. Laj Esaú quixc'ul raj lix maçan xban nak a'an li xben alalbej. Abanan quixtz'ektana lix maçan xban nak quixc'ayi yal riq'uin jun cusa'ob chí cua. ¹⁷ Laex nequenuau nak mokon quixrahi raj cui'chic xc'ulbal li rosobtesinquil laj Esaú riq'uin lix yucua'. Abanan inc'a' chic quiru xban nak ac quixtz'ektana. Tayabak nak quixtz'ama cui'chic, aban inc'a' chic quiru. Maç'a' chic xjalenuil. ¹⁸ Laex inc'a' quebanu jo' que'xbanu eb laj Israel najter k'e cutan. Eb a'an que'jiloc riq'uin li tzul Sinai nak li Dios quixq'ue lix chak'rab re laj Moisés sa' li tzul a'an. Quicuan xam. Quik'ojyino' ut quicuan ajcui' cak-sut-ik'. ¹⁹ Eb a'an que'rabi xyab li trompeta ut que'rabi ajcui' xyab xcux li Dios nak quiatinac riq'uineb. Ut que'xtz'ama nak me'atinac chic xban li Dios. ²⁰ Que'xye chí jo'can xban nak inc'a' que'xcuy rabinquil li chak'rab li naxye nak taçamsik chí pec li ani taxic aran sa' li tzul, usta xul. (Ex. 19:12) ²¹ Xban nak k'axal xucujel rilbal li yo' chí uxc sa' xben li tzul, laj Moisés quixye: C'ajo' nak ninxucuaç ut ninsicsot xban inxiu, chan. (Dt. 9:19) ²² Abanan laex inc'a' xebanu jo' que'xbanu eb laj Israel. Nak laex nequapab li Cristo, chanchan nak ac xexjiloc riq'uin li tzul Si6n. Si6n naraj naxye li santil choxa cuan cui' li yo'yoquil Dios. Ac' Jerusalén nayeman ajcui' re li na'ajej a'an. Aran cuanqueb li q'uila ok'ob chí ángel. Yoqueb chixlok'oninuil li Dios.

²³ Junaj chic eru laex aj pabanel. Ut tz'ibanbil le c'aba' sa' choxa. Textz'akonk sa' choxa erochbened li tiq'ueb xch'ol li ac tz'akobresinbil ruheb xban li Dios. Cuanquex chi sum atin riq'uin li Dios li tarakok atin sa' xbeneb chixjunileb li cuanqueb sa' ruchich'och'. ²⁴ Ut cuanquex chi sum atin riq'uin li Ka'cua' Jesucristo, li quixakaban xcuanquil li ac' contrato. K'axal nim xcuanquil lix quiq'uel li Jesucristo. Riq'uin a'an cuan xcuybal le maç. Maçua' jo' li quic' li quixmajeja laj Abel najter k'e cutan. ²⁵ Metz'ektana li ratin li Dios jo' que'xbanu eb laj Israel. Eb a'an inc'a' que'xcuy rabinquil xchak'rab li Dios ut que'xtz'ektana li ratin nak quich'olobac chak xyalal chiruheb aran sa' li tzul. Ut quirake' atin sa' xbeneb. Cui inc'a' que'cole' eb a'an, çma toja' ta chic lao tocolek' cui takatz'ektana li Dios li naatinac chak toj sa' choxa? ²⁶ Najter nak li Dios quiatinac sa' li tzul Sinaí, lix yab xcux quirec'asi li na'ajej a'an. Ut li Dios quixye: Sa' jun sut chic maçua' ca'aj cui' li ruchich'och' tincuec'asi. Tincuec'asi ajcui' li choxa. (Ex. 19:18) ²⁷ Nak naxye "jun sut chic" naraj naxye nak tixsach li ruchich'och', li choxa, ut chixjunil li c'a'ak re ru yibanbil. A'ut li inc'a' yibanbil, jo' li musik'anbil xban li Dios, a'an taçanak chi junelic. ²⁸ Chikabantioxi chiru nak tocuank riq'uin li Dios chi junelic sa' lix nimajcual cuanquilal. A'an ma jaruj taosok'. Cuank ban chi junelic. Takalok'oni li Dios chi anchal kach'ol xban nak ca'aj cui' a'an xc'ulub lok'onic. Kaq'uehak kach'ol chixbanunquil li c'a'ru naraj a'an ut takaxucua ru. ²⁹ Li kaDios chanchan jun li xam xban nak tixsach chixjunil li inc'a' us.

13

Chanru xna'leb laj pabanel

¹ Meçanab xrabal erib cheribil erib xban nak junajex sa' le pabal. ² Mek'etk'eti erib chixc'ulbal le rula'. Chec'uleb ban sa' usilal. Cuanqueb li que'xc'ul li rula'eb, abanan inc'a' neque'xnau nak ángel li que'cuulac chi ula'aninc reheb. ³ Cherilak xtok'obal ruheb li cuanqueb sa' tz'alam. Cherec'ak sa' le ram nak chanchan ajcui' laex li cuanquex sa' tz'alam. Chinak ajcui' sa' ech'ol li neque'hobe' ut li neque'rahobtesic. Chanchan nak laex ajcui' yoguex chi c'uluc re li raylal a'an. ⁴ Us li sumlac aban tento che-oxlok'i le sumlajic. Maç'a' c'a'ru chebalak'i cui' erib. Li Dios tarakok atin sa' xbeneb li neque'xmux ru lix sumlajiqueb, jo' ajcui' sa' xbeneb laj co'bet laj yumbet. ⁵ Mera ru li tumin. Chec'ojobak ban ech'ol riq'uin li jo' q'uial cuan ere xban nak li Dios quixye: Junelic tatintenk'a, ut ma jok'e tatincanab ajunes. (Dt. 31:6) ⁶ Jo'can nak naru takaye chi anchal kach'ol: Li Ka'cua' Dios natenk'an cue. Inc'a' ninxucua li c'a'ru te'xbanu li xic' neque'iloc cue. (Sal. 118:6) ⁷ Chijulticok' ere eb li que'c'amoc be cheru. A'an que'xch'olob xyalal li ratin li Dios. Cheq'uehak retal lix pabal ut lix yu'ameb nak que'cuan sa' ruchich'och'. Jo'can ajcui' chebanuhak laex. ⁸ Li Jesucristo inc'a' najala chi moco najala lix na'leb. Ac a'an ajcui' chak chalen najter k'e cutan, a'an anakcuan ut a'anak chi junelic. ⁹ Meq'ue erib chi balak'ic xbaneb laj balak', xban nak jalan jalank li tijleb neque'xye. Maçua' li c'a'ru nakatzaca li najaloc re li kayu'am. A' ban li rusilal li Dios najaloc re ut naxq'ue xcacuil kach'ol. ¹⁰ Lao cuan jun kartal. A'an nak quixmajeja rib li Ka'cua' Jesucristo chiru li cruz. Eb laj tij inc'a' naru te'xtzaca li majej a'an jo' que'xbanu chak najter sa' li tabernáculo nak que'xmajeja li xul. (Naraj naxye nak li colba-ib inc'a' natauman riq'uin xbanunquil li chak'rab. Natauman ban riq'uin xpabanunquil li Cristo.) ¹¹ Lix yucua'il aj tij sa' xyankeb laj Israel naxc'am lix quiq'uel li xul sa' li Lok'laj Santil Na'ajej ut naxmajeja re risinuil li maç. Aban lix tibel li xul naxc'at toj jun pac'al li tenamit. ¹² Jo'can ajcui' li Jesucristo quic'ame' toj jun pac'al

li tenamit ut aran quicam chiru li cruz. Ut rig'uin lix lok'laj quiq'uel li Jesucristo nocoxsantobresi. ¹³ Kacanabak li kanajter na'leb ut chikatakehak li Jesucristo usta toj yoko chi c'uluc raylal sa' xc'aba' a'an. ¹⁴ Li ruchich'och' a'in macua' tz'akal kana'aj. Yoco ban chiroybeninguil jun chic li kana'aj k'axal chabil. A'an li choxa. ¹⁵ Jo'can ut junelic chikalok'onihak li Dios sa' xc'aba' li Jesucristo, ut chikanimak ru. Cui takabanu chi jo'can, a'an li kamayej chiru li Dios. ¹⁶ Misach sa' ech'ol xbanunquill li usilal ut xtenk'anquill erib cheribil erib xban nak a'an jun li mayej nacuulac chiru li Dios. ¹⁷ Chex-abink chiruheb laj c'amol be cheru, ut chebanuhak li c'a'ru neque'xye ere xban nak eb a'an neque'tenk'an ere sa' le pabal. A'aneb li te'xk'axtesi xcuent cherix chiru li Dios. Chetenk'aheb re nak sahakeb sa' xch'ol sa' lix c'anjeleb xban nak cui rahakeb sa' xch'ol, rahak ajcui' chok' ere laex. ¹⁸ Ex herman, tintz'ama cheru nak chextijok chikix lao. Nakec'a nak tic kach'ol ut nakaj nak junelic cuanko sa' tiquial. ¹⁹ Ut nintz'ama ajcui' cheru nak chextijok chicuix. A' taxak li Dios chitenk'ank cue re nak taruk tinxic cui'chic chi junpat cherilbal.

Xchak'rabinquileb li herman

²⁰ A' li Kacua' Dios a'an laj q'uehol tuktuquill usilal, li Dios li quicuaaclesin cui'chic re chi yo'yo li Jesucristo sa' xyankeb li camenak. Rig'uin lix lok'laj quiq'uel li Jesucristo xakabanbil xcuanquill li ac' contrato chi junelic. Li Jesucristo na-iloc ke jo' junak cuink narileb lix carner. ²¹ Chicuanak taxak li rusilal li Dios eriq'uin re nak tebanu li c'a'ru naraj. Chixbanuhak taxak li Dios li c'a'ru naraj eriq'uin sa' xc'aba' li Jesucristo. Lok'oninbil taxak li Jesucristo chi junelic k'e cutan. Jo'can taxak. ²² Ex herman, nintz'ama jun usilal cheru. Checuyak rabinquill li cuatin re xch'olobanquill ena'leb. Moco q'ui ta li atin xintz'iba sa' li hu a'in. ²³ Nacuaj ajcui' xyebal ere nak li hermano Timoteo ac x-el sa' tz'alam. Cui nachal chi junpat arin, cuochbenak nak toxic cherilbal. ²⁴ Cheq'uehak xsahil xch'oleb laj c'amol be cheru sa' le pabal ut chixjunileb li kech aj pabanelil. Eb laj pabanel li cuanqueb arin Italia neque'xtakla xsahil ech'ol. ²⁵ Li rusilal li Dios chicuank eriq'uin. Jo'can taxak.

Li Hu li Quixtz'iba laj Santiago

Xq'uebal xsahil xch'oleb laj pabanel

¹ Laj Santiago, laj c'anjel chiru li Dios ut chiru li Kacua' Jesucristo. Yoqun chi tz'ibac eriq'uin laex, li cablaju chi xtepaleb laj Israel. Nintakla xsahil ech'ol laex li xejeq'ui erib yalak bar sa' li junjũnk chi na'ajej.

Li chabil na'leb li naxq'ue li Dios

² Ex inherman, chisahok' taxak sa' ech'ol riq'uin li raylal nequec'ul. Yalak c'a'ru li raylal nachal sa' eben, a'an yal re xyalbal rix le pabal. ³ Laex nequenau nak riq'uin li yalec' nakac'ul, nacacuu li kach'ol sa' li kapabal. ⁴ Abanan junelic checuyak li raylal re nak tz'akalak ere eru nak texcuank. Chabilakex ut mac'a' chexpaltok' cui'. ⁵ Cui cuan junak sa' eyank taraj xna'leb, chixtz'amahak re li Dios, ut li Dios tixq'ue chi anchal xch'ol ut chi nabal. ⁶ Ut nak tixtz'ama re li Dios, tento nak tixpab nak taq'uehek' re xban li Dios. Moco yal ta xcab rix xch'ol nak tixtz'ama. Tixtz'ama ban chi anchal xch'ol. Li ani yal xcab rix xch'ol tixtz'ama li c'a'ru taraj re li Dios, a'an chanchan li palau inc'a' tuktu ru. Lix ch'ol li jun a'an chanchan li palau ec'asinbil xban li ik' ut nac'ame' yalak bar. ⁷ Cui yal xcab rix xch'ol nak tixtz'ama, mixc'oxla nak tixc'ul li c'a'ru naxtz'ama re li Dios. ⁸ Li ani cuib ru lix ch'ol, junpat naxjal xc'a'ux riq'uin li c'a'ru naxc'oxla xbanunquil. ⁹ Junak li herman, usta mac'a' cuan re, chisahok' sa' xch'ol xban nak a'an k'axal lok' chiru li Dios. ¹⁰ Jo'can ajcui' junak biom chisahok' sa' xch'ol usta nasach chixjunil li c'a'ru cuan re xban nak lix biomal mac'a' na-oc cui' chiru li Dios. Li biomal chanchan li utz'u'uj nak na-oso'. ¹¹ Li utz'u'uj nachakic xban li sak'e ut nat'ane'. Jo'can ajcui' li cuan xbiomal. A'an taçamk usta toj yok chixsic'bal xtz'akob lix biomal.

Li xyalbal rix li kapabal

¹² Us xak reheb li neque'xcuy xnumsinquill li raylal ut inc'a' neque'ch'inan xch'ol. Li ani naxcuy xnumsinquill li yalec' te'xc'ul lix mañan li naxyechi'i li Dios reheb li neque'rahoc re. Ut lix mañaneb, a'an li yu'am chi junelic. ¹³ Li ani nayale' rix lix pabal mixc'oxla nak a' li Dios naq'uehoc re chi aleç. Li Dios ma' ani naxq'ue chi aleç chi moco naaleç xban li inc'a' us. ¹⁴ Li aleç nachal sa' xben li junjũnk li naxq'ue rib chi balak'ic xban li naxrahi ru. ¹⁵ Riq'uin xrahinquill ru li c'a'ru inc'a' us, naticla li mac. Ut nak ac xnumta li mac nachal li camc. ¹⁶ Ex inherman, mebalak'i erib chixc'oxlanquill nak li Dios naq'uehoc chak re li aleç sa' eben. ¹⁷ Xban nak chixjunil li c'a'ak re ru tz'akal chabil a' li Dios sa' choxa naq'uehoc chak ke. Li Dios quyiban re li nacutanobresin ru li choxa. Li Dios macua' jo' li sak'e namoy ru. Li Dios inc'a' naxjal lix na'leb. A'an ban chi junelic. ¹⁸ Xban nak jo'can quiraj li Dios, jo'can nak quixye nak chiru li Dios chanchano li xben ru li racuimk li quixyo'obtesi chak.

Chikapab chi tz'akal li ratin li Dios

¹⁹ Ex inherman, raroquex inban. Laex ac nequenau li xyalal a'in. Jo'can nak cheq'uehak ech'ol chi abinc. Chec'oxla chi us li oc ere chixyebal ut mexjosk'o'. ²⁰ Xban nak cui nocojosk'o', inc'a' nakabanu li c'a'ru naraj li Dios. ²¹ Jo'can ut nak checanabak xbanunquill li c'a'ru inc'a' us ut chixjunil li mausilal. Ut chec'ulak sa' xyalal li ratin li Dios li q'uebil ere. Chicanak sa' ech'ol xban nak li ratin cuan xcuanquill re eçolbal. ²² Chepabak ut

chebanuhak li c'a'ru naxye li raṭin li Dios. Mebalak'i erib chixc'oxlanquil nak tz'akal riq'uin ca'aj cui' rabinquil li raṭin. Tento ban ajcui' xbanunquil li naxye li raṭin li Dios. ²³ Li ani narabi li raṭin li Dios ut inc'a' naxbanu li naxye, a'an chanchan jun li cuṅk naril li ru sa' lem. ²⁴ Ut nak ac xril li ru, naxic ut sa' junpaṭ nasach sa' xch'ol chanru na-iloc. ²⁵ Lix chak'rab li Dios tz'akal re ru ut riq'uin xpabanquil a'an nakatau li kacolbal. Li ani naxq'ue xch'ol chixtzolbal lix chak'rab li Dios inc'a' nasach sa' xch'ol li c'a'ru naxtzol. Naxbanu ban li naxye. Ut osobtesinbil xban li Dios riq'uin li c'a'ru naxbanu. ²⁶ Cui junak naxc'oxla nak tz'akal aj pabanel, ut inc'a' naxq'ue retal li c'a'ru naxye, li jun a'an naxbalak'i rib xjunes rib ut lix pabal maç'a' na-oc cui'. ²⁷ Aban chiru li Acuabej Dios, li napaban chi tz'akal ut maç'a' xpaltil, a'an li natenk'an reheb li neba' ut li xmaç'a'an sa' lix raylaleb. Ut inc'a' naxbanu li maṣilal li neque'xbanu li toj maji' neque'paban.

2

Inc'a' takasic' ru li ani takara

¹ Ex inherman, laex nequepab li Kacua' Jesucristo, li k'axal nim xlok'al. Jo'can nak junakiqueb nak terileb le ras eritz'in. Moco jun ta sa teril ut jun ta inc'a'. ² Mare te'cuulak cuibak li cuṅk bar ch'ut'ch'uquex cui' chixlok'oninquil li Dios. Mare li jun k'axal chaḃil xtikibanquil ut cuan xmatk'ab oro. Ut li jun chic mare neba' ut k'el li rak'. ³ Mare ca'aj cui' li chaḃil xtikibanquil teq'ue sa' xnak' eru ut teye re: Chunlan arin sa' li chaḃil na'ajej. A'ut li neba' teye re: Chunlan arin sa' ch'och' malaj ut canakat chi xakxo toj le'. ⁴ Cui jo'can nequebanu naraj naxye nak cuan nequera ut cuan inc'a'. Yoquex chixsic'bal ru li junjunk. Cui jo'can yoquex, inc'a' us le na'leb. ⁵ Ex inherman, raroqueb inban. Abihomak li tinye ere. Li Dios quisc'oc ruheb li neba' sa' ruchich'och'. Abanan li neba' biomeb chiru li Dios xban nak neque'xpab li Cristo ut te'xc'ul lix nimal xcuanquil li quixyechi'i li Dios reheb li neque'rahoc re. ⁶ Laex nequetz'ektanaheb li neba' ut nequeq'ue xlok'aleb li biom. ¿Ma inc'a' ta bi' nequeq'ue retal nak li biom, a'aneb li neque'rahobtesin ere? Ut ¿ma maçua'eb ta bi' li biom li nequec'amoc ere sa' rakleb aṭin? ⁷ ¿Ma maçua' ta bi' a'aneb li neque'majecuan re lix lok'laj c'aba' li Cristo, li nequec'aba'in laex? ⁸ Tz'ibanbil sa' li Santil Hu li chak'rab li k'axal nim xcuanquil. A'an naxye: Chara la cuas açuiz't'in jo' nak nacara açuib laät. Cui jo'can nequebanu tz'akal re ru yoquex chixbanunquil. ⁹ Cui laex nequesis' ru li ani nequera, maç yoquex chixbanunquil. Ut yoquex chixk'etbal li chak'rab. ¹⁰ Li ani naxpab chixjunil li chak'rab, abanan cui naxk'et junak reheb li chak'rab, riq'uin a'an xk'et chixjunil. ¹¹ Li Dios quixye: Matmuxuc caçar. Ut quixye ajcui': Maçamsi açuas açuiz't'in. Li ani inc'a' namuxuc caçar, abanan cui xcamsi li ras riṭz'in, riq'uin xbanunquil a'an, naxk'et li chak'rab. ¹² Jo'can ut chebanuhak li us ut chex-aṭinak sa' xyalal xban nak anakcuan cuanquex chic rubel lix chak'rab li Cristo li naq'uehoc colba-ib. ¹³ Li ani inc'a' naruxtana ru li ras riṭz'in inc'a' ajcui' tauxtanaçak ru xban li Dios sa' li rakba aṭin. Ut li ani taruxtana ru li ras riṭz'in, tauxtanaçak ajcui' ru xban li Dios.

Maç'a' na-oc cui' li kapqbal cui inc'a' nakabanu li us

¹⁴ Ex inherman, ¿c'a'ru aj e nak tixye junak nak a'an aj pabanel cui inc'a' yo chixbanunquil li us? Cui jo'can yo chixbanunquil, maç'a' na-oc cui' lix pabal. Moco naru ta taçolek' xban. ¹⁵ Mare cuan junak kech aj pabanelil maç'a' cuan re. Maç'a' rak' ut maç'a' xcua. ¹⁶ Ut laç nakaye re: Chacuil açuib. Tz'ap açuib chi us ut chatcua'ak chi us. Ut cui maç'a' nakaq'ue re,

maç'a' na-oc cui' li jo' q'ual nakaye re. ¹⁷ Jo'can ajcui' nakac'ul riq'uin li kapabäl. Cui nakaye nak nakapab li Cristo ut inc'a' nakabanu li us, camenak li kapabal. Maç'a' na-oc cui'. ¹⁸ Mare cuan junak tixye: Cuan li neque'xpab li Cristo ut cuan ajcui' li neque'xye nak tz'akal riq'uin xbanunquil li us. Abanan lain tinc'ut chaçuu nak ninpab li Cristo riq'uin li us ninbanu. Ut laät, çchanru nak taç'ut chicuu nak cuan apabäl cui inc'a' nacabanu li us? ¹⁹ Laät nacapab nak li Dios jun ajcui'. Us ajcui' nak nacapab. Aban jo'can ajcui' eb li maus aj musik'ej neque'xpab nak jun ajcui' li Dios cuan ut neque'sicsot xban xxiuheb. ²⁰ Maç'a' ana'leb. ÇJok'e tatau xyalal chi tz'akal? ÇMa inc'a' nacaq'ue retal nak cui inc'a' nacabanu li us, maç'a' na-oc cui' la pabal? ²¹ C'oxlan ca'ch'inak chirix laj Abraham li kaxe'tonil yucua' nak quixq'ue laj Isaac li lalal chok' xmayej sa' xben li artal. Ut riq'uin a'an li Dios quixye nak tic xch'ol laj Abraham. ²² ÇMa inc'a' nacaq'ue retal nak laj Abraham quixbanu li us ut riq'uin a'an quic'utun lix pabal? Ut riq'uin li quixbanu quitz'akloc ru lix pabal. ²³ Ut quic'ulman jo' naxye sa' li Santil Hu: Laj Abraham quixpab li Dios ut riq'uin a'an li Dios quixye nak tic xch'ol. Ut xban a'an nayeman nak laj Abraham raro xban li Dios. ²⁴ Laex nequeq'ue retal nak maçua' ca'aj cui' riq'uin xpabanquil li Dios nak tic li kach'ol chiru li Dios. Riq'uin aj ban cui' xbanunquil li us. ²⁵ Lix Rahab, a'an xcomoneb, li ixk li neque'xc'ayi rib nak quicuan. Abanan quixtenk' aheb laj q'uehol etal chixsic'bal jalan chic be re nak te'xcol ribeb. Riq'uin li usilal quixbanu lix Rahab, li Dios quixye nak tic xch'ol. ²⁶ Junak tz'ejcuallej maç'a' chic xmusik', maç'a' na-oc cui' xban nak camenak chic. Jo'can ajcui' li kapabäl. Cui inc'a' nakabanu li us, maç'a' na-oc cui'.

3

Tento takaq'ue retal li c'a'ru takaye

¹ Ex inherman, moco chixjunil ta te'xq'ue rib sa' li c'anjel naxbanu laj tzolonel xban nak nim li ik cuan sa' xben ut cau tarakek' atin sa' xbeneb cui inc'a' neque'xbanu li c'a'ru neque'xye. ² Chikajunilo lao nocopalto' chi coc' aj sa'. Cui cuan junak maç'a' xpaltil riq'uin li ratin, a'an tz'akal re ru. Li ani naru naxcuy rib riq'uin li naxye, naru ajcui' naxcuy rib riq'uin li c'a'ru naraj xbanunquil. ³ Lao nacaq'ue jun li ch'ich' sa' re li cacuay re nak taabink chiku ut riq'uin li ch'ich' a'an nakaberesi li cacuay. ⁴ Cheq'uehak retal li jucub. Usta k'axal nim ut nac'ame' xban li cacuil ik', aban cuan jun ch'ina ch'ich' naberessin re. Ut riq'uin li ch'ich' a'an laj che'ol re naru naxc'am li jucub bar naraj xc'ambal. ⁵ Jo'can ajcui' li ru'uj ak'. K'axal ca'ch'in aban nanumta naxye. Chanchan li xam. Riq'uin yal jun ratz'um li xam tanak sa' junak q'uiçhe' tixc'at chixjunil li q'uiçhe'. ⁶ Numtajanek xyibal ru naxye li ru'uj ak'. Chanchan lix mausilal li ruchich'och'. Li ru'uj kak', a'an jun xcha'al li katz'ejcual k'axal ca'ch'in; aban riq'uin li mausilal naxye, naxpo' kana'leb. Lix mausilal nachal chak sa' xbalba ut naxpo' kana'leb sa' kayo'lajik toj chalen sa' li kacamic. ⁷ Naru xtulanobresinuil chixjunil li xul, jo' li neque'bec, li neque'rupupic, li neque'xjucuqui rib ut li neque'cuan sa' ha'. Li cujnk ac xtulanobresi q'uila pay chi xul. ⁸ Aban li ru'uj ak' ma ani naru natulanobresin re. Li ru'uj ak', a'an jun li inc'a' us. Ma ani naru nak'usuc re. Li naxye li ru'uj ak' chanchan xmay li c'anti' li nacamsin. ⁹ Riq'uin li ru'uj kak' nakalok'oni li Acuabej Dios ut riq'uin ajcui' li ru'uj kak' nakamajecua li kas kitz'in ut eb a'an yo'obtesinbileb xban li Dios jo' li rilabal. ¹⁰ Riq'uin lix tz'umal ke nakalok'oni li Dios ut riq'uin ajcui' lix tz'umal ke nocomajecuan. Ex inherman, inc'a' us cui takabanu chi jo'can. ¹¹ Cheq'uehak retal. Sa' junak yu'am ha' inc'a' naru na-el chak ca' pay chi ha'. Cui na-el li çabil ha' inc'a'

naru na-el chak li atz'am xsa', chi moco naru na-el chak li chabil ha' sa' li atz'am xsa'. ¹² Ex inherman, lix che'el li higo, ¿ma naru naruchin li aceituna? Ut lix che'el li uva, ¿ma naru naruchin li higo? Inc'a'. Jo'can ajcui' sa' li yu'am ha' atz'am xsa', inc'a' naru na-el li chabil ha'.

Li chabil na'leb nachal chak riq'uin li Dios

¹³ Li ani cuanqueb xna'leb sa' eyank ut neque'xnau xyalal chi us, che'xc'utak sa' tulanal lix chabilaleb a' yal chanru lix na'lebeb. ¹⁴ Cui toi cuan li c'ahjinc ut li cakalinc eriq'uin, menimobresi erib chixyebal nak cuan ena'leb. Riq'uin xbanunquíl a'an yoquex chi tic'ti'ic ut xmukbal li xyalal. ¹⁵ A'an macua' li na'leb naxq'ue li Dios. Xna'leb ban li ruchich'och'. A'an yal xc'a'uxeb cujnk ut q'uebil xban laj tza. ¹⁶ Bar nacuan cui' li cakalinc ut li k'etk'etil, aran ajcui' nacuan po'oc ch'olej ut yalak c'a'ru chi mausilalil. ¹⁷ Li ani q'uebileb xna'leb xban li Dios, tz'akal re ru lix yu'ameb. Cuanqueb sa' usilal, chabileb ut tulaneb. Neque'uxtanan u, neque'xbanu li us, ut inc'a' neque'balak'in. Junelic yal neque'atinac. ¹⁸ Li q'uebileb xna'leb xban li Dios cuanqueb sa' usilal ut neque'xtenk'a ajcui' li ras ritz'in chi cuanc sa' usilal.

4

Inc'a' takajunaji kib riq'uin lix mausilal li ruchich'och'

¹ ¿C'a'ut nak toi cuan pletic ut cuech'inc ib sa' eyank? ¿Ma inc'a' ta bi' riq'uin xrahinquíl ru li inc'a' us nequetiquib pletic? ² Laex nequerahi ru li c'a'ak re ru ut xban nak inc'a' nequetau li c'a'ru nequerahi ru, nequecamsi eras eritz'in re nak tetau. Nacako' ech'ol xban nak inc'a' nequetau li c'a'ru nequeraj ut xban a'an junes pletic nequebanu. Ut xban nak inc'a' nequetz'ama re li Dios li c'a'ru nequeraj, jo'can nak inc'a' naxq'ue ere. ³ Ut nak nequextz'aman chiru li Dios, inc'a' nequec'ul xban nak inc'a' nequetz'ama jo' naraj li Dios. Inc'a' nequec'ul xban nak nequetz'ama yal re xsachbal sa' li jo' majo'il na'leb. ⁴ Laex chanchanex li neque'xmux ru lix sumlajic xban nak laex nequera ru li mac. Macua' li Dios nequec'oxla. Cui laex nequera ru li cuanc sa' lix mausilal li ruchich'och' xic' yoquex chirilbal li Dios. ⁵ Cuan xyalal nak tz'ibanbil chi jo'ca'in sa' li Santil Hu: Li Santil Musik'ej li quixq'ue li Dios chi cuanc kiq'uin, a'an k'axal nocoxra ut a'an naraj nak ca'aj cui' li Dios takalok'oni. ⁶ Li Dios k'axal numtajenak cui'chic li rusilal naxq'ue ke. Li Santil Hu naxye nak li Dios inc'a' nacuulac chiru li neque'xnimobresi rib. Abanan li Dios naxq'ue li rusilal reheb li tulaneb. (Pr. 3:34) ⁷ Jo'can nak chek'axtesihak erib re li Dios. Chexnumtak sa' xben laj tza ut a'an tajelelik cheru. ⁸ Cauhak ech'ol riq'uin li Dios ut li Dios tatenk'ank ere. Laex aj mac, jalomak ec'a'ux. Mebanu chic li mausilal. Jo'can ajcui' laex li yal cuib ech'ol sa' le pabal, yot'omak ech'ol ut jalomak ec'a'ux re nak li Dios tixticobresi le ch'ol. ⁹ Chirahok' ech'ol, chiyot'ek' ech'ol ut chexyabak xban li mausilal li nequebanu. Macua' raj se'ec nequebanu; yabac raj nequebanu xban nak inc'a' us le yehom ebanuhom. Ut inc'a' raj nasaho' sa' ech'ol. Naraho' raj ban sa' ech'ol. ¹⁰ Checubsihak erib chiru li Dios ut a'an tixq'ue e'cuanquíl.

Inc'a' takacuech'i rix li kech aj pabanelil

¹¹ Ex inherman, mecuech'i rix le rech aj pabanelil xban nak ani naxcuech'i rix li rech aj pabanelil naxcuech'i ajcui' rix lix chak'rab li Dios ut naxq'ue rib chok' aj rakol atin. Li kac'anjel macua' re xcuech'bal rix li chak'rab; re ban xpabanquíl. ¹² Jun ajcui' li quiq'uehoc re li chak'rab ut ca'aj cui' a'an naru narakoc atin. A'an li nacoloc ut a'an ajcui' li nasachoc. Jo'can nak laqat inc'a' naru nacatrakoc atin sa' xben la cuas acujtz'in.

Inc'a' nakanau c'a'ru takac'ul cuulaj ca'bej

¹³ Anakcuan abihomak li tinye ere laex li nequexyehoc re chi jo'ca'in: Hon malaj cuulaj toxic sa' jalan chic tenamit ut aran tocuank chak jun chihabak. Aran toyacok ut tacuank katumin chi us. ¹⁴ Aban laex inc'a' nequenau c'a'ru teç'ul cuulaj ca'bej xban nak li kayu'am chanchan li chok. Junpat ajcui' nacuan ut junpat chic ac maç'a' chic. ¹⁵ Jo'ca'in raj teye: Cui li Dios naraj, tixq'ue kayu'am ut takabanu li bar cuan nakac'oxla xbanunquil. ¹⁶ A'ut laex nequenimobresi erib chixyebal li c'a'ru nequec'oxla xbanunquil. Inc'a' us nequebanu nak nequenimobresi erib. ¹⁷ Li naxnau xbanunquil li us, ut inc'a' naxbanu, a'an maç naxbanu.

5

Xch'olobanquil xna'lebeb li biom

¹ A'ut anakcuan, ex biom, cherabihak li oc cue chixyebal. Chiyot'ek' ech'ol ut chexyabak xban li raylal chalc re sa' eben. ² Le biomal taosok'. Maç'a' chic taoc cui'. Jo'can ajcui' le çabil ak' taç'uxek' xban li xulel. ³ Ut tam'o'nk le tumin. Maç'a' chic taoc cui'. A'an retalil nak laex tex-osok' ajcui' jo' nak naso' li xam. Laex yoquex chixtambresinuil le biomal ut inc'a' nequeq'ue retal nak c'ulunc re roso'jic li cutan. ⁴ Laex yoquex chixxochal etumin ut inc'a' nequeq'ue xtojbaleb li que'k'oloc eriq'uin. Eb a'an yoqueb chi k'okonc ut li nimajcual Dios yo chirilbal xtok'obal ruheb nak yoqueb chi k'okonc li que'anjelac eriq'uin. ⁵ Arin sa' ruchich'och' cuan nabal le biomal ut maç'a' napalto' ere. Junelic sa nequenumsi li cutan. Chanchanex li cuacax ch'olaninbil chi us re taçamsik xban nak le yu'am laex, taosok'. Taçculak xk'ehil nak tarakek' atin sa' eben. ⁶ Laex quexrakoc atin sa' xbeneb li tiq'ueb xch'ol ut quecamsiheb. Ut eb a'an maç'a' que'xbanu ere.

Xcuybal xnumsinuil li raylal

⁷ Jo'can ut ex herman, checuyak roybeninuil li xca'ca' Jesucristo. Jo' laj c'alom naxcuy roybeninuil jok'e nat'ane' li hab re nak taq'uk ut naxcuy ajcui' roybeninuil nak nacuulac xk'ehil li k'oloc re nak tixk'ol ru li racuimk. ⁸ Jo'can ajcui' laex checuyak oybeninc ut meç'inan ech'ol. Cacubresihomak ban ech'ol xban nak li xca'ca' chi seb taçalk cui'chic. ⁹ Ex herman, meçuech'i erib çeribil erib re nak inc'a' tarakek' atin sa' eben. Li Jesucristo a'an laj rakol atin ut chi seb taç'ulunc cui'chic. ¹⁰ Ex herman, chetzolac erib riq'ueineb li profeta li que'cuyac chak xc'ulbal li raylal xban xyebal resil li xca'ca'. ¹¹ Lao nakaye nak us xak reheb li neque'cuyac raylal. Xerabi resil chanru nak laj Job quixcuy xnumsinuil li raylal. Ut nequenau nak mokon li Dios quirosobtesí. Li xca'ca' Dios na-uxtanen ut natok'oban u. ¹² Ex inherman, cuan chic jun li na'leb tento tenau ut a'an a'in: nak text'atinak, mepatz' xc'aba' li Dios sa' pac'ba atin, chi moco sa' xc'aba' li choxa, chi moco sa' xc'aba' li ruchich'och', chi moco chepatz' sa' xc'aba' li c'a'ak re ru cuan. Cui teye nak yal, junes yal teye, ut nak teye inc'a', junes inc'a' teye re nak inc'a' tarakek' atin sa' eben xban li Dios.

Takapab nak takac'ul li nakatz'ama re li Dios

¹³ Cui cuan junak sa' eyank cuan sa' raylal, chitijok chiru li Dios. Ut cui cuan junak sa' xch'ol, chixbicha xlok'al li Dios. ¹⁴ Cui cuan junak yaj sa' eyank, tixtakla xbokbaleb li chequeb sa' lix pabal, re nak te'tijok riq'uin ut te'xq'ue ca'ch'inak li acete sa' xben sa' xc'aba' li xca'ca' Jesucristo. ¹⁵ Cui te'xpab nak li Dios tixq'uirtesí li yaj nak te'tijok, li xca'ca' taq'uirtesinik re ut tixcuaclesi cui'chic. Ut cui cuan xmaç, taçuyek' taçachek' ajcui' li xmaç. ¹⁶ Chech'olobak

bi' lē maç cheribil erib ut chextijoc cheribil erib re nak texq'uirtesik. Li ani tic xch'ol natijoc chi anchal xch'ol ut lix tij na-abic xban li Dios. ¹⁷ Li profeta Elías, a'an yal cuink jo' lao. Quitijoc chi anchal xch'ol ut quixtz'ama chiru li Dios nak inc'a' tixq'ue li hab. Ut inc'a' quixq'ue li hab sa' ruchich'och' chiru li oxib chihab riq'uin cuakib po. ¹⁸ Ut nak quitijoc cui'chic, quixtz'ama nak tixq'ue li hab. Ut quixq'ue li hab ut li acumk qui-el cui'chic sa' ruchich'och'. ¹⁹ Ex inherman, mare cuan junak sa' eyank tixcanab xpabanquil lix yalal, ut mare junak chic aj pabanel tasuk'isink cui'chic re sa' lix pabal. ²⁰ Chenauhak laex nak li ani tixsuk'isi chak junak li ras ritz'in sa' xyalal re nak tixcanab xbanunquil li maç, a'an tixcol li ras ritz'in chiru li camc. Ut sa' xc'aba' li jun a'an, nabal li maç tacuyek' tasachek' xban li Dios.

Li Xben Hu li Quixtz'iba li San Pedro

Xq'uebal xsahil xch'qleb

¹ Lain laj Pedro. Lain x-apóstol li Kaçua' Jesucristo. Yoquin chi tz'ibac eriq'uin laex, li xejeq'ui erib sa' li junjünk chi na'ajej. Ya' numec' yoquex xban nak maçua' etenamit li cuanquex cui', laex li cuanquex sa' xcuent Ponto, ut sa' xcuent Galacia ut Capadocia, jo' ajcui' li cuanquex sa' xcuent Asia ut Bitinia. ² Ac najter k'e cutan qui-ala chak sa' xch'ol li Dios Acuabej nak laexak li sic'bil eru xban. Santobresinbilakex chic xban li Santil Musik'ej re nak tex-abjnk ut texpabank chiru li Jesucristo. Cuybilak chic le maç xban xquiq'uel li Jesucristo. Ut chi cuank taxak chi nabal li rusilal li Dios eriq'uin ut li tuktuquuil sa' eyank.

Nakayo'oni jun ac'yu'am maç'a' roso'jic

³ Lok'oninbil taxak li Dios Acuabej, lix Yucua' li Kaçua' Jesucristo. Sa' xc'aba' lix nimal ruxtan, coyo'la cui'chic xca' cua. Xban nak li Jesucristo quicuacli cui'chic chi yo'yo sa' xyankeb li camenak, nakayo'oni li ac' yu'am li maç'a' roso'jic. ⁴ Yoco chixyo'oninguil li kamatan li tixq'ue ke li Dios. Li maçtan a'in inc'a' nalaj inc'a' na-oso'. C'ulanbil sa' choxa. Aran maç'a' tamuxuk ru ut ma jaruj taosok'. ⁵ Xban nak nocopaban, li Dios li k'axal nim xcuanguil nocoril chi junelic re nak tocolek'. Li colba-ib a'in taç'utbesik chi tz'akal re ru sa' roso'jic li cutan. ⁶ Usta tec'ul nabal pay ru li raylal re xyalbal rix le pabal sa' ruchich'och' a'in, chisahok' sa' le ch'ol xban nak ac colbilex chic. ⁷ Tento nak tayalek' rix le pabal re nak taç'utünk ma tz'akal re ru. Li pabal k'axal cui'chic lok' chiru li oro li na-oso'. Li oro nanumsic sa' xam re rilbal ma chabil. Jo'can ajcui' nak tento xyalbal rix le pabal ma tz'akal re ru. Cui tz'akal re ru le pabal, tex-oxlok'ik ut tanimak eru ut taq'uehek' elok'al nak tixc'utbesi cui'chic rib li Jesucristo. ⁸ Nequera li Cristo usta inc'a' nequeril ru. Nequepab li Cristo, usta inc'a' erilom ru. K'axal cui'chic numtajanek xsahil sa' ech'ol chixpabanquil. Ut inc'a' nequetau junak atin re xch'olobanquil lix sahil ech'ol xban nak k'axal lok'. ⁹ Ut lix k'ajcamunquil le pabal, a'an le colbal. ¹⁰ Eb li profeta junxilaj que'xch'olob chak xyalal li usilal a'in q'uebil ere. Que'xtz'il rix ut que'patz'oc chirix li colba-ib a'in. ¹¹ Eb li profeta que'xye resil li raylal tixc'ul li Cristo ut lix nimal xlok'al li taç'utbesik mokon. Que'xq'ue xch'ol chixsiq'uinguil ani tz'akal li Cristo. Que'xsic' xyalal jok'e ut c'a'ru chi cutanil taç'ulmank li yo chi c'utbesic chiruheb xban li Santil Musik'ej. ¹² Li c'a'ru quixc'utbesi chak li Dios chiruheb li profeta junxil inc'a' taç'ulmank nak toj cuanqueb a'an. Taç'ulmank ban sa' li cutan nak cuanquex laex. Eb li profeta que'xch'olob cheru li xyalal a'in, li quic'ute' chak chiruheb xban li Santil Musik'ej li taklanbil chak xban li Dios. Ut eb li ángel que'raj ajcui' raj xtaubal ru chixjunil li c'a'ak re ru a'in.

Tento nak tocuqnk sa' tiquilal

¹³ Xban nak yoquex chiroybeninuil le k'ajcamunquil, chi ajk ru le c'a'ux. Chi cuank chi tuktu le ch'ol. Ut chi anchal ech'ol cheroybeni li usilal li tixq'ue ere li Jesucristo nak tixc'utbesi cui'chic rib. ¹⁴ Chex-abjnk chiru li Dios xban nak laex ralar x'ajol. Mebanu chic li nequerahi ru junxil nak toj maji' nequenau li xyalal. ¹⁵ Aban ticak taxak le ch'ol ut chabilak taxak le yehom ebanuhom xban nak tic xch'ol li Dios li quisic'oc eru chok' ralar x'ajol. ¹⁶ Jo' tz'ibanbil retalil sa' li Santil Hu: Santakex laex xban nak santin

lain, chan li Dios. (Lv. 11:44-45) ¹⁷ Laex nequeye “at inYucua” re li Dios nak nequextijoc. Ut li Dios natz'iloc atin chirix li junjunk a' yal chanru lix yehom xbanuhom. A'an inc'a' naxsiq'ueb ru. Jun xiquic ban naxbanu. Jo'can nak chexucuaq ru li Dios junelic, a' yal jo' najtil texcuank sa' li ruchich'och' a'in. ¹⁸ Laex nequenau nak xban li Dios colbilex chic chiru li jo' majo'il na'leb li quilaje'xc'ut chak cheru le xe'tonil yucua'. Moco colbilex ta riq'uin c'a'ak re ru na-oso' jo' li oro ut li plata. ¹⁹ Colbilex ban riq'uin xlok'laj quiq'uel li Cristo. Li Cristo, a'an li quixmayeja rib chiru li Dios Acuabej jo' jun li carner namayejac chi mac'a' rec' ut chi mac'a' xpaltil. ²⁰ Relic chi yal nak toj maji' nayo'obtesic chak li ruchich'och' ac ch'olch'o chiru li Dios nak li Cristo sic'bil ru ut xakabanbil re tacamk. Ut anakcuan xcuulac xk'ehil nak li Cristo xc'utbesi rib xban erabal laex. ²¹ Sa' xc'aba' li Cristo yoquex chixpabanquil li Dios, li quicuaclesin cui'chic re li Cristo chi yo'yo sa' xyankeb li camenak ut quixq'ue xlok'al. Jo'can nak xepab ut ca'aj cui' riq'uin li Dios nequexyo'onin. ²² Sa' xc'aba' li Santil Musik'ej ch'ajobresinbil le ram riq'uin nak nequepab li tz'akal yal. Ri'q'uin a'in naru teraheb li herman ut inc'a' tera erib chi yal xcab rix ech'ol. Tera ban erib chi tz'akal. ²³ Laex yo'lajenakex chic xca' cua chi ac' chic le yu'am. Li yu'am a'in macua' xq'uehom le na' eyucua'. Li yu'am a'an na-oso'. Abanan li ac' yu'am natauman riq'uin xpabanquil ratin li Dios. Yo'yo ut cuan chi junelic. ²⁴ Sa' li Santil Hu tz'ibanbil retalil chi jo'ca'in: Lix yu'am li cristian sa' ruchich'och', a'an chanchan li pim. Nachakic ut na-oso'. Ut lix lok'al chanchan ratz'um li pim.

Nachakic nat'ane' ut na-oso'. (Is. 40:6-8)

²⁵ Aban li ratin li Dios, a'an cuan chi junelic.

Ut li atin a'in, a'an resil li colba-ib li yebil chak ere.

2

¹ Xban nak ac' chic le yu'am, cherisihak sa' le ch'ol chixjunil li mausilal. Mexbalak'ic chic. Tecanab li ca'pac'al u. Mexcakalin chic ut tecanab ajcui' li yo'obanc atin. ² Li c'ula'al nak toj nayo'la naraj ru tu'uc. Us raj nak jo'cano taxak lao riq'uin ratin li Dios. Takaj taxak ru xtzolbal ratin li Dios xban nak a'an li tz'akal yal. Tocacuuk taxak sa' li kapabal ut tz'akalako taxak chiru li Dios re nak tocolek'. ³ Cui yoquex chixbanunquil a'in, ac nequenau nak li Ka'cua' chabil.

Li Cristo, a'an xxe' li kapabal

⁴ Chalkex riq'uin li Cristo, li yo'yo chi junelic. Eb li cristian que'xtz'ektana li Jesucristo li k'axal lok' li sic'bil ru xban li Dios chixq'uebal kayu'am. Li Jesucristo xakabanbil xban li Dios chi c'anjelac jo' jun nimla pec k'axal chabil li na-oc chok' xxe' li cab. ⁵ Ut laex chanchanex li coc' pec li na-oc sa' li tz'ac. Xban li rusilal li Jesucristo, naru text'anjelac chiru li Dios jo' eb laj tij li neque'mayejac chiru li Dios. Li mayej li k'axal lok', a'an nak tek'axtesi erib sa' ruk' li Dios. Ut le mayej nac'ule' xban li Dios sa' xc'aba' li Jesucristo.

⁶ Tz'ibanbil retalil sa' li Santil Hu li quixye li Dios chirix li Cristo nak quixye chi jo'ca'in:

Lain xinsic' ru li Colonel jo' nak laj tz'ac naxsic' ru li chabil pec chok' xxe' li cab. Xinsic' ru chok' xxe' le pabal. Li ani tapabank re inc'a' tach'inank xch'ol. (Is. 28:16)

⁷ K'axal lok' li Cristo chok' ere laex li ac xexpaban. Abanan chok' reheb li maji' neque'paban, mac'a' na-oc cui'. Tz'ibanbil retalil sa' li Santil Hu chi jo'ca'in:

Li pec li quitz'ektanac xbaneb laj cablanel, a'an li pec li k'axal chabil li quiq'uehe' chok' xxuc li cab. (Sal. 118:22)

⁸ Ut tz'jbanbil ajcui' sa' li Santil Hu chi jo'ca'in:

A'an ut li pec li que'xtich cui' li rokeb. A'an li pec li nat'anoc. (Is. 8:14-15)

Li cristian li neque'xtich rokeb chiru, a'aneb laj k'etol ratin li Dios. Ac ch'olch'o nak te'xc'ul lix tojbal lix maç xban nak neque'xtz'ektaña li Cristo.

Laex ralar xc'ajol li Dios

⁹ Laex sic'bil eru xban li Dios. Sic'bil eru chi c'anjelac chiru li Dios jo' nak neque'c'anjelac laj tij. Laex lix tenamit li Dios ut santobresinbilex. Laex chic ralar xc'ajol li Dios. Sic'bil eru chixyebal resil lix nimal xcuanquilal li Dios. Li Dios quexrisa sa' xk'ojoyinal ru li maç ut anakcuan cuanquex chic sa' xcutan xsaken. ¹⁰ Junxil maçua'ex ralar xc'ajol li Dios. Aban anakcuan laex chic ralar xc'ajol. Junxil inc'a' nequenau lix nimal ruxtañ li Dios. Aban anakcuan nequenau chic.

Bokbilex chi c'anjelac chiru li Dios

¹¹ Ex inherman, raroquex inban. Laex yal numelex arin sa' ruchich'och'. Lain nintz'ama cheru nak mebanu chic li mausilal li quebanu chak junxil xban nak a'an ca'aj cui' xpo'bal ru le c'a'ux naxbanu. ¹² Chabilak taxak le na'leb chiruheb li maji' neque'paban. Usta yokeb chixyebal nak inc'a' us le na'leb, aban cui tebanu li us, te'xq'ue retal ut te'xnima xlok'al li Dios nak tacuulak xk'ehil li rakba atin. ¹³ Sa' xc'aba' li Cristo chepapak chixjunileb li chak'rab q'uebil xbaneb li cuink li neque'taklan sa' ebeñ. Chexpabank chiru li acuabej xban nak a'an cuan sa' xcuanquil. ¹⁴ Ut chexpabank ajcui' chiruheb li taklanbileb xban li acuabej chi rakoc atin sa' xbeneb li neque'xsic' xmaç ut re ajcui' nak te'xq'ue xlok'al li chabileb xna'leb. ¹⁵ Li Dios naraj nak texcuank sa' xyalal. Nak te'ril le tiquilal, li inc'a' useb xna'leb ut li inc'a' neque'xnau xyalal, inc'a' chic te'atinak cherix. ¹⁶ Libre chic cuankek. Abanan moco xban ta nak libre chic cuankek nak tex-oc chixbanunquil li mausilal. Cheq'uehak ban ech'ol chi c'anjelac chiru li Dios. ¹⁷ Laex aj pabanel, chera erib cheribil erib. Chexucuak ru li Kaçua' Dios. Che-oxlok'i le ras eritz'in. Ut cheq'uehak xlok'al li acuabej.

Checuy li raylal jo' nak quixcuy li Cristo

¹⁸ Ex aj c'anjel chex-abink chiruheb le patrón ut che-oxlok'iheb. Moco ca'aj cui' ta chiruheb li tulaneb. Chex-abink ban ajcui' chiruheb li josk' aj patrón. ¹⁹ Cui nequec'ul junak raylal chi maç'a' emaç, osobtesinbilakex cui nequecuy xban nak yoquex chixpabanquil li Dios. ²⁰ Cui nequexsaq'ue' xban nak xesic' emaç, ut nequecuy xnumsinquil, maç'a' xlok'al a'an. Abanan cui nequec'ul li raylal riq'uin xbanunquil li us ut nequecuy, a'an lok' chiru li Dios. ²¹ Li Dios naraj nak tebanu jo' quixbanu li Cristo. Li Cristo quixc'ul li raylal sa' ec'aba' laex. A'an quic'amoc be cheru re nak laex tecuy ajcui' xnumsinquil li raylal. ²² Li Cristo maç'a' xmaç. Ut ma jun sut quibalak'in. ²³ Nak quihobe' li Cristo, inc'a' quixsume ru. Ut nak yo chixc'ulbal li raylal, maç'a' quixye. Inc'a' quixmajecuabe. Quixk'axtesi ban rib sa' ruk' li Dios, li narakoc atin sa' tiquilal. ²⁴ Relic chi yañ nak li Cristo, a'an li quixc'ul li raylal nak quicam chiru li cruz re xtojbal rix li kamaç lao. A'an aj e nak quicam re nak inc'a' chic texmaçobk. Texcuank ban sa' tiquilal. Li Cristo quixc'ul li yoq'uec' sa' kac'aba' lao aj maç. Ut riq'uin li raylal li quixc'ul xexq'uirtesjic. ²⁵ Laex sachoqueq'ue sa' le maç nak quexcuan chak. Chanchanex li carner sachenak li nacha'cha'i rib yalak bar chi maç'a' aj ilol re. Abanan anakcuan xexchal cui'chic riq'uin li Cristo ut a'an chic tjalok ere.

3

Xq'uebal xna'leb li ixakilbej jo' ajcui' li belomej

¹ Laex ixakilbej chex-abjnk chiru le belom. Cui cuanqueb li belomej li inc'a' neque'xpab li ratin li Dios, a'an te'xq'ue retal le chabilal ut te'xpab ajcui' li Dios eb a'an. K'axal us xc'utbal li chabilal chiru xch'olobanquil xyalal riq'uin atin. ² Mare te'pabank le belom nak te'xq'ue retal nak neque-oxlok'iheb ut chabil ena'leb. ³ Mixic ech'ol riq'uin xtikibanquil erib. Mestic' le ch'ina'usal yal riq'uin xchabilal le rak'. Li tz'akal ch'ina'usal macua' riq'uin xyibanquil le rismal chi k'axal ch'ina'us chi moco riq'uin rocsinuil li oro. ⁴ Li tz'akal xch'ina'usal li junjunk, a'an lix tiquilal xch'ol ut lix tulani. A'an inc'a' n-oso. Li tiquil ch'olej ut li tulani, a'aneb li k'axal lok' chiru li Dios. ⁵ Jo'can ajcui' que'xbanu chak li chabil ixk li que'xpab li Dios najter. Que'xsic' lix ch'ina'usal riq'uin li tuktuquilal ut li tulani. Ut eb li ixk a'an que'abin ajcui' chiruheb lix belom ut que'x-oxlok'iheb. ⁶ Ut jo'can ajcui' quixbanu lix Sara. Qui-abin chiru laj Abraham lix belom. Ut quixye "Kacua' Abraham" re xban nak quix-oxlok'i. Jo'can ajcui' laex. Cui tebanu li usilal ut inc'a' texxucuaq, laex ajcui' jo' li ralar xc'ajol lix Sara. ⁷ Ut laex belomej, chexcuank sa' xyalal riq'uibeb le rixakil. Che-oxlok'iheb. Laex nequenau nak eb li ixk k'unek xch'ol ut mac'a'eb xmetz'euheb jo'eb li cuink. Laex tec'ul le matan xban rusilal li Dios. Jo'can ajcui' eb li ixk, te'xc'ul ajcui' lix mataneb. Ut li matan li tec'ul, a'an li yu'am chi junelic. Cui tebanu a'in, mac'a' tach'a'ajquink ere nak textjok.

Banuhomak li chabilal usta nequec'ul li raylal

⁸ Ut tnye ajcui' ere, chexcuank chejunilex chi junajak le ch'ol ut chi junajak le c'a'ux. Cherahak erib cheribil erib. Chetok'oba eru cheribil erib ut k'unak le ch'ol. ⁹ Nak te'xbanu mausilal ere, inc'a' tesume ru riq'uin mausilal. Nak texhobek', mesume ru riq'uin hoboc. Chebanuhak ban usilal reheb li neque'banun mausilal ere. Laex bokbilex chak xban li Dios re nak terechani le rosobtesinuil. ¹⁰ Jo'ca'in naxye sa' li Santil Hu: Li ani taraj cuanc chi sa' sa' xch'ol re tixnumsiheb li cutan sa' xyalal, inc'a' taatinak riq'uin yibru atin chi moco tatic'ti'ik.

¹¹ Jo'can nak checanabak xbanunquil li inc'a' us. Chebanuhak ban li us, jo' naraj li Dios. Ut cheq'uehak ech'ol chi cuanc sa' tuktuquil usilal ut inc'a' chic texpetik.

¹² Li Kacua' Dios narileb li tiqueb xch'ol. Ut junelic narabiheb nak neque'tijoc. Abanan yo' xjosk'il li Kacua' sa' xbeneb li neque'banun re li mausilal. (Sal. 34:12-16)

¹³ Ma'cuan ta bi' junak tarahobtesink ere cui nequeyal ek'e chixbanunquil li us? ¹⁴ Abanan cui cuan junak tarahobtesink ere xban nak yoquex chixbanunquil li usilal, osobtesinbilex xban li Dios. Mexucuaheb ru li te'rahobtesink ere ut mi-oc ec'a'ux xbaneb. ¹⁵ Cheq'uehak ban xlok'al li Kacua' Jesucristo chi anchal ech'ol ut chek'axtesihak erib sa' ruk'. Chenauhak xsumenquil li te'raj patz'oc ere chirix le pabal. Ac cuank sa' le ch'ol c'a'ru tesumeheb cui'. Ut chesumehakeb sa' xyalal ut sa' tulani. ¹⁶ Chexcuank sa' xyalal ut mebanu chic li mausilal re nak mac'a' tach'i'ch'i'ink ere sa' le c'a'ux. Usta chabil nequebanu xban nak nequepab li Cristo, abanan cuan li neque'atinac cherix. Eb a'an xutanal te'elk xban nak neque'k'aban. ¹⁷ Cui li Dios naraj nak tec'ul li raylal chi mac'a' emac, k'axal us nak tec'ul li raylal chi mac'a' emac chiru nak tec'ul li raylal riq'uin xbanunquil li mausilal. ¹⁸ Li Cristo quixc'ul ajcui' li raylal chi mac'a' xmac. A'an tic xch'ol abanan quicamsic re xtojbal rix lix maqueb li inc'a' useb

xna'leb. Jun sut ajcui' quicam ut riq'uin a'an quitz'akloc ru. Ut xban xcamic li Jesucristo, naru toxcol li Dios. Yal nak que'xcamsi li Cristo. Abanan inc'a' quicam lix musik'. ¹⁹ Co ban chi atinac riq'uibeb li musik'ej li cuanqueb chi tz'aptz'o. ²⁰ A'an eb li inc'a' que'paban chak chiru li Dios junxil. Li Dios riq'uin xniml xcuym, quiroybeni nak te'pabank. Abanan inc'a' que'paban. A'an quic'ulmam sa' eb li cutan nak laj Noé yo chixyibanquil li nimla jucub cab. Inc'a' q'ui li que'paban ut que'oc chi sa' li jucub cab. Cuakxakibeb ajcui' que'cole' chiru li but'i ha'. Chixjunileb li jun ch'ol chic quilaje'cam. ²¹ Li but'i ha', a'an retalil li cubi ha' colbilex cui' anakcuan. Li cubi ha', a'an macua' re risinquil lix tz'ajnil li katibel. Cuan ban xyalal. A'an retalil nak cuybil sachbil chic li kamac. Ut nakatz'ama chiru li Dios nak chabilak li kac'a'ux. Colbilo xban nak quicuacli cui'chic chi yo'yo li Jesucristo. ²² Li Jesucristo, a'an quitake' sa'choxa ut anakcuan cuan sa' xnim uk' li Dios Acuabej xban nak k'axal nim lix cuanquil. Li Cristo cuan xcuanquil sa' xbeneb li ángel. Ut cuan ajcui' xcuanquil sa' xbeneb chixjunileb li musik'ej li cuanqueb xcuanquil.

4

Jo'cakex li chqbil mertom riq'uin rusilal li Dios

¹ Li Cristo quixc'ul li raylal ut quirec'a tz'akal li raylal sa' kac'aba' lao. Jo'can nak chikaq'ue ajcui' kach'ol lao chixcuybal li raylal. Julticak ere nak mac'a' chic xcuanquil li mac sa' xbeneb li neque'xcuy li raylal chi mac'a' xmaqueb. ² Ut jarub cutan chic toj yo'yokex chebanuhak li c'a'ru naraj li Dios, ut inc'a' chic yokex chixbanunquil li c'a'ru querahi chak ru junxil. ³ Tz'akal taxak li mac li xebanu chak. Xebanu jo' neque'xebanu li inc'a' neque'paban chiru li Dios. Junxil nasemsot le ch'ol riq'uin li jo' majo'il na'leb. Xebanu chak li calac ut li nink'eic. Xebanu chak li num cua'ac num uc'ac. Ut xebanu ajcui' li tz'ekbetalil aj na'leb. Xutanal xebanu chak junxil nak xenima chak ruheb li yibanbil Dios. ⁴ A'ut anakcuan eb li maji' neque'paban neque'sach xch'oleb cherilbal. Neque'xq'ue retal nak macua'ex chic jun sa' xyankeb chixbanunquil li mausilal. Ut xban a'an nequexhobe'. ⁵ Aban mokon eb laj hobonel tento nak te'xk'axtesi xcuent chiru li Dios riq'uin li c'a'ru quilaje'xebanu chak. Li Dios, a'an li tarakok atin sa' xbeneb li yo'yoqueb jo' eb ajcui' li camenakeb. ⁶ A'an rajbal nak quich'olobac xyalal chiruheb li tenamit. Quirakman atin chirixeb ut eb a'an que'cam jo' nak telaje'camk chixjunileb li cristian. Chixjunileb li que'paban chiru li Dios usta quilaje'cam, lix musik'eb yo'yoqueb jo' nak yo'yo li Dios. ⁷ Li roso'jic li ruchich'och' tasebank chak. Jo'can nak aj-ajak eru, ut cheq'uehak ech'ol chi tijoc. ⁸ Li c'a'ru tento tebanu, a'an xrabal erib cheribil erib ut chi anchal ech'ol. Ut xban nak nequera erib cheribil erib, nequecuy ajcui' emac cheribil erib. ⁹ Chexq'uehok ochochnal cheribil erib chi sa sa' ech'ol. ¹⁰ Chikajunilo jalan jalank li c'a'ru taruk takabanu. Ac kamatan kamatan q'uebil ke chikajunkal xban li Dios. Tento nak takatenk'a li kas kitz'in riq'uin li c'a'ru nocoru chixbanunquil re nak inc'a' tapanak chi mac'a' rajbal li matan q'uebil ke xban li Dios. ¹¹ Cui ani cuan xmatan chi atinac, chixyehak ratin li Dios. Cui ani naraj c'anjelac, chi c'anjelac a' yal chanru lix cacuilal q'uebil re xban li Dios. Riq'uin chixjunil li c'a'ak re ru taxmank, nimanbilak taxak xc'aba' li Dios sa' xc'aba' li Jesucristo. A'an laj echal re li nimajcual cuanquilal ut lok'oninbilak taxak chi junelic k'e cutan. Jo'can taxak.

Tento xcuylal li raylal

¹² Ex inherman, misach ech'ol nak tachalk li ra xic' sa' eben. Chanchan li xam nak nachal sa' eben re xyalbal rix le pabal. Mec'oxla nak ca'aj cui'

laex yoquex chi c'uluc re. ¹³ Chi sahoek' ban sa' ech'ol nak yoquex chi c'uluc raylal jo' quixc'ul li Cristo xban nak yoquex chi tz'akonc riq'uin li raylal li quixc'ul a'an. Taçuulak xk'ehil nak li Jesucristo tixc'utbesi lix nimal xlok'al ut laex k'axal cui'chic tasahok' sa' ech'ol. ¹⁴ Us xak ere cui texhobek' xban nak nequepab li Cristo. A'an retaili nak lix Musik' li Dios cuan eriq'uin ut a'an li k'axal lok'. Relic chi yal nak tz'ektanabil li Dios xbaneb li neque'hoboc ere, abanan cheru laex, k'axal lok' ut nim xcuanquil. ¹⁵ Cheq'uehak retal: mexmacob. Xutanal chok' ere nak tec'ul junak raylal xban elk'ac, malaj ut xban li camsinc, malaj ut xban li yo'obanc ch'a'ajquillal sa' xyankeb le ras eritz'in, malaj ut xban xbanunquil c'a'ak chic re ru inc'a' us. ¹⁶ Cui ut nequec'ul raylal xban nak nequepab li Cristo, a'an moco xutanal ta. Chenimak ban xlok'al li Dios xban nak laex chic ralal xc'ajol. ¹⁷ Cuulac re xk'ehil li rakoc atin. Taticlak kiq'uin lao, li ralal xc'ajol li Dios. Tento nak tarakek' atin sa' kaben lao aj pabanel. Ut tarakek' ajcui' atin sa' xbeneb li inc'a' neque'xpab li Dios. Abanan k'axal numtajanak cui'chic li raylal te'xc'ul eb a'an. ¹⁸ Jo'ca'in tz'ibanbil chak retaili sa' li Santil Hu: Cui li tic xch'ol elajic tacolek', ¿ma toja' ta chic junak laj mac inc'a' elajic tacolek'? ¹⁹ Laex li yoquex chi xc'ulbal li raylal jo' naraj li Dios, cheq'uehak taxak ech'ol chixbanunquil li chabilal. Chek'axtesihak erib sa' ruk' li Dios. A'an li quiyo'obtesin ke ut ma jok'e tapaltok chiku.

5

Xq'uebal xna'leb laj c'amol be

¹ Ut anakuan tinya cuib oxibak li atin reheb laj c'amol be sa' eyank laex aj pabanel. Lain ajcui' erochben chi c'amoc be ut quicuil tz'akal nak li Cristo quixc'ul raylal. Lain tintz'akonk ajcui' jo' nak laex textz'akonk sa' lix nimal xlok'al li tac'utbesik. ² Laex laj c'amol be, tintz'ama cheru nak teq'ue ech'ol chirilbaleb li ralal xc'ajol li Dios jo' nak laj ilol xul narileb lix xul chi anchal xch'ol. Teq'ue ech'ol chixch'olaninguleb laj pabanel li k'axtesinbil ere xban li Dios chi macua' minbil eru. Tebanu ban chi anchal ech'ol. Mebanu yal xban xrahinquil ru le tojbal. Chebanu ban xban nak teraj c'anjelac chiru li Dios. ³ Metaklaheb sa' josk'il li k'axtesinbileb ere. Tetaklaheb ban sa' xyalal. Chabilakex chiruheb re nak te'ril le chabilal. ⁴ Li Jesucristo a'an tz'akal laj ilol ke. Cui nakach'olaniheb chi us li k'axtesinbileb ke, li Jesucristo tixq'ue kak'ajcamunquil nak tol-elk cui'chic. Li kak'ajcamunquil a'an inc'a' nalaj inc'a' na-oso'. Ut totz'akonk ajcui' riq'uin lix nimal xlok'al. ⁵ Ut anakuan, ex herman, tinya cuib oxibak atin ere laex li toj sajex. Chex-abink chiruheb li nequec'amoc be sa' eyank. Menimobresi erib cheribil erib. Chetenk'a ban erib cheribil erib chejunilex jo' tz'ibanbil sa' li Santil Hu: Li Dios naxtz'ektanaheb li k'etk'eteb ut naxbanu usilal reheb li neque'xcubsi ribeb. ⁶ Checubsi bi' ecuanquil chiru li Dios li k'axal nim xcuanquil re nak li Dios tixnimobresi le cuanquil nak tixtau xk'ehil. ⁷ Checanabak sa' ruk' li Dios chixjunil li c'a'ak re ru yo' ec'a'ux chirix xban nak li Dios naxq'ue xch'ol cherix laex. ⁸ Chicuanq' ena'leb re xcolbal erib chiru laj tza xban nak laj tza yo' chixsic'bal ani tarale. Laj tza a'an chanchan li cakcoj camc re xban xtz'ocajic ut yo' chixsutinguil rib yalak bar re xsic'bal ani tixcamsi re tixtiu. ⁹ Meq'ue erib chi alec xban laj tza. Cauhak ban ech'ol sa' le pabal. Mich'inan ech'ol nak tachalk junak raylal sa' eben. Nequenau nak macua' ca'aj cui' laex yoquex chi c'uluc raylal. Jo'can ajcui' neque'xc'ul le rech aj pabanelil yalak bar jun sut sa' ruchich'och'. ¹⁰ Laex tec'ul li raylal. Cuyomak cuan ca'ch'inak xban nak chi seb ajcui' nocoxtenk'a li Dios. A'an tat'akobresink eru. A'an tatenk'ank ere re nak inc'a' tach'inank ech'ol. Tixq'ue ban xcacuil ech'ol. Li

Dios, li naq'uehoc ke li usilal, a'an quibokoc ke chi tz'akonc riq'uin lix nimal xlok'al sa' choxa kochben li Cristo. ¹¹ A'an taxak chinimək xcuauquil chi junelic k'e cutan. Jo'can taxak.

Xrakbal li hu riq'uin sahil ch'olej

¹² Laj Silvano, a'an jun tz'akal aj pabanel. A'an tac'amok re li hu a'in xintz'iba chok' ere. Moco q'ui ta li atin xintz'iba ere. Riq'uin li atin a'in yoquin chixq'uebal ena'leb. Xinch'olob xyalal cheru chanru li rusilal li Dios. A'in taxak chiq'uehoc xcacuil ech'ol. ¹³ Eb laj pabanel li cuanqueb Babilonia neque'xtakla xsahil ech'ol. Eb a'an sic'bil ajcui' ruheb xban li Dios jo' laex. Naxtakla ajcui' xsahil ech'ol laj Marcos, li ninra jo' cualal. ¹⁴ Cheq'uehak xsahil ech'ol cheribil erib riq'uin santil utz'uc u xban nak nequera erib. Chicuañk taxak li tukuquil usilal eriq'uin xban nak laex chic ralal xc'ajol li Cristo. Jo'can taxak.

Li Xcab Hu li Quixtz'iba li San Pedro

Xq'uebal xsahil xch'oleb

¹ Lain laj Simón Pedro. Lain x-apóstol li Jesucristo ut ninc'anjelac chiru. Nintz'iba li hu a'in eriq'uin, laex aj pabanel. Ac xetau lix chak'al ru li pabal jo' li kapabal lao. Li pabal a'in natauman riq'uin li Kaçua' Jesucristo laj Colol ke, li tjc xch'ol. ² Xban nak nequenau chic li xyalal chirix li Dios ut chirix li Kaçua' Jesucristo, taçuank taxak chi nabal li tuktuquuilal eriq'uin ut chi cuank taxak li rusilal li Dios sa' le ch'ol.

Chextz'akonk riq'uin lix santilal li Dios

³ Chixjunil li c'a'ru nac'anjelac ke sa' li kayu'am ut sa' li kapabal q'uebil ke xban ximal xcuanguil li Cristo. Sa' xc'aba' lix cuanguil xkanau ru li Dios li quibokoc ke chi tz'akonk riq'uin lix nimal xlok'al ut xcuanguilal. ⁴ Sa' xc'aba' lix nimal xlok'al ut xcuanguilal li Dios quixyechi'i kamañan k'axal lok' ut nim xcuanguil. Li Dios quixyechi'i ke lix cuanguilal re toelk sa' li mausilal li cuan sa' ruchich'och' ut quixyechi'i ajcui' ke lix cuanguilal re nak takacanab xrahinquil ru li maç, ut re ajcui' nak totz'akonk riq'uin lix tjuilal li Dios. ⁵ Abanan inc'a' tz'akal cui ca'aj cui' nocopaban. Chikayalak ban kak'e chixbanunquil li chaibilal. Ut chikatzolak kib riq'uin li Dios re nak chaibilak li kana'leb. ⁶ Jo'can ajcui' nak chikacuyak kib. Ut chicuank xcacuil li kach'ol sa' li kapabal riq'uin li raylal nakac'ul ut chikac'oxlahak li Dios chi tz'akal. ⁷ Maçua' ca'aj cui' a'an takabanu. Chisahok' ban ajcui' kach'ol riq'uin li kas kitz'in ut chikaraheb. ⁸ Cui nakabanu a'in chi cuulaj cuulaj, yoko chi c'anjelac chiru li Dios re nak li kayu'am inc'a' taçuank chi maç'a' rajbal. Cuank ban xyalal nak takapab li Kaçua' Jesucristo. ⁹ Li ani inc'a' naxbanu li c'a'ak re ru a'in, a'an chanchan jun li mutz' malaj chanchan jun li inc'a' nailoc chi tz'akal. Li jun a'an inc'a' naxq'ue sa' xch'ol nak ac colbil chic chiru li maç li quixbanu junxil. ¹⁰ Riq'uin ut a'in ex herman, cheq'ue taxak ech'ol chixtaubal ru nak bokbilex ut sic'bil eru xban li Dios. Cui nequeq'ue retal a'in inc'a' chic texmaçobk. ¹¹ Ut naru chic tex-oc chok' ralaç xc'ajol li Dios. Ut tex-oc ajcui' sa' lix nimajcual xcuanguilal li Kaçua' Jesucristo laj Colol ke. ¹² Jo'can nak inc'a' tincanab xjulticanquil ere li na'leb a'in, usta ac ch'olch'o cheru lix yalal ut cau chic ech'ol sa' le pabal. ¹³ A' yal jo' najtil yo'yokin, ninc'oxla nak tento tintoch' le ch'ol riq'uin xjulticanquil a'atin a'in cheru. ¹⁴ Li Kaçua' Jesucristo quixc'utbesi chicuu nak chi seb taçuulak xk'ehil lin camic. ¹⁵ Lain ting'ue inch'ol chixch'olobanquil lix yalal cheru re nak chirix lin camic lix yalal a'in taçanak sa' ech'ol.

Kilom riq'uin ku lix lok'al li Cristo

¹⁶ Li c'a'ru yoquin chixyebal ere chirix lix cuanguilal li Jesucristo ut lix c'ulunic, maçua' yal yo'obanbil atin. Ch'olch'o nak xkil riq'uin xnak' ku lix nimajcual cuanguilal. ¹⁷ Lao xkil riq'uin xnak' ku nak li Kaçua' Jesucristo quixc'ul lix nimanquil ru ut lix lok'al riq'uin li Dios Acuabej. Ut quikabi xyab xcux li Dios nak quixye chak sa' lix nimajcual lok'al, a'an a'in li cualal k'axal raro inban. Ut c'ojc'o inch'ol riq'uin, chan. ¹⁸ Nak quikabi li atin a'in li quichal chak sa' choxa, lao cuanco chak kochben a'an sa' xben jun li tzul sic'bil ru xban li Dios. ¹⁹ Riq'uin a'in nakanau nak relic chi yal na-uxman li c'a'ru tz'ibanbil chak najter xbaneb li profeta. Us cui teq'ue retal li quilaje'xtz'iba chak li profeta. A'an naxcutanobresi chiku jo' junak xam nacutanobresin sa'

junak na'ajej k'ojyjn ru. Li Kaçua' Jesucristo naxcutanobresi sa' li kam jo' nak naxcutanobresi ru li k'ojyjn li cak chahim nak sakeuc re. ²⁰ Chetauhak xyalal a'in xben cua: li atin quilaje'xtz'iba li profeta sa' li Santil Hu inc'a' naru yalak ani tajalok re xjunes. ²¹ Eb li profeta ma jun cua que'xtakla rib xjuneseb. Eb a'an sic'bileb ru xban li Dios ut que'atinac jo' quiyeh'e' chak reheb xban li Santil Musik'ej.

2

Eb li xic' neque'iloc re li Cristo

¹ Que'cuan ajcui' chak profeta aj balak' sa' xyankeb laj Israel junxil. Jo'can ajcui' sa' eyank laex, te'cuank aj tzolonel aj balak'. Chi timil ut sa' mukmu te'rocsti li balak' aj na'leb re xsachbal xpabanquil li Dios toj retal te'xtz'ektana li Kaçua' Jesucristo li quicam sa' xc'aba'eb. Ut riq'uin li neque'xbanu, neque'xsach ribeb chi junaj cua ut yoqueb chixbokbal raylal sa' xbeneb. ² Nabaleb telaje'xic sa' li mausilal li yoqueb chixyebal eb a'an ut xmaqueb a'an tamajecuaq li kapabal li tz'akal yal. ³ Eb a'an aj tic'ti'eb. Ca'aj cui' le tumin neque'raj. Xban xrahinquil ru li tumin neque'balak'ic riq'uin tic'ti'. Lix rahobtesinquileb a'an ac tenebanbil chak sa' xbeneb najter xban li Dios. Inc'a' chic tãbayk. Cuulac ban re xcutanquil nak te'sachek' ruheb. ⁴ Li Dios inc'a' quixcuy xmaqueb li ángel li que'macoc chiru. Quixcuteb ban sa' xbalba sa' chamal jul k'ojyjn xsa'. Bac'boqueb chi cadena quixcanabeb toj tacuulak xk'ehil li rakba atin. Jo'can ajcui' tixbanu reheb laj balak'. Inc'a' tixcuy xmaqueb. ⁵ Li Dios inc'a' quixcuy xmaqueb li que'cuan sa' ruchich'och' najter. Quixtakla ban chak li but'i ha' sa' xben li ruchich'och' re nak te'osok' chixjunileb laj mac. Ca'aj cui' laj Noé laj yehol resil li tiqulal quicole' rochbened li cuukub chic lix comoneb. ⁶ Jo'can ajcui' li Dios quixrak atin sa' xbeneb laj Sodoma ut laj Gomorra. Quixsacheb nak quixc'at lix tenamiteb. Junes cha quicana. Li Dios quixbanu chi jo'can chok' retalil chiruheb chixjunileb li yoqueb chi macoc mokon re nak te'xucuaq xban li c'a'ru tachalk sa' xbeneb. ⁷ Quixcol laj Lot li tic xch'ol. A'an c'ajo' nak naraho' sa' xch'ol xban nak numtajenak li mausilal li neque'xbanu li cuanqueb aran Sodoma. ⁸ Laj Lot, a'an tic xch'ol. Ut nak cuan sa' xyankeb laj Sodoma junelic ra sa' xch'ol chirilbal, ut chirabinquil lix mausilal lix na'lebeb. ⁹ Jo'can ajcui' anakuan. Li Dios naxtenk'aheb li tiqub xch'ol re nak inc'a' te'xq'ue rib chi alec. Ut eb li inc'a' tiqub xch'ol tixcanabeb chixc'ulbal li tojba mac nak tixtau xk'ehil li rakba atin. ¹⁰ ¿Ma toja' ta chic inc'a' tixq'ueheb sa' tojba mac li neque'xrahi ru li tz'ajbetal aj na'leb ut neque'xtz'ektana lix cuanquial li Cristo? Eb a'an josk'eb ut k'etk'eteb. Inc'a' neque'xucuaq chixmajecuanquileb li ángel li cuanqueb sa' xnimajcual cuanquial. ¹¹ Eb li ángel cuanqueb xna'leb ut nim xcuanquil chiruheb laj tzolonel aj balak'. Abanan li ángel inc'a' neque'xmajecuaheb li cuink a'in chiru li Kaçua'. ¹² A'ut eb laj tzolonel aj balak' chanchaneb li xul. Mac'a' neque'xpab. Yal re chapec' ut re camsic nak neque'yo'la. Yoqueb chixmajecuanquil li c'a'ak re ru inc'a' neque'xtau ru. Eb a'an jun oso'jiqueb nak te'osok'. ¹³ Chi jo'can te'xc'ul xk'ajcamunquil lix mausilaleb que'xbanu. Eb laj tzolonel aj balak' junelic saheb sa' xch'ol chixbanunquil li inc'a' us, usta chi cutan. Xutanal chok' ere nak cuanqueb sa' eyank xban nak neque'cuulac chi cua'ac sa' le nink'e. Eb a'an junes macoc neque'xc'oxla. ¹⁴ A'aneb aj muxul caxar. Ca'aj cui' ixk neque'xc'oxla ut inc'a' neque'xcanab macoc. Neque'oc chixk'unbesinquileb li toj k'uneb xch'ol. Eb li cuink a'in c'aynakeb chixrahinquil ru li biomal. Eb a'an majecuanbileb chi junaj cua xban li Dios. ¹⁵ Nak neque'xcanab li tiqulal, neque'xic chi jo'

majo'. Neque'xbanu jo' quixbanu laj Balaam li ralal laj Beor. Laj Balaam quiraj xtaubal xtumin riq'uin xbanunquuil li mausilal. ¹⁶ Jo'can nak quik'use' xban jun li bur. Yal xul. Inc'a' naatinac. Ut laj Balaam quirabi xyab xcux li bur jo' xyab xcux li cujnk nak quiyeh'e' re xban li bur nak tixcanab xbanunquuil li mausilal. ¹⁷ Eb laj tzolonel aj balak' chanchaneb lix julel ha' li mac'a' ha' chi sa'. Mac'a' na-oc cui'. Chanchaneb li chok li nac'ame' yalak bar xban li ik'. Eb li cujnk a'in te'xic sa' lix k'ojyinal ru li xbalba li ac yibanbil chok' reheb. ¹⁸ Neque'oc chi yehoc xninkal ru atin sa' lix majelal xna'lebeb. Ut riq'uin li mac naxrahi li tz'ejcualej yoqueb chixk'unbesinquileb li cristian li toj que'el chak sa' xyankeb. ¹⁹ Eb laj balak' neque'xye: Libre chic texcuank, chanqueb. Laex chic yal ere c'a'ru tebanu, chanqueb. Ut inc'a' neque'xq'ue retal nak a'an eb li c'ayinbileb chi c'anjelac chiru li mac xban nak li ani toj nanumta li mausilal sa' xben, toj cuan rubel xcuanquuil li mac. ²⁰ Li ani neque'xpab li Kacua' Jesucristo, neque'xcanab ajcui' xmuxbal rib riq'uin li c'a'ru cuan sa' ruchich'och'. Abanan cui te'oc cui'chic chi macobc ut cui tanumtak cui'chic li mac sa' xbeneb, k'axal cui'chic yibak ru lix na'lebeb chiru nak que'cuan junxil nak toj maji' neque'paban chak. ²¹ K'axal us raj chok' reheb nak inc'a' ta que'xnau xbehil li tiquilal chiru nak ac neque'xnau ru, ut que'xcanab cui'chic xpabanquuil lix chak'rab li Dios li quik'axtesic reheb. ²² Cuan jun li atin nayeman naxye: li tz'i' naxlou cui'chic lix xa'au xca' sut, ut nayeman ajcui' nak li ak li atesinbil, naxtolc'osi cui'chic rib sa' sulul. (Pr. 26:11) Eb li cujnk aj balak' chanchaneb li xul a'an xban nak que'oc cui'chic xbanunquuil li mausilal.

3

Resil xca' c'ulunic li Kacua' Jesucristo

¹ Ex inherman, a'in li xcab hu nintz'iba eriq'uin. Riq'uin li cuib chi hu yoquin cui'chic chixnumsinquuil li xyalal sa' le xic re nak tec'oxla chi us c'a'ru tebanu. ² Chijulticok' ere li ratineb li santil profeta tz'ibanbil chak najter k'e cutan. Ut chijulticok' ere lix chak'rab li Kacua' Jesucristo laj Colol ke, k'axtesinbil ere kaban lao lix ap6stol li Jesucristo. ³ Xben cua chetauhak xyalal a'in: Nak tanach'ok chak roso'jiqueb li cutan, cuan li te'chalk chi hoboc riq'uin yibru atin. Te'xhob xcuanquuil li Dios ut te'xbanu li yibru na'leb li neque'xc'oxla. ⁴ Eb a'an te'xye: Li Jesucristo quixye nak tachalk. ¿Bar ta cuan? ¿Ma ac xc'ulun ta? Chalen chak xcamiqueb li kaxe' katon chixjunil li c'a'ak re ru cuan ajcui' anakcuan jo' nak quicuan chak chalen chak sa' xticlajic li ruchich'och', cha'keb. ⁵ Li neque'xye chi jo'can inc'a' neque'raj xjulticanquuil chanru qui-uxman chak najter. Inc'a' neque'raj xq'uebal retal nak yal riq'uin ratin li Dios quixyo'obtesi li choxa ut li ruchich'och'. Li Dios quixyib li ruchich'och' sa' ha' ut sa' xben ha' quic'ojla li ch'och' xban li Dios. ⁶ Jo'can ajcui' li ruchich'och' li quicuan. Yal riq'uin ratin li Dios, quibut'ha'in ut qui-oso'. ⁷ Li choxa ut li ruchich'och' li cuanqueb anakcuan, cuanqueb sa' xna'aj yal riq'uin ratin li Dios. Yoqueb chiroybeninquuil nak te'c'atek' xban li xam sa' xk'ehil li rakba atin nak te'sachek' li inc'a' useb xna'leb. ⁸ Abanan ex herman, laex li raroquex inban, chetau taxak ru a'in: Nak li jun cuan chiru li Kacua' a'an jo' li jun mil chihab chiku lao, ut li jun mil chihab jo' li jun cutan chiru li Dios. ⁹ Cuan li neque'xye nak li Kacua' Jesucristo xbay chak chi chalç. Inc'a' ajcui' xc'ulun jo' quixye, chanqueb. Abanan inc'a' yo chak chi bayc. Toj maji' nac'ulun xban nak nim lix cuyum eriq'uin laex. Inc'a' naraj nak taçachk junak. Naraj ban nak te'yot'ek' xch'ol ut te'xjal xc'a'ux. ¹⁰ Lix k'ehil lix c'ulunic li Kacua', a'an chanchan nak nachal laj elk'. Moco cuan ta resil lix c'ulunic. Sa' li cutan a'an taçosok' li choxa. Tenlok xyab

nak taosok'. Ut li c'a'ak re ru cuanqueb chiru te'osok' xban li xam. Tac'atk li ruchich'och' jo' ajcui' chixjunil li c'a'ak re ru li cuan chiru. ¹¹ Xban nak chixjunil li c'a'ak re ru telaje'osok', jo'can nak chikaq'ue kach'ol chi cuanc sa' li tiqulal. Chikac'oxlahak li Kacua' Dios. ¹² Yoco chiroybeninuil xk'ehil xc'ulunic li Kacua'. Chikaq'ue kach'ol chi c'anjelac chiru re nak tasebank chak chi chal. Sa' li cutan a'an te'loch'k xxamlel li choxa ut te'osok' chixjunil. Ut li c'a'ak re ru cuanqueb chiru telaje'ha'ok' xban xtikcual li xam. ¹³ Abanan li Kacua' Dios quixyechi'i ke li ac' choxa ut li ac' ruchich'och'. A'an yoco chiroybeninuil. Sa' li ruchich'och' a'an junes tiqulal tacuank. ¹⁴ Jo'can ut ex herman, raroquex inban, chalen nak yoquex chiroybeninuil li c'a'ak re ru a'in, cheq'ue ech'ol chixbanunuil li tiqulal re nak mac'a'ak emac ut cuankex sa' xyalal nak tac'ulunk li Jesucristo. ¹⁵ Julticak ere nak cui li Kacua' Jesucristo maji' nac'ulun, a'an re nak li ani maji' nacole' naru tacolek'. A'an aj e nak quitz'ibac eriq'uin li kaherman Pablo, li k'axal raro kaban. A'an quixtz'iba li na'leb a'in jo' q'uebil chak re xban li Dios. ¹⁶ Chirix a'in quixtz'iba laj Pablo sa' chixjunil lix hu. Cuan li c'a'ak re ru sa' lix hu ch'a'aj xtaubal ru. Ut li mac'a'eb xna'leb ut li junpat neque'ch'inan xch'ol sa' lix pabaleb neque'xpo' li xyalal. Jo'can ajcui' neque'xbanu riq'uin chixjunil li ratin li Dios. Xban nak neque'xk'et ratin li Dios, jo'can nak te'osok'. ¹⁷ Jo'can ut ex herman, k'axal raroquex kaban, ac kayehom resil ere chirixeb laj balak'. Chicuank sa' ech'ol a'in re nak inc'a' texbalak'ik xbaneb li cuink li yibeb ru xna'leb. Ut, laex li cau ech'ol chixpabanuil li Cristo, mich'inan ech'ol xbaneb laj balak'. ¹⁸ A' taxak li rusilal li Kacua' chic'utunk sa' le yu'am ut chesic' chanru nak tenau lix yalal li Kacua' Jesucristo laj Colol ke. A' taxak li Kacua' Jesucristo chilok'onik anakcuan ut chi junelic toj sa' roso'jiqueb li cutan. Jo'can taxak.

Li Xben Hu li Quixtz'iba li San Juan

Resil li Jesucristo li naq'uehoc re li kayu'am

¹ Nintz'ibac eriq'uin chirix li Dios C'ajolbej li cuan chalen chak sa' xticlajic li ruchich'och'. Lao quikil riq'uin xnak' ku ut coatinac riq'uin. Quikil ru a'an chi tz'akal ut xkach'e' riq'uin kuk'. A'an a'in li Atin naq'uehoc yu'am. ² Quic'utbesic chiku li naq'uehoc yu'am. Quikil ru a'an. Jo'can nak nakach'olob xyalal cheru chirix a'an, li naq'uehoc yu'am chi junelic. A'an li cuan chak riq'uin li Acuabej Dios. A'an quixc'utbesi rib chiku. ³ Nakach'olob xyalal cheru chirix li c'a'ru quikil ut li c'a'ru quikabi re nak tocuank chi sum atin chi kibil kib. Ut tocuank ajcui' chi sum atin riq'uin li Acuabej Dios ut riq'uin li Jesucristo, li Lalal. ⁴ Sa' li hu a'in nakatakla xyebal ere re nak chitz'aklok ru lix sahil ech'ol chejunilex, jo' ajcui' lix sahil kach'ol lao.

Li Dios, a'an cutan saken

⁵ A'an a'in li atin quikabi riq'uin li Jesucristo. Ut a'an li nakach'olob xyalal cheru. Li Dios, a'an li cutan saken. Riq'uin li Dios mac'a' k'ojyin. Tic ban xch'ol li Dios. Relic chi yal nak mac'a' mausalil riq'uin. ⁶ Cui nakaye nak cuanco chi sum atin riq'uin li Dios ut cui toj nakabanu li inc'a' us, yoco chi tic'ti'ic. Ut inc'a' nakatzol kib chixbanunquil li yal. ⁷ Ut cui nakabanu li c'a'ru naraj li Dios, jo' naxc'utbesi chiku li Cristo, cuanco chic chi sum atin chi kibil kib. Ut lix quiq'uel li Jesucristo li Lalal li Dios naxch'ajobresi li kam ut narisi chixjunil li kamac.

Laj cuyul laj sachol re li kamac

⁸ Cui nakaye nak mac'a' kamac, nakabalak'i kib ut moco yal ta li yoco chixyebal. ⁹ Cui nakaxoto li kamac chiru li Dios, relic chi yal nak a'an tic xch'ol chixcuybal chixsachbal li kamac, ut tarisi chixjunil li kamausalil. ¹⁰ Cui ut nakaye nak inc'a' xomacob nakaq'ue li Dios chok' aj tic'ti'. Ut inc'a' nakapab li ratin.

2

Li Jesucristo aj jalol atin chikix chiru li Dios

¹ Ex inherman, chanchanex li cualal inc'ajol. A' c'a'ak re ru a'in nintz'iba ere re nak inc'a' texmacobk. Cui ut cuan junak tamacobk, cuan jun aj jalol atin chikix chiru li Acuabej Dios, a'an li Jesucristo li tic xch'ol. ² Li Jesucristo quicam re xtojbal rix li kamac. Moco ca'aj ta cui' xban li kamac lao. Quicam aj ban cui' re xtojbal rix xmaqueb chixjunileb li cuanqueb sa' ruchich'och'. ³ Cui lao nakabanu li c'a'ru naraj li Dios, relic chi yal nak lao reho chic li Dios. ⁴ Li ani naxye, "Lain rehin li Dios", ut cui inc'a' naxbanu li c'a'ru naraj li Dios, a'an aj tic'ti'. Moco yal ta ru li yo chixbanunquil. ⁵ Li ani napaban re li ratin li Dios, relic chi yal nak naxra li Dios chi tz'akal. Riq'uin a'an nakanau nak lao reho chic li Dios. ⁶ Li ani naxye nak re chic li Dios, tento nak junelic chabilak lix yu'am jo' xyu'am li Jesucristo.

Li chak'rab k'axal nim xcuauquil

⁷ Ex inherman, moco toj ac' ta li chak'rab yoquin chixtz'ibanquil eriq'uin. A'in a'an ajcui' li chak'rab li quiq'uehe' chak ere junxil. Ac erabiom chak chalen nak xepab li Cristo. ⁸ Abanan chanchan ac' ajcui' li chak'rab xban nak k'axal nim xcuauquil. Ut li chak'rab a'an, a'in nak tera erib cheribil erib.

Jo' quixbanu li Jesucristo, jo'can ajcui' takabanu lao. Li ratin li Jesucristo naxcutanobresi kana'leb. Nak nakacanab li macobc, chanchan nak yo' chi numec' li k'o'jyin. Ut nak nakapab li ratin li Jesucristo, chanchan nak yo' chi chalc li cutan. ⁹ Li ani naxye nak xcutanobresic lix na'leb xban li Cristo, ut xic' naril lix herman a'an toj cuan ajcui' sa' xk'o'jyinal ru li mac. ¹⁰ Li ani naxra lix herman, a'an cutanobresinbil lix na'leb xban li Cristo. Ut ma' ani nach'inan xch'ol xban. ¹¹ Li ani xic' naril lix herman, a'an toj yo' ajcui' chi bec sa' xk'o'jyinal ru li mac. Ut inc'a' naxnau bar yo' chi xic' xban nak li mac naramoc re li xyalal chiru. ¹² Nintz'ibac eriq'uin, ex herman, xban nak cuybil sachbil chic le mac xban li Dios sa' xc'aba' li Jesucristo. ¹³ Nintz'ibac ajcui' eriq'uin, laex yucua'bej, xban nak ac xepab li Dios C'ajolbej li cuan chalen chak najter nak toj maji' naxyo'obtesi chak li ruchich'och'. Nintz'ibac eriq'uin laex li toj sajex xban nak xecuy xnumsinquil li alec li naxq'ue laj tza. Ut nintz'ibac ajcui' eriq'uin laex coc'al xban nak ac xepab li Acuabej Dios. ¹⁴ Xintz'ibac eriq'uin laex yucua'bej, xban nak ac xepab li Dios C'ajolbej li cuan chalen chak najter nak toj maji' naxyo'obtesi chak li ruchich'och'. Xintz'ibac eriq'uin laex li toj sajex, xban nak cau erib ut li ratin li Dios nacana chi junelic eriq'uin ut xecuy xnumsinquil li alec li naxq'ue laj tza. ¹⁵ Ex inherman, mera chic ru lix mausilal li ruchich'och' chi moco li c'a'ak re ru cuan sa' ruchich'och'. Cui cuan junak naxra ru li c'a'ak re ru a'in, moco naxra ta li Acuabej Dios. ¹⁶ Chixjunil li mausilal cuan sa' ruchich'och' moco riq'uin ta li Dios nachal. Li mac li naxrahi ru li tz'ejuualej ut li xrahinquil ru li c'a'ak re ru nakil riq'uin xnak' ku moco riq'uin ta li Dios nachal. Jo'can ajcui' li k'etk'etil. Chixjunil a'in moco riq'uin ta li Dios nachal; xna'leb ban li ruchich'och'. ¹⁷ Li ruchich'och' taosok' jo' ajcui' li mausilal. Abanan li ani nabanun re li naraj li Dios, a'an cuank chi junelic.

Li xic' neque'iloc re li Cristo

¹⁸ Ex inherman, yo' chak chi nach'oc roso'jiqueb li cutan. Ac xerabi resil nak tachalk jun li xic' na-iloc re li Cristo. A'an li anticristo nayeman re. Ut anakuan ac cuanqueb nabal li xic' neque'iloc re li Cristo. Jo'can nak nakanau nak yo' chi cuulac xk'ehil roso'jiqueb li cutan. ¹⁹ Sa' kayank xe'el li xic' neque'iloc re li Cristo, abanan moco kech aj pabaneleb ta nak xe'cuan. Cui ta eb a'an kech aj pabanelil, cuanqueb raj chi junelic sa' kayank. Abanan xe'el sa' kayank re nak tanaumank nak macua'eb kech aj pabanelil. ²⁰ Ut laex ac santobresinbilex xban li Santil Musik'ej li q'uebil ere xban li Jesucristo, ut nequenau chic li xyalal. ²¹ Moco xban ta nak inc'a' nequenau li xyalal nak nintz'ibac eriq'uin. Laex nequenau li xyalal ut nequenau ajcui' nak ma' jun tic'ti' na-el sa' li tz'akal yal. ²² ¿Ani laj tic'ti' nak nequec'oxla laex? A'an li nayehoc re nak li Jesucristo, macua' a'an laj Colonel li yechi'inbil xban li Dios. Li nayehoc re chi jo'can, a'an li anticristo li xic' na-iloc re li Cristo. A'an li natz'ektan re li Acuabej Dios ut li C'ajolbej. ²³ Li ani naxye nak li Jesucristo macua' Lalal li Dios, li nayehoc re a'an mac'a' li Acuabej Dios riq'uin. Ut li ani naxye nak li Cristo, a'an li tz'akal Lalal li Dios, a'an cuan li Acuabej Dios riq'uin. ²⁴ Li c'a'ru xetzel chak chalen sa' xticlajic le pabal chicuank sa' le ch'ol. Cui tec'ula sa' le ch'ol li c'a'ru xerabi chak chalen sa' xticlajic le pabal, cuankex riq'uin li C'ajolbej ut riq'uin li Acuabej Dios. ²⁵ Li yu'am mac'a' roso'jic, a'an li naxyechi'i ke li Jesucristo. ²⁶ Nintz'iba a'in eriq'uin chirixeb li xic' neque'iloc re li Cristo xban nak eb a'an te'raj ebalak'inquil. ²⁷ Abanan inc'a' tento ta cuank junak aj tzolol ere re xc'utbal cheru c'a'ru li yal ut c'a'ru li inc'a' yal xban nak q'uebil ere li Santil Musik'ej xban li Jesucristo. Li Santil Musik'ej cuan eriq'uin ut a'an li naq'uehoc ena'leb. Li c'a'ru naxc'ut cheru li Santil Musik'ej tz'akal yal. Moco tic'ti' ta. Jo'can nak chexcuank chi sum atin

riq'uin li Jesucristo jo' naxc'ut cheru li Santil Musik'ej. ²⁸ Ut anakcuan, ex herman, ninye cui'chic ere nak chexcuank chi sum atin riq'uin li Jesucristo re nak mac'a'ak le xiu nak tol-elk cui'chic li Kacua' Jesucristo. Sahak ban sa' kach'ol chixc'ulbal chi mac'a'ak kaxutan. ²⁹ Laex nequenau nak li Cristo tic xch'ol. Ut chenuhak ajcui' nak chixjunileb li neque'banun re li tiq'uilal, a'an tz'akal ralar xc'ajol li Dios.

3

Li ralar xc'ajol li Dios

¹ Cheq'uehak retal nak li Acuabej Dios c'ajo' nocoxra. Nocoxq'ue chok' ralar xc'ajol. Relic chi yal nak lao ralar xc'ajol. Jo'can nak li maji' neque'paban inc'a' neque'xtau ru li kana'leb xban nak maji' neque'xnau xyalal xpabanquil li Dios. ² Ex inherman, anakcuan lao ralar xc'ajol li Dios. Abanan maji' nakanau jo' q'uial chic li usilal takac'ul mokon. Ca'aj cui' nakanau nak tol-elk li Jesucristo, chanchanako chic a'an xban nak takil ru chi tz'akal. ³ Li ani yo' chiroybeninquil lix c'ulunic li Cristo, a'an naxsakobresi li ram sa' tiq'uilal jo' li Kacua' Jesucristo tic xch'ol. ⁴ Li ani namacob nax'et lix chak'rab li Dios xban nak li macobc a'an xk'etbal li chak'rab. ⁵ Laex nequenau nak li Kacua' Jesucristo quic'ulun re xcuybal ut xsachbal li kamac. Relic chi yal nak a'an macua' aj mac. ⁶ Jo'can nak li ani cau xch'ol chixtakenquil li Cristo, inc'a' chic yok chi macobc. Abanan li ani toj yo' chi macobc inc'a' naxnau li rusilal li Cristo ut inc'a' napaban. ⁷ Ex herman, ma' ani chibalak'ink ere. Li ani nabanun re li tiq'uilal, a'an tic xch'ol jo' li Cristo tic xch'ol. ⁸ Li ani yo' chi macobc, a'an re laj tza xban nak laj tza a'an aj mac chalen chak sa' xticlajic li ruchich'och'. A'an aj e nak col-elk li Ralar li Dios re xsachbal xc'anjel laj tza. ⁹ Ma' jun ralar xc'ajol li Dios yok chi macobc xban nak li Dios cuan riq'uin. Ut inc'a' naru nak yok chi macobc xban nak a'an tz'akal ralar xc'ajol li Dios. ¹⁰ Riq'uin a'in na'noqueb ru li ralar xc'ajol li Dios ut na'noqueb ajcui' ruheb li ralar xc'ajol laj tza: li ani inc'a' naxbanu li tiq'uilal, ut li ani inc'a' naxra li ras ritz'in, a'an macua'eb ralar xc'ajol li Dios.

Chikara kib chi kibil kib

¹¹ Chalen chak sa' xticlajic le pabal xerabi li chak'rab nak chikarahak kib chi kibil kib. ¹² Mikatake xna'leb laj Cain xban nak a'an re laj tza. A'an quixcamsi li ritz'in. ¿C'a'ut nak quixcamsi li ritz'in? Xban nak tic xch'ol li ritz'in chiru li Dios ut laj Cain junes mausilal naxbanu. ¹³ Jo'can ut ex inherman, misach ech'ol xbaneb li xic' neque'iloc ere sa' ruchich'och'. ¹⁴ Cui nakara li kaherman, a'an retalil nak cuank kacolbal chiru xcuanquil li camc ut q'uebil kayu'am chi junelic. Li ani inc'a' naxra lix herman, a'an toj cuan rubel xcuanquil li camc. ¹⁵ Li ani xic' naril lix herman, a'an chanchan aj camsinel ras ritz'in. Laex nequenau nak junak aj camsinel ras ritz'in mac'a' xyu'am chi junelic. ¹⁶ Li Jesucristo quixc'ut chiku chanru li rahoc nak quixk'axtesi rib chi camc sa' kac'aba' lao. Jo'can ajcui' nak tento takaraheb li kaherman usta tocamsik sa' xc'aba'eb. ¹⁷ Jun chic ninye ere. Cui lao cuan nabal li c'a'ru ke ut inc'a' nakatok'oba ru li neba' li mac'a' cuan re, zma yal ta bi' nak nakara li Dios chi jo'canan? ¹⁸ Ex inherman, morahoc yal chi atin. Chorahok ban chi tz'akal yal ut chic'utunk li karahom riq'uin li usilal nakabanu.

Cau li kach'ol chixpabanquil li Dios

¹⁹ Cui nakara li kaherman, nakanau nak lao tz'akal ralar xc'ajol li Dios, ut cau kach'ol chixpabanquil li Dios. ²⁰ Cui lao nakec'a nak xomacob, ac cutan

saken chiru li Kaçua' Dios li nakabañu xban nak a'an chixjunil naxnau. ²¹ Cui inc'a' nakec'a sa' kach'ol nak inc'a' us yoco, inc'a' nocoxucuac chiru li Dios. ²² Ut yalak c'a'ru takatz'ama chiru, tixq'ue ke xban nak yoco chixpabanquil lix chak'rab ut nakabañu li c'a'ru nacuulac chiru li Dios. ²³ Ut a'an a'in lix chak'rab quixq'ue ke li Dios, nak chopabank sa' xc'aba' li Jesucristo li Lalal li Dios ut takara kib chi kibil kib, jo' coxchak'rabi cui'. ²⁴ Cui nakapab lix chak'rab, lao cuanco riq'uin li Dios ut li Dios cuan kiq'uin. Nakanau nak li Dios cuan kiq'uin chi junelic xban li Santil Musik'ej li q'uebil ke.

4

Li Santil Musik'ej ut laj tzolonej aj balak'

¹ Ex herman, q'uehomak retal nak moco chixjunil ta aj iq'uin cuan li Santil Musik'ej. Nabaleb laj tzolonej aj balak' cuanqueb sa' ruchich'och'. Mepab chixjunil li c'a'ak re ru nequerabi riq'ueñeb, usta tayehek' ere nak riq'uin li Dios xchal. Tento nak tetz'il rix li terabi re xnaubal ma riq'uin li Dios xchal li neque'xye malaj inc'a'. ² Chi jo'ca'in naru tenau cui li Santil Musik'ej xq'uehoc re li na'leb malaj inc'a'. Li ani tayehok re nak li Jesucristo quitz'ejcualo' ut tz'akal cuñk nak quic'ulun sa' ruchich'och', a'an li cuan li Santil Musik'ej riq'uin. ³ Ut li ani tayehok re nak li Jesucristo inc'a' quitz'ejcualo' nak quic'ulun sa' ruchich'och', a'an maç'a' li Santil Musik'ej riq'uin. Li na'leb a'an nachal riq'uin li xic' na-iloc re li Cristo. Abanan ac erabiom resil chirix nak tol-elk li xic' na-iloc re li Cristo. Ut anakuan li na'leb a'an ac yo chi c'ulunc sa' ruchich'och'. ⁴ Ex inherman, laex rehex chic li Dios. Laex xecuy ut xenau xcolbal erib chiruheb laj balak'. Xecuy xban nak li Santil Musik'ej cuan eriq'uin ut k'axal nim xcuanquil a'an chiru laj tza li cuan riq'ueñeb laj balak'. ⁵ Li na'leb li cuan riq'ueñeb laj balak', a'an yal re ruchich'och' ut junes chirix a'an neque'atinac. Ut eb li inc'a' neque'xnau xyalal neque'rabi li inc'a' yal li neque'xye ut neque'xpab. ⁶ Abanan lao ralal xc'ajol li Dios. Ut eb li neque'paban re li Dios nocoe'rabi. Ut eb li inc'a' neque'paban re li Dios inc'a' neque'raj kabinquil. Riq'uin a'an nac'utun ani cuan li Santil Musik'ej riq'uin ut ani cuan xmusik' laj balak' riq'uin.

Li Dios aj rahonej

⁷ Ex inherman, chikara kib chi kibil kib xban nak li rahoc riq'uin li Dios nachal. Li ani narahoc, a'an ralal li Dios ut naxbanu li naraj li Dios. ⁸ Ut li inc'a' narahoc maçua' ralal li Dios xban nak li rahoc riq'uin li Dios nachal. ⁹ Li Dios quixc'ut chiku chanru nak nocoxra nak quixtakla chak lix junaj chi Alal sa' ruchich'och' chi camc sa' kac'aba' lao. Li Dios quixtakla chak li Lalal re nak taçuanq kayu'am chi junelic. ¹⁰ Li tz'akal rahoc, a'an a'in: maçua'o lao xorahoc re li Dios. A'an ban quirahoc ke lao xban nak quixtakla chak li Lalal chi camc re xtojbal rix li kamaç. ¹¹ Ex herman, xban nak k'axal nocoxra li Dios, tento ajcui' nak takara kib chi kibil kib lao. ¹² Ma jun quiloc ru li Dios. Abanan cui nakara kib chi kibil kib, li Dios cuan kiq'uin chi junelic. Ut lix rahom li Dios tz'aklojenak ru kiq'uin. ¹³ Nakanau nak cuanco riq'uin li Dios ut li Dios cuan kiq'uin xban nak li Dios quixq'ue ke li Santil Musik'ej. ¹⁴ Lao lix apóstol li Jesucristo. Quikil ru li Jesucristo. Ut nakach'olob xyalal nak li Açuabej Dios quixtakla chak li Lalal chixcolbaleb li cuanqueb sa' ruchich'och'. ¹⁵ Li ani nach'oloban re nak li Jesús, a'an li Lalal li Dios, a'an cuan riq'uin li Dios, ut li Dios cuan riq'uin a'an. ¹⁶ Lao nakapab nak li Dios, a'an aj rahonej ut nakanau nak yal a'an. Li rahoc nachal riq'uin li Dios. Li ani narahoc, a'an cuan riq'uin li Dios ut li Dios cuan riq'uin a'an. ¹⁷ Riq'uin a'in tatz'aklok ru li rahoc kiq'uin lao re nak cauhak kach'ol sa' xcutanquil li

rakba atin. Chanru xna'leb li Kaçua' Jesucristo, jo'canak ajcui' li kana'leb lao nak cuanko arin sa' ruchich'och'. ¹⁸ Maç'a' kaxiu cui nakara li Dios chi tz'akal. Li tz'akal rahoc narisi li xiu. Li ani naxucuac, naxxucua lix tojbal rix lix maç, ut li naxucuac toj maji' natz'akloc ru li rahoc riq'uin. ¹⁹ Lao nakara li Dios xban nak a'an rahoc ke xben cua. ²⁰ Cui junak naxye nak naxra li Dios ut xic' naril lix herman, a'an aj tic'ti'. Li ani inc'a' naxra lix herman li naril ru, ¿chan ta cui' ru nak tixra li Dios li moco naril ta ru? ²¹ A'in li chak'rab quixq'ue ke li Jesucristo: Li ani naxra li Dios, tento ajcui' nak tixra lix herman.

5

Li xcanabanquil li mausilal cuan sa' ruchich'och'

¹ Chixjunileb li neque'paban re nak li Jesús a'an li Cristo, a'aneb li lalal xc'ajol li Dios. Ut cui lao nakara li Acuabej Dios, takaraheb ajcui' li lalal xc'ajol. ² Cui nakara li Dios, nakapab lix chak'rab. Riq'uin a'an nakanau nak nakara li Dios jo' ajcui' eb li lalal xc'ajol. ³ A'an a'in lix rabal li Dios: nak takapab lix chak'rab. Moco ch'a'aj ta xpabanquil lix chak'rab. ⁴ Li yo'lajenak sa' musik'ej riq'uin li Dios cuan xcuauquil re xcuylal xnumsinquil li mausilal li cuan sa' ruchich'och'. Cuan kacuanquil chixnumsinquil xban nak nakapab sa' xc'aba' li Jesucristo. ⁵ ¿Ani li tz'akal cuan xcuauquil re xcuylal xnumsinquil li mausilal li cuan sa' ruchich'och'? Lao li nocopaban re nak li Jesús a'an li Lalal li Dios. Ca'aj cui' lao cuan kacuanquil re xcuylal xnumsinquil li mausilal.

Li naxch'olob xyalal chirix li Dios C'ajolbej

⁶ Li Jesucristo quic'ulun sa' ruchich'och'. Quixc'ul li cubi ha' ut quihoye' ajcui' lix quiq'uel chiru li cruz. Maçua' ca'aj cui' li cubi ha' quixc'ul. Quihoye' aj ban cui' lix quiq'uel. Li Santil Musik'ej naxch'olob xyalal chiku chirix li Cristo. Ut yal chixjunil li naxc'ut chiku li Santil Musik'ej. ⁷ Sa' choxa cuanqueb li oxibeb li neque'ch'oloban lix yalal. A'aneb a'in: li Dios Acuabej, li Dios C'ajolbej ut li Dios Santil Musik'ej. Li oxib a'in junajeb chi ribil. ⁸ Ut oxib li c'a'ru qui-uxman sa' ruchich'och' li naxc'ut chiku lix yalal chirix li Jesucristo. Li xben, a'an nak li Santil Musik'ej naxc'ut chiku lix yalal. Li xcab, a'an li c'a'ru qui-uxman nak li Jesús quixc'ul li cubi ha'. Ut li rox, a'an nak quihoye' lix quiq'uel li Jesús chiru cruz. Eb li oxib a'in juntak'et lix yalaleb. ⁹ Lao nakapab li yal ch'olobanbil xbaneb li cuñk. Abanan li ch'olobanbil xban li Dios k'axal cui'chic nim cuanquil chiru a'an. Ut li Dios quixch'olob xyalal nak li Jesús a'an li Lalal. ¹⁰ Li ani napaban re li Lalal li Dios, a'an naxnau tz'akal lix yalal. A'ut li inc'a' napaban re li Dios, naxq'ue li Dios chok' aj tic'ti' xban nak inc'a' naxpab li xyalal li quixch'olob li Dios nak quixye re li Jesús: Laat li cualal, chan. ¹¹ Ut a'an a'in li naxch'olob xyalal nak li Dios quixq'ue ke li yu'am chi junelic. Ut li yu'am a'in natauman riq'uin li Lalal. ¹² Yalak ani napaban re li Lalal li Dios, a'an cuan xyu'am chi junelic. Ut li ani inc'a' napaban re li Lalal li Dios, maç'a' lix yu'am chi junelic.

Xnauabal nak cuan kayu'am chi junelic

¹³ Xintz'iba a'in chok' ere laex li nequexpaban re li Lalal li Dios re nak laex tenau nak cuan eyu'am chi junelic. ¹⁴ Ut a'in li cau cui' kach'ol chirix li Dios. Nakanau nak li c'a'ak re ru nakatz'ama re, cui nakatz'ama jo' naraj li Dios, a'an nocorabi. ¹⁵ Nakanau nak li Dios nocorabi nak nocotijoc. Riq'uin a'in nakanau nak naxq'ue ke li c'a'ru nakatz'ama chiru. ¹⁶ Cui lao takil junak li kaherman chi maçobc ut naru xcuylal lix maç, chotijok chirix re nak taçuyek' xmaç xban li Dios ut taçuank riq'uin li Dios toj chirix lix camic.

Abanan cuan li maç inc'a' naxcuy li Dios. Maç'a' rajbal li tijoc chirix li ani yo chi banunc re li maç li maç'a' xcuylal. ¹⁷ Yal nak li mausilal, a'an maç. Abanan li Dios naxnau bar cuan li maç naru xcuylal ut bar cuan li inc'a'.

¹⁸ Nakanau nak li ani napaban re li Dios inc'a' chic yok chi maçobc xban nak li Ralal li Dios na-iloc re. Ut laj tza maç'a' chic xcuanquil sa' xben laj pabanel.

¹⁹ Ut nakanau nak lao ralal xc'ajol li Dios. Abanan li jun ch'ol chic li maji' neque'paban re li Dios, eb a'an cuanqueb rubel xcuanquil laj tza. ²⁰ Ut lao nakanau nak li Ralal li Dios quic'ulun sa' ruchich'och'. Quixq'ue kana'leb re xnaubal bar cuan li tz'akal Dios. Ut junajo chic riq'uin li tz'akal Dios xban nak xkapab li Jesucristo li Ralal li Dios. A'an li naq'uehoc ke li yu'am chi junelic.

²¹ Ex inherman, melok'oni chic li jalanil dios yibanbil riq'uin uk'ej. Jo'can taxak.

Li Xcab Hu li Quixtz'iba li San Juan

Laj Juan natz'ibac riq'uin jun li ixk aj pabanel

¹ Lain aj c'amol be chacuu sa' la pabal. At hermana, nintz'ibac acuiq'uin laa' li sic'bil acuu xban li Dios. Ut nintz'ibac ajcui' riq'uin eb la cualal ac'ajol. Yal nak lain nequexinra. Moco ca'aj ta cui' lain ninrahoc ere. Nequexrahe' aj ban cui' xbaneb chixjunileb li neque'xnau li xyalal. ² Nequexkara xban nak junaj li nakapab ut lix yalal a'an tacuanq' kiq'uin chi junelic. ³ A' taxak li rusilal, li ruxtan ut li tuktuquilal li naxq'ue li Dios Acuabej ut li Jesucristo li Alalbej chicanq' eriq'uin sa' xyalal ut riq'uin rahoc. ⁴ C'ajo' nak nasaho' sa' inch'ol chirilbaleb la cualal ac'ajol nak cuanqueb sa' xyalal. Jo'ca'in li kataklanquil xban li Dios Acuabej. ⁵ Ut anakcuan nintz'ama chacuu nak chikarahak taxak kib chi kibil kib. Li chak'rab a'in moco ac' ta. Abanan q'uebil chak ke chalen chak sa' xticlajic li kapabal. ⁶ Cui nakara kib chi kibil kib, nakapab li kachak'rabinquil xban li Dios. Chalen chak sa' xticlajic, li Dios quixye ke nak tento takara kib chi kibil kib.

Eb laj tzolonej aj balak'

⁷ Ninnumsi cui'chic sa' exic li na'leb a'in xban nak nabaleb laj tzolonej aj balak' cuanqueb sa' ruchich'och'. Eb li cujnk a'in inc'a' neque'xch'olob li xyalal nak li Jesucristo quitz'ejcualo' ut tz'akal cujnk nak quic'unun sa' ruchich'och'. Eb li cujnk a'in aj balak'eb ut xic' neque'ril li Jesucristo. ⁸ Cheq'uehak retal cheribil erib re nak inc'a' tacanak chi mac'a' rajbal le c'anjel chiru li Dios. Tz'akalak ban re ru xk'ajcamunquil le c'anjel tec'ul riq'uin li Dios. ⁹ Cui ani junak naxq'ue xtz'akob li quix-ch'olob li Jesucristo, li jun a'an mac'a' li Dios riq'uin. Abanan cui nakapab li c'a'ru quixch'olob li Jesucristo, li Dios Acuabej cuank kiq'uin ut cuank ajcui' kiq'uin li Jesucristo li C'ajolbej. ¹⁰ Cui nacuulac junak eriq'uin ut nequenau nak jalan li yo chixch'olobanquil cheru chiru li quixch'olob li Jesucristo, mec'ul sa' le rochoch chi moco teye re nak li Dios chi-osobtesjnk re. ¹¹ Xban nak li ani naxtz'ama chiru li Dios nak tarosobtesihej laj balak', a'an tatz'akonk riq'uin lix yibal ru lix c'anjeleb.

Xchak'rabinquileb

¹² Cuan raj chic nabal tinye ere, abanan inc'a' nacua'j xtz'ibanquil sa' li hu a'in. Lain nacua'j xic eriq'uin re nak toatinak ut takil xsahil kach'ol chi kibil kib. ¹³ Neque'xtakla xsahil ach'ol eb li ralal xc'ajol la chak'na', li sic'bil ru xban li Dios. Jo'can taxak.

Li Rox Hu li Quixtz'iba li San Juan

Xq'uebal xsahil xch'ol

¹ Nintz'ibac acuiq'uin, at hermano Gayo. Laj aj c'amol be chacuu sa' la pabal. Relic chi yal nak nacatinra. ² At inherman, yoquin chi tijoc chacuix re nak us tat-elk riq'uin chixjunil li c'a'ru tabanu. Ut nintijoc ajcui' chacuix re nak cauhakat. Ninnau nak tic la ch'ol chiru li Dios. ³ C'ajo' nak nasaho' sa' inch'ol nak neque'c'ulun li herman cuiq'uin ut nacuabi resil nak tic ach'ol. Ut ninnau nak yocat chixbanunquil li xyalal. ⁴ A'an a'in li k'axal nasaho' cui' inch'ol nak nacuabi resil nak eb li kaherman cuanqueb sa' xyalal. Eb a'an chanchaneb li cualal inc'ajol xban nak que'paban chicuu.

Laj Gayo chabil quixbanu riq'uin xtenk'anquileb li herman

⁵ At inherman, k'axal lok' li nacabanu nak nacatenk'aheb li herman, usta inc'a' nacanauheb ru. ⁶ Eb a'an que'xch'olob xyalal arin chiruheb li herman chanru nak nacaraheb. Chatenk'aheb chi chabil jo' naraj li Dios nak te'xic chixyebal ratin li Dios sa' jalan na'ajej. ⁷ Eb a'an xe'oc chi xic xban nak te'raj xbanunquil xc'anjel li Jesucristo. Ut inc'a' que'xc'ul xk'ajcamunquileb chiruheb li maji' neque'xpab li Dios. ⁸ Jo'can nak tento takatenk'aheb li cuink a'in xban nak kech aj c'anjeleb chixch'olobanquil li xyalal.

Lix yibal ru xna'leb laj Diótrefes

⁹ Cuan c'a'ru xintz'iba sa' li hu li xintakla riq'uibeb laj pabanel aran. Abanan li herman Diótrefes, a'an naxnimobresi rib ut inc'a' naxc'ul xch'ol li c'a'ru xintz'iba. Naraj taklanc sa' eyank ut inc'a' naxq'ue incuanquil. ¹⁰ Nak tinxic aran toxink'us ut cheru chejunilex tinye li c'a'ru yo chixbanunquil. Yo chixyebal c'a'ak re ru chi atinul chikix. Ut moco nac'ojla ta xch'ol riq'uin a'an. Toj cuan cui'chic c'a'ak re ru inc'a' us naxbanu. Inc'a' naxc'uleb li herman sa' li rochoch ut naxic chixtacchi'inquileb li herman li neque'raj raj xc'ulbal li ula', ut narisiheb sa' xyankeb laj pabanel cui neque'xc'ul li rula'eb.

Chabil resil chirix laj Demetrio.

¹¹ At inherman, matzol acuib riq'uin li inc'a' us. A' ban li us tabanu. Li ani nabanun re li us, a'an ralal xc'ajol li Dios. Ut li ani naxbanu li inc'a' us, toj maji' naxpab li Dios. ¹² Chixjunileb neque'xye nak chabil li herman Demetrio. Ut relic chi yal nak lix yu'am nac'utuc re lix chabilal. Jo'can ajcui' nakaye lao. Ut laa'at nacanau nak li nakaye lao a'an yal.

Xrakbal li hu riq'uin sahil ch'olej

¹³ Cuan raj nabal chic tinye acue, abanan inc'a' nacuj xtz'ibanquil sa' li hu a'in. ¹⁴ Yoquin chixc'oxlanquil nak chi seb takil kib re nak taruk takatina kib. ¹⁵ Chicuan'k taxak li tuktuquil usilal acuiq'uin. Eb li herman arin neque'xtakla xsahil ach'ol. Ut chaq'ue ajcui' xsahil xch'oleb li kech aj pabanelil chi xjunjuncaleb.

Li Hu li Quixtz'iba li San Judas

Laj Judas natz'ibac riq'uineb li bokbileb xban li Dios

¹ Laj Judas, laj c'anjel chiru li Jesucristo. Laj ritz'in laj Jacobo. Nintz'iba li hu a'in reheb laj pabanel, li bokbileb ut raroqeb xban li Dios Acuabej ut colbileb xban li Jesucristo. ² Chec'ulak taxak chi nabal li ruxtan li Dios, jo' ajcui' li tuktuquil usilal ut li rahoc.

Eb laj tzoloneb aj balak'

³ Ex inherman, anchal inch'ol nak yoquin chixc'oxlanquil tz'ibac eriq'uin chirix li kacolbal sa' comonil. Aban xinq'ue retal nak taajman' ru nak tintz'ibak eriq'uin re xtz'amanquil cheru nak teyal ek'e chixcolbal rix le pabal. A'an li junaj chi pabal k'axtesinbil chak ke xban li Dios. ⁴ Nintz'iba li hu a'in xban nak cuanqueb aj balak' que'xch'ic rib sa' eyank chi mukmu. Eb a'an neque'xye nak laj pabanel naru te'xbanu yalak c'a'ru chi mausilal ut xban li rusilal li kaDios, mac'a' te'xc'ul. Neque'xsach xcuanquil li Kacua' Jesucristo, laj echal ke. Eb a'an aj k'etoleb ratin li Dios ut chalen chak junxil cutan ac xakabanbil chak li rakba atin sa' xbeneb. ⁵ Usta ac xch'olobaman cheru, nacua'j cui'chic xjulticanquil ere chanru nak li Kacua' Dios quirisihieb chak lix tenamit aj Israel sa' li na'ajej Egipto. Ut mokon chic quixsacheb li inc'a' que'paban chiru sa' xyankeb laj Israel. ⁶ Ninjultica ajcui' cheru nak cuan li angel que'xtz'ektana lix lok'al q'uebileb re jo' ajcui' lix na'ajeb. Anakuan tz'aptz'oqeb sa' li k'o'jyin xban li Dios ut bac'boqeb riq'uin cadena toj tacuulak xcutanquil li rakba atin. ⁷ Jo'can ajcui' que'xc'ul li tenamit Sodoma ut Gomorra jo'queb ajcui' li tenamit cuanqueb chixc'atk. Juntak'eteb lix na'lebeb riq'uineb li angel li que'mac'ob. Que'muxuc caxar ut que'mac'ob ajcui' riq'uin rech cuinkilal ut riq'uin rech ixkilal. Que'xk'axtesi rib chixbanunquil chixjunil li mausilal. Lix c'atic eb li tenamit a'an, a'an re xc'tubesinquit chiku nak cuan xtojbal rix li mac'. A'an li tac'ulman' mokon sa' li xam li tacuan'k chi junelic. ⁸ Usta nanauman li c'a'ru quixc'ul li tenamit Sodoma ut Gomorra, abanan toj cuanqueb ajcui' aj balak' li neque'xpab li yal yo'obanbil na'leb. Ut neque'xtz'ajni rib riq'uin li mac'. Neque'xtz'ektana lix cuanquil li Kacua' ut neque'xmajecua li cuanqueb xcuanquil ut li cuanqueb xlok'al. ⁹ Ut li angel Miguel, li k'axal nim xlok'al, inc'a' quixq'ue rib chok' aj rakol atin sa' xben laj tza. Nak li angel que'xcuech'i rib riq'uin laj tza chirix lix tz'e'jcu' laj Moisés, li angel inc'a' quixhob chi moco quiraj xrakbal atin sa' xben. Quixye ban re: Li Kacua' Dios chik'usuk acue, chan. ¹⁰ Ut eb laj balak' a'in neque'xmajecua ru li c'a'ak re ru lok', li inc'a' neque'xtau ru. Chanchaneb li xul li mac'a'eb xna'leb. Neque'xsach rib chixbanunquil li c'a'ak re ru chi mausilal. ¹¹ Ra te'xc'ul. Lix na'lebeb a'an jo' lix na'leb laj Caín. Chanchaneb laj Balaam, xban nak neque'xrahi ru li tumin ut junes a'an chic neque'xc'oxla. Neque'xtz'ektana lix chak'rab li Dios ut neque'xnimobresi rib jo' quixbanu laj Coré. Xban a'an nak te'osok'. ¹² Xutanal chok' ere nak cuanqueb laj balak' sa' eyank nak nequebanu le nink'e re sahil ch'olej. Eb laj balak' ca'aj cui' li num cua'ac ut num uc'ac neque'xbanu ut inc'a' neque'xutanac. Junes xch'olaninquireb rib neque'xc'oxla. Eb laj balak' a'an chanchaneb li chok li mac'a' hab chi sa', li nac'ame' yalak bar xban li ik'. Laj balak' mac'a' neque'oc cui'. Chanchaneb li che' li inc'a' neque'uchin, li namich'man chi junaj cua ut nachakic. ¹³ Nak na-el chak xcuokx li palau xban xcacuil rok li ha', nalemeb rib chire li ha' lix tz'ajnil li ha'. Jo'can ajcui'

lix xutaneb laj balak' xban li mausilal li neque'xbanu. Chanchaneb li chahim li yal naxbeni rib yalak bar chiru choxa. Eb li cujnk a'in ac xakabanbibleb chi xic chi junaj cua toj sa' xchamal ut xk'ojyinal li tojba mac. ¹⁴ Laj Enoc, a'an lix cuukil chak chirix laj Adán. Quiatinac chirixeb li cujnk a'in jo' quic'ute' chiru xban li Dios. Laj Enoc quixye: —Abihomak, chan. Tol-elk li Kacua' rochben li q'uila ok'ob chi ángel. ¹⁵ Tachalk chi rakoc atin sa' xbeneb chixjunil ut chixch'olobanquil lix maqueb riq'uin lix yehom xbanuhomeb jo' eb ajcui' riq'uin li xic' aj atin xyehomeb chirix li Kacua', chan laj Enoc. ¹⁶ Eb a'in aj cuech'oneleb. Mac'a' nacuulac chiruheb. Ca'aj cui' li c'a'ru naxrahi ru li tz'ejcualej neque'xbanu. Neque'atinac re xnimbresinquileb ribeb. Neque'xk'unbesi junak riq'uin k'unil atin yal re li c'a'ru neque'raj riq'uin.

Xch'olobanquil xna'leb eb laj pabanel

¹⁷ Ut laex ex inherman, tento nak tacuank sa' ech'ol eb li atin li que'xye chak lix apóstol li Kacua' Jesucristo. ¹⁸ Eb li apóstol que'xye ere nak tanach'ok chak rosó'jiqueb li cutan te'chalk eb laj balak' aj majecuanel. A' li mac li naxrahi ru lix tz'ejcualeb, a'an li neque'xbanu. ¹⁹ Eb li cujnk a'in, a'aneb li neque'yo'oban jachoc ib. Neque'xrahi ru lix mausilal li ruchich'och' ut li Santil Musik'ej mac'a' riq'uineb. ²⁰ A'ut laex, ex inherman, cauhaq taxak ech'ol sa' le santil pabal. Ut chextijok riq'uin xcuanquil li Santil Musik'ej. ²¹ Chenauhak nak nequexra li Dios ut inc'a' chicuibank ech'ol. Cheroybenihak nak tol-elk li Kacua' Jesucristo ut riq'uin lix nimal ruxtan tixq'ue le yu'am chi junelic. ²² Cheq'uehak xna'lebeb li neque'cuiban xch'ol. ²³ Q'uehomak le ch'ol chixcolbal eras eritz'in. Chanchan li yokex chirisinquileb sa' xxamlel li xbalba. Ut li jun ch'ol chic eb laj k'etol atin, cheruxtanahab ru aban tinye ere: cheq'uehak retal. Inc'a' chextz'akonk riq'uineb lix mausilal xban nak numtajeakeb cui'chic lix mausilal. Xic' cheril lix maqueb jo' junak k'el t'icr numtajeak xtz'ajnil ru.

Xnimanquil ru li Dios

²⁴ Ut anakcuan lok'oninbil taxak li nimajcual Dios. A'an k'axal nim xcuanquil checolbal re nak inc'a' texmacobk. Nim ajcui' xcuanquil chek'axtesinquil sa' xanimal xlok'al li Dios chi mac'a'ak emac ut chi sa sa' ech'ol. ²⁵ Lok'oninbil taxak li junaj chi Dios, laj Colol ke sa' xc'aba' li Kacua' Jesucristo. A'an taxak chinimac xcuanquil ut xlok'al chalen chak najter k'e cutan, ut toj chalen anakcuan ut chi junelic. Jo'can taxak.

Li Hu Apocalipsis li Quixtz'iba li San Juan

Li quic'utbesic chiru laj Juan xban li Jesucristo

¹ Li tz'ibanbil sa' li hu a'in quic'utbesic chiru li Jesucristo xban li Dios. Quixc'utbesi chiru li Jesucristo re nak a'an chic tac'utbesinik re chiruheb laj pabanel li c'a'ru tac'ulmank chi seb. Jo'can nak li Jesucristo quixtakla lix ángel chixc'utbesiniquil a'in chiru laj Juan laj c'anjel chiru. ² Ut a'an quixye resil chixjunil li quic'utbesic chiru. A'an a'in li quixye li Dios jo' quic'utbesic chiru laj Juan xban li Jesucristo. ³ Us xak re li ani naril xsa' li hu a'in ut naxq'ue retal li c'a'ru naxye. Us xak re li ani naxbanu li c'a'ru tz'ibanbil chi sa' xban nak relic chi yal nak yo' chi cuulac xk'ehil nak tac'ulmank li c'a'ru naxye.

Laj Juan quixtakla xsahil xch'qleb li cuukub ch'utaleb chi aj pabanel aran Asia

⁴ Lain laj Juan. Yoquin chi tz'ibac eriq'uin laex li cuukub ch'utalex chi aj pabanel li cuanquex aran Asia. A' taxak li usilal ut li tuktuquikal chi cuank eriq'uin li naxq'ue li Dios li ac cuan chak sa' xtclajic, li cuan anakuan, ut li cuank chi junelic, ut li naxq'ue li Santil Musik'ej li cuan cui' lix lok'laj c'ojaribal li Kacua'. ⁵ A' taxak li usilal ut li tuktuquikal chicuank eriq'uin li naxq'ue li Jesucristo li tic xch'ol chixyebal li yal. Li Jesucristo a'an li xben li quicuacli chi yo'yo sa' xyankeb li camenak. A'an li k'axal nim xcuanquil sa' xben chixjunileb li cuanqueb xcuanquil sa' ruchich'och'. A'an quiraohoc ke ut a'an qui-isin re li kamac nak quihoye' lix quiq'uel nak quicam sa' kac'aba'. ⁶ A'an naq'uehoc kacuanquil re toc'anjelak chok' aj tij chiru li Acuabej Dios. Lok'oninbil taxak li Jesucristo. Nimanbilak taxak ru ut a'an taxak chicuank xcuanquil sa' xben chixjunil chi junelic k'e cutan. Jo'can taxak. ⁷ Q'uehomak retal. A'an tachalk chak sa' li chok ut chixjunileb te'ilok re. Te'ril ajcui' eb li que'camsin re. Chixjunileb li cuanqueb sa' ruchich'och' te'yot'ek' xch'ol ut te'yabak xban li raylal li te'xc'ul. Jo'can taxak chic'ulmank. ⁸ Quixye li Kacua' Dios: —Lain quinyo'obtesin re chixjunil ut lain tinsachok re chixjunil. Lain li Alfa ut li Omega. Ut k'axal nim incuanquil, chan li nimajcual Dios.

Nak quic'utbesic li Cristo chiru laj Juan sa' visión

⁹ Lain laj Juan, le rech aj pabanelil. Lain xintz'akon ajcui' riq'uin xcuylal li raylal sa' xc'aba' li Jesucristo erochben laex li sic'bil eru xban li Kacua'. Lain cuanquin arin sa' li na'ajej Patmos li sutsu riq'uin ha' xban nak xinch'olob xyalal li ratin li Dios ut xinye resil li Jesucristo. ¹⁰ Sa' li cutan nak nakach'utub kib chixlok'oniniquil li Kacua', riq'uin xcuanquil li Santil Musik'ej, li Dios quixc'utbesi jun li visión chicu. Quicuabi jun xyab cux chicuix. Chanchan xyab jun li trompeta yo' chi ec'anc. ¹¹ Quixye cue: —Li c'a'ru tinc'utbesi chacu tatz'iba sa' jun li botbil hu ut tatakla riq'uineb li cuukub ch'utaleb laj pabanel li cuanqueb sa' xcuent Asia. Takla riq'uineb li cuanqueb Efeso, Esmirna, ut Pérgamo. Ut tatakla ajcui' riq'uineb li cuanqueb Tiatira, Sardis, Filadelfia ut Laodicea, chan. ¹² Ut nak quin-iloc chicuix chirilbal ani yo' chi atinanc cue, quicuil cuukub li candelero cuan xxamlel yibanbil riq'uin oro. ¹³ Ut sa' xyankeb li candelero xakxo li C'ajolbek li chanchan na-iloc jun cuink nak quicuil. Toj chi rok nacuulac xnimalk re rak'. Cuan jun c'amal sa' yibanbil riq'uin oro chire xch'ol. ¹⁴ Li rismal xjolom sak sak jo' xsakal li nok' lana. Chanchan xsakal li nieve. Ut lix nak' ru nalemtz'un chanchan xam.

¹⁵ Li rok nalemtz'un chanchan li chabil ch'ich' bronce ut cakjorin chanchan li k'an ch'ich' nak cuan sa' xam. Nak naatinac chanchan xyab lix cau ok li palau. ¹⁶ Sa' lix nim uk' chapcho cuukub li chahim. Ut sa' re cuan jun li ch'ich' ca' pac'al xk'esnal. C'ajo' nalemtz'un li ru. Chanchan nak nalemtz'un li sak'e. ¹⁷ Nak quicuul ru quint'ane' chi rok. Chanchan camenak quincana. Ut a'an quixq'ue lix nim uk' sa' inben ut quixye cue: —Matxucuac. Lain li ac cuanquin chak sa' xticlajic li ruchich'och' ut cuankin chi junelic k'e cutan. ¹⁸ Lain yo'yoquin. Lain quincam, abanan yo'yoquin chic chi junelic k'ben cutan. Lain cuan incuanquil sa' xben li camc. Ut lain ajcui' yal cue sa' xben li na'ajej li neque'xic cui' li camenak. ¹⁹ Tz'iba retalil li c'a'ru yocat chirilbal xban nak a'an retalil li yo' chi c'ulmanc anakcuan ut li tac'ulmank mokon. ²⁰ Lix yalal li cuukub chi chahim li xacuul sa' lin nim uk', a'an li retalileb li cuukub lix takl li Dios li neque'iloc reheb li cuukub ch'utal chi aj pabanel. Ut lix yalal li cuukub chi candelero, a'an retalileb li cuukub ch'utal chi aj pabanel.

2

A'in li esilal li quixtakla riq'uineb laj pabanel li cuanqueb Efeso

¹ Tz'iban riq'uin lix takl li Dios li na-iloc reheb li jun ch'utal chi aj pabanel li cuanqueb Efeso ut taye re chi jo'ca'in: —Li cuan cuukub chi chahim sa' xnim uk', li yo' chi bec sa' xyankeb li cuukub chi candelero yo' chixyebal ere chi jo'ca'in. ² Lain ninnau chixjunil li nequebanu. Ninnau nak cau nequexc'anjelac ut ninnau ajcui' nak inc'a' nach'inan ech'ol. Ninnau nak xic' nequeril li neque'xbanu mausilal. Xeq'ue retal li ani xe'xq'ue ribeb chok' apóstol ut macua'eb. Ut xenau nak aj balak'eb ut aj tic'ti'eb. ³ Ninnau nak nabal li raylal xec'ul sa' inc'aba' lain. Abanan nequecuy xnumsinquil. Ut inc'a' xch'inan ech'ol. Ninnau nak cau nequexc'anjelac yal xban inrabal lain. ⁴ Abanan cuan jun epaltil chicuu. Læx inc'a' chic niquinera jo' nak xinera chak junxil. ⁵ Cheq'uehak retal c'a'ru xexpalto' cui'. Chijulticok' ere chanru nak xinera chak junxil. Yot'omak ech'ol ut jalomak ec'a'ux ut chinerahak cui'chic jo' nak xinera chak junxil. Cui inc'a' tayot'ek' ech'ol ut tejal ec'a'ux, lain tincuisi le candelero sa' xna'aj chi junpat. ⁶ Abanan cuan jun li us nequebanu. Læx xic' nequeril li mausilal li neque'xbanu li neque'taken re li cuink laj Nicolás. Jo'can ajcui' lain. Xic' nacuil li mausilal li neque'xbanu eb a'an. ⁷ Cui teraj xtaubal ru li xyalal, cheq'uehak retal li naxye li Santil Musik'ej reheb laj pabanel. Li ani tixcuy xnumsinquil chixjunil li raylal a'in ut inc'a' nach'inan xch'ol sa' lix pabal, lain ting'ue lix yu'am chi junelic. Ut a'an tacuanq riq'uin li Dios chi junelic sa' lix santil na'aj, chan li C'ajolbej reheb laj Efeso.

Li esilal li quixtakla riq'uineb laj pabanel li cuanqueb Esmirna

⁸ Ut quixye cui'chic cue: —Tz'iban riq'uin lix takl li Dios, li na-iloc reheb li jun ch'utal chi aj pabanel li cuanqueb Esmirna. Ut taye re: Li ac cuan chak sa' xticlajic ut cuank ajcui' toj sa' roso'jic, li quicam ut quicuacui cui'chic chi yo'yo sa' xyankeb li camenak, naxye ere chi jo'ca'in: ⁹ Lain ninnau chanru cuanquex. Ninnau chixjunil li raylal nequec'ul. Ninnau nak neba'ex. Abanan cuan ebiomal riq'uin li Dios. Ninnau nak nequexmajecuac xbaneb li neque'xye nak tz'akaleb aj judio, abanan inc'a' neque'c'anjelac chiru li Dios. Aj c'anjeleb ban chiru laj tza. ¹⁰ Mexxucuac xban li raylal li tachalk sa' eben. Cuanqueb sa' eyank li te'q'uehek' sa' tz'alam xbaneb laj c'anjel chiru laj tza re xyalbal rix le pabal. Tec'ul raylal, abanan inc'a' najt tec'ul. Mich'inan ech'ol. Cauhak ban ech'ol toj chirix le camic ut lain ting'ue ere le k'ajcamunquil.

Chanchan nak ting'ue le corona nak ting'ue le yu'am chi junelic. ¹¹ Cui teraj xtaubal ru li xyalal, cheq'uehak retal li naxye li Santil Musik'ej reheb laj pabanel. Li ani tixcuy xnumsinquil chixjunil li raylal a'in ut inc'a' nach'inan xch'ol sa' lix pabal, li jun a'an inc'a' tixc'ul lix cab xcamic. Inc'a' taxic sa' xbalba, chan li C'ajolbej reheb laj Esmirna.

Li esilal li quixtakla riq'uineb laj pabanel li cuanqueb Pérgamo

¹² Ut quixye cui'chic cue: —Tz'iban riq'uin lix takl li Dios li na-iloc reheb laj pabanel li cuanqueb Pérgamo ut taye re: Li cuan xch'ich' ca' pac'al xk'esnal naxye ere chi jo'ca'in: ¹³ Lain ninnau chanru nak cuanquex. Lain ninnau nak cuan xcuanquil laj tza sa' li tenamit li cuanquex cui'. Abanan laex toj yoquex chinlok'oninuil. Inc'a' xecanab inpabanquil usta quicamsic laj Antipas xban nak quixye cuesilal aran sa' le tenamit li cuan rubel xcuanquil laj tza. ¹⁴ Abanan cuan c'a'ak re ru yoquex chixbanunquil inc'a' us xban nak cuanqueb sa' eyank li toj yoqueb chixq'uebal xcuanquil lix tijleb laj Balaam li quic'utuc chiru laj Balac chanru nak tixq'ueheb chi macobc laj Israel. Quixye reheb nak taruk te'xtzaca li tzacaemk li mayejanbil chiru li jalanil dios. Ut quixtacchi'ihob re nak te'yumbetak ut te'co'betak. ¹⁵ Ut cuanqueb ajcui' sa' eyank li toj neque'xq'ue xcuanquil lix tijleb laj Nicolás. Lain xic' nacuil li mausilal li neque'xbanu eb a'an. ¹⁶ Jo'can nak isihomakeb sa' eyank li inc'a' useb xna'leb. Cui' inc'a' nequerisiheb, lain tinxic chi junpat eriq'uin ut tinpletik riq'uineb. Chanchan nak tincamsiheb riq'uin k'esnal ch'ich' nak tinsach ruheb riq'uin li cuatin. ¹⁷ Cui teraj xtaubal ru li xyalal, cheq'uehak retal li naxye li Santil Musik'ej reheb laj pabanel. Li ani tixcuy xnumsinquil chixjunil li raylal a'in ut inc'a' nach'inan xch'ol sa' lix pabal, lain ting'ue li choxahil cua li inc'a' na-ilman ru chixtzaca. Ut ting'ue ajcui' jun li saki pec re ut tz'ibanbilak chiru jun li ac' c'aba'ej. Ma' ani tana'ok re li c'aba'ej. Ca'aj cui' li ani li tac'uluk re, chan li C'ajolbej reheb laj Pérgamo.

Li esilal li quixtakla riq'uineb laj pabanel li cuanqueb Tiatira

¹⁸ Ut quixye ajcui' cue: —Tz'iban riq'uin lix takl li Dios li na-iloc reheb li jun ch'utal chi aj pabanel li cuanqueb Tiatira ut taye re: Li C'ajolbej, li nalemtz'un xnak' ru chanchan xam ut li rok chanchan li chabil ch'ich' bronze li nalemtz'un, naxye ere chi jo'ca'in: ¹⁹ Lain ninnau chanru nak cuanquex. Ninnau nak nequexrahoc ut nequexpaban. Ninnau nak cau nequexc'anjelac chicuu ut nabal li raylal nequeucuy. Lain ninnau nak a'axal cui'chic cau yoquex chi c'anjelac chiru li xbanu junxil. ²⁰ Abanan inc'a' nacuilac chicuu nak nequec'am erib sa' usilal riq'uin li ixk li yibru xna'leb li chanchan lix na'leb lix Jezabel. Li ixk a'an naxq'ue rib chok' xprofeta li Dios, abanan moco yal ta. Yo ban chixbalak'inquileb laj c'anjel chicuu. Ri'uin li naxbanu yo chixc'ambaleb xbe chi yumbetak ut chi co'betak. Ut yo ajcui' chixc'ambaleb xbe chixtzacanquil li tzacaemk mayejanbil chiru li jalanil Dios. ²¹ Lain xcua'j raj nak tixyot' xch'ol ut tixjal xc'a'ux ut xcuo'ybeni re tixbanu. Abanan inc'a' naraj xcanabanquil li mausilal. ²² A'ut anakuan lain ting'ue junak yajel sa' xben re nak tat'ane'k' sa' ch'at. Ut eb li neque'xbanu mausilal riq'uin te'xc'ul ajcui' li raylal cui' inc'a' neque'yot'e' xch'ol ut cui' inc'a' neque'xcanab xbanunquil li mausilal li naxbanu a'an. ²³ Ut tink'axtesiheb chi camc li neque'taken re. Ut riq'uin a'in te'xq'ue retal chixjunileb laj pabanel nak lain ninnau c'a'ru nanume' sa' xch'oleb li junjunk. Lain ninnau c'a'ru nequec'oxla. Ut lain ting'ue ek'ajcamunquil chejunkal a' yal chanru le yehom ebanuhom. ²⁴ Mac'a' tinya ere re ek'usbal laex aj Tiatira li jo' q'uailex inc'a' xetzol erib riq'uin li tijleb li neque'xch'olob eb a'an, xban nak a'an xmaus aj na'leb laj tza. ²⁵ Ca'aj cui' tinya ere

a'in: Cacuubresihomak ech'ol sa' le pabal toj tacuulak xk'ehil nak tincuulak eriq'uin. ²⁶ Li ani naxcuy xnumsinquil chixjunil li raylal a'in ut inc'a' nach'inan xch'ol sa' lix pabal ut tixbanu li c'a'ru nacuaj toj sa' roso'jic, lain ting'ue xcuanquil chi taklanc sa' xbeneb li tenamit. ²⁷ Eb a'an te'taklanc sa' xbeneb li tenamit chi cau. Chanchan nak te'xtaklaheb rig'uin jun li xuk' ch'ich'. Ut tashachek' xcuanquileb li te'taklanc cui'. Chanchan nak najore' junak ch'och' uc'al. Lain ting'ue lix cuanquileb jo' li cuanquil li quixq'ue cue lin Yucua'. ²⁸ Ut lain ting'ue ajcui' reheb lix lok'aleb, chanchan xch'ina'usal li cak chahim. ²⁹ Cui teraj xtaubal ru li xyalal, cheq'uehak retal li naxye li Santil Musik'ej reheb laj pabanel, chan li C'ajolbej reheb laj pabanel li cuanqueb Tiatira.

3

Li esial li quixtakla riq'uibeb laj pabanel li cuanqueb Sardis

¹ Ut li C'ajolbej quixye cui'chic cue: –Tz'iban riq'uin lix takl li Dios li na-iloc reheb li jun ch'utal chi aj pabanel li cuanqueb Sardis ut taye re: Li cuan li Santil Musik'ej riq'uin ut li cuan li cuukub chi chahim sa' ruk' naxye ere chi jo'ca'in: Lain ninnau chanru nak cuanquex. Eb li tenamit neque'xye nak laex tz'akal aj pabanelex. Abanan moco yal ta. Lain ninnau nak inc'a' nequexpaban chi tz'akal. Chanchan camenakex. ² Q'uehomak retal chanru nak cuanquex. Laex inc'a' tz'akal re ru le yu'am chiru li Kacua' Dios. Jo'can nak q'uehomak ech'ol chi pabanc chi tz'akal ut mich'inan chic ech'ol. ³ Chijulticok' ere li xyalal li querabi chak junxil. Chiyot'ek' ech'ol ut jalomak ec'a'ux. Cacuubresihomak ech'ol sa' le pabal. Cui inc'a' tebanu a'an, lain tincuulak eriq'uin chi mac'a' sa' ech'ol jo' naxbanu laj elk' ut tinrakok atin sa' eben. ⁴ Lain ninnau nak aran Sardis toj cuanqueb cuib oxib sa' eyank li tic xch'oleb. Inc'a' xe'xtz'ajni ribeb riq'uin xbanunquil li mausalil. Lain tinye reheb nak xc'ulubeb cuanc cui'uin chi tiktoqueb riq'uin saki ak'ej xban nak tic xch'oleb. ⁵ Li ani tixcuy xnumsinquil chixjunil li raylal a'in ut inc'a' nach'inan xch'ol sa' lix pabal, a'an tatikibak riq'uin saki ak'ej. Ut lain inc'a' tinsach lix c'aba' sa' li hu tz'ibanbil cui' xc'aba'eb li cuanqueb xyu'am chi junelic. Ut chiru lin Yucua' ut chiruheb ajcui' lix angel, lain tinye nak a'an cualal inc'ajol. ⁶ Cui teraj xtaubal ru lix yalal, cheq'uehak retal li naxye li Santil Musik'ej reheb laj pabanel. Jo'ca'in quixye li C'ajolbej reheb laj pabanel li cuanqueb Sardis.

Li esial li quixtakla riq'uibeb laj pabanel li cuanqueb Filadelfia

⁷ Ut li C'ajolbej quixye cui'chic cue: –Tz'iban riq'uin lix takl li Dios li na-iloc reheb li jun ch'utal chi aj pabanel li cuanqueb Filadelfia, ut taye re: Li tic xch'ol ut li tz'akal Dios, a'an cuan xcuanquileb jo' li cuanquil li quiq'uehe' re laj David junxil. Li oquebal li tixte a'an, ma' ani naru tatz'apok re; ut li oquebal li tixtz'ap a'an, ma' ani naru tatehok re. ⁸ A'an yo' chixyebal ere chi jo'ca'in: Lain ninnau chanru nak cuanquex. Lain xinte li oquebal cheru ut ma' ani naru tatz'apok re. Ninnau nak inc'a' cau erib. Abanan inc'a' xinetz'ektana. Junelic ban nequebanu li c'a'ru ninye. ⁹ Cuanqueb li neque'xbanu li c'a'ru naraj laj tza. Neque'xye nak tz'akaleb aj judio, abanan inc'a' neque'canjelac chiru li Dios. Yal tic'ti' neque'xye. Lain tincanabeb toj retal te'xcuik'ib ribeb cheru re nak te'xq'ue retal nak lain ninrahoc ere. ¹⁰ Laex xecuy xbanunquil li xinye ere ut inc'a' xch'inan ech'ol sa' le pabal. Jo'can nak lain tincolok ere sa' xk'ehil nak tachalk li raylal sa' xbeneb chixjunileb li cuanqueb sa' ruchich'och'. ¹¹ Lain chi seb tinchalk. Tincuulak eriq'uin. Jo'can nak cau hak taxak ech'ol sa' le pabal ut mecanab inpabanquil

re nak təc'ul lə k'ajcamunquill li ting'ue ut re ajcui' nak inc'a' taq'uehek' re jalan. ¹² Li ani tixcuy xnumsinquill li raylal ut inc'a' tach'inank xch'ol sa' lix pabal, ting'ue xlok'al ut ma ani taruk taisink re sa' lix na'aj li taq'uehek' re xban lin Yucua'. Chanchanak li okech li nacutun re lix templo li Dios, li inc'a' na-ec'an sa' xna'aj. A'an taçuank riq'uin lin Yucua' chi junelic sa' li Ac' Jerusalén li tixq'ue lin Yucua' cuan sa' choxa. Ac' chic lix c'aba' ting'ue. Ut chixjunileb te'xnau nak a'an ralal xc'ajol lin Yucua'. Ut ting'ue ajcui' re lin c'aba' lain. ¹³ Cui teraj xtaubal ru li xyalal, cherabihak li naxye li Santil Musik'ej reheb laj pabanel. Jo'ca'in quixye li C'ajolbej reheb laj pabanel li cuanqueb Filadelfia.

Li esilal li quixtakla riq'uineb laj pabanel li cuanqueb Laodicea

¹⁴ Ut li C'ajolbej quixye cui'chic cue: –Tz'iban riq'uin lix takl li Dios li naloic reheb li jun ch'utal chi aj pabanel li cuanqueb Laodicea ut taye re: Li ani naxc'aba'in “Amén”, li junelic tic xch'ol chixyebal li yal, li ac cuan chak nak quiyibac chak li ruchich'och' ut chixjunil li c'a'ak re ru cuan, naxye ere chi jo'ca'in: ¹⁵ Lain ninnau chanru nak cuanqueb. Laex inc'a' yoquex chinpabanquill chi anchal ech'ol, chi moco yoquex chintz'ektanquill. Us raj nak tinepab chi anchal ech'ol malaj ut tinetz'ektana raj chi junaj cua. Abanan laex chanchanex li ha' moco tik ta, chi moco que. Yal lulu ban. ¹⁶ Xban nak xcab rix ech'ol nak yoquex chinpabanquill, lain texintz'ektana. Chanchan texinx'a'cua nak texintz'ektana. ¹⁷ Laex nequeye nak biomex ut cuan chixjunil li c'a'ru ere. Mac'a' napalto' ke chanqueb. Abanan inc'a' nequeq'ue retal nak k'axal ra cuanqueb. Chanchan neba'ex ut mutz'ex. Chanchan t'ust'uquex xban nak inc'a' niquinepab. K'axal tok'obal eru. ¹⁸ Jo'can nak ninye ere: Lok'omak e-oro cuiq'uin li ac numsinbil sa' xam ut isinbil xtz'ajnil. Lok'omak lə saki t'icr cuiq'uin re tetikib erib ut inc'a' təc'ut exutaj nak t'ust'uquex. Lok'omak xbanol li xnak' eru cuiq'uin re nak tex-iloc. ¹⁹ Li ani nequebinra, nintijeb ut nink'useb. Jo'can nak ninye ere nak jalomak ec'a'ux ut q'uehomak ech'ol chinpabanquill. ²⁰ Chanchan nak cuanquin chire li oquebal nak yoquin chebokbal. Li ani taabink re li cuatin ut tinixpab, lain tincuank riq'uin ut tocuank chi sum atin. ²¹ Li ani tixcuy xnumsinquill li raylal ut inc'a' tach'inank xch'ol, lain ting'ue chi c'ojlaj chinc'atk sa' lin c'ojaribal jo' nak c'ojc'oquin chixc'atk lin Yucua' sa' lix c'ojaribal xban nak xincuy xnumsinquill li raylal. ²² Cui teraj xtaubal ru li xyalal, cheq'uehak retal li naxye li Santil Musik'ej reheb laj pabanel, chan li C'ajolbej reheb laj pabanel li cuanqueb Laodicea.

4

Lix lok'laj c'ojaribal li Dios cuan sa' choxa

¹ Ut chirix a'an quicuill jun chic li visión. Quicuill jun li oquebal teto sa' choxa. Ut quicuabi cui'chic li xyab li cux li quicuabi xben cua, chanchan xyab jun li trompeta nak yo chi atinac, ut quixye cue: –Taken chak arin ut tinc'utbesi chacuu li c'a'ak re ru tac'ulmank mokon, chan. ² Ut sa' li visión li quixc'utbesi chicuu li Dios riq'uin xcuanquill li Santil Musik'ej, quicuill sa' choxa jun li lok'laj c'ojaribal. Ut quicuill nak cuan jun c'ojc'o sa' li c'ojaribal a'an. ³ Ut li ani chunchu sa' li c'ojaribal, c'ajo' lix lok'al. Li rilobal chanchan li chabil pec jasje malaj ut chanchan li chabil pec cornalina li nalemtz'un. Ut lix c'ojaribal sutsu riq'uin jun li xoquik'ab chanchan li chabil pec esmeralda nak quicuill. ⁴ Ut chi xjun sutam li lok'laj c'ojaribal cuanqueb cahib xca'c'al chic li c'ojaribal. Ut aran c'ojc'oqueb li cahib xca'c'al li que'c'amoc chak be chiruheb laj pabanel. Sak li rak'eb ut cuanqueb xcorona oro sa' xjolomeb.

⁵ Ut sa' li lok'laj c'ojaribał nareploc li chanchan rak' cak ut lix yab li chokinc chanchan nak namok li cak. Chiru cuan cuukub li lámpara lochlo retalil li Santil Musik'ej. ⁶ Ut quicuil ajcui' jun chanchan nebal cuan chiru li c'ojaribał. Nalemtz'un jo' li lem ut chanchan jun li palau sak sak ru. Chi xjun sutam li c'ojaribał cuanqueb cahib li yo'yoqueb, chanchaneb ángel. Nabal li xnak' ruheb, jo' chiru jo' chirixeb. ⁷ Li xben li chanchan ángel, a'an chanchan n-iloc jun li cakcoj; li xcab, a'an chanchan na-iloc jun li cuacax; li rox, a'an cuan xnak' ru chanchan ru jun cuink; ut li xca, a'an chanchan jun li nimla c'uch yo chi xic'anc. ⁸ Cuan cuakitk xiq'ueb li junjunk. Nabal li xnak'eb ru cuan xca' pac'alil. Chi k'ek chi cutan yoqueb chixyebal: —Santo, santo, santo. Lok'oninbil taxak ru li Kaçua' Dios li k'axal nim xcuanquil, li ac cuan ajcui' chak sa' xticiajic, li cuan anakcuan ut li cuank chi junelic. ⁹ Rajlal neque'xq'ue xlok'al ut neque'xnima ru ut neque'xbantioxi chiru li nimajcual Dios, li yo'yo chi junelic k'e cutan, li c'ojc'o sa' lix lok'laj c'ojaribał. ¹⁰ Eb li chanchaneb ángel yoqueb chi lok'oninc, ut li cahib xca'c'al chi aj c'amol be neque'xcuik'ib ribeb chiru li Kaçua' Dios, li c'ojc'o sa' lix c'ojaribał ut que'xlok'oni xban nak yo'yo chi junelic k'e cutan ut que'xq'ue lix corona chiru lix c'ojaribał re xq'uebal xlok'al. ¹¹ Ut que'xye re: At Kaçua', at kaDios, ac'ulub nak takaq'ue alok'al. Ac'ulub nak tanimak acuu ut taq'uehek' acuanquil xban nak laať catyiban re chixjunil li c'a'ru cuan. Xban nak jo'can xacuať laať, jo'can nak xayo'obtesiheb li c'a'ru cuanqueb.

5

Li botbil hu ut li carner

¹ Ut sa' lix nim uk' li Dios li c'ojc'o sa' li lok'laj c'ojaribał quicuil jun li botbil hu tz'ibanbil chi sa' ut chirix ut tz'apbil rig'uin cuukub li sello. ² Ut quicuil jun li ángel k'axal cau rib ut chi cau xyab xcux quixye: —¿Ani li xc'ulub risinquil li sello ut xtebal li hu? chan. ³ Xban nak moco xc'ulubeb ta, ma jun reheb sa' choxa, chi moco sa' ruchich'och', chi moco sa' xna'ajeb li camenak quiru xtebal li hu chi moco rilbal xsa' li hu. ⁴ Ut c'ajo' nak quinyabac chirilbal nak ma jun reheb xc'ulubeb xtebal li hu chi moco xc'ulubeb rilbal xsa'. ⁵ Ut jun reheb li chunchuqueb sa' li cahib xca'c'al chi c'ojaribał quixye cue: —Matyabac xban nak cuan jun taruk tixte li hu a'in. Cuan jun aj Judá chanchan li cakcoj. A'an xcomoneb li ralal xc'ajol li rey David. A'an xc'ulub risinquil li cuukub chi sello ut xc'ulub xtebal li hu xban nak a'an quixcuy xnunsinuil li ra xic', chan. ⁶ Quicuil jun xakxo aran chiru li lok'laj c'ojaribał li sutsu xbaneb li cahib li chanchaneb ángel jo'queb ajcui' li cahib xca'c'al li c'ojc'oqueb aran. Quic'utun nak li jun a'an ac camsinbil. Chanchan carner. Cuan cuukub xxucub ut cuan ajcui' cuukub xnak' ru retalil li Santil Musik'ej li quitaklac sa' chixjunil li ruchich'och'. ⁷ Li Jun li chanchan carner quichal ut quixchap li botbil hu li cuan sa' xnim uk' li c'ojc'o sa' li lok'laj c'ojaribał. ⁸ Nak quixchap li botbil hu, li cahib li chanchaneb ángel ut li cahib xca'c'al li c'ojc'oqueb aran que'xcuik'ib ribeb chiru li Jun li chanchan carner. Cuanqueb x-arpa chi xjunkaleb ut cuanqueb xsec' yibanbil rig'uin oro ut cuan li sununquil ban chi sa' retalil lix tijeb li ralal xc'ajol li Dios. ⁹ Que'xbicha jun li ac' bich ut que'xye: —Ac'ulub xchapbal li botbil hu ut xtebal li sello xban nak laať catcamsic. Rig'uin la quiq'uel xalok'eb nabal re nak te'oc chok' ralal xc'ajol li Dios. Yalak ani xacoleb a' yal ani xtepeleb xxe'tonil yucua'eb, ut a' yal bar xtenamiteb ut a' yal chanru li ratinobaleb. ¹⁰ Xaq'ueheb xcuanquil chi c'anjelac chiru li kaDios jo' aj tij, ut taq'ueheb ajcui' chi taklanc sa' ruchich'och'. — ¹¹ Ut sa' li visiön quicuileb li

q'uila ok'ob chi ángel li cuanqueb chi xjun sutam li lok'laj c'ojaribal ut li cahib li yo'yoqueb li chanchaneb ángel jo'queb ajcui' li cahib xca'c'al li c'ojc'oqueb aran. Quicuabi nak yoqueb chi atinac li q'uila ok'ob chi ángel. ¹² Que'xye chi cau xyab xcux: —Li Jun li chanchan carner li quicamsic, a'an xc'ulub nak taq'uehek' xlok'al xban nak numtajanac xcuanguil, xbiomal, xna'leb, ut xcacuilal. Ut xc'ulub nak taq'uehek' xlok'al, tanimak ru ut talok'onik.— ¹³ Ut quicuabi ajcui' nak que'atinac chixjunil li c'a'ak re ru quiy'o'obtesic xban li Dios, jo' li cuanqueb sa' choxa, jo' li cuanqueb sa' ruchich'och', jo' ajcui' li cuanqueb sa' li palau, jo'queb ajcui' li cuanqueb sa' xna'ajeb li camenak. Chixjunileb li que'yo'obtesic xban li Dios que'xye: —A' taxak li Dios li c'ojc'o sa' xc'ojaribal jo' ajcui' li Jun li chanchan carner, chilok'onik ut chiq'uehek' xlok'al. Chiq'uehek' xcuanguil ut chinimak ru chi junelic k'e cutan.— ¹⁴ Ut li cahib li yo'yoqueb li chanchaneb ángel, yoqueb chixyebal: —Jo'can taxak.— Ut eb li cahib xca'c'al li c'ojc'oqueb aran que'xcuik'ib ribeb ut que'xlok'oni li yo'yo chi junelic k'e cutan.

6

Li cuukub chi sello

¹ Ut quicuail nak li Jun li chanchan carner quixte li xben sello. Ut quicuabi nak quiatnac jun reheb li cahib li chanchaneb ángel, li yo'yoqueb. Chanchan nak na-ec'an li cak nak quiatnac chi cau xyab xcux. Quixye: —¡Quim! Cholaçuil a'in, chan. ² Quicuail nak cuan jun li cacuay sak rix. Ut cuan jun li yo'chi xic chirix cuan xtzimaj sa' ruk'. Ut quiq'uehe' jun lix corona ut co' cui'chic chi numtac sa' xbeneb li cuanqueb sa' ruchich'och'. ³ Ut li Jun li chanchan carner quixte jun chic li sello ut quicuabi li xcab li chanchan ángel nak quixye: —¡Quim! ¡Cholaçuil a'in! chan. ⁴ Ut qui-el chak jun chic li cacuay cak rix. Ut li jun li cuan chirix quiq'uehe' jun li nimla ch'ich' re ut quiq'uehe' xcuanguil re tarisi li tuktuquil usilal sa' ruchich'och' re nak eb li cujnk te'xcamsi ribeb chi ribileb rib. ⁵ Ut nak li Jun li chanchan carner quixte li rox sello, quicuabi li rox li chanchan ángel yo' chixyebal: —¡Quim! Cholaçuil a'in, chan. Ut quicuail jun li cacuay k'ek rix. Ut li jun li cuan chirix cuan jun li bisleb sa' ruk'. ⁶ Ut quicuabi jun xyab cuy quiatnac sa' xyankeb li cahib li chanchaneb ángel ut quixye: —Naru xlok'bal cuib libra li trigo chiru li tojleb li re jun cutan ut naru xlok'bal cuakib libra li cebada chiru li tojleb li re jun cutan. Abanan meterk'usi xtz'ak li aceite ut li vino, chan. ⁷ Ut li Jun li chanchan carner quixte li xca' sello ut quicuabi nak li xca' li chanchan ángel quixye: —¡Quim! Cholaçuil a'in, chan. ⁸ Quicuail jun li cacuay k'an rix. Ut li cuan chirix li cacuay, a'an Camc xc'aba'. Ut li yo'chi takenc re, a'an Xna'aj Camenak xc'aba' xban nak a'an li tac'uluk reheb li te'camk. Li cuan chirix li cacuay quiq'uehe' xcuanguil chixcamsinquil nabaleb sa' ruchich'och'. Jun jachal sa' xyankeb li cahib jachal (1'4) chi cristian li cuanqueb sa' ruchich'och' te'camk. Cuan te'camsik riq'uin ch'ich'. Cuan te'camk xban cue'ej. Cuan te'camk xban yajel ut cuan ajcui' li te'camsik xban li josk' aj xul. ⁹ Nak li Jun li chanchan carner quixte li ro' sello, quicuail nak cuanqueb rubel li artal li que'camsic xban nak que'paban ut xban nak que'xch'olob xyalal li ratin li Dios. ¹⁰ Ut que'xye chi cau xyab xcux: —At nimajcual Dios, laat Santo ut laat tic ach'ol. ¿Jok'e tatrakok atin sa' xbeneb li tenamit xban li raylal xe'xbanu ke? Ut, ¿jok'e taq'ue rekaj reheb nak xoe'xcamsi? chanqueb. ¹¹ Que'q'uehe' xsaki ak'eb. Ut que'yeh'e reheb nak te'hilank ut te'roybeni jarubak cutan chic toj tatz'aklok xq'uialeb li rech aj c'anjelil li toj te'camsik jo' nak que'camsic eb a'an. ¹² Ut quicuail nak li Jun li

chanchan carner quixte li xcuak sello ut quicuan jun li nimla hij. Li sak'e quik'ojyino' ru. Chanchan li k'eki t'icr li neque'rocsi li raheb sa' xch'ol. Ut li po quicako' jo' li quic'. ¹³ Ut eb li चाहिम quilaje't'ane' chak chi ch'och' jo' nak nahire' ru li higo xban li cacuil ik' nak toj maji' nak'ano'. ¹⁴ Ut quisach li choxa nak quicuil. Chanchan jun li hu nak quixboti rib. Chixjunil li tzul jo' ajcui' li ch'och' li sutsu sa' ha' quilaje'ec'an sa' xna'ajeb. ¹⁵ Ut chixjunileb quilaje'xmuk ribeb xbaneb xxiu. Que'xmuk ribeb li rey ut eb li cuanqueb xcuanguil, jo'queb ajcui' li neque'taklan sa' xbeneb li soldado. Que'xmuk ribeb li biom jo'queb ajcui' li cauheb rib, jo'queb ajcui' li lok'bil mos jo' ajcui' li mac'a'eb xpatrón. Que'xmuk ribeb sa' li ochoch pec ut sa' xyankeb li ninki pec li cuanqueb sa' tzul. ¹⁶ Ut que'xye reheb li tzul ut reheb ajcui' li pec: -T'anekech chak sa' kabén ut choemuk taxak chiru li c'ojc'o sa' lix lok'laj c'ojaribal. Choemuk chiru li Jun li chanchan carner, li yo' xjosk'il sa' kabén. ¹⁷ Xcuulac xk'ehil li rakba atin sa' kabén. ¿Ani ta cui' taruk tixcol rib chiru a'an? chanqueb.

7

Li cahib xcuakxakc'al mil (144,000) laj Israel li q'uebileb retalil xban li Dios

¹ Ut chirix chixjunil a'in quicuil cahib li ángel xakxoqueb sa' xca pac'alil li ruchich'och' li nachal cui' li ik'. Yoqueb chixk'usbal li ik' re nak inc'a' tanumek' chi cau sa' xben li ruchich'och' jo' ajcui' sa' xben li palau ut sa' xbeneb li che'. ² Ut quicuil jun chic li ángel yo' chak chi chalc na-el cui' chak li sak'e. Cuan chak lix sello li yo'yoquil Dios riq'uin. Ut quiatinac chi cau xyab cxux riq'uibeb li cahib chi ángel li ac q'uebileb xcuanguil re xbanunquil raylal reheb li cuanqueb sa' ruchich'och', jo'queb ajcui' li cuanqueb sa' li palau. ³ Quixye reheb: -Mebanu raylal reheb li cuanqueb sa' ruchich'och' chi moco reheb li cuanqueb sa' li palau chi moco reheb li che'. Toj takaq'ue retalileb sa' xpequemeb riq'uin li sello eb laj c'anjel chiru li Dios. ⁴ Ut quicuabi lix q'uialeb li que'q'uehe' retalileb sa' xpequemeb riq'uin li sello, a'an cahib xcuakxakc'al mil (144,000) chi cristian. A'aneb li quiq'uehe' retalileb sa' xpequemeb sa' xyankeb lix tepaleb li ralal xc'ajol laj Israel. ⁵ Cablaju mil (12,000) li quiq'uehe' retalileb sa' xpequemeb sa' xyankeb li ralal xc'ajol laj Judá; ut sa' xyankeb li ralal xc'ajol laj Rubén, cablaju mil li quiq'uehe' retalileb sa' xpequemeb. Sa' xyankeb li ralal xc'ajol laj Gad, cablaju mil li quiq'uehe' retalileb sa' xpequemeb. ⁶ Cablaju mil (12,000) li quiq'uehe' retalileb sa' xpequemeb sa' xyankeb li ralal xc'ajol laj Aser; ut sa' xyankeb li ralal xc'ajol laj Neftalí, cablaju mil li quiq'uehe' retalileb sa' xpequemeb. Ut sa' xyankeb li ralal xc'ajol laj Manasés, cablaju mil li quiq'uehe' retalileb sa' xpequemeb. ⁷ Cablaju mil (12,000) li quiq'uehe' retalileb sa' xpequemeb sa' xyankeb li ralal xc'ajol laj Simeón; ut sa' xyankeb li ralal xc'ajol laj Leví, cablaju mil li quiq'uehe' retalileb sa' xpequemeb. Ut sa' xyankeb li ralal xc'ajol laj Isacar, cablaju mil li quiq'uehe' retalileb sa' xpequemeb. ⁸ Cablaju mil (12,000) li quiq'uehe' retalileb sa' xpequemeb sa' xyankeb li ralal xc'ajol laj Zabulón; ut sa' xyankeb li ralal xc'ajol laj José, cablaju mil li quiq'uehe' retalileb sa' xpequemeb. Ut sa' xyankeb li ralal xc'ajol laj Benjamín, cablaju mil li quiq'uehe' retalileb sa' xpequemeb.

Nabaleb li tenamit tikibanbileb riq'uin saki ak'

⁹ Ut chirix a'an, quicuil ajcui' nabaleb chi tenamit xakxoqueb chiru li c'ojc'o sa' lix lok'laj c'ojaribal ut chiru li Jun li chanchan carner. Inc'a' naru rajlanquileb xban xq'uialeb. Cuanqueb aran a' yal ani xtepaleb xxe'tonil

xyucua'eb ut a' yal bar xtenamiteb ut a' yal chanru li ratinobaleb. Tikibanbibleb riq'uin saki ak' ut cuan chak sa' ruk'eb li ruk' che' palma. ¹⁰ Ut japjoqueb re chixyebal: —Li kacolbal riq'uin li Dios nachal chak, li c'ojc'o sa' lix lok'laj c'ojaribal, ut riq'uin ajcui' li Jun li chanchan carner.— ¹¹ Ut chixjunileb li ángel li cuanqueb chi xjun sutam li lok'laj c'ojaribal ut li cahib li chanchaneb ángel, jo'queb ajcui' li cahib xca'c'al li c'ojc'oqueb aran, que'xcuik'ib ribeb chiru li lok'laj c'ojaribal ut que'xllok'oni li Dios. ¹² Ut que'xye: —Lok'oninbil taxak li kaDios. Chinimak taxak ru. Chiq'uehek' taxak xlok'al xban nak numtajanak xcuanquil, xna'leb ut xcacuilal. Xc'ulub nak tobantioxink chiru chi junelic k'e cutan. Jo'can taxak. ¹³ Ut jun reheb li cahib xca'c'al li c'ojc'oqueb aran quixpatz' cue: —¿Aniheb a'in li tikibanbibleb riq'uin saki ak'? ut ¿Bar xe'chal chak? ¹⁴ Ut lain quinchak'oc ut quinye re: —Kacua', laät nacatna'oc re. Ut a'an quixye cue: —A'aneb a'in li xe'cuyuc chak xnumsinquil li nimla raylal xe'xc'ul. A'aneb li cuybil sachbil lix maqueb xban nak quihoye' xquiq'uel li Jun li chanchan carner nak quicam sa' xc'aba'eb. ¹⁵ Jo'can ut nak cuanqueb chiru lix lok'laj c'ojaribal li Dios ut neque'c'anjelac chiru chi k'ek chi cutan sa' lix templo. Ut li c'ojc'o sa' lix lok'laj c'ojaribal, a'an tailok reheb xban nak a'an cuank riq'uineb. ¹⁶ Inc'a' chic te'tz'ocak chi moco tachakik reheb. Inc'a' chic te'xc'ul xtikkual li sak'e chi moco te'lubk xban tik. ¹⁷ Ut li Jun li chanchan carner li c'ojc'o aran sa' xyiheb li c'ojaribal, a'an tailok reheb jo' jun li chabil pastor narileb lix carner. Ut a'an taq'uehok re lix yu'ameb chi junelic. Inc'a' chic te'yabak xban nak li Dios tac'ojobank xch'oleb.—

8

Nak quitehe' li xcuuk li sello

¹ Nak quixte li xcuuk sello li Jun li chanchan carner, ma ani chic quie'can sa' choxa. Mero or na ch'anamil que'cana. ² Ut quicuul cuukub li ángel xakxoqueb chiru li Dios. Ut que'q'uehe' cuukub li trompeta reheb. ³ Quichal jun chic li ángel ut quixakli chiru li artal yibanbil riq'uin oro. Cuan chak sa' ruk' jun xna'aj li incienso yibanbil riq'uin oro. Quiq'uehe' nabal li incienso re, re tixc'at sa' li artal li cuan chiru li c'ojaribal, re nak cuotz taçuulak toj riq'uin li Kacua' rochben lix tijej laj pabanel. ⁴ Ut lix sibel li incienso li cuan sa' ruk' li ángel quicuulac riq'uin li Dios rochben lix tijej laj pabanel. ⁵ Ut li ángel quixchap li xna'aj li incienso ut quixnujobresi riq'uin li ru xam li cuan sa' li artal, ut quixcut sa' ruchich'och'. Nak quit'ane' sa' ruchich'och' naquililnac jo' nak namok li cak, ut nareploc li rak' cak ut quicuan ajcui' hic.

Li trompetas

⁶ Ut eb li cuukub chi ángel que'xcauresi ribeb chixyabasinguil li cuukub chi trompeta li cuan riq'uineb. ⁷ Li xben ángel quixyabasi lix trompeta. Ut quicute' sa' ruchich'och' sakbach ut xam junajinbil riq'uin quic'. Ca'ch'in chic ma jun jachal (1'3) li ruchich'och' quic'at. Ut que'c'at ajcui' li che'. Ca'ch'in chic ma jun jachal li che' que'c'at ut quic'at chixjunil li rax pim. ⁸ Ut li xcab ángel quixyabasi lix trompeta. Chanchan jun li nimla tzul yo chi c'atc ut quicute' sa' li palau. Ca'ch'in chic ma jun jachal li palau quisuk'i chok' quic'. ⁹ Ut ca'ch'in chic ma jun jachal li xul li cuanqueb sa' li palau quilaje'cam. Ut ca'ch'in chic ma yijach li ninki jucub que'sache'. ¹⁰ Ut li rox ángel quixyabasi lix trompeta ut jun nimla chahim quit'ane' chak sa' choxa. Yo chi c'atc. Chanchan jun li chaj yo xxamlel. Ca'ch'in chic ma yijach li nima' ut ca'ch'in chic ma yijach li yu'am ha' li quinak cui'. ¹¹ Li chahim a'an, C'a xc'aba'. Ca'ch'in chic ma yijach li ha' quic'aho' ut nabaleb li tenamit que'cam xban

nak que'ruc' li c'ahil ha'. ¹² Ut li xca ángel quixyabasi li trompeta ut ca'ch'in chic ma yijach (1'3) li sak'e inc'a' chic quicutano' ru. Ut ca'ch'in chic ma yijach li chic ma yijach li chahim inc'a' chic que'lemtz'un. Ca'ch'in chic ma yijach li cutan quik'ojyino' ru. Ut jo'can ajcui' li po chiru li k'ojyin. Ca'ch'in chic ma yijach li k'ojyin inc'a' quicutano' ru. ¹³ Ut quicuul jun chanchan nimla c'uch yo chi rupupic chiru choxa, ut yo chixjapbal re chixyebal: —C'ajo' li raylal, c'ajo' li raylal. C'ajo' li raylal li tachalk sa' xbeneb li cuanqueb sa' ruchich'och' nak te'yabasik li oxib chic chi trompeta xbaneb li oxib chi ángel, chan.

9

¹ Ut li ro' ángel quixyabasi lix trompeta ut quicuul nak jun li chahim quit'ane' chak sa' choxa ut quinak sa' ruchich'och'. Ut quiqu'ehe' re li chahim lix lacuil li chamal jul nak quicuul. ² Nak quixte li re li chamal jul, c'ajo' li sib qui-el chak. Chanchan li sib li na-el sa' junak nimla horno. Quik'ojyino' ru li sak'e ut li ik' xban li sib li qui-el chak sa' li chamal jul. ³ Sa' li sib a'an que'el chak nabaleb li xul chanchaneb laj sac' ut que'xjeq'ui ribeb sa' ruchich'och'. Que'q'uehe' xcuanquil re nak te'ti'ok. Lix may li te'xtiu, a'an chanchan xmay li neque'xtiu laj xoc'. ⁴ Que'yehe' reheb nak inc'a' te'xche' li pim chi moco li acujmk sa' ruchich'och', chi moco junak che'. Ca'aj cui' eb li cristian li mac'a' retalileb sa' xpequemeb xban li Dios, ca'aj cui' eb a'an li te'ti'ek'. ⁵ Ut que'yehe' ajcui' reheb nak inc'a' te'xcamsi li cristian. Ca'aj cui' te'xrahobtesiheb chiru ob po. Ut lix rahil li te'xtiu li xul a'an, chanchan xmay naxtiu laj xoc'. ⁶ Sa' eb li cutan a'an, eb li cristian te'xsic' raj xcamiqueb xban li raylal yoqeb chixc'ulbal. Te'xra raj ru camc, abanan inc'a' te'camk. ⁷ Eb laj sac' chanchaneb li cacuay ac cauresinbileb chi pletic. Chanchan cuanqueb xcorona yibanbil riq'uin oro sa' xjolomeb. Ut li rilobaleb chanchan rilobaleb cujnk. ⁸ Li rismal xjolomeb chanchan rismal xjolomeb ixk ut li ruch reheb, chanchan ruch reheb cakcoj. ⁹ Chanchan ch'ich' cuan chire xch'oleb re xcolbaleb rib. Ut lix xiq'ueb neque'ec'an jo' neque'ec'an q'uila carruaje quelonbil xban cacuay nak ac yoqeb chi xic chi pletic. ¹⁰ Eb li xul a'an cuanqueb xmay sa' ru'ujeb xye. Ut riq'uin lix ye neque'ti'oc jo' laj xoc'. Ut riq'uineb lix ye te'xrahobtesiheb li tenamit chiru ob po. ¹¹ Cuan jun li nataklan sa' xbeneb. A'an li ángel li k'axal nim xcuanquil chi taklanc sa' li chamal jul. Aj Abadón xc'aba' sa' li atinobal hebreo, ut sa' griego aj Apolión xc'aba'. (Chi jalbil ru li c'aba'ej a'in naraj naxye "aj sachonel".) ¹² A'in li xben raylal li quic'ulman nak quicuul. Abanan toj cuan cuib chic li raylal li te'chalk sa' xbeneb li tenamit. ¹³ Li xcuak ángel quixyabasi lix trompeta ut quicuabi jun xyab cux quiatinac chak sa' xyankeb li cahib chi xucub li cuanqueb sa' xca xucutil li artal li yibanbil riq'uin oro, li cuan chiru li Dios. ¹⁴ Quixye re li xcuak ángel li cuan xtrompeta riq'uin: —Hiteb li cahib chi ángel li bac'boqeb chire li nima' Eufrates, chan. ¹⁵ Que'ach'abac li cahib chi ángel li ac xakabanbileb re li honal a'an ut re li cutan a'an ut re li po a'an ut re li chihab a'an re nak te'xic xcamsinqueb nabaleb li cristian. Ca'ch'in chic ma yijach li cristian li te'camsik. ¹⁶ Lain quicuabi jo' q'uialeb li soldado li te'xic chi pletic chirix cacuay. Cuib ciento millón (200,000,000) lix q'uialeb. ¹⁷ Jo'ca'in nak que'cuil sa' li visión eb li cacuay ut eb li yoqeb chi xic chirix. Eb li yoqeb chi xic chirix li cacuay cuanqueb xcolbal li re xch'oleb. Chanchan xcakal li xam, chanchan xraxil li chabil pec zafiro ut chanchan xk'anal li azufre. Lix jolomeb li cacuay chanchan lix jolomeb li cakcoj. Ut sa' reheb yo chi elc xam, sib ut azufre. ¹⁸ Xban li

oxib chi raylal a'in ca'ch'in chic ma yijach li cristian que'camsic. Nabaleb li cristian que'camsic xban li xam, li sib ut li azufre li qui-el chak sa' reheb li cacuay. ¹⁹ Sa' reheb cuanqueb xmay ut cuanqueb ajcui' sa' ru'ujeb xye. Lix yeheb chanchan xjolomeb li c'anti' ut riq'uin a'an neque'xrahobtesieheb li cristian. ²⁰ Ut li jo' q'ual chic li cristian li inc'a' que'camsic xban li raylal a'an inc'a' ajcui' que'yot'e' xch'oleb ut inc'a' que'xcanab xbanunquul li mausilal. Inc'a' que'xcanab xlok'oninquil li maus aj musik'ej chi moco que'xcanab xlok'oninquileb li jalanil dios yibanbil riq'uin oro, plata, k'an ch'ich' bronze jo' ajcui' riq'uin pec ut che'. Inc'a' que'xcanab xlok'oninquileb li yibanbil dios a'in, li inc'a' neque'iloc, chi moco neque'abin, chi moco neque'bec. ²¹ Inc'a' que'xjal xc'a'uxeb chi moco que'yot'e' xch'oleb xban nak inc'a' que'xcanab xcamsinquit ras ritz'ineb ut inc'a' que'xcanab li tulac, chi moco que'xcanab li co'betac yumbetac ut inc'a' ajcui' que'xcanab li elk'ac.

10

Li ch'ina botbil hu li cuan riq'uin li ángel

¹ Quicuul nak quichal jun chic li ángel cau rib. Yo chak chi cubec sa' choxa sutsu sa' chok. Ut lix jolom sutsu xban jun li xoquik'ab. Li rilobal nalemtz'un jo' li sak'e ut li rok chanchan jun okech yo xxamlel. ² Cuan chak sa' ruk' jun li ch'ina hu teto. Lix nim ok quixxakab sa' xben li palau ut lix tz'e ok quixxakab sa' xben li ruchich'och'. ³ Ut quixjap re chi cau xyab xcux chanchan nak naxjap re li cakcoj. Ut qui-abic cuukub xyab cux chanchan cak nak que'ec'an. ⁴ Oc raj cue chixtz'ibanquil retalil li c'a'ru que'xye li chanchan cuukub chi cak. Abanan quicuabi jun quiatinac sa' choxa ut quixye cue: —Matz'iba li c'a'ru xe'xye li cuukub chi xyab cux chanchan cak. Li c'a'ru xacuabi ma' bar taye resil. Xocxok ban sa' ach'ol, chan. ⁵ Ut li ángel li quicuul xakxo sa' xben li palau ut sa' xben li ruchich'och', quixtaksi lix nim uk', ⁶ ut quixbanu li juramento sa' xc'aba' li Jun li yo'yo chi junelic, li quiyobtesin re li choxa jo' ajcui' li ruchich'och' ut chixjunil li cuan chiru, jo' ajcui' li palau ut chixjunil li cuan chi sa'. Quixye nak ac xcuulac xk'ehil. Inc'a' chic tabayk. ⁷ Nak tixyabasi lix trompeta li xcuuk ángel, sa' eb li cutan a'an tatz'aklok ru lix c'a'ux li Dios, li mukmu nak quicuan. Tatz'aklok ru jo' quixye reheb li profeta li que'c'anjelac chiru, chan. ⁸ Ut li jun li quiatinac cuiq'uin sa' choxa, quixye cui'chic cue: —Ayu. C'ul li hu li teto, li cuan sa' ruk' li ángel, li xakxo sa' xben li palau ut sa' xben li ruchich'och'. — ⁹ Lain cojn riq'uin li ángel ut quinye re nak tixq'ue cue li ch'ina hu. Ut a'an quixye cue: —Cue'. Chap li hu ut tanuk'. Sa' acue qui'ak jo' xqui'al lix ya'al cab, abanan c'ahak sa' la sa', chan cue. ¹⁰ Quinc'ul li ch'ina hu sa' ruk' li ángel ut quinnuk'. Nak cuan sa' cue chanchan xqui'al li xya'al cab. Ut nak ac xinnuk' quic'aho' sa' lin sa' xban. ¹¹ Quixye cue: —Tenebanbil sa' aben laa' xyebal resil li c'a'ru tac'ulmanq. Toj taye cui'chic resil c'a'ru te'xc'ul eb li tenamit, jo' ajcui' li xninkal ru tenamit jo' ajcui' lix reyeheb. Taye ajcui' resil li c'a'ru te'xc'ul sa' eb li tenamit li jalan jalank ratinobaleb.

11

Li cuib chi cujnk li te'yehok resil li c'a'ru tac'ulmanq

¹ Ut quiq'uehe' cue jun li che' re bisoc ut quiyeh'e' cue: —Ayu, bis chak lix templo li Dios jo' ajcui' li artal ut tacuajlaheb jarubeb li cristian li neque'lok'onin aran. ² Abanan mabis li nebal li cuan chiru lix templo li Dios xban nak a'an k'axtesinbil reheb li macua'eb aj judío. Eb a'an te'xmux ru li santil tenamit chiru oxib chihab riq'uin media (42 po). ³ Lain tintaklaheb

cuib aj c'anjel chicuu. Cuank rak'eb chirix k'es ru retalil li rahil ch'olej. Eb a'an te'xye cuesilal chiru oxib chihab riq'uin cuakib po.— ⁴ Chiru li Kaçua' li cuib chi cujnk a'in chanchanakeb li cuib chi che' olivo ut chanchanakeb li cuib chi candelero li cuanqueb chiru li Dios, laj eçal re li ruchich'och'. (Zac. 4:3, 11, 14) ⁵ Ut cui ani taajok xrahobtesinquileb, chanchan xam li taelk sa' reheb li cuib chi cujnk xban nak yal riq'uin li ratineb te'camk li xic' neque'iloc reheb. Jo'ca'in nak te'camk li ani te'ajok re xrahobtesinquileb li cuib chi cujnk a'in. ⁶ Eb li cuib chi cujnk a'in q'uebileb xcuauquil chixbanunquil re nak inc'a' tixq'ue li hab chiruheb li cutan nak yokeb chixyebal li c'a'ru taç'ulmank. Ut cuanqueb xcuauquil re xsuk'isinguil li ha' chok' quic' ut cuanqueb ajcui' xcuauquil re xrahobtesinquileb li cuanqueb sa' ruchich'och' riq'uin chixjunil li raylal a' yal jarub sut te'raj xbanunquil. ⁷ Nak acak xe'rake' xyebal resilal li c'a'ru taç'ulmank, jun li chanchan josk' aj xul taelk chak sa' li chamal jul ut tapletik riq'üneb a'an. Tanumtak sa' xbeneb toj retal xtxcamsiheb. ⁸ Li camenak te'canaç' chi t'ant'o sa' eb li be re li nimla tenamit bar quicamsic cui' chiru cruz li Kaçua' Jesucristo. Cuan nak neque'xjuntak'eta li tenamit a'an riq'üneb li tenamit Sodoma ut Egipto xban li mausalal que'xbanu. ⁹ Oxib cutan riq'uin jun cua'leb te'cuank aran chi t'ant'o li camenak ut inc'a' te'q'uehek' chi mukec'. Ut yalak ani te'ilok reheb, a' yal ani xtepaleb lix xe'tonil yucua'eb, ut a' yal bar xtenamiteb, ut a' yal chanru li ratinobaleb. ¹⁰ Ut li cuanqueb sa' ruchich'och' taçahok' sa' xch'oleb nak te'camk li cuib chi cujnk ut taç'ojlak xch'oleb. Jo'can nak te'oc chixsihinquil c'a'ru reheb chi ribileb rib. Taçahok' xch'oleb nak te'camk li cuib chi cujnk xban nak ch'a'aj que'rec'a nak que'yeh'e' reheb nak taç'alk raylal sa' xbeneb. ¹¹ Ut quicuil ajcui' nak ac xnume' li oxib cutan riq'uin jun cua'leb, que'yo'obtesic cui'chic li cuib chi cujnk xban li Dios ut que'xakli cui'chic chi yo'yo chiruheb li tenamit. Ut c'ajo' nak qui-oc xxiuheb li que'iloc reheb. ¹² Ut li cuib chi cujnk que'rabi jun yo'chi atinac sa' choxa. Chi cau xyab xcux quixye reheb: —Takenkex chak arin, chan. Ut que'take' sa' choxa sa' jun li chok chiruheb li xic' neque'iloc reheb. ¹³ Ut sa' li honal a'an quicuan jun nimla hçc ut li xlaje jachalal li tenamit qui-uk'e'. Cuukub mil (7,000) xq'uial li cristian que'cam xban li hçc. Ut li jo' q'uial chic inc'a' que'cam, que'xucuac ut que'xq'ue xlok'al li Dios cuan sa' choxa. ¹⁴ A'in li xcab li raylal ac xnume'. Abanan toj xuan jun chic li raylal taç'alk chi seb sa' xbeneb.

Nak quiyabasic li xcuuk li trompeta

¹⁵ Ut li xcuuk ángel quixyabasi lix trompeta. Ut qui-abic nabal li xyab cux sa' choxa. Yoqueb chixyebal chi cau: —Anakcuan te'canaç' rubel xcuauquil li Kaçua' chixjunileb li cuanqueb sa' ruchich'och'. A' chic li Kaçua' Dios ut li Cristo te'taklanç' sa' xbeneb chixjunileb chi junelic k'e cutan, chanqueb. ¹⁶ Ut eb li cahib xca'ç'al li c'ojc'oqueb sa' lix c'jaribal que'xcuik'ib ribeb ut que'xlok'oni li Dios. ¹⁷ Ut que'xye: —At Kaçua', at nimajcual Dios, nocobantioxin çacuu. Laat li ac cuancat ajcui' chak junxil ut cuancat anakcuan ut cuankat chi junelic. Laat cuan açuanquil chi junelic ut laaç' chic tattaklanç' sa' xbeneb chixjunileb li cuanqueb sa' ruchich'och'. ¹⁸ C'ajo' nak que'josk'o' li tenamit li xic' neque'iloc açue. Abanan xcuulac xk'ehil nak taç'ut la josk'il chiruheb. Xcuulac xk'ehil nak tatrakok atin sa' xbeneb li camenak. Ut taç'ueheb xk'ajcamunquileb laj c'anjel çacuu li que'yehoc resil li c'a'ru taç'ulmank. Ut taç'ueheb ajcui' xk'ajcamunquileb laj pabanel li que'q'uehoc alok'al, usta cuanqueb xcuauquil usta maç'a'. Ut laaç' tasach ruheb li que'banun raylal reheb li cuanqueb sa' ruchich'och', chanqueb. ¹⁹ Ut quicuil nak quitehe' lix templo li Dios cuan sa' choxa. Ut quic'utun li Lok'laj

Cax li cuan cui' li contrato sa' lix templo li Dios. Nareploc li rak' çak ut nabal li chokinc. Quicuan jun li hıc ut nabal li sakbach quit'ane' nak quicuil.

12

Li ixk ut li josk' aj xul dragón xc'aba'

¹ Ut quicuil jun li sachba ch'olej sa' choxa. Quicuil jun li ixk. Nalemzt'un li rak' jo' nalemzt'un li sak'e. Li po cuan rubel rok ut cuan jun corona sa' xjolom ut chiru li corona cuan cablaju li chahim. ² Li ixk a'an yaj aj ixk. Ac oc re chi q'uirac. Yo chixjapbal re xban lix raylal. ³ Ut jun chic sachba ch'olej quic'utbesic chicuu sa' choxa. Quicuil jun nimla josk' aj xul cak rix dragón xc'aba'. Cuan cuukub lix jolom ut lajeb lix xucub. Ut sa' eb lix jolom cuukub cuan junjunk lix corona. ⁴ Ut riq'uin lix ye yo chixquelonquil nabal li chahim chiru choxa. Ca'ch'in chic ma yijach li chahim li yo chixquelonquil. Ut quixcut sa' ruchich'och' li chahim. Li nimla josk' aj xul quixakli chiru li ixk li oc re chi q'uirac re nak tixnuk' li c'ula'al nak tayo'lak. ⁵ Quiyo'la lix c'ula'al li ixk ch'ina telom. Ut a'an chic tatakłank sa' xbeneb li cuanqueb sa' ruchich'och'. Chanchan riq'uin li xuk' ch'ich' tatakłank sa' xbeneb xban nak a' anak chic li yal re sa' xbeneb. Li c'ula'al quisapuc ut quic'ame' riq'uin li Dios bar c'ojc'o cui' sa' lix lok'laj c'ojaribal. ⁶ Li ixk quielelic ut cõ sa' li chaki ch'och' bar mac'a' cuan sa' li na'ajej ac cauresinbil chok' re xban li Dios. Ut aran taç'olonik xban li Dios chiru oxib chihab riq'uin cuakib po (1,260 cutan). ⁷ Chirix a'an quicuan jun nimla plet sa' choxa ut li ángel Miguel rochbeneb li ángel li neque'taken re que'pletic riq'uin li josk' aj xul dragón. Ut eb li ángel li neque'taken re li dragón que'xtenk'a a'an chi pletic. ⁸ Inc'a' que'xcuy pletic li dragón ut inc'a' chic que'q'uehe' xna'ajeb sa' choxa. ⁹ Quicute' sa' ruchich'och' xban li Dios li josk' aj dragón. Li dragón, a'an li c'anti' li ac cuan ajcui' chak najter. A'an laj tza li nabalak'in reheb li cuanqueb sa' ruchich'och'. Satanás nayeman re. Quicute' sa' ruchich'och' laj tza ut que'cute' ajcui' li ángel li que'taken re. ¹⁰ Ut quicuabi jun xyab cuy yo chi atinac chi cau sa' choxa ut quixye: —Anakcuan xc'ulun chak li kacolbal. Anakcuan li Kaçua' chic taçuanık xcuanguil ut a'an chic tatakłank. Quic'utun lix cuanquil li Cristo nak qui-isic sa' choxa laj tza li quijitoc reheb li kech aj pabanelil chiru li Dios chi k'ek chi cutan. ¹¹ Eb li kech aj pabanelil xe'numta sa' xben laj tza sa' xc'aba' lix quiq'uel li Jun li chanchan carner ut xban nak que'xch'olob xyalal nak a'an laj Colol reheb. Inc'a' que'xra xyu'ameb, toj retal que'xc'ul camc. ¹² Jo'can nak chisahok' taxak sa' ech'ol laex li cuanqueb sa' choxa. Abanan li cuanqueb sa' ruchich'och' ut sa' li palau tok'obeb ru xban nak laj tza quicute' sa' ruchich'och' chi cuanc riq'uinéb. C'ajo' lix josk'il xban nak naxnau nak cuulac re xk'ehil nak tasachek' ru, chan. ¹³ Ut li josk' aj dragón quixq'ue retal nak quicute' sa' ruchich'och'. Qui-oc xtakenquil li ixk li quiyo'la jun xc'ula'al telom. ¹⁴ Quiq'uehe' cuib lix xic' li ixk re tarupupik chanchan xxic' li nimla c'uch re nak taëlelik ut taxic toj sa' li chaki ch'och' sa' li na'ajej ac cauresinbil chok' re bar mac'a' cuan. Ut aran taç'olonik xban li Dios chiru oxib chihab riq'uin cuakib po. Ut aran tixmuk rib chiru li c'anti'. ¹⁵ Ut li c'anti' quixxa'cua' ha' chirix li ixk. Ut li quixxa'cua' chanchan jun nima' re nak taç'amek' xban li rok li nima' li ixk. ¹⁶ Li ixk quitenk'ac xban li ch'och'. Quixte rib li ch'och' ut quixtz'ub li ha' li quixxa'cua' li josk' aj dragón. ¹⁷⁻¹⁸ C'ajo' nak quijosk'o' li dragón sa' xben li ixk. Cõ chi pletic riq'uinéb li lalal xc'ajol, li jo' q'ual chic que'cana. A'aneb li neque'banun re lix chak'rab li Dios ut neque'paban re li xyalal li quixch'olob li Jesucristo.

13

Li josk' aj xul li qui-el chak sa' li palau

¹ Ut li dragón quixakli chire li palau ut quicuul nak qui-el chak sa' li palau jun chic chanchan josk' aj xul cuan cuukub xjolom ut lajeb lix xucub. Ut sa' li lajeb chi xucub cuan junjunk lix corona. Ut tz'ibanbil sa' eb lix jolom jun li c'aba'ej re xmajecuanquil li Kacua'. ² Li josk' aj xul li quicuul, a'an chanchan híx. Eb li rok chanchan rok li xul oso. Ut li ruch re chanchan ruch re li cakoj. Ut li dragón quixq'ue lix cacuilal ut lix c'ojaribal re li josk' aj xul. Ut quixq'ue ajcui' xcuauquil. ³ Ut quicuul nak jun reheb lix jolom li josk' aj xul yoc'ol ut chanchan camc re. Abanan quiq'uira. Sachso xch'oleb li tenamit que'cana chirilbal nak quiq'uira. Ut que'xtake li josk' aj xul. ⁴ Ut que'xq'ue xlok'al li dragón xban nak quixq'ue xcuauquil li josk' aj xul. Ut que'xlok'oni ajcui' li josk' aj xul ut que'xye: —¿Ani ta cui' cuan xcuauquil jo' li josk' aj xul a'in? Ma' ani tixcuy pletic riq'uin a'an xban nak quiq'uehe' xcuauquil xban li dragón, chanqueb. ⁵ Ut quiq'uehe' xcuauquil li josk' aj xul chí atinac ut chixbanunquil li c'a'ru taraj. K'axal k'etk'et li xul ut yo' chixmajecuanquil li Dios. Sachba ch'olej quixbanu chiru oxib chihab riq'uin cuakib po. ⁶ Ut li josk' aj xul quixmajecua li Dios ut quixmajecua ajcui' lix santil na'aj. Ut quixmajecua li cuanqueb sa' choxa. ⁷ Quiq'uehe' xcuauquil chi pletic riq'uineb li ralal xc'ajol li Dios ut quinumta sa' xbeneb. Quiq'uehe' xcuauquil sa' xbeneb chixjunileb, a' yal ani xtepaleb lix xe'tonil yucua'eb, ut a' yal bar xtenamiteb ut a' yal chanru li ratinobaleb. ⁸ Ut chixjunileb li cuanqueb sa' ruchich'och' te'xlok'oni ru li josk' aj xul a'an. Te'xlok'oni li xul chixjunileb li inc'a' tz'ibanbileb xc'aba' sa' li hu li tz'ibanbil cui' xc'aba'eb li cuanqueb xyu'am chí junelic, li cuan riq'uin li Jun li chanchan carner, li ac xakabanbil chak re camc sa' xtielajic li ruchich'och'. ⁹ Li ani taraj xtaubal ru li xyalal, chixq'uehak retal a'in: ¹⁰ Li ani tento taxic chi prexil, xicak chí prexil. Ut li ani tento taxamsik riq'uin chí'ich', chícamc riq'uin chí'ich'. Jo'can nak cauakeb taxak xch'oleb li ralal xc'ajol li Dios. Te'xcuy taxak xnumsinquil li raylal ut inc'a' ta chí'ich' inank xch'oleb.

Li josk' aj xul li qui-el chak sa' ch'och'

¹¹ Ut chirix a'an quicuul jun chic li josk' aj xul qui-el chak sa' ch'och'. Cuan cuib lix coc' xucub chanchan lix xucub li carner. Ut naatinac jo' naatinac li dragón. ¹² Li xul a'an cuan xcuauquil jo' li josk' aj xul li quiyog'ue' jun xjolom ut quicam raj abanan quiq'uira. Ut chiru ajcui' a'an naxmin ruheb chixjunileb li cuanqueb sa' ruchich'och' re nak te'xlok'oni li josk' aj xul. ¹³ Li xcab josk' aj xul quixbanu sachba ch'olej. Naxcubsi chak xam sa' choxa toj sa' ruchich'och' yal re nak eb li cristian te'ril. ¹⁴ Quixbalak'ihéb li cuanqueb sa' ruchich'och' riq'uin li sachba ch'olej li quiq'uehe' re xbanunquil chiru li josk' aj xul. Ut quixye reheb li cuanqueb sa' ruchich'och' nak te'xyib jun xjalám uch li josk' aj xul li quiyog'ue' riq'uin chí'ich' ut quiq'uira. ¹⁵ Ut li xcab xul quiq'uehe' xcuauquil re nak tixq'ue xmusik' lix jalám uch li xben josk' aj xul re taatinac ut tixq'ue chí camc li ani inc'a' taq'uehok xlok'al. ¹⁶ Quixpuersi ruheb chixjunileb re nak te'xc'ul li retalileb sa' lix nim uk' malaj sa' xpequemeb. Que'q'uehe' retalileb chixjunileb li cuanqueb xcuauquil jo' ajcui' li maç'a'eb xcuauquil, eb li biom jo' eb ajcui' li neba', eb li lok'bil moç jo' ajcui' li maç'a'eb xpatron. ¹⁷ Cui maç'a' li retalileb sa' xnim uk' malaj sa' xpequemeb, inc'a' taruk te'lok'ok chí moco taruk te'c'ayink. Li retalil li te'q'uehek', a'an xc'aba' li josk' aj xul. Lix c'aba' a'an, a'an ajcui' jun li número. ¹⁸ A'in naraj nak cuank xna'leb li ani tailok re. Li ani cuan xna'leb naru tixsic' c'a'ru xyalal. Naru tarajla lix letril lix c'aba' li josk' aj xul ut taqlk

lix número jun li cuṽnk. Li número a'an cuakib ciento riq'uin cuakib xçac'äl (666).

14

Li çahib xcuakxak'al mil (144,000) yoqueb chi bichanc re xlok'oninquil li Kacua'

¹ Ut quin-iloc cui'chic ut quicuul nak aran sa' xben li tzul Siön xakxo li Jun li chanchan carner. Ut rochben a'an cuanqueb çahib xcuakxak'al mil (144,000) chi cristian. Sa' xpequemeb tz'ibanbil lix c'aba' li Jun li chanchan carner ut tz'ibanbil ajcui' xc'aba' lix Yucua'. ² Ut quicuabi jun yo chi atinac sa' choxa chanchan xyab lix cau ok li nima'. Chanchan nak namok li çak. Ut chanchan xyabeb li arpa nak yoqueb xch'e'bal. ³ Quicuabi nak yoqueb chixbichanquil jun li ac' bich chiru li c'ojc'o sa' li lok'laj c'ojaribal, chiruheb li çahib li chanchaneb ángel li yo'yoqueb, ut chiruheb li çahib xca'ç'al li c'ojc'oqueb sa' xc'ojaribaleb. Ma ani chic que'ru xtzolbal li bich a'in. Ca'aj cui' eb li çahib xcuakxak'al mil (144,000) li que'cole' sa' xyankeb li cuanqueb sa' ruchich'och'. ⁴ A'aneb a'in li que'paban re li Jun li chanchan carner, li que'taken re yalak bar, li inc'a' que'xmux ribeb riq'uin ixk chi inc'a' sumsuqueb. A'ineb li xben que'cole' sa' xyankeb li cuanqueb sa' ruchich'och' re nak te'oc chok' ralal xc'ajol li Dios ut chok' ralal xc'ajol li Jun li chanchan carner. ⁵ Inc'a' que'tic'ti'ic. Chiru li Dios maç'a' xmaqueb.

Li oxib chi ángel

⁶ Ut quicuul jun chic li ángel yo chi rupupic chiru choxa. Yo chixyebal jun esilal li maç'a' roso'jic reheb chixjunileb li cuanqueb sa' ruchich'och' a' yal ani xtepaleb lix xe'tonil yucua'eb, ut a' yal bar xtenamiteb ut a' yal çanru li ratinobaleb. ⁷ Yo chixyebal chi cau xyab xcux: —Chexucuak ru li Dios ut cheq'ue xlok'al xban nak xcuulac xk'ehil nak tarakok atin sa' xbeneb li cuanqueb sa' ruchich'och'. Chelok'onihak a'an li quiyiban re li choxa, li ruchich'och', ut li palau jo'queb ajcui' li yu'am ha', çan. ⁸ Jun chic li ángel yo chi taçenc re ut yo chixyebal: —Ac xsache' xcuanquil li nimla tenamit Babilonia. Ac xsache' ru li tenamit. A'an li quic'amoc xbeheb chixjunileb li tenamit chi maçobc. Chanchan nak quixcaltesiheb nak quixq'ueheb chixbanunquil li mausilal, çan. ⁹ Ut quicuul li rox ángel, yo chixtakenquil li cuib chic. Li jun a'in yo chixyebal chi cau xyab xcux: —Li ani tixlok'oni li josk' aj xul malaj ut lix jalam uch, ut tixc'ul li retalil sa' xpequem malaj chi ruk', ¹⁰ a'an tixc'ul nabal li raylal nak li Dios tarakok atin sa' xbeneb riq'uin xjosk'il. Chiruheb li santil ángel ut chiru li Jun li chanchan carner tarahobtesik riq'uin azufre yo xxamlel nak taq'uehek' chixtojbäl rix lix maç. ¹¹ Junelic k'e cutan yokeb chi c'uluc raylal li neque'xlok'oni li josk' aj xul malaj ut lix jalam uch, li que'xc'ul li retalil lix c'aba' sa' xpequemeb malaj chi ruk'eb. Chi k'ek chi cutan yokeb chi c'uluc raylal, çan. ¹² Jo'can nak cauhakeb taxak xch'oleb li ralal xc'ajol li Dios, eb li neque'banun re lix çak'rab li Dios ut neque'paban sa' xc'aba' li Jesucristo. Inc'a' taxak taç'inançk xch'oleb sa' xpabaleb. ¹³ Ut quicuabi jun yo chi atinac sa' choxa ut quixye cue: —Tz'iba li atin a'in: Chalen anakuan us xak reheb li neque'cam, li ac xe'xpab li Kacua'. Yal. Us xak reheb, çan li Santil Musik'ej, xban nak te'hilank chixbanunquil li çahil c'anjel li ac xe'xbanu ut te'xc'ul xk'ajcamunquil.—

Nak quirake' atin sa' xbeneb li cuanqueb sa' ruchich'och'

¹⁴ Ut quicuul jun li saki chok. Ut sa' li chok a'an, chunchu li Jun chanchan cuṽnk. A'an li C'ajolbej. Ut sa' xjolom cuan jun li corona yibanbil riq'uin oro

ut sa' ruk' cuan jun li k'esnal ch'ich' c'onc'o. ¹⁵ Ut jun chic li ángel qui-el chak sa' xtemplo li Dios. Yo chi atinac riq'uin li Jun li c'ojc'o sa' xben li chok ut quixye re chi cau xyab xcux: —Tiquib xyoc'bal li acujmk sa' ruchich'och'. Ac xcuulac xk'ehil xxocbal li ru li acujmk xban nak ac xk'ano', chan. ¹⁶ Ut li c'ojc'o sa' li chok quixtiquib xyoc'bal li acujmk sa' ruchich'och' ut quixxoc li ru. ¹⁷ Ut jun chic li ángel qui-el sa' xtemplo li Dios, li cuan sa' choxa. Cuan ajcui' sa' ruk' a'an jun li k'esnal ch'ich'. ¹⁸ Ut jun chic li ángel qui-el cuan cui' li artal. A'an li qui-iloc re li xam li naqueman sa' xben li artal. Quiatinac riq'uin li ángel li cuan xk'esnal ch'ich' sa' ruk' ut quixye re chi cau xyab xcux: —Taset chi cut riq'uin la k'esnal ch'ich' li ru li uva li cuanqueb sa' ruchich'och' xban nak ac xk'ano', chan. ¹⁹ Ut li ángel quixyoc' li ru li uva li cuan sa' ruchich'och'. Ut quixcut sa' li nimla na'ajej bar nayatz'man cui' li uva. Li yatz'lebal a'an retalil lix josk'il li Dios sa' xbeneb li tenamit. ²⁰ Ut que'xyatz' li ru li uvas sa' li yatz'lebal li cuan chirix li tenamit. Ut nabal li xya'al. Chanchan nima' nak qui-el sa' li yatz'leb. Quicuulac toj sa' reheb li cacuay ut quibec rok lix ya'al ut oxib ciento metro rok quicuulac. (Lix ya'al li ru li uvas a'an retalil xquiq'ueleb li cristian li te'camsik nak tarakek' atin sa' xbeneb).

15

Li cuukub chi ángel li que'c'amoc chak re li cuukub chi raylal sa' ruchich'och'

¹ Ut quicuil sa' choxa jun chic li sachba ch'olej rilbal. Quicuil cuukub li ángel ut cuan riq'uineb cuukub chi raylal. A'an li raylal li tac'ulmank sa' roso'jiqueb li cutan. Riq'uin li cuukub chi raylal a'an tatz'aklok ru lix josk'il li Dios. ² Ut quicuil jun li palau chanchan lem yo xxamlel. Ut chire a'an xakxoqueb li ac que'xcuy xcöloninguil li raylal ut cuanqueb lix arpa li Dios riq'uineb. Inc'a' que'xq'ue xcuanquil li josk' aj xul chi moco lix jalam uch, chi moco que'xc'ul lix numbril lix c'aba'. Inc'a' que'xq'ue rik chi balak'ic xban li xul. ³ Yoqueb chixbichanguil li bich li quixbicha laj Moisés laj c'anjel chiru li Dios re xlok'oninguil li Jun li chanchan carner. Ut yoqueb chixyebal: —At Kacua', at nimajcual Dios, nim acuanquil ut sachba ch'olej rilbal li nacabanu. K'axal tic ach'ol ut junelic nacaye li yal. Laat li tz'akal rey. K'axal nim acuanquil sa' xbeneb chixjunileb li tenamit. ⁴ ¿Ma cuan ta bi' junak inc'a' tixxucua acuu? Chixjunileb te'xnima acuu, at Kacua', xban nak ca'aj cui' laät tic ach'ol. Chixjunileb li cuanqueb sa' li xninkal ru tenamit te'chalk ut te'xcuik'ib ribeb hacuu ut tate'xlok'oni xban nak te'xq'ue retal nak laät tatrakok atin sa' tiqulal.— ⁵ Ut chirix chic a'an quicuil nak quitehe' li lok'laj santil na'ajej sa' choxa bar xocxo cui' li contrato li quixbanu li Dios. ⁶ Ut li cuukub chi ángel que'el chak sa' xtemplo li Dios li yoqueb chak chixc'ambal li cuukub chi raylal. Tikibanbileb riq'uin li saki t'icr lino li nalemtz'un. Ut bac'boqueb li re xch'ol riq'uin c'amal sa' yibanbil riq'uin oro. ⁷ Ut jun reheb li cahib li yo'yoqueb li chanchaneb ángel, quixq'ue reheb li cuukub chi ángel li cuukub chi sec' oro nujenak riq'uin xjosk'il li Dios, li yo'yo chi junelic k'e cutan. ⁸ Ut chanchan quinuajac chi sib lix templo li Dios nak quinuajac riq'uin xlok'al ut xcuanquilal li Dios. Ut ma' ani quiru qui-oc aran toj retal quinume' li cuukub chi raylal li yoqueb chixc'ambal chak li cuukub chi ángel.

16

¹ Ut quicuabi jun xyab cux quiatinac chak chi cau sa' lix templo li Dios. Quixye reheb li cuukub chi ángel: —Ayukex ut hoyomak chak sa' xben li ruchich'och' lix josk'il li Dios li cuan sa' li cuukub chi sec'.— ² Co li xben ángel

ut quixhoy li cuan sa' lix sec' sa' xben li ruchich'och'. Ut quichal jun yajel sa' xbeneb chixjunileb li que'xc'ul xnumbril lix c'aba' li josk' aj xul jo' queb ajcui' li que'xlok'oni lix jalam uch. Que'xoxo' rixeb ut k'axal ra que'xc'ul xban li yajel. ³ Ut li xcab ángel quixhoy li cuan sa' lix sec' sa' xben li palau. Ut li ha' quisuk'i chok' quic'. Chanchan xquiq'uel jun camenak. Ut quilaje'cam chixjunileb li cuanqueb sa' li palau. ⁴ Li rox ángel quixhoy li cuan sa' lix sec' sa' xbeneb li nima' ut sa' xbeneb li yu'am ha'. Ut li ha' quisuk'i chok' quic'. ⁵ Ut quicuabi nak li ángel li nataklan sa' xben li ha' quiatinac ut quixye: — At Kaçua', laät tic ach'ol chi rakoc atin chi jo'ca'in. Laät ac cuanac chak sa' xticlajic ut laät cuanac anakuan. Laät santo. Jo'can nak xatrakoc atin sa' xyalal sa' xbeneb li inc'a' useb xna'leb. ⁶ Xban nak a'an eb que'camsin reheb la cualal ac'ajol ut eb la profeta, jo'can nak xasuk'isi li ha' chok' quic' ut xaq'ueheb chiruc'. Xc'ulubeb nak te'xc'ul chi jo'can xban nak inc'a' us lix na'lebeb, chan. ⁷ Ut quicuabi jun yo' chak chi atinac sa' li artal. Ut quixye: —Relic chi yal, at Kaçua', at nimajcual Dios, Laät nacatrakoc atin sa' xyalal ut sa' tiquilal, chan. ⁸ Ut li xcá ángel quixhoy li cuan sa' lix sec' sa' xben li sak'e. Ut li sak'e quitikcuo' ru chi us ut quixc'ateb li cristian. Chanchan xtikcual li xam. ⁹ Eb li cristian que'c'ate' xban xtikcual li sak'e. Xban li raylal li yo'queb chixc'ulbal, que'xmajecua li Dios li cuan xcuanquil sa' xbeneb li raylal. Ut inc'a' que'yot'e' xch'oleb chi moco que'xq'ue xlok'al li Dios. ¹⁰ Ut li ro' ángel quixhoy li cuan sa' lix sec' sa' xben lix c'ojaribal li josk' aj xul. Ut chixjunileb li cuanqueb rubel xcuanquil que'cana sa' k'o'jyin. Chixjunileb yo'queb chixtiubal li ru'uj rak'eb xban li raylal yo'queb chixc'ulbal. ¹¹ Ut que'xmajecua li Dios li cuan sa' choxa xban li raylal ut li xox li yo'queb chixc'ulbal. Abanan inc'a' quiyot'e' xch'oleb ut inc'a' que'xcanab xbanunquil li mausilal. ¹² Ut li xcuaq' ángel quixhoy li cuan sa' lix sec' sa' xben li nima' Eufrates. Quichakic li ha' re te'numek' eb li rey li que'chal chak sa' eb li na'ajej li na-el cui' chak li sak'e. ¹³ Ut quicuil oxib li maus aj musik'ej. Yo'queb chi elc sa' re li dragón ut sa' re li josk' aj xul ut sa' re li xcab xul li cuan cuib xxucub, li profeta aj balak'. Li oxib chi maus aj musik'ej, a'an chanchaneb li amoch. ¹⁴ Eb li maus aj musik'ej a'in neque'xbanu sachba ch'olej. Neque'xic yalak bar sa' ruchich'och' chixch'utubanquileb li rey ut eb li tenamit re nak te'pletik sa' eb li cutan nak li nimajcual Dios tapletik riq'uin li josk' aj xul. ¹⁵ Ut lain quicuabi nak li Kaçua' quixye: —Lain tinchalk chi mac'a' sa' xch'oleb li tenamit jo' nak nachal laj elk'. Us xak re li ani nayo'lec re cuoybeninquil ut inc'a' nach'inan xch'ol sa' xpabal. A'an inc'a' taxutanak chicu u nak tinc'ulunk xban nak tic xch'ol, chan. ¹⁶ Ut que'xch'utub eb li rey li oxib chi maus aj musik'ej sa' li na'ajej Armagedón xc'aba' sa' hebreo. ¹⁷ Ut lix cuuk ángel quixhoy sa' ik' li cuan sa' lix sec'. Ut quicuabi jun yo' chak chi atinac sa' lix templo li Dios. Chi cau xyab xcux quixye: —Riq'uin a'in tat'aklok ru li rakba atin sa' xben li ruchich'och'. — ¹⁸ Ut quirepoc li rak' cak ut qui-abic nabal li xyab cux. Quimok li cak. Ut quicuan jun nimla hic. Ma jun cua quinume' junak hic jo' a'an chalen sa' li cutan nak que'yo'obtesic li cristian sa' ruchich'och'. ¹⁹ Li tenamit li k'axal nim xcuanquil quijache'. Oxib jachal qui-el. Ut eb li jun ch'ol chic tenamit quilaje't'ane'. Ut quijultico' re li Dios li mac que'xbanu li tenamit Babilonia. Jo'can nak quixq'ueheb chixtojbil rix lix maq'ueb chi tz'akal xban nak yo' xjosk'il sa' xbeneb. ²⁰ Quilaje'sache' li ch'och' li sutsu sa' ha'. Que'sube' sa' ha'. Ut quilaje't'ane' li ninki tzul. ²¹ Quit'ane' ninki sakbach sa' ruchich'och'. Junk ciento libra ralal li junjunk chi sakbach. Ut que'nak sa' xbeneb li cristian ut que'xmajecua li Dios xban li nimla raylal li yo'queb chixc'ulbal.

17

Li ixk li naxc'ayi rib, a'an retalil li tenamit Babilonia

¹ Ut jun reheb li cuukub chi ángel, li cuanqueb li cuukub chi sec' riq'uineb, quixye cue: —Quim arin. Tinc'ut chacuu jun li ixk li naxc'ayi rib chunchu sa' xben li ha' retalil li nimal tenamit Babilonia li cuan xcuanquil sa' xbeneb nabal chi tenamit. Tinc'ut chacuu li tojba mac li xchal sa' xben li tenamit a'an xban li mausal neque'xbanu. ² Chixjunileb li rey li cuanqueb sa' ruchich'och' neque'cuulac sa' li tenamit a'an chixbanunquil li mausal. Chanchan nak ac xe'caltesic xban li mausal yoqueb chixbanunquil, chan li ángel. ³ Sa' li visión li quixc'utbesi chicuu li Santil Musik'ej, quicuul nak li ángel quinixc'am sa' jun li na'ajej bar mac'a' cuan. Aran quicuul li ixk chunchu chirix jun li josk' aj xul cak rix. Tz'ibanbil nabal li atin chirix re xmajecuanquil li Dios. Cuan cuukub xjolom ut cuan lajeb xxucub. ⁴ Li ixk tikibanbil riq'uin rak' púrpura ut cak. Lix sahub ru li rak' yibanbil riq'uin oro ut tertuquil pec ut riq'uin perla. Cuan chak riq'uin jun li sec' oro nujenak riq'uin li mausal ut li yumbetac co'betac. ⁵ Ut tz'ibanbil sa' lix pequem jun li c'aba'ej mukmu xyalal. A'an a'in li tz'ibanbil: Li nimla tenamit Babilonia a'aneb li neque'c'amoc be chi co'betac yumbetac ut chixbanunquil chixjunil li mausal. ⁶ Ut quicuul li ixk chanchan tacalac xban xquiq'ueleb li ratal xc'ajol li Dios li que'camsic xban. Ut que'camsic ajcui' nabaleb li cristian li que'xch'olob resil li Cristo. Nak quicuul a'an, sachso inch'ol quincana. ⁷ Ut li ángel quixpatz' cue: —¿C'a'ut nak sachso ach'ol xatcana? Lain tinch'olob chacuu li xyalal li mukmu nak xcuan. Tinye acue c'a'ru xyalal li ixk a'an jo' ajcui' li josk' aj xul li yo chi ikanc re. Ut tinye ajcui' acue c'a'ru xyalal lix jolom cuukub ut lix xucub lajeb. ⁸ Li josk' aj xul li xacuul, a'an li quicuan, ut anakcuan ma' ani chic. Abanan taek cui'chic chak sa' li chamal jul ut tasachek' ru chi junaj cua. Ut li jo' q'uaieleb li inc'a' tz'ibanbileb xc'aba'eb chalen sa' xticlajic li ruchich'och' sa' li hu li tz'ibanbil cui' xc'aba'eb li cuanqueb xyu'am chi junelic, eb a'an tasachk xch'oleb chirilbal li josk' aj xul li quicuan chak junxil ut ma' ani chic anakcuan. Abanan tachalk cui'chic. ⁹ Tento nak cuank ana'leb re nak tatau ru lix yalal. Li cuukub chi jolom, a'an retalil li cuukub chi coc' tzul li cuan cui' li tenamit. ¹⁰ Ut retalileb ajcui' li cuukub chi rey. Ob li rey ac xe'cuan ut xe'sache' ruheb, jun cuan anakcuan ut li jun chic toj maji' na-oc sa' xcuanquil. Ut nak taoc, inc'a' najt tabayk. ¹¹ Ut li josk' aj xul li quicuan ut ma' ani chic anakcuan, a'an li xcuaaxak li rey ut xcomoneb rib riq'uineb li cuukub chi rey. A'an tasachek' ru. ¹² Ut li lajeb chi xucub li xacuul, a'an retalileb li lajeb chi rey li te'cuank. Te'xc'ul xcuanquileb chi cuanc chok' rey, rochbeneb li josk' aj xul li cak rix. Abanan inc'a' najt tacuank xcuanquil eb a'an. ¹³ Eb a'in junajak xc'a'uxeb ut te'xq'ue lix cacuilal ut lix cuanquilal re li josk' aj xul. ¹⁴ Eb li rey te'pletik riq'uin li Jun li chanchan carner. Abanan a'an tanumtak sa' xbeneb xban nak a'an li Kacua', li k'axal nim xcuanquil sa' xben chixjunil. Ut a'an li tz'akal rey li nim xcuanquil sa' xbeneb chixjunileb li cuanqueb xcuanquil sa' ruchich'och'. Ut li sic'bileb ru, li tiqueb xch'ol chixtakenquil, te'numtak ajcui' sa' xbeneb li rey, rochbeneb li Jun li chanchan carner.— ¹⁵ Quixye cue li ángel: —Li ha' li xacuul li chunchu cui' li ixk, a'an retalileb li xninkal ru tenamit, a' yal ani xtepaleb xxe'tonil yucua'eb, ut a' yal chanru li ratinobaleb. ¹⁶ Li lajeb chi xxucub li josk' aj xul li xacuul, xic' te'ril li ixk li naxc'ayi rib. Te'xtz'ektana li ixk ut te'xcanab chi mac'a' cuan re. T'ust'u te'xcanab. Te'xtiu lix tibet ut li jo' q'ual chic inc'a' te'xchoy te'xc'at sa' xam. ¹⁷ Li Dios quiq'uehoc re sa' xch'oleb li rey nak jo'can te'xbanu. Jo'can nak junajakeb lix c'a'ux chixq'uebal lix cuanquileb re li josk'

aj xul re nak tatakłank toj tatz'aklok ru li quixye li Dios. ¹⁸ Li ixk li xacuil, a'an retailil li nimla tenamit, li cuan xcuauquil sa' xbeneb chixjunileb li tenamit sa' ruchich'och'.—

18

Nak quisache' ru li tenamit Babilonia

¹ Chirix a'an quicuil jun chic li ángel quicube chak sa' choxa. K'axal nim xcuauquil ut chixjunil li ruchich'och' quicutano' xban lix lok'al. ² Quixjap re chi cau xyab xcux ut quixye: —X-oso' li tenamit Babilonia. Xsache' xcuauquil li nimla tenamit Babilonia. Li tenamit a'an xcana chok' xna'ajeb laj tza ut eb li maus aj musik'ej. Xcana chok' xna'ajeb laj xic'anel xul li k'axal yibeb ru li inc'a' neque'ti'e'. ³ Xsache' xcuauquil xban nak numtajenak li maç neque'xbanu. Chixjunileb li rey li cuanqueb sa' ruchich'och' neque'cuulac Babilonia chixbanunquuil li mausilal riq'uineb. Chanchan calajenakeb xban li mausilal yoqueb chixbanunquuil. Ut eb laj c'ay que'biomo' aran xban nak nabal li c'a'ak re ru que'xc'ayi chi tertó xtz'ak, chan. ⁴ Ut quicuabi jun chic yo chak chi atinac sa' choxa ut quixye: —Ex lalal xc'ajol li Dios, elenkex sa' li tenamit a'an re nak inc'a' textz'akonk riq'uin lix maqueb ut re nak inc'a' textz'akonk riq'uin li raylal li te'xc'ul. ⁵ Xnumta lix maqueb. Chanchan xcuulac toj sa' choxa lix q'uial. Li Dios yo chak chixq'uebal retail lix mausilaleb. ⁶ Che'q'uehek' chixtoj li jo' q'uial li raylal xe'xbanu reheb li jalaneb xtenamit. Chiq'uehek' rekaj li que'xbanu reheb. Ca' sut xq'uial li raylal tabanuk reheb chiru li que'xbanu eb a'an. ⁷ Che'rahobtesik xban nak que'xnimobresi ribeb ut que'xbanu li mausilal. Eb a'an neque'xye, “Lao chanchano li reina. Moco neba'ó ta jo' junak xmalca'an. Lao ma jun cua takac'ul rahil ch'olej,” chanqueb. ⁸ Jo'can nak chiru jun cutan talaje'chalk li raylal sa' xben li tenamit a'an. Tachalk camc, ut yabac ut cue'ej sa' xbeneb. Li tenamit tasachek' ru riq'uin xam xban nak k'axal nim xcuauquil li Kacua' li tarakok atin sa' xbeneb, chan. ⁹ Eb li rey li cuanqueb sa' ruchich'och' li que'cuulac aran Babilonia chixbanunquuil li mausilal rochbened ut que'saho' sa' xch'oleb riq'uineb, tarahok' sa' xch'oleb chirilbal nak yok chi sachec' ru li tenamit. Te'yabak xban xrahil xch'oleb nak te'ril xsibel li tenamit nak yok chi c'atc. ¹⁰ C'ajo' nak te'xucuak chirilbal li c'a'ru tixc'ul li tenamit. Te'xaklik chi najt riq'uin xban xxiuheb ut te'xye: —Tok'ob ru li tenamit Babilonia li nim xcuauquil nak quicuan. Tok'ob ru lix nimal ru tenamit. Chiru jun c'amoc xrake' atin sa' xbeneb.— ¹¹ Eb laj c'ay tarahok' sa' xch'oleb ut te'yabak chirix li tenamit xban nak ma ani chic talok'ok re lix c'ayeb. ¹² Ma ani chic talok'ok re li oro, chi moco li plata, chi moco li çabil pec li tertó xtz'ak, chi moco li perlas. Ma ani chic talok'ok re li çabil t'icr lino, chi moco li púrpura, chi moco li seda, chi moco li escarlata. Ma ani chic talok'ok re li q'uila pay ru chi sununquuil che'. Ut ma ani chic talok'ok re li c'a'ak re ru yibanbil riq'uin marfil, chi moco riq'uin li çabil che', chi moco riq'uin li ch'ich' hierro ut cobre, chi moco li yibanbil riq'uin li pec mármol. ¹³ Ma ani chic talok'ok re li canela, li sununquuil ban, li incienso, li mirra ut li olíbano. Ma ani chic talok'ok re li vino, li acéite, li trigo ut li çabil c'aj. Ut ma ani chic talok'ok re li cuacax, li carner ut li cacuay, chi moco te'xlok' li carruajes, chi moco te'xlok' chic li rech cristianil chok' moseb. ¹⁴ Eb laj c'ay te'xye reheb li tenamit: —Chixjunil li çabil li quera ru, a'an ac xsach cheru. Maç'a' chic le' biomal chi moco eçh'ina'usal. Ma jok'e chic tetau li c'a'ak re ru a'an.— ¹⁵ Ut eb li neque'c'ayin li c'a'ak re ru a'in te'xaklik chi najt riq'uin li tenamit xban xxiuheb nak te'ril li raylal li yokeb chixc'ulbal li tenamit. Eb laj c'ay li que'biomo' xbaneb, te'yabak ut te'xye: ¹⁶ —Tok'obeb ru. Tok'obeb ru li

cuanqueb sa' li nimla tenamit a'an. Junxil que'xtikib ribeb riq'uin li çahbil t'icr lino ut pùrpura ut caki t'icr. Ut que'xq'ue chok' xsahob ru li oro, ut li tertoguil pec ut li perla. ¹⁷ Ut yal chiru junpat x-oso' chixjunil lix biomaleb, cha'akeb. Ut eb laj echal jucub ut eb li neque'xberesi li jucub sa' li palau ut chixjunileb li neque'trabajic sa' li ninki jucub, jo'queb laj c'ay li neque'xic sa' li jucub, que'xakli chi najt chi rilbal. ¹⁸ Ut que'xjap re nak que'ril nak yo çhi c'atc li tenamit ut que'xye: —Ma jun chic tenamit juntak'et riq'uin li tenamit a'in nak quicuan, chanqueb. ¹⁹ Que'xq'ue poks sa' xjolomeb retalil lix rahil xch'oleb ut que'yabac ut que'xjap reheb chixyebal: —jTok'obeb ru! jTok'obeb ru li cuanqueb sa' li tenamit a'an! Riq'uin lix biomaleb li tenamit a'an xobiomo' lao li nococ'anjelac sa' jucub. Ut chiru junpat quisache' ru li tenamit, chanqueb. ²⁰ —Chisahok' sa' ech'ol laex li cuanquex sa' choxa. Laex laj pabanel, laex profeta ut laex apóstol, chisahok' taxak sa' ech'ol xban nak li Dios xrakoc atin sa' xbeneb sa' ec'aba' laex, chan li yo çhak chi atinac sa' choxa. ²¹ Ut jun li ángel cau rib quixchap jun li nimla pec, chanchan li nimla pec li neque'rocsi re li molino, ut quixcut sa' li palau ut quixye: —Jo' nak xsach li pec a'in sa' li palau, jo'can ajcui' nak tasachek' ru li tenamit Babilonia. Inc'a' chic tailek' ru. ²² Inc'a' chic taabik sa' li tenamit a'an lix yab li cuajb chi moco lix yab li arpa, chi moco li xyab li xolb ut li trompeta. Ut inc'a' chic tecuank sa' li tenamit a'an li neque'xnau trabajic chi us riq'uin li c'a'ak re ru, ut inc'a' chic taabik xyab junak molino sa' li tenamit a'an. ²³ Inc'a' chic tailmank junak xam sa' li tenamit a'an. Ut inc'a' ajcui' taabik xyab xcuxeb li neque'saho' sa' xch'oleb sa' junak sumlac. Te'xc'ul chi jo'can xban nak eb laj c'ay li que'cuan sa' li tenamit a'an que'xnimobresi ribeb, ut riq'uin li tulac que'xbanu, que'xbalak'i chixjunileb li tenamit.— ²⁴ Sa' ajcui' li tenamit a'an que'camsic li ralal xc'ajol li Dios ut eb li profeta. Li tenamit a'an quic'amoc be chiruheb li tenamit sa' ruchich'och' chixcamsinquileb laj pabanel yalak bar.

19

Li lok'oninc li que'xbanu sa' choxa

¹ Chirix chic a'an quicuabi nak nabaleb que'ec'an sa' choxa. Chi cau xyab xcuxeb yoqueb chixyebal: —Aleluya. Lok'oninbil taxak li Kaçua'. Li kaDios, a'an li nacoloc. A'an li k'axal nim xcuanquil ut xc'ulub nak talok'onik. ² A'an tic xch'ol chi rakoc atin sa' xyalal. A'an xrakoc atin sa' xben li nimla tenamit li chanchan jun li ixk naxc'ayi rib. Xban nak numtjenak lix mausilal, a'an quipo'oc ruheb li tenamit li cuanqueb sa' ruchich'och'. Li Dios xq'ueheb chixtojbaleb rix lix maqueb xban nak que'xcamsi nabaleb laj c'anjel chiru.— ³ Ut que'xye cui'chic: —Aleluya, lok'oninbil taxak li Dios. Lix sibel li tenamit a'an tatakek' chi junelic k'e cutan nak yok chi c'atc.— ⁴ Ut li çahib xca'c'al li c'ojc'o'queb sa' xc'ojaribaleb jo'queb ajcui' li çahib li yo'yo'queb li chanchaneb ángel que'xcuik'ib ribeb ut que'xlok'oni li Dios li c'ojc'o sa' li lok'laj c'ojaribal ut que'xye: —Lok'oninbil taxak li Kaçua'. Jo'can taxak, chanqueb. ⁵ Ut quicuabi jun yo çhak chi atinac sa' li lok'laj c'ojaribal ut quixye: —Chelok'onihak li kaDios chejunilex laex li nequexc'anjelac çiru. Chelok'onihak li Kaçua' laex li nequexucua ru, laex li cuan ecuanquil jo' ajcui' li maç'a' ecuanquil.— ⁶ Ut quicuabi cui'chic xyab xcuxeb nabaleb li cuanqueb sa' choxa. Chanchan xyab lix cau ok li palau ut chanchan nak namok li çak. Que'xye: —Aleluya. Li Kaçua' li nimajcual Dios, a'an cuan sa' xcuanquil. ⁷ Chisahok' taxak sa' kach'ol. Chikaq'ue xlok'al li Kaçua' xban nak xcuulac xk'ehil lix sumlajic li jun li chanchan carner. Li ixakilbej ac xcauresi

rib. ⁸ Quic'uehe' li chabil lino re xtikibanquil rib. Sak ru li rak' ut nalemtz'un. Li saki lino a'an retalil lix tiquilal xch'oleb li ralal xc'ajol li Dios.—⁹ Ut li ángel quixye cue: —Tz'iba retalil a'in: Us xak reheb li bokbileb chixnink'equil lix sumlajic li Jun li chanchan carner. Ut quixye ajcui' cue: —A'in ratin li Dios ut tz'akal yal, chan. ¹⁰ Lain quincuik'ib cuib chiru chixlok'oninuil. Ut a'an quixye cue: —Mabanu a'an. Lain yal aj c'anjelin chiru li Dios jo' laot, ut jo' eb ajcui' la cuech aj pabanelil, li neque'xpab li xyalal li quixch'olob li Jesús. Li Dios, a'an li talok'oni, chan cue, xban nak li quixch'olob li Jesús, a'an ajcui' li musik'anbil reheb li profeta.

Li Jun li chunchu chirix jun li cacuay sak rix

¹¹ Ut teto li choxa nak quicuul. Quicuul jun li cacuay sak rix. Ut lix c'aba' li c'ojc'o chirix li cacuay, a'an "Tz'akal Dios" ut "Tic Xch'ol", xban nak a'an sa' tiquilal tarakok atin ut sa' tiquilal tapletik. ¹² Lix nak' ru chanchan xam. Nabal li corona cuan sa' xjolom ut tz'ibanbil lix c'aba' chiru. Abanan ma ani nata'oc ru. Ca'aj cui' a'an. ¹³ Cuan quic' chiru li rak' ut lix c'aba' a'an "Ratin li Dios". ¹⁴ Nabaleb li cuanqueb sa' choxa yoqueb chi takenc re. Tiktoqueb riq'uin li saki t'icr lino ut sak ru. Yoqueb chi xic chirix li cacuay sakeb rix. ¹⁵ Li Tic Xch'ol cuan jun li k'esnal ch'ich' sa' re, re xsachbal xcuanquileb li xninkal ru tenamit. Cau tatak'lan sa' xbeneb. Chanchan riq'uin jun xuk' ch'ich' tixtaklaheb. Chanchan nak nayatz'e' li ru li uvas nak tarakok atin sa' xbeneb riq'uin xjosk'il li Dios. ¹⁶ Tz'ibanbil xc'aba' chiru li rak' ut chiru li ra'. A'an a'in lix c'aba': Li Rey li k'axal nim xcuanquil sa' xbeneb chixjunileb li rey. Li Kacua', li k'axal nim xcuanquil sa' xbeneb chixjunileb li neque'taklan. ¹⁷ Ut quicuul jun li ángel xakxo chiru li sak'e. Chi cau xyab xcux yo chi atinac riq'uin eb chixjunileb laj xic'anel xul li neque'ti'oc tib, li yoqueb chi rupucic chiru choxa. Quixye reheb: —Quimkex. Ch'utubomak erib chi cua'ac sa' li nink'e li ac xcauresi li Dios. ¹⁸ Quimkex ut tiuhomakeb lix tibeleb li rey li cuanqueb sa' ruchich'och' jo' ajcui' lix tibeleb li neque'taklan sa' xbeneb li soldado. Tiuhomakeb xtibeleb li cauheb rib jo'queb ajcui' li cacuay ut eb li cuink li neque'xic chirixeb. Tiuhomakeb xtibeleb chixjunileb, jo' li lok'bil chi c'anjelac jo' ajcui' li inc'a' lok'bil, jo' li cuanqueb xcuanquil ut jo' ajcui' li mac'a'eb xcuanquil.—¹⁹ Quicuul ru li josk' aj xul ut eb li rey li cuanqueb sa' ruchich'och' rochbeneb li soldado li neque'c'anjelac chiruheb. Que'xch'utub rib re te'pletik riq'uin li Tic Xch'ol li cuan chirix li cacuay sak rix rochbeneb li neque'taken re. ²⁰ Li josk' aj xul quichape' xban li Tic Xch'ol li cuan chirix li cacuay sak rix ut quichape' ajcui' li profeta aj balak', li quixbanu li sachba ch'olej sa' xc'aba' li josk' aj xul. Riq'uin li sachba ch'olej quixbanu quixbalak'i nabaleb li tenamit chixc'ulbal li retalil li josk' aj xul ut que'xlok'oni lix jalom uch. Chi xcabichaleb li josk' aj xul ut li profeta aj balak' que'cute' chi yo'yoqueb sa' li xxamlel li azufre li chanchan nimla palau. ²¹ Ut li jun ch'ol chic li neque'c'anjelac chiru li josk' aj xul que'sache' ruheb riq'uin li k'esnal ch'ich' li cuan sa' re li Tic Xch'ol li cuan chirix li cacuay sak rix. Ut chixjunileb laj xic'anel xul li neque'ti'oc tib que'nujac xsa'eb riq'uin xtibeleb li jo' q'ual que'cam.

20

Li jun mil chihab

¹ Quicuul jun chic li ángel yo chak chi cubec sa' choxa. Cuan chak sa' ruk' xlahuil li nimla chamal jul jo' ajcui' jun li nimla cadena. ² Quixchap li dragón. A'an li c'anti' li ac cuan ajcui' chak najter. A'an laj tza. Satanás nayeman

re. Nak quixchap, quixbac' ut quixcanab chi bac'bo chiru jun mil chihab. ³ Quixcut sa' li nimla chamal jul ut quixtz'ap xben ut quixq'ue jun sello chiru re nak inc'a' chic tixbalak'ihab li tenamit chiru li jun mil chihab. Chirix a'an taach'abak. Abanan inc'a' najt taçuank. ⁴ Ut quicuileb li c'ojaribal li que'c'ojla cui' li que'q'uehe' xcuanquil chi rakoc atin. Que'cuil li que'camsic xban nak que'xch'olob resil li Jesús ut xban nak que'xch'olob ratin li Dios. Inc'a' que'xlok'oni li josk' aj xul chi moco lix jalām uch. Ut inc'a' quiq'uehe' retalil li xul sa' xpequemeb chi moco chi ruk'eb. Que'cuacli cui'chic chi yo'yo ut que'cuan xcuanquil rochbeneb li Cristo chiru jun mil (1,000) chihab. ⁵ A'an a'in li xben cuaclijiqueb li camenak chi yo'yo. Ut eb li camenak jun ch'ol chic inc'a' que'cuacli chi yo'yo toj tatz'aklok ru li jun mil chihab. ⁶ Us xak reheb li te'tz'akonk sa' li xben cuaclijiqueb li camenak chi yo'yo. A'aneb li ralal xc'ajol li Dios. Ut lix cab li camc, mac'a'ak chic xcuanquil sa' xbeneb. A'anaheb chic li te'anjelak chiru li Dios ut chiru li Cristo chok' aj tij. Ut te'çuank xcuanquileb rochben li Cristo chiru jun mil chihab.

Quisache' xcuanquil laj tza

⁷ Nak acak xnume' li jun mil chihab, taach'abak laj tza ut taēlk sa' li nimla chamal jul li tz'aptz'o cui'. ⁸ Ut taxic sa' chixjunil li ruchich'och' chixbalak'inquileb li tenamit yalak bar jo' li cuanqueb aran Gog ut Magog. Ut tixch'utubeb re nak te'pletik. K'axal nabalakeb jo' xq'uial li coc' ru li samaib li cuan chire li palau. ⁹ Yalak bar sa' ruchich'och' te'chalk chi pletic ut te'xsut li tenamit li raro xban li Dios li cuanqueb cui' li ralal xc'ajol. Li Dios tixtakla chak li xam sa' choxa ut tixsach ruheb chixjunileb li xic' neque'iloc re. ¹⁰ Ut laj tza li quibalak'in reheb taçutek' sa' xxamlel li azufre li chanchan nimla palau li cuanqueb cui' li josk' aj xul ut li profeta aj balak'. Ut aran te'rahobtesik chi k'ek chi cutan chi junelic k'e cutan.

Nak tarakek' atin sa' roso'jic li ruchich'och'

¹¹ Ut quicuil jun li saki c'ojaribal. Ut li Jun li chunchu aran k'axal nim xcuanquil. Xban xnimla xcuanquil, mac'a' chic li ruchich'och' ut mac'a' chic li choxa. Que'sach chi junaj cua nak quicuil. ¹² Ut que'cuil chixjunileb li camenak, jo' nink jo' coc', xakxoqueb chiru li chunchu sa' li c'ojaribal. Ut que'teli li hu li tz'ibanbil cui' lix yehom xbanuhomeb. Ut quitehe' ajcui' li hu li tz'ibanbil cui' xc'aba'eb li cuanqueb xyu'am chi junelic. Ut quirake' atin sa' xbeneb li camenak a' yal chanru lix yehom xbanuhomeb jo' tz'ibanbil retalil sa' li hu. ¹³ Chixjunileb li camenak cuanqueb aran, jo' eb li que'cam sa' ha' jo'queb ajcui' li que'muke'. Quirake' atin sa' xbeneb chixjunileb a' yal chanru lix yehom xbanuhomeb. ¹⁴ Ut quisache' xcuanquil li camc, ut quisache' ajcui' li na'ajej li neque'xic cui' li camenak. Que'cute' sa' li xam li chanchan palau. Li xam a'an, a'an li xcab camc. ¹⁵ Ut li ani inc'a' quita'e' xc'aba'eb sa' li hu li tz'ibanbil cui' xc'aba'eb li cuanqueb xyu'am chi junelic, a'aneb li que'cute' sa' li xam li chanchan palau.

21

Li Ac' Jerusalén

¹ Ut quicuil ajcui' jun ac' choxa ut jun ac' ruchich'och' xban nak li xben choxa ut li xben ruchich'och' mac'a' chic. Ac xsache'. Ut mac'a' chic li palau. ² Ut quicuil nak yo' chak chi cubec sa' choxa cuan cui' li Dios li santil tenamit, li Ac' Jerusalén. C'ajo' xch'ina'usal. Chanchan jun li ixakilbej tikibanbil chi chabil xban nak oc re chi sumlac. ³ Ut quicuabi jun yo' chak chi atinac cuan cui' li c'ojaribal ut quixye chi cau xyab xcux: —Anakuan taçuank li Dios

riq'ueib li cristian. A'anakeb li ralal xc'ajol. Li Dios taçuank riq'ueib. A'anak lix Dioseb. ⁴ Maç'a'ak chic rahil ch'olej. Maç'a'ak chic li camc chi moco li yabac chi moco li yot'ec', chi moco li raylal xban nak chixjunil li c'a'ak re ru a'an, ac xelaje'nume'.—⁵ Li c'ojc'o sa' li c'ojaribal quixye: —Lain tinac'obresi chixjunil li c'a'ak re ru. Ut quixye ajcui': —Tz'iba retalil a'in xban nak li a'tin a'in tz'akal ya' ut us xpabanquil. ⁶ Ut quixye cue: —Xtz'akloc ru chixjunil. Lain li Alfa ut li Omega. Lain ting'ue chi ma'tan li yu'am chi junelic re li ani taraj jo' nak taq'uehek' chi uc'ac li ani taçhakik re. ⁷ Li ani tixcuy xnumsinquil li raylal ut inc'a' tach'inank xch'ol sa' lix pabal, a'an tareçhani chixjunil li c'a'ak re ru a'in. Lainak lix Dios ut a'anak li cualal inc'ajol. ⁸ Abanan li c'a'ru te'reçhani li inc'a' useb xna'leb, a'an li xxamlel li azufre li chanchan palau, a'an lix na'ajeb li neque'xucuac, ut eb li inc'a' neque'paban, ut eb li que'xmux ru lix pabaleb, ut eb li neque'xcamsi ras ritz'in, ut eb laj co'bet laj yumbet, ut eb laj tul, ut eb li neque'lok'onin jалан dios, jo'queb ajcui' laj tic'ti'. Li c'a'ru te'reçhani eb a'an, a'an li xcab camic nak te'cutek' sa' li xam.—⁹ Quichal jun reheb li cuukub chi ángel li que'cuan li cuukub chi sec' riq'ueib, li cuan cui' li cuukub chi raylal li que'xc'ul sa' roso'jic, ut quixye cue: —Quim. Tinc'ut chaçuu li ixk li taçsumlak cui' li Jun li chanchan carner, chan. ¹⁰ Riq'uin xcuauquil li Santil Musik'ej, xinixc'am sa' xben jun li nimla tzul najt xteram ut quixc'ut chicuu li santil tenamit Jerusalén, yo çhak chi cubec sa' choxa riq'uin li Dios. ¹¹ Lix lok'al li Dios cuan riq'uin. C'ajo' xch'ina'usal. Chanchan jun li tertuquil pec jaspe. K'axal xchak'al ru ut nalemtz'un jo' li lem. ¹² Li tenamit sutsu sa' jun nimla tz'ac najt xteram ut cuan cablaju li oquebal. Cablaju chi ángel cuanqueb sa' eb li oquebal. Chiru li oquebal tz'ibanbil retalileb li xc'aba'eb li cablaju xtepaleb li ralal xc'ajol laj Israel. ¹³ Oxib li oquebal cuan sa' li norte, oxib cuan sa' li sur, oxib cuan bar na-el cui' li sak'e ut oxib cuan bar na-oc cui' li sak'e. ¹⁴ Cablaju li pec li qui-oc chok' xcimiento li tz'ac li sutsu cui' li tenamit. Ut chiruheb a'an tz'ibanbil retalileb lix c'aba'eb li cablaju chi apóstol li que'c'anjelac chiru li Jun li chanchan carner. ¹⁵ Li ángel li quiatnac cuiq'uin cuan jun lix bisleb riq'uin yibanbil riq'uin oro re xbisbal li tenamit ut li oquebal jo' ajcui' li tz'ac. ¹⁶ Ça xucut li tenamit nak quicuul. Lix nimal rok juntak'et riq'uin xnimal ru. Li ángel quixbis li tenamit riq'uin lix bisleb. Cuib mil kilómetro riq'uin cuib ciento kilómetro lix bisbal. Juntak'et xbisbal li rok, li ru ut lix teram. ¹⁷ Chirix a'an quixbis li tz'ac li sutsu cui' li tenamit. Lix bisbal a'an ob xçac'al metro (65). Li ángel quixbis li tz'ac jo' neque'bisoc sa' ruchich'och'. ¹⁸ Li tz'ac yibanbil riq'uin li çabil pec jaspe. Li tenamit yibanbil riq'uin tz'akal oro. Nalemtz'un. Chanchan lem. ¹⁹ Li pec li qui-oc chok' xcimiento li tenamit cuan xsahob ru yibanbil riq'uin q'uila pay ru chi tertuquil pec. Li xben pec, a'an li çabil pec jaspe; lix cab, a'an zafiro; li rox, a'an ágata; li xça, a'an esmeralda. ²⁰ Li ro', a'an ónice; li xcuak, a'an cornalina; li xcuuk, a'an crisólito; li xcuakxak, a'an berilo; ut li xbele, a'an topacio; li xlaje, a'an crisopraso; li xjunlaju, a'an jacinto; ut li xcablaju, a'an amatista. ²¹ Li cablaju chi oquebal, yibanbibleb riq'uin cablaju chi tertuquil perla, jun sa' li junjunk chi oquebal. Eb li be sa' li tenamit yibanbibleb riq'uin tz'akal oro. Nalemtz'un. Chanchan lem. ²² Quicuul nak sa' li tenamit a'an maç'a' lix templo li Kaçua' bar te'xic li tenamit chi lok'oninc. Maç'a' chic aj e xban nak li Kaçua' li k'axal nim xcuauquil cuan aran riq'ueib chi junelic. Ut cuan ajcui' aran li Jun li chanchan carner. ²³ Maç'a' li sak'e aran ut maç'a' li po xban nak li Dios cuan aran ut lix lok'al li Dios nacutanobresin re. Ut lix lok'al li Jun li chanchan

carner nacutanobresin re li tenamit. ²⁴ Eb li nxĩnk'al ru tenamit li te'colek', te'cuank sa' cutan saken. Ut eb li que'cuan xlok'al sa' ruchich'och', eb a'an te'xq'ue xlok'al li tenamit. ²⁵ Eb li oquebal inc'a' te'tz'apek' xban nak junelic cutanak. Maç'a'ak k'ojoyin. ²⁶ Eb li que'cuan xlok'al sa' ruchich'och' te'xq'ue xlok'al li tenamit. ²⁷ Li ani cuanqueb xmaç inc'a' taruk te'oc aran. Eb li neque'xbanu mausilal chi moco li neque'tic'ti'ic, te'oc sa' li tenamit a'an. Li ani te'oc aran, ca'aj cui' li tz'ibanbileb xc'aba' sa' lix hu li Jun li chanchan carner, li hu li tz'ibanbil cui' xc'aba'eb li cuanqueb xyu'am chi junelic.

22

¹ Ut li ángel quixc'ut chicuu li nima' li naq'uehoc yu'am chi junelic. Li ha' sak sak ru. Chanchan lem. Na-el chak cuan cui' lix lok'laj c'ojaribal li Dios ut li Jun li chanchan carner. ² Li nima' a'an nanume' sa' xyi li tenamit. Chire li nima' xca' pac'alil cuan li che' retalil li junelic yu'am. Cablaju pay li ru naxq'ue ut rajlal po nauchin. Lix xak nac'anjelac re xq'uebal xcacuillaleb lix nĩnk'al ru tenamit. ³ Aran maç'a'ak chic mausilal. Lix lok'laj c'ojaribal li Dios taçuank aran ut taçuank ajcui' lix lok'laj c'ojaribal li Jun li chanchan carner. Ut eb laj c'anjel chiru te'lok'onjnk re. ⁴ Eb a'an junelic yokeb chirilbal ru ut tz'ibanbilak lix c'aba' sa' xpequemeb. ⁵ Aran maç'a'ak chic k'ojoyin. Jo'can nak inc'a' chic tac'anjelak reheb li sak'e chi moco li candil. Li Kaçua' Dios, a'an chic li taçutanobresink reheb. Ut te'cuank aran chi k'axal sa sa' xch'oleb. Chanchanakeb chic rey.

Nak taçhalk cui'chic li Jesucristo

⁶ Ut li ángel quixye cue: —Eb li atin a'in tz'akal yal ut us xpabanquil. Li Kaçua' Dios li nac'utbesin chiruheb lix profeta c'a'ru te'xye, a'an xtakla chak lix ángel chixc'utbal chiruheb laj c'anjel li c'a'ru taç'ulmank chi seb.— ⁷ Li Jesús quixye: —Q'uehomak retal. Chi seb tinchalk lain. Us xak re li ani naxc'ula sa' xch'ol li atin li tz'ibanbil sa' li hu a'in chirix li c'a'ru talajc'ulmank mokon, chan. ⁸ Lain laj Juan li quin-abin ut quin-iloc re chixjunil li c'a'ak re ru a'in. Nak acak xcuabi ut nak acak xcuil, quincui'ib cuib chiru li ángel li quic'utuc chicuu chixjunil li c'a'ak re ru a'in re raj xlok'oninquit. ⁹ Abanan li ángel quixye cue: —Mabanu chi jo'can. Minalok'oni. Lain yal aj c'anjelin jo' laät, jo'eb ajcui' li profeta la cuech aj pabanelil, jo'queb ajcui' li neque'paban re li atin li tz'ibanbil sa' li hu a'in. A' li Dios, a'an li taç'ok'oni ru, chan. ¹⁰ Ut quixye ajcui' cue li ángel: —Mamuk chiruheb li tenamit li xyalal li tz'ibanbil sa' li hu a'in. Mamuk chiruheb li c'a'ru taç'ulmank xban nak cuulac re xk'ehil nak taç'ulmank li c'a'ru tz'ibanbil sa' li hu a'in. ¹¹ Li ani yok chixbanunquit li mausilal, xbanuhak li mausilal. Ut li ani yok chi maçobc, xbanuhak li maç. Li ani tic xch'ol, yok chixbanunquit li tiçuilal. Li ani santobresinbil, chicuank sa' santilal.— ¹² —Q'uehomak retal, chan li Jesús. —Lain chi seb tinchalk ut tinc'am chak le k'ajcamunquit. Tinq'ue xk'ajcamunquit li junjnk a' yal chanru lix yehom xbanuhom. ¹³ Lain li Alfa ut li Omega. Lain ac cuanquin chak sa' xtiçlajic li ruchich'och' ut cuankin ajcui' sa' roso'jic.— ¹⁴ Us xak reheb li cuybil sachbil xmaçueb xban li Dios, xban nak eb a'an taruk te'xtzaca li ru li che' li retalil li junelic yu'am. Ut te'oc ajcui' sa' li oquebal re li tenamit. ¹⁵ Abanan li inc'a' useb xna'leb inc'a' taruk te'oc sa' li tenamit a'an, chi moco laj tul, chi moco laj co'bet laj yumbet, chi moco li neque'xcamsi ras ritz'ineb ut eb li neque'lok'onin jalanil dios jo'queb ajcui' li neque'cuulac chiru balak'ic ut tic'ti'ic. ¹⁶ Ut li Jesús quixye: —Lain xintakla lin ángel acuiq'uin re nak taç'olob li xyalal a'in reheb laj pabanel. Lain li chanchanin xtux li che'. Quinyo'la sa' xyankeb li ralal xc'ajol li rey

David. Lain chanchanin li cak chahim li nalemtz'un chak toj ek'ela, chan li Jesús. ¹⁷ Li Santil Musik'ej ut li ixakilbej neque'xye: —Chalkex.— Li ani taabink re li atin a'in, chixyehak ajcui' —chalkex.— Li ani taraj ruc'bal li ha', li retalil li junelic yu'am, chichalk chi uc'ac chi matan. ¹⁸ A'an a'in li tinye re li ani taabink reheb li atin li tz'ibanbil sa' li hu a'in chirix li tac'ulmank mokon: Cui ani tixq'ue xtz'akob li atin a'in, li Dios tixq'ue li raylal sa' xben jo' tz'ibanbil retalil sa' li hu a'in. ¹⁹ Ut cui ani tarisi junak reheb li atin li tz'ibanbil sa' li hu a'in, taisik lix c'aba' xban li Dios sa' li hu li tz'ibanbil cui' lix c'aba'eb li cuanqueb xyu'am chi junelic. A'an inc'a' tac sa' li santil tenamit, chi moco tacuanik lix yu'am chi junelic jo' tz'ibanbil retalil sa' li hu a'in. ²⁰ Li Jesús li nach'oloban xyalal li c'a'ak re ru a'in naxye: —Relic chi yal chi seb tinchalk.— Jo'can taxak. Chalkat, at Kacua' Jesús. ²¹ A' taxak li usilal li naxq'ue li Kacua' Jesucristo chicuank eriq'uin chejunilex laex laj pabanel. Jo'can taxak.